


El Nuevo Testamento
en nahuatl de
Tetelcingo



New Testament in Nahuatl, Tetelcingo (MX:nhg:Nahuatl,
Tetelcingo)

El Nuevo Testamento en nahuatl de Tetelcingo
New Testament in Nahuatl, Tetelcingo (MX:nhg:Nahuatl, Tetelcingo)

copyright © 1980 Wycliffe Bible Translators, Inc.

Language: Nahuatl, Tetelcingo

Translation by: Wycliffe Bible Translators, Inc.

Náhuatl, Tetelcingo [nhg], Mexico

Copyright Information

© 1980, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Nahuatl, Tetelcingo

© 1980, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files dated 29 Jan 2022

03771ce6-e402-5a23-8b38-f25c82864faf

Contents

Mateo	1
Mórcos	54
Lucas	87
Juan	142
Hechos	184
Romanos	238
1 Corintios	260
2 Corintios	281
Gálatas	296
Efesios	304
Filipenses	312
Colosenses	318
1 Tesalonicenses	324
2 Tesalonicenses	329
1 Timoteo	332
2 Timoteo	339
Tito	343
Filemón	346
Hebreos	347
Santiöco	364
1 Piero	370
2 Piero	377
1 JUAN	381
2 Juan	387
3 Juan	388
Judas	389
Apocalipsis	391

Cuale Tlamachestelestle tli oquejcuelo SAN MATEO

Tiebiebetcöhua de totie Jesucristo

¹ Nönca tlapoale de tiebiebetcöhua de Jesucristo, öque iloac iconie David, hua iconie Abraham.

² Abraham oyeya tajtle de Isaac, hua Isaac oyeya tajtle de Jacob, hua Jacob oyeya tajtle de Judá hua noche icnihua. ³ Hua Judá oyeya tajtle de Fares hua Zara, hua innöntzi de yejua yaja Tamar. Hua Fares oyeya tajtle de Esrom, hua Esrom oyeya tajtle de Aram. ⁴ Hua Aram oyeya tajtle de Aminadab, hua Aminadab oyeya tajtle de Naasón, hua Naasón oyeya tajtle de Salmón. ⁵ Hua Salmón oyeya tajtle de Booz, hua inöntzi Booz yaja Rahab. Hua Booz oyeya tajtle de Obed, hua inöntzi Obed yaja Rut. Hua Obed oyeya tajtle de Isaí. ⁶ Hua Isaí oyeya tajtle de inu rey David.

Hua David oyeya tajtle de Salomón, hua inöntzi Salomón yaja öque oyeya isohua de Urías. ⁷ Hua Salomón oyeya tajtle de Roboam, hua Roboam oyeya tajtle de Abías, hua Abías oyeya tajtle de Asa. ⁸ Hua Asa oyeya tajtle de Josafat, hua Josafat oyeya tajtle de Joram, hua Joram oyeya tajtle de Uzías. ⁹ Hua Uzías oyeya tajtle de Jotam, hua Jotam oyeya tajtle de Acáz, hua Acáz oyeya tajtle de Ezequías. ¹⁰ Hua Ezequías oyeya tajtle de Manasés, hua Manasés oyeya tajtle de Amón, hua Amón oyeya tajtle de Josías. ¹¹ Hua Josías oyeya tajtle de Jeconías hua icnihua, cuöc uyajque inu israelitas de priesos ompa Babilonia.

¹² Hua sötiepa de cuöc uyajque ca Babilonia, Jeconías omochi tajtle de Salatiel, hua Salatiel oyeya tajtle de Zorobabel. ¹³ Hua Zorobabel oyeya tajtle de Abiud, hua Abiud oyeya tajtle de Eliaquim, hua Eliaquim oyeya tajtle de Azor. ¹⁴ Hua Azor oyeya tajtle de Sadoc, hua Sadoc oyeya tajtle de Aquim, hua Aquim oyeya tajtle de Eliud. ¹⁵ Hua Eliud oyeya tajtle de Eleazar, hua Eleazar oyeya tajtle de Matán, hua Matán oyeya tajtle de Jacob. ¹⁶ Hua Jacob oyeya tajtle de Josie, öque uya inömec María öque tietlöcatele Jesús, öque tietucöyutejque Cristo.

¹⁷ Ejqueu cate catorce generaciones desde Abraham hasta David, hua nuyejque cate catorce generaciones desde David hasta cuöc uyajque ca Babilonia, hua nuyejque cate catorce generaciones desde cuöc uyajque ca Babilonia hasta cuöc otlöcatihuac Cristo.

Quiene otlöcatihuac Jesucristo

¹⁸ Ejqueyi uya quiene ca otlöcatihuac Jesucristo. Oyeya sente sisehuanu itucö María öque sötiepa uyesquea tienönajtzi. Yaja hua Josie ye omocomprometierojque para monömetisque. Pero antes de mosietelisque, María omoutztlöle por medio de Espíritu Sönto. ¹⁹ Hua Josie, öque uyesquea inömec, yectec tlöcatl oyeya, hua amo oquenequeya quepejpinöjtis. Por inu oquepensöro quecajcohua sa ichtacajtzi. ²⁰ Hua cuöc yaja quepensörojtaya ini nönca söstantle, ohuöla sente öngel tli cualtitlanque Tlöcatzintle. Inu öngel moniexte ipa icochtiemequeles Josie, hua oquelfe:

—Josie, öque teca teiconie David, amo xomomajte para tecönas María mosohua. Pues inu peltzintle tli quetlöcatelis, de Espíritu Sönto icaca. ²¹ Hua quetlöcatelis peltzintle oquechtle, hua tectucöyutis *Jesús, ipampa yaja quemöquextis ipuieblo de itlajtlacul.

²² Noche ini nönca opasöre para ma mochihua tli oquejtojque Tlöcatzintle por icamacopa tlayulepante:

²³ Xequajtacö, que sisehuanu moutztlölis, hua quetlöcatelis sente peltzintle oquechtle,

* **1:21** “Jesús” quejtusneque “Tiemöquextiöne” ca hebreo.

hua yejua quecuitisque Emanuel,
que quejtusneque: Deus iloac ca tejua.

²⁴ Cuöc otlachix Josie de ipa icocheles, oquechi san quiene ca oquenahuate inu öngel de Tlöcatzintle. Oquesele isohua María, ²⁵ pero amo itlac omotiecac hasta senamo oquetlöcatele peltzintle hua oquecuite Jesús.

2

Quiene tietlajpaluto tlajmatque

¹ Otlöcatihuac Jesús ipa puieblo de Belén ipan tlöle de Judea cuöc oyeya rey yaja Herodes. Hua ohuöläjque seque tlajmatque noso magos desde ca cöne quisa tunale hasta por inu ciudad de Jerusalén. ² Hua oquejtojque:

—¿Cöne icaca inu peltzintle tli otlöcat para iyey rey de joriojte? Pues isitlal otequejtaque desde ca ompa ca cöne quisa tunale, hua otehuöläjque otecmabesutico.

³ Hua cuöc oquecac ini nönca inu rey Herodes, omotequepacho lalebes, hua noche giente de Jerusalén nuyejque motequepachojque. ⁴ Hua oquensentlöle noche jefes de teopexcötzetzi ca tiehua tlamachtiöneme tli quemachtiöya teotlajtule ca inu puieblo. Hua oquentlajtlane cöne noso tlöcates inu Cristo öque Deus oquixpejpenque. ⁵ Hua yejua oquelfejque:

—Tlöcates ipa puieblo de Belén ca necö ipan tlöle de Judea. Pues ejqueu tlajcuelulpanca por inu tlayulepante:

⁶ Taja, Belén de inu tlöle de Judea, amo lalebes tetzitzequetzi tecaca intzölö tlötlajtoönejme de Judá;

pues de taja quisas sente tlayecönque, tli quemixutis hua quentlacualtis nopuieblo Israel.

⁷ Yecuöquenu Herodes sa ichtajcajtzti oquemennutz inu magos, hua oquentlajtlane exactamente quiejquech tunalte quepeaya desde que onies inu sitlale. ⁸ Sötiepa oquentitla ca Belén, hua oquemelfe:

—Keyöcö ompa, hua xetlajtlanecö ca nobeyo por inu peltzintle. Hua sötiepa de cuöc ye nenqueniextejque, xeniechmacheistique, para nuyejque naja neyös necmabesutiti.

⁹ Hua yejua, cuöc oquecajque inu rey, uyajque. Hua necö inu sitlale tli oquejtaque cöneca quisa tunale, oquenyecöntöya hasta cuöc aseto, hua omoquetz icpac cöne oyeya peltzintle. ¹⁰ Hua cuöc oquejtaque sitlale, oquepexque lalebes bieye pöquelestle.

¹¹ Hua ocalajque ipan chöntle, hua oquejtaque peltzintle ca inöntzi María. Hua omotlancuöquetzque, hua oquemabesutejque. Hua ocönque de inricoju, hua oquemacaque tietlöcolestle de oro, hua copale, hua pajtle pateyo que itucö mirra. ¹² Hua Deus oquennahuatejque ipa incochtiemequeles ma ayecmo yöcö ca itlac Herodes. Entunses uyajque para ca inchö ca pa ocsente ojtle.

Quebicaque peltzintle Jesús pa Egipto

¹³ Hua cuöc uyajque yejua, ohuöla sente öngel de Tlöcatzintle hua omoniexite ipa incochtiemequeles Josie. Oquelfe:

—Xemiehua, hua xecöna peltzintle ca tiehua inöntzi, hua xecholo pa Egipto. Hua ompa xeya hasta senamo naja temetzelfis. Pues inu Herodes quetiemus peltzintle para quemectis.

¹⁴ Hua cuöc yaja otlachix, ucö peltzintle ca tiehua inöntzi ca yohuale, hua uyajque ca Egipto. ¹⁵ Hua ompa oyejyeya hasta senamo omec Herodes. Ini nönca opasöre para ma mochihua tli oquejtojque Tlöcatzintle por icamacopa tlayulepante, cuöc oquejto: “Nectzajzele noConie ma quisa de Egipto”.

Herodes tlamandöro ma quenmejmecticö pelantzetzti

¹⁶ Yecuöquenu Herodes omomacac cuenta de que inu magos omoburlörojque de yaja. Entunses ocualö lalebes, hua otlatitla ma quenmejmecticö noche pelantzetzti oquechte tli cate ipa Belén hua noche puieblos tli ca ompa cate. Otlamandöro ma quenmejmecticö tli quepeaya desde ume xebetl para ca tlatzintla, según quiene oquemat de queiejquech tiempo quepeaya de que inu magos oquejtaque inu sitlale. ¹⁷ Ejqueu omochihuaco tli oquejto tlayulepante Jeremías:

¹⁸ Ocaquestec sente tosquetl ipan Ramá,
meyac chuquelestle hua tzajtzelestle.
Yaja Raquel quenchuqueliöya ipelhua,
hua amo quenequeya moyulölis, ipampa ye omejmejque.

¹⁹ Cache cuöc ye ome Herodes, ohuöla sente öngel de Tlöcatzintle, hua omoniexte ipa icochtiemequeles Josie ompa Egipto. ²⁰ Oquelfe:

—Xemiehua, hua xecöna peltzintle ca tiehua inöntzi, hua xebeya ipan tlöle de Israel. Pos ye omejmejque niecate tli quetepotztocaya peltzintle para quemectisque.

²¹ Yecuöquenu yaja omie, hua ucö peltzintle ca tiehua inöntzi, hua ohuölajque ca ipan tlöle de Israel. ²² Hua cuöc oquecac que Arquelao tlajtojcötejteca ipa Judea itlacopa Herodes itajtzi, omomajte iyös ompa. Hua ocsajpa Deus quenahuatejque ipa icochtiemequeles, para ma beya ca estado de Galilea. ²³ Ejqueu uya, hua onemeto ipa sente puieblo itucö Nazaret. Noche inu opasöre para ma mochihua tli oquejtojque tlayulepantejque, pues oquejtojque que Cristo tietucöyutisque nazareno.

3

Xohuö Bautista tlanunutzaya

¹ Hua ipa inu niecate tunalte ohuöla Xohuö Bautista (quejtusneque Tlacuötiequiöne). Hualtlanunutztoyä ipa inu pörtes de Judea cöne nionöque chönte. ² Cualejtojtöya:

—Xomoyulcuepacö, ipampa ye aseco tunalte para Deus tlamandörurus nemotlac.

³ Pues de ini nönca Xohuö Deus otlajtlajtuluc por icamacopa inu tlayulepante Isaías, cuöc oquejto:

Caquestec tlajtule de yeca tli tzajtzeyä ompa cöne nionöque chönte, hua quejtoöya: “Xecyejyectlölicö tieojfe Tlöcatzintle. Xecmejmeloöhuacö tieojfe, pues ye miero axihuaqui”.

⁴ Quepeaya Xohuö itlaquie de itojmeyo de camello, hua motlajcoilpejtaya ca sente cuetlaxpöxajtle. Hua itlacual oyeya yaja chapolte hua nectle de cormiena tli onca ca caltienco. ⁵ Hua quisaya ca yaja noche giente de inu ciudad de Jerusalén hua de noche tlöle de Judea, hua de noche inu locör tli ica itech inu ötlactle de Jordán. ⁶ Hua cuöc moyulcuiöya de intlajtlacul, entunses quencuötiequiöya Xohuö ipa inu ötlactle de Jordán.

⁷ Hua cuöc oquemejtac yaja meyactie de *fariseos ca tiehua saduceos tli ohuölöya para mocuötiequisque, quemelfiöya:

—¡Tlöcaxenöchchuhuöme! ¿Öque onemiechmachte nenholusque de ipa inu cualönelestle de Deus tli huölös nemopa? ⁸ Xecchihuacö noso söstantle tli conbenierebe quechihuas öque de melöhuac ye omoyulcuec. ⁹ Hua amo xecpensörojtacö nemojtecopa que yaja Abraham icaca nemotajtzi hua que por inu nencate cuale. Pues naja nemiechelfea que Deus cuale quenchiualtisque ini nöncate teme ma mochihuacö ipelhua Abraham. ¹⁰ Öxö, pues Deus ye miero quenpojpolusque tli amo quechihua tlin cuale. Icacä quiename tlö sente öcha ye intzintlanca cuajme; hua noche cuabetl tli amo quetiemaca ifruto cuale, motzinteques hua motlajcales ijtec tletzintle.

* **3:7** Fariseos hua saduceos oyejyeya ume grupos de inu religiön de jorijote. Saduceos quepensöroöya que mimejque amo yulebesque. Xomojtelicö Hch. 23.6.

¹¹ Naja por nopörte nemiechcuötiequea ca ötzintle ipampa nemoyulcuepa. Pero ocsie tlöcatl biloatz sötiepa de naja, öque cache quepealo meyac checöhualestle que naja. Naja amo necmeresieroa nion para necbicas tiecacua. Yejuatzi nemiechcuötiequisque ca Espíritu Sönto hua ica tletzintle. ¹² Yejuatzi iloac quiename sente tlöcatl tli ye miero piehuas para quetzetzelus trigo. Hua quebicas inu trigo tli chepöhuac para ma iye ijtec bescomatl, pero inu itlasolyo quexutlaltisque ijtec inu tletzintle tli ayec siebe.

Xohuö tiecuötieque Jesús

¹³ Yecuöquenu ohualiloac Jesús de ipa Galilea para cöne icaca Xohuö itlac inu ötlactle de Jordán. Ohualiloac para ma tiecuötieque Xohuö. ¹⁴ Cache Xohuö amo quenequeya. Quejtoöya:

—Naja cache cuale necnesesitöroa ma xeniechmocuötiequele tejuatzi. ¿Tlica noso cache tejuatzi noca tomobica?

¹⁵ Pero Jesús onöhuatihuac hua oquelfejque:

—Xejcöhua öxö ma tecchihuacö ini nönca, pues ejqueu conbenierebe ma tecchihuacö noche lo que tli icaca yectec.

Yecuöquenu Xohuö omoconformöro hua otiecuötieque. ¹⁶ Hua Jesús, sötiepa de cuöc necuötiequiluc, sa nima oquixoac de ijtec ötzintle. Entunses omotlapo elfecac tiepa yejuatzi, hua oquejtaque tieEspíritu de Deus que hualtemoöya quieme sente palumax tiepa yejuatzi. ¹⁷ Hua ocaquestec sente tlajtule ipa elfecac. Quejtoöya:

—Yaja ini nönca noConie, öque nectlasojtla. Ica yaja necpea meyac pöquelestle.

4

Diöblo tieyulmajmötocac Jesús

¹ Yecuöquenu Espíritu Sönto tiebicaluc Jesús ca ompa cöne nionöque chönte para ompa tieyulmajmötocas inu Diöblo. ² Hua cuöc amo otlacualuc cuarenta tunale hua cuarenta yohuale, sötiepa oteosebihuac. ³ Hua cuöc oaseto inu tieyulmajmötocane, otieyelfe:

—Tlö teca teiconie Deus, xequejto ma ini nöncate teme ma mocuepacö pöntzi.

⁴ Cache yejuatzi onöhuatihuac, oquelfejque:

—Tlajcuelulpanca:

Amo sa ca pöntzi cuale nemes sente tlöcatl, cache quenenesitöroa de noche tlajtule tli quisa tiecamacopantzinco Deus.

⁵ Yecuöquenu Diöblo otiepanulte ipa inu ciudad de Deus, que yaja Jerusalén, hua tietlejcabé hasta icuayuluc teopantle. ⁶ Hua otieyelfe:

—Tlö tecaca teiconie Deus, xomocajcöhua hasta tlölpa. Pues ejqueyi tlajcuelulpanca: Cualentitlanesque tieöngeles por mopampa, hua metzajcoquesque ca inmöhua, para que ejqueu mocxehua amo moteputlamesque ica teme.

⁷ Jesús oquelfejque:

—Pues nuyejque tlajcuelulpanca: “Amo xetietantiöro Tlöcatzintle moDeus para abier tlö cuale quechihuasque”.

⁸ Ocsajpa Diöblo tiebicac hasta icpac sente tepietl bieye, hua tieyejtete noche reinos hua naciones de tlöltecpactle, hua noche incualniexteles. ⁹ Hua otieyelfe:

—Noche ini nönca temetzmacas tlö nixpa tomotlancuöquetzas hua teniechmabesutis.

¹⁰ Yecuöquenu Jesús oquelfejque:

—Xebeya, Satanás, ipampa tlajcuelulpanca:

Yejuatzi Tlöcatzintle moDeus tetiemabesutis, hua sa yejuatzi tetietequapanus.

¹¹ Yecuöquenu Diöblo tiecöjtie. Entunses oaseco öngeles hua tietequapanoöya.

Jesús quepiehualtejque tietequé ipa Galilea

¹² Sötiepa Jesús oquecajque que Xohuö ye oquetzajtzejque ipan cörsel. Entunses Jesús onecuepaluc ca inu tlöle de Galilea. ¹³ Hua oquixoac de Nazaret, hua onemoaco ipa sente puieblo itucö Capernaum, que icaca itienco ötiescatl, cöne ica itlamejyo de inu tlöle de Zabulón hua de Neftalí. ¹⁴ Ejqueu opasöre para ma mochihua tli oquejto inu tlayulepante Isaías. Pues oquejto:

¹⁵ Inu tlöle de Zabulón, hua inu tlöle de Neftalí, ojtle tli pano itienco ötiescatl, ca nie löro de Jordán, tlöle de Galilea cöne chajchönte meyactie tli amo cate de topuieblo.

¹⁶ Noche inu gente tli yejyehuataya ca tlajtlayohuaquelestle pa inyulo oquejtaque bieye tlanixtelestle, hua tli yejyehuataya ipa inu locör de tlayohuaquelestle de mequelestle, tlöbile oquentlanixtele.

¹⁷ Desde cuöquenu opiehualuc Jesús para tlanunutzalus, hua quejtuloöya:

—Xomoyulcuepacö, ipampa ye ajaseco tunalte para Deus tlamandörurus nemotlac.

Jesús oquennutzque nöbe pescadurte

¹⁸ Hua nejnemoatenemeya Jesús itlac ötiescatl de Galilea. Oquemejtaque unte icnijte: Semu, öque nuyejque mocuitea Piero, hua Andrés icni. Quetlajcaleya tarröya ijtec ötiescatl, pues yejua oyejyeya pescadurte. ¹⁹ Hua oquemelfejque:

—Xeniechtocacö, hua nemiechchihualtis nenyisque nenpescadurte de tlöca.

²⁰ Yejua sa nima oquecöjtiejque intarröya, hua tietocaque. ²¹ Hua cuöc opanoac de ompa oquemejtaque oc unte icnijte: yaja Jacobo, iconie Zebedeo, ca tiehua icni itucö Xohuö. Yejua oyejyeya ipan börco ca tiehua intajtzi, hua quenyejyectlöliöya intarröyajua ye otlajtlatzcotu. Hua yejuatzi quennutzque. ²² Hua sa nima quecöjtiejque inu börco ca tiehua intajtzi, hua tietocaque.

Jesús quenmachtejque hua quenpajtejque meyac gente

²³ Hua biloatenemeya por noche inu tlöle de Galilea, hua otlamachtiloöya ipan in-teopancuconehua de yejua. Tlanunutzaloöya de inu cuale tlamachestelestle de quiene Deus tlamandöruro. Hua otlapajtilutöya de noche cocolestle hua de noche tiecoco tli quepeaya gente. ²⁴ Hua caquesteya tieyectieniehuals ipa noche inu tlöle de Siria. Hua gente tiehualquelejque noche tlin cocolesyojque, tli quepejpeaya de noche söstantle cocolestle, hua tli quepejpeaya demunios, hua tli lucojte hua tli cojcultzetzi. Hua yejuatzi oquenpajtiloöya. ²⁵ Hua otietocaya meyac gente de inu tlölte de Galilea hua de Decápolis hua de inu ciudad de Jerusalén, hua de inu tlöle de Judea, hua de ca nie löro de inu ötlactle de Jordán.

5

Jesús tlamachtiluc ipan tepietl

¹ Hua cuöc oquejtaque inu meyac gente, otlejcoac ipan tepietl, hua ompa netlöliuc. Hua omopachojque tietlac tiemachtejcohua. ² Hua yejuatzi oquetlapojque tiecamac hua quenmachtejque.

Öquemeju cuale imicnupel

Oquejtojque:

³ —Cuale imicnupel tli momachelea porubejte ipa inyulo, pos yejua quepejpea pörte cöne Deus tlamandöruro ipa elfecac.

⁴ Cuale imicnupel tlin chojchuca, pos yejua moyulölisque.

⁵ Cuale imicnupel tli modominöroa cuale hua amo papasolte, pues yejua mo-huöxcatisque inu tlöle tli Deus queprometierojque.

⁶ Cuale imicnupel tli lalesbes queneque yesque yecteque, quiename cuöc öque teosebe hua ömeque. Pues yejua ixbesque.

⁷ 'Cuale imicnupel tli tlaicnuyejta, pos Deus quemicnuejtasque yejua.

⁸ 'Cuale imicnupel tli chepöjtecate ipa inyulo, pos yejua tiejtasque Deus.

⁹ 'Cuale imicnupel tli quechihua siebelestle entre tli mophoneroa, pos yejua mocuitisque tiepelhua de Deus.

¹⁰ 'Cuale imicnupel niecate tli ocseque quentepotztoca porque yejua cate yecteque, pos yejua quepeasque pörte cöne Deus tlamandöruro ipa elfecac.

¹¹ 'Cuale nemocnupel cuöc giente nemiechpöpöca, hua nemiechtepotztoca, hua cuöc nemoca tlajtoa de noche tlin amo cuale ca istlacatlajtule, hua ejqueu nemiechchibelea porque nenniechtoca. ¹² Xepajpöquecö hua xecpeacö meyac pöquelestle, ipampa inu premio tli nenqueselisque ompa elfecac cache bieye iyes. Pues ejqueu nuyejque quentepotztocaque inu tlayulepantejque tli cachtu ohuölajque que nemejua.

Nemejua nencate quiename yestatl hua tlöbile

¹³ 'Nemejua nencate quiename nenestatl para tlöltecpectle. Hua tlö yestatl mocuepas öbielec, ¿tli ica mopoyelis? Ayecmo serbirebes para niontle, tlöcamo sö para motlajcalis ca queyöhuac ma ipa moquejquetzacö giente.

¹⁴ 'Nemejua nencate quiename nentlöbile de tlöltecpectle, quiename sente ciudad tli icaca ipa sente tepietl hua abele mojoyönas. ¹⁵ Nuyejque ica melöhuac que amo moxutlaltea sente cantil para öque quetlölis itzintla sente almu. Cache öque quetlölea ipa sente canteliero, hua ejqueu quentlaniextelea noche tli cate ipan chöntle. ¹⁶ Pues ejqueu ma tlanixte nemotlöbil imixtla noche giente, para ma quejtacö tlin cuale nemotlachihual, hua ma tiemabesuticö nemoTajtzi öque elfecac iloac.

Jesús tlamachtilo de quiene icaca inu ley

¹⁷ 'Amo xecpensörucö que naja nehuöla para necxexetunis inu ley de Moisés nimpor lo que oquejcuelojque inu tlayulepantejque. Amo onehuöla para netlaxexetunico, cache onehuöla para nejcumpliruco. ¹⁸ Pues nemiechelfea, que de melöhuac hasta senamo tlamas elfecac hua tlöltecpectle, nion sente lietra, por mös tzitzequetzi oyene, amo polebes de ipa inu ley, tlöcamo mochihuas noche söstantle tli ompa tlajcuelulpanca. ¹⁹ Por inu tlö canajyeca amo queneltocas sente mandamiento de inu ley, por mös tzitzequetzi oyene, hua tlö ejqueu quenmachtis ocseque giente para amo queneltocasque, inu tlöcatl lalebes tzitzequetzi iyes ompa cöne Deus tlamandöruro. Cache tlö canajyeca quechihuas hua tlamachtis inu mandamiento, yaja momajtas bieye ompa cöne Deus tlamandöruro. ²⁰ Pues nemiechelfea que tlö quejtus nemoyectlachihual amo iyes cache cuale que lo que tli quechihua inu fariseos hua tlamachtioneme de teotlajtule, amo nencalaquesque ompa cöne Deus tlamandöruro.

Jesús tlamachtilo de quiene ica cuöc öque cualöne

²¹ 'Ye nenquemajmate que omojto ca tobiebetcöhua: "Amo xetlamecte", hua: "Tlö canajyeca tlamectea ica en peligro de que quecuntenörusque tlajtoönejme de ipuieblo". ²² Cache naja nemiechelfea, que tlö canajyeca cualönes ica icni, ica en peligro de que quecuntenörusque tlötlajtoönejme del puieblo. Hua öque quelfis icni: "Raka" (quejtus-neque Tunto), ica en peligro para quecuntenörusque inu tlajtoönejme del cubierno. Hua öque quelfis icni: "Taja sie tiro tetunto", ica en peligro de que iyös ipa tlecale. ²³ Por inu, cuöc tejcualecas bentle ipa ajtöl, hua ompa tequelnömeques que mocni quepea canajyetla ca taja, ²⁴ pues ompa xejcöjtiehua bentle ixpa ajtöl, hua xebeya ca mocni, hua cachtu xomotlapojpolficö. Entunses sötiepa xehuöla hua xejcuetlabilte inu bentle. ²⁵ Mientras teya pa ojtle ca moenemigo sa nima xecnunutzta hua xomotlöle de acuerdo ca yaja; amo cana mochihuas que moenemigo metzmöctis ica tlajtoöne, hua tlajtoöne metzmöctis ica cörseliero hua metzcalaquis ijtec cörsel. ²⁶ Melöhuac temetzelfea, que amo tequisas de ompa hasta senamo tectlaxtlöhuas hasta inu sölültimo quinto de tli tectietlabiquelea.

Jesús tlamachtilo de quiene ica cuöc öque tlajtlacoa ca sohuatl

²⁷ 'Nenquemate que omojto: "Amo tecalaques ca isohua ocsente". ²⁸ Cache naja nemiechelfea, que tlö canajyeca sa quejta sente sohuatl para quixeliebis, pues ipa iyulo ye tlajtlacojteca ca inu nieca sohuatl. ²⁹ Ca inu, tlö quejtus mixtelolo de ca momöyecmö metzchihualtea tetlajtlacus, xejcopina, hua xectlajcale de taja. Pos cache metznömeque ma polebe sie pörte de mocuierpo, hua majcamo que noche mocuierpo quetlajcalesque ijtec tlecale. ³⁰ Hua tlö quejtus momöyecmö metzchihualtea tetlajtlacus, xectejteque, hua xectlajcale de taja. Cache metznömeque ma polebe sie pörte de mocuierpo, hua majcamo que noche mocuierpo quetlajcalesque ijtec tlecale.

Jesús tlamachtilo de quiene ica cuöc öque mosohuacajcöhua

³¹ 'Nuyejque omojto: "Öque quecajcohua isohua, ma quemaca ömatl de necajcohuallestle". ³² Cache naja nemiechelfea, que tlö canajyeca quecajcohua isohua hua amo quechihua porque isohua otlajtlaco ca ocsente tlöcatl, cache quechihua por ocseque söstantle, yaja quechihualtea que isohua tlajtlacus. Hua öque mosohuajtis ca inu sohuatl tli inömec quecajco, yaja tlajtlacoa porque inu sohuatl ye quepea inömec, mös amo quepexteca.

Jesús tlamachtilo de quiene ica cuöc öque tlajuröroa noso quejtoa "¡Paltzinco!"

³³ 'Nuyejque nenquemate que omojto ca tobiebetcöhua: "Amo xequejto ¡Cabelele paltzinco! ica istlacatelestle", hua: "Cuöc tetieprometierfis Deus canajyetla, xejcumpliro". ³⁴ Cache naja nequejtoa: Ayec canajquiema amo xequejtucö "¡Cabelele paltzinco!" Nimpor amo xetlajurörucö por elfecac, ipampa ica quiename tietrono de Deus, hua tlö ejqueu nenquechihuasque ica iguöl quiename tlö nenquejtoöne "¡Cabelele paltzinco!" ³⁵ Nimpor amo xetlajurörucö por tlöltecpactle, ipampa yaja ica quiename cöne quesiebito tieicxehua. Nimpor amo xetlajurörucö por Jerusalén, pues yaja ica tieciudad de inu Rey bieye, que yejuatzi iloac Deus. Tlö nentlajurörusque por nöncate söstantle ica iguöl quieme tlö nenquejtoöne "¡Cabelele paltzinco!", noso "¡Por Deus!" ³⁶ Nuyejque amo xetlajuröro por motzonteco ipampa abele tecchihuas sente motzo ma iye istöc hua ocsente capotztec. ³⁷ Cache cuale ma ejqueyi iye nemotlajtul: que cuöc nenquejtoa "Quiema", ma iye quiema, hua cuöc nenquejtoa "Amo", pos ma iye amo. Pos amo cuale ica öque quesölultis tlajtule.

Majcamo tejcuajnömequecö cuöc canajyeca tiechchibelea amo cuale

³⁸ 'Ye nenquemate que omojto ejqueyi: "Tlö canajyeca quixcopina ocsente, xequixcopinacö yaja nuyejque, hua tlö quetlancochcopina, xetlancochcopinacö yaja nuyejque". ³⁹ Cache naja nemiechelfea: Amo xejcuajnömequecö tlö canajyeca queneque nemiechchibelis tlin amo cuale. Cache tlö quejtus metzmaca ipa moxöyac de momöyecmö, xomocuepa para ma metzmaca nuyejque de ocsie löro. ⁴⁰ Hua tlö canajyeca queneque metzbicas ca tlajtoönejme para metzcuejcuelis mocamixa, xecmaca nuyejque mosaröpe. ⁴¹ Tlö canajyeca queneques metzchihualtis para tetlamömajtös sie kilómetro ca yaja, pos xebeya ume kilómetro ca yaja. ⁴² Öque metztlajtlanelis canajyetla, xecmaca, hua öque queneques motlacuis canajyetla de taja, amo xetzacuele.

Ma tequentlasojtlacö toenemigos

⁴³ 'Ye nenquemate que omojto: "Xectlasojtla motlöcaicni, hua xectlajyelejta moenemigo". ⁴⁴ Cache naja nemiechelfea: Xequentlasojtlacö nemoenemigos, hua xomotlajtlötlajticö por niecate tli nemiechtepotztoca. ⁴⁵ Pues ejqueu nieses que melöhuac nencate nentiepelhua de nemoTajtzi öque iloac elfecac. Pues yejuatzi quechihualo ma quisa tunale impa tlin amo cualteque hua tlin cualteque, hua ma queyabe impa tli yecteque hua tli amo yecteque. ⁴⁶ Pues tlö nenquentlasojtlasque sa öque nemiechtlasojtla, ¿tli tlaxtlöbile nenquepeasque ompa elfecac? ¿Amo nuyejque ejqueu quechihua

inu tlanechecojqe hua ocseque amo cualteque? ⁴⁷ Hua tlö nenquentlajpaloa sa tlin nemocnihua, ¿tli nenquechihua que ocseque amo quechihua? Pues hasta giente que amo joriojte nuyejque quechihua ejqueu. ⁴⁸ Xeyecö, noso, nemejua nenyecualteque, quiename nemoTajtzi öque iloac elfecac yejcualtec iloac.

6

Quiene ma tetietlöocolicö

¹ Xecpeacö cueröro cuöc nenquechihuasque tlin cuale amo xecchihuacö imixtla giente para que yejua nemiechejtasque. Pues tlö ejqueu nenquechihua amo nenqueselisque inu premio tli quetiemasque nemoTajtzi öque elfecac iloac.

² Por ejemplo, cuöc canajyetla nentietlöocolisque amo xecchihuacö para ma machea lalebes. Pues ejqueu quechihua inu giente de ume inxöyac. Pues yejua quisa ipa teopanme hua ipan plösas hua quenejneque ma quemejtacö innochie, para que ejqueu quenyectioniehuasque. Melöhuac nemiechelfea, ye quepea intlaxtlöbil. ³ Cache taja, cuöc canajyetla tetietlöocolea, majcamo quemate nionöque mösque oyene moamigo lalebes. ⁴ Ejqueu motietlöocoleles iyes sa ichtacajtzi, hua moTajtzi Deus öque cuale quejtalo mös tectiemaca sa ichtacajtzi, yejuatziz metzcuepelisque.

Quiene ma totlajtlötlajticö

⁵ Hua cuöc nemotlajtlötlajtea, amo xecchihuacö quieme inu niecate que quepea ume inxöyac. Pues yejua quecualejta moquetzasque ipan teopanme noso ipa esquinas de cayajunte, hua ompa motlajtlötlajtea, para ma quemejtacö noche giente. Melöhuac nemiechelfea, que ye quepea intlaxtlöbil. ⁶ Cache taja, cuöc tomotlajtlötlajtis, xecalaque sa mosiel ipa mocalejtec, hua xetzacua pobielta, hua xomotlajtlötlajte tiecatzinc moTajtzi öque abele öque tieyejtas. Pues moTajtzi quejtalo lo que tli sa ichtacajtzi, hua yejuatziz metzcuepelisque por lo que tli tecchihua.

⁷ Hua cuöc tomotlajtlötlajtis, amo seme xequetojta sö ye yaja sösanle hasta que ayecmo quejtusneque niontle. Pos ejqueu quechihua inu giente tli quentoca ocseque deuste. Pues yejua quepensöroa que beles ipampa lalebes tlajtlajtoa indeus cuale quencagues. ⁸ Amo xomochihuacö, noso, quiename yejua. Pues nemoTajtzi quemati-huateca tli sösanle nemiechpoloa, antes de que nentietlajtlanelisque. ⁹ Nemejua, noso, xomotlajtlötlajticö ejqueyi:

ToTajtzi öque elfecac tomobetzteca,
ma innochie ma queyectieniehuacö motucöyutzi.

¹⁰ Ma aseque inu tunale cuöc tomotlamandörfis.
Ma mochihua tli motlanequelestzi necö ipan tlöltecpactle,
quieme nuyejque mochihua ompa elfecac.

¹¹ Xetiechmomaquele öxö totlacual de ini nönca tunale.

¹² Hua xetiechmoperdonörfe de lo que tli temetzmotlabiquelelea,
quiename tejua nuyejque ye tequenperdonörojque quiejquech tiechtlabiquelelea.

¹³ Hua amo xetiechmocöbele *ma tiechyulmajmötoca Amo Cuale Tlöcatl,
cache xetiechmomöquextele de yaja.

¹⁴ Pues tlö nenquenperdonörfisque giente de noche tli nemiechchibelea, nemejua nuyejque nemiechperdonörusque nemoTajtzi öque elfecac iloac. ¹⁵ Cache tlö quejtus amo nenquenperdonörusque giente, nuyejque nemejua nemoTajtzi amo nemiechperdonörusque de lo que tli amo cuale nenquechihua.

Quiene ma tetlajyubicö

* **6:13** Cuale nuyejque motradusirus: “ma tecalaquecö ipa pruebas, cache xetiechmomöquextele de lo que tli amo cuale topa betzes”.

¹⁶ 'Hua cuöc nentlajyubea, amo xeyecö quieme inu giente de ume inxöyac, tli niese quieme sana mocojocoa cuöc tlajyubea. Pos yejua quepatla inxöyac para nisesque imixtla giente nele melöhuac tlajyubea. Melöhuac nemiechelfea, que ye quepea intlaxtlöbil. ¹⁷ Cache taja, cuöc tetlajyubis, xomoyejyecpachoasfe hua xecpajpöca moxöyac. ¹⁸ Pues ejqueu giente amo momacasque cuenta tlö tetlajyubea, tlöcamo sa nemacus cuenta moTajtzi sa ichtacajtzi. Hua yejuatzzi moTajtzi öque quejtalo tli sa ichtacajtzi, yejuatzzi metzcuepelisque.

Toricojyu ma tecpeacö ompa elfecac

¹⁹ 'Amo xectlamachtlölicö nemoricojyu necö ipan tlöltecpactle, cöne tlacuacualoa hua tepostlölöa, hua ichtejque calaque para tlachtequesque. ²⁰ Cache cuale nemoricojyu ma iye söstantle de elfecac, cöne nimpör amo tlacuacualoa nimpör tepostlölöa, hua cöne ichtejque abele calaquesque para tlachtequesque. Ompa elfecac xectlamachtlölicö nemoricojyu. ²¹ Pues cöne iyeyes nemoricojyu, ompa queneques iyeyes nemoyulo nuyejque.

Itlöbil de tocuiervo

²² 'Tlöbile de tocuiervo yaja toixtelolo. Ejqueu, tlö toixtelolo amo mococoa, noche tocuiervo quepeas tlöbile. ²³ Cache tlö toixtelolo amo cuale ica, noche tocuiervo quepeas tlajtlayohuaquelestle. Hua tlö ejqueu inu tli uyesquea tlöbile para tocuiervo mocuepa tlajtlayohuaquelestle, lalebes petzotec icaca inu tlajohuaquelestle.

Abele tequentequepanusque unte totiecohua

²⁴ 'Nionöque abele quentequepanus umeme itiecohua. Pues quetlajyelejtas sente hua quetlasojtlas ocsente, o noso mopachus itlac sente hua quedespresiörus ocsente. Abele nentietequenpanusque Deus mientras nuyejque nenquentequepanoa ricojyutl.

Majcamo totequepachucö

²⁵ 'Hua ca inu nemiechelfea: Amo xomotequepachucö por nemonemeles, por tli nenquecuösque, noso tli nenconisque. Nimpör amo xomotequepachucö por quiene nenquetlaquentisque nemocuiervo. Pues ye nenquepea nemonemeles, hua yaja inu melöhuac cache balierebe que tlaquale. Hua ye nenquepea nemocuiervo, que melöhuac cache balierebe que tlaquentle. ²⁶ Xequemejtacö tutume tli patlöne ipa yejyecatl. Yejua amo tlajtlatuca, nimpör amo pejpexca, nimpör amo tli quetejtiema ipa inbesco. Hua nemoTajtzi öque elfecac iloac yejuatzzi quentlacualtilo. ¿Beles nenquejtusque que amo cache nenbajbalierebe nemejua que yejua? ²⁷ Hua nionöque de nemejua, por mös motequepachus lalebes, abele mobepöhuas nion tlajco mietro por yaja mismo. ²⁸ Hua por inu tlaquentle, ¿tli para nemotequepachoa? Xequajtacö cuale quiene mobepöhua xucheme de ca caltienco. Amo tejtequete nimpör amo quechejchihua tlaquentle. ²⁹ Cache nemiechelfea que nimpör Salomón ca noche icualniexteles ayec omotlaquente quiename sente de inu niecate xucheme. ³⁰ Hua tlö quejtus xebetl que öxö icaca, hua para mustla ye motlajcale ijtec tletzintle, Deus quetlaquentilo ejqueu, ¿tlica noso nenquepensöroa que abele quechihuasque por nemejua? Pues cache ca meyac arrasu nemiechtlaquentisque nemejua, tlöca que nemiechpoloa neltoquelestle. ³¹ Amo xomotequepachucö noso, hua amo xequajtucö: "¿Tli tejcuösque?" noso "¿Tli teconisque?" noso "¿Tli töquisque?" ³² Pues giente que amo tieixomate Deus quetiemoa ini nönca söstantle. Pero nemoTajtzi öque elfecac iloac ye quematihuateca de que nemiechpoloa noche ini nönca söstantle. ³³ Pero cachtö xectiemucö ma Deus tlamandörucö hua ma mochihua tli yectec tli yejuatzzi quenequihua. Entunses nuyejque nemiechmacasque noche ini nönca söstantle.

³⁴ 'Por inu, amo xomotequepachucö de lo que tli mustla huölös, pues mustla metztocörus tomotequepachus de inu söstantle. Cöra tunale quebicas itequenpachul, hua amo quenesisitöroa cache meyac.

7

Majcamo tequemestlocucö ocseque

¹ 'Amo xetlaestlocucö, para que ejqueu amo nemiechestlocusque. ² Ipampa ejqueu quieme nemejua nentlaestlocoa, ejqueu mismo nemiechestlocusque. Hua san quiene nequentemachibelea ocseque giente, ejqueu mismo nemiechtemachibelisque. ³ Hua cuöc tequemestlocoa ocseque, icaca quiename tlö tequejtelea sente tlasolconetzi ijtec ixtelolo de mocni, pero amo tomojtelea que taja mismo tecpea sente cuabetl bieye ijtec mixtelolo. ⁴ ¿Quiene noso tequelfis mocni: "Xomocöhua ma temetzquextele inu tlasole tli tecpea ijtec mixtelolo", mientras tecpea cuabetl ijtec mixtelolo taja? ⁵ ¡Sa ume moxöyac! Xejquexte cachtö inu cuabetl de ijtec mixtelolo taja para que ejqueu cuale ye tequejtas para cuale tejquextis inu tlasole de ijtec ixtelolo de mocni.

⁶ 'Inu söstantle tli yectec amo xequenmacacö checheme, hua lo que tli balierebe lalebes amo xequensemanelicö petzome. Majcamo iye que ipa moquejquetzasque hua cana de repiente mocuepasque nemopa hua nemiechcocototzasque.

Ma tetlajtlanecö, ma tectiemucö, ma tetzajtzecö

⁷ 'Xetlajtlanecö, hua nemiechmacasque. Xectiemucö, hua nenqueniextisque. Xetzajtzecö, hua nemiechtlajitlapolfisque. ⁸ Pues noche nieca öque tlajtlane, queselea; hua öque quetiemoa, queniextea; hua öque tzajtze, quetlajitlapolfea. ⁹ Pos nionöque de nemejua, tlö quejtus iconie quetlajtlanelis pöntzi, amo quemacas sente tietetu. ¹⁰ Hua tlö cana iconie tlajtlanes meche, amo quemacas sente cuhuötl. ¹¹ Entunses tlö nemejua, mös amo nencate nencualteque, pero nenquemate nenquetiemacasque lo que tlin cuale ca nemopelhua, pues cache ca meyac arrasü ejqueu quechihuasque nemoTajtzi öque elfecac iloac, hua quetiemasque noche söstantle tlin cuale cuöc yeca tietlajtlanelea.

¹² 'Por inu, noche söstantle tli nenqueneque ma nemiechchibelicö giente ca nemejua, ejqueu nuyejque xequenchibelicö yejua. Pues tlö nenquechihuasque ini nönca, nenquecumplirusque noche tli nemiechelfea inu ley hua inu tlayulepantejque.

Ma tecalaquecö ca pa trönca pitzutec

¹³ 'Xecalaquecö ca pa inu trönca tli pitzutec. Pos tlapojque trönca, hua patlöhuac ojtle tli tiebica ipa ixniempolebelestle, hua meyactie giente calaque ipa inu ojtle. ¹⁴ Pero lalebes pitzutec trönca, hua pipetzatzi ojtle tli tiebica ipa nemelestle, hua amo meyactie queniextea.

Ixomacheste cuabetl por ifruto

¹⁵ 'Xomomalficö de giente tli huölösque quiename tlayulepantejque pero amo de melöhuac cate. Yejua cate quiename tlö sente coyutl moquentiöne de calnielo, hua calaquene intzölö calnielojte. Ca pane niese que calnielo icaca, cache de melöhuac ica tiecuöne. ¹⁶ Inca intlachihual nenquemixomatesque inu giente. ¿Beles noso cuale öque queteques capole itech bechöche? Noso ¿cuale öque queteques icox itech sacajpule? ¹⁷ Ejqueu pues, noche tlin cuale cuabetl quetiemaca tlin cuale ifruto; cache tlin amo cuale cuabetl amo cuale ifruto quetiemaca. ¹⁸ Abele tlin cuale cuabetl quetiemas tlin amo cuale ifruto, nimpör tlin amo cuale cuabetl abele quetiemas tlin cuale fruto. ¹⁹ Noche cuabetl tli quemochihualtea amo cuale ifruto, ica para quetequesque hua quetlajcalesque ijtec tletzintle. ²⁰ Ejqueu pues, por infrutos nenquemixomatesque.

Seque amo quenreconosierusque Jesús

²¹ 'Meyac giente niechelfea: "Tlöcatzintle, Tlöcatzintle", pero amo innochie calaque-sque cöne Deus tlamandöruro ompa elfecac. Sa calaquesque tli quechihua tietlaneques de noTajtzi öque iloac elfecac. ²² Meyactie niechelfisque ipa inu nieca

tunale: “Tlöcatzintle, Tlöcatzintle, ¿amo tomolnömequitea que tejua tetlayulepantejque motucöyupantzinco, hua motucöyupantzinco tequenquextejque demunios, hua motucöyupantzinco tecchijque meyac tietzöbetl?” ²³ Cuöquenu naja nequemelfis: “Ayec nemiechixomat. Xomoxelucö de naja, nemejua tli nenquechihua tlin amo cuale”.

Ume cimientos

²⁴ Por inu, tlö canajyeca quecaque nönca notlajtul, hua quechihua, cuale mocomparörus quiename sente tlöcatl tli cuale oquepensöro. Yaja oquequetz ical ipa tepetlatl. ²⁵ Hua ohuöla queyabetl, hua oyejcoc ötzintle, hua otlalpitz yejyecatl, hua oquecuanjömejqe inu nieca cale. Pero amo obetz, ipampa oijcataya ipa tepetlatl. ²⁶ Pero tlö canajyeca quecaques nönca notlajtul, hua amo quechihuas, nejcomparörus quiename sente tlöcatl tunto, que oquequetz ical ipa xöle. ²⁷ Hua ohuöla queyabetl, hua oyejcoc ötzintle, hua otlalpitz yejyecatl, hua oquemagac checöhuac inu cale. Hua obetz cale, hua omochi bieye tlaxexetochestle.

²⁸ Hua sötiepa, cuöc Jesús oquesencöjqe ini tlajtule, noche giente quetietzöbejtaya de quiene tlamachtiloöya. ²⁹ Pues quenmachtiloöya quiename öque quepea autoridad, hua amo quiename quenmachiöya inu tlamachtiöneme de teotlajtule.

8

Jesús quepajtejqe sente tlöcatl sa söhuayo

¹ Cuöc hualtemoac de ipan tepietl, tiehualtocaya meyac giente. ² Hua necö sente tlöcatl sa söhuayo ohuöla, hua tiemabesutiöya. Oquejto:

—Tlöcatzintle, mach tomonequitis, cuale teniechmopajtelis.

³ Hua omösohualuc Jesús, hua oquemötocaque. Oquejtojqe:

—Necneque; xepajte.

Hua sa nima icocoles opajtec. ⁴ Yecuöquenu Jesús oquelfejque:

—Xequjeta, amo öque xequelfe tli metzpasöro. Cache xebeya, xomotieijtete ica teopexque. Hua xetlacuetlabilte inu bentle tli otlanahuate Moisés, para ma quematecö yejua lo que tli omochi ca taja.

Jesús quepajtejqe itlatequepano de sente capetö

⁵ Hua ocalacoac Jesús ipa inu puieblo de Capernaum. Cuöquenu ohuöla tietlac sente capetö, hua tietlajtlötlajte, ⁶ hua otieyelfe:

—Tlöcatzintle, notlatequepano betzteca ompa nochö cojcultzi, ca lalebes checöhuac tietunie.

⁷ Hua Jesús oquelfejque:

—Naja neyös hua necpajtis.

⁸ Hua onöhuat inu capetö, hua oquejto:

—Tlöcatzintle, amo necmeresieroa para tomocalaquis ipa nochö. Cache sa xomojtalfe sente tlajtule, hua notlatequepano pajtes. ⁹ Pues naja nuyejqe necpea que nequeneltocas tli cache quepea autoridad que naja. Hua nuyejqe nequenpea soltörojte tli niechneltoca naja. Hua tlö nequelfea sente: “Xebeya niepa”, yaja iya. Hua tlö nequelfea ocsente: “Xehuöla”, yaja yebitz. Hua tlö nequelfea notlatequepano: “Xecchihua ini”, pues yaja quechihua. Ejqueu necasojcömate que tejuatzitzi tomopilea checöhuallestle para tomopajtelis notlatequepano ca sente tlajtule.

¹⁰ Hua cuöc Jesús oquecajqe ini nönca, oquetietzöbejqe. Hua oquemelfejque quiejquech tietocaya:

—Melöhuac nemiechelfea, que nimpör inca giente de Israel amo onecniexte tönto lalebes meyac neltoquelestle quiename quepea ini nönca tlöcatl, mös amo de Israel icaca. ¹¹ Hua nemiechelfea que huölösque meyac giente de cöneca quisa tunale hua de cöneca calaque tunale. Yejua motlölisque itlac Abraham, hua Isaac, hua Jacob,

ompa elfecac cöne Deus tlamandöruro. ¹² Pero meyactie de nemejua tli nenjoriojte, tli nemiechtocöorusquea para nenquepeasque pörte ca ompa, nemiechtlajcalesque ca queyöhuac ipa tlajtlayohuaquelestle. Ompa nenchojchucasque hua nemotlantesesque.

¹³ Yecuöquenu oquelfejque inu capetö:

—Xebeya, hua san quiene ca tomoneltocac ma ejqueu mochihua.

Hua itlatequepano opajtec ipa inu ura.

Jesús quepajtejque imontiesyo Piero

¹⁴ Hua obiloac Jesús ipa ichö Piero. Ompa oquejtaque imontiesyo Piero betztaya ipa tlapechtle ca totunealestle. ¹⁵ Hua oquemötocaque imö, hua totunealestle oquecö. Hua yaja omie hua tietlamacaya.

Jesús quenpajtejque meyactie cocoxcötzetzi

¹⁶ Hua cuöc omochi ca ye yohuac, quenhualecaque tietlac meyactie tli quepeaya demunios. Hua oquenquextejque inu demunios sa ca sente tlajtule, hua oquenpajtejque innochie tli mocojcooöya. ¹⁷ Ejqueu omochi lo que tli omojto por icamacopa tlayulepante Isaías, cuöc oquejto:

Sie yejuatzi oquemönele tococoles,
hua oquebicaque totuniejcöyu.

Seque gente quejtoöya que quenequeya tietocasque Jesús

¹⁸ Hua cuöc oquejtaque Jesús que meyac gente tieyehualojtaya, otlanhuatiluc ma panucö ca icuetlapa ötiescatl. ¹⁹ Hua oaseco sente tlamachtione de teotlajtule, hua otieyelfe:

—Maestro, temetzmotoquelis cöne beletes tomobicas.

²⁰ Hua Jesús oquelfejque:

—Coyume quenpea inustuhua, hua tutume tli patlöne ipa yejyecatl quepea intepasol; cache naja, öque onochi netlöcatl, amo necpea cöne necsiebis notzonteco.

²¹ Hua ocsente de tiemachtejcöhua otieyelfe:

—Tlöcatzintle, xeniechmocöbele ma nebeya cachto, ma neclölpachute notöta.

²² Hua Jesús oquelfejque:

—Xeniechtoca; xequenajcöhua que mimejque ma quentlölpachucö inmimejcöhua.

Jesús cajajuaque öyejyecatl hua omoquetz

²³ Hua cuöc yejuatzi ocalacoac ijtec börco, tiemachtejcöhua nuyejque ocalajque. ²⁴ Yecuöquenu omochi sente bieye öyejyecatl ipa ötiescatl, que inu börco cöso motlapachöya ca ötzintle. Cache yejuatzi cochihuaya. ²⁵ Hua omopachojque tiemachtejcöhua, hua otieixetejque. Otieyelfejque:

—¡Tlöcatzintle, xetiechmomöquextele, pues temequesque!

²⁶ Hua yejuatzi oquemelfejque:

—¿Tlica nemomajtea? Lalebes nemiechpoloa neltoquelestle.

Yecuöquenu neyehualuc, hua quemajajuaque yejyecatl ca tiehua ötzintle. Hua sa nima omoquetzque completamente.

²⁷ Hua inu tlöca oquetietzöbejque. Oquejtojque:

—¿Tli tlöcatl iloac ini nöiloac? Pues hasta yejyecatl hua ötzintle tieneltoca.

Unte tlöca gadarenos quepejpeaya moxicoöneme

²⁸ Hua cuöc yejuatzi onaxihuato ca nie löro intzölö gente de puieblo de Gadara, tienömequeco unte tlöca tli quepejpeaya demunios. Inu tlöca hualquistiejque de ijtec mejcöcoyocme. Petzoteque oyejyeya lalebes, que hasta nionöque abele panuya ipa inu nieca ojtle. ²⁹ Cuöc yejua tieijtaque Jesús, otzajtzeque, hua oquejtojque:

—¿Tli tecpea tejua ca taja, öque teca teiconie Deus? ¿Otehuöla necö para tetiechmacas tiecoco antes ases ura?

³⁰ Hua tepetzi bejca de yejua oyejyeya meyactie petzome tlajtlacuajtenemeya.
³¹ Entunes inu demunios otietlajtlötölajtejqe, otieyelfejque:

—Tlötetiechquextis, xetiehcöhua ma tecalaquecö imijtecopa inu meyactie petzome.

³² Hua oquemelfejque:

—Xeyöcö noso.

Hua yejua oquistiejque de imijtec tlöca, hua uyajque inca petzome. Hua ye ompau innochie inu niecate petzome omomiemeröjqe omotietepexebito ijtec ötiescatl. Hua innochie omejmejque ijtec ötzintle. ³³ Hua inu giente tli quentlajtlacualtejenemeya petzome ochucholotiejque. Cuöc oaseto ipa puieblo, oquepujqe noche söstantle hua tli omochi inca inu tlöca tli quepeaya demunios. ³⁴ Yecuöquenu, noche tlöca de inu puieblo otienömequeco Jesús, hua cuöc otiejtaque, tietlajtlötölajtejqe ma quixoa de intlöl.

9

Jesús quepajtejqe sente tlöcatl biebelatzi

¹ Yecuöquenu ocalacoac ijtec börco. Opanoac hasta ocsie löro de inu ötiescatl, hua ohualiloac ipa tiepuieblo. ² Yecuöquenu seque tlöca otiecualaquelejque sente biebelatzi, hualbetztöya ipa tlapechtle. Hua Jesús nemacuc cuienta quiene moneltocaya yejua. Entunes oquelfejque inu cojcultzi:

—Xemanimöro, noconie; motlajtlacul ye omoperdonöro.

³ Yecuöquenu, seque de inu tlamachtioneme de teotlajtule oquejtojque imijtecopa: “Ini nönca checuatlajtoa encuntra de Deus”. ⁴ Pos Jesús nemacuc cuienta de lo que tli yejua quepensöroöya, hua oquemelfejque:

—¿Tlica nenquepensöroa amo cuale ipa nemoyulo? ⁵ Pues ¿cötölaja cache tequeyo, nequelfis: “Ye omoperdonöro motlajtlacul”, noso nequelfis: “Xemiehua, hua xenejneme”? ⁶ Pos öxö nenquematesque que naja öque onochi netlöcatl necpea deriecho necö ipan tlöltecpactle para necperdonörus tlajtlacule.

Entunes oquelfejque inu biebelatzi:

—Xemiehua. Xecöna motlapech, hua xebeya pa mochö.

⁷ Entunes inu biebelatzi omoquetz hua uya ipa ichö. ⁸ Hua inu giente, cuöc oquejtaque, omomajtejqe, hua tiechamöjqe Deus, porque yejuatzi oquetiemacaque inu checöhuallestle ca tlöltecpactlöca.

Jesús quenutzque Mateo

⁹ Hua cuöc Jesús quixoac de ompa, oquejtaque sente tlöcatl tlanecheco oyehuataya ipa sente miesa cöne caresibiroöya tomi. Ini nönca tlöcatl itucö oyeya Mateo. Hua Jesús oquelfejque:

—Xeniechtoca.

Hua yaja omajcoc, hua tietocac.

¹⁰ Hua omochi que cuöc yejuatzi yehualutaya itlac miesa ipan chöntle, nuyejque meyactie tlanechecojque ca tiehua giente tlajtlaculteque nuyejque ohuölajque omotlölico itlac miesa ca Jesús hua ca tiemachtejcöhua. ¹¹ Hua inu fariseos oquejtaque ini nönca, hua oquemelfejque tiemachtejcöhua:

—¿Tlica tlcua nemomaestro inca tlanechecojque hua ocseque tlajtlaculteque?

¹² Hua cuöc oquecajqe Jesús, oquemelfejque:

—Öque amo mocojcocha amo quenesesitöroa mierco, tlöcamo sa öque mocococha, yaja quenesesitöroa. ¹³ Xeyöcö noso, hua xectzecucö tlin quejtusneque teotlajtule cuöc quejtoa: “Icnuejtelestle necneque, hua amo bentle”. Pues naja amo nehuöla nequennutzaco tli cate yecteque ma huölöcö ca naja, tlöcamo nequennutzaco tlin tlajtlaculteque.

Tietlajtlanejqe Jesús de tlajyubelestle

14 Yecuöquenu imachtejcohua de Xohuö Bautista ohuöläjque tiecatzinco, hua oquejtojqe:

—¿Tlica tejua hua inu fariseos tetlajyubea meyacpa, pero momachtejcötzetzihua amo tlajyubea?

15 Hua Jesús oquemelfejque:

—¿Beles cuale chojchucasque tli nejnieneme ipa nesohuajtiluyo, mientras montle intlanca? Pos amo. Pero huölösque tunalte cuöc montle ayecmo oncöyes. Cuöquenu tlajyubisque. Cuöc naja ayecmo oncö neyes, tlajyubisque nomachtejcohua. 16 Sente tzotzomajtle tli ye soltec amo öque quetlamanelea ica tzotzomajtle yancuec. Pos tlö ejqueu quechihuas, inu tzotzomajtle yancuec mocototzus hua quetzomunis inu soltec, hua cache bieye iyec tzomunelestle. 17 Nimpör amo motlölea vino yancuec ijtec puxajme de cuetlaxtle tli ye solteque. Pues tlö ejqueu, puxajme tzojtzomunesque, hua vino nunuquebes, hua niempolebesque puxajme. Cache vino yancuec motlölea ijtec puxajme yancueque, hua ca inu vino hua puxajme innehua momalfea.

Jesús quenpajtejqe ichpuch tlajtoöne hua sohuatl tli quemötocac tietzotzoma

18 Hua mientras oquemelfilutaya ini nönca söstantle, oaseco sente tlajtoöne, hua tiemabesutiöya. Otieyelfe:

—Nochpuch quiemach omec. Pero xehualmobica hua xomotlölele momötzi ipa hua yaja nemes.

19 Hua onequetzaluc Jesús, hua oquetocaque, ca tiehua tiemachtejcohua. 20 Hua oyeya sente sohuatl tli ye mococoöya majtlactle huan ume xebetl ica itlapalyeso. Inu sohuatl omopacho ca tiecuetlapa, oquemötocac itienco de tietlaquie. 21 Pues quejtoöya ijtecopa: “Tlö sa necmötocas tietlaquie, nepajtes”. 22 Cache Jesús onecuepaluc, hua cuöc oquejtaque, oquejtojqe:

—Xemanimöro, nochpuch. Por tomoneltocac ye tepajtec.

Hua sa nima pajtec inu sohuatl ipa inu nieca ura.

23 Hua cuöc oaxihuato Jesús pa ichö de nieca tlajtoöne, oquemejtaque tlin tlajtlapitz-taya, hua giente lalbes cuejcueyuneya. 24 Hua yejuatzi oquemelfejque:

—Xomocaltechucö. Inin sisehuanu amo omec, tlöcamo cochteca.

Pero yejua moburlörojque de yejuatzi. 25 Hua cuöc noche giente oquemenquextejque ca queyöhuac, ocalacoac cöne oyeya sisehuanu. Ocajcojqe ca imö, hua omie inu sisehuanu. 26 Hua ini nönca söstantle omacheac ipa noche inu nieca tlöle.

Jesús quenpajtejqe unte ixcocoxcötzetzi

27 Hua cuöc oquixoac Jesús de ompa, otietocaque unte ixcocoxcötzetzi. Tzajtzejtoöya hua quejtoöya:

—Xomotlöocoltejtino por tejua, iConie David.

28 Hua cuöc yejuatzi onaxihuato ipan chöntle, ohuöläjque tietlac inu ixcocoxcötzetzi. Hua Jesús oquemelfejque:

—¿Nemoneltoca que cuale necchihuas ini nönca?

Yejua oquejtojqe:

—Quiema, Tlöcatzintle.

29 Entunses oquenmötocaque ipa imixtelolo, hua oquejtojqe:

—San quiene ca nemoneltocaque, ejqueu ma mochihua.

30 Hua imixtelolöjua ye cuale otlachixque. Hua Jesús oquennahuatejqe ca checöhuac tlajtule, oquemelfejque:

—Xecpeacö cueröro de que majcamo öque quemate.

31 Cache yejua, cuöc oquisque, otlamachestejqe ipa noche tlöle de lo que tli impa omochi.

Jesús quepajtejqe sente mumorojtzzi

³² Hua cuöc oquisque yejua, giente otiehualequelejque sente mumorojtzi, tli quepeaya demunio. ³³ Hua oquequextelejque inu diöblo, hua ca inu otlajtlajto mumorojtzi. Hua giente oquetietzöbejqe. Quejtoöya:

—Ayec omojtac ini nönca söstantle necö ipa Israel.

³⁴ Cache inu fariseos quejtoöya:

—Por ichecöhuales de inu tlajtoöne de demunios quenquextea demunios.

Jesús netlöcoltiluc por giente

³⁵ Hua Jesús biloatenemeya ipa noche ciudades hua puieblos. Otlamachtilutenemeya ipan inteopancuconehua de yejua. Tlanunutzaloöya de inu cuale tlamachestelestle de quiene Deus tlamandörurus. Tlapajtiloöya de noche cocolestle tli oyeya ipan puieblo. ³⁶ Hua cuöc oquemejtaque giente netlöcoltiluc por yejua, ipampa cuajcuasemantaya hua bejbetztaquieme cana cuöc calnielojte amo quepea calnielojpejqe. ³⁷ Yecuöquenu oquemelfejque tiemachtejcohua:

—Inu meyac giente cate quiename sente tlamochihualestle tli bieye ica. Pero tejua tli tepejpexca sa quiesquete tecate. ³⁸ Xetietlajtlötlajtelicö, noso, öque tiehuöxca inu tlatuctle, para ma quenhuaitlanecö cache meyactie tequetque para pexcasque.

10

Jesús quentitlanque majtlactle huan ume tietlateotitlanhua

¹ Yecuöquenu oquennutzque majtlactle huan ume de tiemachtejcohua, hua oquenmacaque checöhuallestle para ma cuale quenquexticö moxicoöneme, hua para cuale quepajtisque noche cocolestle hua noche tietunie. ² Hua intojtucöyo de inu majtlactle huan ume tietlateotitlanhua yejua ini nöncate: cachtö Semu, öque nuyejque mocuitea Piero, hua icni itucö Andrés; ca tiehua Jacobo, iconie Zebedeo, hua icni itucö Xohuö; ³ hua Felipe, hua Bartolomé, hua Tumös, hua Mateo inu tlanecheco, Jacobo iconie Alfeo, hua Tadeo, ⁴ hua Semu öque oyeya de inu partido cananista, hua Judas Iscariote, öque sötiepa tietiemöcte Jesús.

⁵ Yeuani majtlactle huan ume oquentitlanque Jesús, hua oquennahuatejqe, oquemelfejque:

—Amo xeyöcö ca cöne chajchönte inu giente tli amo joriojte, nimpör amo xecalaquecö ipa inpuieblos de samaritanos. ⁶ Cache xeyöcö inca togiente de Israel, tli cate quiename calnielojte tli ixniempolejtecate. ⁷ Hua cuöc nenyösque, xetlanunutztoöcö, xequejtucö: “Ye aseco tunalte para Deus tlamandörurus nemotlac”. ⁸ Xequenpajticö cocoxcötzetzi. Xequenyulebiticö tli omejmejque. Xequenpajticö tli sa söhuayojque cate. Xequenquexticö demunios. Nenqueselejque inu checöhuallestle sin que amo nenquetlaxtlöjqe niontle; xectequetilticö sin que nenqueducubrörsque niontle. ⁹ Amo xomopealticö niontle tomi ijtec nemopuxa, ¹⁰ nimpör amo xomopealticö sente morröl para pa ojtle, nimpör ume tlaquentle, nion sapötoste, nimpör cuajfortu. Pues tequetque quepea deriecho de que quetlamacasque.

¹¹ Hua cuöc nencalaquesque ipa sente ciudad noso puieblo xectiemucö öque ica de confiönsa, hua ompa xeyecö ipa ichö hasta cuöc nenquisasque de inu locör. ¹² Hua cuöc nencalaquesque ipa inu chöntle, xebendesirucö. Xequejtucö: “Ma yecsiebelestle iye ca nemejua”. ¹³ Hua tlö inu giente quemeresieroa, inu bendeseyu de yecsiebelestle tli nenquemacaque ma mocöhua ipan chöntle. Cache tlö amo quemeresieroa, ma ayecmo mocöhua inu bendeseyu de yecsiebelestle ca yejua. ¹⁴ Hua tlö canajyeca amo nemiechselis, nimpör amo queneques quecaques nemotlajtul, xequisacö de ipa inu nieca chöntle o noso puieblo, hua xectzetzelucö noche tlöle de ipa nemocxehua quiename sieñas de que inu giente amo yectequete cate. ¹⁵ Melöhuac nemiechselfea, que

ipa inu tunale cuöc Deus tlajuscörurus, cache petzotec iyec para inu nieca puieblo que para inu puieblos de Sodoma hua Gomorra tli lalebes tlajtlaculteque oyejyeya.

Giente nemiechtepotztocasque

¹⁶ Xequajtacö cuale, que nemiechtitlane quieme cana nencalnelojte intzölö coyume tiecuöneme. Por inu, xeyecö xelistos quiename cohuöme, pero amo xepapasolebecö quiename palumax amo papasol. ¹⁷ Pero xecpeacö cueröro, porque giente nemiechtiemöctisque inca tlötlajtoönejme. Ipa inteupancuconehua nemiechbitesque ca cuabetl. ¹⁸ Hasta imixpa cubernadurte hua reyes nemiechbicasque por nopampa. Ejqueu nentlatestificörusque imixtla de tlajtoönejme hua giente tli amo joriojte. ¹⁹ Pero cuöc nemiechtiemöctisque, amo xomotequepachucö por quiene nentlajtlajtusque noso tli nenquejtusque. Pos ipa inu nieca ura Deus nemiechmacasque tlajtule tli nenquejtusque. ²⁰ Pues amo nenyecque nemejua tli nentlajtlajtusque, tlöcamo yejuatzi tieEspíritu de nemoTajtzi tlajtlajtusque nemocamacopa de nemejua. ²¹ Ipa inu niecate tunalte, icni quetiemoctis icni ma meque, hua tajtle quetiemoctis iconie. Inpelhua quencuajnömequesque intötajua, hua quenmejmectisque. ²² Hua nemiechtlajyelejtusque noche giente por nopampa. Pero öque quexicus hasta cuöc tlames, yaja inu momöquextis. ²³ Cache cuöc nemiechtepotztocasque ipa sente puieblo, xecholucö ipa ocsente puieblo. Pues melöhuac nemiechelfea, que amo nenasetibe ipa noche puieblos de Israel, cuöc nehuölös naja, öque onochi netlöcatl.

²⁴ Sente machejtque amo cache bieye ica que imaestro, nimpor tlatequepano amo cache bieye que itieco. ²⁵ Pues inu machejtque ma iye confurme tlö giente quechibelisque quiename quechibelejtque imaestro, hua tlatequepano ma iye confurme tlö quetratörusque quiename itieco. Tlö naja, öque neca quiename netajtle de chöntle oniechcuitejtque neBeelzebú noso Moxicojctötlöcatl, ¿tli amo nemiechcuitisque nemejua tli nencate de nochö?

Öquenu ma tetiemabelicö

²⁶ Por inu, amo xequenmabelicö inu giente, porque amo onca niontle mojoynteca, que amo moniextis. Hua abele mojoyntas niontle, pues noche quepea que macheas. ²⁷ Lo que tli nemiechelfea ipa tlajtlayohuaquelestle, xequajtucö pan tunale. Hua tli nenquecaque sa ichtacajtzi xetlanunutzacö cöne cuale caquestes noche. ²⁸ Hua amo xequenmabelicö niecate tli cuale quemectea nemocuiervo, pero nemoölma abele quemectisque. Cache xetiembabelicö öque cuale queniempolusque nemoölma hua nemocuiervo ijtec tlecale. ²⁹ ¿Amo monamaca unte tutucucone por sente centöbo? Hua mösque ejqueu, ayec betze nion sente tutuconetzi sin tietlanequeles nemoTajtzi. ³⁰ Hua nemejua, Deus quematihua hasta itlapoal de nemotzo. ³¹ Por inu, amo xomomajticö; pos nemejua cache nenbajbalierebe que meyactie tutume.

Ma tetiereconosierucö Cristo

³² Ejqueu noso, tlö canajyeca niechtieniehuas hua tlajtus cuale de naja imixtla giente, naja nuyejque nechtieniehuas, hua netlajtus cuale de yaja tieixpa noTajtzi öque iloac elfecac. ³³ Pero tlö canajyeca niechnegörus imixpa giente, naja nuyejque necnegörus tieixpa noTajtzi öque iloac elfecac.

Uyes peleitos por tiepampa Cristo

³⁴ Amo xecpensörucö que naja onehuöla para ma ayecmo uye peleitos ipan tlöltecpactle. Amo onehuöla para nechtieniehuas siebelestle, cache mochihuas guierra porque nehuöla. ³⁵ Pues porque naja onehuöla tlöcatl iyec encuntra de itajtzi, hua ichpuchtle iyec encuntra de inöntzi, hua sohuamontle iyec encuntra de imono. ³⁶ Hua ienemigos tlöcatl yesque mismo ifamiliares. ³⁷ Öque quetlasojtla itajtzi hua inöntzi cache que naja, amo quemeresieroa iyec de naja; hua öque quetlasojtla itielpuch noso

ichpuch cache que naja, amo quemeresieroa iyés de naja. ³⁸ Hua öque amo niechtoca mös quepeas que quesufrius quiename öque quesufriroa ipa sente corujtzi, amo quemeresieroa iyés de naja. ³⁹ Öque queneques quemöquextis inemeles, quepolus; pero öque quepolus inemeles por nopampa, queniextis.

⁴⁰ 'Öque nemiechselea nemejua, nuyejque naja niechselea. Hua öque niechselea naja nuyejque tieselea yejuatzi öque niechhualtitlanque. ⁴¹ Öque queselea sente tlayulepante ipampa ica tlayulepante, queselis inu premio tli quetocöroa öque queselea sente tlayulepante. Hua öque queselea sente tlöcatl yectec ipampa ica yectec, yaja queselis inu premio tli quetocöroa öque queselea sente tlöcatl yectec. ⁴² Hua tlö canajyeca quetlöocolis sente de ini nöncate tzequetzetzi mösque sa sie xölo ötzintle itztec, porque ica nomachtejque, melöhuac nemiechselea, que seguramente quepeas ipremio.

11

¹ Hua ejqueu Jesús ye nesencöhualuc de que quennahuatejque inu majtlactle huan ume tiemachtejcöhua. Entunses obiloac de ompa otlamachtiluto hua otlannutzaluto ipa inu puieblos de ca ompa.

Xohuö Bautista comentitla imensajeros ca Cristo

² Hua Xohuö Bautista otzajtactaya ipan cörsel. Hua cuöc yaja oquemat de tli söstantle quechihualöoya Cristo, quementitla seque de imachtejcöhua. ³ para ma tietlajtlanecö Cristo:

—¿Tejuatzi tomobetzteca inu nieiloac öque hualiloasquea, o noso tetiemöcheasque ocsietzi?

⁴ Hua onöhuatihuac Jesús, oquemelfejque:

—Xeyöcö, hua xecmachesticö Xohuö noche söstantle tli nenquecactecate hua nenquetztecate: ⁵ quiene ixcocoxcötzetzi ye tlajtlachea, cucuxojtetzzi nejneme, tli sa söhuayojque pajpajte, tzatzatzetzi ye tlajtlacaque, mimejque yojyulebe, hua porubejte quecaque cuale tlamachestelestle. ⁶ Hua cuale icnupel öque amo quepoloa ineltoqueles por nopampa.

⁷ Hua cuöc yejua uyajque, opiehualuc Jesús quennunutzaloöya giente de Xohuö. Oquejtojque:

—¿Tli nenquejtato ompa cöne nionöque chönte? ¿Beles oyeya sente ohuatl que ca nobeyo cuoliniöya yejyecatl? Amo. ⁸ Cache cuöc nenquisque para nenquejtato, ¿tli nenquejtato? ¿Beles sente tlöcatl tli motlaquentiöya ca tlin cuale tzotzomajtle? Amo. Xequajtacö, que niecate tli möquea tli cuajcuale tlaquentle, ipa inchö reyes cajcate. ⁹ Cache ¿tlica nenquisque? ¿Nenquejtato sente tlayulepante? Quiema, hua nemiechselea que cache que sente tlayulepante icaca. ¹⁰ Pues yaja ini nönca Xohuö de öque tlajcuelulpanca: “Xequajtacö, naja nectitlane notlatitlantle mixpa, ma quemejmelöhua moojfe mixpa”.

¹¹ Melöhuac nemiechselea, que entre innochtie tlöca ayec otlöcatl ocsente ma cache bieye momajta que Xohuö Bautista. Cache öque lalebes tzitzequetzi ica cöne Deus tlamandöruro desde elfecac, cache bieye ica que Xohuö. ¹² Hua desde cuöc ohuöla Xohuö Bautista hasta öxö, *giente queneque ca fuiersa calaquesque ompa cöne Deus tlamandöruro. Hua tli cache pobiercojte calactecate. ¹³ Pues noche inu tlayulepantejque hua inu ley de Moisés tlajtoöya hasta que ohuöla Xohuö. ¹⁴ Hua tlö nenqueneque nenqueselisque, yaja ini nönca icaca Elías, tli huölösquea. ¹⁵ Öque quepea itlacaqueles, ma tlacaque.

¹⁶ 'Pero ¿ca tli nejcomparörus giente de nönca tiempo? Cate quiename cuöc pelalacme yejyehuatecate ipan plöza para majöbeltisque, hua quentzajtzelea incompanierojua, ¹⁷ hua quemelfea: “Amo nemajöbeltea cuale. Pos tejua tontlapitzque ca tlapitzale

* **11:12** Cuale nuyejque motradusirus: “tietlajtojçöteles Deus quepanuteca guierra, hua giente pobiercojte que-tratöroa de quetlönisque”.

para ma xomojtuticö, pero amo nemojtutejque. Otechojchualescuicaque, pero amo nenquenejque nenchojchucasque”. ¹⁸ Pues ohuöla Xohuö, hua tlajyubiöya hua amo coniya. Hua nönca giente quejtoa: “Quepea demunio”. ¹⁹ Sötiepa onehuöla naja öque onochi netlöcatl, que netlacua hua necone. Hua nönca giente quejtoa: “Xequejtacö necö sente tlöcatl lalebes tlacuöne hua tlöhuönque, que lalebes cuale mobica ca tlanechecoique hua ocseque tlöca tlajtlaculteque”. Pero cuale öque momacas cuenta que toconchijque lo que tli tlajmatque por quejtas totlachihual.

Jesús quentlajtlacaquitejque puieblos

²⁰ Yecuöquenu opiehualuc para quentlajtlacaquisque inu puieblos cöne yejuatzi oquechijque meyac tietzöbetl. Quemajajuaque ipampa amo omoyulcuepaya. Oquejtojqque:

²¹ —¡Porube de taja, pueblo de Corazín! ¡Porube de taja, pueblo de Betsaida! Ipampa tlö pa inu ciudades de Tiro hua Sidón omochihuane ini nönca tietzöbetlachihualestle tli omochi ca nemejua, ye icsa omoyulcuepane. Ye motlaquentiöne de luto hua de tlaconextle para ma quedemoströrucö que ye moyulcuejque. ²² Por inu nemiechelfea, que ipa inu tunale cuöc Deus tlajuscörurus, cache petzotec iyes para nemejua que para inu ciudades de Tiro hua Sidón. ²³ Hua taja, puieblo de Capernaum, ¿beles tecpensöroa temajcoques hasta elfecac? Pues tetemus hasta meclöncale. Ipampa tlö pa inu ciudad de Sodoma omochihuane ini tietzöbetlachihuale tli omochi ca taja, mocöhuane hasta öxö. ²⁴ Por inu nemiechelfea, que ipa inu tunale cuöc Deus tlajuscörurus, cache petzotec iyes para taja que para inu tlöle de Sodoma.

Xehuölöcö ca naja hua xomosiebicö

²⁵ Ipa inu nieca tiempo, Jesús oquejtojqque:

—Temetzmomabesutelea, noTajtzi, Tlöcatzintle de elfecac hua de tlöltecpactle, pues tejuatzi otomojyönele ini nönca sösantle de tli tlajmatque hua casojcömateneme, hua otequenmoniextelele tli cate quiename pelantzetzi. ²⁶ Pues ejqueu, noTajtzi, tomocualejtele.

²⁷ 'Noche sösantle ye niechmöctejque noTajtzi. Hua amo öque quixomate tieConietzi, tlöcamo sa yejuatzi Tajtle. Nuyejque amo öque tieixomate Tajtle, tlöcamo sa tieConietzi, hua öque tieConietzi queneques tieniextelis.

²⁸ 'Xehuölöcö ca naja nemonochtie quiejquech nentejtequete lalebes hua tli nentlajtlamömajtecate, hua naja nemiechchihualtis nemosiebisque. ²⁹ Xebicacö noyuco nemopa nemejua, hua xectzecucö de naja, que neyulsiejque hua amo mochamöhuane noyulo. Ejqueu nenquepeasque siebelestle para nemoyulo. ³⁰ Pues noyuco tli nemiechtlölelea amo yetic, hua amo yetic notlamömales.

12

Tiemachtejcöhua Jesús cualcopintöya meyöhuatl

¹ Ipa inu nieca tiempo omochi que Jesús biloatöya ipan söbro ca cöne onca tlatuctle. Joriojte quepeaya costumbre de mosiebiöya ipan söbro. Tiemachtejcöhua Jesús tejteosebeya, hua cualcopintöya hua cualcuajcuajtöya meyöhuatl de trigo. ² Hua cuöc oquejtaque inu fariseos, tieyelfejque:

—Xequejta necö momachtejcöhua quechijtebitze lo que tli amo conbenierebe ma öque quechihua pan söbro.

³ Pero yejuatzi oquemelfejque:

—¿Ayec nenquetlajtultejque tli oquechi David ca tiehua tli oyejyeya ca yaja, cuöc teosejtaya? ⁴ Pues yaja ocalac ipa tieteupa Deus, hua oquecua inu pöntzi tli oyeya de bentle, tli amo conbenierebeya ma quecua yaja nimpör tli oyejyeya ca yaja, tlöcamo sa yejua teopexcötzetzi cuale quecuösque. ⁵ O noso ¿ayec nenquetlajtultejque lo que tli quejtoa inu

ley de Moisés? Pues ipan söbro cuöc tosiebea inu teopexcötzetzi tequete ipan teopantle. Ejqueu yejua amo mosiebea ipan söbro hua amo öque quentlajtlacultea. ⁶ Pos nemiechelfea öxö que oncönca canajyetla tli cache importönte ica que inu teopantle. ⁷ Pero nemejua amo nencasojcömate tli quejtusneque teotlajtule cuöc quejtoa: “Ícnuejtelestle necneque hua amo bentle”. Pues tlö nencasojcömatene, amo nenquentlajtlacultiöne ini nöncate tlöca, pues amo cate tlajtlaculteque. ⁸ Pues naja öque onochi netlöcatl necpea deriecho para nequennahuatis giente de tli söstantle conbenierebe ma quechihuacö pan söbron tunale.

Sente tlöcatl quepeaya imö huöjqe

⁹ Hua cuöc obiloac de ompa, calacoac ipa inteupancone. ¹⁰ Hua ompa oyeya sente tlöcatl tli quepeaya sente imö ye uhuöc. Hua inu fariseos tietlajtlanejqe:

—¿Conbenierebe öque tlapajtis ipan söbron tunale cuöc tosiebea?

Ejqueu oquejtojque porque quietiemoöya manera para tietieyelfisque. ¹¹ Hua yejuatzí oquemelfejque:

—Tlö canajyeca de nemejua quepea sente icalnielo, hua tlö cana betzes ijtec sente puso ipan söbro, ¿quie beles amo cases hua quequextis? Pos quienamo quechihuas. ¹² Entunses cache ca meyac arrasu ma tequenpaliebicö giente, pues sente tlöcatl cache balierebe lalebes que sente calnielo. Ejqueu noso, conbenierebe ma mochihua tlin quale ipan söbron tunale.

¹³ Yecuöquenu oquelfejque inu nieca tlöcatl:

—Xecmelaso momö.

Hua yaja oquemelaso, hua opajtec, omoyectlöle quiename ocsente. ¹⁴ Pero cuöc oquisque inu fariseos, omotlajtulmacaque para quiene tiemectisque.

Jesús iloac tietlatequepano tlaixpejpentle de Deus

¹⁵ Jesús nemacuc cuienta de tli quepejpensöroöya yejua, hua nexeluluc de ompa. Hua meyac giente tietocaque, hua quenpajtiloöya innochie. ¹⁶ Hua yejuatzí quennahuatiloöya majcamo quejtucö öquenu oquenpajte. ¹⁷ Ejqueu opasöre para ma mochihua tli omojto por icamacopa tlayulepante Isaías, cuöc oquejto:

¹⁸ Xequejtacö necö notlatequepano, öque naja nequixpejpe.

Yaja neclasojtla, hua ica yaja pajpöque noyulo.

Nectlölis noEspíritu ipa yaja,

hua quenmachestis giente de noche naciones de quiene netlajuscörus.

¹⁹ Amo chöchalönes, nimpör amo tzajtzes,

hua cuöc tlajtlajtus ijtec cale, itlajtul amo caquestes hasta pan cayaju.

²⁰ Quentratörus ca quale tlin amo checacteque,

quiename sente tlöcatl tli amo queposteqes ohuatl mös amo checöjteca,

hua amo quesiebis miecha mös sa popucateca.

Ejqueu quechihuasque hasta senamo quechihuas para ma mochihua ipa noche tlöltecpactle lo que tli yectec.

²¹ Hua giente de noche naciones quepeasque nemöchealestle itucöyupa.

Quejtojque que Jesús quepealoöya checöhuallestle de Amo Cuale Tlöcatl

²² Yecuöquenu tiecualequelajque sente tlöcatl tli quepeaya demunio, ixcocoxque hua mumorojtzi. Hua yejuatzí oquepajtejqe, hua inu tli oyeya ixcocoxque hua mumorojtzi ye quale otlajtlajto hua ye tlacheaya. ²³ Hua noche giente oquetietzöbejqe, hua quejejtoöya:

—¿Beles yaja ini nönca iconie David öque iyes torey?

²⁴ Cache cuöc oquecajqe fariseos, oquejtojque:

—Ini nönca sa quenquextea demunios ca ichecöhuales Beelzebú, tlajtoöne de demunios.

²⁵ Pero yejuatzi quematiloöya tli yejua quepejpensöroöya, hua oquenmelfejque:

—Tlō giente de sente nación seme momejmechtejasque entre yejua mismo, pues moxexetunis inu nación. Hua tlō giente de sente puieblo o noso de sente chöntle seme momacatasque, pues nima pojpolebes inu puieblo noso chöntle. ²⁶ Hua tlō cana Satanás quetojtoca Satanás, mopeleörojteca cuntra yaja mismo. ¿Quiene noso bejcöbes itlajtoj-cöteles? Pues abele bejcöbes. ²⁷ Hua tlō naja por ichecöhuales Beelzebú nequenquextea demunios, ¿beles nenquejtusque que nemomachtejcohua nuyejque quenquextea por Beelzebú? Ejqueu yejua mismo nemiechpinöbea de lo que tli nenquejtoa. ²⁸ Pero tlō por tieEspíritu de Deus naja nequenquextea demunios, quejtusneque que de melöhuac Deus piehualuteca tlamandöruro nemotzölö. ²⁹ Pues ¿quiene cuale öque calaques ipa ichö de sente tlöcatl chejchecactec hua cuale quetlaquejquextelis de tli ihuöxca, tlō amo cachtö öque quejilpis inu tlöcatl checactec? Pues tlō ye quejilpe ye cuale öque quetlaquejquextelis noche tli quepea ipa ichö. ³⁰ Öque amo ica ca naja encuentra de naja ica; hua öque amo niechpaliebea para nejcuejcuis quechayöjteca. ³¹ Hua por inu nemiechelfea que Deus quenperdonörfisque giente de noche tlajtlacule hua checuatlajtule tli quechihua noso quejtoa. Cache inu checuatlajtule de öque tiepöpöcas Espíritu Sönto amo queperdonörfisque Deus. ³² Tlō canajyeca tlajtus encuentra de naja öque onochi netlöcatl, cuale moperdonörus. Pero tlō tlajtus tieca Espíritu Sönto, abele moperdonörus, nimpör öxö pa ini nönca tlöltecpactle nimpör sötiepa cuöc ye opanuc tlöltecpactle, abele moperdonörus.

Cuabetl mixomates por ifruto

³³ Tlō ica cuale sente cuabetl, entunses ifruto nuyejque ica cuale. Noso tlō sente cuabetl amo cuale ica, entunses nuyejque ifruto amo cuale iyes. Pues por ifruto mixomate sente cuabetl. ³⁴ ¡Tlöcaxenöchcuhuöme! ¿Quiene cuale nenquejtusque de lo que tlin cuale, tlō nemejua amo nencualteque nencate? Pos lo que tli öque quejtoa ca icamac quisa de lo que tli quetiemitea iyulo. ³⁵ Sente tlöcatl cualtec quemalfea de lo que tlin cuale ipa iyulo, hua cuöc tlajtlajtoa quequextea inu sösantle tlin cuale. Pero sente tlöcatl amo cualtec quemalfea sösantle tli amo cuale ipa iyulo, hua cuöc tlajtlajtoa quequextea de inu sösantle tli amo cuale. ³⁶ Hua nemiechelfis ini nönca, que ipa inun tunale cuöc Deus tlajuscörurus, giente quetiemasque cuenta de cara sente tlajtule tli oquejtojque. Hasta de inu tlajtulme tli amo quepexque cueröro quiene ca oquejtojque, de inu quetiemasque cuenta. ³⁷ Porque por motlajtulhua niseses tlö teca teyectec, noso por motlajtulhua niseses tlö amo teyectec, hua metzcuntenörusque.

Giente otlajtlanque sente sieñas de tietzöbetl

³⁸ Yecuöquenu onöhuatque seque de inu tlamachtioneme de teotlajtule hua seque fariseos. Oquejtojque:

—Maestro, tecneque tequejtasque de tejuatzi sente tietzöbetlachihuale quiename sieñas de que lo que tli tomojtalfea ica melöhuac.

³⁹ Hua yejuatzi onöhuatihuac, hua oquemelfejque:

—Nemejua nengiente amo nencualteque nencate hua sie tiro amo nenqueneque nentietocasque Deus. Hua öxö nenqueneque ma nemiechmaca sente sieñas. Pero amo nemiechmacas nion sente sieñas de tietzöbetl tlöcamo sa inu sieñas de inu tlayulepante Jonás. ⁴⁰ Pues quieme oyeya Jonás ijtecopa inu bieye meche yeye tunale hua yeye yohuale, ejqueu naja öque onochi netlöcatl neyes ijtec tlöle yeye tunale hua yeye yohuale. ⁴¹ Inu tlöca de inu ciudad de Nínive majcoquesque ca nemejua ipa inu nieca tunale cuöc Deus tlajuscörurus, hua nemiechpinöbisque. Pues yejua omoyulcuejque cuöc oquennunutz Jonás. Hua xequetacö necö oncönca sente cache bieye que Jonás ipa ini nönca locör, pero nemejua amo nenqueneque nemoyulcuepasque. ⁴² Inu reina de tlöle del sur majcoques ca nemejua ipa inun tunale cuöc Deus tlajuscörurus, hua

nemiechpinöbis. Pues yaja ohuöla desde lalebes ca bejca para quecaques imachesteles de Salomón. Hua xequejtacö, necö oncönca sente cache bieye que Salomón ipa ini nönca locör, pero nemejua amo nenqueneque nenquecaquesque.

Quiene ocsajpa yebitz moxicoöne

⁴³ 'Cuöc moxicoöne ye oquis de ijtecopa tlöcatl, nejnteneneme ipa tlölluöjque. Quetiemojteneme cöne mosiebis, hua amo queniextea. ⁴⁴ Yecuöquenu quejtoa: "Nocuepas ocsajpa nochö de cöne onehualquis". Hua cuöc yebitz, cualniextea tlayejteca, hua tlachpöntle hua tlayecchejchijtle. ⁴⁵ Yecuöquenu iya, hua quenbicz ca yaja oc checume moxicoöneme cache petzoteque que yaja. Cajcalaque, hua ompa mochönte. Hua sötiepa mochihua cache lalebes petzotec para inu nieca tlöcatl que cuöc cachtö oyeya. Ejqueu nuyejque nemiechpasörus nemejua, pues sie tiro amo nencualteque nencate.

Tienönajtzi hua tieicnihua de Jesús

⁴⁶ Hua mientras yejuatzi tlajtlajlutaya inca giente, necö tienönajtzi ca tiehua tieicnihua queyöhuac oyejyeya. Quenequeya tienunutzasque. ⁴⁷ Hua yeca otieyelfe:

—Xomojtele monönajtzi ca tiehua mocnijtztzihua cate ca queyöhuac; quenejneque metzmonunuchelisque.

⁴⁸ Hua oquenönquelejque yejuatzi öque tieyelfiöya inu, oquelfejque:

—¿Öquenu nonöna hua öquemeju nocnihua?

⁴⁹ Yecuöquenu oquenmajpelfejque tiemachtejcohua. Oquejtojque:

—Xequejtacö necö nonöna ca tiehua nocnihua. ⁵⁰ Pos noche öque quechihuas tli tietlanequales noTajtzi öque iloac elfecac, yaja inu icaca nocni oquechtle, noso nocni sohuatl, noso nonöna.

13

Cuiento de sente tlöcatl tli tlatucato

¹ Hua ipa inu nieca tunale, oquixoac Jesús de ipan chöntle, hua onetlöliluc itlac ötiescatl.

² Hua omopachojque lalebes meyac giente. Por inu yejuatzi ocalacoac ijtec börco hua onetlöliluc. Hua noche giente oyejyeya tlatienco. ³ Hua oquennunutzque meyac söstantle ica cuientos. Oquejtojque:

—Xejaquecö cuale. Sente tlöcatl oquis otlatucato. ⁴ Quecuasema xenöchtle. Hua omochi cuöc tlatucato, que seque xenöchtle obetz itienco ojtle; hua ohuölajque tutume, hua oquecuajque. ⁵ Hua ocseque obetz ipa locör cöne lalebes tecamac, cöne amo quepeaya meyac tlöle. Oquis sa nima, pues tlöle amo teröhuac oyeya. ⁶ Pero cuöc oquis tunale, opeli hua uhuöc, pues amo monelhuayute. ⁷ Hua ocseque obetz ipa betztle; hua betztle omobepö, hua quepöztzmete tlatuctle. ⁸ Hua seque obetz ipa tlin cuale tlöle, hua ini nönca otlamochihualte. Seque oasec hasta sie sientos töntos, seque hasta sesenta, hua seque hasta treinta töntos. ⁹ Öque quepea itlacaqueles, ma tlacaque.

Tlica Jesús cusörojque cuientos

¹⁰ Entunses omopachojque tiemachtejcohua, hua tieyelfejque:

—¿Tlica tequenmonunuchelea ica cuientos?

¹¹ Hua yejuatzi onöhuatihuac, hua oquemelfejque:

—Nemejua nemiechtocöroa nenquematesque inu secrietos de quiene ca Deus tlamandörurus desde elfecac. Pero yejua amo quentocöroa quematesque. ¹² Pos tiel öque quepea, quemacasque, hua quepeas cache meyac. Pero öque amo bel quepea, quequextelisque hasta inu tepetzli tli oc quepea. ¹³ Ipampaju nequennunutzca ca cuientos, ipampa mös tlachea cuale, pero amo quejta, hua mös tlacaque, pero amo queyejcaque, nimpör amo casojcomate. ¹⁴ Hua ejqueu mochihua inca yejua lo que tli queyulepantejque Isaías, cuöc oquejto:

Ca nemotlacaqueles nentlacaquesque, pero amo nencasojcömatesque, hua ca nemoixtelolajua nenquejtasque, pero amo nenquixomatesque.

¹⁵ Pues inyulo de ini nönca puieblo ye omotepitzo, hua amo yectlacaque itlacaqueles, hua omotlapachojque inmixtelolajua para amo quejtasque ca inmixtelolo, nimpor amo tlacaquesque ca intlacaqueles, nimpor amo casojcömatesque ca inyulo, nimpor amo moyulcuepasque para que ejqueu naja amo nequenpajtis.

¹⁶ Pero cuale nemocnupel nemejua, ipampa nenquejta ca nemixtelolajua, hua nentlajtlacaque ca nemotlacaqueles. ¹⁷ Pues melöhuac tli nemiechelfea, que meyactie tlayulepantejque hua yecteque de pa nieca tiempo quenejnequeya quejtasque tli nenquejta, pero abele quejtaque; hua quenejnequeya quecaquesque tli nenquecaque, pero abele oquecajque.

Jesús quesplícörojque inu cuiento de tlöcatl tli tlaturato

¹⁸ Xejcaquecö nemejua noso tli quejtusneque inu cuiento de tlöcatl tli tlaturato. ¹⁹ Cuöc canajyeca quecaque tlajtule de quiene Deus tlamandörurus, hua amo casojcömate, entunses yebitz inu Amo Cuale Tlöcatl, hua cajcoctebetse tli omotucac ipa iyulo. Yaja ini nönca quiename xenöchtle tli omotucac itienco ojtle. ²⁰ Hua inu xenöchtle tli omotucac cöne tecamac, yaja ini nönca öque quecaque tlajtule, hua nima queselea ca meyac pöquelestle. ²¹ Pero mochihua quieme cana inu tlajtule amo monelhuayutea de melöhuac ipa iyulo. Pues ipa yebitz tiecoco noso cox giente quetepotztoca por ipampa teotlajtule, hua nima modesanimöroa. Sa quiesque tiempo quexicoa. ²² Öxö, inu xenöchtle tli omotucac itzölö betztle, pues yaja inu icaca öque quecaque tlajtule, pero quetequepachoa söstantle de ini nönca tlöltecactle, hua mixcajcayöhua ca tomi. Hua ini nöncate söstantle quieme quepöztmectea teotlajtule ipa iyulo. Yaja ica teotlajtule amo quepea resultödo ica yaja. ²³ Cache inu xenöchtle tli omotucac ipan tlin cuale tlöle, ini nönca yaja öque quecaque hua casojcömate inu teotlajtule. Hua yaja quechihua de noche tlin cuale tlachihuale, quieme cana tlö sente xenöchtle quietiomasquea ca sie sientos töntos, hua ocsente ca sesenta hua ocsente ca treinta töntos.

Cuiento de xebetl itzölö trigo

²⁴ Hua ocsente cuiento oquenpubelejque. Oquemelfejque:

—Cuöc Deus tlamandöruro ica ejqueyi: ica quiename sente tlöcatl tli quetucac tlin cuale xenöchtle ipa itlö. ²⁵ Pero cuöc ocochtaya tlöca, ohuöla ienemigo, hua oquetucac xebetl itzölö trigo hua uya. ²⁶ Hua cuöc trigo omobepö hua oquetlöle imeyöhua, yecuöquenu onies nuyejque inu xebetl. ²⁷ Hua ohuölajque tlatequepanojque de inu nieca chöne, hua oquelfejque: “Tlöcatzintle, ¿amo tomotuquele cuale xenöchtle ipa motlöltzi? ¿De cöne, noso, quepea xebetl?” ²⁸ Hua yaja oquemelfe: “Sente tlöcatl enemigo oquechi ini nönca”. Hua itlatequepanojua oquelfejque: “¿Tomonequitea noso ma teyöcö hua ma tejcojcopinacö?” ²⁹ Hua yaja oquejto: “Amo, pues tlö nenquecopinasque xebetl, nuyejque ihua nenquecopinasque trigo. ³⁰ Cache cuale xejcöhuacö ma mobepöhuacö innehua hasta senamo cuöc moteques. Hua cuöc ye moteques naja nequemelfis inu tlatejque: Xejcujcucö cachtö yaja xebetl, hua xequeljpicö hua xecxutlalticö. Sötiepa xejcujcucö trigo hua xecualecacö para nectiemas ijtec nobesco”.

Cuientos de mostöza hua levadura

³¹ Ocsente cuiento oquenpubelejque. Oquemelfejque:

—Cuöc Deus tlamandöruro desde elfecac icaca quiename ixenöch mostöza, que sente tlöcatl ocasesc hua oquetucac ipa itlö. ³² Ini nönca mostöza de melöhuac yaja icaca cache

tzitzequetzi que noche sösantle xenöchtle, cache cuöc ye mobepöhua, yaja icaca cache bieve de noche sösantle queletl, hua mochihua quiename sente cuabetl. Hasta bitze tutume tli patlöne ipa yejyecatl hua ompa quetlölea intepasol ipa imömöyo.

³³ Ocsente cuiento oquemelfeque:

—Cuöc Deus tlamandöruro desde elfecac, icaca quiename levadura de pöntzi, que ucö sente sohuatl, hua quenelulte ca yeye tlatemachihuale de harina, hua noche oquesunie.

Jesús seme cusörojque cuientos

³⁴ Noche ini nönca sösantle Jesús oquennunutzaloöya giente por medio de cuientos. Sin cuientos cöso amo tli quennunutzaloöya. ³⁵ Ejqueu omochi lo que tli omojto por icamacopa tlayulepante, cuöc oquejto:

Nectlapus nocamac para necpoas cuientos.

Nequejtus sösantle tli mojoyöntaya desde cuöc omochejchi tlöltecpactle.

Jesús quesplícörojque inu cuiento de xebetl

³⁶ Yecuöquenu Jesús oquencöjtiejque giente, hua ocalacoac ipan chöntle. Hua omopachojque tietlac tiemachtejcöhua. Otieyelfeque:

—Xetiechmoesplícörfele inu cuiento de xebetl tli omotucac itzölö tlatuctle.

³⁷ Hua yejuatzi onöhuatihuac. Oquejtojque:

—Naja, öque onochi netlöcatl, naja necaca inu tlöcatl tli quetuca inu cuale xenöchtle.

³⁸ Hua inu tlöle yaja noche tlöltecpactle. Hua inu tlin cuale xenöchtle yejua giente tli quepeasque pörte cöne Deus tlamandöruro. Hua inu xebetl yejua giente tli queneltoca Amo Cuale Tlöcatl. ³⁹ Hua inu enemigo öque quetucac xebetl, yaja Diöblo. Hua inu tiempo cuöc tlatequesque, yaja iyes cuöc itlamejyo tlöltecpactle. Hua inu tlatejque, yejua öngeles. ⁴⁰ Hua ejqueu quieme cuöc quecuejcueque inu xebetl hua quexutlaltejque ijtec tletzintle, ejqueu mochihuas cuöc tlamas ini nönca tlöltecpactle. ⁴¹ Naja öque onochi netlöcatl necualentitlanes noöngeles. Yejua quenpejpenasque de ipa notlajtojcöyo noche niecate tli quenchiualtea giente para majcamo moneltocacö, hua noche ocseque tli amo cuale quechijtecate. ⁴² Hua quentlajcalesque ijtec tlecale cöne xutlateca. Ompa chojchucasque hua motlantesesque. ⁴³ Yecuöquenu tli yecteque tlanixtisque quiename tunale ompa cöne tlamandöruro inTajtzi. Öque quepea itlacaqueles, ma tlacaque.

Yeye cuientos

⁴⁴ Cuöc Deus tlamandöruro, icaca quiename sente tesoro tli mojoyöntaya ipan tlöle. Hua sente tlöcatl oqueniexte, hua entunses oquejyö ocsajpa. Hua ca meyac pöquelestle unya, hua quenamacac noche tli quepeaya, hua oquecu inu nieca tlöle.

⁴⁵ 'Ocsajpa, cuöc Deus tlamandöruro icaca ejqueyi: icaca quiename sente tlöcatl puchtiecatl tli quetiemoöya tlin cuajcual perlas. ⁴⁶ Hua yaja oqueniexte sente perla tli lales balierebeya. Entunses yaja uya hua oquenamacac noche tli quepeaya, hua oquecu.

⁴⁷ 'Ocsajpa, quiene Deus tlamandöruro icaca quiename sente tarröya, que quetlajcalque ijtec lamör, hua oquemasec de noche sösantle mimechte. ⁴⁸ Hua cuöc ye otie, oquequextejque ca tlatienco. Hua omotlölejque, hua oquemaseque tlin cuajcual hua oquentlölejque ijtec incheque. Hua tlin amo cuajcual oquenchayöjque. ⁴⁹ Ejqueu iyes cuöc tlamas tlöltecpactle. Quisasque öngeles hua quennencuaxelusque tlin amo cualteque de intzölö tli yecteque. ⁵⁰ Hua quentlajcalesque ijtec tlecale cöne xutlateca. Ompa chojchucasque hua motlantesesque.

Tesoro tli yancuec hua tli soltec

⁵¹ Quemelfiloöya Jesús:

—¿Ye nencasojcömatque ini nönca sösantle?

Yejua onöhuatque:

—Quiema, Tlöcatzintle.

⁵² Hua yejuatzí oquemelfejque:

—Por inu noche tlamachtione de inu ley de Moisés tli nuyejque ye oquetzeco quiene Deus tlamandöruro, yaja icaca quiename sente chöne, que quequextea de itesoro söstantle tli yancuec hua nuyejque tli soltec.

Giente de Nazaret amo omoneltocaque tieca Jesús

⁵³ Hua omochi que cuöc oquesencöjque Jesús ini nöncate cuientos, obiloac de ompa.

⁵⁴ Hua ohualiloac pa tiepuieblo. Hua quenmachtiloöya giente ipan teopanconetzi. Hua ca inu yejua quetietzöbejtaya, hua quejtoöya:

—¿De cöne quepea ini nöncia ini machestelestle, hua ini nöncia checöhualestle para quechihuas tietzöbetl? ⁵⁵ ¿Amo yaja ini nöncia iconie calpintiero? ¿Amo itucö inöntzi María, hua icnihua Jacobo hua Josie, hua Semu, hua Judas? ⁵⁶ Hua icnihua sohuame, ¿amo oncö cate totlac? ¿De cöne, noso, quepea ini nöncia ini söstantle?

⁵⁷ Hua por inu amo quecualajtaya giente. Cache Jesús oquemelfejque:

—Ca nobeyo giente queyequejta sente tlayulepante, pero ipa ipuieblo hua ipa ichö amo öque ipa quejta.

⁵⁸ Hua ompa amo oquechijque meyac tietzöbetl, ipampa amo moneltocaya yejua.

14

Quiene omec Xohuö Bautista

¹ Ipa inu niecate tunalte Herodes inu tetrarca noso rey oquecac tiechamöhuales de Jesús. ² Hua oquemelfe itlatequepanojua:

—Ini nöncia yaja Xohuö Bautista. Yaja ye oyule de intzölö mimejque, hua por inu quechihua bieye tlachihualestle.

³ Pues Herodes ye icsa otlanahuate para ma casecö Xohuö, hua ma quejilpicö ca carienajte, ma quetzacuacö ipan cörsel. Pos ejqueu oquechi Herodes porque yaja mismo Herodes oquesohuacuejcuele icni Felipe. Inu sohuatl itucö oyeya Herodías. ⁴ Hua Xohuö quelfiöya Herodes:

—Amo cuale tecpexas inu sohuatl.

⁵ Hua Herodes quemectisquea Xohuö, pero quemabeliöya puieblo ipampa puieblo quejtoöya que Xohuö oyeya sente tlayulepante de Deus. ⁶ Pero oquechijque yelfetl ipa icumpleaños de Herodes, hua ichpuch Herodías omojtute innepantla giente. Hua oquecualajtac Herodes. ⁷ Ca inu oqueprometierfe hua oquejurörfe nele quemacas noche tli yaja tlajtlanes. ⁸ Hua inu sisehuantu oquetlajtlanele lo que tli oquelfe inöntzi. Oquejto:

—Xeniechmomaquele necö ipa sente plöto itzonteco de Xohuö Bautista.

⁹ Hua cuöc oquecac omotequepacho lalebes inu rey. Pero ipampa ye oquejuröro para quemacas hua oquecajque innochie tli tlajtlacuajtaya ca yaja, otlanahuate ma quemacacö. ¹⁰ Hua otlatitla, hua oquequechtejque Xohuö ipan cörsel. ¹¹ Hua oquehualecaque itzonteco ipan plöto, hua oquemacaque inu sisehuantu. Hua yaja oquebiquele inöntzi. ¹² Yecuöquenu imachtejcöhua de Xohuö oaseco. Ocajcojque icuierpo, hua oquetlölpachuto. Hua uyajque, hua tiepubelejque Jesús.

Jesús quentlacualtejque cinco mil tlöca

¹³ Hua cuöc oquecajque Jesús, onenencuaxeluluc de ompa ipa sente börco, hua obiloac ipa sente locör cöne nionöque chönteya. Pero giente oquematque, hua meyactie giente de inu puieblos tietocaque sa icxepa. ¹⁴ Hua ohualiloac Jesús, oquemejtaque inu meyac giente. Hua tietlöocoltejque, hua oquenpajtejque tli de yejua mocojcocoöya. ¹⁵ Hua cuöc ye yohuac, omopachojque tiemachtejcöhua tietlac. Otieyelfejque:

—Amoyetla chöntle ca necö, hua ye yohuac tecate. Xequenmotitlanele giente noso, para ma yöcö pa puieblos ma mocubicö tlacuale.

¹⁶ Hua Jesús oquemelfejque:

—Amo quepea tli ipampa yösque. Xequentlamacacö nemejua.

¹⁷ Hua yejua oquejtojque:

—Amo tli tecpejpea necö tlöcamo sa möcuile pöntzi hua unte mimechte.

¹⁸ Hua yejuatzi oquemelfejque:

—Xeniechhualequelicö necö.

¹⁹ Hua yejuatzi quennahuatejque giente ma motietiecacö ipa sacatl. Entunses ocönque inu möcuile pöntzi hua inu unte mimechte. Ajcopatlachealuc ca elfecac, oqueteochijque tlacuale, hua quecocototzque. Entunses oquenmacaque inu pöntzi ca tiemachtejcohua, hua tiemachtejcohua quenxiexelfejque giente. ²⁰ Pos otlacujque innochie hasta cöne ijixbeque. Hua oquepejpenque majtlactle huan ume chequejme tietieme de lo que tli omocö de inu cojcototec. ²¹ Hua tli otlacujque oyejyeya quiename möcuile mil tlöca, sin mopoasque sohuame nimpör pelantzetzti.

Jesús onejnemoöya ipa ötiescatl

²² Nima Jesús oquenchihualtejque ma calaquecö tiemachtejcohua ijtec börco, hua ma yöcö cachtö que yejuatzi ca nepa löro de ötiescatl, mientras yejuatzi quentitlaniloöya giente para ma yöcö. ²³ Hua cuöc ye innochie oquentitlanque, yejuatzi otlejcoac ipa tepietl netlölajtiluto. Hua cuöc cache ye yohuac, yejuatzi turavea iloaya ompa tiesiel.

²⁴ Hua mientras, inu börco oyeya bejca de itienco ötiescatl. Hua ötzintle ipa huölöya ipampa bel yejyecataya cuntra yejua. ²⁵ Hua ca ise quieme entre yeye hua checuasie ura, Jesús ohualiloac intlac, hualnejnemoataya ipa ötiescatl. ²⁶ Hua cuöc tieijtaque tiemachtejcohua quiene hualnejnemoatöya icpac ötiescatl, omomajtejque. Oquejtojque:

—Icaca sente mejque.

Hua majcötzejtzeque. ²⁷ Cache nima Jesús oquennutzque, oquemelfejque:

—Xomoyulölicö; naja necaca. Amo xomomajticö.

²⁸ Yecuöquenu otienönquele Piero, hua oquejto:

—Tlöcatzintle, tlö tejuatzi tomobetzteca, xomotlanahuatele ma nuyejque naja ma neya ca tejuatzi hua ma nenejnemete ipa ötzintle.

²⁹ Hua yejuatzi oquejtojque:

—Xehuöla.

Hua cuöc otemuc de ipa börco, onejnemeya ipa ötzintle hua tienömequeto Jesús. ³⁰ Cache cuöc oquejtac checöhuac yejyecatl, omomajte, hua opie opötzcalactöya. Entunses otzajtzec, oquejto:

—Tlöcatzintle, xeniechmomöquextele.

³¹ Hua sa nima Jesús omösohualuc, oquequitzejque, hua oquelfejque:

—Oh tlöcatl amo moneltocane, ¿tlica amo tomoneltocac?

³² Hua cuöc yejuatzi ca Piero ocajcalacoac ijtec börco, omoquetz yejyecatl.

³³ Yecuöquenu tli oyejyeya ipa börco ohuölajque hua tiemabesutejque. Oquejtojque:

—De melöhuac tejuatzi tomobetzteca tetieConietzi Deus.

Jesús quenpajtejque meyactie cocoxcötzetzi ipa locör itucö Genesaret

³⁴ Cuöc ye opanuque ca nepa löro, huajualiloac ipan tlöle de Genesaret. ³⁵ Hua tieixomatque inu niecate tlöca de ipa inu nieca puieblo. Entunses otlatitlanque ca nobeyo de ipa inu nieca tlöle, hua oquenhualECAQUE tieca yejuatzi noche cocoxcötzetzi.

³⁶ Hua tietlajtlötlajtiöya ma quemötocacö sa siquiera itienco tietlaquie. Hua noche tli oquemötocaya, opajteya.

15

Lo que tli quisa de ipa iyulo tlöcatl inu quemajmöhua

¹ Yecuöquenu ohuölajque seque fariseos hua tlamachtioneme de teotlajtule de ipa Jerusalén. Otieyelfejque:

² —¿Tlica momachtejcohua amo quemalfea inu costumbres de tobiebetcohua? Pues amo momöpajpöca cuöc tlacua.

³ Hua yejuatzí onöhuatihuac, oquemelfejque:

—¿Tlica nuyejque nemejua sa nenquepanabea tiemandamiento de Deus ipampa nemocostumbres? ⁴ Pues Deus oquejtojque: “Pa xequejta motajtzi hua monöntzi”. Nuyejque oquejtojque: “Öque checuatlajtus encuntra de itajtzi hua inöntzi, ma meque sin remedio”. ⁵ Pero nemejua nenquejtoa: “Cuale öque quelfis itajtzi noso inöntzi: Ayojcuele yetla temetzmotlöocolelis porque ye netietlöocole Deus”. ⁶ Entunses nemejua nenquejtoa que inu tlöcatl ayecmo quepeas obligación para ipa quejtas hua quepaliebis itajtzi. Ejqueu nenquejtlacoa tietlajtultzi Deus por nemocostumbres. ⁷ ¡Sa ume nemoxöyac! Cuale otlanunutz de nemejua inu tlayulepante Isaías, cuöc oquejto:

⁸ Ini nönca puieblo sa ca itlajtul niechmabesutea, cache inyulo icaca bejca de naja.

⁹ Pero san tlapic niechmabesutea, pues tlajtlamachtea sa inmandamientos de tlöca quiename tlö oyene lo que tli tiechmachtilo Deus.

¹⁰ Hua quennutzque noche giente ca tietlac. Oquemelfejque:

—Xejcaquecö, hua xecasojcömatecö. ¹¹ Lo que tli calaque ca pa icamac tlöcatl, inu amo tlamajmöhua. Pero lo que tli quisa de ijtec icamac tlöcatl, yaja inu quemajmöhua.

¹² Yecuöquenu omopachojque tiemachtejcohua. Otieyelfejque:

—¿Tomomachitea que fariseos cuöc oquecajque ini nönca tlajtule ocuajcualönque?

¹³ Cache yejuatzí onöhuatihuac, oquejtojque:

—Noche plönta tli amo oqueplantörojque noTajtzi öque elfecac iloac, mocojcopinas.

¹⁴ Xequencöhuacö: cate quiename ixcocoxcoztetzi tli quenejneque quenyecönasque ocseque ixcocoxcoztetzi. Pos tlö sente ixcocoxque queyecönas ocsente ixcocoxque, inehua betzesque ijtec coyocle.

¹⁵ Yecuöquenu onöhuat Piero, otieyelfe:

—Xetiechmoesplicörfele inu cuiento.

¹⁶ Hua Jesús oquejtojque:

—¿Nuyejque nemejua ayemo nencasojcömate? ¹⁷ ¿Amo nencasojcömate que noche tli calaque ijtec icamac tlöcatl iya ipa ijte, hua quisa ca icuetlapa? ¹⁸ Cache tli quisa ipa icamac yebitz de ijtec iyulo, hua yaja inu quemajmöhua tlöcatl. ¹⁹ Pos itech yulojtle quisa inu amo cuale pensamientos, öque tlamectea, öque tlaumepea, öque mopöctea ca ocsente tli amo isohua noso amo inömec, öque tlachteque, öque istlacadlajtoa, öque checuatlajtoa. ²⁰ Noche ini nönca söstantle quemajmöhua tlöcatl. Pero tlö quejtus tlacuös sin momöpajpöcas, inu amo quemajmöhua tlöcatl.

Moneltocac sente sohuatl cananea

²¹ Hua cuöc oquixoac Jesús de ompa, obiloac ipa tlölte tli cate itlac puieblo de Tiro hua puieblo de Sidón. ²² Hua necö sente sohuatl cananea, que hualquis de ipa inu nieca tlöle, tzajtzeja. Quejtoöya:

—Tlöcatzintle, iConie David, xomopile icnuejtelestle de naja. Nochpuch lalebes quepea tiecoco de sente demunio.

²³ Cache yejuatzí amo quenönqueliloöya nion sente tlajtule. Entunses omopachojque tiemachtejcohua, hua tietlölajtejque, tieyelfejque:

—Xomonahuatele para ma beya, pues lalebes tzajzeteneneme tocuetlapa.

²⁴ Hua yejuatzí onöhuatihuac, oquejtojque:

—Amo niechtitlanque Deus para nequenpaliebis ocseque giente, tlöcamo sa inu giente de Israel, que cajcate quiename calnielojte tli ixniempolejtecate.

²⁵ Yecuöquenu ohuöla sohuatl hua tiemabesute. Oquejto:

—Tlöcatzintle, xeniechmopaliebele.

²⁶ Hua onöhuatihuac yejuatzi, oquejtojqe:

—Amo conbenierebe nemiechmacas nemejua lo que tli quentocöroa joriojte. Pos tlöjcu uyesquea quiename tlö öque cönane pöntzi de pelantzetzi hua quentlajcaleliöne checheme.

²⁷ Cache yaja oquejto:

—Melöhuac, Tlöcatzintle; pues nuyejque checheme quecua perösojcucone tli betze itzintla miesa cöne tlajtlacua intiecohua.

²⁸ Yecuöquenu onöhuatihuac Jesús, oquejtojqe:

—Oh sohuatl, lalebes bieye moneltoqueles. Ma mochihua san quiene ca taja tecneque.

Hua opajtec ichpuch ipa nieca ura.

Jesús quenpajtejqe meyac giente

²⁹ Hua cuöc biloac Jesús de ompa, ohualiloac itlac ötiescatl de Galilea. Hua otlejcoac ipa tepietl. Ompa onetlöliluc. ³⁰ Hua ohuölajque tieca meyactie tlöca, que ompa quenbicaya cucuxojtzetzi, ixcocoxcötzetzi, poteme, mömöncojtzetzi, hua ocseque meyactie cocoxcötzetzi. Hua oquentlölejque tieicxetla Jesús, hua yejuatzi oquenpajtejqe. ³¹ Hua ca inu quietietzöbejtaya noche giente, cuöc oquejtaque tlajtlajtoa poteme, mömöncojtzetzi ya opajpajteque, cucuxojtzetzi ye nejneme, hua ixcocoxcötzetzi tlajtlachea. Hua giente tiemabesutiöya Deus öque iloac Deus de Israel.

Jesús quentlamacaque nöbe mil tlöca

³² Hua Jesús oquennutzque tiemachtejcöhua. Oquemelfejque:

—Niechtlöocoltea nöncate giente por que ye quepea yeye tunale que notlac cate hua amo quepea tli quecuösque. Hua amo necneque nequentitlanes ma yöcö sin tlacuösque, majcamo cana iye que abele cöhuantörusque ipa ojtle.

³³ Entunes tiemachtejcöhua otieyelfejque:

—¿Quiene tecpeasque tejua meyac pöntzi necö cöne nionöque chönte, para tequenmexbiltisque tönto lalebes meyac giente?

³⁴ Hua Jesús oquemelfejque:

—¿Quiejquech pöntzi nenquepea?

Hua yejua oquejtojqe:

—Checume, hua nönöjtetzi mimechte.

³⁵ Hua oquennahuatque tlöca ma motlölicö tlölpa. ³⁶ Entunes ocönque inu checume pöntzi hua mimechte, hua tietlasojcömatelejque Deus. Entunes oquencojcototzque pöntzi hua mimechte hua oquenmacaque tiemachtejcöhua. Hua tiemachtejcöhua quenmacaque inca tlöca. ³⁷ Hua otlacuajque innochie, hua oijixbeque. Hua ocajcojqe tli cojcotoctec omocö checume pescunchequejme tietieme. ³⁸ Hua tli otlacuajque oyejyeya nöbe mil tlöca, sin mopoasque sohuame hua pelantzetzi. ³⁹ Yecuöquenu oquentitlanque noche giente ma yöcö. Hua ocalacoac ijtec börco, hua ohualiloac ipan tlöle itucö Magadan.

16

Quenejnequeya ma Jesús quechihuacö sente sieñas de Deus

¹ Yecuöquenu oaseco inu fariseos ca tiehua saduceos para tieprobörusque. Tietlajtlanelejque sente tietzöbetlachihuale quiename sieñas de que Deus tiepaliebiloöya. ² Cache yejuatzi onöhuatihuac, oquemelfejque:

—Cuöc ye ca ye yohuac tunale, nenquejtoa: “Öxö cuale tiempo huölös ipampa tlachichiliebe”. ³ Hua ca ise nenquejtoa: “Öxö öyejyecas ipampa tlachichiliebe elfecac hua mextieme”. Cuale nenquemate nequixnenebelisque tli onca ixpa elfecac, pero abele nencasojcömate inu sösantle tli cate quiename sieñas de lo que tli mochihuas ipa ini nönca tiempo. ⁴ Nemejua nencate nengiente amo nencualteque, hua sie tiro amo nenqueneque nentietocasque Deus. Hua öxö nenqueneque ma nemiechmaca sente sieñas. Pero amo nemiechmacas nion sente sieñas de tietzöbetl tlöcamo solamente inu sieñas de Jonás tlayulepante.

Hua oquencöjtiejque, hua obiloac.

Levadura de fariseos

⁵ Hua cuöc ohuölajque tiemachtejcohua hasta pa inu löro ötiescatl, oquencöjque de quehualecasque pöntzi. ⁶ Hua Jesús oquemelfejque:

—Xequejtacö. Xomotlachilicö de inu levadura de fariseos hua de saduceos.

⁷ Yejua molfejtaya, oquejtoöya:

—Yejuatzi quejtulo ejqueu ipampa amo otecualcaque pöntzi.

⁸ Ocasojcömatque Jesús, hua oquejtojque:

—¿Tlica nemolfea nemotzölö de que amo nenquepea pöntzi? Lalebes nemiechpoloa neltoquelestle. ⁹ ¿Quie ayemo nencasojcömate, nimpör amo nenquelnömeque de inu möcuile pöntzi tli omoxiexeløjque intzölö möcuile mil tlöca, hua quiejquech chequejme nencajcojque? ¹⁰ ¿Nimpör amo nenquelnömeque de inu checume pöntzi tli omoxiexeløjque intzölö nöbe mil, hua quiejquech pescunchequejme nencajcojque? ¹¹ ¿Quiene noso ayemo nencasojcömate? Pues amo nemiechonelfe ipampa pöntzi. Pero xomotlachilicö de inu levadura de fariseos hua de saduceos.

¹² Entunses ocasojcömatque quiene amo oquemelfiloöya ma motlachilicö de levadura de pöntzi, tlöcamo cache ma motlachilicö de inenseñönsas de fariseos hua de saduceos.

Piero oquejto que Jesús iloac Cristo

¹³ Hua cuöc ohualiloac Jesús ca tlöle itlac puieblo itucö Cesarea de Filipo, oquentlajtlanejque tiemachtejcohua. Oquemelfejque:

—¿Öquenu quejtoa giente que necaca naja öque onochi netlöcatl?

¹⁴ Hua yejua oquejtojque:

—Pos seque quejtoa que Xohuö Bautista, hua seque que nele inu tlayulepante Elías, hua ocseque que nele Jeremías, noso beles ocseque tlayulepante de tli pa nieca tiempo tlajtlajtoöya de pörte de Deus.

¹⁵ Hua yejuatzi oquemelfejque:

—Hua nemejua, ¿öquenu nenquejtoa tlö naja necaca?

¹⁶ Hua onöhuat Semu Piero, oquejto:

—Tejuatzi tomobetzteca teCristo, öque Deus metzmixpejpenelejque. Tejuatzi tetieConietzi de Deus, öque nemoa.

¹⁷ Entunses onöhuatihuac Jesús, oquelfejque:

—Cuale mocnupel, Semu, iconie Jonás. Pos amo yeca tlöcatl metzmacheste ini sösantle, cache metzmachestejque noTajtzi öque iloac elfecac. ¹⁸ Cache naja nuyejque temetzelfe, que taja tecaca tePiero (quejtusneque Tietetu). Hua ipa ini nönca tietebiebentzi necchejchihuas noiglesia de innochie creyentes. Hua noche ichecöhuales de inu meclöncale abele quexexicus. ¹⁹ Hua taja temetzenmacas yöbejte de elfecac cöne Deus tlamandöruro. Hua noche tli tectzacuelis ipa ini nönca tlöltecpactle iyeyes lo que tli motzacuelea ompa elfecac, hua noche tli tectlöcayejtas ipan tlöltecpactle iyeyes lo que tli motlöcayejta ompa elfecac.

²⁰ Yecuöquenu oquennahuatejque tiemachtejcohua majcamo öque quelficö tlö yejuatzi iloac inu Cristo öque Deus tieixpejpenque.

Jesús tlamachestejque que micoas

²¹ Desde ipa inu niecate tunalte Jesús piehualuc quenmachestiloöya tiemachtejcohua nele tieconbenieroöya ma biloa ca Jerusalén, hua ma quesufrirucö meyac söstantle tli tiechibelisquea biebentzetzi hua jefes de teopexcötzetzi hua tlamachtioneme de teotlajtle. Nuyejque tieconbenieroöya ma tiemecticö, hua ma yulebihua ipa yeye tunale.

²² Entunes Piero tieasec hua tieajajuac, otieyelfe:

—Tlöcatzintle, majcamo metzmpasörfe ini nönca. Ayec ejqueu mopantzinco betzes ini söstantle.

²³ Pero yejuatzi onecuepaluc. Oquelfejque Piero:

—Xebeya de naja, Satanás. Taja tecaca para naja quiename sente tietetu cöne noteputlames. Pues taja amo tomofijöroa de söstantle tli de Deus tlöcamo sa tli de tlöca.

²⁴ Yecuöquenu Jesús oquemelfejque tiemachtejcohua:

—Tlö canajyeca queneques niechtocas, majcamo quechihua lo que tli sa yaja queneque, tlöcamo ma niechtoca mös quepeas que quesufrirus quiename öque que-sufriroa ipa sente corujtzi. ²⁵ Pos öque beletes queneques quemalfis inemeles, quixniempolus. Hua öque beletes quetiempocas inemeles nopampa, queniextis. ²⁶ Pos ¿tli para serbirebes tlö sente tlöcatl quetlönes noche tlöltecpactle pero quixniempolus inemeles? ¿Noso tli quemacas sente tlöcatl para ocsajpa quepeas inemeles? ²⁷ Pues naja que onochi netlöcatl nehuölös ipa tietlaniexteles de noTajtzi inca noöngeles, hua entunes nequentlaxtlöbelis cara sesen tlöcatl san quiene ca itlachihual. ²⁸ Melöhuac nemiechelfea, que seque de tli oncö nencate amo nenmejmequesque hasta senamo nenquejtasque quiene naja que onochi netlöcatl nehuölös para netlamandörus.

17

Jesús necuepaluc ocsie

¹ Sötiepa de checuasien tunale, Jesús oquemaxihuato Piero ca tiehua Jacobo hua Xohuö icni Jacobo. Oquenbicaque nencua ipa sente tepietl bejcapa. ² Ompa necuepaluc ocsie imixtla. Hua tzotzotlacaya tiexöyac quiename tunale, hua tietlaquie omochi istöc quiename tlöbile. ³ Hua moniextejtequisque Moisés ca Elías, hua yejua tlajtlajtoöya ca yejuatzi. ⁴ Yecuöquenu Piero otieyelfe Jesús:

—Tlöcatzintle, cuale que oncö tecate. Tlö tomonequitea, naja nequenchejchihuas necö yete cuajtlapame: sente para tejuatzi, hua sente para Moisés, hua ocsente para Elías.

⁵ Hua cuöc yaja oc tlajtlajtojta, necö sente mextle de tlöbile oquentlapacho. Hua necö sente tlajtule ijtec mextle oquejto:

—Yaja ini nönca notlasojcöConie. Itech ini nönca nepöcteca. Yaja xejcaquecö.

⁶ Hua tiemachtejcohua, cuöc oquecajque ini nönca, omopiechojtequisque, hua omomajtejque lalebes. ⁷ Hua cuöc Jesús axihuato intlac, oquenmötocaque, hua oquejtojque:

—Xemiehuacö, hua amo xomomajticö.

⁸ Hua cuöc yejua otlachixque, nionöque amo oquejtaque, tlöcamo sa Jesús tiesiel. ⁹ Hua cuöc ye hualtemoöya de ipa tepietl, oquennahuatejque Jesús, oquemelfejque:

—Amo öque xequelicö ini tli nenquejtaque, hasta senamo naja que onochi netlöcatl neyulebes de intzölö mimejque.

¹⁰ Yecuöquenu tiemachtejcohua tietlajtlanejque, otieyelfejque:

—¿Tlica quejtoa inu tlamachtioneme de teotlajtle que conbenierebe cachtö ma huöla Elías?

¹¹ Hua onöhuatihuac Jesús, oquemelfejque:

—Tiel melöhuac, Elías huölös hua queyectlölis noche söstantle. ¹² Pero nemiechelfea que Elías ye onhuöla, pero amo oquixomatque. Hua oquechibelejque noche tli yejua oquenejque. Ejqueu nuyejque naja que onochi netlöcatl niechchibelisque meyac söstantle.

¹³ Yecuöquenu tiemachtejcohua ocasojcömatque que oquennunutzaloöya de Xohuö Bautista.

Jesús quepajteque sente pelalactle tli quepeaya moxicoöne

¹⁴ Hua cuöc oajaxihuato intlac giente, ohuöla sente tlöcatl omotlancuöquetz tieixpa.

¹⁵ Oquejto:

—Tlöcatzintle, xomopile icnuejtelestle de noconie. Pos quepea mimequelestle, hua lalebes mococoa. Quiemaneyo betze ipa tletzintle, noso ijtec ötzintle. ¹⁶ Onequemejtete momachtejcoztetzihua, pero abele oquepajteque.

¹⁷ Hua onöhuatihuac Jesús, oquejtoque:

—¡Ay! ¡Nentlöca que amo nemoneltoca hua amo nenquepensöroa lo que tli melöhuac! ¿Pos hasta quiema nemotlac neyes? ¿Hasta cöne necpeas necxicojtas ca nemejua? Xecualecacö necö.

¹⁸ Hua Jesús ocajajuaque inu demunio, hua oquis de inu pelalactle. Hua opajtec pelalactle desde inu tiempo. ¹⁹ Yecuöquenu omopachojque tiemachtejcohua tietlac Jesús nencua. Tiejelfeque:

—¿Tlica tejua abele toconquextelejque?

²⁰ Hua Jesús oquemelfeque:

—Ipampa nemiechpoloa neltoquelestle. Pues melöhuac nemiechelfea, que tlö nenquepeasquiöne nemoneltoqueles quiename ixenöchy mostöza, nenquelfisquiöya ini nönca tepietl: “Xomopacho de necö hasta niepa”, hua mopachus. Hua amo oyes niontle tli abele nenquechihuasque. ²¹ (This verse does not appear in the printed copy)

Ocsajpa Jesús otlamachestejque que mecoas

²² Hua cuöc mosentlöliöya ipan Galilea, Jesús oquemelfeque:

—Naja öque onochi netlöcatl niechtiemöctisque inmöpa tlöca. ²³ Niechmectisque. Pero ipa yeye tunale neyulebes.

Hua yejua motequepachojque lalebes por inu.

Jesús oquetlaxtlöjque inu contribuseyu de teopantle

²⁴ Hua cuöc ajaxihuato ipa Capernaum, ohuölajque ica Piero tli quenechecoöya inu contribuseyu de teopantle. Oquejtoque:

—¿Nemomaestro amo quetlaxtlöhuas inu contribuseyu?

²⁵ Hua yaja oquejto:

—Quienamo quetlaxtlöhuasque.

Hua cuöc ocalac yaja calejtec, Jesús oquelfeque cachtö. Oquejtoque:

—¿Quiene metzparesieroa, Semu? Inu reyes de tlöltecpacktle, ¿de öque quenechecoa inu impuestos hua tlanechecule? ¿De inepjelhua, noso de ocseque giente?

²⁶ Piero otiejelfe:

—Pos de ocseque giente.

Jesús oquelfeque:

—Entunses quejtusneque que inepjelhua amo tli quepea que quetlaxtlöhuasque.

²⁷ Pero mösque amo tecpejpea que tectlaxtlöhuasque, amo necneque nequencualöntis inu giente. Por inu xebeya ipa ötiescatl, hua xectlajcale moanzuelo ijtec ötzintle para tecases meche. Hua tli meche tejquextis cachtö, xecase hua xejcamatlapo. Hua tecniextelis sente moneda. Xectiemaca para tectlaxtlöhuas contribuseyu por naja hua por taja.

18

Öquenu cache bieye momajtas

¹ Ipa inu nieca tiempo omopachojque tiemachtejcohua tietlac Jesús. Otiejelfeque:

—¿Öquenu noso cache bieye momajtas cöne Deus tlamandörruro?

² Yecuöquenu Jesús oquenutzque sente peltzintle, hua oquetlölejque innepantla de yejua. ³ Oquejtojque:

—Melöhuac nemiechelfea, que tlö amo nemoyulcuepasque para nemochihuasque quieme nenpelantzetzti, amo nencalaquesque ompa cöne Deus tlamandöruro. ⁴ Ejqueu, öque mopichaquis para iyes quieme ini nönca peltzintle, yaja bieye momajtas cöne Deus tlamandöruro. ⁵ Hua tlö canajyeca queselis sente peltzintle quieme ini notucöyupa, naja niechselea. ⁶ Pero tlö canajyeca quechihualtis sente de ini nöncate pelantzetzti tli moneltoca ca naja ma betze ipa tlajtlacule, cache cuale uyene para inu tlöcatl ma quilpelicö sente tietetu de molino ipa icucutla, hua ma quepötzcalaquicö ijtec lamör. ⁷ ¡Porube de tlöltecpactle! Pues seme giente quenchiuualtisque ocseque giente ma betzecö ipan tlajtlacule. Pues abele iyes de ocsie manera; seme giente ejqueu quechihuasque. Pero ¡porube de inu nieca tlöcatl öque quechihualtea ma betze ocsente ipa tlajtlacule! ⁸ Hua tlö quejtus momö noso mocxe metzchihualtis tebetzes ipan tlajtlacule, pos xectejteque hua xectlajcale de taja. Cache cuale tecpeas nemelestle mös tecucoxojtzi noso temöcototec, hua amo ca unte momöhua hua unte mocxehua ma metztlajcale Deus ijtec tletzintle nochepa. ⁹ Tlö mixtelolo metzchihualtis tebetzes ipan tlajtlacule, xejcopina hua xectlajcale de taja. Cache cuale tecpeas nemelestle mös sa sente mixtelolo tecpeas, hua amo ca unte mixtelolojua ma metztlajcalecö Deus ijtec tlecale cöne xutla tletzintle.

Cuento de calnielo tli opole

¹⁰ Xecpeacö cueröro majcamo cana nenquedespresiörusque sente de ini nöncate tzequetzetzti. Pues nemiechelfea que oncate öngeles tli quemixutea. Hua inu öngeles ompa elfecac seme tieyetztecate tiexöyac de noTajtzi öque iloac elfecac. ¹¹ (This verse does not appear in the printed copy) ¹² ¿Quiene nemiechparesieroa? Tlö sente tlöcatl quepea sie sientos de calnielojte, hua tlö quepolus sente de yejua, ¿amo quencöjtiehuas inu ocseque noventa y nueve calnielojte, hua quetiemuti ca pan tepieme inu sente tli opole? ¹³ Hua tlö quejtus queniextis, melöhuac nemiechelfea que cache quepea pöquelestle de inu nieca, que de inu ocseque noventa y nueve tli amo opolejque. ¹⁴ Ejqueu mismo nemoTajtzi öque elfecac iloac amo quenequihua ma ixniempolebe nion sente de ini nöncate tzequetzetzti.

Quiene ma tecchihuacö cuöc tocni tlajtlacoa encuntra de tejua

¹⁵ 'Hua tlö quejtus mocni tlajtlacus encuntra de taja, xebeya ca yaja. Xequelfe tli tlajtlacule oconchi, sa nemosiel taja ca yaja. Tlö ometzcac, ye otectlö porque ocsajpa iyes cuale entre taja hua mocni. ¹⁶ Cache tlö amo metzcaque, xequemase sente noso unte ocseque para que yösque moca quenunutzasque mocni. Ejqueu unte noso yete testigos cuale tlatestificörusque de noche tli mojtus. ¹⁷ Hua tlö amo quencagues nimpör yejua, xequemelfe innochie creyentes cuöc mosentlölea. Hua tlö amo tlaques cuöc quenunutzta inu grupo de creyentes, xextratörucö quiename sente que amo moneltoca noso quiename sente tlanecheco.

¹⁸ 'Melöhuac nemiechelfea que noche tli nenquetzacuelisque ipan tlöltecpactle iyes lo que tli motzacuelea ompa elfecac. Hua noche tli nenquetlöcayejtasque ipan tlöltecpactle iyes lo que tli nuyejque motlöcayejta ompa elfecac. ¹⁹ Ocsajpa nemiechelfea, que tlö quejtus unte de nemejua necö ipan tlöltecpactle nenyisque de acuerdo para nentlajtlanesque canajyetla, noTajtzi öque elfecac iloac quechihuasque por nemejua. ²⁰ Ipampa cönen cate unte noso yete tli mosentlölejtecate notucöyupa, ompa neca ca innepantla de yejua.

Cuento de sente tlöcatl tli amo oquenec tlaperdönörus

²¹ Yecuöquenu Piero omopacho tietlac yejuatzti. Otieyelfe:

—Tlōcatzintle, ¿quiejquechpa necperdonōrus nocni cuōc tlajtlacus encuntra de naja? ¿Hasta checumejpa?

²² Jesús oquelfejque:

—Amo temetzelfea que hasta checumejpa, cache hasta setenta veces checumejpa.

²³ 'Ejqueu, quiene Deus tlamandōruro icaca quiename sente rey, que yaja oquenec quechihuas cuentas ca itlatequepanojua. ²⁴ Hua cuōc opie ica inu tlapoalestle, oquehualaquelejque sente itlatequepano tli quetiebiquelejta mil millones de tomi. ²⁵ Pero abele quetlaxtlōbeliōya, hua itieco otlatitla ma quenamacacō, ca tiehua isohua hua ipelhua hua noche tli quepeaya, para ma quetlaxtlōhua. ²⁶ Yecuōquenu inu nieca tlatequepano omotlancuōquetz, hua quetlajtlōtlajtiōya. Oquejto: “Xomochile ca paciencia, hua naja temetzmotlaxtlōbelelis noche”. ²⁷ Inu tlōcatzintle quetlōocolte inu nieca itlatequepano. Oquecājcō hua oqueperdonōro. Oquetlapojpolfele itietlabiqueles. ²⁸ Hua cuōc oquis inu nieca tlatequepano, oqueniextito sente itlōcaicni, que quebiquelejta quiesquete piesos. Hua ocāsec, hua quepōtzmectiōya. Oquejto: “Xeniechtlaxtlōbele tli teniechbiquelea”. ²⁹ Yecuōquenu itlōcaicni omotlancuōquetz hua quetlōtlajtiōya, oquejto: “Xomochile ca paciencia, hua naja temetzmotlaxtlōbelelis noche”. ³⁰ Cache yaja amo oquenec, tlōcamo uya hua oquecalaquito ijtec cōrsel ma ompa yeta hasta senamo quetlaxtlōhuas tli quetiebiquelejta. ³¹ Hua cuōc itlōcaicnihua tli nuyejque quetequepanoōya inu rey oquejtaque tli mochihuaya, omotequepachojque lalebes. Hua ohuōlajque, quelfico intieco noche tli omochi. ³² Yecuōquenu itieco oquetlatitla para ma huōla inu tlatequepano. Oquelfe: “¡Taja tetlatequepano que sie tiro amo tecualtec! Noche inu nieca tli teniechbequelejta temetzlapojpolfele hua otemetzperdonōrfe ipampa teniechtlōtlajte. ³³ ¿Tlica amo nuyejque ejqueu taja amo metztlōocolte motlōcaicni, quieme nuyejque naja teniechtlōocolte?” ³⁴ Hua ocualō lalebes itieco, hua oquetiemōcte ca tli quetiema tletunie tiecoco, hasta senamo ma quetlaxtlōhua noche tli quetiebiqueliōya. ³⁵ Ejqueu nuyejque noTajtzi öque elfecac iloac quechihuasque ca nemejua, tlō amo nenquenperdonōrusque nemocnihua ca noche sentetl nemoyulo.

19

Tlōcatl majcamo quecājcōhua isohua

¹ Hua omochi que sōtiepa de que Jesús oquetlamejque ini nōncate tlajtulte, oquixoac de inu estado de Galilea, hua ohualiloac itlac estado de Judea, pa ocāsie lōro de ötlactle Jordán. ² Hua otietocaque meyactie giente. Hua oquenpajtejque ompa.

³ Yecuōquenu seque fariseos omopachojque tietlac para tieprobōrusque. Hua tietlajtlanejque:

—¿Conbenierebe que sente tlōcatl ma quecājcōhua isohua ipampa canajyetla sōsantle?

⁴ Hua yejuatzi onōhuatihuac, oquejtojque:

—¿Ayec nenquetlajtulteque que yejuatzi öque oquenchejchijque desde ca opie, oquechtle hua sohuatl oquenchejchijque? ⁵ Hua oquejtojque: “Por inu, tlōcatl quecōjtiehuas itajtzi hua inōntzi, hua mosietelis ca isohua. Hua yejua umeme mochihuasque sa sie cuiervo”. ⁶ Ejqueu noso ayecmo cate ume, tlōcamo sa sie cuiervo. Por inu, lo que tli Deus oquesietelejque, majcamo quenencuajtele tlōcatl.

⁷ Otieyelfejque:

—¿Tlica, noso, Moisés otlanhuate ma öque quemaca sente öcta de divorcio hua ma quecājcōhua?

⁸ Hua oquemelfejque:

—Ipampa nenyultepitzteque lalebes, por inu Moisés onemiechcō nenquencājcōhuasque nemososohuahua. Pero cuōc opie tlōltecpactle amo ejqueu oyeya. ⁹ Hua naja nemiechelfea que öque beletes quecājcōhuas isohua, hua mosohuajtis ca ocāsentle

sohuatl, ye tlaumepea hua tlajtlacoa. Mös tlö cana sohuatl otlajtlaco ca ocsie tlöcatl, entunses cuale quecajcohuas.

¹⁰ Tiejelfeque tiemachtejcohua:

—Tlö ejqueu icaca para sente tlöcatl ica isohua, cache cuale öque amo mosohuajtis.

¹¹ Hua yejuatzi oquemelfeque:

—Amo innochie cuale queselisque ini nönca tlajtule, tlöcamo sa inu niecate öque Deus quenmacasque beletelestle. ¹² Oncate capunteque que otlajtlöcatque ejqueu, que desde cuöc oyejyeya imijtecopa innajnönhua ejqueu cate que abele mosohuajtisque. Nuyejque oncate capunteque, que giente oquenchijque capunteque, hua oncate seque que quiename omochijque capunteque yejua mismos, hua amo mosohuajtea para que ejqueu cache cuale tequetesque para ma isejcö ma tlamandörucö Deus. Öque cuale queselis ini tlajtule, ma quelese.

Jesús quenteochijque pelantzetzzi

¹³ Yecuöquenu tiehualequeliöya pelantzetzzi, para ma quentlölicö tiemöhua impa yejua, hua ma netlajtlötlajtilo por yejua. Pero tiemachtejcohua quemajajuaya giente tli quenhualecaya inelhua. ¹⁴ Pero Jesús oquejtojque:

—Xequencöhuacö pelantzetzzi, hua amo xequentzacuelicö para ma huölöcö notlac. Pos giente tli cate quiename nochimeji pelantzetzzi quepeasque pörte cöne Deus tlamandöruro desde elfecac.

¹⁵ Hua oquentlölejque tiemöhua impa. Sötiepa obiloac de ompa.

Sente tlöcatl rico quenequeya quepeas nemelestle nochepa

¹⁶ Hua necö, sente tlöcatl omopacho hua otiejelfe:

—Maestro, ¿tli söstantle cuajcuale necchihuas para necpeas nemelestle nochepa?

¹⁷ Hua yejuatzi oquelfeque:

—¿Tlica teniechtlajtlanea de lo que tlin cuale? Iloac sente öque iloac cuale. Pero tlö taja tecneque tecpeas nemelestle, xecneltoca inu mandamientos.

¹⁸ Otiejelfe:

—¿Cötlejuanu?

Hua Jesús oquelfeque:

—“Amo tetlamectis”. “Amo tecalaques ca isohua ocsente”. “Amo tetlachteques”. “Amo tiecamac tetieajaques”. ¹⁹ “Pa tequemejtas motajtzzi hua monöntzi”. Hua, “Tectlasojtlas motlöcaicni quieme taja tomotlasojtla”.

²⁰ Oquejto inu tielpuchtle:

—Noche ini nönca necchijtebitz. ¿Tli ocseque niechpoloa?

²¹ Oquelfeque Jesús:

—Tlö tecneque teyes intiero tecualtec, xebeya, xecnamaca noche tli tecpea, hua xequenmaca tli porubejte. Ejqueu tecpeas ricojyutl ompa elfecac. Entunses xehuöla, xeniechtoca.

²² Pero cuöc inu tielpuchtle oquecac ini nönca tlajtule, yaja uya. Motequepachoöya porque quepeaya meyac tli ihuöxca.

²³ Hua Jesús oquemelfeque tiemachtejcohua:

—De melöhuac nemiechelfea, que para sente rico icaca tequeyo lalebes para calaques cöne Deus tlamandöruro desde elfecac. ²⁴ Ocsajpa nemiechelfis, que cache isejco panus sente camello ijtec ixtelolo de sente öcuxa, que sente rico calaques cöne tlamandöruro Deus.

²⁵ Hua cuöc oquecajque tiemachtejcohua, pos quietetzöbejque bel lalebes. Oquejtojque:

—Tlöjcu, ¿öquenu noso cuale momöquextis?

²⁶ Entunses Jesús quemetzalutaya. Oquemelfeque:

—Para tlöca abele mochihuas ini nönca. Cache para Deus noche söstantle cuale mochihuas.

²⁷ Entunses Piero otieyelfe:

—Xomojtele, tejua otejcöjque noche, hua otemetzmotoquelejque. ¿Tli noso tecpeasque?

²⁸ Hua Jesús oquemelfejque:

—De melöhuac nemiechelfea, que cuöc noche moyancuelis, cuöc naja öque onochi netlöcatl notlölis ipa notrono de tlanixtelestle, nemejua nuyejque tli nenniechtocaque nemotlölisque ipa majtlactle huan ume tronos. Hua nenquenjuscörusque inu majtlactle huan ume grupos de gente de Israel. ²⁹ Hua öque beletes cualcöjtiehuas calte noso icnihua oquechte noso icnihua sohuame noso itajtzi noso inöntzi noso ipelhua noso itlölhua, por ipampa notucöyo, quepeas sie sientos töntos, hua nuyejque mohuöxcatis de nemelestle nochepa. ³⁰ Pero meyactie yesque sölültimo tli öxö cate cachtö, hua yesque cachtö tli öxö cate sölültimo.

20

Cuiento de tequetque

¹ Porque quiene Deus tlamandöruro desde elfecac icaca quiename sente tlöcatl chöne, que oquis ca cualcö quensentlölito tequetque para tequetesque ipa ihuierta de uvas.

² Hua oquemelfe tequetque que quentlaxtlöbis sie denario tomi por tunale. Entunses oquentitla ipan huierta. ³ Hua quieme ca pan checnöbe ura oquis, hua oquemejtac ocseque oijcataya pan plöza hua amo tli axtaya. ⁴ Hua oquemelfe: “Xeyöcö nuyejque nemejua xetequetete ipa notlöl, hua nemiechtlaxtlöbis lo que tli conbenierebe”. Hua yejua uyajque. ⁵ Hua oquis ocsajpa quieme ca pan tlajca hua quieme ca pa yeye, hua ocsajpa ejqueu oquechi. ⁶ Hua cuöc oquis quieme ca pa möcuile ura, oquenniexte ocseque amo tli axtaya. Oquemelfe: “¿Tlica oncö nencate noche semelfetl hua amo tli naxtecate?” ⁷ Oquenönquelejque: “Ipampa amo öque tiechtalfe ma tetequetecö”.

Oquemelfe: “Xeyöcö nuyejque nemejua ipa nohuierta, hua nemiechtlaxtlöbis lo que tli conbenierebe”. ⁸ Hua cuöc ye omochi ca ye yohuac, inu señor öque ihuöxca inu nieca huierta oquelfe inu calpexque: “Xequentzajtzele inu tequetque hua xequentlaxtlöbe tli intunal. Xepiehua desde tli onhuölajque sötiepa hasta tli cachtö onhuölajque”. ⁹ Hua cuöc onhuölajque tli ocalajque ipa möcuile ura, oquenmacac siesen denario. ¹⁰ Hua cuöc huölajque tli ocalajque cachtö, yejua quepensöroöya que quenmacas cache. Pero yejua oquenmacac nuyejque siesen denario. ¹¹ Hua cuöc motlaxtlöbejque, ica tlajtoöya inu chöne. ¹² Quejtoöya: “Nöncate sötiepa onhuölajque otejtequetque sa sie ura. Hua taja tequentratöroa iguöl quiename tejua, mös tejua noche tequetl toconchijque hua noche tunale topa otunac”. ¹³ Hua yaja onöhuat, oquelfe sente de yejua: “Amigo, amo temetzchibelejteca tli amo cuale. ¿Amo melöhuac que totlölejque de acuierto para naja temetztlaxtlöbis sie denario? ¹⁴ Xecöna noso ini nönca sie denario, pues mohuöxca, hua xebeya. Naja necneque necmacas sie denario ca ini nönca tli sötiepa onhuöla, quiename taja temetzmacac. ¹⁵ ¿Quie beles amo necpea deriecho para necchihuas tli naja necneque ca tli nohuöxca? Noso ¿beles taja tomoxicoa, ipampa naja necuale tlöcatl para ca ocseque?”

¹⁶ Ejqueu tli öxö cate sölültimo yesque cachtö, hua tli cate cachtö yesque sölültimo.

Ocsajpa Jesús otlamachestejque que mecoas

¹⁷ Hua otlejcoac Jesús ca pa ojtle para biloas ca inu ciudad de Jerusalén. Oquenbicaque nencua inu majtlactle huan ume tiemachtejcöhua. Oquemelfejque:

¹⁸ —Xequejtacö. Tetejcatebe ca pa Jerusalén. Hua naja öque onochi netlöcatl niechtiemöctisque ca jefes de teopexcötzetzi hua inca tlamachtioneme de teotlajtule. Entunses yejua niechcuntenörusque ma nemeque. ¹⁹ Niechtiemöctisque ca tli amo de

topuieblo para moburlörusque de naja hua niechbitequesque, hua niechcoruspelusque. Cache ipa yeye tunale Deus niechyulebitisque.

Jacobo hua Xohuö hua innöntzi otlajtlanque sie favur

²⁰ Yecuöquenu ohuöla tietlac innöntzi de ipelhua Zebedeo inca ipelhua. Tiemabesutiöya, hua tietlajtlaneliöya sente favur. ²¹ Hua yejuatzi oquelfejque:

—¿Tli tecneque?

Yaja otieyelfe:

—Xomotlanahuatele por favur ma motlöllicö ini nöncate nopelhua, sente ca momöyecastzi hua ocsente ca momöarrabiescontzi, cuöc tejuatzi tomotlamandörfis.

²² Entuneses Jesús onöhuatihuac, hua oquejtojque:

—Amo nenquemate tli nentlajtlane. ¿Cuale nenconisque de inu bölso de tietunie tli naja isejco neconis?

Hua yejua tieyelfejque:

—Cuale tecchihuasque.

²³ Hua yejuatzi oquemelfejque:

—Melöhuac nobölso de tietunie nenconisque. Pero para nemotlölisque sente ca nomöyecmö hua ocsente ca nomöarrabis, abele nemiechmacas. Cache icaca para yejua tli quemixpejpenque noTajtzi.

²⁴ Cuöc inu majtlactle oquecajque inu, ocuajcualönque inca inu unte icnijte. ²⁵ Pero Jesús oquennutzque hua oquemelfejque:

—Ye nenquemate que inu tlötlajtoönejme de giente de ocseque naciones ca fuiersa quensujetöroa tlöca. Tli motztecate cache bejbeye intzölö, pos ca checöhualestle quenmandöroa giente. ²⁶ Cache nemotzölö nemejua amo ejqueu iyes; tlöcamo öque queneques cache bieye momajtas nemotzölö, ma mosujetöro para nemiechtequepanus.

²⁷ Öque beletes de nemejua queneques iyes cache importönte, iyes nemotlatequepano.

²⁸ Pues ejqueu mismo naja que onochi netlöcatl amo onehuöla para ma giente ma niechtequepanucö, tlöcamo para nequentequepanus giente. Nehuöla para nectiemacas nonemeles para ejqueu neclaxtlöhuas inpatie de meyactie, para que ejqueu quepeasque libertad.

Jesús oquenpajtejque unte ixcocoxcötzetzi

²⁹ Yecuöquenu oquejquixoac de inu puieblo de Jericó. Hua tietocaya meyac giente.

³⁰ Hua necö unte ixcocoxcötzetzi yejyehuataya itienco ojtle. Hua cuöc oconcajque nele Jesús opanoöya, tzajtzajtzeya. Oquejtojque:

—Tlöcatzintle, iConie David, ma temetzmoyulcocolficö.

³¹ Hua inu giente quemajajuaya nele ma quetzacuacö incamac. Pero yejua cache tzajtzajtzeya, quejejtöya:

—Tlöcatzintle, iConie David, ma temetzmoyulcocolficö.

³² Yecuöquenu onequetzaluc Jesús, hua oquennutzque. Oquejtojque:

—Pos ¿tli nenqueneque ma nemiechchibele?

³³ Hua yejua otieyelfejque:

—Tlöcatzintle, ma cuale tetlacheacö.

³⁴ Entuneses Jesús tietlööcoltejque, hua oquenmötocaque imixtelololjua. Hua sa nima otlachixque, hua otietocaque.

21

Jesús ocalacoac pa Jerusalén ipa sente puro

¹ Huajualbiloac ipa Betfagé, itlac tepietl de los Olivos, amo bejca de inu ciudad de Jerusalén. Entuneses Jesús oquentitlanque unte de tiemachtejcohua. ² Oquemelfejque:

—Xeyöcö ipa inu puieblo tli niepaca. Sa nima nenqueniextisque sente purolama ilpetas, hua sente purojconetzi ca yaja. Xequentojtomacö, hua xeniechenhualaquelicö.
³ Tlö canajyeca canajyetla nemiechelfis, xequajtucö que Tlöcatzintle quennesesitöruro. Entunses sa nima cualentitlanes.

⁴ Hua noche ini nönca sösantle omochi para ma mochihua tli omojto por inu tlayulepante cuöc oquejto:

⁵ Xequelfe inu giente de Sión, noso Jerusalén:
 “Xequajtucö necö, que nemoRey biloatz nemoca.
 Yulsiejque, yehualutebitz ipa sente purolama,
 hua ipa sente yulcöconetzi, iconie puro”.

⁶ Hua tiemachtejcohua uyajque hua oquechijque san quiene ca Jesús oquemelfejque.

⁷ Hua oquehualaque purolama hua purojconetzi, hua oquetlölejque intlaquie impa. Hua yejuatz onetlöililuc impa. ⁸ Hua cöso innochtie giente quesoaya intlaquie ipa ojtle. Hua ocseque quetequeya imömöyo cuajme, hua quesoaya ipa ojtle. ⁹ Hua inu giente tli oyöya adelönte, hua tli hualtlatocatöya, tzajtzajztetöya, quejejtoöya:

—¡Osana! ¡Hualiloac iconie David! ¡Ma tetieteochihuacö öque biloatz tietucöyupa Tlöcatzintle! Mojtoa ompa elfecac: “¡Osana!”

¹⁰ Hua cuöc ocalacoac ipa ciudad de Jerusalén, noche puieblo cuejcueyuneja. Oquejtoöya:

—¿Öquenu icaca ini nönca?

¹¹ Hua giente quejejtoöya:

—Ini nöiloac yejuatz Jesús tlayulepante de puieblo de Nazaret pa estado de Galilea.

Jesús otlaquextejque pa teopantle

¹² Hua ocalacoac Jesús ipan teopantle. Oquenquextejque ca queyöhuac noche quiejquech tlajtlanamacaya hua motlajtlacubiöya ipan teopantle. Quencuajxelfejque inmieja de tli quepatlataya tomi, ca tiehua siyetajte de tli quennajnamacataya palumaxte. ¹³ Hua oquemelfejque:

—Tlajcuelulpanca: “Nocal mocuitis cale de netlötlajtelestle”. Cache nemejua nenquechijtecate tiecaltzi Deus quieme cana ustutl de ichtejcötzetzi.

¹⁴ Yecuöquenu ohuölajque tieca yejuatz ixcocoxcötzetzi ca tiehua cucuxojtetzzi ipan teopantle. Hua yejuatz oquenpajtejque. ¹⁵ Pero inu jefes de teopexcötzetzi ca tiehua tlamachtioneme de teotlajtule ocuajcualönque cuöc oquejtaque inu tlachihualestle tli quechihualoöya, hua quiene pelalacme tzajtzajztzeya ipan teopantle hua quejejtoöya:

—¡Osana iconie David!

¹⁶ Hua yejua otieyelfejque:

—¿Tejcaque taja tli quejejtojtecate ini nöncate?

Hua Jesús oquemelfejque:

—Quiema nejcaque. ¿Ayec nenquetlajtultejque ipan teotlajtule nöncate tlajtulme? “De incamacopa de pelantzetzzi hua de tli chejchiche tomoyecniextele mochamöhuallestzi”.

¹⁷ Yecuöquenu oquencöjtiejque. Oquixoac de inu ciudad hua obiloac ca pa Betania, hua ompa nesiebiluc.

Jesús quetlabejbicaltejque icox cuabetl

¹⁸ Hua pa mustlateca ca ise ocsajpa ohualiloac ipa ciudad, hua oteosebihuaya. ¹⁹ Hua oquejtaque sente icox cuabetl sa ompa itlac ojtle. Ohualiloac itlac, pero amo tli oqueniextejque itech, tlöcamo sa ixejyo. Hua oquelfejque:

—Ma nochepa ayec quisa de taja fruto.

Hua nima uhuöc inu icoxcuabetl. ²⁰ Hua cuöc oquejtaque tiemachtejcohua, oquetietzöbejque. Oquejtoöya:

—¿Quiene uhuöc sa nima inu icoxcuabetl?

²¹ Hua onöhuatihuac Jesús hua oquemelfejque:

—Melöhuac nemiechelfea que tlö nenquepeasque neltoquelestle, hua amo nemoyulcuiecuectasque, nenquechihuasque söstantle cache bejbeye que ini nönca de icoxcuabetl. Hasta tlö ini nönca tepietl nenquelfisque: “Xomojcuene hua xomotlajcale ijtec lamör”, pues mochihuas. ²² Hua noche tli nentlajtlanesque ica netlajtlötajtelestle, ca neltoquelestle, nenqueselisque.

Nele ca tli beletelestle quechihualo Jesús söstantle

²³ Hua cuöc ohualiloac ipan teopantle, tlamachtilitaya. Hua ohuölajque tietlac inu jefes de teopexcötzetzi ca tiehua biebzetzeti de inu nieca puieblo. Oquejtojque:

—¿Ca tli beletelestle tecchihua ini nönca söstantle? Noso ¿öquenu metzmacac ini nönca beletelestle?

²⁴ Hua onöhuatihuac Jesús, oquemelfejque:

—Naja nuyejque nemiechtajtlanes sente pregunta. Tlö nenniechelfisque, nuyejque naja nemiechelfis ca tli beletelestle necchihua ini nönca. ²⁵ Xohuö Bautista tlacuötiequiöya. ¿Öquenu cualtitlanque ma tlacuötieque? ¿Beles Deus, noso beles tlöca?

Yecuöquenu yejua omonenebelejque, hua molfejque:

—Tlö tequejtusque que Deus, tiechelfis: “¿Tlica noso amo nemoneltocaque ca yaja?”

²⁶ Hua tlö tequejtusque que tlöca, pos tequenmabelea inu meyac giente, ipampa innochie quepensöroa que Xohuö oyeya tlayulepante tli tlajtlajtoöya de pörte de Deus.

²⁷ Entunes onöhuatque. Tieyelfejque Jesús:

—Amo tecmate.

Hua yejuatzi oquemelfejque:

—Nuyejque naja amo nemiechelfis öque niechmacac beletelestle para ma necchihua ini nönca söstantle.

Cuiento de unte ipelhua de sente tlöcatl

²⁸ 'Pero ¿quiene nemiechparesieroa ini nönca cuiento? Que sente tlöcatl quepeaya unte ipelhua. Hua omopacho itlac sente, oquelfe: “Ixo, xebeya öxö xetequetete ipa nohuierta”. ²⁹ Hua yaja onöhuat, oquejto: “Amo necneque”. Cache sötiepa omoyulcuc hua uya. ³⁰ Nuyejque tajtle omopacho itlac ocsente, oquelfe nuyejque ejqueu. Hua onöhuat yaja, oquejto: “Naja neyös, Tlöcatzintle”. Pero amo uya. ³¹ Bieno pues, ¿öquenu de innehua oquechi itlanequeles itajtzi?

Oquejtojque teopexcötzetzi hua biebzetzeti:

—Yaja cachto.

Oquemelfejque Jesús:

—Melöhuac nemiechelfea que inu tlanechecoque hua cacherilajte cachto de nemejua calaquesque ca cöne Deus tlamandöruro. ³² Pos ohuöla Xohuö nemoca hua otlanunutz de inu ojtle de yectelestle, hua amo nemoneltocaque ca yaja. Pero inu tlanechecoque hua cacherilajte omoneltocaque. Hua nemejua, mös nenquejtaque inu, pero amo nemoyulcujque sötiepa para nemoneltocasque ca yaja.

Cuiento de tequetque petzoteque

³³ 'Xejaquecö ocsente cuiento. Oyeya sente tlöcatl chöne. Yaja oquetucac sente huierta de uvas temecatl. Quesiercajte ica cuajme. Oquechejchi sente tönque cöne quepötzcas uvas. Quechejchi sente cale bejcapa. Quentlaniejte tejtequetque hua yaja uya ca bejca. ³⁴ Cuöc ye oaseco tunalte para tlamoehualtis, ocualentitla itlatequepanojua inca inu tequetque para ma quemacacö inu fruta tli quetocöroöya. ³⁵ Pero inu tejtequetque oquemaseque inu itlatequepanojua. Sente oquebitejque, hua ocsente oquemecteque, hua ocsente oquetecaltejque. ³⁶ Ocsajpa oquenhualentitla ocseque tlatequepanojque, cache meyactie que tli cachto ohuölajque. Pero quentratörojque iguöl. ³⁷ Hua cache sötiepa ocualtitla iconie. Oquejto: “Beles pa quejtasque noconie”.

³⁸ Pero tequetque, cuöc oquejtaque iconie, omolfejqe sie yejua: “Yaja ini nönca öque mohuöxcatis de ini nönca huierta. Xehuölöcö, ma tecmecticö. Entunses tejua tecasesque tli yaja mohuöxcatisquea”. ³⁹ Ocaseque. Oquequextejque ca queyöhuac de inu huierta, hua oquemectejque.

⁴⁰ ‘Cuöc huölös niecaju tlöcatl öque ihuöxca inu huierta, ¿tli noso quenchibelis inu niecate tejtequetque?

⁴¹ Otieyelfejque:

—Quenpojpoluqui sin remedio inu tlöca sie tiro amo cualteque, hua inu huierta quentlaniejtis ocseque tejtequetque, tli quemacasque fruto cuöc conbenierebes.

⁴² Oquemelfejque Jesús:

—¿Ayec nenquetlajtulfejque ini nönca ipa teotlajtule?

Inu tietetu tli calchihuaneme oquetlabielcöjqe, yaja mismo öxö omochihuaco esquiniero principal.

Yejuatzi Tlöcatzintle oquechijque ini nönca, hua tejua tectietzömate.

⁴³ Por inu nemiechelfea que ayecmo nemiechtocörus nenyeseque cöne Deus tlamandöruro, cache quentocörus giente de ocsente tlöle, tli quetiemasque quiename fruto lo que tli Deus quenequihua.*

⁴⁵ Hua cuöc inu jefes de teopexcötzetzi hua inu fariseos oquecajqe ini cuientos, ocasojcömatque que tlajtlajtuloöya de yejua. ⁴⁶ Hua quetiemoöya manera para tieasesque, pero quenmabeliöya giente, ipampa giente quepensöroöya que Jesús iloaya sente tlayulepante de Deus.

22

Cuento de nesohuajtiluyo

¹ Jesús ocsajpa oquennunutzque ica cuientos. Oquejtojque:

² —Quiene Deus tlamandöruro icaca ejqueyi: ica quiename sente rey, que oquechi nesohuajtiluyo para iconie. ³ Oquentitla itlatequepanojua para ma quennutzate tli oquentlalfejque ipa inu nieca nesohuajtiluyo. Cache yejua amo oquenejqe huölösque.

⁴ Ocsajpa oquentitla ocseque itlatequepanojua. Oquejto: “Xequemelficö ejqueyi tli tlatlalfilte: Xequejtacö que tlacuale ye icaca. Nocucobejua hua noyulcöhua tlin tojtomöjqe ye onequenmecte, hua noche ye ica listo. Xehuölöcö noso ipa nesohuajtiluyo”. ⁵ Pero yejua tlatlalfilte amo oquechijque cöso, cache quechijque tli yejua quenejnejqe. Sente onya ipa imil, hua ocsente ipa inegocio. ⁶ Hua ocseque oquemaseque itlatequepanojua de inu rey, hua quentratörojque san petzotec, hua hasta oquenmejmectejque seque. ⁷ Hua inu rey ocualö lalebes. Oquentitla isoltörojua, hua oquentlamejqe inu niecate mequestierojte, hua oquenzutlaltejqe inpuieblo. ⁸ Entunses inu rey oquemelfe itlatequepanojua: “Ye icaca listo nesohuajtiluyo, cache tli tlatlalfilte amo quemeresierojque. ⁹ Xeyöcö noso ca cöne quisa ojme, hua xequennutzacö innoctie tli nenquenniextisque ma huölöcö ipa ini nönca nesohuajtiluyo”. ¹⁰ Hua itlatequepanojua oquisque ca pa ojtle. Oquensentlölejque noche quiejquech oquenniextejque, ca tiehua petzoteque hua cualteque. Hua inu cale otie ca tlatlalfilte de nesohuajtiluyo.

¹¹ ‘Hua ocalac rey para quemejtas tli tlatlalfilte, hua oquejtac sente tlöcatl sin tlaque- ntle cuale de nesohuajtiluyo. ¹² Hua oquelfe: “Amigo, ¿quiene otecneq tecalaques necö sin que amo otomotlaquente ca motlaquie cuale de nesohuajtiluyo?” Cache yaja abele tli oquenönquele. ¹³ Entunses rey oquemelfe tli latequepanoöya: “Xequilpicö ini nönca tlöcatl pa imöhua hua ipa icxehua. Xecasecö, hua xectlajcalecö ca queyöhuac ipa tlajtlayohuaquelestle. Ompa giente chojchucasque hua motlantesesque”.

* **21:43** Meyactie manuscritas quepea v. 44 “Hua öque betzes ipa inu tietetu posteques, pero tlö inu tietetu betzes ipa canajyeca, quexaxacuas hua yaja mocöhuas quiename nochaja tlölcuiechtle”.

14 'Pues meyactie quennutzalo Deus, pero sa quiesquete quemixpejpenalo.

¿Motlaxtlöhuas contribuseyu noso amo?

15 Entunses uyajque fariseos, hua omotlajtulmacaque de quiene tiechihualtisque ma quejtulo canajyetla tli itech cuale tietieyelfisque. 16 Hua tietitlanelejque inmachtejcöhua ca tiehua herodianos tli quetocaya rey Herodes. Yejua oquejtojque:

—Maestro, tecmajtecate que tejuatzi tomobetzteca temelactec hua lalebes tomocualejtelea tlin melöhuac, hua que tetiechmojtetelea de tlin melöhuac de ojtle de Deus, hua que amo tomotlachilejtzinoa de nionöque. Porque tlöca amo metzmoimportörfelea.

17 Xetiechmolfele noso, ¿tli tomopensörfea? ¿Beles conbenierebe tecmacasque inu emperador César tocontribuseyo, noso amo?

18 Cache Jesús nemacaloöya cuenta de quiene quepensöroöya tli amo cuale. Oquemelfejque:

—¿Tlica nenniechproböroa naja? Pos sa ume nemoxöyac. 19 Xeniechejteticö inu tomi de contribuseyu.

Hua yejua otieyjetetejque sie denario tomi. 20 Oquemelfejque:

—¿Öqueniji ixöyac, hua öquenu ihuöxca ini tlajcuelule?

21 Otieyelfejque:

—De César.

Hua oquemelfejque:

—Entunses xecmacacö César tli quetocöroa Cesár, hua xetiemacacö Deus tli tietocöroa Deus.

22 Hua cuöc oquecajque ini nönca, oquetietzöbejque. Hua tiecöjtiejque, hua uyajque.

Saduceos otlajtlanque tlö mimejque yulebesque

23 Ipa inu nieca tunale ohuölajque tietlac inu saduceos, hua quejejttojque nele mimejque amo yulebesque. Yejua tietlajtlanejque, 24 oquejtojque:

—Maestro, Moisés oquejto que: “Tlö meque sente tlöcatl hua amo quepea ipelhua, icni mosohuajtis ca isohua de inu tlöcatl para quentlöcatelelis ipelhua de icni”. 25 Bieno pues, oyejyeya toztölö tejua checumeme icnijte tlöca. Inu cachtojyiebe omosohuajte, hua sötiepa omec, hua amo oquepex ipelhua. Así es que oquecöbelejtie isohua para icni.

26 Hua icni omosohuajte ca yaja, hua nuyejque ejqueu mismo ipa omochi. Hua nuyejque iguöl oquepasöro ocsente icni, hasta senamo noche inu checumeme impa omochi iguöl.

27 Hua sötiepa de que omejmejque innochtie nuyejque omec sohuatl. 28 Entunses cuöc yulebesque mimejque, ¿cötlaja de inu checumeme iy es isohua ini nönca sohuatl? Pues innochtie checumeme oquepexque.

29 Pero onöhuatihuac Jesús, oquemelfejque:

—Nemixcajcajöhua, porque amo nenquemate tli tlajcuelulpanca hua tli tiechecöhuales Deus. 30 Ipampa cuöc yulebesque mimejque nimpör amo mososohuajtisque nimpör amo monajnömectisque, tlöcamo yesque quiename inu öngeles ompa elfecac. 31 Pero de que tlö onca yulebelestle de mimejque, ¿ayec nenquetlajtultejque tli nemiechelfilo Deus? Pues oquejtojque: 32 “Naja necaca neDeus de Abraham, hua neDeus de Isaac, hua neDeus de Jacob”. Deus amo iloac Deus de mimejque, tlöcamo de tli yulejtecate.

33 Hua cuöc inu giente oquecajque, quetietzöbejtaya inu tlamachtelestle.

¿Cötlaja mandamiento cache bieye?

34 Pero inu fariseos, cuöc oquecajque quiene oquentzacuele incamac inu saduceos, omosentlölejque. 35 Hua sente de yejua, tlajmatque de inu ley de Moisés, tietlajtlane sie pregunta para tieprobörus:

36 —Maestro, ¿cötlaja mandamiento de inu ley icaca cache bieye?

37 Hua Jesús oquelfejque:

—“Tetietlasojtlas Tlöcatzintle moDeus ca noche sentetl moyulo, hua ca noche sentetl moölma, hua ica noche mopensamientos”. ³⁸ Yaja ini nönca mandamiento icaca cachto hua cache bieye. ³⁹ Hua inu segundo icaca quiename ini nönca: “Tectlasojtlas motlöcaicni quiename taja mismo tomotlasojtla”. ⁴⁰ Noche tli tlajcuelulpanca ipa inu ley hua inu ömame de tlayulepantejqque mase itech ini nöncate ume mandamientos.

¿De öquenu iloac iconie Cristo?

⁴¹ Hua mientras mosentlöliöya inu fariseos, Jesús oquentlajtlanejqque, ⁴² oquemelfejque:

—¿Tli nenquepensöroa de inu Cristo öque Deus oquixpejqque? ¿De öque iconie? Otieyelfejque:

—De David.

⁴³ Yejuatzi oquemelfejque:

—¿Quiene noso David ca Espíritu Sönto quecuitea “noTlöcatzintle”? Pues quejtoa:

⁴⁴ Tlöcatzintle tiemölfeliluc notlöcatzintle:

“Xomotlöle ca nomöyecömpa

hasta senamo ma nequemumiyöro moenemigos hasta itzintla mocxehua”.

⁴⁵ Ejqueu noso David oquecuite “noTlöcatzintle”. ¿Quiene noso icaca iconie?

⁴⁶ Hua nionöque abele tienönqueliöya ca canajyetla tlajtule. Hua desde entunses nionöque ayecmo matrebiero para tietlajtlanis canajyetla söstantle.

23

Jesús tlamachtiloöya ma quepeacö giente cueröro de fariseos hua tlamachtioneme de teotlajtule

¹ Yecuöquenu Jesús oquennutzque inu giente ca tiehua tiemachtejcöhua. ² Oquejtojque:

—Inu tlamachtioneme de teotlajtule hua fariseos motlölea para nemiechmachtisque quiene otlamachte Moisés. ³ Ejqueu, noche tli nemiechelfisque nenquechihuasque xecmalficö hua xecchihuacö. Pero amo xecchihuacö san quiene ca yejua quechihua. Pos yejua quejtoa, pero amo quechihua. ⁴ Melöhuac, yejua quejilpea tlamömale lalebes yetic, hua quetlölea impa tlöca; cache yejua nimpör ca inmajpel amo queneque cajcoquesque inu tlamömale. ⁵ Cache noche intlachihual quechihua para ma quemejtacö giente. Pues quechihua bejbeye inu filacterías cöne quebica sie pörte de teotlajtule ipa imixcuöte hua inmö, hua quesosohua tlatientle de intlaquie. ⁶ Seme quenejneque motlölisque ipa tli cache cuale locör cöne tlajtlacua, hua quenejneque tlaixpa yesque ipan teopan-cucone. ⁷ Quepea gusto ma giente quenyectlajpalucö ipan plösa, hua quenejneque ma giente ma quemelficö “totiemachtejcötzi”. ⁸ Cache nemejua, majcama xomocuiticö “totiemachtejcötzi”, ipampa sasio nemomachtejqque nenquepea, hua noche nemejua nencate nenicnijte. ⁹ Hua nionöque ipan tlöltecpactle amo xejcuiticö “totajtzi”, ipampa sasio nemoTajtzi, ininöiloac elfecac. ¹⁰ Nimpör amo xomocuiticö “tomaestro”, ipampa sasio nemomaestro icaca, yaja Cristo öque Deus quixpejqque. ¹¹ Öque cache bieye iyes entre nemejua, ma iye nemotlatequepano. ¹² Ipampa öque mochajchamöhuas, quepichaquesque; hua öque mopichaques, quepeas chamöhuallestle.

¹³ Cache iporube de nemejua, tlamachtioneme de ley hua fariseos, que sa ume nemoxöyac! Pues nenquetzacua pobielta para majcama öque calaque ompa elfecac cöne Deus tlamandöruro. Hua nion nemejua amo nencalaque, nimpör amo nenquencöhua ma calaquecö niecate tli quenectecate calaquesque.

¹⁴ (This verse does not appear in the printed copy)

¹⁵ ¡Porube de nemejua, tlamachtioneme hua fariseos, que sa ume nemoxöyac! Pos nenqueyehualoa noche lamör hua noche tlöltecpactle para nenqueniextisque sa sente

tlöcatl tli nemiechtocas. Hua cuöc ye nenqueniextejque, nenquechihualtea ma iye cache lalebes petzotec que nion nemejua. Hua nemonochtie nenyösque tlecale.

¹⁶ ¡Porube de nemejua! ¡Nencate nentlajtlayecönque pero nenixcocoxcötzetzi nencate! Nenquejtoa que tlö canajyeca tlajuröroa por teopantle amo tli quejtusneque, pero que tlö tlajurörus por inu oro tli ica pan teupa, quepea que quecumplirus. ¹⁷ ¡Lalebes nentuntojte hua nenixcocoxcötzetzi! Pues ¿cötlaja cache impörtönte ica? ¿Yaja oro tli onca ipa teopantle, o noso yaja teopantle que quechihualtea inu oro ma iye mabestec? ¹⁸ Hua nenquejtoa que tlö canajyeca tlajurörus por inu ajtöl, amo tli quejtusneque; cache tlö tlajurörus por inu bentle tli ipanca ajtöl, quepea que quecumplirus. ¹⁹ ¡Nenixcocoxcötzetzi lalebes! Pues ¿cötlaja cache impörtönte? ¿Yaja bentle, o noso yaja ajtöl que yaja quechihualtea bentle ma iye mabestec? ²⁰ Pos öque tlajuröroa por inu ajtöl, quejurörojteca por yaja ajtöl, hua por noche tli ipanca yaja. ²¹ Hua öque beletes tlajurörus por teopantle, tlajurörojteca por yaja teopantle hua nuyejque por Deus öque chöntihua ijtec. ²² Hua öque tlajuröroa por elfecac, tlajurörojteca por tietrono de Deus, hua por yejuatzi öque yehualuteca ipa.

²³ ¡Porube de nemejua, tlamachtioneme de ley hua fariseos, que sa ume nemoxöyac! Pues hasta nenquenejnecheco ca meyac cueröro inu majtlactle pörte tli nenquetiemacasque de nemoalfabieno hua eneldo hua cominos. Pero onca ocseque söstantle tli nemiechmandöroa inu ley tli cache impörtönte ica, que yaja ma xecchihuacö tlin melactec, hua ma xequemicnuejtacö giente, hua ma xomoneltocacö. Hua inu söstantle nenquecöhua sin que amo nenquechihua. Pues ica cuale ma xecchihuacö inu söstantle tli nenquechijtecate, pero cache lalebes conbenierebe xecchihuacö inu söstantle tli cache impörtönte. ²⁴ Nencate nentlajtlayecönque tli nenixcocoxcötzetzi. Pues ca meyac cueröro quiename nenquetzetzelo tli nencojcone para tlö quejtus amo de repiente amo quebicas sente söyulconetzi, ¡hua mientras hasta nenquetolutecate sente camello!

²⁵ ¡Porube de nemejua, tlamachtioneme hua fariseos, que sa ume nemoxöyac! Pues nenquechepöhua tli ca queyöhuajca de xoctle noso casfiela para ma niese cuöcualtzi. Pero de ca tlaijtec tienteca de söstantle petzoyutl. Pues nentlachteque hua amo nenquecontlöroa nemotlaeliebeles, hua inu söstantle icaca quiename petzoyutl ijtec sente xoctle cuöcualtzi. ²⁶ Fariseo ixcocoxque, xecchepöhua cachtö tli ca tlaijtec de inu xoctle. Pues ejqueu nuyejque tli ca queyöhuac cuale mochepöhuas.

²⁷ ¡Porube de nemejua, tlamachtioneme hua fariseos, que sa ume nemoxöyac! Pues nencate quiename mejcöcoyocme yequistoque, que de ca pane melöhuac nejniese cualtzetzi, cache de ca tlaijtec tientecate de memeteme de mimejque hua de noche petzoyutl. ²⁸ Ejqueu nencate nuyejque nemejua. De ca queyöhuac, de melöhuac nennejniese nenyecteque imixtla tlöca, pero de ca tlaijtec nenquepea ume nemoxöyac hua nenquepea meyac tlajtlacule.

²⁹ ¡Porube de nemejua, tlamachtioneme hua fariseos, que sa ume nemoxöyac! Pues nenquechijchihua mejcöcoyocme cualtzetzi para inu tlayulepantejque, hua nenqueyeyejcualtlölea inmejcöcoyocua de tli yecteque. ³⁰ Hua nenquejtoa: “Tlö teyesquiöya ipa inun tunalte de tobiebetcöhua, amo tequenpaliebisquiöne cuöc quenmectejque inu tlayulepantejque”. ³¹ Ejqueu mismo sie nemejua nentlatestificöroa encuentra de nemejua mismo, pos nenquejtoa que nencate neninpelhua de inu niecate tli quenmejmectejque tlayulepantejque. ³² ¡Nemejua nuyejque nenquecumplirusque lo que tli quenpoloöya nemobiebetcöhua de intlachihuales amo cuale! ³³ ¡Cuhuöme! ¡Tlöcaxenöchchcuhuöme! Abele nenmöquisasque pues cuöc Deus nemiechjuscörusque nenyösque miero tlecale. ³⁴ Ca inu, xequetacö, que naja nequentitlane ca nemejua tlayulepantejque, hua tlajmatque, hua tlamachtioneme. Seque de yejua nenquenmejmectisque hua nenquencoruspelusque, hua seque de yejua nenquenbitequesque

ipa nemoteopancucone, hua nenquentepotztocasque, hua cuöc quisasque de sente puieblo nenquentepotztocasque hasta ipa ocsente puieblo. ³⁵ Ejqueu nenyasque nent-lajtlaculteque de inmequeles de innochie yecteque tli omejmejque ipan tlöltecpactle, desde imequeles de inu tlöcatl yectec Abel, hasta imequeles de Zacarías, iconie Berequías, öque nenquemectejque entre teopantle hua ajtöl. ³⁶ De melöhuac nemiechelfea que noche inu tlajtlacule huölös nemopa nemejua tli öxö nennentecate.

Jesús ochucoac por inu ciudad de Jerusalén

³⁷ ¡Ay, Jerusalén, Jerusalén, que tequenmejmetea tlayulepantejque hua tequente-caltea tli Deus quantitlanque ca taja! ¡Meyacpa onecnec nequensentlölis tli neme mojtec, quiename sente piyolama quensentlölea ipelhua itzintla iajfetz, cache ayec onenquenejque! ³⁸ Xequejtacö, que Deus ayecmo chöntihuas nemotzölö, cache nemiechcöhualutiehwas. ³⁹ Pues nemiechelfea que desde öxö ayecmo nenniechejtasque hasta senamo nenquejtusque: “Ma tetietechihuacö öque biloatz tietucöyupa Tlöcatzintle”.

24

Jesús tlamachestejque que teopantle xexetunes

¹ Hua oquixoac Jesús de ipan teopantle hua obiloac. Hua omopachojque tiemachtejcöhua, hua tieijtetejque inu calme hua tepönme de teopantle. ² Hua onöhuatihuac yejuatzi, oquemelfejque:

—¿Nenquejta noche ini nönca? De melöhuac nemiechelfea, que amo mocöhwas tietetu ipa tietetu, tlöcamo noche yecxexetunes.

Sieñas tli mochihuatibe antes que tlames tlöltecpactle

³ Hua yejuatzi onetlöliluc ipa inu nieca tepietl de los Olivos. Omopachojque tietlac tiemachtejcöhua cuöc tiesiel. Otieyelfejque:

—Xetiechmolfele, ¿quiema mochihwas ini nönca söstantle? ¿Tli sieñas oyes cuöc tehualmobicas, hua cuöc tlames tlöltecpactle?

⁴ Onöhuatihuac Jesús, hua oquemelfejque:

—Xomotlachilicö majcamo öque nemiechcajcayöhua. ⁵ Pues huölösque meyactie notucöyupa. Quejtusque: “Naja necaca neCristo”. Pos quencajcayöhwasque meyactie. ⁶ Hua nenquecaquesque de guerras, hua tlapubelis de que oyes guerra. Xequejtacö noso majcamo xomotequepachucö, porque ejqueu quepea que mochihwas. Pero ayemo tlames tlöltecpactle. ⁷ Pos majcoques nación cuntra nación, hua igiente de sente rey cuntra igiente de ocsente rey, hua oyes öpestle, hua tlaolines ca nobeyo. ⁸ Ca ini nönca söstantle piehuas tiecoco tietunie.

⁹ Yecuöquenu giente nemiechtiemöctisque ipa tietunie tiecoco, hua nemiechmejmectisque. Hua giente de noche naciones nemiechtlajyelejtasque por nopampa.

¹⁰ Yecuöquenu meyactie betzesque ipa tlajtlacule hua ayecmo moneltocasque. Motejtiemöctisque entre yejua, hua motlötlayelejtasque entre yejua. ¹¹ Hua huölösque meyactie tli quejtusque que cate tlayulepantejque de Deus mös amo melöhuac, hua quencajcayöhwasque meyactie. ¹² Hua momeyaquelis tlajtlacule, hua por inu meyactie ayecmo motlasojtlasque lalebes. ¹³ Pero öque quexicus hasta ca cöne tlames, yaja inu momöquextis. ¹⁴ Hua ini nönca cuale tlamachestelestle de quiene Deus tlamandöruro monunutzas ipa noche tlöltecpactle, hua giente de noche naciones quecaquesque. Yecuöquenu tlames tlöltecpactle.

¹⁵ Ejqueu noso nenquejtasque inu tli san petzotec tlaxexetotzas hua moquetzas ipa löcor yectec. Inu tlayulepante Daniel otlajtlajto de inu tli san petzotec. —Öque quetlajtul-tea ömatl ma casojcömate.— ¹⁶ Cuöquenuju quiejquech yesque ipa Judea ma cholucö hasta ipa tepieme. ¹⁷ Öque iyec icpac cale majcamo temo para quequextiti canajyetla de tli

quepea pa ichö. ¹⁸ Öque iyes ca caltienco majcama mocuepa ca ichö para cönati ipelesol. ¹⁹ ¡Ay, porubejte quiejquech tli uutzte hua tli tlajtlabepöjtecate ipa inu niecate tunalte! ²⁰ Xomotlajtlötlajticö, noso, que majcama xecpeacö que nenchojchulusque ipa mietztle cuöc cache siehua nimpör ipan söbron tunale cuöc tosiebea. ²¹ Pues entunses iyes meyac tietunie, tli ayec omochi desde ca opie tlöltecpectle hasta öxö, nimpör ayecmo quiema mochihuas ocsajpa. ²² Tlö quejtus inu tiempo amo mochihuane tzitzequetzi, nion sente tlöcatl amo momöquextisquiöne. Pero por impampa yejua tli Deus quemixpejpenque, inu nieca tiempo mochihuas tzitzequetzi. ²³ Cuöquenuju, tlö quejtus canajyeca nemiechelfis: “Xequetacö, nönca Cristo”, o noso: “Necö oncönca”, amo xomoneltocacö. ²⁴ Pos majcoquesque Cristos hua tlayulepantejque tli amo de melöhuac. Quechihuasque meyactie sieñas hua tietzöbeme bejbeye, que hasta cöso quencajcayöhuasque giente tli Deus quemixpejpenque tlö cuale quencajcayöhuasquiöne. ²⁵ Xequetacö, ye nemiechelfea antes de que mochihuas. ²⁶ Ejqueu, tlö cana nemiechelfisque: “Xequetacö, Cristo iloac ca ompa cöne nionöque chönte”, amo xequisacö. Tlö nemiechelfea: “Xequetacö necö iloac ijtec cuörto de nönca cale”, amo xomoneltocacö. ²⁷ Pues quieme cuöc tlapetlöne ca cöneca quisa tunale hua onniestebetze hasta cöneca calaque tunale, ejqueu nuyejque cuale mojtas ca nobeyo cuöc nehuölös naja öque onochi netlöcatl. ²⁸ Cöne beletes iyes cuiervo mejque ompa mosentlölisque tzopilume.

Jesús oque nechihualuc tlöcatl hualiloas ocsajpa

²⁹ 'Hua nima sötiepa de ini nönca tiecoco tietunie tli oyes ipa inu niecate tunalte, tunale tlajtlayöhuas, hua mietztle ayecmo mietztunas. Sitlalte betzesque de elfecac, hua inu söstantle checöhuac de elfecac muolinisque. ³⁰ Yecuöquenu nieses sente sieñas: naja öque onochi netlöcatl nenieses ipa elfecac. Entunses chojchucasque giente de noche tribus hua naciones, hua niechejtasque cuöc naja öque onochi netlöcatl nehuölös ipa mextle de elfecac, ca checöhualestle hua meyac tlanixtelestle de coluria. ³¹ Hua necualentitlanes noöngeles ca sente bieye tlapitzalestle, hua quensentlölisque noche giente tli naja nequemixpejpe, de ca nobeyo desde cöne ipiejyo elfecac hua tlöltecpectle hasta cöne itlamejyo.

Ejiemplo de icox cuabetl

³² 'Itech icox cuabetl xetzecucö sente ejiemplo. Cuöc ye selea imömöyo, hua ye itzmoline, nenquemate que ye asequi xupantla. ³³ Ejqueu nuyejque nemejua, cuöc nenquejtasque noche ini nönca söstantle, xecmatecö que ye aseco tiempo hua que ye nemotlanca. ³⁴ Melöhuac nemiechelfea, amo mequesque innoctie giente *tli öxö nentecate hasta senamo mochihuas ini nönca söstantle. ³⁵ Elfecac hua tlöltecpectle tlamesque, cache notlajtul amo tlames.

Amo tecmate tlin ura hualiloas Tlöcatzintle

³⁶ 'Cache de inu nieca tunale hua inu ura nionöque amo quemate. Amo quemajmate öngeles de elfecac, nimpör amo quemate tieConietzi, tlöcamo solamiente quematihua Tajtle. ³⁷ Hua quieme oyeya pan tunalte de Noé, ejqueu iyes cuöc nehuölös naja que onochi netlöcatl. ³⁸ Pues ipa inu tunalte antes de inu ötiemelestle, giente tlajtlacuajtaya hua cojconitaya. Mososohuajtejtaya hua monajnömectejtaya. Ejqueu oquechijtaya hasta ipa inun tunale cuöc ocalac Noé ijtec inu börcobiebe itucö örca. ³⁹ Hua amo omomacaque cuienta hasta senamo ohuöla ötzintle hua oquenbicac innoctie. Ejqueu mismo iyes cuöc nehuölös naja que onochi netlöcatl. ⁴⁰ Cuöquenu yesque unte tlöca ipan caltientle. Sente quebicasque sa de repiente, hua ocsente quecöjtiehuasque. ⁴¹ Unte sohuame testasque ipa sente molino. Sente quebicasque, hua ocsente quecöjtiehuasque. ⁴² Xetlachixtacö noso, porque amo nenquemate tlin tunale hualiloas nemo Tlöcatzintle.

* **24:34** Cuale nuyejque motradusirus: “tli entunses nentasque”.

⁴³ Pero xecmatecö ini nönca, que tlö chöne quematene tlin ura ca yohuale huölös ichtejqe, tlaixutejtasquea, hua amo quecöhuasquea ma calaque ichtejqe ipa ichö. ⁴⁴ Hua por inu, nuyejqe nemejua xeyecö listos, porque naja que onochi netlöcatl nehuölös cuöc nemejua amo nenquepensörusque.

Tlatequepanojque de confiönsa hua tli amo cualteque

⁴⁵ ¿Öquenu noso ica tlatequepano tlajmatque hua de confiönsa, que itieco quen-cargörfe ichö para ma quentlacualte noche giente ipa ura? ⁴⁶ Cuale icnupel inu nieca tlatequepano, tlö itieco cuöc huölös queniextiqui quechijteca ejqueu. ⁴⁷ Melöhuac nemiechelfea, itieco quetlölis ma tlamandöro ipa noche tli ihuöxca. ⁴⁸ Pero beles inu nieca tlatequepano amo cualtec iyes, hua quejtus ipa iyulo: “Notieco bejcöbe para huölös”. ⁴⁹ Beles piehuas quenmaltratörus ocseque tlatequepanojque, hua tlatlacuös hua conis ca tlöhuöncötzetzi. ⁵⁰ Huölös itieco de inu nieca tlatequepano ipan tunale cuöc yaja amo quechea, hua tlin ura amo quemate. ⁵¹ Yecuöquenu quetlajcoteques, hua quetlölis inca tli ume inxöyac. Ompa chojchucasque hua motlantesesque.

25

Cuiento de majtlactle sehuantotu

¹ 'Quiene Deus tlamandörurus ejqueyi iyes. Iyes quiename majtlactle sehuantotu ipa sente nesohuajtiluyo, que cara sente quepeaya sente tlöbile. Yejua oquisque para quenömequeto montle. ² Hua möcuiltie de yejua oyejyeya tuntojte, hua möcuiltie tlajmatque. ³ Tli oyejyeya tuntojte ocönque intlöbil, pero amo oquecueque asiete. ⁴ Pero tli tlajmatque oquecueque asiete ijtec potieyacucone nuyejqe ca intlöbil. ⁵ Hua omochi que obejcö montle, hua ocojcochtaque innochie. ⁶ Hua quieme ca tlajco yohuac ocaquestec tzajtzelestle: “¡Xequejtacö biloatz montle! ¡Xequisacö xetienömequete!” ⁷ Yecuöquenu innochie inu niecate sehuantotu omiejque, hua oquenxutlaltejqe intlöbil. ⁸ Hua inu tuntojte oquemelfejque tli tlajmatque: “Xetiechmacacö de nemoasiete, ipampa totlöbil ye sesiebe”. ⁹ Cache tli tlajmatque onöhuatque, oquejtojque: “Amo nemiechmacasque, amo cana de repiente tiechpolus tejua hua nemejua nuyejqe. Xeyöcö cöne monamaca, hua xomocubicö asiete”. ¹⁰ Hua mientras yejua uyajque oquecoato, ohuöla montle. Hua tli ye oyejyeya listas ocalajque ca yaja ipa nesohuajtiluyo. Hua omotzac pobielta. ¹¹ Hua sötiepa ohuölajque nuyejqe inu ocseque sehuantotu. Oquejtojque: “Tlöcatzintle, Tlöcatzintle, xetiechmotlajtlapolfefe”. ¹² Cache onöhuat yaja, oquejto: “Melöhuac nemiechelfea, amo nemiechixomate”.

¹³ 'Por inu, nemejua xetlachixtacö, ipampa amo nenquemate tlin tunale hua tlin ura nehuölös.

Cuiento de tlöcatl tli quetiencacac tomi ca itlatequepanojua

¹⁴ 'Pues ica quiename sente tlöcatl que uya ipa ocsente tlöle. Hua oquennutz itlatequepanojua, hua oquenmötejtie tli ihuöxca. ¹⁵ Hua sente oquemacac cincuenta mil pieso, hua ocsente oquemacac veinte mil pieso, hua ocsente oquemacac diez mil pieso. Oquenmacac san quiene ca yejua beleteya para quechihuasque negocio. Hua oquis ipa ibiöje. ¹⁶ Hua sa nima öque oqueselec cincuenta mil pieso uya, hua oquetlatlöniltelito, hua oquentlönele impa ocseque cincuenta mil pieso. ¹⁷ Hua ejqueu nuyejqe öque queselec veinte mil, oquetlö nuyejqe yaja ocseque veinte mil. ¹⁸ Cache öque oqueselec sa diez mil, uya hua otlatacac ipan tlöle, hua ompa oquejyö inu tomi de itieco. ¹⁹ Hua sötiepa de meyac tiempo, ohuöla intieco de inu niecate tlatequepanojque. Oquennutz, hua oquechi cuenta ca yejua. ²⁰ Hua cuöc oaseco öque oquesele cincuenta mil pieso, oquehualcac ocseque cincuenta mil pieso. Oquejto: “Tlöcatzintle, cincuenta mil pieso teniechmomöctele. Xomojtele necö ocseque cincuenta mil pieso onectlö ica yejua”. ²¹ Hua itieco oquelfe: “Cuale otecchi. Taja teca tecuale tlatequepano hua teca de

confiönsa. Teniechmoströrfe que teca de confiönsa ca tli sa nönöjtetzi; öxö temetzlölis para ma xetlamandöro ipa meyac söstantle. Öxö xecpea inu pöquelestle de motieco”.²² Hua cuöc oaseco nuyejque öque ocasec veinte mil pieso, oquejto: “Tlöcatzintle, veinte mil pieso teniechmomöctele. Xomojtele necö ocseque veinte mil pieso onectlö ica yejua”.²³ Itieco oquelfe: “Cuale otecchi. Taja teca tecuale tlatequepano hua teca de confiönsa. Teniechmoströrfe que teca de confiönsa ca tli sa nönöjtetzi. Öxö temetzlölis para ma xetlamandöro ipa meyac söstantle. Öxö xecpea inu pöquelestle de motieco”.²⁴ Hua cuöc oaseco nuyejque öque queselec sa diez mil pieso, oquejto: “Tlöcatzintle, temetzmixomachele que tejuatzitzi tomobetzteca tetlöcatl que amo temetzmotlöocoltelea, hua que tomocuejcuelea tli amo tomotlapexquele, hua tomotlapexquelea cöne amo tomotlatuquele.”²⁵ Ejqueu onomajte, hua oneya, hua onequejyö inu diez mil pieso ijtec tlöle. Öxö necönca tli mohuöxcatzitzi”.²⁶ Pero onöhuat itieco, oquelfe: “Amo cuale moyulo hua tetlatzejque lalebes. Amo tecuale tlatequepano. Tecmajtaya que nejcuejcue cöne amo nepexcac hua que nepexca cöne amo onetlatucac.”²⁷ Por inu conbenierebeya siquiera tectiemacas notomi inca giente ipa böncö. Pues ejqueu cuöc onehuöla naja, necönane tli nohuöxca siquiera ca tli ye otequet”.²⁸ Hua oquemelfe itlatequepanojua: “Xejcuejcuelicö noso inu diez mil pieso, hua xecmacacö öque quepea cien mil pieso.”²⁹ Ipampa öque quepea, quemacasque, hua quepeas cache lalebes meyac. Cache öque amo quepea, quecuejcuelisque hasta inu tepetzi tli oc quepea.”³⁰ Hua inu tli amo cuale tlatequepano, xectlajcalicö ca queyöhuac pa tlajtlayohuaquelestle. Ompa chojchucasque hua motlantesesque.

Cuento de calnielöjte hua chiböjte

³¹ 'Hua cuöc naja que onochi netlöcatl nehuölös ca notlaniexteles, ca tiehua noche öngeles, yecuöquenu notlölis ipa notrono.”³² Hua nixtla mosentlölisque noche naciones hua nequennencuaxelus de intzölö de yejua, quieme calnielöjpeque quennencuaxeloa calnielöjte ca quieme hua chiböjte ca ocsie löro.”³³ Hua calnielöjte quentlölis ca möyecömpa, hua chiböjte ca rabiescopa.”³⁴ Yecuöquenu inu rey quemelfis tli yesque ca möyecömpa: “Xehuölöcö, nemejua tli nemiechteochihualo noTajtzitzi. Xomohuöxcaticö ini nönca reino tli ye moyecchijteca para nemejua desde cuöc omochejchi tlöltecpectle.”³⁵ Ipampa cuöc naja neteosebeya, nenniechtlamacaque. Cuöc noömequeya, nenniechötliltejque. Amo necpeaya cöne neyes, hua nenniechcalutejque.”³⁶ Niechpoloöya notlaquie, hua nenniechtlaquentejque. Nococoöya, hua nenniechtlajpaluto. Oneyeya ipan cörsel, hua nenniechejtato.”³⁷ Yecuöquenu inu yecteque nöhuatesque, quejtusque: “Tlöcatzintle, ¿quiema temetzmöjtelejque tomoteosebitiöya, hua temetzmotlamaquelejque? O noso ¿quiema tomoömequitejtenemeya hua temetzmötliltelejque?”³⁸ Hua ¿quiema amo tomopeliöya cöne tomobetztaquea, hua temetzmocalutelejque? O noso ¿quiema metzmopolfiöya motlaquientzi. hua temetzmotlaquentelejque?”³⁹ O noso ¿quiema tomococöjzinoöya, o noso tomobetztaquea ipan cörsel, hua otemetzmöjtelite?”⁴⁰ Hua nöhuates rey, hua quemelfis: “Melöhuac nemiechelfea que cuöc nenquechibelejque ejqueu sente de ini nöncate nocnihua, mös tzitzequetzi, naja nenniechchibelejque.”⁴¹ Yecuöquenu quemelfis nuyejque tli yesque ca irabiescopa: “Xomonencuaxelucö de naja, tlabejbi-calteme. Xeyöcö ijtec tletzintle tli xutlateca nochepa tli tlachejchijtle para Diöblo hua para iöngeles.”⁴² Ipampa cuöc neteosebeya, amo nenniechtlamacaque. Cuöc noömequeya, amo nenniechötliltejque.”⁴³ Amo necpeaya cöne neyas, pero amo nenniechcalutejque. Oniechpoloöya notlaquie, pero amo nenniechtlaquentejque. Onococoöya, hua neyeya ipan cörsel, hua amo nenniechtlajpaluto.”⁴⁴ Yecuöquenu yejua quenönquelisque, quejtusque: “Tlöcatzintle, ¿quiema temetzmöjtelejque temoöpesmequitejtenemeya, noso tomoömequitejtenemeya, noso amo tomopiliöya cöne tomobetztaquea, noso metzmopolfiöya motlaquientzi, noso tomococöjzino, noso tomobetztaquea ipan cörsel, hua

amo temetzmotequepanelfejque?”. ⁴⁵ Yecuöquenu quennönquelis, quejtus: “Melöhuac nemiechelfea que cuöc amo nenquechijque ca sente de ini nöncate tzequetzetzi, naja amo nenniechchibelejque”. ⁴⁶ Hua inu niecate yösque para mocastecöorusque nochepa, hua tli yecteque calaquesque cöne nemesque nochepa.

26

Quetiemoöya manera quiene tiemectisque Jesús

¹ Hua omochi que cuöc otlamoac Jesús de noche ini nöncate tlajtulme, oquemelfejque tiemachtejcohua:

² —Ye nenquemate que sötiepa de ume tunale mochihua pöscua yelfetl, hua naja tli onochi netlöcatl niechtiemöctisque para ma niechcoruspelucö.

³ Yecuöquenu jefes de teopexcötzetzi hua biebentzetzi de inu puieblo omosentlölejque ipan pötio de palacio de tlajtojcöteopexque, öque itucö Caifás. ⁴ Hua omotlajtulmacaque para tieasesque Jesús ca möñas hua tiemectisque. ⁵ Hua quejtoöya:

—Amo tecasesque Jesús ipa yelfetl, para majcamo chöchalöncö giente.

Sente sohuatl quemejmelo pajtle ajfeyoc ipa tietzonteco Jesús

⁶ Hua Jesús iloaya ipa puieblo de Betania ipa ichö Semu öque sa söhuayo oyeya. ⁷ Ohuöla tietlac sente sohuatl. Quehualécaya sente potixajconetzi de alabastro tli quepeaya pajtle ajfeyoc tli lalebes pateyo. Oquemejmelo pajtle ipa tietzonteco yejuatzí mientras tlacualutaya. ⁸ Cuöc oquejtaque tiemachtejcohua, ocuajcualönque. Oquejtojque:

—¿Tli para niempolebe ini nönca? ⁹ Pues cuale monamacasquea ica pateyo, hua cuale moxiexeloöne ca tli porubejte.

¹⁰ Pero Jesús nematicuc cuenta de tli quejtojque, hua oquemelfejque:

—¿Tlica nenquepasoloa ini nönca sohuatl? Ara ca cuale tli niechchibेलico. ¹¹ Nochepa nenquenpea tli porubejte nemotzölö, cache naja amo nochepa nenniechpeasque.

¹² Hua tlö quetlölele inu pajtle ajfeyoc ipa nocuierpo, pos oquechi para cuöc notlölpachus.

¹³ Melöhuac nemiechelfea, que cöne beletes tlanunutzasque de ini nönca cuale tlamach-estelestle ipa noche tlöltecpactle, nuyejque ini nönca lo que tli oquechi ini sohuatl mojtus, para que giente quelnömequesque de yaja.

Judas carreglörö para tieantrecöorus Jesús

¹⁴ Entunses sente de inu majtlactle huan ume tiemachtejcohua, que itucö Judas Iscariote, uya inca jefes de teopexcötzetzi. ¹⁵ Hua oquemelfe:

—¿Tli nenqueneque nenniechmacasque, hua naja nectiemacas ca nemejua?

Hua yejua quepesörfejque treinta monedas de plöta. ¹⁶ Hua desde cuöquenu quetiemoöya quiene ca tieantrecöoruti.

Jesús ocualuc sölültimo cena

¹⁷ Hua ipa primero tunale de yelfetl de pöntzi sin levadura, ohuölajque tiemachtejcohua tieca Jesús. Otieyelfejque:

—¿Cöne tomonequitea ma tetlapreparörucö para tomocualtis inu tlacuale de pöscua?

¹⁸ Hua oquejtojque:

—Xeyöcö ipa puieblo ica sente tlöcatl tli ompa nenqueniextisque, hua xequelficö: “Maestro quejtulo: Ye aseco noura. Ipa mochö necchihuas inu pöscua yelfetl ca tiehua nomachtejcohua”.

¹⁹ Hua tiemachtejcohua oquechijque quiene Jesús oquennahuatejque, hua otlapreparörojque para pöscua.

²⁰ Hua cuöc ye oyeya ca ye yohuac, yehualutaya itlac miesa inca inu majtlactle huan ume tiemachtejcohua. ²¹ Hua cuöc ye tlajtlacualutaya, oquejtojque:

—Melöhuac nemiechelfea que sente de nemejua niechantrecöoruti.

²² Yecuöquenu yejua ocaseque meyac tequepachule, hua opiejque tieyelfiöya cara sesen tlöcatl:

—¿Beles naja, Tlöcatzintle?

²³ Yejuatzi onöhuatihuac, oquemelfejque:

—Öque quecalaquis imö ca naja ijtec nocasfiela, yaja inu niechantrecörus. ²⁴ Naja que onochi netlöcatl nemeques, san quiene ca tlajcuelulpanca de naja. Pero, ¡porube de inu tlöcatl tli niechantrecörus naja que onochi netlöcatl! Cache cuale uyesquea para yaja ma ayec tlöcatene.

²⁵ Yecuöquenu onöhuat Judas, öque tieantrecörusquea. Oquejto:

—¿Beles naja, noTiemachtejçötzi?

Oquelfejque:

—Taja ye tequejto.

²⁶ Mientras tlajtlacualutaya, ocönque Jesús inu pöntzi hua oqueteochijque. Oquecojcontunque, hua oquenmacaque tiemachtejçöhua. Hua oquejtojque:

—Xecönacö, xejcuöcö. Nönca pöntzi *ica nocuierpo.

²⁷ Yecuöquenu ocönque sente bölsö, hua tietlasojçömacheliluc. Oquenmacaque, oquejtojque:

—Xeconicö de ini nönca nemonochtie. ²⁸ Pues yaja ini *icaca noyeso. Nectiemaca para ma mochihua sente acuerdo entre Deus hua tlöca. Nocuierpo yesquisas impampa meyactie tlöca para ma moperdonöro intlajtlacul. ²⁹ Pero nemiechelfea, que desde öxö ayecmo neconis iöyo de uvas hasta ipa inu nieca tunale cuöc ca tiehua nemejua neconis inu vino yancuec tli onca cöne tlamandöruruteca noTajtzi.

Jesús quelfejque Piero que yaja quejtus yexpa que amo tieixomate

³⁰ Hua ocuejcuicoac sente cuicatelestle, hua oquejquixoatie bejbiloac ipa tepietl de los Olivos. ³¹ Yecuöquenu oquemelfejque Jesús:

—Noche nemejua nenbetzesque ipa tlajtlacule por nopampa ipa ini nönca yöhuale. Pos tlajcuelulpanca:

Necmectis calnielojpexque,

hua inu calnielojte tli quemixutea mocuasemanasque.

³² Pero sötiepa cuöc naja neyulebes, neyös delönte de nemejua hasta pa estado de Galilea.

³³ Yecuöquenu onöhuat Piero, otieyelfe:

—Mös cana noche ocseque betzesque ipa tlajtlacule por mopampantzinco, pero naja ayec nebetzes.

³⁴ Oquelfejque Jesús:

—Melöhuac temetzelfea que ipa nönca yöhuale, antes tzajtzes canteliex, taja yexpa tequejtus que amo teniechixomate.

³⁵ Otieyelfe Piero:

—Mösque quejtus nemeques ca tejuatzi, pero amo temetzmongörfis.

Hua innochtie tiemachtejçöhua nuyejque oquejtoöya ejqueu.

Jesús netlötlajtiluc pa Getsemaní

³⁶ Yecuöquenu hualiloac Jesús ca tiehua tiemachtejçöhua ipa locör itucö Getsemaní. Hua oquemelfejque:

—Xomotlölicö necö, mientras naja ma nebeya notlajtlötlajtite niepa.

³⁷ Hua oquenbicaque Piero, ca tiehua inu unte ipelhua Zebedeo. Opiehualuc netequepachuluc, hua lalebes quiene oquechi tieyulo. ³⁸ Yecuöquenu oquemelfejque:

—Lalebes meyac tequepachule quepea noölma, hasta sana nemequesneque. Xomocöhuacö necö, hua xetlachixtacö ca naja.

* **26:26** Cuale nuyejque motradusirus: “querepresentöroa”.

³⁹ Entunses obiloac cache adelönte. Onepechtiecaluc hasta tlölpä, hua onetlajtlötlajtiluc. Oquejtojque:

—NoTajtzi, tlö quejtus cuale mochihuas, majcamo necpea que neconis ini nönca bolso de tietunie. Cache majcamo mochihua quiename naja necneque, tlöcamo quiename tejuatzitomonequitea.

⁴⁰ Hua ohualbiloac intlac tiemachtejcohua, hua oquenniexutiluco cojcochtaya. Quelfejque Piero:

—¿Quie abele nentlachixtaque ca naja nion sie ura? ⁴¹ Xetlachixtacö hua xomotlötajticö, para amo nemiechyulmötocas Amo Cuale Tlöcatl. Melöhuac toyulo cuejcue-sebe, cache tonacayo débil icaca.

⁴² Ocsajpa biloac, ca ujpa, hua onetlötajtiluc. Oquejtojque:

—NoTajtzi, tlö abele iyös nönca tietunie sin que naja nepanus por yaja, pues ma mochihua tli motlanequelestzi.

⁴³ Cuöc ohualiloac ocsajpa, oquenniexutiluco cojcochtecate, porque lalebes cojcoches-nequeya. ⁴⁴ Hua oquencöjtiejque hua biloac ocsajpa onetlötajtiluc ca yexpa. Ocsajpa oquejtojque mismo tlajtule. ⁴⁵ Yecuöquenu ohualiloac intlac tiemachtejcohua, hua oquemelfejque:

—Bieno. Pues a öxö xecojcohecö, hua xomosiebicö. Xequetacö ye aseteca ura. Naja que onochi netlöcatl öxö niechantrecörusque inmöpa tlajtlaculteque tlöca. ⁴⁶ Xemiehuacö hua teyabe. Ye ompabitz öque niechantrecörus.

Enemigos de Jesús tieaseque

⁴⁷ Hua cuöc yejuatzitoc tlajtlajtulutaya, ye aseco Judas, sente de inu majtlactle huan ume tiemachtejcohua. Ohuöla, hua ca yaja ohuölajque meyac tlöca ca espödas hua ca cuabetl. Huölajque porque jefes de teopexcötzetzi hua biebentzetzi de puieblo cualentitlanque. ⁴⁸ Antes que Judas tieantrecörus, quemelfe inu tlöca de sente sieñas. Oquejto:

—Öque naja necpetzus, yaja inu icaca. Xecasecö.

⁴⁹ Hua omopacho tietlac Jesús. Oquejto:

—Ma cuale xomobetzta, noTiemachtejcotzi.

Hua otiepetzo. ⁵⁰ Hua Jesús oquelfejque:

—Amigo, ¿tli para tebitz? ¿Para tecchihuas ini nönca?

Yecuöquenu omopachojque, hua tieaseque Jesús, hua tiebicaque. ⁵¹ Pero sente de tli oyejyeya tieca Jesús omösu hua oquequexte iespöda. Conmacac sente itlatequepano de tlajtojcöteopexque. Pos quetejtequele inacas. ⁵² Yecuöquenu Jesús oquelfejque:

—Xejcuepa moespöda ipa ifunda. Pos tli case espöda para momagasque, ca espöda mejmequesque. ⁵³ ¿Quie beles amo tomomaca cuenta que mös niechquitzquejtecate nönca giente cuale notlötajtis tieca noTajtzi, hua yejuatzitoc niechmacasque cache de majtlactle huan ume ejércitos de öngeles para ma niechpaliebicö? ⁵⁴ Pero tlö ejqueu necchihuane, ¿quiene noso mochihuasquea lo que tli tlajcuelulpanca ipan teotlajtule, que ejqueyi quepea que mochihuas?

⁵⁵ Entunses Jesús oquemelfejque giente:

—¿Nenhualiejque ca espödas hua ca cuabetl quieme cana contra sente ichtejque para nenniechasesque? Carä tunale notlöliöya nemiechmactiöya ipan teopantle. Pos amo nenniechaseque. ⁵⁶ Pero noche ini mochijteca para ma mochihua tli inu tlayulepantejque oquejcuejojque ipa teotlajtule.

Yecuöquenu noche tiemachtejcohua tiecöjtiejque. Ochucholajque.

Tiebicaque Jesús ipa junta

⁵⁷ Hua inu giente tli tieaseque Jesús tiebicaque itlac tlajtojcöteopexque itucö Caifás. Pa ichö mosentlölejque tlamactiöneme de teotlajtule hua biebentzetzi. ⁵⁸ Cache Piero

tietocaya bejcateca hasta cöne pötio de ichö de tlajtojcöteopexque. Hua ocalac ca tlajtec, hua ompa omotlöle ca yejua de guardia, para quejtas quiene ca tlames inu asunto. ⁵⁹ Hua inu jefes de teopexcötzetzi, ca tiehua noche inu junta, quietimoöya manera de tietieyelfisque Jesús mös iyex por istlacatlajtule, hua ejqueu tiemectisque. ⁶⁰ Pero amo yetla queniextiöya, mös meyactie hualaseya hua istacatlajtoöya. Pero sötiepa ohuölajque unte tlöca ⁶¹ que oquejtojque:

—Ini nönca tlöcatl oquejto: “Cuale necxexetunis tieteupa Deus, hua ipa yeye tunale ocsajpa necajcoques”.

⁶² Entunses omoquetztequis tlajtojcöteopexque. Otieyelfe:

—Pos ¿amo yetla tenöhuates? ¿Tlin inu noso quemelöjöpujtecate de taja?

⁶³ Pero Jesús sa quetzacualoöya tiecamac. Tlajtojcöteopexque otieyelfe:

—Naja temetznahuatea tietucöyupantzinco Deus öque nemoa, xetiechelfe tlö taja tecaca teCristo, tieConie Deus.

⁶⁴ Jesús oquelfejque:

—Ica melöhuac tli tequejto. Hua öxö nemiechelfea, que sötiepa de öxö nenquejtasque que naja öque onochi netlöcatl neyehuatas ca tiemöyecmö de Deus öque quepealo checöhualestle. Naja que onochi netlöcatl nehuölös de elfecac ipa mextle.

⁶⁵ Yecuöquenu tlajtojcöteopexque oquetzotzomotz itzotzomajua. Oquejto:

—Ye ochecuatlajto cuntra Deus. ¿Tli para cache tecneque öque tiechmelöjöpobelis? Öxö necö ye onenquecajque quiene checuatlajtoa cuntra Deus. ⁶⁶ ¿Tlin nenquejtoa?

Hua onöhuatque yejua, oquejtojque:

—Quemeresieroa ma meque.

⁶⁷ Yecuöquenu ochejchaque ipa tiexöyac, hua tiemacaque checöhuac, hua ocseque tiecamatlajtlatzcuepuniöya. ⁶⁸ Quejejtoöya:

—Xetiechyulepante, ya que taja teCristo. Xetiechelfe öquenu ometzmacac.

Piero oquejto que amo tieixomateya Jesús

⁶⁹ Hua Piero oyeya ca queyöhuac pan pötio. Hua omopacho itlac sente sohuatl llatequepano. Oquejto:

—Taja nuyejque oteyeya ca Jesús inu galileo.

⁷⁰ Pero yaja oquenegöro imixtla innochtie. Oquejto:

—Amo necmate tli tequejtoa.

⁷¹ Hua cuöc yaja oquis ca ipan pobielta, ocsente sohuatl oquejtac, hua oquemelfe tli ompa oyejyeya:

—Ini nönca tlöcatl oyeya itlac Jesús de puieblo de Nazaret.

⁷² Hua ocsajpa oquenegöro ca juramento. Oquejto:

—Amo nequixomate inu tlöcatl.

⁷³ Hua oc tepetzi sötiepa oaseco tli ca niepa oyejyeya, hua oquelfejque Piero:

—De melöhuac taja nuyejque tecaca de yejua, ipampa hasta ipa motlajtul teniese.

⁷⁴ Yecuöquenu opie yaja motlabejbicalteya ica sie yaja. Oquejtoöya:

—¡Paltzinco! Amo nequixomate inu tlöcatl.

Hua sa nima otzajtzec canteliex. ⁷⁵ Entunses Piero oquelnömec inu tlajtule de Jesús, que oquelfejque: “Antes tzajtzes canteliex yexpa tequejtus que amo teniechixomate”. Hua oquis ca queyöhuac, hua ochucac lalebes.

27

Tieantrecöruto Jesús ca Pilöto

¹ Hua cuöc ye ca ise cualco, noche jefes de teopexcötzetzi, ca tiehua biebertzetzi de puieblo, quetzontejque entre yejua quiene tiechibelisque Jesús para cuale tiemectisque.

² Hua otieijilpejque hua otiebicaque otieantrecöruto ica Pilöto, öque oyeya cubernadur.

Judas omocucupötmectito

³ Yecuöquenu Judas, öque ye tieantrecöro Jesús ca tieenemigos, oquejtac que ye tiecuntenörojque. Omoyulcuc de lo que tli oquechi, hua oquecucupato inu treinta monedas de plöta inca jefes de teopexcötzetzi hua biebentzetzi. ⁴ Oquejto:

—Naja ye onetlajtlaco onetieantrecöro para mecoas öque amo tlajtlacultec iloac.

Cache yejua oquejtojqe:

—¿Tli tiechtequepachoa tejua? Metztocöroa taja tequejtas.

⁵ Hua oquetlölmutilac inu tomi hasta ijtec teopantle, hua oquis de ompau. Hua uya omocucupötmectito. ⁶ Hua inu jefes de teopexcötzetzi ocönque inu tomi. Oquejtojqe:

—Amo cuale tectlölisque ini tomi itzölö tomi de nönca teopantle, ipampa ica ipati de iyeso de sente tlöcatl tli meques.

⁷ Hua cuöc ye omotlajtulmacaque, oquecujque ca inu tomi sente tlöle de casfielajtiero, para ompa motlölpachusque inmimejcöhua de extranjeros. ⁸ Ipampaju omocuite inu nieca tlöle, Tlöle de Yestle. Hua ejqueu mocuitea hasta ipa ini nönca tunale. ⁹ Ejqueu omochi lo que tli omojto por icamacopa tlayulepante Jeremías, cuöc oquejto: “Hua ocaseque inu treinta monedas de plöta, ipati de inu tlöcatl tli seque de inu israelitas quetlölejque inu precio. ¹⁰ Hua oquetiemacaque inu tomi para oquecujque tlöle de casfielajtiero, san quiene oniechmandöro Tlöcatzintle”.

Jesús hua Pilöto

¹¹ Hua Jesús iloaya ixtla cubernadur. Hua cubernadur tietlajtlane, otieyelfe:

—¿Taja terey de joriojte?

Hua Jesús oquelfejque:

—Ica melöhuac tli tequejtojteca.

¹² Hua cuöc jefes de teopexcötzetzi hua biebentzetzi tietieyelfiöya, amo nöhuatihuaya.

¹³ Yecuöquenu Pilöto otieyelfe:

—¿Amo tejcaque que meyac söstantle quejtoa encuentra de taja?

¹⁴ Pero Jesús amo quenönquelejque nion sie tlajtule. Así es que inu cubernadur quetietzöbejtaya lalebes.

¹⁵ Hua ipa inun tunale de yelfetl, inu cubernadur quepeaya costumbre de que quecajcöhuaya sente prieso tli yejua quenequeya mocajcöhua. ¹⁶ Hua cuöquenu ompa quepeaya sente prieso tzactaya lalebes motieniehuaya. Itucö oyeya *Jesús Barrabás.

¹⁷ Hua cuöc ye mosentlölejque meyac giente, oquemelfe Pilöto:

—¿Öquenu nenqueneque ma nejcajcöhua ca nemejua? ¿Yaja *Jesús Barrabás, o noso yaja Jesús öque giente quecuitea Cristo?

¹⁸ Pos yaja quemateya que por envidia tieantrecörojque. ¹⁹ Hua cuöc yaja oyehuataya ipa imiesa de tlajtojcötelestle, isohua oquetlatitlanele sente mensöje. Oquelfe: “Amo xomopile tli tomojtelis ca inu tlöcatl yectec. Porque öxö meyac tiecoco nopa omochi ipa nocochtiemequeles por tiepampa yejuatzi”.

²⁰ Cache inu jefes de teopexcötzetzi ca tiehua biebentzetzi oquentlajtulmacaque giente para ma tlajtlanecö yaja Barrabás, hua ma tiemecticö Jesús. ²¹ Yecuöquenu onöhuat cubernadur, oquemelfe:

—¿Cötlaja de innehua nenqueneque ma nejcajcöhua?

Hua yejua oquejtojqe:

—Yaja Barrabás.

²² Pilöto oquemelfe:

—¿Tli noso necchibelis inu Jesús öque giente quecuitea Cristo?

Oquelfejque innochie:

—Ma mocuspelo.

* **27:16** Meyactie manuscritos sa quejtoa “Barrabás”, amo “Jesús Barrabás”.

²³ Hua yaja oquejto:

—¿Tlica? ¿Tli mal oquechi?

Cache yejua cache tzajtztzeya lalebes. Quejejtöya:

—¡Ma mocuspelo!

²⁴ Hua cuöc oquejtac Pilöto que abele tli quechihuaya, antes cache yejua chöchalöneya, oquecuc ötzintle hua omomöpajpöc imixtla de inu giente. Oquejto:

—Amo tli tlajtlacule necpea naja de imequeles de ini nönca tlöcatl. Nemejua nemiech-tocörus nenquejtasque.

²⁵ Hua onöhuat noche puieblo, oquejtojque:

—Inu tlajtlacule por imequeles ma topa betze, hua impa topejpelhua.

²⁶ Yecuöquenu oquencajcöbele yaja Barrabás. Hua oquemandörojque ma tiebitequecö Jesús, hua otieantrecöro para ma tiecoruspelucö.

²⁷ Yecuöquenu soltörojte de cubernadur otiebicaque Jesús ipa pretorio noso palacio. Omosentlölejque ca yejuatzi innochie soltörojte. ²⁸ Hua tiexipetzojque, hua tietlölelejque sente tlaquentle chichiltec, quiename möquea reyes. ²⁹ Quechejchijque sente corona de betztle, oquetlölejque ipa tietzonteco. Sente uhuatl otiemöpiquelejque ipa tiemöyecmö, quiename inu tlacutl tli cusöroa reyes cuöc tlamandöroa. Tieixtla motlancuöquetzaya. Tieca bejbiebetzcaya, quejejtöya:

—¡Xeneme, Rey de joriojte!

³⁰ Hua ochejchaque tiepa, hua ocaseque inu uhuatl, hua ica tiemacaya ipa tietzonteco.

³¹ Hua sötiepa de cuöc ye tieca opajpöjque, tiequextelejque inu tlaquentle. Entunses tietlaquentejque ca tietzotzomajua. Yecuöquenu tiebicaque para tiecoruspelutibe.

Jesús omeoac ipan corujtzi

³² Hua cuöc oquisque, oquenömejque sente tlöcatl de inu nación que itucö Cirene, hua itucöyu de inu tlöcatl oyeya Semu. Yaja inu nieca oquechihualtejque ma quebica tiecorujtzi Jesús. ³³ Hua oaseto ipa sente locör que itucö Gólgota. Quejtusneque Locör de Mejcötzontecomatl. ³⁴ Tiemacaque vino tli quenelulteque ca ichecheca ma conihua. Cache cuöc oquematque, amo oconihuac.

³⁵ Hua sötiepa de cuöc ye tiecoruspelöjque, oquexiexelöjque tietlaquie, hua quer-iförojque. ³⁶ Hua ompa omotlölejque tieixutejtaya. ³⁷ Hua oquetlölejque ipan corujtzi ipa tiecuötecpac ini nönca tlajtule oquejtojtaya tli ipampa tiecoruspelöjque: “YAJA INI NÖNCA JESÚS INU REY DE JORIOJTE”.

³⁸ Hua quencoruspelöjque nuyejque tiehua yejuatzi unte ichtejque, sente ca möyecömpa, hua ocsente ca rabiescopa. ³⁹ Hua tli pajpanutöya, tiechecuaelfiöya. Mocua-jcuayecachoöya. ⁴⁰ Tieyelfiöya:

—¡Taja! Taja tequejto que tecxexetunis teopantle, hua ipa yeye tunale ocsajpa tecajcoques. Abier xomomöquexte sie taja. Tlö tecaca tetieConietzi Deus, xetemo de ipan corujtzi.

⁴¹ Pos ejqueu nuyejque inu jefes de teopexcötzetzi tieca opajpöjque. Molfiöya ca tiehua tlamachtioneme de teotlajtule hua fariseos ca tiehua biebertzetzi, quejejtöya:

⁴² —Ocseque quenmöquexte, pero sie yaja abele momöquextea. Nele yaja icaca Rey de Israel. Pues ma temo öxö de ipan corujtzi, hua toneltocasque ica yaja. ⁴³ Nele moneltoca ca Deus. Deus ma quemöquexticö öxö tlö quetlasojtlalo. Pues yaja oquejto: “Naja necaca netieConie Deus”.

⁴⁴ Nuyejque ejqueu tlimach tieyelfiöya inu ichtejque tli cojcoruspelcataya ca yejuatzi.

⁴⁵ Hua desde ca pan tlajca otlayohuac ipa noche tlöltecpactle hasta senamo quemacac yeye ura. ⁴⁶ Quieme ca pa yeye ura, otzajtzihuac Jesús checöhuac. Oquejtojque:

—Elí, Elí, ¿lama sabactani? —Quejtusneque: NoTeotzi, noTeotzi, ¿tlica tomoxelöjtzino de naja?

⁴⁷ Cuöc oquecajque seque tli ompa ijcataya, quejtoöya:

—Ini nönca tlöcatl quenutza inu tlayulepante Elías.

⁴⁸ Hua sa nima omomerö sente de yejua. Ucö sente sunectle hua oquepaltele ica pinögre. Oquetlöle ipa sente öcatl tiemacac ma conihua. ⁴⁹ Hua inu ocseque quejtoöya:

—Xejcajcöhua, ma tequejtacö abier tlö yebitz Elías quemöquextiqui.

⁵⁰ Pero Jesús ocsajpa tzajtzihuac checöhuac hua omecoac.

⁵¹ Hua necö inu cortina de teopantle otzomu. Opie desde tlapac hasta ca tlölpä. Hua ontlaole, hua teme otlajtlapönque. ⁵² Omotlapojque mejcöcoyocme, hua meyactie mimejque tli yecteque omiejque. ⁵³ Hua sötiepa de cuöc ye oyulebihuac Jesús oquisque de ijtec mejcöcoyocme. Ohuölajque ipa inu ciudad yectec, que yaja Jerusalén. Ompa oquemejtaque meyactie.

⁵⁴ Inu capetö, hua tli oyejyeya ca yaja tieixutejtaya Jesús, cuöc oquejtaque tlaolineles-tle, hua noche söstantle tli omochi, omomajtejque lalebes. Oquejtojque:

—De melöhuac ini nönca tlöcatl iloaya tieConie Deus.

⁵⁵ Hua ompa oyejyeya meyactie sohuame tlajtlachixtaya bejcateca. Ini nöncate otiehualtoaque Jesús desde estado de Galilea, tiehualtequepanojtöya. ⁵⁶ Intzölö oyeya yaja María de puieblo de Magdala, hua María innöntzi de Jacobo hua Josie, ca tiehua innöntzi de ipelhua Zebedeo.

⁵⁷ Hua cuöc ye omochi ca ye yohuac, ohuöla sente tlöcatl rico de puieblo de Arimatea, itucö Josie. Ini nönca nuyejque oyeya de tiemachtejcöhua de Jesús. ⁵⁸ Ocalac itlac Pilöto quetlajtlanito tiecuiervo Jesús. Entunses Pilöto otlamandöro ma quemacacö inu cuiervo. ⁵⁹ Hua Josie ucö inu cuiervo, oquequemelo ica sente tzotzomajtle de lino chepöhuac. ⁶⁰ Hua quepeaya sente mejcöustutl yancuec, tli omotatac itech sente tepetlatl. Ompa oquetlöle tiecuiervo Jesús. Oquememelo sente bieye tietetu hua ica quetlapacho inu ustutl. Entunses yaja uya. ⁶¹ Hua ompa oyeya María de puieblo de Magdala, ca tiehua ocsente María. Ompa oyejyehuataya ixtla mejcöustutl.

⁶² Hua ipa mustlateca iyes tunale sötiepa de cuöc mopreparöroöya para mosiebisque ipan söbro. Omosentlölejque jefes de teopexcötzetzi ca tiehua fariseos ica Pilöto.

⁶³ Oquelfejque Pilöto:

—Señor, otequelnömejque que inu nieca tlacajcayöhuane oquejto, cuöc yaja oc nemeya: “Sötiepa de yeye tunale neyulebes”. ⁶⁴ Xomotlamandörfe, noso, ma mixute inu mejcöustutl hasta ipa yeye tunale, majcamo cana iye que huölösque imachtejcöhua, hua quechtequesque, hua quelfisque puieblo: “Ye oyule de intzölö mimejque”. Pos tlöjcu sötiepa cache amo cuale istlacatlajtule iyes que cuöc ca opie.

⁶⁵ Hua Pilöto oquemelfe:

—Xecpeacö guardias. Xeyöcö hua xequixuticö quiename nemejua nenquemate.

⁶⁶ Pues yejua uyajque ipa inu mejcöustutl, hua quetzajtzajque hua quesyörojque, hua oquencöjtiejque guardias.

28

Cristo oyulebihuac

¹ Hua opanuc inu yohuale de söbro, hua ye miero tlanieseya para inu primero tunale de semöna. Ca ise cualcö ohuöla María de puieblo de Magdala, ca tiehua inu ocsente María, oquejtaco inu mejcöustutl. ² Hua sa trepiente ontlaole lalebes checöhuac. Pues sente öngel de Tlöcatzintle hualtemuc de elfecac hua oquecuc inu tietetu, hua omotlöle ipa. ³ Nieseya ixöyac quiename cuöc tlapetlöne, hua itlaquie oyeya istöc quiename tesebetl. ⁴ Inu tlajpexque lalebes oquemajcöejtaque, hua omocöjque quiename mimejque. ⁵ Hua inu öngel oquemelfe sohuame:

—Amo xomomajticö, pues naja necmajteca que nentietiemoa Jesús, öque tiecorus-peløjque. ⁶ Amo oncö iloac necö; pues ye oyulebihuac, quieme oquejtojque. Xehuölöcö,

xequejtacö necö locör cöne betzihuataya. ⁷ Entunses xeyöcö sa nima, xequemelficö tiemachtejcohua que ye oyulebihuac de intzölö mimejque. Hua yejuatzi biloas cachtö que nemejua pa Galilea. Ompa nentieyejtasque. Xomofijörucö cuale de lo que tli onemiechelfe.

⁸ Hua yejua onyajque de ompa mejcöcoyoctle. Momajtiöya pero nuyejque papjöqueya lalebes. Omomiemeröjque oquenmachestito tiemachtejcohua. ⁹ Hua necö Jesús oquennömequihuato. Oquejtojque:

—Ma cuale xeyecö.

Hua yejua omopachojque hua tienöhuajtejque ipa tieicxehua, hua tietechijque.

¹⁰ Yecuöquenu Jesús oquemelfejque:

—Amo xomomajticö. Xeyöcö, xequenmachesticö nocnihua, para ma yöcö ipan Galilea. Ompa niechejtasque.

¹¹ Hua cuöc uyajque yejua, necö seque de inu tlajpexque tli quexutiöya mejcöustutl ohuölajque ipa ciudad, hua oquenmachestejque jefes de teopexcötzetzi de noche söstantle tli omochi. ¹² Hua yejua omosentlölejque ca tiehua biebertzetzi, hua omotlajtulmacaque. Entunses oquenmacaque meyac tomi inu soltörojte. ¹³ Oquejtojque:

—Xequejtucö nemejua ejqueyi: “Imachtejcohua ohuölajque ca yohuale, hua oquechtejque mientras tejua tecojcochtaya”. ¹⁴ Hua tlö ini quemates cubernadur, tejua teczyulsiebisque, para ejqueu amo nemiechpasörus niontle.

¹⁵ Ca inu, yejua ocönque inu tomi, hua oquechijque san quiene ca oquentlajtulmacaque. Ejqueu ini nönca tlajtule omacheac intzölö joriojte, hua hasta öxö oc turavea quepoa ini cuiento.

¹⁶ Pero inu majtlactle huansie tiemachtejcohua uyajque ca Galilea, ipa inu nieca tepietl cöne Jesús oquennahuatejque. ¹⁷ Hua ompa otiejtaque. Entunses tietechijque. Pero seque amo bel moneltocaya. ¹⁸ Hua onaxihuato Jesús, oquennunutzque. Oquejtojque:

—Noche checöhualestle ye oniechmacaque ompa elfecac hua ipan tlöltecpectle. ¹⁹ Por inu, xeyöcö, hua xequemixtlamacticö giente de noche naciones para ma yecö nomachtejcohua. Xequencuötiequicö tietucöyupa Tajtle, hua de tieConietzi, hua de Espíritu Sönto. ²⁰ Xequenmacticö ma quechihuacö noche söstantle tli ye onetlanahuate. Hua naja necaca ca nemejua nochepan tunalte. Hasta ipan tunale cuöc tlametl tlöltecpectle naja neyes ca nemejua.

Cuale Tlamachestelestle tli oquejcuelo SAN MÖRCOS

Xohuö Bautista tlanunutzaya

¹ Ejqueyi opie cuale tlamachestelestle de Jesucristo, tieConietzi Deus. ² Pos tlajcuelulpanca ipan ömatl tli oquejcuelo inu tlayulepante Isaías:

Xequejta. Naja nectitlanes notlatitlantle
ma cachtö beya que taja para ma quixmana moojfe.

³ Caquestec tlajtule de yeca tli tzajtzec ompa cöne nionöque chönte,
hua quejtoöya: “Xecyejyectlölicö tieojfe Tlöcatzintle.
Xecmelöhuacö tieojfe, pues ye miero axihuaqui”.

⁴ Xohuö tlacuötiequiöya ipa locör cöne nionöque chönteya. Tlanunutzaya nele tlögiente moyulcuepasque para ma Deus ma quentlapojpolfelicö intlajtlacul yaja cuale quencuötiequis. ⁵ Noche tlöca de estado de Judea hua noche de ciudad de Jerusalén quisaya ca itlac yaja. Mocuötiequiöya ca yaja ipan ötlactle itucö Jordán. Moyulcuiüya ca Deus de intlajtlacul. ⁶ Pos Xohuö motlaquentiöya ca tzotzomajtle de itojmeyo camello, hua ca sente cuetlaxpöxajtle ca motlajcoilpiöya. Quecuöya chapolte hua nectle de cormienajte de caltienco. ⁷ Tlanunutzaya hua quejtoöya:

—Biloatz ocsie tlöcatl sötiepa de naja öque cache quepealo meyac checöhualestle que naja. Amo necmeresieroa nion para nopiechus para netiequextelis tiecacua. ⁸ Naja de melöhuac onemiechcuötieque ca ötzintle, pero yejuatzi nemiechcuötiequisque ca Espíritu Sönto.

Xohuö Bautista tiecuötieque Jesús

⁹ Omochi ipa niecate tunalte que Jesús hualiloac de puieblo itucö Nazaret de estado de Galilea, hua Xohuö tiecuötieque ipa ötlactle Jordán. ¹⁰ Cuöc oquixoac de ötzintle, sa nima oquejtaque quiene ca hualmotlapo elfecac, hua quiene ca otemoac Espíritu de Deus quiename palumax tiepa yejuatzi. ¹¹ Pos ohuöla sente tlajtule de elfecac:

—Taja tenotlasojcöConie. Ica taja necpea meyac pöquelestle.

Amo Cuale Tlöcatl tieyulmajmötocac Jesús

¹² Nima Espíritu de Deus tiechihualtiluc ma biloa ipa locör cöne nionöque chönteya. ¹³ Ompa iloaya cuarenta días ipa inu locör, hua tieyulmajmötocaya Satanás. Pos ompa iloaya inca yulcöme tiecuöneme, hua öngeles tietequetanoöya.

Jesús quepiehualtejqe tequetihuaya ipa Galilea

¹⁴ Cuöc ye oquetzajtzajque Xohuö, Jesús hualiloac ipa estado de Galilea. Hualtlanunutzalutöya de cuale tlamachestelestle tli tiechelfea de Deus. ¹⁵ Oquejtojque:

—Ye aseco tunalte para Deus tlamandörurus nemotlac. Xomoyulcuepacö hua xomoneltocacö ica cuale tlamachestelestle.

Jesús quennutzque nöbe pescadurte

¹⁶ Nejnemoöya Jesús itlac ötiescatl de Galilea. Oquejtaque Semu hua icni itucö Andrés quetlajcaleya tarröya ijtec ötzintle, pos yejua oyejyeya pescadurte. ¹⁷ Pos oquemelfejque Jesús:

—Xeniechtocacö hua nemiechchihualtis nenyisque nenpescadurte de tlöca.

¹⁸ Pos sa nima quecöjtiejque intarröya hua tietocaque.

¹⁹ Opanoac tepetzi cache ca niepa. Oquejtaque Jacobo, iconie de Zebedeo, hua Xohuö, icni de Jacobo. Nuyejqe yejua oyejyeya ipa börco queyejyectlöliöya intarröya ye

tlajtlatzcotu. ²⁰ Pos nima quennutzque. Entunses yejua cualcöjtiejque intajtzi Zebedeo ipa börco ca tiehua tequetque hua tietocaque.

Sente tlöcatl quepeaya moxicoöne

²¹ Ocajcalacoac ipa puieblo de Capernaum. Cuöquenu yejuatzi ocalacoac ipa teopanconetzi ipan söbron tunale cuöc mosiebea joriojte. Ompa tlamachtiloöya. ²² Pos giente quetietzöbejtaya quiene ca tlamachtiloöya porque quenmachtiloöya ca checöhuallestle hua amo quiename yejua tlamachtioneme de teotlajtule tlamachtioöya. ²³ Pero oyeya ipa teopanconetzi sente tlöcatl tli ijtecopa quepeaya moxicoöne. Ini nönca otzajtzec. ²⁴ Oquejto:

—¡Ay! ¿Tli tecpea ca tejua, Jesús de puieblo de Nazaret? ¿Ye tehuöla tetiechxexetunico? Necmate öquenu taja; taja tetietlöcayectec de Deus.

²⁵ Pero Jesús cajajuaque. Oquelfejque:

—Xectzacua mocamac hua xequisa de ijtecopa yaja.

²⁶ Pos inu moxicoöne quechihualte tlöcatl ma mimeque. Otzajtzec checöhuac, hua oquis de yaja. ²⁷ Pos innochie quetietzöbejque. Motlajtlaniöya sente ca ocsente. Quejtoöya:

—¿Tlininiji? Pos ica sente yancuec tlamachtelestle tli quepea meyac checöhuallestle. Pos hasta moxicoöneme yaja quennahuatea hua yejua queneltoca.

²⁸ Sa nima ca nobeyo quecajque giente ipa noche estado de Galilea lo que tli oquechijque Jesús.

Jesús quepajtejque imontiesyo de Piero

²⁹ Oquejquixoac de ipan teopanconetzi. Obejbiloac ca inchö Semu hua Andrés. Ajaxihuato ca tiehua Jacobo hua Xohuö. ³⁰ Pos imontiesyo Semu betztotaya. Quepeaya totunealestle. Pos nima yejua tienunutzque de imontiesyo. ³¹ Entunses axihuato yejuatzi. Ocönque ca imö hua cajcojque. Pos ayecmo quepeaya totunealestle, hua tieintlamacaya.

Jesús quenpajtejque meyactie cocoxcötzetzi

³² Ye ixtlayohua oyeya. Hua san tequetl ocalac tunale, quenhualecaque tietlac noche tli mocojcooöya, hua tli quepejpeaya demunios. ³³ Pos noche puieblo mosentlölejque ipan queyöhuatiente. ³⁴ Yejuatzi quenpajtejque meyactie tli mocojcooöya de söstantle cocolestle. Quenquextejque meyactie demunios. Amo quencöjque demunios ma quejtucö canajyetla porque ye tieixomatque.

Jesús tlanunutzalutenemeya ca nobeyo pa estado de Galilea

³⁵ Lalebes cualco ca ise oneyehualuc, oc tlajtlayohua. Oquixoac hua obiloac ipan locör cöne nionöque chönteya. Ompa netlötlajtiluc. ³⁶ Cuöquenu tietiemojtenemeya Semu, ca noche tli oyejyeya ca yaja. ³⁷ Cuöc tieniextejque, otieyelfe:

—Noche giente metzmotiemolejteneme.

³⁸ Pos quemelfejque:

—Cache cuale teyabe ca niecate puieblos para nuyejque ompa netlanunutzas. Ipampaji nehuöla.

³⁹ Entunses hualtlanunutzalutöya ipa teopancucone de noche estado de Galilea, hua cualenquextilutöya demunios.

Jesús quepajtejque sente tlöcatl sa söhuayo

⁴⁰ Sente tlöcatl sa söhuayo ohuöla tietlac Jesús, tietlötlajtico. Motlancuöquetz hua otieyelfe:

—Mach tomonequitis cuale teniechmopajtelis.

⁴¹ Pos tieyulcoco Jesús. Omösohualuc hua quemötocaque. Oquelfejque:

—Necneque. Xepajte.

⁴² Cuöc oquejtojqe inu, pos inu cocolestle de söhuame sa nima oquecö hua yaja opajtec. ⁴³ Yecuöquenu quenahuatejqe ca meyac checöhualestle, hua nima quelfejque ma beya. ⁴⁴ Oquelfejque:

—Xequajta. Amo öque tli xequelfe, tlöcamo xebeya xomotieijtete ica teopexque. Ye techepöhuac. Xejcuetlabilte lo que tli Moisés otlanhuate, para ma quematecö yejua lo que tli omochi ca taja.

⁴⁵ Pero yaja oquis hua opie tlapoa lalebes. Ca nobeyo quepoaya noche tli omochi. Pos yaja ica Jesús abele calacoaya ixmantete ipa puieblo tlöcamo iloaya ipa inu locör cöne nionöque chönteya. Pero giente de ca nobeyo huölöya tieca.

2

Jesús quepajtejqe sente tlöcatl cojcultec

¹ Pa quiejquech tunalte Jesús ocalacoac ocsajpa ipa puieblo de Capernaum. Omacheac nele iloaya ipan chöntle. ² Pos nima mosentlölejque meyactie, hasta ayecmo ajaqueya nimpör ipa queyöhuatiente. Quennunutzaloöya de tietlajtultzi Deus. ³ Yecuöquenu nöbe tlöca ohuölajque tietatzinco. Quehualecaque sente tlöcatl cojcultec. ⁴ Pos como yejua abele aseya tietlac por meyactie tlöca, quecuötlapojque cale cöne yejuatzi iloaya. Cuöc quetlapojque, quetemobejqe cuajtlapechte ca tiehua cojcultzi tli ipa hualbetztöya. ⁵ Jesús nemacuc cuienta quiene moneltocaya inu tlöca. Oquelfejque cojcultzi:

—Xequajta, Ixo, motlajtlaculyo temetzperdonörfea.

⁶ Ompa yejyehuataya seque tlamachtioneme de teotlajtule. Quepensöroöya ipa inyulo: ⁷ “¿Tlica tlajtlajtoa nönca tlöcatl ejqueyi? Checuetlajtojteca encuentra de Deus. Abele öque cuale tieperdonörfis tlajtlacule tlöcamo sa yejuatzi Deus”. ⁸ Pos sa nima oquematque Jesús ipa tieyulo quiene yejua quenenebeliöya ejqueu imijtecopa. Oquenmelfejque:

—¿Tlica nenquepensöroa tlimach ipa nemoyulo? ⁹ ¿Cötlaja cache tequeyo, nequelfis cojcultzi: “Temetzperdonörfea motlajtlaculyo”, noso nequelfis: “Xemiehua. Xecöna mocuajtlapech hua xenejneme”? ¹⁰ Pos öxö nenquematesque que naja que onochi netlöcatl necpea deriecho necö ipan tlöltecpactle para netieperdonörfis tlajtlacule.

Oquelfejque cojcultzi:

¹¹ —Taja temetzelfea, xemiehua. Xecöna mocuajtlapech hua xebeya pa mochö.

¹² Entunses omoquetz. Sa nima ucö icuajtlapech hua oquistie imixtla innochie. Pos ca inu noche giente oquetietzöbejqe hua tiechamöjqe Deus. Quejtojqe:

—Ayec tequejtaque niontle quieme ini.

Jesús quenutzque Leví

¹³ Ocsajpa obiloac ca itlac ötiescatl. Noche tlöca ohuölöya ca tietlac, hua quenmachtiloöya. ¹⁴ Cuöc obiloac de ompau, oquejtaque Leví, öque oyeya iconie de Alfeo. Leví yehuataya cöne yaja caresibirojtaya tomi. Pos yaja tlanecheco oyeya. Jesús quelfejque:

—Xeniechtoca.

Pos moquetztie hua tietocac.

¹⁵ Omochi ini nönca. Cuöc Jesús tlacualutaya ichö Leví, meyactie giente tli tlanechecojqe hua tlajtlaculteque nuyejqe ompa tlacujtaya ca Jesús hua tiemachtejcöhua. Pos meyactie tietocaque. ¹⁶ Ompa oyejyeya seque tlamachtioneme de teotlajtule tli oyeya de inu grupo de joriojte itucö fariseos. Yejua tieijtaque Jesús que tlacualutaya inca giente tli tlanechecojqe hua tlajtlaculteque. Entunses yejua oquemelfejque tiemachtejcöhua:

—¿Tlininiji? Jesús tlacua intzölö nöncate giente tli tlanechecojqe hua tlajtlaculteque.

¹⁷ Cuöc quecajqe Jesús quemelfejque:

Pues oquemelaso hua imö opajtec. ⁶ Cuöquenuju oquisque fariseos hua nima motlaj-tulmacaque inca herodianos cuntra yejuatzi para quiene tiemectisque.

Meyactien tlöca tietocaque Jesús hasta itlac ötiescatl

⁷ Cache Jesús nexeluluc de yejua hua obiloac ca itlac ötiescatl ca tiemachtejcöhua. Tietocaque meyactie de estado de Galilea. Pos de estado de Judea, ⁸ de ciudad de Jerusalén, de estado de Idumea, de ca nepa icuetlapa ötlectle Jordán, hua de itlac puieblos de Tiro hua Sidón, lalebes meyactien tlöca oquecäjque tli bieye tlachihualestle quechihualoöya. Entunses ohuölajque tieca. ⁹ Hua mopachojque meyactie tlöca, hasta que yejuatzi quemelfejque tiemachtejcöhua ma ompaye sente börco para ipa cuale tlejcoas para majcamo tiepötzucö. ¹⁰ Pos quenpajtiloöya meyactie. Yaja ica tiepötzoöya noche tli mocojcooöya porque quenequeya tiemajmötocasque para que ejqueu pajtesque. ¹¹ Cuöc moxicoöneme tieijtaque, mopehtiecaya tieixpa hua tzajtzajtzeya. Quejtoöya:

—Taja teca teiConie Deus.

¹² Pero yejuatzi quemajajualoöya lalebes que majcamo quejtucö öquenu iloac yejuatzi.

Jesús quemixpejpenque majtlactle huan ume tlöca

¹³ Sötiepa otlejcoac ipan tepietl. Quennutzque quiejquech yejuatzi oquenejque. Ohuölajque tietlac. ¹⁴ Entunses quemixpejpenque majtlactle huan ume tlöca para ma yecö tieca hua para quentitlanesque ma tlanunutzacö. Hua quencuitejque llateotitlanme. ¹⁵ Quemixpejpenque para ma quepeacö checöhuallestle para quenquextisque moxicoöneme. ¹⁶ Ejqueu noso quemixpejpenque inu majtlactle huan ume. Hua yaja Semu yejuatzi quecuitejque Piero. ¹⁷ Nuyejque quemixpejpenque Jacobo iconie Zebedeo hua Xohuö icni de Jacobo. Quencuitejque Boanerges, que quejtusneque giente tli tlajtlajtoa checöhuac quiename cuöc llatecuine. ¹⁸ Quemixpejpenque Andrés, Felipe, Bartolomé, Mateo, Tumös, Jacobo iconie de Alfeo, Tadeo, Semu de inu partido de cananistas, ¹⁹ hua Judas Iscariote, öque nuyejque tieantrecöro.

Deus amo queperdonörusque öque tiechecuayelfis Espíritu Sönto

²⁰ Axihuato ipan chöntle. Ocsajpa mosentlölejque meyactie tlöca, hasta nimpör abele tlajtlacualoöya. ²¹ Cuöc oquematque tiefamiliares Jesús que ompa iloaya, onyajque para tieasetibe. Pos quejtoöya:

—Ye lucojtec ícaca.

²² Pero tlamachtioneme de teotlajtule ohuölajque de ciudad de Jerusalén. Quejtoöya nele Jesús quepealoöya inu demunio itucö Beelzebú. Nele quenquextiloöya ocseque demunios ca ichecöhuales inu tlajtoöne de demunios. Yaja ica. ²³ Entunses Jesús quennutzque. Quenmelfiloöya ica cuientos:

—¿Quiene cuale Satanás sa ye yaja motojtocas? ²⁴ Tlö quejtus giente de sente nación seme momejmectisque entre yejua mismo, pos polebesque inu giente de inu nación. ²⁵ Tlö giente de sente chöntle seme momacasque, pos nima pojpolebes inu chöntle. ²⁶ Tlö Satanás moponierojteca cuntra yaja mismo hua mopeleörojteca ca sie yaja, pos abele tli ayes, tlöcamo sie yaja mopoipolus.

²⁷ Nionöque abele calaques ichö sente tlöcatl chejchecactec para quequextelis tli ihuöxca tlö amo cachtö quejilpis inu tlöcatl chejchecactec. Yecuöquenu quetlaquejquextelis ipa ichö.

²⁸ Melöhuac nemiechelfea que Deus quenperdonörfisque tlöca noche tlajtlacule hua noche checuatlajtule tli cusöroa para checuatlajtoa. ²⁹ Pero öque tiechecuayelfis hua tiepöpöcas Espíritu Sönto, inun quiema Deus ayec queperdonörusque, porque quepea tlajtlacule tli mocöhuas nochepa.

³⁰ Ejqueu quemelfejque porque yejua quejtoöya nele quepealo moxicoöne.

Tienönajtzi hua tieicnihua Jesús

³¹ Sötiepa tienönajtzi hua tieicnihua ohuölajque. Cuöc oyejyeya queyöhuac, tlatitlanque ma tienutzacö. ³² Pos giente yejyehuataya tieyehualojtaya yejuatzi. Tiejelfejque:

—Monönajtzi hua mocnijtetzihua metzmotiemolea queyöhuac.

³³ Entunes yejuatzi onöhuatihuac, quemelfejque:

—¿Öquemeju nonöna hua nocnihua?

³⁴ Pos otlachealuc impa yejua tli ompa yejyehuataya tieyehualojtaya. Oquemelfejque: —Xequejtacö. Nemejua nennonöna hua nennocnihua. ³⁵ Porque öque beletes quechihuas tietlanequeles Deus, yaja inu icaca nocni oquechtle, noso nocni sohuatl, noso nonöna.

4

Cuiento de sente tlöcatl tli tlaticato

¹ Ocsajpa opiehualuc quenmachtiloöya itlac ötiescatl. Tieca mosentlölejque lalebes meyac giente. Por inu ocalacoac ijtec sente börco. Onetlöliluc ijtec börco ipa ötiescatl. Entunes noche giente oyejyeya ipan tlöle itienco ötiescatl. ² Meyac söstantle oquenmachtiloöya ca cuientos. Cuöc quenmachtiloöya quemelfiloöya ejqueyi:

³ —Xejaquecö cuale. Sente tlöcatl oquis tlaticato. ⁴ Quecuasema xenöchtle. Hua omochi cuöc tlaticato, seque obetz itienco ojtle. Tutume ohuölajque hua quecuajque. ⁵ Ocseque obetz cöne lalebes tecamac, cöne amo quepeaya meyac tlöle. Nima oquis, pos tlöle amo teröhuac oyeya. ⁶ Pero cuöc oquis tunale, opeli hua uhuöc, pues amo monelhuayute. ⁷ Ocseque obetz ipa betztle. Betztle omobepö hua quepötmecte tlatictle. Por inu amo tlamochihualte. ⁸ Pero ocseque obetz ipa cuale tlöle. Pos tlamochihualte. Mobejcapano hua omobepö. Seque meyöhuatl oquebicac ca treinta, ocseque ca sesenta, ocseque ca sie sientos töntos.

⁹ Entunes quemelfejque:

—Öque quepea itlacaqueles para tlacaques, ma tlacaque.

Tlica Jesús cusörojque cuientos

¹⁰ Sötiepa oijiloaya tieinsiel yejuatzi hua inu majtlactle huan ume ca tiehua quiesquete ocseque. Entunes yejua tietlajtlaniöya tli quejtusneque inu cuientos tli quenpubeliloöya. ¹¹ Yejuatzi quemelfejque:

—Nemejua nemiechtocöroa nencasojcömatesque inu secretos de quiene ca Deus tlamandörurus. Pero ca giente tli amo cate de nemejua, mojtoa noche söstantle ca cuientos. ¹² Ejqueu mös yectlajtlacheasque, pero majcamo yetla quixomatecö. Mös tlayejcaquesque, pero majcamo yetla casojcömatecö. Ejqueu amo moyulcuepasque para ejqueu Deus amo quenperdonörfisque intlajtlacul.

Jesús quesplícörojque inu cuiento de tlöcatl tli tlaticato

¹³ Oquemelfejque:

—¿Amo nenquemate tli quejtusneque ini nönca cuiento? ¿Quiene noso nencasojcömatesque noche cuientos? ¹⁴ Öque tlatuca icaca quieme tlö öque quetuca tlajtule de Deus. ¹⁵ Inu xenöchtle tli obetz itienco ojtle icaca quieme cana giente tli ipa inyulo ye omotucac teotlajtule. Pero cuöc ye quecajque, nima yebitz Satanás. Quejcuenea inu tlajtule tli omotucac ipa inyulo. ¹⁶ Öxö nuyejque inu xenöchtle tli omotucac intzölö teme icaca quieme cana giente tli quecajque teotlajtule hua nima queselejque ca meyac pöquelestle. ¹⁷ Pero mochihua quieme cana inu tlajtule amo monelhuayute de melöhuac ipa inyulo. Pos impa yebitz tiecoco noso cox giente quentepotztoca por ipampa teotlajtule, hua nima modesanimöroa. ¹⁸ Öxö inu xenöchtle tli omotucac intzölö betztle nele icaca quieme cana yejua tli quecajque teotlajtule, ¹⁹ pero quentequepachoa söstantle ipa nönca tlöltecpactle. Mixcajcayöhua ca tomi hua quixeliebea meyac söstantle. Pos tönto hua tönto tlaxeliebea hasta quieme cana ye oquepötmecteque teotlajtule ipa inyulo.

Yaja ica teotlajtule amo quepea resultado inca yejua. ²⁰ Cache inu xenöchtle tli omotucac ipa cuale tlöle icaca quieme cana yejua tli quecajque teotlajtule. Cöna hua quechihua noche tlin cuale tlachihuale, quieme cana tlö sente xenöchtle quetiencasquea treinta, hua ocsente quetiencasquea sesenta, hua ocsente quetiencasquea sie sientos töntos.

Noche tli mojoynteca sötiepa nieses

²¹ Nuyejque quemelfejque:

—Pos lalebes tunto öque quetlölis sente cantil itzintla almu noso itzintla tlapectle. Tejua tectlölea sente cantil ipa canteliero cöne tlöbejtös. ²² Pos noche tli mojoynteca sötiepa nieses, hua noche tli sa ichtacajtzi icaca sötiepa macheas. ²³ Tlö canajyeca quepea itlacaqueles para tlacaques ma tlacaque.

²⁴ Nuyejque quemelfejque:

—Xecpeacö cueröro de lo que tli nenquecaque. Pos san quiene nenquentemachibelea ocseque giente, ejqueu nuyejque nemiechtemachibelisque, hua hasta cache meyac nemiechmacasque. ²⁵ Tiel öque tli quepea, quemacasque cache meyac. Pero öque amo bel quepea, quequextelisque hasta inu tepetzi tli oc quepea.

Cuiento de tlatuctle

²⁶ Nuyejque oquejtuloöya:

—Cuöc Deus tlamandöruro icaca quieme cana sente tlöcatl cuöc quetuca xenöchtle. ²⁷ Inu tlöcatl coche ca yohuale. Miehua ca tunale. Pos tlatuctle quisa hua mobepöhua pero yaja amo quemate quiene. ²⁸ Sie yaja tlöle quetlamochihualtea. Cachtö ixeyjo. Yecuöquenu imeyöhuayo, hua sötiepa itech imeyöhuayo quisa ixenöchyö. ²⁹ Entunes cuöc ye ochecö, sa nima queteque ca yusno, porque ye ura para moteques.

Cuiento de ixenöch mostöza

³⁰ Nuyejque oquejtojque:

—¿Ca tli tejcomparörusque quiename cuöc tlamandöruro Deus? Noso ¿tli cuiento cuale tecönasque para tequejtusque que ejqueu tlamandöruro? ³¹ Cuale tequejtusque que Deus tlamandöruro quiename cuöc mobepöhua ixenöch mostöza. Cuöc inu mostöza motuca, cache tzitzequetzi icaca que noche söstantle xenöchtle tli onca ipa tlöltecpactle. ³² Pero cuöc ye omotucac, mobepöhua hua mochihua cache bieye que noche söstantle queletl. Lalebes momömöyutea hua tutume tli patlöne ipa yejyecatl quetlölea intepasol ipa isumbra.

Quiene Jesús cusörojque cuientos

³³ Pos ca meyac cuientos quieme ini yejuatzí quennunutzaloöya de teotlajtule san quiene ca yejua cuale quecajque. ³⁴ Sin cuientos amo quennunutzaloöya. Cache tiemachtejcohua, cuöc sa insiel oijiloaya, yejuatzí quenpanquexteliloöya noche söstantle.

Jesús cajajuaque öyejyecatl hua omoquetz

³⁵ Inu mismo tunale cuöc ixtlayohua oyeya quemelfejque:

—Ma tepanucö ca niepa.

³⁶ Quencöjtiejque inu giente, pos tiemachtejcohua tiebicaque ipa börco san quiene ca iloaya. Ompa nuyejque oyejyeya ocseque börcos. ³⁷ Pero omochi sente yejyecatl bel checöhuac. Ötzintle majcoteopancueya ipa börco, hasta ye tiemeya börco. ³⁸ Pos yejuatzí iloaya icuetlapa ijtec börco. Cochihuataya ipa sente tlacpale. Entunes tieixetejque hua tieyelfejque:

—Maestro, ¿amo metzmoimportörfea tlö necö temejmequesque?

³⁹ Yecuöquenu neyhualuc, hua cajajuaque öyejyecatl. Quelfejque ötiescatl:

—Sa xeyeta. Xomosiebe.

Cuöquenuju öyejyecatl omoquetz por complieto hua sa tlacacta. ⁴⁰ Entunes quemelfejque yejua:

—¿Tlica tönto lalebes nemomajtejqe? ¿Tlica ayemo nemoneltoca?

⁴¹ Hua yejua majcömejque lalebes. Omolfiöya sie yejua:

—¿Öqueniji noso? Pos hasta yejyecatl hua ötzintle tieneltoca.

5

Sente tlöcatl geraseno quepeaya moxicoöne

¹ Onajaxihuato ca nie löro de ötiescatl intzölö giente de puieblo de Gerasa. ² Cuöc Jesús oquixoac de ijtec börco, nima sente tlöcatl tli quepeaya moxicoöne ohuölie de mejcöustutl tienömequeco. ³ Ini tlöcatl chönteya cöne motuca mimejqe. Pero nionöque abele quelpiöya nion ca cariena. ⁴ Pos meyacpa quejilpiöya ca carienajte pa icxehua hua pa imöhua. Pero yaja quenxexetune inu carienajte pa imöhua hua quencojcotunaya inu carienajte pa icxehua. Pos nionöque abele quequitzquiöya. ⁵ Seme yohualen tunale tzajtzetenemeya ipa tepieme hua tzajtzetenemeya cöne motuca mimejqe. Sie yaja mococojtenemeya ca teme. ⁶ Entunses cuöc tieyejtac Jesús bejcateca, omomerö. Motlancuöquetzato tieixtla. ⁷ Tzajtzec checöhuac hua oquejto:

—¿Tli tomopilea ca naja, Jesús, tieConietzi Deus bieyetzintle? Temetzmotlötlaitelea tieixtlantzinco Deus, amo xeniechmotlajcalele ipa tiecoco tietunie.

⁸ Ejqueu oquejto porque ye quelfejque Jesús:

—Xequisa de ini tlöcatl, taja temoxicoöne.

⁹ Entunses quetlajtlanque:

—¿Quiene tomotucö?

Tienönquele:

—Pos nenotucö Trupa, porque temeyactie tecate.

¹⁰ Yecuöquenu tielötlahtiöya lalebes meyac majcamo quetitlanecö ca queyöhuac de inu nieca locör. ¹¹ Ompa oyejyeya itech nieca tepietl meyactie petzome tlajtlacuajtenemeya.

¹² Entunses inu moxicoöneme tielötlahtejqe:

—Xetiechmotitlane inca petzome ma tecalaquecö inmijtecopa.

¹³ Pos sa nima quencöjqe yejuatzi. Entunses quistiejque moxicoöneme. Calaqueto imijtec petzome. Cuöquenuju momiemeröjtiejque noche petzome quiename ume mil. Motietepexebito hasta ijtec ötiescatl, hua ompa öijyumejqe.

¹⁴ Inu tlöca tli quentlajtlacualtejenemeya petzome ochucholojtiejque. Tlamachestito ipa puieblo hua ca caltienco. Pos quistiejque giente para quejtaque tlininu nieca tli omochi. ¹⁵ Hua ohuölajque tieca Jesús. Quejtaque yehuataya inu tlöcatl tli antes quecocoöya demunios. Pos yaja cachtö quepeaya inu trupa de moxicoöneme, pero öxö ye cuale. Ye möquejtaya itzotzomajua hua ayecmo lucojtaya. Pos yejua giente momajtejqe. ¹⁶ Entunses yejua tli miero quejtaque lo que opasöre quenpubelejque lo que tli ipa omochi inu tlöcatl tli quepeaya demunios hua tli impa omochi petzome. ¹⁷ Yecuöquenu opiejqe tielötlahtejqe Jesús ma biloa de intlac. ¹⁸ Cuöc calacoac yejuatzi ijtec börco, inu tlöcatl tli oquepex demunios tielötlahtiöya ma seme iye tietlac. ¹⁹ Cache Jesús amo quecöjqe, tlöcamo quelfejque:

—Xebeya pa mochö inca motlöcaicnihua, hua xequenpubele tli bieye tlachihualestle oquechijque Tlöcatzintle ca taja, hua quiene ca oquepexque icnuejtelestle ca taja.

²⁰ Melöhuac uya hua tlanunutz ipa inu estado de Decápolis tli bieye tlachihualestle oquechijque Jesús ica yaja. Pos noche giente quietetzöbiöya.

Ichpuch de Jairo hua inu sohuatl tli quemötocac tietlaquie de Jesús

²¹ Cuöc Jesús panoac ocsajpa ca nepa löro omosentlölejque meyactie tieca. Ompa iloaya itienco ötiescatl. ²² Entunses ohuöla sente tlayecönque de teopanconetzi itucö Jairo. Hua cuöc tieyejtac Jesús, mopechtiecac tieicxetla. ²³ Tielötlahtiöya lalebes. Oquejto:

—Nochpuchconie ye mecteca. Xehualmobica hua xomotlölele momötzetzihua ipa yaja para ma pajte, hua ma neme.

²⁴ Pos biloac ca yaja, hua tietocaque meyac giente. Tiepötzoöya. ²⁵ Sente sohuatl ye mococoöya majtlactle huan ume xebetl ica itlapalyeso. ²⁶ Lalebes obejco mococoöya inmöpa miercojte. Quecastöro noche tli quepeaya hua amo opejtec, tlöcamo cache tlanabeya. ²⁷ Cuöc inu sohuatl oquecac lo que tli giente quejtoöya de Jesús, aseto ca tiecuetlapa intzölö giente. Quemötocac tietlaque Jesús. ²⁸ Pos quejtoöya ijtecopa: “Tlö necmötocas mös sa tietlaque, nepajtes”.

²⁹ Hua sa nima itlapalyeso omoquetz hua quemachele ipa icuierpo que ye opajtec de inu nieca tiecoco. ³⁰ Pos nima Jesús quemachejque tieijtecopa que cusörojque checöhualestle. Onecuepaluc intzölö giente hua quemelfejque:

—¿Öquenu conmötocac notlaque?

³¹ Tiejelfejque tiemachtejcohua:

—Pos ¿quie amo tomojtelea meyac giente metzmopötzelfea, hua turavea tomojtalfea: “¿Öquenu niechonmötocac?”

³² Pero yejuatzi tlachealoöya ca nobeyo para quejtasque inu sohuatl tli tiemötocac. ³³ Yecuöquenu inu sohuatl omajcömec hua bebeyocac, porque oquemat ijtecopa tli omochi. Entunes ohuöla hua mopechtiecac tieixpa yejuatzi. Tiemelöjco pubele noche. ³⁴ Yejuatzi oquelfejque:

—Nochpuch, por tomoneltocac ye tepajtec. Xebeya ca pöquelestle, hua xepajte de mococoles.

³⁵ Mientras yejuatzi oc tlajtlajtulutaya, ohuölajque seque giente tli cate pa ichö de tlayecönque de teopanconetzi. Quelfejque tlayecönque:

—Pos moconietzi ye omec. ¿Tli para cache tetiemotequemaquelea nöiloac maestro?

³⁶ Pero cuöc Jesús quecajque lo que oquejtojque, quelfejque tlayecönque de teopanconetzi:

—Amo xomomajte. Sa xomoneltoca.

³⁷ Entunes yejuatzi amo quecöjque yeca ma tietoca tlöcamo sa Piero hua Jacobo hua Xohuö, icni de Jacobo. ³⁸ Obiloac ichö de tlayecönque de teopanconetzi. Quejtaque quiene ca cuejcueyune ya giente, quiene ca chojchucaya hua ara ca chuquestlajtoöya. ³⁹ Yecuöquenu ocalacoac hua oquemelfejque:

—¿Tlica nencuejcueyune hua nenchojchuca? Pos ini sisehantu amo omec tlöcamo coche.

⁴⁰ Cache moburlörojque de yejuatzi. Pero yejuatzi quenquextejque ca queyöhuac innoctie. Ocönque itajtzi de sisehantu hua inöntzi hua tli oyejyeya tiehua hua ocajcalacoac cöne oyeya sisehantu. ⁴¹ Caseque imö sisehantu. Oquelfejque:

—Talita, cumi —quejtusneque: Sisehantu, taja temetzelfea, xemiehua.

⁴² Pos sa nima sisehantu omie, hua nejnemeya. Quepeaya majtlactle huan ume xebetl. Pos nima quetietzöbejque bel lalebes. ⁴³ Pero yejuatzi quennahuatejque checöhuac nele majcamo öque quemate de ini nönca, hua quemelfejque ma quetlamacacö sisehantu.

6

Giente de Nazaret amo omoneltocaque tieca Jesús

¹ Oquixoac Jesús de ompa hua hualiloac ca tiepuieblo. Tiehualtoaque tiemachtejcohua. ² Ipan söbro, opiehualuc quenmachtiloöya ipa teopanconetzi. Meyactie quetietzöbejque cuöc tiecaqueya. Quejtojque:

—¿De cöne quetzeco nönca tlöcatl nocheji söstantle? ¿Hua tlininiji tlamatcöyutl tli yeca oquemacac? ¿Tli quejtusneque nöncate tietzöbeme tli quechihua ca imö? ³ ¿Amo yaja ini

calpintiero, iconie María, hua icni de Jacobo, de Josie, de Judas, hua de Semu? ¿Amo oncöncate ca tejua icnihua sohuame?

Pos por inu amo quecualajtaya giente. ⁴ Pero Jesús quemelfejque:

—Ca nobeyo giente queyequejta sente tlayulepante, cache amo öque pa quejta miero ipa ipuieblo hua intzölö ifamiliars hua tli cate pa ichö.

⁵ Pues yejuatzí abele oquechijque canajyetla tietzöbetl ompa. Sa quentlölejque tiemöhua impa quiesquete cocoxcötzetzi hua quenpajtejque. ⁶ Quetietzöbejtaloöya quiene yejua amo moneltocaya.

Nejnemoatenemeya ipa noche puieblos tli ompa sierca oyejyeya, hua tlamachtiloöya.

Jesús quentitlanque tiemachtejcohua ca ojume

⁷ Sötiepa quennutzque innochie majtactle huan ume tiemachtejcohua. Opiehualuc quentitlanihuaya ca ojume. Quenmacaque checohuallestle para quenquextisque moxi-coöneme. ⁸ Pero quemelfejque majcamo tli quebicacö para pa ojtle, tlöcamo sa cuajfortu. Nimpör ijtaatl, nimpör morröl, nimpör tomi ijtec cinturón, ⁹ tlöcamo ma sa mocacticö, hua majcamo quebicacö unte tlaquieme. ¹⁰ Entunses quemelfiloöya:

—Cöne beletes nencalaquesque ipa sente chöntle, ompa xomocöhuacö hasta senamo nenquisasque de inu locör. ¹¹ Pues tlö giente de sente puieblo amo nemiechselisque nimpör amo nemiechcaquesque, xequisacö de ompa hua xectzetzelucö noche tlöle de nemocxehua. Yaja inu xecchihuacö para quematesque que amo cuale tli quechihua yejua.

¹² Entunses cuöc oquisque, tlanunutzaya que ma moyulcuepacö tlöca.

¹³ Quenquextiöya meyactie demunios. Quemajalöbeliöya asiete impa meyactie cocoxcötzetzi hua quenpajtiöya.

Rey Herodes quequechtejtec Xohuö Bautista

¹⁴ Oquemat rey Herodes de ini söstantle. Pos giente tlapoaya de Jesús ca nobeyo. Pos seque quejtoöya:

—Pos ini tlöcatl icaca Xohuö Bautista que ye oyule de intzölö mimejque. Por inu quechihua bieye tlachihuallestle yaja.

¹⁵ Pero ocseque quejtoöya:

—Elías icaca.

Ocseque quejtoöya:

—Yaja sente tlayulepante, noso icaca quiename sente de inu tlayulepantejque de ca ye niepa.

¹⁶ Cuöc oquecac rey Herodes inu, oquejto:

—Ini nönca yaja Xohuö öque naja nejquechtejtec. Ye oyule de intzölö mimejque.

¹⁷ Pues sie yaja rey Herodes otlatitla para ma casecö Xohuö hua ma quetzajtzacuacö ca cariena ipa cörsel. Pos ejqueu oquechi Herodes porque yaja mismo Herodes oqueso-huacuejcuele icni Felipe. ¹⁸ Hua Xohuö quelfiöya rey Herodes:

—Amo cuale tecpehtas isohua mocni.

¹⁹ Pero inu sohuatl Herodías quetlajyejta Xohuö hua quenequeya quemectis. Cache abele quechihuaya, ²⁰ porque rey Herodes quemabeliöya Xohuö. Quemajtaya que Xohuö oyeya sente tlöcatl yulmelactec hua yectec, hua por inu Herodes oquepex cueröro majcamo yetla pasörebe ca yaja. Hua cuöc quecaqueya tli yaja quejtoöya, amo oquemat tli quechihuas. Pero de todos modos quecaqueya ca meyac gönas. ²¹ Aseco sente cuale tunale. Ca sente yelfetl de icumpleaños, Herodes quentlötlacualtiöya itlötlajtoönejua ca tiehua coronielte hua tli cache bejfeye momajtaya ipa estado de Galilea. ²² Pos ompa pa yelfetl ocalac ichpuch Herodías hua omojtute. Quecualajtac rey Herodes ca tiehua tli tlatlalfilte. Entunses rey oquelfe sisehuantu:

—Xeniechtlajtlanele tli taja tecneques, hua naja temetzmacas.

²³ Pos rey oquejto hua quejuröro lalebes:

—Paltzinco, noche tli taja teniechtajtlanelis, temetzmecas hasta tlajcopa noche tli necpea necö cöne netlamandöroa.

²⁴ Oquistie sisehuanu. Quelfito inöntzi:

—¿Tli netlajtlanes?

Hua yaja oquelfe:

—Itzonteco Xohuö Bautista.

²⁵ Yecuöquenu yaja sa nima ocalac itlac rey hua quetlajtlane. Oquejto:

—Naja necneque teniechmomaquelis ahorita ipa sente plöto itzonteco Xohuö Bautista.

²⁶ Pos rey motequepacho lalebes. Pero por oquejto paltzinco, hua por quecajque yejua tli tlacuöya ca yaja, amo oquenec quejtus que amo. ²⁷ Pos nima oquetitla sente guardia, hua oquenahuate ma quehualeca itzonteco Xohuö. ²⁸ Pos guardia quequechtejtequeto ompa cöne tzactaya Xohuö. Quehualecac itzonteco ipa plöto, hua quemacac sisehuanu, hua sisehuanu quemacac inöntzi. ²⁹ Entunses cuöc quematque imachtejcohua, ohuölajque cajcoqueco icuierpo. Quetlölejque ijtec mejcöustul.

Jesús quentlamacaque möcuile mil tlöca

³⁰ Entunses tietlateotitlanhua de Jesús mosentlölejque tieca. Tiepubelejque noche tli oquechijque, hua tli otlamachtejque. ³¹ Yejuatzi quemelfejque:

—Ma teyöcö nencua ipa locör cöne nionöque chönte, ma xomosiebicö tepetzi.

Pos meyactie giente oyöya hua huölöya, hasta nimpör amo quepejpealoöya locör para tlajtlacualus. ³² Obejbiloac tieinsiel ipa börco. Ajaxihuato hasta ipa locör cöne nionöque chönte. ³³ Pero meyactie tieinmejtaque bejbiloac hua ocajasojcömatque cöne bejbiloasquiöya. Entunses meyactie sa icxepa onyajque de ipa nochemeju puieblos hasta para ca ompa. Aseto cachtö que yejuantzetzti. ³⁴ Oquixoac Jesús de ijtec börco, hua quenmejtaque inu meyac giente. Tiejulcocojque porque oyejyeya quiename calnielöjte cuöc amo quepea calnielöjpexque. Entunses opiehualuc quenmachtiloöya meyac söstantle. ³⁵ Cuöc ye miero tlajtlayohuas, tiemachtejcohua mopachojque tietlac. Oquejtojque:

—Amo öque chönte ca necö, hua ye yohuac tecate. ³⁶ Xequenmotitlane giente ma yöcö ipan caltiencalme hua ca pan puieblos para ma mocojubicö tli quecuösque.

³⁷ Yecuöquenu onöhuatihuac yejuatzi. Oquemelfejque:

—Xequentlamacacö nemejua.

Tiejelfejque:

—¿Teyösque tejcoatibe pöntzi ca ume sientos *denarios tomi, hua sa ca inu tequentlamacasque? Pos abele.

³⁸ Yejuatzi quemelfejque:

—¿Quiejquech pöntzi nenquepea? Xeyöcö xequajtate.

Entunses cuöc quematque quejtojque:

—Möcuile pöntzi hua unte mimechte.

³⁹ Quentitlanque quemelfisque giente ma motlamachtlölicö ca grupos tlölpa ipan sacatl xoxoctec. ⁴⁰ Omotlölejque ca grupos de sese sientos hua de tlötlajco sientos.

⁴¹ Entunses yejuatzi ocönque inu möcuile pöntzi hua inu unte mimechte. Ajcopatlachealuc ca elfecac, queteochijque inu pöntzi, hua quecocototzque. Entunses quentlamacaque tiemachtejcohua para ma quentlamacacö giente. Nuyejque quenxiexelfejque inu unte mimechte. ⁴² Pos otlacuajque innochie hasta cöne ijixbeque. ⁴³ Cajcojque majtlactle huan ume chequejme tietieme de pöntzi cojcoctec hua mimechte. ⁴⁴ Yejua tli quecuajque inu pöntzi oyejyeya quieme möcuile mil tlöca.

* **6:37** Sente tunale de tequetl motlaxtlöhuaya ca sie denario tomi.

Jesús nejnemoaya ipa ötiescatl

⁴⁵ Nima quenchiualtejqque tiemachtejcohua ma tlejucö ipa börco hua ma yöcö cachto que yejuatzi para ca puieblo de Betsaida ca nepa löro, mientras yejuatzi quentitlanque giente ma yöcö. ⁴⁶ Cuöc ye oquendespedirojqque, obiloac ipa tepietl netlötajtiluto. ⁴⁷ Cuöc ye otlayohuac, inu börco ye oyöya inepantla ötiescatl. Yejuatzi necöhualuc tiesiel ipa tlöle. ⁴⁸ Quemejtaque quiene ca tiemachtejcohua moöpröroöya para ma möbelöna börco ijtec ötzintle porque bel yejyecaya cuntra yejua. Ca ise quieme entre yeye hua checuasie ura, hualiloac intlac. Hualnejnemoatöya ipa ötiescatl, hua quenequihuaya quenpanultisque. ⁴⁹ Pero cuöc tiejtaque yejua quiene nejnemoaya icpac ötiescatl, quejtojque que beles yaja sente mejque, hua majcötzejtzeque. ⁵⁰ Pos innochie tiejtaque hua majcömejque. Pero nima quennutzque hua quemelfejque:

—Xomoyulölicö. Naja necaca; amo xomomajticö.

⁵¹ Entunses otlejcoac inca yejua ipa börco. Ye omoquetz yejyecatl. Pos yejua bel lalebes quetietzöbejqque. ⁵² Melöhuac ayemo casojcomataya tli quejtusneque lo que tli Jesús oquechijque ca inu pöntzi, porque oc yultepitzteque oyejyeya.

Jesús quenpajtejqque meyac cocoxcötzetzi ipa locör itucö Genesaret

⁵³ Cuöc ye opanoac ca nepa löro, huajhualiloac ipa locör de Genesaret. Ajaxihuaco itienco ötiescatl itech tlöle. ⁵⁴ Entunses quejquixoac de ijtec börco hua sa nima giente tieixomatque Jesús. ⁵⁵ Momiemeröjqque ca nobeyo pa inu locör. Opiejque quenbecaya de ca nobeyo cocoxcötzetzi ipa incuajtlapech ca cöne quemateya nele ompa iloaya. ⁵⁶ Pos cöne beletes calacoaya Jesús, tlö pan puieblos tzequetzetzi, tlö pan puieblos bejbeye, tlö ca caltienco, giente quentlöliöya cocoxcötzetzi pan cayaju. Tietlötajtiöya nele ma quencöhuacö quemötocasque mös sa itienco tietlaquie. Entunses noche tli quemötocaya opajpajtejqque.

7

Lo que tli quisa de ipa iyulo tlöcatl inu quemajmöhua

¹ Tieca Jesús mosentlölejque fariseos hua seque tlamachtioneme de teotlajtule tli huölajque de ciudad de Jerusalén. ² Pos yejua quejtaque que seque de tiemachtejcohua Jesús tlacuöya sin quechepöhuaya inmöhuö. Es decir, amo momöpajpöcaya. Por inu quentlajtlaculfejque. ³ (Pos inu fariseos hua noche joriojte quechihua ca meyac cueröro inu costumbre de biebertzetzi. Tlö amo momöyecpajpöca lalebes, amo tlajtlacua. ⁴ Cuöc hualmocuepa de plöza, tlö amo majöltea, amo tlajtlacua. Pos meyac ocseque söstantle onca tli ocaseque para quechihuasque. Por ejiemplo, quenpajpöca bölsöjte hua xölojte hua xocme de cobre hua tlapechme.) ⁵ Tietlajtlanejqque noso fariseos hua tlamachtioneme de teotlajtule:

—¿Tlica noso amo quechihua momachtejcohua inu costumbres de biebertzetzi tlöcamo tlacua sin momöpajpöca?

⁶ Onöhuatihuac yejuatzi, quemelfejque:

—Ara ca melöhuac tli oquejto Isaías de nemejua sa ume nemoxöyac. Pos tlajcuelulpanca cöne Deus quejtulo:

Ini nönca giente quejtoa que pa niechejta,

pero ca inyulo amo niechtlasojtla.

⁷ Pos san tlajic yejua niechmabesutea.

Pos quemachteya mandamientos de tlöca quieme tlö oyene tlamachtelestle de naja.

⁸ Pos nemejua ye nenquecöjqque mandamientos de Deus hua nemajase itech costumbres de tlöca.

⁹ Nuyejque Jesús quemelfiloöya:

—Para cuale nenquechihuasque inu costumbres de nemejua, bel melöhuac nenquecaltechojtebitze mandamiento de Deus. ¹⁰ Pos Moisés oquejto: “Pa xequejta motajtzi hua monöntzi”. Nuyejque oquejto: “Öque quechecuayejtus itajtzi noso inöntzi, ma meque sin remedio”. ¹¹ Pero nemejua nenquejtoa: “Sente tlöcatl cuale quelfis itajtzi noso inöntzi: Ayojocuele yetla temetzmotlööcoolelis porque ye Corbán”. (Corbán quejtusneque, ye netietlööcoole Deus.) ¹² Hua ca inu ayecmo nenquecöhua ma öque quepaliebe itajtzi noso inöntzi. ¹³ Pos nenquejtlacoa tietlajtultzi Deus por nenquechihua inu costumbres de nemejua tli nenquetlölejtebitze. Hua meyac ocseque söstantle nenquechihua quiename ini.

¹⁴ Quennutzque noche giente ca tietlac. Quemelfejque:

—Xeniechcaquecö nemonochtie hua xecasojcömatecö. ¹⁵⁻¹⁶ Sente tlöcatl amo momöhuas por lo que tli quecuös noso por lo que tli conis, tlöcamo tli quisa de ijtec tlöcatl, yaja inu quemöhua.

¹⁷ Jesús nexeluluc de niecate giente hua calacoac pan cale. Tiemachtejcohua tietlajt-lanejque tli quejtusneque inu cuiento. ¹⁸ Quemelfejque:

—¿Nuyejque nemejua ejqueu nencate que amo nencasojcömate? ¿Amo nenquemate que noche lo que tli quecuös sente tlöcatl calaques ijtecopa hua abele quemajmöhuas? ¹⁹ Pues amo calaque ipa iyulo tlöcamo ipa ijte, hua quisa ca icuetlapa.

Ca inu Jesús tlamachestejque que noche söstantle tli mocuöne ica chepactec para cuale öque quecuös. ²⁰ Hua oquejtojque:

—Noche tli quisa de ijtec sente tlöcatl yaja inu quemöhua. ²¹ Porque de imijtecopa tlöca, de ipa inyulo, quisa amo cuale pensamientos, öque mopöctea ca ocsente tli amo isohua noso tli amo inömec, öque tlachteque, öque tlamectea, ²² öque mopöctea ca isohua ocsente, öque moricotlölisneque, san petzotec tlachihuale, öque tlacajcayöhua, öque amo pinöjque, öque moxicoöne, öque checuatlajtoa, öque mochajchamöhua, öque amo tlarespetöroa. ²³ Noche ini nönca söstantle tli amo cuale, quisa de ijtec tlöcatl, hua yaja ini quemöhua.

Moneltocac sente sohuatl de sente nación itucö Sirofenicia

²⁴ Ohuöliehualuc de ompa. Obiloac ca itlac puieblo de Tiro. Ocalacoac pa sente cale hua amo oquenejque ma yeca quemate. Pero abele neijyönaluc. ²⁵ Isisehuanconie sente sohuatl quepeaya moxicoöne. Pos inu sohuatl oquecac de yejuatzi hua nima ohuöla tietlac. Mopechtiecaco tieicxetla. ²⁶ Inu sohuatl oyeya griega hua chajchönteya ipa inu nación de Sirofenicia. Tietlötajtiöya ma quequextelicö demunio ichpuch. ²⁷ Pero Jesús quelfiloöya:

—Xequencöhua ma cachtö tlacuöcö pelantzetzzi que yejua joriojte. Porque amo conbenierebe ma tequenquextelicö pöntzi de pelantzetzzi hua ma nemiechtlajcalelicö nemejua tli nencate quiename nenchecheme.

²⁸ Onöhuat sohuatl, tieyelfe:

—Tlöcatzintle, pos nuyejque checheme tli cate itzintla miesa quecua perösojcucone tli pelantzetzzi quemöcöhua.

²⁹ Yecuöquenu yejuatzi quelfejque:

—Ipampa ini nönca lo que tli otequejto, xebeya. Demunio ye oquis de mochpuch.

³⁰ Entunses cuöc aseto ca ichö queniextito que moxicoöne ye oquis, hua iconie betztotaya pa tlapechtle.

Jesús quepajtejque sente tlöcatl tli tzatzatzzi hua niempote

³¹ Ocsajpa Jesús oquixoac de itlac puieblo de Tiro. Opanoac ca puieblo de Sidón. Hualiloac itlac ötiescatl de Galilea, intzölö puieblos de estado de Decápolis.

³² Tiehualequelejque sente tlöcatl tli tzatzatzzi hua niempote. Tietlötajtejque nele ma ipa

quetlolicö tiemö. ³³ Entunes quenencuaxelojque de intzölö giente ca sie löro isiel. Quecalaquejque tiemajpelhua ijtec inacashua de yaja. Cuöc ochejchaluc, quemötoquelejque inenepil. ³⁴ Ajcopatlachealuc ca elfecac, hua yelsesebihuac. Oquelfejque:

—¡Efata!—tli quejtusneque: ¡Ma motlapo!

³⁵ Pos sa nima omotlapo inacas hua inenepil moyectlöle. Ye tlajtlajtoa cuale.

³⁶ Quennahuatejque giente majcama öque tli quelficö. Pero entre mös quennahuatiloöya, cache hua cache tlamachestiöya. ³⁷ Pos ara ca quetietzöbejtaya. Quejtoöya:

—Lalebes cuale noche tli quechihualo. Hasta tzatzatzetzi quenchiuualtilo ma tla-caquecö, hua niempoteme ma tlajtlajtucö.

8

Jesús quentlamacaque nöbe mil tlöca

¹ Ipa inu niecate tunalte mosentlölejque ocsajpa lalebes meyac giente pero amo quepeaya tli quecuösque. Jesús quennutzque tiemachtejcohua hua quemelfejque:

² —Niechtlöocoltea nöncate giente porque ye quepea yeye tunale que notlac cate, hua amo quepea tli quecuösque. ³ Tlö nequentitlanes ma yöcö ca inchö sin tlacuösque, amo cöhuantörusque pa ojtle. Pos seque ohuölajque de bejca.

⁴ Tienönquelejque tiemachtejcohua:

—¿De cöne noso cuale öque quentlacualtis nöncate giente necö ipa ini nöncate locör cöne nionöque chönte?

⁵ Quentlajtlanejque:

—¿Quiejquech pöntzi nenquepea?

Yejua oquejtojque:

—Checume.

⁶ Yecuöquenu quennahuatejque noche giente ma motlolicö tlölpa. Ocönque inu checume pöntzi, hua cuöc tietlasojcömatelejque Deus, quencocototzque. Quenmacaque tiemachtejcohua ma quentlamacacö giente. Pos quentlamacaque innochie. ⁷ Nuyejque quepeaya seque mimechte. Cuöc ye quenteochijque Jesús, quennahuatejque ma quenmacacö inu mimechte nuyejque. ⁸ Pos tlacujque hua ijixfeque. De tli cojcotoctec omocö cajcojque checume pescunchequejme. ⁹ Quiejquech giente tli tlacujque oyejyeya quieme nöbe mil. Entunes Jesús quentitlanque giente ma yöcö. ¹⁰ Nima ocalacoac ijtec börco ca tiehua tiemachtejcohua. Hualbiloac ipa sente locör itucö Dalmanuta.

Giente otlajtlanque sente sieñas de tietzöbetl

¹¹ Entunes ohuölajque fariseos hua opiejque tieixcomaca. Tietlajtlanelejque ma quechihuacö sente tietzöbetlachihuale quiename sieñas de que Deus tiepaliebiloöya. Pos quenejque tieprobörusque. ¹² Yejuatzi yelsesebihuac ipa tieyulo, hua oquejtojque:

—¿Tlica nentlajtlane sieña? Melöhuac nemiechelfea, amo nemiechmacas nion sente sieña.

¹³ Pos ca inu quencöjtiejque, hua ocsajpa ocalacoac ijtec börco. Obiloac ca niepa löro.

Levadura de fariseos

¹⁴ Tiemachtejcohua oquelcöjque cönasque pöntzi. Quepeaya sa sente pöntzi ijtec börco.

¹⁵ Quennahuatejque Jesús. Quemelfejque:

—Xequejtacö, xomotlachilicö de levadura de fariseos hua de levadura de Herodes.

¹⁶ Yejua molfejtaya:

—Yejuatzi quejtulo ejqueu porque amo tecualecaque pöntzi.

¹⁷ Ocasojcömatque Jesús, hua quemelfejque:

—¿Tlica nemolfea de que amo nenquepea pöntzi? ¿Ayemo nenquemate, nimpör amo nencasojcömate? ¿Quie nencate nenyultepitzteque? ¹⁸ Pos nenquepea nemixtelolo, ¿quie amo nentlachea? Nenquepea nemotlacaqueles, ¿quie amo nentlacaque? ¿Nimpör

amo nentlalnömeque? ¹⁹ Cuöc onejcocototz inu möcuile pöntzi para möcuile mil gientes, ¿quiejquech chequejme nencajcojque de pöntzi cojcotoctec?

Tieyelfejque:

—Majtlactle huan ume.

²⁰ —Hua cuöc onejcocototz checume pöntzi para nöbe mil, ¿quiejquech pescunchequejme tietieme nencajcojque de pöntzi cojcotoctec?

Quejtojque:

—Checume.

²¹ Entuneses quemelfejque:

—¿Quiene noso amo nencasojcömate?

Opajtec sente ixcocoxque pa puieblo de Betsaida

²² Nima hualiloac pa puieblo de Betsaida. Tiehualequelejque sente ixcocoxque. Tietlötajtejque ma quemötocacö. ²³ Yecuöquenu ocönque imö ixcocoxque. Quequextejque ca caltienco. Ochejchaluc ijtec ixtelololjua hua oquetlölejque tiemö ipa ixtelololjua ixcocoxque. Entuneses quetlajtlanque:

—¿Ye tetlachea cache tepetzi?

²⁴ Pos yaja tlachixteca. Oquejto:

—Nequemejta tlöca sana cuajme. Pero nequemejta nejneme.

²⁵ Yecuöquenu quetlölejque tiemö ocsajpa ipa ixtelololjua. Quechibelejque ma yectlachea. Yeca. Ye moyectlöle. Pos oquemejtac sösantle ixmantete mös bejca. ²⁶ Entuneses quetitlanque ma beya ca ichö. Oquelfejque:

—Nion amo xecalaque pa puieblo.

Piero oquejto que Jesús iloac Cristo

²⁷ Obiloac Jesús ca tiemachtejcöhua ipa puieblos amo bejca de sente puieblo itucö Cesarea de Filipo. Pa ojtle quentlajtlaniloöya tiemachtejcöhua, quemelfiloöya:

—¿Öquenu quejtoa giente que naja necaca?

²⁸ Hua yejua tienönquelejque, quejtojque:

—Pos seque quejtoa Xohuö Bautista. Ocseque quejtoa que nele Elías, noso yeca ocseite tlayulepante.

²⁹ Entuneses quentlajtlanque:

—Hua nemejua, ¿öquenu nenquejtoa tlö naja necaca?

Onöhuat Piero, tieyelfejque:

—Tejuatzi tomobetzteca teCristo öque Deus metzmixpejpenelejque.

³⁰ Pero yejuatzi quennahuatejque majcamo tli quepubelicö nionöque de yejuatzi.

Jesús otlamachestejque que mecoas

³¹ Opiehualuc quenmachtילוöya que moneque ma yejuatzi öque nechihualuc tlöcatl ma quesufrirucö meyac sösantle, hua ma tietlajyejtcacö biebertzetzi hua jefes de teopexcötzetzi hua tlamachtioneme de teotlajtule, hua ma tiemecticö, hua ma yulebecö ipa yeye tunale. ³² Ixmantete quemelfiloöya noche ini tlajtule. Entuneses Piero tieasec hua tieajajuac. ³³ Cache Jesús necuepaluc, hua quemetzalutaya tiemachtejcöhua. Cajajuaque Piero. Oquejtojque:

—Xebeya de naja, Satanás, porque amo tomofijöroa de sösantle tli de Deus, tlöcamo sa tli de tlöca.

³⁴ Cuöc quennutzque giente ca tiehua tiemachtejcöhua, quemelfejque:

—Tlö canajyeca queneques niechtocas, majcamo quechihua lö que tli sie yaja queneque, tlöcamo ma iye listo para quesufrirus quiename öque quesufriroa ipa sente corujtzi, hua ma niechtoca. ³⁵ Pos öque beletes queneques quemalfis inemeles, quixniempolus. Hua öque beletes quetiencas inemeles nopampa hua ipampa cuale tlamachestelestle, quemalfis. ³⁶ Pos ¿tli proviecho quepeas sente tlöcatl mös quetlönes

noche tlöltecpactle, tlö quixniempolus inemeles? ³⁷ ¿Tli noso quemacas sente tlöcatl para ocsajpa quepeas inemeles? ³⁸ Beles sente tlöcatl pinöhuas ca naja hua ca notlajtul intzölö nöncate giente tli sie tiro amo queneque tietocasque Deus hua lalebes tlajtlaculteque. Pos tlöjcu naja que onochi netlöcatl nepinöhuas nuyejque ca inu tlöcatl cuöc nehuölös ca tlanixtelestle de noTajtzi ca tiehua öngeles tli yecteque.

9

¹ Nuyejque quemelfejque:

—Melöhuac naja nemiechelfea que seque de tli oncö nenijjcatecate amo mejmesqueque hasta senamo quejtasque quiene Deus tlamandörurus ca meyac checöhualestle.

Jesús necuepaluc ocsie

² Sötiepa de checuasien tunale Jesús quemaxihuato Piero ca tiehua Jacobo hua Xohuö. Quenbicaque nencua insiel ipa sente tepietl bejcapa. Ompa necuepaluc ocsie imixtla. ³ Pos tietlaqueie opie tzotzotlaca bel lalebes istöc, quieme nionöque sente tlöcatl pan tlöltecpac abele quepöcas ejqueu bel istöc. ⁴ Entunses inca yejua monixtejtequisque Elías hua Moisés. Tlajtlajtoöya ca Jesús. ⁵ Yecuöquenu Piero tieyelfe Jesús:

—ToTiemachtejcozi, cuale que oncö tecate. Ma tequenchejchihuacö yete cuajtlapame. Sente para tejuatzi, hua sente para Moisés, hua ocsente pare Elías.

⁶ Pos amo quemateya tli quejtus, porque yejua lalebes momajtejtaya. ⁷ Entunses ohuöla sente mextle hua oquentlapachojtequis. Sente tlajtule de ijtec mextle quejtoöya: —Yaja ini nönca notlasojcöConie. Yaja xejcaquecö.

⁸ Sa de repiente cuöc tlajtlachixque, ayecmo öque quejtaque, tlöcamo sa Jesús tiesiel ca yejua.

⁹ Cuöc ye hualtemoaya de ipa tepietl, Jesús quennahuatejque checöhuac que majcamo yeca quelficö de tli oquejtaque tlöcamo hasta senamo yejuatzi que nechihualuc tlöcatl yulebesque de intzölö mimejque. ¹⁰ Entunses yejua quemelfejque ipa inyulo inu nieca tlajtule, pero molfiöya nele tli quejtusneque öque yulebes de intzölö mimejque. ¹¹ Tietlajtlanejque, oquejtojque:

—¿Tlininuju quejtoa tlamachtioneme de teotlajtule, nele moneque ma huöla Elías cachtö?

¹² Yejuatzi quemelfejque:

—Tiel melöhuac, huölös Elías cachtö hua queyectlölis noche söstantle. Öxö tlö ejqueu, ¿quiene tlajcuelulpanca de naja que onochi netlöcatl, que necsufrirus meyac söstantle hua giente amo pa niechejtasque? ¹³ Pero nemiechelfea que Elías ye ohuöla. Pero giente ye quechibelejque noche tli oquenejque san quiene ca tlajcuelulpanca de yaja.

Jesús quepajtejque sente pelalactle tli quepeaya moxicoöne

¹⁴ Onajaxihuato cöne oyejyeya ocseque tiemachtejcohua. Quejejtaloöya que meyac tlöca tlamach cate ca yejua hua que tlamachtioneme de teotlajtule mixcomacataya ca yejua. ¹⁵ Cuöc giente tieijtaque, nima quetietzöbejque. Tienömequeto yejuatzi hua tietlajpalojque. ¹⁶ Quentlajtlanejque:

—¿Tlininu nemixcomacataya entre nemejua?

¹⁷ Yecuöquenu sente de inu giente tienönquele:

—Maestro, temetzhualmiquelule noconie. Quepea sente espíritu de moxicoöne tli quechihualtea ma iye niempote. ¹⁸ Inu moxicoöne cöne beletes case, quetlajcale. Camapuposune hua motlantese. Pos ye cuahuöcte. Nocomenelfe momachtejcoztetzihua ma quequextelicö. Cache abele conchijque.

¹⁹ Yecuöquenu quennönquelejque yejuatzi, oquejtojque:

—¡Ay! ¡Nentlöca que amo nemoneltoca! ¿Hasta quiema neyes ca nemejua? ¿Hasta cöne necpeas necxicojtas ca nemejua? Xeniechhualequelicö.

²⁰ Entunses tiehualaquelejque. San tequetl inu espíritu de moxicoöne otieyejtac Jesús quechihualte pelalactle ma checöhuac mimeque. Motlajcale, momemelo, hua camapoposocac. ²¹ Jesús quetlajtlanejque itajtzi:

—¿Quiejquech xebetl quepea quechihua ejqueyi?

Yaja oquejto:

—Pos desde peltzintle. ²² Quiemaneyo quetlajcale ijtec tletzintle, hua ijtec ötzintle, para quemectis. Pero tlö cuale tetiechmopaliebelis, ma temetzmoyulcocolficö tejua. Xetiechmopaliebele.

²³ Jesús quelfejque:

—Taja tequejtoa que tlö cuale. Pos noche cuale mochihuas para öque moneltoca.

²⁴ Nima itajtzi de pelalactle otzajtzec, oquejto:

—Noneltoca. Xeniechmopaliebele ma noneltoca de melöhuac.

²⁵ Cuöc Jesús oquejtaque quiene giente motlamachtlöliöya, cajajuac moxicoöne. Oquelfejque:

—Taja temoxicoöne tli techihualte ini pelalactle niempote hua tzatzatzi. Öxö naja temetznahuatea: Xequisa de yaja, hua ayecmo quiema xecalaque ijtecopa.

²⁶ Yecuöquenu inu moxicoöne otzajtzec. Quechihualte ma checöhuac mimeque pelalactle, hua oquis. Entunses pelalactle omocö quieme cuöc ye mejque. Hua meyac giente quejtoöya:

—Pos ye omec.

²⁷ Pero Jesús ocönque ca imö hua cajcojque. Yaja entunses omoquetz.

²⁸ Cuöc Jesús ocalacoac ipa cale, tiemachtejcöhua tietlajtlanejque cuöc tiesiel:

—¿Tlica tejua abele toconquextelejque?

²⁹ Quemelfejque:

—Amo onca manera para quisas töl quiename ini tlöcamo sa ca öque motlötlajtis.

Ocsajpa Jesús otlamachestejque que mecoas

³⁰ Hua oquejquixoac de ompa, hua onejnemoatenemeya ipa Galilea. Pero Jesús amo quenequihuaya ma canajyeca quemate. ³¹ Quenmachtילוöya tiemachtejcöhua. Oquemelfiloöya:

—Naja que onochi netlöcatl niechtiemöctisque inmöpa tlöca. Niechmectisque. Pero cuöc ye niechmectejque, neyulebes pa yeye tunale.

³² Pero yejua amo casojcömatque ini nönca tlajtule. Tiemabeliöya hua amo tietlajtlanejque cache.

¿Öquenu cache bieye momajtas?

³³ Onajaxihuato ipa puieblo de Capernaum. Hua cuöc yejuatzi iloaya pan chöntle, quentlajtlanejque:

—¿Tli nencualejtojtöya pa ojtle?

³⁴ Pero yejua tlacactajque porque pa ojtle yejua hualmixcomacatöya nele öquenu de yejua cache bieye momajtas. ³⁵ Entunses netlöliuc. Quennutzque innochie majtlactle huan ume, hua quemelfejque:

—Tlö canajyeca queneque mobieyemajtas, ma iye cache tzitzequetzi de nemonochtie hua ma iye tlatequepano de nemonochtie.

³⁶ Yecuöquenu ocaseque sente peltzintle, hua quetlölejque nepantla de yejua. Entunses quenöpaluc. Quemelfejque:

³⁷ —Öque queselis notucöyupa sente de ini nöncate pelantzetzi quieme ini, nuyejque niechselea naja. Öque niechselea naja, amo sa naja niechselea, tlöcamo nuyejque tieselea yejuatzi öque niechhualtitlanque.

Öque amo icaca cuntra tejua ca tejua icaca

³⁸ Yecuöquenu onöhuat Xohuö. Oquejto:

—Maestro, otequejtaque sente tlöcatl motucöyupantzinco quenquextiöya demunios. Pos tectzacuelejque porque amo tiechtoca.

³⁹ Pero Jesús oquejtoque:

—Amo xectzacuelicö, porque abele öque quechihuas sente tietzöbetlachihuale notucöyupa hua al mismo tiempo quejtus tli amo cuale de naja. ⁴⁰ Pues öque amo icaca cuntra tejava ca tejava icaca. ⁴¹ Öque beletes nemiechmacas sie bölsö ötzintle notucöyupa porque nencate de Cristo, melöhuac nemiechelfea que amo quepolus ipremio tli quetlönes.

Majcamo öque betze ipa tlajtlacule

⁴² 'Tlö canajyeca quechihualtis sente de ini nöncate pelantzetzi tli moneltoca ca naja ma betze ipa tlajtlacule, cache cuale iyesquiöya para yaja tlö quelpelisque sente tietetu de molino ipa icucutla inu tlöcatl hua quetlajcalesque ijtec lamör. ⁴³⁻⁴⁴ Tlö quejtus momö metzchihualtis tebetzes pa tlajtlacule, pos xectejteque. Cache cuale para taja tecpeas nemelestle mös temöcototec hua amo ca noche unte momöhua tecalaques ijtec tlecale cöne ayec siebes tletzintle. ⁴⁵⁻⁴⁶ Tlö mocxe metzchihualtis tebetzes pa tlajtlacule, xectejteque. Cache cuale para taja tecpeas nemelestle mös tecxecototec hua amo ca noche unte mocxehua ma metztlajcalecö Deus ijtec tlecale. ⁴⁷ Tlö mixtelolo metzchihualtis tebetzes pa tlajtlacule, xejcopina. Cache cuale para taja tecalaques ca sa sente mixtelolo cöne Deus tlamandöruro, hua amo ca noche unte mixtelolöjua ma metztlajcalicö Deus ijtec tlecale, ⁴⁸ cöne inocuil amo meque hua tletzintle amo siebe.

⁴⁹ 'Pos noche giente mobielelisque ica tletzintle, quiename tlacuale mobielelea ca istatl. ⁵⁰ Istatl icaca cuale. Pero tlö istatl quepoloa ipöyeyco, ¿tli ica nenquebielelisque? Ma iye nemoyulo cualtec quieme istatl icaca poyec, hua xomoyulsiebejtacö sente ca ocsente.

10

Sente tlöcatl mosietelis ca isohua hua majcamo mocajcöhuacö

¹ Huöliehualutie de ompa. Hualiloac ca itlac estado de Judea hua ca ocsie löro de ötlactle Jordán. Ocsajpa mosentlölejque giente tieca. Ocsajpa quenmachtiloöya quieme seme quechihualoöya.

² Ohuölajque seque fariseos tieca. Tietlajtlanejque tlö quejtus conbenierebe que sente tlöcatl ma quecajcohua isohua. Pos tieproböroöya. ³ Pero yejuatzi onöhuatihuac, quemelfejque:

—¿Tli nemiechnahuate Moisés?

⁴ Yejua quejtoque:

—Moisés tiechcajco ma mojcuelo öcta de divorcio para tocajcohuasque.

⁵ Onöhuatihuac Jesús, quemelfejque:

—Pos lalebes nenyultepitzteque. Yaja ica Moisés nemiechejcuelfe inu mandamiento.

⁶ Pero desde ca opie nönca tlöltecpactle, “Deus quenchejchijque oquechte hua sohuatl.

⁷ Ipampaju tlöcatl quencöjtiehuas itajtzi hua inöntzi, hua mosietelis ca isohua. ⁸ Hua yejua umeme mochihuasque sa sie cuiervo”. Ejqueu noso ayecmo cate ume tlöcamo sa sie cuiervo. ⁹ Por inu, lo que tli Deus quesietelejque, majcamo quenencuajtele tlöcatl.

¹⁰ Ompa calejtec, tiemachtejcohua tietlajtlanejque ocsajpa de inu. ¹¹ Yejuatzi quemelfejque:

—Öque beletes quecajcohua isohua hua mosohuajtea ca ocsente, ye tlaumepea hua tlajtlacoa cuntra isohua. ¹² Tlö sohuatl quecajcohua inömec hua monömettea ca ocsente, nuyejque tlaumepea hua tlajtlacoa.

Jesús quenteochijque pelantzetzi

¹³ Entunses seque giente tiehualequeliöya pelantzetzi para ma quenmötocacö. Pero tiemachtejcohua quemajajuaya. ¹⁴ Cuöc Jesús nemacuc cuienta ocualönoac. Quemelfejque:

—Xequencöhuacö pelantzetzi ma huölöcö notlac, hua amo xequentzacuelicö. Porque Deus tlamandöruro inca giente tli cate quiename nochemeji pelantzetzi. ¹⁵ Melöhuac nemiechelfea, que öque beletes amo tiecöhua Deus ma tlamandörucö ipa iyulo quiename sente peltzintle tiecöhua, inu tlöcatl amo calaques cöne Deus tlamandöruro.

¹⁶ Yecuöquenu quennöpalojque. Quentlölejque tiemöhua impa yejua para quenteochijque.

Sente tlöcatl rico quenequeya quepeas nemelestle nochepa

¹⁷ Cuöc quixoac pa ojtle, hualmomerö sente tlöcatl. Motlancuöquetzaco tieixtla. Tietlajtlane:

—Maestro, lalebes tecuale tetlöcatl. ¿Tli naves para necpeas nemelestle nochepa?

¹⁸ Jesús quelfejque:

—¿Tlica teniechelfea necuale netlöcatl? Amo onca sente cualtec tlöcamo sa sietzi, yejuatzí Deus. ¹⁹ Inu mandamientos taja ye tecmate: “Amo xetlamecte”. “Amo xecalaque ca isohua ocsente”. “Amo xetlachteque”. “Amo tiecamac xetieajaque”. “Amo tli xomotejtechte”. “Pa xequajta motajtzí hua monöntzi”.

²⁰ Entunses inu tlöcatl otieyelfe:

—Maestro, noche inu necchijtebitz desde cuöc netzitzequetzi.

²¹ Jesús quetzatalutaya, hua quetlasojtlaluc. Oquelfejque:

—Sa sente cosa metzpoloa. Xebeya, xecnamaca noche tli tecpea, hua xequenmaca tli porubejte. Ejqueu tecpeas ricojyutl ompa elfecac. Entunses xehuöla xeniechtoca.

²² Cache yaja ocasec tequepachule por lo que tli oquejtojqe hua uya. Motequepa-choöya porque quepeaya meyac tli ihuöxca.

²³ Yecuöquenu Jesús otlachealuc ca nobeyo hua quemelfejque tiemachtejcohua:

—Bel lalebes tequeyo para calaquesque tlin ricojte cöne tlamandöruro Deus.

²⁴ Pos tiemachtejcohua quetietzöbejqe por lo que tli oquejtojqe. Pero Jesús onöhuatihuac, ocsajpa oquemelfejque:

—Xequajtacö, nopelhua. Bel lalebes tequeyo öque calaques cöne tlamandöruro Deus.

²⁵ Cache isejco panus sente camello ijtec ixtelolo de sente öcuxa que sente rico calaques cöne tlamandöruro Deus.

²⁶ Pos yejua quetietzöbejtaque bel lalebes. Molfejque:

—¿Öquenu noso cuale momöquextis tlö ejqueu?

²⁷ Entunses Jesús quemetzatalutaya. Oquejtojqe:

—Para tlöca abele, pero para Deus cuale mochihuas. Pos noche söstantle cuale quechihuasque Deus.

²⁸ Entunses opie Piero tieyelfea:

—Xomojtele. Tejua otejcöjqe noche söstantle hua ye temetzmotoquelejteneme.

²⁹ Onöhuatihuac Jesús, oquejtojqe:

—Melöhuac nemiechelfea: Öque cualcöjtiehuas ichö noso icnihua oquechte noso icnihua sohuame noso inöntzi noso itajtzí noso ipelhua noso itlölhua por nopampa naja hua por ipampa cuale tlamachestelestle, ³⁰ ipa ini nönca tiempo quepeas sie sientos töntos de calte hua de icnihua oquechte, hua de icnihua sohuame hua de nönönte hua de ipejpelhua hua de tlölte, hua nuyejque giente quetepotztocasque. Hua ipa inu tiempo tli huölös quepeas nemelestle nochepa. ³¹ Pero meyactie tli öxö cachtö cate, sölültimo yesque; hua tli sölültimo cate, cachtö yesque.

Ocsajpa Jesús otlamachestejqe que mecoas

³² Bejbiloaya ipa ojtle tli tlejco ca ciudad de Jerusalén, hua Jesús quenyecönalutöya yejua. Quetietzöbejtaya hua quiejquech tietocaya majcömejque. Cuöc quenbicaque innochie majtlactle huan ume nencua, opiehualuc quennunutzaloöya de noche tli tiepa mochihas.

³³ —Xequejtacö —oquemelfejque—. Tetejcotetebe ca Jerusalén. Pos naja que onochi netlöcatl niechtiemöctisque ca jefes de teopexcötzetzi hua inca tlamachtioneme de teotlajtule. Entunes yejua niehcuntenörusque ma nemeque. Niechtiemöctisque inca tli amo de topuieblo. ³⁴ Yecuöquenu moburlörusque de naja hua niechchejchasque. Niechbitequesque hua niechmectisque. Cache sötiepa de yeye tunale ocsajpa neyulebes.

Jacobo hua Xohuö otlajtlanque sie favur

³⁵ Entunes Jacobo ca Xohuö, ipelhua de Zebedeo, mopachojque tietlac. Tiejelfejque: —Maestro, tejua tecneque xetiechmochibelele tli tejua tetlajtlanesque.

³⁶ Yejuatzi quemelfejque:

—¿Tli nenqueneque ma nemiechchibele?

³⁷ Yejua tieyelfejque:

—Pos xetiechmocöbele ma totlölicö ipa motlaniextelestzi, sente ca momöyecömpantzinco hua ocsente ca morabiescopantzinco.

³⁸ Yecuöquenu Jesús quemelfejque:

—Amo nenquemate tli nentlajtlane. ¿Cuale nenconisque de inu bölso de tietunie de tli naja neconis? ¿Noso cuale nemocuötiequisque ca inu tiecoco tli ica naja nocuötiequis?

³⁹ Yejua quejtojque:

—Cuale tecchihuasque.

Pero Jesús quemelfejque:

—Tiel, de inu bölso de tietunie que naja neconis, nuyejque nenconisque nemejua, hua inu tiecoco tli ica nocuötiequis naja, ca inu nemocuötiequisque. ⁴⁰ Pero para nemotlölisque sente ca nomöyecömpa hua ocsente ca norabiescopa, abele nemiechmacas. Cache icaca para yejua tli Deus quemixpejpenque.

⁴¹ Cuöc inu majtlactle oquecajque, opiejque cuajcualönque ca Jacobo hua Xohuö.

⁴² Pero Jesús oquennutzque, hua quemelfejque:

—Ye nenquemate que niecate tli momajtecate tlötlajtoönejme de giente de ocseque naciones ca fuierza quensujetöroa tlöca. Tli motztecate cache bejbeye intzölö, pos ca checöhualestle quenmandöroa giente. ⁴³ Pero amo ejqueu ica nemotzölö nemejua, tlöcamo öque queneques cache bieye momajtas nemotzölö ma mosujetöro para nemiechtequepanus. ⁴⁴ Öque beletes de nemejua queneques iyecache importönte, ma iye quiename tlatequepano de nemonochtie. ⁴⁵ Pos nion naja que onochi netlöcatl amo nehuöla para ma giente ma niechtequepanucö naja, tlöcamo para nequentequapanus giente. Nehuöla para nectiemacas nonemeles para ejqueu nectlaxtlöhwas intlajtlacul de meyactie.

Ixcocoxque Bartimeo tlachea

⁴⁶ Entunes huajhualiloac ca puieblo de Jericó. Hua cuöc oquixoac Jesús de Jericó ca tiehua tiemachtejcöhua hua meyac giente, sente motlajtlane ixcocoxque itucö Bartimeo yehuataya itienco ojtle. Inu Bartimeo oyeya iconie de Timeo. ⁴⁷ Oconcac nele Jesús de puieblo de Nazaret niebiloatz. Bartimeo opie otzajtzec, hua quejtoöya:

—Jesús, iconie David, ma temetzmoyulcocolfe.

⁴⁸ Pos meyactie cajajuaya nele ma quetzacua icamac. Pero yaja cache tzajtzeyalalebes:

—Iconie David, ma temetzmoyulcocolfe.

⁴⁹ Yecuöquenu Jesús onequetzaluc, hua oquejtojque:

—Xecnutzacö ma huöla.

Yecuöquenu giente quenutzato ixcocoxque. Quelfejque:

—Xepajpöque. Xomoquetza porque metznutzalo.

⁵⁰ Yecuöquenu yaja quetlajcaltie ipelesol hua moquetztequis. Ohuöla tieca Jesús.

⁵¹ Jesús onöhuatihuac, oquelfejque:

—¿Pos tli tecneque ma temetzchibele?

Ixcocoxque otieyelfe:

—NoTiemachtejçötzi, ma netlachea.

⁵² Entunses Jesús quelfejque:

—Xebeya. Por tomoneltocac ye tepajtec.

Pos sa nima ye tlacheaya. Entunses yaja tietocaya Jesús ca pa ojtle.

11

Jesús ocalacoac Jerusalén pa purojconetzi

¹ Huajhualiloac ipan puieblos de Betfagé hua Betania, itech tepietl de los Olivos, amo bejca de inu ciudad de Jerusalén. Jesús quentitlanque unte de tiemachtejçöhua,

² oquemelfejque:

—Xeyöcö ipa inu puieblo tli niepaca. San tequetl nencalaquesque, nenqueniextisque sente purojconetzi ilpetas. Ayemo öque ipa tlejco. Xectojtomacö hua xecualecacö. ³ Tlö canajyeca nemiechelfis: “¿Tlica ejqueu nenquechihua?” xequelficö que: “Tlöcatzintle quenesesitöruro hua nima cualtitlanesque ocsajpa”.

⁴ Onyajque hua conniextejque purojconetzi ilpeteca queyöhuatiempa cöne posteque ojtle. Quetojtonque. ⁵ Entunses seque de tli ompa oyejyeya quemelfejque:

—¿Tli nemajaye nemejua nenquetojtontecate purojconetzi?

⁶ Yecuöquenu yejua quemelfejque lo que tli Jesús quennahuatihuac ma quejtucö, hua ca inu concöjque ma quebicacö. ⁷ Yecuöquenu conhualecaque purojconetzi tieca Jesús. Ipa comentlölejque intlaquie hua yejuatzi ipa otlejcoac. ⁸ Nuyejque meyactie quesoaya intlaquie pa ojtle. Ocseque quetejque imömöyö cuajme ca caltienco hua quesoaya pa ojtle. ⁹ Tli oyöya adelönte hua tli hualtlatocatöya tzajtztetöya:

—¡Osana! ¡Ma tetieteochihuacö öque biloatz tietucöyupa Tlöcatzintle! ¹⁰ ¡Ma tetieteochihuacö öque hualtlamandörurus itucöyupa totajtzi David! Mojtoa ompa elfecac: “¡Osana!”

¹¹ Ocalacoac Jesús ipa Jerusalén ipan teopantle. Otlachealuc ca nobeyo ipa noche söstantle, hua obiloac ca Betania ca tiehua inu majtlactle huan ume. Pos lalebes ye yohuac oyeya.

Jesús quetlabejbicaltejque icox cuabetl

¹² Pa mustlateca oquixoac de puieblo de Betania. Teosebihuaya Jesús. ¹³ Oquejtaque bejcateca sente icox cuabetl tli quepeaya ixejyo. Quejtaluto tlö quepeaya icox. Pero cuöc nepachuluc itlac, amo tli oqueniextejque tlöcamo sa ixejyo, porque ayemo tiempo para quepeas icox. ¹⁴ Yecuöquenu Jesús oquelfejque icox cuabetl:

—Majcayec nionöque quecua fruto de taja.

Tiemachtejçöhua oquecajque tli oquejtojque.

Jesús otlaquextejque pa teopantle

¹⁵ Yecuöquenu huajhualiloac ca ciudad de Jerusalén. Yejuatzi ocalacoac ipan teopantle. Opiehualuc quenquextilo ca queyöhuac quiejquech tlajtlanamacaya hua quiejquech motlajtlacubiöya ipa teopantle. Quencuajxelfejque inmiesa de tli quepatlataya tomi ca tiehua sietas de tli quennajnamacataya palumaxte. ¹⁶ Amo quecöhualoöya ma canajyeca quebica xoctle ijtec teupa. ¹⁷ Quenmachtiloöya. Quenmelfiloöya:

—¿Amo melöhuac que tlajcuelulpanca ejqueyi? “Nocal mocuitis cale de netlötlajtelestle cöne motlajtlötlajtisique giente de noche naciones”. Pero nemejua nenconchijque tiecaltzi Deus quieme cana ustutl de ichtejçötzetzi.

¹⁸ Oquecajque noche jefes de teopexcötzetzi ca tlamachtioneme de teotlajtule, hua quetiemoöya manera para tiemectisque. Pos tiemabeliöya porque noche giente queti-etzöbejtaya quiene ca tlamachtiloöya. ¹⁹ Pero cöra tunale cuöc ixtlayohua oyeya, yejuatzi hua tiemachtejcohua oquejquixoac de inu ciudad.

Icox cuabetl tli Jesús quetlabejbicaltejque ye uhuöc

²⁰ Cuöc opanuque ca ise, oquejtaque icox cuabetl ye uhuöc desde itech inelhuayo.

²¹ Yecuöquenu Piero quelnömec hua tieyelfejque Jesús:

—Maestro, xomojtele icox cuabetl tli tomotlabejbicaltele ye uhuöc.

²² Onöhuatihuac Jesús, oquemelfejque:

—Xomoneltocacö ca Deus. ²³ Melöhuac nemiechelfea, que öque beletes quelfis ini nönca tepietl: “Xomojcuene hua xomotlajcale ijtec lamör”, hua amo moyulcuiecueltas tlöcamo moneltocas que mochihuas tli quejtoa, entunses de melöhuac inu mochihuas. ²⁴ Por inu nemiechelfea, cuöc nemotlötajtisque, noche tli nentietlajtlanisque Deus, xomoneltocacö que ye nenqueselejque, hua ejqueu nenquepeasque. ²⁵⁻²⁶ Cuöc nemotlötajtea, xomoperdonörucö tlö canajyetla nenquepea ca canajyeca, para nuyejque nemoTajtzi öque iloac elfecac nemiechperdonörfisique noche tli amo cuale nenquechihua.

Nele ca tli beletelestle quechihualo Jesús söstantle

²⁷ Entunses huajhualiloac ocsajpa ca ciudad de Jerusalén. Cuöc nejnemoatenemeya ijtec teupa, ohuölajque tietlac jefes de teopexcötzetzi ca tiehua tlamachtioneme de teotlajtule hua biebentzetzi. ²⁸ Tieyelfejque:

—¿Ca tli beletelestle tecchihua ini nönca söstantle? ¿Öquenu metzmacac beletelestle para tecchihuas ini nönca söstantle?

²⁹ Jesús oquejtojque:

—Naja nemiechtajtlanis sente pregunta. Xeniechnönquelicö, hua sötiepa nemiechelfis öque oniechmacac ini beletelestle para necchihuas nönca söstantle. ³⁰ Xohuö Bautista tlacuötiequiöya. ¿Beles Deus cualtitlanque ma tlacuötieque, noso tlöca cualtitlanque ma tlacuötieque? Xeniechnönquelicö.

³¹ Yecuöquenu yejua monenebelejque. Molfejque:

—Tlö tequejtusque que Deus, yaja quejtus: “¿Tlica noso amo nemoneltocaque ca yaja?” ³² Pero tlö tequejtusquiöne que tlöca; pero abele tequejtusque.

Pues yejua quenmabeliöya giente, porque giente quepensöroöya que Xohuö de melöhuac oyeya tlayulepante de Deus. ³³ Entunses nöhuatque, tieyelfejque Jesús:

—Amo tecmate.

Yecuöquenu Jesús oquemelfejque:

—Naja nuyejque amo nemiechelfis öque niechmacac beletelestle para ma necchihua ini nönca söstantle.

12

Cuiento de tequetque petzoteque

¹ Entunses opiéhualuc Jesús quennunutzaloöya ca cuientos. Oquejtojque:

—Sente tlöcatl quetucac huierta de uvas temecatl. Quesiercajta ca cuajme. Quechejchi sente tönque cöne quepötzcac uvas. Quechejchi sente cale bejcapa. Quentlaniejte tejtequetque, hua yaja uya ca bejca.

² Pos ca tiempo cualtitla sente itlatequepano inca inu tequetque para ma quemacacö de inu fruto de inu huierta. ³ Pero yejua ocaseque, quebitejque, hua quetitlanque sin niontle. ⁴ Ocsajpa quehualentitlanele ocsente tlatequepano. Pero yaja quecocojque pa itzonteco hua quetratörojque san petzotec. ⁵ Ocsajpa quehualentitlanele ocsente, pero

inu nieca quemecteique. Ocseque meyactie quehualentitlanele. Pero inu tequetque quenbiteique seque hua ocseque quenmeiecteique.

⁶ 'Inu tlöcatl öque ihuöxca tlöle oquepex sa sente itlasojcöconie. Pos ca sölúltimo nuyeique cualtitla iconie ca inu tequetque. Oquejto: "Beles pa quejtasque noconie".

⁷ Pero inu tequetque omolfeique: "Yaja ini öque mohuöxcatis de ini nönca huierta. Xehuölöcö, ma tecmecticö. Entunses tli yaja mohuöxcatisquea tohuöxca iyes". ⁸ Ocaseque hua quemecteique. Quequexteique icuierpo ca queyöhuac de inu huerta.

⁹ '¿Tli noso ayes inu tlöcatl öque ihuöxca inu huierta? Pos huölös quenpojpoluqui niecate tequetque, hua inu huierta quenxiexelfis ocseque.

¹⁰ '¿Quie amo quiema nenquetlajtulteique ini teotlajtule?

Inu tietetu tli calchihuaneme quetlabielcöjque,

¹¹ yaja mismo omochihuaco esquiniero principal.

Yejuatzi Tlöcatzintle oquechijque ini nönca, hua tejua tectietzöbea.

¹² Entunses inu joriojte quietiemoöya manera para tieasesque Jesús, porque yejua casojcömateya que ca nieca cuento tlajtultuloöya de yejua. Pero yejua quenmabeliöya giente. Yaja ica tiecöjtieique hua onyajque.

¿Motlaxtlöhuas contribuseyu noso amo?

¹³ Yejua quentitlanque tietlac seque fariseos ca tiehua herodianos tli quietocaya rey Herodes, para abier tlö quejtusque canajyetla tli itech cuale tieteyelfisque.

¹⁴ Ohuölajque hua tieyelfeique:

—Maestro, tejua tecmate que tejuatzi tomobetzteca temelactec, hua lalebes tomocualejtelea tlin melöhuac, hua amo tomtlachilejtzinoa de nionöque. Porque tlöca amo metzmoimportörfeä tlö rico tlö porube tlö quiene, tlöcamo de melöhuac tequenmojtetelea ojtle de Deus. ¿Beles conbenierebe tecmacasque inu emperador César tocontribuseyo noso amo? ¿Tecmacasque noso amo tecmacasque?

¹⁵ Pos yejuatzi casojcömatihuataya quiene yejua quepeaya ume inxöyac. Quemelfeique:

—¿Tlica nenniechproböroa naja? Xeniechhualequelicö denario tomi ma nequejta.

¹⁶ Yejua tiehualequeleique. Yejuatzi quemelfeique:

—¿Öqueniji ixöyac, hua öquenu ihuöxca tlajcuelule?

Yejua tieyelfeique:

—De César.

¹⁷ Onöhuatihuac Jesús, quemelfeique:

—Xecmacacö César tli quietocöroa César, hua xetiemacacö Deus tli tietocöroa Deus.

Pos quietietzöbeique quiene onöhuatihuac.

Saduceos tlajtlanque tlö mimeique yulebesque

¹⁸ Entunses ohuölajque tietlac seque saduceos, öque yejua quejetoa nele mimeique amo yulebesque. Yejua tietlajtlaneique, tieyelfeique:

¹⁹ —Maestro, Moisés otiechejcuelfe nele tlö icni de sente tlöcatl omec quecöjtie isohua pero amo quencöjtie ipelhua, nele icni ma case isohua para quentlöcatelelis ipelhua de icni. ²⁰ Bieno. Oyejyeya checume icnijte. Inu cachtöjyebé oquepex isohua. Pero cuöc omec amo quencöjtie pelantzetzti. ²¹ Ocsente icni oquepex isohua. Nuyeique omec. Nimpör nieca amo quencöjtie pelantzetzti. Entunses inu tercero icni nuyeique ejqueu ipa omochi. ²² Pos noche checumeme amo quencöjtieique pelantzetzti. Hua sötiepa de que innochtie omeiecteique, inu sohuatl nuyeique omequeco. ²³ Cuöc mochihuas yulebelestle hua yulebesque mimeique, ¿cötlaya de yejua iyes isohua ini nönca sohuatl? Pos innochtie checumeme quepexque inu sohuatl.

²⁴ Entunses Jesús quemelfeique:

—Sa por ini nönca nemixcajcayöhua, por que amo nenquemate tli tlajcuelulpanca hua tli tiehecöhuales Deus. ²⁵ Pos cuöc yulebesque de intzölö mimejque nimpör amo mososohuajtisque nimpör amo monömetisque, tlöcamo yesque quieme inu öngeles tli cate elfecac. ²⁶ Pero mimejque quiema yulebesque. ¿Amo nenquetlajtultea lo que tli oquejcuelo Moisés cöne tlajtoa de inu tebetztle? Quejtoa quiene Deus quenunutzque yaja, hua oquelfejque: “Naja necaca neDeus de Abraham, hua neDeus de Isaac, hua neDeus de Jacob”. ²⁷ Yejuatzi amo iloac Deus de mimejque tlöcamo iloac Deus de tli yulejtecate. Nemejua lalebes nemixcajcayöhua.

¿Cötlaja mandamiento cache bieye?

²⁸ Entunes omopacho sente de inu tlamachtioneme de teotlajtule. Yaja oquecac quiene mixcomacataya ca Jesús. Oquemat que yejuatzi quennönquelejque cuale. Entunes tietlajtlane:

—¿Cötlaja mandamiento cache bieye icaca de noche?

²⁹ Jesús quenönquelejque:

—Mandamiento tli cache bieye yaja ini: “Xejaque, Israel. Yejuatzi Tlöcatzintle toDeus sa sietzi iloac. ³⁰ Tetietlasojtlas Tlöcatzintle moDeus ca noche sentetl moyulo, ca noche sentetl moölma, ca noche mopensamientos, hua ca noche mochecöhuales”. Cache bieye ini nönca mandamiento que noche ocseque. ³¹ Hua inu segundo yaja ini nönca: “Tectlasojtlas motlöcaicni quiename taja tomotlasojtla”. Amo onca ocsente mandamiento ma cache bieye iye.

³² Entunes inu tlamachtione de teotlajtule tieyelfe:

—Lalebes cuale, Maestro. Tehualmojtalfe tlin melöhuac, nele sa sietzi toDeus, hua amo onca ocsente cache de yejuatzi. ³³ Nele tetietlasojtlasque ca noche sentetl toyulo, ca noche topensamientos, hua ca noche tochecöhuales, hua tectlasojtlasque totlöcaicni quiename tejua mismo totlasojtla. Cache cuale öque quechihuas ini que tlö quejtus quetlölis bentle tli xutla ca tiehua cuetlabilestle.

³⁴ Jesús quecajque quiene ca tienönquele lalebes cuale. Quelfejque:

—Amo bejca tecaca de tecalaques cöne Deus tlamandöruro.

Yecuöquenu nionöque ayecmo matrebieroöya para tietlajtlanes cache.

¿Cristo iloac iconie de öquenu?

³⁵ Jesús tlamachtiloöya teupa. Quejtuloöya:

—¿Quiene quejtoa tlamachtioneme de teotlajtule nele Cristo, öque Deus quixpejquenque, icaca iconie David? ³⁶ Pos David otlajtlajto por Espiritu Sönto, hua oquejto:

Tlöcatzintle tiemolfeliluc noTlöcatzintle:

“Xomotlöle ca nomöyecömpa

hasta senamo ma nequemumiyöro moenemigos hasta itzintla mocxehua”.

³⁷ Tlö quejtus mismo David quecuitea Cristo Tlöcatzintle, ¿quiene noso iyes iconie?

Hua inu giente tiecaqueya ca meyac gönas.

Jesús tlamachtiloöya ma quepeacö giente cueröro de tlamachtioneme de teotlajtule

³⁸ Quemelfiloöya cuöc tlamachtiloöya:

—Xecpeacö cueröro de tlamachtioneme de teotlajtule, porque yejua mochajchamöhua yajtenemesque ca bejfeye intlaquie. Quepea gusto ma giente ma quenyectlajpalucö ipa plösa. ³⁹ Seme quetiemoa tlaixpa yesque ipa teopancucone, hua cöne tlajtlacua quetiemoa tli cache cuajcuale locör. ⁴⁰ Motejtechtea inchajchö de icnusohuame. Hua para nieses que lalebes cualteque cate, motlötlajtea lalebes meyac tiempo. Pero impa ini nöncate huölös cache bieye incastigo.

Sente icnusohuatl mös porube contlöle cache meyac que ricojte

⁴¹ Yehualutaya Jesús itlac caxu cöne quetiemya tomi para bentle. Quejtaloöya quiene noche tlöca quetlöliöya tomi ijtec caxu. Meyactie tli rcojte quetiemya meyac. ⁴² Ohuöla sente icnusohuatl porube. Contlöle ume tomi tzequetzetzi, tli sa balierebeya sie quinto.

⁴³ Yecuöquenu Jesús quennutzque tiemachtejcohua. Quemelfejque:

—Melöhuac nemiechelfea, que ini nönca icnusohuatl tli porube oquetlöle cache meyac que noche ocseque tli oquetienque ijtec caxu. ⁴⁴ Pos noche yejua quetlölejque sa tli subra, pero ini icnusohuatl mös lalebes porube oquetlöle noche tli quepeaya, hua yaja amo tli mocöbe tli quecuös.

13

Jesús otlamachestejque que teopantle xexetunes

¹ Cuöc oquixoac Jesús de teupa, tieyelfe sente de tiemachtejcohua:

—Maestro, xomojtele cualtzetzi teme, hua cualtzetzi calme.

² Jesús onöhuatihuac, oquelfejque:

—¿Tequemejta nöncate calme ca bejbeye? Amo mocöhuas necö tietetu ipa tietetu, tlöcamo noche yexexetunes.

Sieñas tli mochihuatibe antes que tlames tlöltecpactle

³ Netlöliiluc ipa tepietl de los Olivos ixtla teupa. Cuöc tieinsiel tietlajtlanejque Piero hua Jacobo ca Xohuö hua Andrés:

⁴ —Xetiechmolfele, ¿quiema mochihuas ini nönca söstantle? ¿Tli sieña oyes cuöc noche ini söstantle miero mochihuati?

⁵ Jesús opiehualuc quemelfiloöya:

—Xomotlachilicö majcamo yeca nemiechcaycayöhua. ⁶ Huölösque meyactie notucöyupa. Quejtusque: “Naja neCristo”. Pos quencajcayöhuasque meyactie.

⁷ ‘Pero cuöc nenquecaquesque de guerras noso cuöc tlapubelea que oyes guerra, majcamo xomotequepachucö, porque ejqueu quepea que mochihuas. Pero ayemo tlames tlöltecpactle. ⁸ Pos majcoques nación cuntra nación, hua igiente de sente rey cuntra igiente de ocsente rey. Tlaolines ca nobeyo hua giente öpesmequesque. Ca nönca söstantle piehuas tiecoco tietunie.

⁹ ‘Pero xomotlachilicö sie nemejua, porque nemiechtiemöctisque inca tlötlajtoönejme. Pa teopancucone nemiechbitequesque. Hasta imixtla cubernadurte hua imixtla reyes nemiechbicasque nopampa. Hua ejqueu nentlatesteficörusque inca yejua. ¹⁰ Pero antes de inu moneque que inu cuale tlamachestelestle ma monnutza ca giente de noche naciones. ¹¹ Pero cuöc nemiechbicasque para nemiechtiemacacque, amo xomotequepachucö por tli nenquejtusque nimpör tli nenquepensörusque. Pos sa lo que tli Deus nemiechmacacque ipa inu nieca ura, inu xequejtucö. Porque amo nemejua nentlajtlajtusque, tlöcamo yejuatzi Espíritu Sönto. ¹² Pa inu niecate tunalte, icni quetiemoctis icni ma meque. Tajtle quetiemoctis iconie. Inpejpelhua quencuajnömequesque intötajua hua quenmejmectisque. ¹³ Nemiechtlajyejtasque noche giente por nopampa. Pero öque quexicus hasta cöne tlames, yaja inu momöquextis.

¹⁴ ‘Pos nenquejtusque inu tli san petzotec tlaxexetotzas, hua moquetzas ipa locör cöne amo conbenierebe ma iye. —Öque quetlajtultea ömatl, ma casojcömate—. Cuöquenuju quiejquech yesque ipa Judea ma cholucö hasta ipa tepieme. ¹⁵ Öque iyes icpac cale majcamo temo nimpör majcamo calaque icalejte para quequextiti canajyetla. ¹⁶ Öque iyes ca caltienco majcamo mocuepa ca ichö para cönati ipelesol. ¹⁷ ¡Ay, porubejte quiejquech tli uutzte hua tli tlajtlabepöjtecate ipa inu niecate tunalte! ¹⁸ Xomotlajtlötlajticö noso para amo nenchölusque ipa mietztle cuöc cache siehua. ¹⁹ Porque ipa inu niecate tunalte iyes tietunie tli ayec omochi desde opie noche söstantle tli Deus oquechejchijque hasta öxö. Nimpör ayecmo mochihuas. ²⁰ Tlö quejtus Tlöcatzintle amo quechihualoöne

inu tiempo ma iye tzitzequetzi, nion sente tlöcatl amo momöquextisquiöne. Pero por impampa yejua tlaixpejpeme, öquemeju Deus quemixpejpenque, yejuatzi oquechijque ma iye tzitzequetzi inu tiempo.

²¹ Yecuöquenu, tlö quejtus canajyeca nemiechelfis: “Xequetacö, nöiloac Cristo”, noso “Xequetacö, ca niepa iloac”, amo xomoneltocacö. ²² Pos majcoquesque Cristos hua tlayulepantejque tli amo de melöhuac. Quechihuasque meyac sieñas hua tietzöbeme para hasta quencajcayöhuasque giente tli Deus quemixpejpenque, tlö cuale quencajcayöhuasquiöne. ²³ Pero nemejua xomotlachilicö. Ye nemiechelfea noche antes de que mochihuas.

Jesús öque nechihualuc tlöcatl hualiloas ocsajpa

²⁴ Pero ipa niecate tunalte sötiepa de inu tiempo de tiecoco tietunie, tunale tlajtlayohuas hua mietztle ayecmo mietztunas. ²⁵ Sitlalte betzesque de elfecac, hua inu söstantle checöjque tli oncate ipa elfecac moulinisque. ²⁶ Yecuöquenu giente quejtasque cuöc naja que onochi netlöcatl nehuölös ipa mextle ca meyac checöhualestle hua tlanixtelestle. ²⁷ Yecuöquenu necualentitlanes noöngeles, hua quiejquech tlöca nequemixpejpe nequensentlölis de ca nobeyo desde cöne tlame tlöltecpactle hasta cöne tlame elfecac.

Ejiemplo de icox cuabetl

²⁸ Itech icox cuabetl xetzecucö sente ejiemplo. Cuöc ye selea imömöyo hua ye quisa ixeyjo, nenquemate que ye asequi xupantla. ²⁹ Ejqueu nuyejque nemejua, cuöc nenquejtasque que ye mochijteca ini nönca söstantle, xecmatecö que ye aseco tiempo hua que ye nemotlanca. ³⁰ Melöhuac nemiechelfea, amo mequesque innoctie giente *tli öxö nentecate hasta senamo mochihuas ini nönca söstantle. ³¹ Elfecac hua tlöltecpactle tlamesque, cache notlajtul amo tlames.

³² Pero de inu nieca tunale hua de inu nieca ura nionöque amo quemate, nimpör öngeles tli cate elfecac nimpör tieConietzi, tlöcamo sa Tajtle.

³³ Xomotlachilicö noso, hua xetlachixtöcö, porque amo nenquemate quiema asequi inu tunale. ³⁴ Pos inu tunale icaca quieme cana sente tlöcatl tli uya bejca. Quecöjtie ichö. Quenmacatie tli ayesque itlatequepanojua. Pos quenmacatie cöra sesen tlöcatl iteque, hua queyöhuatientlajpexque quenahuatejtie nele ma tlachixta. ³⁵ Xetlachixtacö noso, porque amo nenquemate quiema huölös chöne de inu cale, tlö quejtus cuöc ixtlayohua cox ca tlajco yohuac cox cuöc tzajtzes canteliex noso cox ca ise. ³⁶ Xetlachixtacö para majcamo nemiechase nencojcohtecate cuöc sa de repiente huölös. ³⁷ Pos lo que tli nemiechelfea nemejua, nequemelfea innoctie giente: Xetlachixtacö.

14

Quetiemoöya manera quiene tiemectisque Jesús

¹ Sötiepa de ume tunale omochi pöscua hua yelfetl de pöntzi tli amo quebica levadura. Jefes de teopexcötzetzi ca tiehua tlamachtioneme de teotlajtule quetiemoöya quiene cuale tieasesque ca möñas hua tiemectisque. ² Quejtoöya:

—Amo tecasesque ipa yelfetl, para majcamo cana cuejcueyunecö giente.

Sente sohuatl quemejmelo pajtle ajfeyoc de nardo ipa tietzonteco Jesús

³ Hua iloaya yejuatzi ipa puieblo de Betania ipa ichö Semu öque sa söhuayo. Ompa tlacualutaya cuöc ohuöla sente sohuatl. Quehualecaya sente potixajconetzi de alabastro tli quepeaya pajtle ajfeyoc de nochaja nardo, pateyo lalebes. Quetlajtlapö inu potixajconetzi de alabastro hua noche oquemejmelo ipa tietzonteco. ⁴ Hua seque cuajcualönque. Quejtojque entre yejua:

* **13:30** Cuale nuyejque motradusirus: “tli entunses nentasque”.

—¿Tli para oniempole ini nönca pajtle de nardo? ⁵ Ini nönca cuale monamacane ca más de yeye sientos denarios tomi hua cuale moxiexeloöne ca tli porubejte.

Opiejque cajajuaya inu sohuatl. ⁶ Pero Jesús oquejtojqe:

—Xejcajcohuacö. ¿Tlica nenquepasoloa? Ara ca cuale tli niechhualchibele. ⁷ Nochepa nenquenpea porubejte nemotzölö. Cuöc nenquenequesque, cuale nenquechihuasque tlin cuale inca yejua. Cache naja amo nochepa nenniechpeasque. ⁸ Nönca sohuatl oquechi tli yaja opodiene. Yaja ye quetlölele nocuierpo inu pajtle ajfeyoc de nardo para cuöc notlölpachus. ⁹ Melöhuac nemiechelfea, que cöne beletes tlanunutzasque de ini nönca cuale tlamachestelestle ipa noche tlöltecpectle, nuyejqe ini nönca lo que tli oquechi ini sohuatl mojtus para quelnömequesque giente de yaja.

Judas carreglōro para tietiemacas Jesús

¹⁰ Entunses Judas Iscariote, sente de inu majtlactle huan ume tiemachtejcohua, uya intlac jefes de teopexcötzetzi, porque oquenec tietiemacas Jesús inca yejua. ¹¹ Cuöc yejua oquecajqe, oquepexque pöquelestle. Queprometierojque quemacasque mieleyo. Pos Judas quetiemoöya quiene cuale tietiemacati.

Jesús ocualuc sölültimo cena

¹² Ipa primero tunale de yelfetl de pöntzi sin levadura, cuöc quenmejmectiöya calnielocucone para bentle de pöscua, tiemachtejcohua tieyelfejque:

—¿Cöne tomonequitea ma tetlapreparörucö para ma xomotlacualte inu tlacuale de pöscua yelfetl?

¹³ Yejuatzi quantitlanque unte de tiemachtejcohua. Quemelfejque:

—Xeyöcö ipa puieblo hua nemiechnömeques sente tlöcatl tli quebica sente öcumetl ca ötzintle. Xectocacö. ¹⁴ Hua cöne calagues, xequelficö inu chöne: “Maestro quejtulo: ¿Cönenca cale cöne nejcuös inu tlacuale de pöscua yelfetl ca nomachtejcohua?” ¹⁵ Pos yaja mismo nemiechejtetis sente bieye cuörto icpac cale que oyes listo hua tli quepeas noche tli tecnesesitörusque. Ompa xetlamömanacö para tejua.

¹⁶ Entunses uyajque tiemachtejcohua hua ocajcalajque ipa puieblo. Oqueniextejque san quiene ca quemelfejque. Hua ompa otlamömanque para pöscua.

¹⁷ Cuöc ye yohuac oyeya, hualiloac ca inu majtlactle huan ume tiemachtejcohua. ¹⁸ Yehualutaya itlac miesa hua mientras tlajtlacualutaya, oquejtojqe Jesús:

—Melöhuac nemiechelfea, que sente de nemejua öque tlacua ca naja niechantrecöruti.

¹⁹ Yecuöquenu yejua ocaseque tequepachule hua tieyelfiöya cara sesen tlöcatl:

—¿Beles naja?

²⁰ Hua yejuatzi quemelfejque:

—Icaca sente de nemejua nenmajtlactle huan ume. Icaca yaja öque noca tlapaloa ijtec nocasfiela. ²¹ Pues naja que onochi netlöcatl nemeques san quiene ca tlajcuelulpanca de naja. Pero ¡porube de inu tlöcatl tli niechantrecörus naja que onochi netlöcatl! Cache cuale uyesquea para yaja ma ayec tlöcatene.

²² Mientras tlajtlacualutaya, Jesús ocönque pöntzi, hua queteochijque. Quecojco-tunque hua quenmacaque. Oquejtojqe:

—Xecönacö. Nönca pöntzi *ica nocuierpo.

²³ Yecuöquenu ocönque sente bölsö hua tietlasojcömacheliluc. Oquenmacaque. Entunses oconique innochie de inu bölsö. ²⁴ Oquemelfejque:

—Yaja ini *ica noyeso. Necmaca para ma mochihua sente acuerdo entre Deus hua tlöca. Nocuierpo yesquisas por impampa meyactie giente. ²⁵ Melöhuac nemiechelfea que ayecmo quiema neconis iöyo de uvas hasta ipa inu nieca tunale cuöc neconis inu vino yancuec tli onca cöne tlamandöruruteca Deus.

* **14:22** Cuale nuyejqe motradusirus: “querepresentöroa”.

²⁶ Hua ocuejcuicoac sente cuicatelestle, hua oquejquixoatie, bejbiloac ipa tepietl de los Olivos.

Jesús quelfejque Piero que yaja quejtus yexpa que amo tieixomate

²⁷ Hua quemelfejque Jesús:

—Noche nemejua nenbetzesque ipa tlajtlacule nopampa. Pos tlajcuelulpanca: Nejcocus calnielompexque hua calnielojte mocuasemasque.

²⁸ Cache sötiepa cuöc neyulebes, neyös delante de nemejua hasta pa estado de Galilea.

²⁹ Yecuöquenu Piero tieyelfe:

—Mös noche ocseque betzesque, cache naja amo.

³⁰ Hua quelfejque Jesús:

—Melöhuac temetzelfea, que öxö mismo ipa ini nönca yohuale, antes tzajtzes canteliex ujpa, taja tequejtus yexpa que amo teniechixomate.

³¹ Cache yaja oquesequiro lalebes tlajtlajtoöya:

—Mös cana nemeques ca tejuatzí, pero amo temetzmonegörfis.

Innochtie ejqueu nuyejque quejtoöya.

Jesús netlötajtiluc pa Getsemaní

³² Pos ohuajhualbiloac ipa locör itucö Getsemaní. Quemelfejque tiemachtejcöhua:

—Xomotlöllicö necö, mientras naja notlötajtiti.

³³ Hua quenbicaque Piero, Jacobo, hua Xohuö. Opiehualuc netequepachuloöya lalebes, hua lalebes quiene oquechi tieyulo. ³⁴ Quemelfejque:

—Lalebes meyac tequepachule quepea noölma, hasta sana nemequesneque. Xomocheacö necö hua xetlachixtacö.

³⁵ Entunses obiloac cache adelönthe. Netlancuöquetzaluc ipan tlöle, hua netlötajtiluc mach tlö cuale, majcama tiepa mochihua pa nieca ura lo que tli mochihuati.

³⁶ Quejtuloöya:

—*Abba, noTajtzí, para tejuatzí noche sösantle cuale mochihuas. Xomojcuenele nönca bölso de tietunie majcama niechtocöro. Pero majcama mochihua tli naja necneque tlöcamo tli tejuatzí tomonequitea.

³⁷ Hua hualiloac hua quenniextiluco cojcochtecate. Quelfejque Piero:

—Semu, ¿tecochteca? ¿Abele tetlachixtas nion sie ura? ³⁸ Xetlachixtacö hua xomotlötajticö, para majcama nemiechylmajmötoca Amo Cuale Tlöcatl. Melöhuac toyulo cuejcuesebe, cache tonacayo débil icaca.

³⁹ Hua obiloac ocsajpa. Netlötajtiluc, hua ocsajpa oquejtojque mismo tlajtule. ⁴⁰ Cuöc ocsajpa hualiloac, quenniextiluco cojcochtecate porque lalebes cojcochesnequeya. Pos amo quemateya quiene tienönquelisque. ⁴¹ Hualiloac ca yexpa. Quemelfejque:

—Bieno. Xecojcohecö hua xomosiebicö. Basta ca inu. Ye aseco ura. Xequetacö. Pos naja que onochi netlöcatl öxö niechtiemöctisque inmöpa tlajtlaculteque tlöca.

⁴² Xemiehuacö. Teyabe. Öque niechtiemöctis ye ompabitz.

Enemigos de Jesús tieaseque

⁴³ Cuöc yejuatzí oc tlajtlajtulutaya, nima ohuöla Judas, sente de inu majtlactle huan ume tiemachtejcöhua de Jesús. Ca Judas ohuölajque meyac giente ca espödas hua cuabetl. Huölajque porque jefes de teopexcötzetzi hua tlamachtioneme de teotlajtule hua biebertzetzi cualentitlanque. ⁴⁴ Antes que Judas tietiemöcte Jesús, quemelfe inu tlöca de sente sieñas. Oquejto:

—Öque necpetzus, yaja inu icaca. Xecasecö hua xebicacö sin fölta.

⁴⁵ Pos yaja ohuöla, nima omopacho tietlac. Tieyelfejque:

* **14:36** “Abba” icaca sente tlajtule aramaico que quejtusneque “Tata”, noso “noTöta”. Xomojtelicö Ro. 8.15, Gá. 4.6.

—NoTiemachtejçötzi.

Hua tiepetzo. ⁴⁶ Yecuöquenu yejua tieaseque hua tiebicaque. ⁴⁷ Pero sente de tli ompa ijcataya quequexte iespöda. Conmacac itlatequepano de tlajtojcöteopexque. Pos quetejtequele inacas. ⁴⁸ Onöhuatihuac Jesús, quemelfejque:

—¿Nenhualiejque ca espödas hua ca cuabetl quieme cana cuntra sente ichtejque para nenniechasesque? ⁴⁹ Cöra tunale neyeya nemotlac netlamachtiöya ipan teopantle. Pos amo nenniechaseque. Pero ejqueyi moneque para ma mochihua tli tlajcuelulpanca ipa teotlajtule.

⁵⁰ Entunses tiecöjtiejque noche tiemachtejçöhua. Chucholojque.

Sente peltuntle ocholojtie xipetztec

⁵¹ Pero sente peltuntle tietocaya. Motlaquentejtöya sa ca sente bieye tatapajtle. Pos yejua caseque. ⁵² Pero yaja quencöbelejtie tatapajtle. Cholojtie xipetztec.

Tiebicaque Jesús ipa junta

⁵³ Entunses tiebicaque Jesús itlac tlajtojcöteopexque. Mosentlölejque ca yaja noche jefes de teopexcötzetzi ca tiehua biebzetzeti hua tlamachtiöneme de teotlajtule. ⁵⁴ Pos Piero tietocaya bejcateca hasta ocalac ipa pötio de ichö de tlajtojcöteopexque. Ompa Piero yehuataya ca yejua de guardia. Mototunejtaya itlac tletzintle.

⁵⁵ Hua inu jefes de teopexcötzetzi ca tiehua noche inu junta quetiemoöya arasu cuntra Jesús para tiemectisque. Pero amo yetla queniextiöya. ⁵⁶ Porque meyactie quejtoöya istlacatlajtule cuntra yejuatzi pero imistlacatlajtul amo oyeya de acuerdo. ⁵⁷ Entunses majcojque seque. Yejua istlacatque cuntra yejuatzi. Quejtojque:

⁵⁸ —Tejua otejcajque cuöc oquejto: “Pos naja necxexetunes ini nönca teopantle tli tlöca conchejhijque, hua ipa yeye tunale necajcoques ocsente tli amo yeca tlöcatl oquechejchi”.

⁵⁹ Pero nimpör ejqueu amo oyeya de acuerdo tli quejtojque. ⁶⁰ Yecuöquenu tlajtojcöteopexque omoquetz nepantla. Tietlajtlane Jesús, otieyelfe:

—Pos ¿amo yetla tenöhuates? ¿Tlininu noso quemelöjçöpujtecate de taja?

⁶¹ Pero yejuatzi quetzacualoöya tiecamac, hua amo tli quejtuloöya. Tlajtojcöteopexque ocsajpa tietlajtlane, otieyelfe:

—¿Taja tecaca teCristo, tetieConietzi Deus Bendito?

⁶² Jesús quelfejque:

—Naja necaca. Nenquejtasque que naja tli onochi netlöcatl neyehuatas ca tiemöyecmö de Deus öque quepealo checöhuallestle. Naja que onochi netlöcatl nehuölös de elfecac ica mextle.

⁶³ Entunses tlajtojcöteopexque quetzotzomoz itlaquie. Oquejto:

—¿Tli para cache tecneque öque tiechmelöjçöpobelis? ⁶⁴ Ye nenquecajque quiene checuatlajtoa cuntra Deus. ¿Tli nenquejtoa?

Pos innochie quenejque ma mecoa. Quejtojque que quemeresieruroöya mecoas. ⁶⁵ Yecuöquenu seque opiejque chejchejcha tiepa. Tieixtlapachojque hua tiemacaque checöhuac. Tieyelfiöya:

—¡Xetlayulepante!

Hua tietiemacaque ca inu guardia, hua yejua tiecamatlatzcuepuniöya.

Piero oquejto que amo tieixomate Jesús

⁶⁶ Cuöc Piero oyeya tlölpa pa pötio, ohuöla sente sohuatl itlatequepano de tlajtojcöteopexque. ⁶⁷ Cuöc oquejtac Piero mototunejtaya, quetzotzotz hua oquejto:

—Taja nuyejque oteyeya ca inu Jesús de puieblo de Nazaret.

⁶⁸ Pero yaja oquenegöro, oquejto:

—Amo nequixomate nimpör amo necmate tli tequejtoa.

Oquis ca queyöhuac cöne queyöhuatiente. Yecuöquenu otzajtzec canteliex. ⁶⁹ Inu sohualt tli tlátequepanoöya oquejtac Piero ocsajpa. Opie quemelfiöya tli ompa oyejyeya:
—Ini nönca de yejua icaca.

⁷⁰ Pero yaja ocsajpa oquejto que amo tieixomatiöya. Tepetzi bejcöjpa, quiejquech ompa oyejyeya quelfejque Piero:

—Melöhuac taja tecaca de yejua porque taja tecaca tegalileo.

⁷¹ Entuneses yaja opie motlabejbicaltiöya sie yaja. Oquejtoöya:

—¡Paltzinco! Amo nequixomate ini nönca tlöcatl de öque nemejua nentlajtoa.

⁷² Hua sa nima otzajtzec canteliex ca ujpa. Entuneses Piero omolnömec de inu tlajtule, quiene quelfejque Jesús: “Antes tzajtzes canteliex ujpa, tequejtus yexpa que amo teniechixomate”. Oquelnömec, hua opie ochucaya.

15

Tietiemacato Jesús ca Pilöto

¹ Cualco ca ise, inu jefes de teopexcötzetzi ca biebertzetzi hua tlamachtioneme de teotlajtule hua noche inu junta quetzontejque tli quechihuasque. Tielpejque Jesús hua tiebicaque tietiemacato ica Pilöto. ² Pilöto tietlajtlane:

—¿Taja terey de joriojte?

Onöhuatihuac yejuatzi, quelfejque:

—Ica melöhuac tli tequejtojteca.

³ Pos jefes de teopexcötzetzi tietieyelfiöya de tlimach. ⁴ Ocsajpa tietlajtlane Pilöto. Otieyelfe:

—¿Amo tli tenöhuates? Xequajta de meyac söstantle metztieyelfejtecate.

⁵ Pero Jesús ayecmo nöhuatihuac. Así es que Pilöto quetietzöbejtaya.

Pilöto tietiemacac Jesús ma tiecoruspelucö

⁶ Öxö, miero pan yelfetl, seme quecajcohuaya sente prieso tli quetlajtlaneyaya yejua. ⁷ Oyeya sente itucö Barrabás, tzactaya ca noche ocseque tli tlamejmectejque cuöc omajcojque contra cubierno. ⁸ Huölajque meyactie tlöca. Opiejque quelfea Pilöto nele ma quenchebele inu favur tli quepeaya costumbre quenchebelejtebitz. ⁹ Pilöto onöhuat, quemelfe:

—¿Nenqueneque ma nejcajcohua ca nemejua ini Rey de joriojte?

¹⁰ Porque yaja quemateya que por envidia tietiemacaque jefes de teopexcötzetzi. ¹¹ Pero jefes de teopexcötzetzi quemelfejque noche giente nele cache cuale ma quecajcohuacö yaja Barrabás. ¹² Entuneses onöhuat Pilöto ocsajpa. Quemelfe:

—¿Tli noso nenqueneque necchibelis nönca tlöcatl tli nenquecuitea Rey de joriojte?

¹³ Pos yejua ocsajpa tzajtzejteque:

—¡Xomocoruspelfe!

¹⁴ Pilöto quemelfiöya:

—¿Tlica? ¿Tli mal oquechi?

Pero yejua cache tzajtzejteyaya lalebes:

—¡Xomocoruspelfe!

¹⁵ Yecuöquenu Pilöto, para quencontentörus giente, quencajcobele Barrabás. Cuöc ye quemandörojque ma tiebitequecö Jesús, tietiemacac para ma tiecoruspelucö.

¹⁶ Entuneses soltörojte tiebicaque ca tlajtec pa pötio itucö pretorio. Mosentlölejque noche inu grupo de soltörojte. ¹⁷ Tietlaquentejque Jesús ca sente tzotzomajtle morörojtec quiename möquea reyes. Quechijque sente corona de betztle, hua tietlölelejque.

¹⁸ Nima opiejque tietlajpaloöya:

—¡Xeneme, Rey de joriojte!

¹⁹ Tiemacaque ipa tietzonteco ca sente uhuatl. Chejchaya tiepa. Motlancuöquetzque para tiemabesutiöya. ²⁰ Cuöc ye tieca opajpöjque, tiequextelejque tzotzomajtle morörojtec. Entunses tietlaquentejque ca tietzotzomajua. Yecuöquenu tiequextejque para tiecoruspelutibe.

Jesús omecoac pa corujtzi

²¹ Ompa panuya sente tlöcatl itucö Semu, tli oyeya de sente nación itucö Cirene. Pos yaja Semu, itajtzi de Alejandro hua Rufo, huölöya de caltienco. Pos quechihualtejque ma quebica tiecorujtzi Jesús.

²² Tiebicaque pa locör itucö Gólgota. Quejtusneque Locör de Mejcötzontecomatl.

²³ Tiemacasquiöya vino tli quenelulteque ica mirra ajfeyoc. Pero yejuatzi amo conihuac. ²⁴ Hua tiecoruspelojque, hua quexiexelojque tietlaquie. Queriförojque, abier tli quebica cara sente.

²⁵ Oyeya quieme pa checnöbe ura cuöc tiecoruspelojque. ²⁶ Hua quejcuelojque tli ipampa tiecoruspelojque. Quejcuelojque ejqueyi: “REY DE JORIOJTE”. ²⁷⁻²⁸ Quencoruspelojque nuyeque tiehua unte ichteque, sente ca tiemöyecmö, hua ocsente ca rabiescopa.

²⁹ Hua tli pajpanutöya tiechecuayelfiöya. Mocujcuöyecachoöya. Tieyelfiöya:

—¡Ja! ¡Taja! Taja otequejto que tecxexetunis teopantle hua pa yeye tunale tecajcoques.

³⁰ Abier xomomöquexste sie taja, hua xetemo de ipan corujtzi.

³¹ Pos ejqueu nuyeque jefes de teopexcötzetzi tieca opajpöjque. Molfiöya sie yejua ca tiehua tlamachtioneme de teotlajtule:

—Ocseque quenmöquexste, pero sie yaja abele momöquexstea. ³² Inu Cristo, Rey de Israel, ma temo öxö de ipan corujtzi para tequejtasque. Entunses toneltocasque.

Nuyeque inu unte tli coruspelcataya ca yejuatzi tlimach tieyelfiöya.

³³ Miero pan tlajca otlayohuac ipa noche tlöltecpactle hasta senamo quemacac yeye ura. ³⁴ Pa yeye ura, tzajtzihuac Jesús checöhuac:

—Eloi, Eloi, ¿lama sabactani? —Quejtusneque: NoTeotzi, noTeotzi, ¿tlica tomoxelotzino de naja?

³⁵ Cuöc quecajque seque tli ompa oyejyeya, quejtoöya:

—Xejcaquecö. Quetzajtzelea inu tlayulepante Elías.

³⁶ Omomerö sente. Quetlöle sente estropöjo ipa sente öcatl hua quepaltele ca pinögre. Tiemacac ma conihua. Oquejto:

—Xomocöbelicö. Tequejtasque abier tlö yebitz Elías para quetemubiqui.

³⁷ Pero Jesús tzajtzihuac checöhuac hua omecoac.

³⁸ Yecuöquenu inu cortina de teopantle otzomu. Opie de tlacpac para ca tlölpä. ³⁹ Inu capetö tli oyeya tieixpa yejuatzi, cuöc oquejtac quiene omecoac, oquejto:

—Melöhuac ini nönca tlöcatl oyeya tieConietzi Deus.

⁴⁰ Nuyeque ompa oyejyeya sohuame tlajtlachixtaya bejcateca. Intzölö oyeya Salomé hua María de puieblo de Magdala ca tiehua María inöntzi de Jacobo tzitzequetzi hua de Josie. ⁴¹ Ini nöncate tietocatenemeya cuöc Jesús iloaya ipa estado de Galilea. Tietequapanöya. Nuyeque ompa oyejyeya ocseque meyactie tli tietlamachtocaya cuöc otlejcoac ca Jerusalén.

Tietlöltucaque Jesús ijtec sente mejcöustutl

⁴² Ye ixtlayohua oyeya. Mopreparöroöya joriojte para mustlateca mosiebisque. ⁴³ Ohuöla sente tlöcatl itucö Josie tli oyeya de puieblo de Arimatea. Yaja oyeya cualtien tlöcatl, hua miembro de inu grupo de tlötlajtoönejme de joriojte itucö Sinedrio. Josie nuyeque quemöchixtaya ma hualtlamandörucö Deus. Sin pinöhualastle ocalac itlac Pilöto. Quetlajtlaneto tiecuierpo Jesús. ⁴⁴ Pos Pilöto quetietzöbejtac cuöc oquemat que ye omecoac Jesús. Entunses Pilöto oquenutz capetö de soltörojte. Quetlajtlane tlö

melöhuac ye yecsa omecoac. ⁴⁵ Cuöc quemacheste capetö nele ye omecoac, quetiencac tiecuiervo ica Josie. ⁴⁶ Pos Josie ye oquecu sente tzotzomajtle de lino yancuec. Quetembe tiecuiervo Jesús. Quequemelo ca inu tzotzomajtle. Quetlöle ijtec sente mejcöustutl tli ye omotatac itech tepetlatl. Quememelo sente tietetu hua ica quetlapacho inu ustutl. ⁴⁷ María de puieblo de Magdala hua María inöntzi de Josie oquejtaque cöne tielöllejque Jesús.

16

Jesús oyulebihuac

¹ Opanuc tunale que mosiebejqe joriojte. Salomé hua María de puieblo de Magdala hua María inöntzi Jacobo oquecujque pajtsetzi tli ajfeyoc para tielölleitibe. ² Cuöc ye oquis tunale ca ise cualco pa primero tunale de semöna, onyajque cöne mejcöustutl. ³ Pero entre yejua molfejque:

—¿Öquenu tiehcuepelis tietetu de ipan coyocle de mejcöustutl?

⁴ Pero cuöc otlachixque, quejtaque tietetu ye mocuctaya. Pos lalebes bieye oyeya.

⁵ Cuöc ocalajque yejua ijtec mejcöustutl, quejtaque sente peltuntle yehuataya ca möyecöntle. Motlaquentejtaya ca sente tzotzomajtle istöc. Pos yejua momajtejqe.

⁶ Pero yaja quemelfe:

—Amo xomomajticö. Nentietiemoa Jesús de puieblo de Nazaret, öque tiecoruspelojqe. Ye oyulebihuac. Amo oncö iloac necö. Xequetacö necö locör cöne tietiecaque.

⁷ Xeyöcö xequemelficö tiemachtejcohua ca tiehua Piero que biloas cacho de nemejua pa Galilea. Ompa nentieyetasque quieme nemiechelfejqe.

⁸ Yejua chucholotiejque de ipa mejcöustutl porque bebeyocaya hua majcömequeya. Nionöque amo tli quepoaya porque momajtiöya.

**[Jesús neniexsiluc cacho ca María de puieblo de Magdala]*

⁹ Jesús ye oyulebihuac ca ise cualco pa primero tunale de semöna. Neniexsiluc cacho ca María de puieblo de Magdala. Jesús antes quequextejque checume demunios de María. ¹⁰ Yaja uya quenmachestito noche tli oyejyeya tieca. Pos yejua quepeaya meyac tequepachule, hua chojchucataya. ¹¹ Cuöc quecajqe yejua nele nemoöya hua nele yaja tieyeytac, amo moneltocaque.

[Jesús neniexsiluc ca unte de tiemachtejcohua]

[¹² Pero sötiepa de ini nönca, Jesús neniexsiluc de ocsie forma ca oc unte de yejua. Onyöya pa ojtle. Nejnentöya ca caltienco. ¹³ Entunses yejua ohualiejque quenmachestejque inu ocseque. Pero nimpoc ca yejua amo moneltocaque.

[Jesús quentitlanque tiemachtejcohua ma tlanunutzacö pa noche tlöltecpactle]

[¹⁴ Ca sölültimo neniexsiluc ca noche majtlactle huansie cuöc yejua tlacuajtaya. Quemajajuaque porque amo moneltocaque hua porque yultepitzteque. Pos amo moneltocaque cuöc yejua tli tieijtaque quejtojque que yulebihuateca. ¹⁵ Quemelfejqe:

—Xeyöcö ipa noche tlöltecpactle hua xequennunutzacö noche giente de quale tlamachestelestle. ¹⁶ Öque moneltocas hua mocuötiequis, momöquextis, pero öque amo moneltocas Deus quecuntenörusque. ¹⁷ Ini nönca sieñas quechihuasque yejua tli moneltocasque: Notucöyupa quenquextisque demunios. Tlajtlajtusque ca ocsejen tlajtule. ¹⁸ Casesque cuhuöme. Tlö conisque canajyetla tiemecte, amo tli quenhibelis. Impa cocoxcötzetzi quentlölisque inmöhua hua pajpajtesque.

[Otlejcoac Jesús elfecac]

* **16:8** Ini nöncate tlajtulme (vv. 9-20) de mölas amo oyejyaye ipa ömatl de San Mörcos cuöc primero omojcuelo.

[¹⁹ Cuöc Tlöcatzintle Jesús ye quennunutzaluc, otlejcoac elfecac. Netlöлилuc ca tiemöyecmö de Deus. ²⁰ Tiemachtejcohua oquisque. Tlanunutztenemeya ca nobeyo, hua Tlöcatzintle tequetihuaya ca yejua. Cafirmöruroöya inu tlajtule tli quenunutzaya por medio de sieñas de tietzöbetl.]

Cuale Tlamachestelestle tli oquejcuero SAN LUCAS

Tlica omojcuero nönca ömatl

¹ Meyactie tlöca ye oquenejqque quejcuerosque sente tlapubelestle de noche inu sösantle que entre totzölö omochi. ² Inu tlateotitlanme oquejtaque inu sösantle ca imixtelolójua desde ca opie. Omochijque tlatequepanojque de Deus para tlanunutzasque inu nieca tlajtule, hua otiechpubelejque tejua. ³ Hua naja onectiemo hua onecmat exactamente quiene omochi noche inu sösantle desde cuöc opie. Por inu onejcualejtac temetzmojcuelfelis ini nönca ömatl para tejuatzi, Teófilo, öque innoctie metzmoyectieniebelea. ⁴ Ejqueu cuale tomojtelis tlin melöhuac de noche inu sösantle de tli ye ometzmomachtelejque.

Sente öngel oquejto que tlöcates Xohuö Bautista

⁵ Cuöc Herodes oyeya rey de tlöle de joriojte, oyeya sente teopexque itucö Zacarías. Yaja oyeya de inu grupo de teopexcötzetzi de Abías. Isohua de Zacarías itucö Elisabet. Yaja nuyejque oyeya de ixenöchpelhua de inu primero teopexque Aarón. ⁶ Hua innehua oyejyeya yecteque para ca Deus, hua quechihuaya noche tli quemarcöroa inu mandamientos de Tlöcatzintle sin que quefaltörojque niontle. ⁷ Amo quenpeaya inpelhua, ipampa Elizabet oyeya machura, hua innehua ye oyejyeya biebertzetzi.

⁸⁻⁹ Hua omochi que quetocöro inu grupo de Abías tequepanusque tieixpa Deus. Hua quiene quepeaya costumbre, queriförojque abier öque quetocörus quechihuas tli tequetl de teopexque. Hua Zacarías quetocöro calagues para quexutlaltiti cupale ipa tieteupa Tlöcatzintle. ¹⁰ Hua meyac giente de puieblo oyejyeya queyöhuac omotlajtlötlajtejtaya ipa inu ura cuöc quexutlaltea cupale. ¹¹ Hua omoniexte sente öngel de Tlöcatzintle ica Zacarías. Oijcataya ca imöyecmö ajtöl cöne motlölea cupale. ¹² Hua oquetietzöbe Zacarías cuöc oquejtac, hua omomajte. ¹³ Pero inu öngel oquelfe:

—Zacarías, amo xomomajte, ipampa motlajtlötlajteles ye oquecajqque Deus. Mosohua Elisabet quemixebes sente moconie, hua tectucöyutis Xohuö. ¹⁴ Hua tepajpöques hua tecpeas pöquelestle, hua meyactie pajpöquesque cuöc yaja tlöcates. ¹⁵ Porque yaja bieye iyes para ca Deus. Amo conis vino nimpör sidra. Tientas iyulo ca Espiritu Sönto desde cuöc iyes ijtecopa inöntzi. ¹⁶ Hua meyactie de inu giente de Israel quenyulcuepas para ma tietocacö Tlöcatzintle inDeus de yejua. ¹⁷ Pues yaja tlayecöntös delönte de yejuatzi Tlöcatzintle. Huölös ca checöhuallestle san quiene inu tlayulepante Elías. Quenyulcuepas inyulo de tötajte para yesque cuale ca inpejpelhua, hua tli amo tlaneltocaneme quenyulcuepas para ma quematecö inu machestelestle de tli yecteque. Ejqueu quenpreparörus giente para cuöc hualiloas Tlöcatzintle.

¹⁸ Hua Zacarías oquelfe öngel:

—¿Tli sösantle teniechejtetis para necmates que ica melöhuac ini nönca? Pues naja ye nebiebentzi, hua nosohua nuyejque ye lamatzi.

¹⁹ Hua onöhuat öngel, oquejto:

—Naja necaca neGabriel, öque seme neijcateca tieixpantzinco Deus. Yejuatzi niechhualtitlanque ma temetznunutzahui, hua ma temetzmacaqui ini cuale tlamachestelestle. ²⁰ Öxö, noso, taja teyes temumorajtzi, hua abele tetlajtlajtus hasta tli ipan tunale mochihuas ini nönca. Ejqueu mochihuas ipampa amo tomoneltocac ica notlajtul. Pero lo que tli onequejto mochihuati ipa tiempo.

²¹ Mientras, noche tlöca quemöchixtaya Zacarías, hua quetietzöbejqque de que Zacarías tönto obejcö ipan teopantle. ²² Hua cuöc yaja oquis, abele quennunutzaya. Hua

ocasojcömatque que Deus oquejtetejque canajyetla ipan teopantle. Yaja quennunutzaya sa ca sieñas de imöhua, hua omocö mumorojtzi. ²³ Hua omochi que cuöc ye oquetlame tunalte de iteque, uya ca ichö.

²⁴ Hua sötiepa de inu niecate tunalte omoutztlöle isohua Elisabet. Hua omojyö möcuile mietztle. Oquejto:

²⁵ —Ejqueyi oquechijque Tlöcatzintle ca naja. Pues ipa nöncate tunalte oniechejtaque, hua niechonchibejeque ma ayecmo nepinöhua por que amo necpeaya nopelhua.

Sente öngel oquejto que tlöcatihuas Cristo

²⁶ Hua ipan checuasie mietztle, oquetitlanque Deus inu öngel Gabriel ipa sente puieblo de estado de Galilea, que itucö Nazaret. ²⁷ Ompa oyeya sente sisehuanu tli omocomprometiero para monömectis ca sente tlöcatl itucö Josie. Josie oyeya de ixenöchpelhua de David. Hua inu nieca sisehuanu itucö María. ²⁸ Hua inu öngel ocalac icalejtec cöne yaja oyeya. Oquelfe:

—Ma cuale xeye. Deus metzpaliebilo lalebes, hua yejuatzi iloac ca taja.

²⁹ Cache yaja amo oquemat quiene quepensörus, hua oquepensöro tli tlajpalulestle icaca ini nöncia. ³⁰ Inu öngel oquelfe:

—María, amo xomomajte, ipampa Deus metzmacalo meyac tiefavur. ³¹ Xequejta que tecpeas peltzintle mojtec, hua tecmixebes sente moconie, hua tejcuitis Jesús. ³² Lalebes bieye iloas, hua necutilus tieConietzi de yejuatzi öque lalebes bieyetzintle iloac. Hua Tlöcatzintle Deus tiemacasque para tlareinörurus quiename otlareinöro David, que ica de tiebiebetcöhua. ³³ Tlamandörurus ipa giente de Jacob nochepa, hua tiereinödo amo quepeas tlamelestle.

³⁴ María oquelfe öngel:

—¿Quiene iyes ini nöncia? Pues naja ayemo nequixomate tlöcatl.

³⁵ Onöhuat öngel, oquelfe:

—Espíritu Sönto hualiloas mopa, hua tiechecöhuales de öque lalebes bieyetzintle iloac mopa huölös. Por inu nuyejque inu peltzintle yectec tli tlöcates motucöyutis tieConietzi Deus. ³⁶ Hua xequejta, Elisabet quiene tequejta yaja nuyejque ye omoutztlöle ca sente iconie mös ye lamatz; hua ye quepea checuasie mietztle de que moutztlöle mös giente quejtoöya que yaja machura. ³⁷ Pues Deus cuöc quejtulo canajyetla quepealo belelestle para quechihuasque.

³⁸ Yecuöquenu María oquejto:

—Nö neca naja que necaca netietlatequepano de Tlöcatzintle. Ma mochihua ca naja san quiene ca tomojtalfe.

Hua öngel uya de yaja.

María onya quetlajpaluto Elisabet

³⁹ Ipa inu niecate tunalte omoquetztie María hua uya ca meyac cuesebelestle ipa sente puieblo de tlöle de Judá que oyeya innepantla tepieme. ⁴⁰ Ocalac ipa ichö Zacarías, hua oquetlajpalo inu Elisabet. ⁴¹ Hua omochi que cuöc oquecac Elisabet tlajpalulestle de María, inu peltzintle otzecui ijtecopa, hua iyulo Elisabet otie de Espiritu Sönto. ⁴² Hua otzajtzec checöhuac, hua oquejto:

—Deus metzteochihualo cache que noche ocseque sohuame, hua queteochihualo inu peltzintle tli mojtejca. ⁴³ ¿Tlica noso nopa omochi ini nöncia, que tienönajtzi de noTlöcatzintle onhuöla notlac? ⁴⁴ Pos cuöc onejca motlajpalules, inu peltzintle otzecui nojttecopa ca meyac pöquelestle. ⁴⁵ Hua cuale mocnupel taja öque tomoneltocac, ipampa ca taja mochihuas noche söstantle tli ometzefejque Tlöcatzintle.

Icuicateles de María

⁴⁶ Yecuöquenu María oquejto:
Noölma tiebieyelea Tlöcatzintle,

⁴⁷ hua noyulo oquepex pöquelestle tiecatzinco Deus notiemöquextejcötzi,
⁴⁸ ipampa oniechicnuejtaque naja, mös sa neca netietlatequepano.
 Pues desde öxö, noche giente tli yesque ipan tlöltecpactle quejtusque que cuale nocnupel.
⁴⁹ Pos oniechchibelejque bieye sösantle yejuatzi öque quepealo checöhualestle,
 hua yectec icaca tietucöyutzi.
⁵⁰ Hua tieicnuejteles icaca ica giente de noche tiempos,
 ca innochie tli tiemabelea.
⁵¹ Oquecuajpetzoyque tiemö para oquechijque bieye sösantle.
 Oquencuasemanque tli mochajchamöhua ipa inyulo.
⁵² Oquenquextejque tlajtoönejme para ayecmo tlamandörusque,
 hua oquemajcojqque tli porubejte.
⁵³ Tli tejteosejtaya oquentlamacaque de meyac tlin cuale,
 hua tli ricojte oquemelfejque ma yöcö, hua amo quenmacaque niontle.
⁵⁴ Oquenpaliebejqque ixenöchpelhua de tietlatequepano Israel,
 oquelnömejque de Israel ca icnuejtelestle.
⁵⁵ Ejqueu oquechijque quiename oquemelfejque totötajua,
 quieme oqueprometierfejque Abraham hua ipejpelhua para nochepa.
⁵⁶ Hua omocö María ca Elisabet quieme yeye mietztle. Sötiepa ohuöla pa ichö.

Otlöcat Xohuö Bautista

⁵⁷ Hua oasec tunale para mixebes Elisabet. Oquemixe iconie. ⁵⁸ Hua tli itlac chajchönteya hua igiente oquecajqque que Deus quepilejqque meyac icnuejtelestle, hua opajpöjqque ca yaja. ⁵⁹ Hua omochi que pan checuieye tunale ohuölajque para quenacayutequesque inu peltzintle. Hua quecuiüya quieme itajtzi, Zacarías. ⁶⁰ Yecuöquenu onöhuat inöntzi, oquejto:

—Amo, cache itucöyes Xohuö.

⁶¹ Hua oquelfejque:

—¿Tli ipampa? Amo öque de mogiente mocuitea ejqueu.

⁶² Hua oquenutzque itajtzi peltzintle ca sieñas de inmöhua, quiene queneque quecuitis. ⁶³ Hua yaja otlajtla ömatl, hua oquejcuelo ejqueyi: “Itucö Xohuö”.

Innochie quetietzöbejqque. ⁶⁴ Hua sa nima opajtec icamac hua inenepil Zacarías. Ye cuale otlajtlahto, hua otieteochi Deus. ⁶⁵ Ohuöla majcömabelestle impa innochie tli ompa chajchönteya intlac yejua. Hua ipa noche tepieme de estado de Judea omacheac de noche ini nönca sösantle tli opasöre. ⁶⁶ Hua noche quiejquech quecaqueya quemalfiöya ipa inyulo, hua quejejtöya:

—¿Öquenu iyes inu peltzintle?

Pues Tlöcatzintle iloaya ca yaja hua ejqueu quepaliebiloöya.

Zacarías otlayulepante

⁶⁷ Hua Zacarías itajtzi Xohuö iyulo otie de Espíritu Sönto. Otlayulepante, hua oquejto:

⁶⁸ Ma tetieteochihuacö Tlöcatzintle Deus de Israel,
 que ohualiloac ca tiepuieblo, hua oquemöquextejque,

⁶⁹ hua ocajcojqque sente tiemöquextiöne para tejua,
 de ixenöchpelhua de David tietlatequepano.

⁷⁰ Pues ejqueu oquejtojque por incamacopa de tietlayulepanhua yectequ
 tli oquepujqque tietlajtultzi desde ca opie tlöltecpactle.

⁷¹ Tiechmacaque nemöquextelestle de toenemigos,
 hua de innochie tli tiechtajyelejta.

⁷² Ejqueu quepeasque icnuejtelestle ca totötajua,
 hua quelnömequesque de inu acuiendo yectec tli oquechijque,

⁷³ hua de inu promesa tli oquejurörojque ca Abraham totöta.

⁷⁴ Pues oqueprometierojque tiechmacasque ini nönca: que temöquisasque de inmöpa de toenemigos,

hua tetietequapanusque sin mabelestle,

⁷⁵ ca yectelestle hua nemelestle yectec para ca yejuatzi, mientras teneme.

⁷⁶ Hua taja, peltzintle, teyes tetlayulepante de öque lalebes bieyetzintle iloac.

Pues taja teyös delönte de Tlöcatzintle, para tecyejyectlöliti tieojfe.

⁷⁷ Tequemixtlamachtiti giente de tiepuieblo quiene momöquextisque,

para ejqueu toDeus quenperdonörfisque de intlajtlacul,

⁷⁸ porque yejuatzi quemicnuejtalo.

Por inu, desde ompa tlapac hualiloas quiename cuöc quisa tunale,

⁷⁹ hua quenmacasque tlöbile tlin neme ipan tlajtlayohuaquelestle hua ipa locör de mequelestle,

hua tiechyecönasque para tocxehua ma nejnemecö ipa ojtle de yecsiebelestle.

⁸⁰ Hua inu peltzintle mobepöhuaya, hua caseya checöhuallestle ipa iyulo. Hua omocö cöne nionöque chönteya hasta inu tunale cuöc Deus oquetitlanque itlac giente de Israel.

2

Quiene ca otlöcatihuac Jesús

¹ Hua omochi ipa inu niecate tunalte que inu emperador Augusto César otlamandöro que noche giente de tlöltecpactle ma mocensörucö. ² Ini nönca primiero censo omochi cuöc Cirenio oyeya cubernadur ipan tlöle de Siria. ³ Hua oyöya innoctie para mocensörusque. Cara sesen tlöcatl onya ipan puieblo cöne onemeya ibiebetcöhua. ⁴ Hua oquis Josie de ipa inu estado de Galilea, hua de inu puieblo de Nazaret. Onya ca ipa estado de Judea, ca ipa ipuieblo de David, que itucö Belén. Pues yaja oyeya de ixenöchpelhua David. ⁵ Ompa onya para mocensörus ca tiehua María, öque omocomprometiero para monömectis ca yaja. Hua María ye utztle oyeya. ⁶ Hua omochi que cuöc yejua ye oyejyeya ompa, oasec tunale para mixebes. ⁷ Hua oquemixe itieyecapaconie, hua oquequemelo ica tzintatapajme, hua oquetietiecac ijtec sente cöxa tli quepeaya sacatl para ompa tlapac yulcöme. Pues amo oyeya locör para yejua ipa inu nieca mersu.

Öngeles oquenmachestejque calnielojpexque de que ye otlöcatihuac Jesús

⁸ Hua oyejyeya calnielojpexque ipa inu nieca tlöle. Yejua oyejyeya ca caltienco hua quemixutiöya incalnielojua ca yohuale. ⁹ Hua sente öngel tli cualtitlanque Tlöcatzintle ohuöla impa yejua, hua tietlaniexteles Tlöcatzintle oquenyehualo ica itlapetlöneles. Hua omomajtejque lalebes. ¹⁰ Cache öngel oquemelfe:

—Amo xomomajticö, porque nemiechpubelea quale tlamachestelestle tli quenmacas meyac pöquelestle ca noche tiegiente de Deus: ¹¹ que öxö ye otlöcatihuac, ipa ipuieblo de David, sente tiemöquextiöne öque yejuatzi iloac Cristo öque Deus tieixpejpenque, hua iloac Tlöcatzintle. ¹² Hua ejqueyi nenquematesque cuöc ye nentieniextejque: pos nenqueniextisque peltzintle que quemelejtas ca tzintatapajme. Betztotas ijtec cöxa tli quepea sacatl para ompa tlajtlacua yulcöme.

¹³ Hua sa de repente oniesque ica öngel lalebes bel meyactie de tieöngeles Deus. Tiechamöhuaya, hua quejejtöya:

¹⁴ Deus ma quepeacö yectieniebelelestle ompa tlapac,

hua ipan tlöltecpactle ma uye yulsiebelelestle inca innoctie tli quencualejtalo Deus.

¹⁵ Hua omochi que cuöc öngeles ye uyajque ca elfecac, calnielojpexque omolfejque entre yejua:

—Ma teyöcö hasta Belén. Ma tequejtacö inin tli omochi, tli Tlöcatzintle ye otiechmachestejque.

¹⁶ Hua ocuejcuesejque, hua oquenniextico inu María, ca Josie, hua peltzintle obetzaya ijtec cōxa cōne tlajtlacua yulcōme. ¹⁷ Hua cuōc oquejtaque, oquepujque noche tli öngel oquemelfe de inu peltzintle. ¹⁸ Hua noche tli oquecajque oquetietzöbejque inu sōsantle tli quenpubeliöya calnielojpexque. ¹⁹ Cache María quemalfiöya ini nōnca sōsantle ipa iyulo, hua seme quepensöroöya. ²⁰ Hua omocuejque inu calnielojpexque. Tiemabesutejtöya hua tieyectieniehuatöya Deus por ipampa noche inu sōsantle tli oquecajque hua oquejtaque, san quiene ca oquemelfe öngel.

María hua Josie oquebicaque peltzintle Jesús pa teopantle

²¹ Hua cuōc opanuc checuieye tunale para quenacayutequesque inu peltzintle, oquetlölelejque itucöyu Jesús. Pues ejqueu oquecuite öngel antes que mochejchihuas ipa ijte María.

²² Cache cuōc opanuque tunalte para omohepöjque, san quiene ca quejtoa inu ley de Moisés, oquehalecaque peltzintle ipa inu ciudad de Jerusalén para quetieyjetetisque tieca Tlöcatzintle. ²³ (Pues ejqueyi tlajcuelulpanca ipa inu ley tli quemacaque Tlöcatzintle: “Noche peltzintle tli primero tlöcate de inōna, tlö ica oquechtle modedicōrus para iyes de Tlöcatzintle”.) ²⁴ Ejqueu noso onyajque para quetiemasque inu bentle quiene quemarcōroa inu ley tli quemacaque Tlöcatzintle, cōne quejtoa: “Ma mobentlölicö unte cucutetzetzi noso unte palumaxte”.

²⁵ Hua ompa oyeya sente tlöcatl ipa Jerusalén, que itucö oyeya Simeón. Ini nōnca tlöcatl oyeya yecnemelestec hua seme tietechihuaya Deus. Quecheaya ma mochihua inu sōsantle tli quenylölis giente de Israel. Hua Espíritu Sönto hualiloöya ipa yaja. ²⁶ Hua Espíritu Sönto ye oquemachestejque que amo meques hasta senamo tieyetas inu Cristo öque tieixpejpenque Tlöcatzintle. ²⁷ Hua Espíritu Sönto oquechihualtejque ma huöla ipan teopantle. Hua itötajua peltzintle Jesús oquecalaquejque peltzintle ipan teopantle, para quechibelisque por yaja san quiene ica costumbre de inu ley. ²⁸ Yecuöquenu yaja Simeón oquenöpalo peltzintle. Tietechibele Deus, hua oquejto:

²⁹ Öxön quiema ma nebeya naja que neca motlatequepanojtzi, notiecojtzi.

Ma nemeque ca siebelestle ipa noyulo, san quiene ca teniechmolfele.

³⁰ Porque noixtelololua ye oquejtaque motiemöquextelestzi tli tetiechmomaquelis,

³¹ que ye otomopreparörfe para quejtasque noche puieblös,

³² tlöbile para ma quentlaniextele giente de ocseque puieblös,

hua tlanixtelestle de mopuieblojtzi de Israel.

³³ Itöta ca inōna peltzintle quetietzöbejque de noche ini sōsantle tli mojtoöya de yaja.

³⁴ Hua Simeón oquenbendeseyumacac, hua oquelfe María inöntzi peltzintle:

—Xequejta necö, que ini nōnca peltzintle oquetlölelejque Deus para que por medio de yaja meyactie giente de Israel tli quepea checöhualestle quepolusque, hua meyactie tli quenpoloa casesque. Iyes quiename sente sieñas para yejua, hua meyactie quetlabielcöhuasque. ³⁵ Hua melöhuac, iyes quiename tlö sente espöda motlölaquis ijtec moölma de taja. Ejqueu ixniesesque pensamientos tli mojoynteca ipa inyulo de meyactie.

³⁶ Hua ompa oyeya nuyejque sente sohualt tlayulepante itucö Ana. Itajtzi itucö Fanuel. Oyeya de inu grupo de israelitas tli oyejyeya de itlöcaxenöchyo de Aser. Ini nōnca sohualt ye oyeya lalebes ye lamatzi. Pues cuōc sisehuanu omonömete, hua one ica inömec checume xebetl, ³⁷ hua öxö ye quepeaya ochenta y cuatro años de que oyeya icnusohualt. Yaja seme mocöhuaya ipan teopantle. Tietechijtaya Deus yohualen tunale. Tlajyubiöya hua motlajtlötlajtiöya. ³⁸ Ini sohualt ohuöla ipa inu nieca ura, hua tietlasojcömat Deus. Quennunutzaya de inu peltzintle ca noche giente tli quemöcheaya ma momöquexte inu ciudad de Jerusalén.

Omocuejque ica puieblo de Nazaret

³⁹ Hua cuöc oquechijque noche söstantle tli quejtoa inu ley tli quemacaque Tlöcatzintle, omocuejque ca Galilea, ca ipan inpuieblo de Nazaret. ⁴⁰ Hua peltzintle mobepöhuaya, hua caseya checöhualestle. Momeyaqueliöya ca tlamatelestle, hua tiefavur Deus oyeya ca yaja.

Peltuntle Jesús omocö pan teopantle

⁴¹ Hua itötajua oyöya cara xebetl ipa Jerusalén ipa inu yelfetl de pöscua. ⁴² Hua cuöc ye quepeaya majtlactle huan ume xebetl, otlejcojque yejua ca ipa Jerusalén san quiene ca quepeaya costumbre ipa inun tunale de yelfetl. ⁴³ Cuöc ye otlán tunalte, omocuejque yejua. Pero omocö inu pelalajconetzi ipa Jerusalén, sin quematesque itötajua. ⁴⁴ Yejua quepensöroöya que beles oyeya inca ocseque giente tli oyöya ca yejua. Ejqueu onejnenque noche semelfetl. Hua ca ye yohuac quietiemoöya intzölö igiente hua intzölö tli quemixomateya. ⁴⁵ Cuöc amo oqueniextejque, omocuejque ca Jerusalén oquetiemuto. ⁴⁶ Hua opasöre que hasta pa yeye tunale oqueniextejque ipan teopantle. Yehuataya innepantla tlajmatque. Oquencactaya hua oquentlajtlanejtaya. ⁴⁷ Hua noche giente tli quecaqueya quietietzöbejtaya de quiene quemateya hua quiene onöhuateya. ⁴⁸ Cuöc oquejtaque itötajua oquetietzöbejque. Oquelfe inöntzi:

—Noconie, ¿tlica otetiechchibele ejqueyi? Xequajta motajtzi hua naja otemetztiemojtenemeya ca meyac tequepachule.

⁴⁹ Yaja oquemelfe:

—¿Tlica nenniechmotiemolejque? ¿Amo nemomachitea que niechconbenieroa ma neya ipa tietequoyotzi de noTajtzi?

⁵⁰ Pero yejua amo ocaojcömatque inu tlajtule tli yaja oquemelfe. ⁵¹ Hua ohuöla ca yejua, hua oaseco ipa Nazaret, hua omosujetöro ca yejua. Noche ini nönca söstantle tli omochi, inöntzi quemalfiöya ipa iyulo. ⁵² Hua Jesús cache mochihuaya tlajmatque, cache mobepöhuaya, hua Deus hua giente cache quecualejtaque.

3

Xohuö Bautista tlanunutzaya

¹ Ye quepeaya caxtule xebetl que tlagobörnoro inu emperador Tiberio César. Oyeya cubernadur de estado de Judea yaja Poncio Pilöto. Herodes oyeya Tetrarca, noso rey de estado de Galilea, hua icni Felipe oyeya Tetrarca de inu tlöle de Íturea hua de Traconite, hua Lisaniás oyeya Tetrarca de tlöle de Abilinia. ² Oyeya tlajtojcoöteopexque yaja Anás ca tiehua Caifás. Ipa inu tiempo Tlöcatzintle oquemacaque tietlajtul ca Xohuö, iconie Zacarías, ompa cöne nionöque chönteya. Oquetitlanque para ma tlanunutza de inu tlajtule. ³ Yaja ohuöla ipa inu tlöle itlac inu ötlactle de Jordán. Hualtlanunutztoya que giente ma moyulcuepacö para ma Deus ma quenperdonörficö intlajtlacul. Hua tlöjcu, ma mocuötiequicö. ⁴ Pues ejqueu tlajcuelulpanca ipa ömatl de inu tlayulepante Isaías, que quejtoa:

Caquestec tlajtule de yeca tli tzajtze ompa cöne nionöque chönte,

hua quejtoa: “Xecyejyeclölicö tieojfe Tlöcatzintle.

Xecmelöhuacö tieojfe, pos ye miero axihuaqui”.

⁵ Noche xopochco majcoques, hua noche tepieme moparejörusque,

hua tli ojme nejnecuelteque momejmelöhuasque, hua tli ojme petzoteque mixmanasque.

⁶ Hua noche giente quejtasque quiene Deus quenmöquextisque.

⁷ Hua Xohuö quemelfiöya giente tli quisaya para mocuötiequisque ca yaja:

—¡Tlöcaxenöchcuöme! ¿Öquenu onemiechmachte nenholusque de ipa inu cualönelestle de Deus tli huölös nemopa? ⁸ Xecchihuacö noso söstantle tli conbenierebe quechihuas öque de melöhuac ye omoyulcuec. Hua amo xequajtojtacö nemojtecopa que yaja Abraham icaca nemotajtzi hua que por inu nencate cuale. Pues naja nemiechelfea

que Deus cuale quenchihualtisque ini nōncate teme ma mochihuacō ipelhua Abraham.
⁹ Öxö nuyejqe pues Deus ye miero quenpojpulusque tli amo quechihua tlin cuale. Icacá quiename tlō öcha ye intzintlanca cuajme. Hua noche cuabetl tli amo quetiémaca ifruto cuale motzinteques hua motlajcales ijtec tletzintle.

¹⁰ Hua inu tlōca quetlajtlaniöya, hua quelñiöya:

—¿Tli noso tecchihuasque?

¹¹ Hua yaja onōhuat, hua oquemelfe:

—Öque quepea unte tlaquentle, ma quemaca öque amo quepea, hua öque quepea tli quecuōs nuyejqe ma quechihua ejqueu.

¹² Nuyejqe ohuōlajque tlanechecojque para mocuōtiequisque, hua oquelfejque:

—Maestro, ¿tli tecchihuasque tejua?

¹³ Hua yaja oquejto:

—Amo cache meyac xecnechecucō tlōcamo sa tli quemarcōroa ley.

¹⁴ Hua quetlajtlaniöya soltōrojte, oquejtojque:

—Hua tejua, ¿tli tecchihuasque?

Hua yaja oquemelfe:

—Amo xecmaltratōrucō nionōque, hua amo öque xejcuejcuelicō lo que tli amo nenquepea deriecho para nenquecuejcuelisque. Xomoconformōrucō ca lo que tli nenquetlōntecate.

¹⁵ Noche giente quechixtaya hua quepensōrojtaya ipa inyulo de Xohuō, tlō beles yaja icaca inu Cristo tli Deus quixpejpenque. ¹⁶ Onōhuat Xohuō, oquemelfe innochie:

—Naja, por nopörte, nemiechcuōtiequea ca ötzintle. Pero sōtiepa de naja biloatz ocsie tlōcatl, öque cache quepealo meyac checōhuallestle que naja. Naja amo necmeresieroa nion para nopiechus para netiequextelis tiecacua. Yejuatzi nemiechcuōtiequesque ca Espiritu Sōnto hua ica tletzintle. ¹⁷ Yejuatzi iloac quiename sente tlōcatl tli ye miero piehuas para quetzetzelus hua quechepōhuas trigo. Hua quebicasque inu trigo tli chepōhuac ijtec ibesco. Pero inu itlasolyo quexutlaltisque ijtec inu tletzintle tli ayec siebe.

¹⁸ Hua Xohuō quenmachestiöya giente ocseque meyac sōsantle, hua quennunutz de cuale tlamachestelestle. ¹⁹ Hua yaja ocajajuac Herodes inu Tetrarca noso rey ipampa omosohuajte ca Herodías, isohua icni Felipe. Nuyejqe ocajajuac ipampa oquechi meyac ocseque sōsantle tli amo cuale. ²⁰ Hua ca inu Herodes oconchi ocsente sōsantle cache turavea amo cuale, que oquetzajtzac Xohuō ipan cōrsel.

Xohuō Bautista tiecuōtieque Jesús

²¹ Hua cachtō de cuōc oquetzajtzac, omochi que cuōc noche giente mocuōtiequiöya, nuyejqe Jesús onecuōtiequiluc. Hua onetlajtlōtlajtiluc. Hua elfecac omotlapo, ²² hua Espiritu Sōnto ohualiloac tiepa yejuatzi ca furma quieme palumax. Hua ocaquestec sente tlajtule de elfecac, tli quejtoöya:

—Taja tenotlasojcōconie. Motech taja necpea meyac pōquelestle.

Tiebiebetcōhua de totieJesucristo

²³ Cuōquenuju Jesús quepealoöya treinta xebetl. Entunses opiehualuc tlanunutzaloöya. Giente quejtoöya que yejuatzi iloaya iconie Josie, öque oyeya iconie Elí, ²⁴ öque oyeya iconie de Matat, öque oyeya iconie de Leví, öque oyeya iconie de Melqui, öque oyeya iconie de Jana, öque oyeya iconie de Josie, ²⁵ öque oyeya iconie de Matatías, öque oyeya iconie de Amós, öque oyeya iconie de Nahum, öque oyeya iconie de Esli, ²⁶ öque oyeya iconie de Nagai, öque oyeya iconie de Maat, öque oyeya iconie de Matatías, öque oyeya iconie de Semei, öque oyeya iconie de Josie, öque oyeya iconie de Judá, ²⁷ öque oyeya iconie de Joana, öque oyeya iconie de Resa, öque oyeya iconie de Zorobabel, öque oyeya iconie de Salatiel, ²⁸ öque oyeya iconie de Neri, öque oyeya iconie de Melqui, öque oyeya

iconie de Adi, öque oyeya iconie de Cosam, öque oyeya iconie de Elmodam, öque oyeya iconie de Er,²⁹ öque oyeya iconie de Josué, öque oyeya iconie de Eliezer, öque oyeya iconie de Jorim, öque oyeya iconie de Matat, öque oyeya iconie de Leví,³⁰ öque oyeya iconie de Simeón, öque oyeya iconie de Judá, öque oyeya iconie de Josie, öque oyeya iconie de Jonán, öque oyeya iconie de Eliaquim,³¹ öque oyeya iconie de Melea, öque oyeya iconie de Mainán, öque oyeya iconie de Matata, öque oyeya iconie de Natán,³² öque oyeya iconie de David, öque oyeya iconie de Isaí, öque oyeya iconie de Obed, öque oyeya iconie de Booz, öque oyeya iconie de Salmón, öque oyeya iconie de Naasón,³³ öque oyeya iconie de Aminadab, öque oyeya iconie de Admi, öque oyeya iconie de Arni, öque oyeya iconie de Esrom, öque oyeya iconie de Fares,³⁴ öque oyeya iconie de Judá, öque oyeya iconie de Jacob, öque oyeya iconie de Isaac, öque oyeya iconie de Abraham, öque oyeya iconie de Taré, öque oyeya iconie de Nacor,³⁵ öque oyeya iconie de Serug, öque oyeya iconie de Ragau, öque oyeya iconie de Peleg, öque oyeya iconie de Heber,³⁶ öque oyeya iconie de Sala, öque oyeya iconie de Cainán, öque oyeya iconie de Arfaxad, öque oyeya iconie de Sem, öque oyeya iconie de Noé, öque oyeya iconie de Lamec,³⁷ öque oyeya iconie de Matusalén, öque oyeya iconie de Enoc, öque oyeya iconie de Jared, öque oyeya iconie de Mahalaleel,³⁸ öque oyeya iconie de Cainán, öque oyeya iconie de Enós, öque oyeya iconie de Set, öque oyeya iconie de Adán, öque oyeya tieconie de Deus.

4

Amo Cuale Tlöcatl tieyulmajmötocac Jesús

¹ Hua tieyulo Jesús otie ca Espíritu Sönto. Nehualnecuepaluc de ipan Jordán, hua Espíritu Sönto tiebicaluc ca ompa cöne nionöque chönte. ² Ompa iloaya cuarenta días, hua tieyulmajmötocaya Diöblo. Cuöc ye opanuc inun tunalte oteosebihuac. ³ Hua Diöblo otieyelfe:

—Tlö teca teiconie Deus, xequelfe ini nönca tietetu ma mocuepa pöntzi.

⁴ Hua Jesús oquenönquelejque, oquelfejque:

—Tlajcuelulpanca: “Amo sa ca pöntzi cuale nemes sente tlöcatl”.

⁵ Hua Diöblo otiebicac tlapac, hua otieyeltete noche reinos hua naciones de tlöltecpactle. ⁶ Hua Diöblo otieyelfe:

—Taja temetzmecas noche ini nönca checöhuallestle, hua icualniexteles de noche nöncate naciones. Pos naja oniechmöctejque, hua öque naja necneque, cuale necmacas.

⁷ Ejqueu, tlö taja teniechmabesutis nixpa, noche ini nönca mohuöxca iyés.

⁸ Hua onöhuatihuac Jesús, oquelfejque:

—Tlajcuelulpanca:

Yejuatzí Tlöcatzintle moDeus tetiemabesutis, hua sa yejuatzí tetietequépanus.

⁹ Hua otiebicac ipa ciudad de Jerusalén, hua otietlejcabe icuayuluc teopantle. Hua otieyelfe:

—Tlö tecaca teiconie Deus, xomocajcöhua para tebetzes desde necö hasta tlölpa.

¹⁰ Pues tlajcuelulpanca ejqueyi:

Quenhualentitlanesque tieöngeles por mopampa, ma metzixuticö.

¹¹ Hua:

Metzajcoquesque ca inmöhua,

para que ejqueu mocxehua amo moteputlamesque ca teme.

¹² Hua onöhuatihuac Jesús, oquelfejque:

—Pan tlajtule icaca: “Amo xetietantiöro Tlöcatzintle moDeus para abier tlö cuale quechihuasque”.

¹³ Hua cuöc Diöbbo ayecmo quemateya quiene cache tieyulmajmötocas, uya de tietlac por sie röto.

Jesús quepiehualtejqe tieteqe ipa Galilea

¹⁴ Hua Jesús ohualiloac ca estado de Galilea ca checöhuallestle de tieEspíritu de Deus. Hua omacheac de yejuatzi ipa noche tlöle tli ica ca ompa. ¹⁵ Hua tlamachtiloöya ipan inteopancuconehua, hua innochtie tieyectieniehuaya.

Giente de Nazaret amo omoneltocaque tieca Jesús

¹⁶ Hua ohualiloac ipa puieblo de Nazaret, cöne yejuatzi onebepöhualuc. Ipan söbro ocalacoac pa teopanconetzi, quiene quepealoöya costumbre. Onequetzaluc para quetlajtultisque ömatl. ¹⁷ Otiemacaque yaja ömatl de inu tlayulepante Isaías. Oquexetunque inu ömatl tli ilacatzetaya, hua oqueniextejque cöne tlajcuelulpanca ejqueyi:

¹⁸ TieEspíritu Tlöcatzintle iloac ipa noyulo.

Ejqeu niechixpejpenque para ma netlanunutzta de cuale tlamachestelestle ca tli porubejte.

Niechhualtitlanque para netlamachestis de que priesoste cuale quisasque de incörsel, hua ixcocoxcötzetzi ye cuale tlacheasque, hua tli omolastimörojque ye cuale yesque libres.

¹⁹ Niechhualtitlanque para netlanunutzta de ini xebetl tluacalejtale de Tlöcatzintle.

²⁰ Hua cuöc ye oquetlajtultejque nöncate tlajtulte, oquequemeløjque inu ömatl. Oquemacaque teotlatequepano, hua onetlösiluc. Hua innochtie tli oyejyeya ipa inu teopanconetzi tieyetzta. ²¹ Hua opiehualuc quemelfiloöya:

—Öxö ye omochihuaco ini nöncia teotlajtulte tli nenquecajqe.

²² Hua innochtie tietieniehuaya, hua quetietzöbejtaya inu tlajtulte cuajcualtec tli quejtuloöya. Hua quejejtöya:

—¿Amo yaja ini nöncia iconie de Josie?

²³ Hua yejuatzi oquemelfejque:

—Seguramente ye neniechelfisque ini nöncia tlajtulte: “Mierco, xomopajte sie taja”. Hua neniechelfisque ma necchihua noche söstantle tli onenquecajqe que onecchi ipa Capernaum, ma necchihua necö ipa nopuieblo.

²⁴ Nuyejque oquejtojque:

—Melöhuac neniechelfea, que nionöque tlayulepante amo queresibiroa giente de ipuieblo. ²⁵ Melöhuac neniechelfea, que meyactie icnusohuame oyejyeya ipa Israel ipa inun tunalte de Elías, cuöc elfecac omotzac para amo onqueya yeye xebetl hua checuasie mietztle, hua oyeya meyac öpestle ipa noche tlöle. ²⁶ Cache Deus amo quetitlanque inu tlayulepante Elías ma beya itlac nionöque de yejua, tlöcamo itlac sente icnusohuatl estrangiera tli nemeya pan puieblo de Sarepta itlac ciudad de Sidón. ²⁷ Hua cuöc nemeya inu tlayulepante Eliseo oyejyeya meyactie tlöca sa söhuayojque ipa Israel. Cache nionöque de yejua opajtec, tlöcamo sa inu estrangiero Naamán, öque oyeya de inu nación de Siria.

²⁸ Hua cuöc oquecajqe ini nöncia söstantle, noche tli oyejyeya ipan teopanconetzi ocuajcualönque. ²⁹ Omoquiequetzque, hua otiequextejque ca queyöhuac de inu puieblo. Hua otiebicaque hasta icuötecpac tepietl cöne oyeya inu puieblo para tietepexebisque.

³⁰ Cache yejuatzi opanoac intzölö de yejua hua obiloac.

Sente tlöcatl quepeaya moxicoöne

³¹ Hua ohualiloac ipa Capernaum, ocsente puieblo de inu estado de Galilea. Hua quenmachtiloöya ipan tunale cuöc mosiebea joriojte, que yaja söbro. ³² Pos giente tietietzöbeya quiene ca tlamachtiloöya, ipampa tlajtlajtuloöya ca meyac checöhuallestle. ³³ Pero oyeya ipan teopanconetzi sente tlöcatl que quepeaya sente espíritu de moxicoöne. Ini nöncia otzajtzec checöhuac. ³⁴ Oquejto:

—¡Ay! ¿Tli tecpea ca tejua, Jesús de Nazaret? ¿Ye tehuöla otetiechxexetunico? Necmate öquenu taja: taja tetietlöcayectec de Deus.

³⁵ Pero Jesús ocajajuaque, oquelfejque:

—Xectzacua mocamac, hua xequisa de yaja.

Yecuöquenu inu demunio oquechihualte tlöcatl ma betze tlanepantla. Entunses oquis de yaja, hua amo tli quechibele. ³⁶ Hua quetietzöbejque innochie, hua monunutzaya entre yajua sie tlöcatl ca ocsie tlöcatl. Quejejtöya:

—¿Tli tlajtule icaca ini nönca? Pues quennahuatea moxicoöneme ca checöhuallestle hua ca beletelestle, hua yajua quisa.

³⁷ Hua inu tli oquechijque yejuatzi omacheac ca nobeyo ipa noche pörtes de inu nieca tlöle.

Jesús quepajtejque imontiesyo de Piero

³⁸ Hua onequetzaluc Jesús, oquixoac de ipan teopanconetzi. Ocalacoac ipa ichö Semu. Imontiesyo Semu quepeaya checöhuac totunealestle, hua giente tietlötajtejque por yaja para ma quepajticö. ³⁹ Yejuatzi onepiechuluc cöneca yaja oyeya. Cajajuaque inu to-tunealestle, hua totunealestle oquecö. Entunses yaja sa nima omie hua tieintlamacaya.

Quenpajtejque meyactie cocoxcötzetzi

⁴⁰ Hua cuöc ye calaques tunale, noche quiejquech quepejpeaya cocoxcötzetzi de meyac söstantle cocolestle quenhualcaya tieca. Yejuatzi quetlöliloöya tiemöhua ipa cara sente cocoxque de yajua, hua quenpajtiloöya. ⁴¹ Hua oquisaya nuyejque demunios tli meyac giente quepeaya imijtec. Tzajtztajzeyya, quejejtöya:

—Taja tecaca teiconie Deus.

Pero quemajajualoöya, hua amo quencöhualoöya ma tlajtlajtucö, pues yajua quemaj-taya que yejuatzi iloac inu Cristo tli Deus tieixpejpenque.

Jesús tlanunutzalutenemeya ca nobeyo pa estado de Galilea

⁴² Hua cuöc ye oyeya ca tunale oquixoac hua obiloac ipan locör cöne nionöque chönteya. Hua meyac giente tietiemöya, hua ohuölajque hasta tietlac. Pues amo quenequeya ma nenencuaxelulo de yajua. ⁴³ Cache yejuatzi oquemelfejque:

—Necpea que netlanunutzas de ini cuale tlamachestelestle de quiene tlamandöruro Deus nuyejque ca ocseque puieblos. Pues ipampaji onehuöla.

⁴⁴ Hua hualtlanunutzalutöya ipa noche teopancucone de inu tlöle de joriojte.

5

Jesús oquennutzque seque de tiemachtejcöhua

¹ Hua omochi que yejuatzi oiloaya itlac ötiescatl de Genesaret. Meyac giente mosentlöliöya para quecaquesque tietlajtultzi Deus. ² Hua oquejtaque unte börcoscucone que oyejyeya tlatienco de ötiescatl. Inu tlajtlamajque ye oquisque hua quepöcaya intarröya. ³ Hua ocalacoac ipa sente de ini nöncate börcos que oyeya ihuöxca Semu. Oquetlajtlanelejque ma quepacho cache tepetzi ca tlajjtec de ötiescatl. Onetlöliluc, hua quenmachtöya giente desde ipa börcö. ⁴ Hua cuöc ayecmo tlajtlajtuloöya, oquelfejque Semu:

—Xebeya cache ca cöne bejcatla ötzintle, hua ompa xectlajcale nemotarröya para nenquemasesque mimechte.

⁵ Hua onöhuat Semu, otieyelfe:

—NoTlöcatzi, ye otetquetque noche seyohual, hua amo tli tecaseque. Pero siendo que tejuatzi teniechmolfelea, pos nectlajcales notarröya.

⁶ Hua cuöc inu pescadurte oquechijque ejqueu, oquemaseque lalebes meyactie mimechte, que intarröya tzomuneya de tönto ara meyactie. ⁷ Hua oquenchibelejque sieñas ca inmöhua para ma huölöcö incompanierojua tli oyejyeya ipa ocseque börcö,

hua ma quenpaliebicö. Hua ohuölajque, hua oquentiemitejque innehua börcos, hua hasta quenegueya öpötzcalaquesque. ⁸ Hua cuöc Semu Piero oquejtac ini nönca, omotlancuöquetz tieicxetla Jesús. Oquejto:

—Xomoxelojtzino de naja, Tlöcatzintle, ipampa naja necaca netlajtlacultec.

⁹ Pues ipa ohuöla majcömabelestle, hua impa noche quiejquech oyejyeya ca yaja, ipampa lalebes meyactie mimechte oquemaseque. ¹⁰ Ca yaja oyejyeya Jacobo hua Xohuö, ipelhua Zebedeo. Ini nöncate oyejyeya icompanierojua de Semu. Hua Jesús oquelfejque Semu:

—Amo xomomajte; desde öxö teyes tetlajtlamajque de gientes, para ma momöquexicö.

¹¹ Hua cuöc yejua oquisque ipan tlöle oquecöjtiejque noche tli quepejpeaya, hua otietocaque.

Jesús quepajtejque sente tlöcatl sa söhuayo

¹² Hua omochi que cuöc iloaya ipa sente puieblo, ohuöla sente tlöcatl sa söhuayo, lalebes cocoxque. Ini nönca, cuöc otieyjtac Jesús, omotlancuöquetz tieicxetla. Otietlölajte, oquejto:

—Tlöcatzintle, mach tomonequitis, cuale teniechmopajtelis.

¹³ Hua yejuatzi omomösohualte hua oquemötocaque. Oquejtojque:

—Necneque; xepajte.

Hua sa nima icocoles oquecö. ¹⁴ Hua yejuatzi oquenahuatejque que majcamo öque quepubele. Cache cuale oquejtojque:

—Xebeya xomotiejtetite ica teopexque. Xejcuetlabilte bentle san quiene ca Moisés otlanahuate para teyes techepöhuac para cuale tecalaques pan teopantle. Ejqueu ma quematecö yejua lo que tli omochi ca taja.

¹⁵ Pero cache lalebes caquesteya tietlatieniehuales. Hua mosentlöliöya meyac tlöca para tlaquesque hua para mopajtisque de incocoles. ¹⁶ Cache yejuatzi nenencuaxeluloöya ca cöne nionöque chönteya para netlajtlölajtilus.

Jesús quepajtejque sente tlöcatl cojcultzi

¹⁷ Hua omochi sie tunale que yejuatzi otlamachtilitaya. Hua ompa oyejyeya seque fariseos ca tiehua seque maestros de inu ley de Moisés. Yejua ohuölajque de ipa noche puieblos de inu estado de Galilea, de estado de Judea, hua de ciudad de Jerusalén. Hua Jesús quepealoöya checöhuallestle de Tlöcatzintle para quenpajtisque giente. ¹⁸ Hua necö ohuölajque seque tlöca que quehualecaya ipa sente tlapechtle sente tlöcatl cojcultzi. Quetiemoöya quiene cuale quecalaqueque hua quetlölisque tieixtla yejuatzi. ¹⁹ Cuöc amo oqueniextejque quiene quecalaqueque ipampa lalebes meyac giente, oquetlej-cabejque icpac cale. Oquetlapojque tiejas, hua ca ompa oquetemobejque ipa itlapech tlanepantla, ca tieixpa Jesús. ²⁰ Cuöc yejuatzi oquejtaque quiene yejua moneltocaya, oquelfejque:

—Tlöcatl, motlajtlacul ye temetzperdonörfe.

²¹ Inu tlamachtioneme de teotlajtule hua fariseos opiejque tlajtlajtojta entre yejua. Oquejtojque:

—¿Öqueniji que checuatlajtoa encuntra de Deus? ¡Abele öque cuale tieperdonörfis tlajtlacule tlöcamo sa Deus!

²² Jesús oquixomatque inpensamientos de yejua. Onöhuatihuac hua oquemelfejque:

—¿Tli nenquepensöroa ipa nemoyulo? ²³ ¿Cötlaja cache tequeyo, nequelfis cojcultzi: “Ye temetzperdonörfe motlajtlacul”, o noso nequelfis: “Xemiehua hua xenejneme”?

²⁴ Pos öxö nenquematesque que naja que onochi netlöcatl necpea deriecho necö ipan tlöltecpectle para necperdonörus tlajtlacule.

Quelfejque cojcultzi:

—Taja temetzelfea: Xemiehua. Xecöna motlapech, hua xebeya pa mochö.

²⁵ Hua sa nima omoquetz imixtla yejua. Oconö tli ipa obetzötöya, hua uya ca ichö, tiechamöjtöya Deus. ²⁶ Hua quetietzöbejqe innochie, hua tiechamöjqe Deus, hua omomajtejqe. Oquejtojque:

—Otequejtaque söstantle tietzöbetl öxö.

Jesús oquenutzque Leví

²⁷ Hua sötiepa de ini nönca söstantle oquixoac, hua oquejtaque sente tlanecheco itucö Leví. Oyehuataya cöne yaja caresibirojtaya tomi. Hua Jesús oquelfejque:

—Xeniechtoca.

²⁸ Pos oquecö noche söstantle, omoquetztie, hua otietocac.

²⁹ Oquechi Leví meyac tlacuale ompa ichö. Hua lalebes meyactie tlanechecojqe hua ocseque giente ompa oyejyeya ipa miesa ca yejuantzetzí. ³⁰ Hua inu fariseos hua tlamachtioneme de teotlajtule moquejöröjqe ca tiemachtejcöhua. Quejtoöya:

—¿Tlica nentlajtlacua hua nencojcone inca tlanechecojqe hua ocseque tlajtlacul-teque?

³¹ Onöhuatihuac Jesús, oquemelfejque:

—Öque amo mocoj cocoa amo quenesesitöroa mierco, tlöcamo sa öque mococoa, yaja quenesesitöroa. ³² Amo onehuöla onequennutzaco tli yecteque, cache nequennutzaco tlin tlajtlacul-teque para ma moyulcuepacö.

Otlajtlanque tlica amo tlajyubea tiemachtejcöhua de Jesús

³³ Hua otieyelfejque:

—Imachtejcöhua de Xohuö tlajyubea meyacpa hua quechihua netlajtlötlajtelestle, hua ejqueu nuyejque quechihua inmachtejcöhua de fariseos. Pero momachtejcöhua tlajtlacua hua tlajtlayi.

³⁴ Jesús quemelfejque:

—¿Cuale nenquenchihualtisque tli nejnieneme ipa nesohuajtiluyo ma tlajyubicö, cuöc montle intlanca? Pos amo. ³⁵ Pero huölösque tunalte cuöc montle ayecmo oncöyes. Cuöquenuju tunalte tlajyubisque. Ejqueu cuöc naja ayecmo oncö neyes, tlajyubisque nomachtejcöhua.

³⁶ Hua nuyejque quemelfiloöya sente ejiemplo:

—Nionöque amo quetzomunea sente tzotzomajtle yancuec para quetlamanelis ipa sente tzotzomajtle soltec. Pues tlö ejqueu, ye otzomu inu tzotzomajtle tlin cuale, hua inu pieröso yancuec amo cuale mocöhua ca tzotzomajtle soltec. ³⁷ Nuyejque nionöque amo quetlölea vino yancuec ijtec puxajme de cuetlaxtle tli ye solteque. Pues tlö ejqueu, inu vino yancuec quetzomunis inu cuetlaxtle. Nununquebes vino hua puxajme niem-polebisque. ³⁸ Cache cuale vino yancuec quepea que motlölis ijtec puxajme yancueque. ³⁹ Hua nionöque öque cone vino tli ye soltec, ayecmo queneque conis tli yancuec. Pos quejtoa: “Tli soltec lalebes cuale icaca”.

6

Tiemachtejcöhua de Jesús cualcopintöya meyöhuatl

¹ Hua omochi ipan söbron tunale, cuöc quepeaya costumbre de mosiebiöya joriojte, que opanoac yejuatzí cöneca tlatuctle. Tiemachtejcöhua cualcopintöya meyöhuatl. Quex-acualoöya ca inmöhua, hua entunses quecuöya. ² Pero seque fariseos oquemelfejque:

—¿Tlica nenquechihua tli amo conbenierebe ma mochihua ipan söbron tunale?

³ Hua onöhuatihuac Jesús, oquemelfejque:

—¿Ayec nenquetlajtul-tejqe ini nönca, tli oquechi David ca tiehua tli oyejyeya ca yaja, cuöc oteosejtaya? ⁴ Pos yaja ocalac ipa tietepa Deus, hua ucö inu pöntzi tli oyeya de

bentle, hua oquecua, hua oquenmacac tli ca yaja oyejyeya. Ejqueu oquechi mös amo conbenierebe öque ma quecua tlöcamo sa yejua teopexcötzetzi.

⁵ Hua quemelfiloöya:

—Naja que onochi netlöcatl necpea deriecho para nequennahuatis giente de tli söstantle conbenierebe ma quechihuacö pan söbron tunale cuöc tosiebea.

Sente tlöcatl quepeaya imö huajque

⁶ Hua omochi nuyejque ipa ocsente söbron tunale, que yejuatzi calacoac ijtec teopanconetzi hua tlamachtילוöya. Ompa oyeya sente tlöcatl tli quepeaya imöyecmö huajque.

⁷ Hua tietetzaya inu tlamachtioneme de ley hua fariseos, abier tlö beles tlapajtilus ipan söbron tunale. Pos quenequeya tietieyelfisque. ⁸ Cache yejuatzi quematiloöya tli quepensöroöya yejua. Oquelfejque inu tlöcatl öque quepeaya imö huajque:

—Xomoquetza hua xehuöla tlanepantla.

Hua yaja omoquetz hua ohuöla. ⁹ Entunses Jesús oquemelfejque:

—Nemiechtlajtlanes ini nönca: ¿Conbenierebe öque quechihuas tlin cuale, noso öque quechihuas tlin amo cuale ipan tunale cuöc tosiebea? ¿Conbenierebe öque quemöquextis inemeles ocsente, noso queniempolus?

¹⁰ Hua quemetzalutaya innochie. Entunses oquelfejque inu tlöcatl:

—Xecmelaso momö.

Hua yaja ejqueu oquechi, hua imö opajtec. ¹¹ Hua yejua cache lalebes otlajtlabielmejqe. Hua monojnunuzaya yejua de tli tiechibelisque Jesús.

Jesús quemixpejpenque majtlactle huan ume tlöca

¹² Hua omochi ipa inu niecate tunalte, que biloac ipan tepietl netlajtlötlajtiluto. Noche seyohual opanoac netlajtlötlajtilutaya tieca Deus. ¹³ Hua cuöc ye omochi ca tunale, oquennutzque tiemachtejcohua, hua oquemixpejpenque majtlactle huan ume de yejua. Ini nöncate nuyejque oquencuitejqe tlateotitlanme. ¹⁴ Hua yejua ini nöncate: yaja Semu öque Jesús oquecuitejqe Piero, hua Andrés icni, Jacobo ca tiehua Xohuö, Felipe hua Bartolomé, ¹⁵ Mateo, Tumös, Jacobo iconie Alfeo hua Semu öque mocuitiöya Celador, ¹⁶ Judas iconie Jacobo, hua Judas Iscariote, öque nuyejque tieantrecöro.

Jesús quenmachtejqe hua quenpajtejque meyac giente

¹⁷ Hua obiloac ca yejua, hua onequetzaluc cöne tlölmanale. Meyactie tiemachtejcohua, hua lalebes meyac giente de noche estado de Judea hua de ciudad de Jerusalén, hua de inu tlölte itech lamör itlac puieblos de Tiro hua Sidón, noche ini nöncate ohuölajque para tiecaqueco, hua para mopajtisque de noche incocoles. ¹⁸ Nuyejque noche tli quepeaya tiecoco por moxicoöneme opajteque. ¹⁹ Hua noche giente quenequeya siquiera tiemötocasque. Pos quisaya de tietech yejuatzi checöhualestle tli quenpajtiöya innochie.

Öquemeju cuale imecnupel noso amo cuale

²⁰ Hua ajcopatlachealuc, hua oquemejqe tiemachtejcohua. Entunses oquejtojqe: —Cuale nemocnupel nemejua tli nenporubejte, pues nenquepea pörte cöne Deus tlamandöruro.

²¹ Cuale nemocnupel tlin öxö nentejteosebe, porque nenixbesque.

’Cuale nemocnupel tli öxö nenchojchuca, porque sötiepa nenbiebetzcasque.

²² Cuale nemocnupel iyes cuöc noche tlöca nemiechtlajjelejtisque hua cuöc nemiechtojtocasque para ayecmo tli quepeasque ca nemejua, hua cuöc nemiechpöpöcasque, hua quetlajjelejtisque hasta nemotucöyo, hua ejqueu quechihuasque ipampa nenniechtoca naja öque onochi netlöcatl. ²³ Xepajpöquecö ipa inu nieca tunale, hua lalebes xecpeacö meyac pöquelestle; pues cache bieye iyes inu premio tli nenqueselisque. Pos ejqueu nuyejque inbiebetcöhua de inu giente quenchiebejqe inu tlayulepantejqe.

²⁴ Cache jporube de nemejua tli nenricojte! Pues ye nenqueselejque nemopajpöqueles.

²⁵ ¡Porube de nemejua tlin nenijxbetecate! Pues nemejua nenteosebesque.

¡Porube de nemejua tlin öxö nenbiebetzca! Pues nemejua nenchojchucasque lalebes.

²⁶ ¡Porube de nemejua cuöc noche giente nemiechyectioniehuasque! Pues ejqueu inbiebetcöhua quenyectioniehuaya inu tlayulepantejqe istlacateque.

Ma tequentlasojtlacö toenemigos

²⁷ 'Cache nemiechelfea nemonochtie tli nenquecaque: Xequentlasojtlacö nemoenemigos. Xequenchibelicö tlin cuale quiejquech nemiechtlayjeleja.

²⁸ Xequenteochihuacö quiejquech nemiechtlabelbicaltea. Hua xomotlajtlötlajticö por öque nemiechchibelea tli amo cuale. ²⁹ Tlö quejtus canajyeca metzmacas ipa moxöyac de momöyecmö, xejcöhua nuyejque ma metzmaca de ocsie löro. Öque metzcuejcuellis mosaröpe xejcöhua ma quebica nuyejque mocamixa. ³⁰ Öque metztlajtlanelis canajyetla, xecmaca. Hua öque cönas tli mohuöxca, ayecmo xetlajtlane. ³¹ Hua quiene nenqueneque ma nemiechchibelicö giente, ejqueu nuyejque xequenchibelicö nemejua.

³² 'Tlö nenquentlasojtla sa öque nemiechtlasojtla, ¿tli cualejtelestle nenquepea? Pues nuyejque tlin tlajtlaculteque quentlasojtla öque quentlasojtla. ³³ Hua tlö nenquenchiebelea tlin cuale öque nemiechchibelea tlin cuale, ¿tlin cualejtelestle nenquepea? Pues tlajtlaculteque nuyejque ejqueu quechihua. ³⁴ Hua tlö nenquentlatlaniejtea sa inu niecate de öque nenquechea que nemiechmacasque ocsajpa, ¿tlin cualejtelestle nenquepea? Pues tlin tlajtlaculteque nuyejque quentlatlaniejtea ocseque tlajtlaculteque, cuöc quemate ocsajpa cönasque iguöl tönto. ³⁵ Xequentlasojtlacö, noso, nemoenemigos, hua xequenchibelicö tlin cuale ca innochtie. Hua xetietlaniejticö, hua amo xeccheacö ma nemiechcuelicö canajyetla de tli nenquetietlaniejtea. Ejqueu nenquepeasque bieye nemopremio, hua ejqueu nieses que melöhuac nencate nentiepelhua de öque bieyetzintle lalebes iloac. Pues yejuatzi iloac cualtec hasta ca quiejquech amo tlatlasojcömate hua quiejquech amo cualteque. ³⁶ Xomotlöocolticö noso de giente, quieme nuyejque toTajtzi netlöocoltilo.

Majcama tequemestlöcucö ocseque

³⁷ 'Amo xetlaestlocucö, pues ejqueu amo nemiechestlöcusque. Amo xequencuntenörucö ocseque, hua amo nemiehcuntenörusque Deus. Xetlaperdonörucö, hua nemiechperdonörusque. ³⁸ Xectiemacacö, hua nemiechmacasque. Xectiemacacö meyac, hua quetzintelaquisque hua queyectiemitisque almu cuöc nemiechmöpiqueltisque. Pues san quiene nenquentemachibelea ocseque giente, ejqueu nuyejque nemiechtemachibelisque.

³⁹ Hua quemelfiloöya sente ejiemplo. Oquejtojque:

—Sente ixcocoxque ¿cuale queyecönas ocsente ixcocoxque? Pues amo. Pues innehua betsesque ijtec coyocle. ⁴⁰ Sente machtejqe amo cache bieye momajtas que imaestro. Pero cuöc ye omomachte intiero cuale, entunses iy es quiename imaestro. ⁴¹ Hua taja ¿tlica tequejtelea tlasolconetzi ijtec ixtelolo mocni, hua amo tomojtelea cuabetl bieye tli taja mismo tecpea ijtec mixtelolo? ⁴² ¿Quiene noso tequelfis mocni: “Nocni, xomocöhua ma temetzquextele inu tlasole tli tecpea ijtec mixtelolo”, mientras taja amo tequejta inu cuabetl ijtec mixtelolo? ¡Sa ume moxöyac! Xejquexte cachtö inu cuabetl de ijtec mixtelolo taja, para que ejqueu cuale ye tequejtas hua cuale tejquextelis inu tlasole tli ijteja ixtelolo mocni.

Ixmacheste cuabetl por ifruto

⁴³ 'Pues amo onca sente cuabetl cuale tli quietiemaca ifruto hua ma iye palönque. Nimpor sente cuabetl tli amo cuale abele quietiemacas ifruto cuale. ⁴⁴ Pues cöra sente cuabetl mixomate por ifruto. Pues amo mocuejcue icox de itech betztle, nimpor amo mocuejcue capole de itech bechöche. ⁴⁵ Sente tlöcatl cualtec quemalfea lo que tlin cuale ipa iyulo, hua cuöc tlajtlajtoa quequextea inu söstantle tlin cuale de ipa iyulo. Hua sente

tlöcatl amo cualtec quemalfea sösantle tlin amo cuale ipa iyulo, hua cuöc tlajtlajtoa quequextea de inu sösantle tli amo cuale. Ipampa lo que tli öque quejtoa ca icamac quisa de inu meyac sösantle tli quetiemitea iyulo.

Ume tlöca oquechejchijque cale

⁴⁶ ¿Tlica nenniechcuitea, “Tlöcatzintle, Tlöcatzintle”, pero amo nenquechihua lo que tli nemiechelfea? ⁴⁷ Noche nieca öque yebitz noca, hua niechcaque notlajtul, hua quechihua, naja nemiechelfea quiename öquenu icaca. ⁴⁸ Icaca quiename sente tlöcatl tli oquechejchi sente cale. Otlatac bejcatla, hua oquetlöle cimientito itech tepetlatl. Hua oyejcoc ötzintle, hua inu ötzintle oquemagac checöhuac inu nieca cale, cache abele nimpör cuoline, porque omochejchi cuale. ⁴⁹ Cache öque quecaque tlajtule hua amo quechihua, icaca quiename sente tlöcatl öque oquechejchi cale ipan tlöle, hua amo oquetlölele icimientito. Ini nönca oquemagac checöhuac ötzintle, hua sa nima obetz. Hua omochi bieye tlaniempolebelestle de inu nieca cale.

7

Jesús quepajtejque itlatequepano de sente capetö

¹ Hua cuöc oquetlamejque noche nöncate tlajtulme hua ye oquecac noche puieblo, ocalacoac ipa inu puieblo de Capernaum. ² Hua ompa mococoöya hua ye oyeya para meques itlatequepano de sente capetö. Hua inu capetö lalebes quetlasojtlaya. ³ Hua cuöc oquecac de Jesús, oquentitla tieca yejuatzí seque biebertzetzi de joriojte, ma tietlötlajticö ma hualbiloa hua ma quepajticö itlatequepano. ⁴ Hua cuöc ohuölajque yejua tietlac Jesús, tietlötlajtejque lalebes. Otieyelfejque:

—Ini nönca tlöcatl quemeresieroa ma xomopaliebele ejqueu, ⁵ pues yaja quetlasojtla tonación, hua yaja hasta otiechchejchibeles sente teopanconetzi.

⁶ Hua Jesús obiloac ca yejua. Cache cuöc ye onaxihuataya para ca ichö, oquementitla capetö ca yejuatzí seque iamigos. Otieyelfejque:

—Tlöcatzintle, amo xomopasolojtzino para tehualmobicas, pues amo necmeresieroa para tomocalaquís ipa nochö. ⁷ Pues por inu nimpör amo necpensöro nehuölös mocatzinco. Cache sa xomojtalfe inun tlajtule, hua notlatequepano pajtes. ⁸ Pues naja nuyejque necpea que nosujetörus para nequenneltocas tli cache quepea autoridad que naja. Hua nuyejque nequenpea soltöröjte tli niechneltoca. Hua tlö nequelfea sente: “Xebeya niepa”, yaja iya. Hua tlö nequelfea ocsente: “Xehuöla”, yaja yebitz. Hua tlö nequelfea notlatequepano: “Xecchihua ini”, pues yaja quechihua. Ejqueu necasojcömäte que tejuatzí tomopilea checöhuallestle para tomopajtelis notlatequepano ca sente tlajtule.

⁹ Cuöc oquecajque Jesús ini nönca sösantle, oquetietzöbejque de inu capetö. Onecuepaluc, hua oquemelfejque giente tli tietocaya:

—Nemiechelfea que nimpör inca giente de Israel amo onecniexte tönto lalebes meyac neltoquelestle quiename quepea ini nönca tlöcatl, mös amo de Israel icaca.

¹⁰ Hua cuöc omocuejque ca ipan chöntle tli quenhualentitla, oqueniextito inu tlatequepano ye pajtec.

Jesús queyulebitejque iconie sente icnusohuatl ipa puieblo de Naín

¹¹ Hua omochi sötiepa que yejuatzí obiloac ipa sente puieblo itucö Naín. Oyöya ca yejuatzí tiemachtejcohua hua meyactie ocseque giente. ¹² Hua cuöc axihuato itlac entröda de inu puieblo, ye ompa quequextejtöya sente mejque. Hua inöntzi mejque oyeya icnusohuatl, hua sa inu isente conie quepeaya. Oyejyeya ca yaja meyac giente de inu nieca puieblo. ¹³ Hua cuöc Tlöcatzintle oquejtaque inu sohuatl, otietlöocolte por yaja. Oquelfejque:

—Amo xechuca.

¹⁴ Hua onepachuluc, oquemötocaque cuajcöxa. Tli oquebicaya omoquetzque. Hua oquelfejque mejque:

—Pelalactle, naja temetzelfea, xemiehua.

¹⁵ Yecuöquenu omie öque ye oyeya mejque, hua opie otlajtlajto. Hua Jesús oquemöctejque inöntzi. ¹⁶ Hua innochie omomajtejque, hua tiechamoöya Deus. Quejejtöya:

—Sente tlayulepante lalebes bieye iloac entre tejua. Nuyejque quejtojque:

—Deus ohualiloac para quenpaliebisque tiegiente.

¹⁷ Hua omacheac de ini nönca ipa noche tlöle itlac Naín, hua ipa noche tlöle de joriojte.

Xohuö Bautista comentitla imensajeros ca Jesús.

¹⁸ Hua imachtejcöhua de Xohuö oquelfejque de noche ini nönca sösantle. Hua oquenutz Xohuö unte de imachtejcöhua. ¹⁹ Oquentitla tieca Tlöcatzintle. Oquemelfe ma tietlajtlanite: “¿Tejuatzi tomobetzteca inu nieiloac öque hualiloasquea, o noso tetiecheasque ocsietzi?” ²⁰ Hua cuöc inu tlöca ohuölajque tieltac Jesús, otieyelfejque:

—Xohuö Bautista tiechhualtitlanque mocatzinco. Otiechelfejque ma temetzmotlajtlanelicö ejqueyi: “¿Tejuatzi tomobetzteca inu nieiloac öque hualiloasquea, o noso tetiecheasque ocsietzi?”

²¹ Mientras yejua ompa oyejyeya, Jesús oquenpajtejque meyac giente tli quepeaya colestle, noso tiecoco, noso moxicoöneme. Hua meyactie ixcocoxcötzetzi oquenpajtejque para ontlachixque. ²² Entunses onöhuatihuac Jesús, oquemelfejque:

—Keyöcö hua xecmachesticö Xohuö de tli sösantle nenquejtaque hua nenquecajque, quiene ixcocoxcötzetzi tlajtlachea, cucuxojtsetzi ye nejneme, tli sa söhuayojque pajpajte, tzatzatzetzi tlajtlacaque, mimejque yojyulebe, hua porubetzetzi quecaque cuale tlamachestelestle. ²³ Hua cuale icnupel öque amo quepoloa ineltoqueles por nopampa.

²⁴ Hua cuöc ye uyajque inu mensajeros de Xohuö, Jesús opiehualuc quennunutzaloöya giente acerca de Xohuö. Oquejtojque:

—¿Tli nenquejtato ompa cöne nionöque chönte? ¿Beles oyeya sente ohuatl que ca nobeyo cuoliniöya yejyecatl? Amo. ²⁵ Cache, ¿tli nenquisque nenquejtato? ¿Beles sente tlöcatl tli motlaquentiöya ca tlin cuale tlaquentle? Amo. Xequetacö, que niecate tli motlaquentea ca tlin cuöcualtzi intlaquie, hua neme ca noche tlin quenmaca pöquelestle, yejua ipa ichö de sente rey neme. ²⁶ Cache ¿tli nenquisque nenquejtato? ¿Beles sente tlayulepante? Quiema, hua nemiechelfea que cache que sente tlayulepante icaca.

²⁷ Pues yaja ini nönca Xohuö de öque tlajcuelulpanca:

Necö nectitlane notlatitlantle mixpa,

ma quemejmelöhua moojfe mixpa.

²⁸ Nemiechelfea que entre innochie tlöca, ayec otlöcat ocsente ma cache bieye momajta que Xohuö. Cache öque lalebes tzitzequetzi cöne Deus tlamandöruro cache bieye ica que Xohuö. ²⁹ Hua noche giente hua tli tlanechecojque, cuöc oquecajque itlanunutzales de Xohuö, oquejtojque que de melöhuac iloac yectec Deus, hua omocuötiequejque ca inu tlacuötiequelestle de Xohuö. ³⁰ Cache inu fariseos ca tiehua tlajmatque de inu ley de Moisés amo oquenejque lo que tli Deus quenequiuhaya para yejua, pues amo omocuötiequejque ca Xohuö.

³¹ Entunses ¿ca tli nejcomparörus nönca giente de nönca tiempo? ¿Öque sabele cate? ³² Cajcate quiename pelalacme tli motlajtlölea ipa plösa para majöbeltisque, hua motzajtzajtzelea seque ca ocseque. Quejetoa: “Amo nemajöbeltea cuale. Pos tejua tontlapitzque ca tlapitzale para ma xomojtuticö, pero amo nemojtutejque. Otechuquescuejcuicaque, pero amo nenquenejque nenchojchucaque”. ³³ Pues ye ohuöla Xohuö Bautista, que tlajyubiöya, hua amo coniya vino, hua nenquejtoa: “Quepea demunio”.

³⁴ Onehuöla naja öque onochi netlöcatl, que netlacua hua necone, hua nenquejtoa:

“Xequejtacö necö sente tlöcatl lalebes tlacuöne hua tlöhuönque, hua lalebes cuale mobica ca tlanechecoique hua ocseque tlöca tlajtlaculteque”.³⁵ Pero noche giente tli tlajmatque momacasque cuienta que toconchijque tlin tlajmatque.

Jesús queperdonörojque sente sohuatl tlajtlacultec

³⁶ Hua sente de inu fariseos oquenec ma tlacualute Jesús ca yaja. Hua ocalacoac ipa ichö de inu fariseo, hua onetlöliluc para tlacualus. ³⁷ Hua oyeya ipa inu puieblo sente sohuatl tli oyeya tlajtlacultec lalebes. Cuöc yaja ocaojcömat nele ye tlacualoöya pa ichö de inu nieca fariseo, oquehualecac sente potixajconetzi de alabastro tli quepeaya pajtle ajfeyoc. ³⁸ Hua omoquetz ca tiecuetlapa ca tieicxetla, hua ochucac lalebes. Otieicxepaltele ca ixöyu, hua tiepojpoöya ca itzo. Quenpetzoöya tieicxehua hua ipa quetlölöya inu pajtle ajfeyoc. ³⁹ Hua cuöc oquejtac ini nönca inu fariseo öque tielalfe, oquejto ijtecopa: “Ini nönca tlöcatl, tlö melöhuac oyene sente tlayulepante, quematesquiöne öquenu quemajmötoca hua tli clase de sohuatl icaca, pues icaca tlajtlacultec”.

⁴⁰ Entunes onöhuatihuac Jesús, oquelfejque:

—Semu, necpea tlimach para temetzelfis.

Hua yaja oquejto:

—Xomojtalfe, Maestro.

Jesús oquelfejque:

⁴¹ —Unte tlöca quetietlabiquelejtaya ca sente tlöcatl que tielacueltea tomi. Sente quetiebiquelejtaya quinientos pesos, hua inu ocsente sa cincuenta. ⁴² Hua amo quepejpeaya tli ica quecuelpelisque. Entunes inu tlöcatl oquenperdonörfe innehua. ¿Öquenu de innehua noso quetlasojtlas cache?

⁴³ Hua onöhuat Semu, oquejto:

—Necnenebelea que öque queperdonörfe cache meyac.

Hua yejuatzi oquelfejque:

—Melöhuac otequejtac cuale.

⁴⁴ Hua onecuepaluc ica sohuatl. Oquelfejque Semu:

—¿Tequejta ini nönca sohuatl? Naja onecalac ipa mochö, hua amo teniechmacac ötzintle para nocxehua. Cache ini nönca ocajfeche nocxehua ica ixöyu, hua oquenpojpu ca itzo. ⁴⁵ Nimpör amo oteniechmacac petzule, cache ini nönca, desde cuöc onecalac, quesequiroa quepetzojteca nocxehua. ⁴⁶ Amo teniechajalöbele ipa notzonteco nion ca oleo, cache ini nönca ocajalöbele nocxehua ca pajtle ajfeyoc. ⁴⁷ Hua por inu temetzelfea que cuale tequejta que ye omoperdonöro inu meyac tlajtlacule tli oquechi, pues niechtlasojtla lalebes. Cache öque amo bel meyac itlajtlacul tli omoperdonöro, amo bel tietlasojtlane.

⁴⁸ Hua oquelfejque sohuatl:

—Ye omoperdonöro motlajtlacul.

⁴⁹ Hua inu giente tli ompa tlacuöya ca yejuatzi opiejqque quejtoa imijtecopa: “¿Öquenu ini nönca tlöcatl que nuyejqque tieperdonörfea tlajtlacule?”

⁵⁰ Pero Jesús oquelfejque sohuatl:

—Por tomoneltocac ye otomomöquexte. Xebeya ca cuale.

8

Seque sohuame tiepaliebiöya Jesús

¹ Hua sötiepa de inu, yejuatzi biloatenemeya ipa ciudades hua puieblos. Tlanunutzalutenemeya hua quemelfiloöya giente de inu cuale tlamachestelestle de quiene Deus tlamandöruro. Hua inu majtlactle huan ume tiemachtejcöhua oyöya ca yejuatzi. ²⁻³ Hua seque sohuame tli opajteque de moxicoöneme hua de sösantle cocolestle nuyejqque oyöya tieinca, hua tieinpaliebiöya ca lo que tli quepejpeaya. Entre yejua oyeya María tli

mocuitiöya Magdalena porque oyeya de puieblo de Magdala. Pos checume demunios oquisque de ijtec María. Nuyejque oyeya Xohuana, öque oyeya isohua de Chuza, inu maortumo de inu rey Herodes. Nuyejque oyeya Susana, hua ocseque meyactie sohuame.

Cuiento de sente tlöcatl tli tlatucato

⁴ Hua omosentlölejque meyac giente. Ohuölajque de ipa noche puieblos tietlac yejuatzi. Entunses otlajtlajtuluc por medio de sente cuiento. Oquejtojque:

⁵ —Sente tlöcatl oquis oquetucato xenöchtle. Hua cuöc quecuasemanaya hua tlatucataya, seque obetz ipa ojtle. Giente ipa moquetzque hua tutume tli patlöne ipa yejyecatl oquecuajque. ⁶ Ocseque obetz icpac teme. Cuöc oquis, sa nima uhuöc, ipampa amo quepeaya cuechöhualutl. ⁷ Hua ocseque obetz itzölö betztle. Omobepö tlatuctle ca tiehua betztle, hua betztle oquepöztmecte. ⁸ Hua ocseque obetz ipan cuale tlöle. Omobepö, hua tlamochihualte hasta sie sientos töntos.

Hua cuöc oquejtojque ini nönca sösantle oquejtojque checöhuac:

—Öque quepea itlacaqueles para tlacaques ma tlacaque.

Tlica Jesús cusörojque cuientos

⁹ Hua tiemachtejcohua otietlajtlaneliöya tli quejtusneque inu cuiento. ¹⁰ Hua yejuatzi oquejtojque:

—Nemejua nemiechtocöroa nenquematesque inu secretos de quiene ca tlamandörurus Deus. Pero inu ocseque sa nequenmachtea ca cuientos para mös tlacheasque amo quejtasque, hua mös quecaquesque amo casojcömatesque.

Jesús quesplícörojque inu cuiento de tlöcatl tli tlatucato

¹¹ 'Yaja ini nönca tli quejtusneque inu cuiento. Inu xenöchtle yaja tietlajtultzi Deus. ¹² Hua tli obetz itienco ojtle, yejua cate giente tli quecaque teotlajtule, hua yebitz Diöblo, hua quejcuenea tlajtule de ipa inyulo, para majcamo moneltocacö hua majcamo momöquexticö. ¹³ Hua tli obetz ipan teme, yejua cate giente tli ye oquecajque, hua cöna tlajtule ca pöquelestle. Pero pasörebe que tlajtule amo monelhuayutea imijtec. Pues por sie röto monejneltoca, pero cuöc impa yebitz tequepachule, ayecmo quesequiroa. ¹⁴ Hua xenöchtle tli obetz itzölö betztle, yejua cate giente tli oquecajque, cache cuöc uyajque, motequepachoa por ocseque sösantle, hua quietiemoa ricojyutl hua sösantle cualtzetzi de tli onca ipa nönca nemelestle, hua inu sösantle quieme cana quepöztmecta tlajtule. Por inu amo mobepöhua cuale inu xenöchtle, hua tlajtule amo quepea iresultödo cuale inca yejua. ¹⁵ Cache tli obetz ipan cuale tlöle, yejua cate giente tli quepea tlin cuale inyulo hua melactec. Yejua, cuöc quecaque tlajtule, quemalfea, hua quesequiroa quechijtecate de noche tlin cuale tlachihuale.

Noche tli mojoynteca sötiepa nieses

¹⁶ 'Cuöc canajyeca quexutlaltea sente cantil amo quetlapachoa ca sente cumetl, o noso amo quetlölea itzintla tlapechtle. Cache quetlölea ipa canteliero, para ejqueu innochie tli calaque ijtec cale ma quejtacö tlöbile. ¹⁷ Pos noche tli mojoynteca nieses sötiepa. Hua noche tli sa ichtacajtzi sötiepa ixnieses hua macheas. ¹⁸ Xecpeacö cueröro noso quiene nenquecaque. Pos tiel öque quepea, quemacasque cache meyac. Pero öque amo bel quepea, inu nieca quequextelisque hasta inu tepetzi tli quepensöroa que oc quepea.

Tienönajtzi hua tieicnihua Jesús

¹⁹ Tienönajtzi hua tieicnihua ohuölajque tieca Jesús hua abele onaseya hasta tietlac ipampa lalebes meyac giente. ²⁰ Hua giente otieyelfejque:

—Monönajtzi ca tiehua mocnijtetzihua cate ca queyöhuac. Quenejneque metzmojtetisque.

²¹ Hua yejuatzi oquennönquelejque, oquemelfejque:

—Nonöna hua nocnihua yejua niecate tli quecaque tietlajtultzi Deus, hua quechihua tli quemelfea.

Jesús cajajuaque öyejyecatl hua omoquetz

²² Hua omochi que sie tunale ocalacoac ijtec sente börco yejuatzi ca tiehua tiemachtejcohua. Oquemelfejque:

—Ma tepanucö ca nie löro de ötiescatl.

Hua obejbiloac. ²³ Cache mientras bejbiloaya, yejuatzi ocochihuatöya. Hua ohuölajtequis sente yejyecatl checöhuac ipa inu nieca ötiescatl. Hua inbörco otiemeya de ötzintle, hua ye miero pötzcalaqueya. ²⁴ Hua omopachojque tiemachtejcohua hua otieixetejque. Otiyelfejque:

—¡ToTlöcatzi, toTlöcatzi, temequesque!

Yecuöquenu niehualuc. Cajajuaque öyejyecatl ca tiehua ötzintle tli majcoqueya ca tlabiele. Hua omoquetz por completo hua tlacacta. ²⁵ Hua oquemelfejque:

—¿Tlica amo nemoneltocaque?

Hua yejua omajcömejque, hua oquetietzöbejque. Omolfiöya sie yejua:

—¿Öqueniji, noso? Pos hasta yejyecatl hua ötzintle quennahuatilo, hua tieneltoca.

Sente tlöcatl geraseno quepeaya moxicoöne

²⁶ Hua onajaxihuato intzölö giente de puieblo de Gerasa. ²⁷ Hua cuöc ye oquixoac de börco hua ohualiloac ca ipan tlöle, sente tlöcatl de inu puieblo que quepeaya demunios ohualie tienömequeco. Ye quepeaya meyac tiempo amo tli möquiöya, nimpör amo chönteya ijtec cale, cache chönteya ipa camposönto. ²⁸ Ini nönca, cuöc otieyjetac Jesús, otzajtzec checöhuac hua omopechtiecatö tieixtla. Oquejto ca checöhuac tlajtule:

—¿Tli tomopilea ca naja, Jesús, tieConietzi Deus bieyetzintle? Temetzmotlötlaitelea amo xeniehmococolfe ica tiecoco tietunie.

²⁹ Pues yejuatzi ye quenahuatilitaya ma quisa moxicoöne de inu tlöcatl. Pues ye meyacpa quepasöroöya inu tlöcatl que moxicoöne quequitzquiöya. Giente quetzajtzacuaya hua quejilpiöya ca carienajte ipa icxehua hua imöhua. Pero yaja quecocotunaya tli ica quejilpiöya, hua inu demunio quechihualtiöya ma beya ca cöne nionöque chönteya.

³⁰ Hua Jesús oquetlajtlanejque:

—¿Quiene tomotucö?

Yaja oquejto:

—Nocuitea Trupa.

Pues meyactie demunios ocalajque ijtecopa yaja. ³¹ Hua inu demunios tietlötlahtiöya majcamo quentitlanecö ipa inu llatecoyöbelespa bejcatla. ³² Hua ompa oyeya meyactie petzome tlajtlacuajtenemeya ipa inu nieca tepietl. Entunses inu moxicoöneme tietlötlaitejque ma quencöhuacö ma calaquecö imijtecopa de petzome. Yejuatzi oquencöjque. ³³ Entunses inu demunios quistiejque de ijtecopa tlöcatl hua ocalaqueto imijtecopa petzome. Cuöquenuju omomiemeröjque noche petzome motietepexebito hasta ijtec ötiescatl, hua ompa öijyumejque.

³⁴ Inu tlöca tli quentlajtlacualtejenemeya petzome, cuöc oquejtaque tli omochi, ochucholajtejque. Tlamachestito ipa puieblo hua ca caltienco. ³⁵ Pues oquisque giente oquejtato tli omochi. Hua ohuölajque tieca Jesús. Oqueniextito inu tlöcatl de öque itech oquisque demunios, que ye möquejtaya itzotzomajua, hua ayecmo lucojtec. Yehuataya tieicxetla Jesús. Pos yejua giente omomajtejque. ³⁶ Entunses yejua tli miero quejtaque lo que opasöre oquepujque, quiene pajtec inu nieca. ³⁷ Yecuöquenu noche inu niecate giente de puieblo de Gerasa hua de ocseque tlölte tli ca ompa itech, otietlötlaitejque ma biloa de ompa, ipampa lalebes momajtiöya. Hua yejuatzi ocalacoac ipa börco para onecuepaluc. ³⁸ Hua inu nieca tlöcatl, de öque ijtec oquisque demunios, otietlötlaite ma seme iye tietlac. Cache Jesús oquetitlanque ma beya. Oquelfejque:

³⁹ —Xomocuepa ca mochö, hua xecpoa noche tli bieye tlachihualestle oquechijque Deus ca taja.

Hua yaja uya, otlanunutzöya ipa noche inu puieblo de tli bieye tlachihualestle oquechijque Jesús ca yaja.

Ichpuch de Jairo hua inu sohuatl tli quemötocac tietlaquie Jesús

⁴⁰ Cuöc Jesús onehualnecuepaluc, otieselejque giente ca pöquelestle, pues innochie tiechixtaya. ⁴¹ Yecuöquenu ohuöla sente tlöcatl itucö Jairo, tlayecönque de teopanconetzi. Yaja omopehtiecac tieicxetla Jesús. Tietlötajtiöya ma biloa pa ichö. ⁴² Pos yaja quepeaya sa sente ichpuch, tli quepeaya quieme majtlactle huan ume xebetl. Ini nönca ye omectaya.

Hua cuöc yejuatzi biloaya ca ichö de Jairo, tiepötzoöya giente. ⁴³ Hua sente sohuatl ye mococoöya majtlactle huan ume xebetl de itlapalyeso. Ye oquecastöro noche itomi inca miercojte, hua nionöque abele oquepajte. ⁴⁴ Yaja oaseto ca tiecuetlapa Jesús hua oquemötocac itienco de tietlaquie. Hua nima omoquetz itlapalyeso. ⁴⁵ Jesús oquejtojque:

—¿Öquenu yaja oniechmötocac?

Innochie oquejtojque que yejua amo tiemötocaque. Entunses oquejto Piero:

—NoTlöcatzi, noche ini meyac giente metzmöpötzelfea.

⁴⁶ Hua Jesús oquejtojque:

—Yeca oniechmötocac. Pos onecmachele que oquis checöhualestle de notech para onetlapajte.

⁴⁷ Yecuöquenu, inu sohuatl omomacac cuenta que abele mojoyönas. Omopacho mös bebeyocaya lalebes, hua omopehtiecac tieicxetla. Hua oquepu imixtla noche giente tli ipampa otiemötocac, porque mococoöya, hua quiene sa nima opajtec. ⁴⁸ Yejuatzi oquelfejque:

—Nochpuch, por que tomoneltocac ye tepajtec. Xebeya ca cuale.

⁴⁹ Mientras yejuatzi oc tlajtlajtulutaya, ohuöla sente tlöcatl desde ichö de inu tlayecönque de teopanconetzi. Oquejto:

—Pos mochpuchtzi ye omec. Ayecmo xetiemotequemaquele nöiloac maestro.

⁵⁰ Pero Jesús oquecajque, hua oquenönquele:

—Amo xomomajte. Sa xomoneltoca, hua pajtes.

⁵¹ Hua cuöc axihuato ipa ichö, amo öque oquecöjque ma calaque tiehua tlöcamo sa yaja Piero, ca Jacobo, hua Xohuö, ca tiehua itajtzi hua inöntzi de inu sisehuanu. ⁵² Hua chojchucaya innochie giente, hua chuquestlajtoöya porque omec sisehuanu. Hua yejuatzi oquejtojque:

—Amo xechucacö. Pos amo omec, tlöcamo sa cochteca.

⁵³ Cache moburlörojque de yejuatzi, pues oquemajtaya yejua que ye omec. ⁵⁴ Pero yejuatzi caseque imö sisehuanu, hua oquenutzque. Oquejtojque:

—Sisehuanu, xemiehua.

⁵⁵ Hua inemeles omocuec, hua sa nima omie. Hua yejuatzi otlanhuatejque ma quetlamacacö. ⁵⁶ Pos itötajua quetietzöbejque. Pero yejuatzi quennahuatejque majcamo öque quemachesticö de tli omochi.

9

Jesús quentitlanque majtlactle huan ume llateotitlanme

¹ Hua yejuatzi oquennutzque inu majtlactle huan ume tiemachtejcohua ma mosentlöllicö. Oquenmacaque checöhualestle hua beletelestle para quenquextisque noche demunios, hua para quepajtisque cocolestle. ² Hua oquentitlanque ma tlanunutzacö de quiene tlamandöruro Deus, hua ma quenpajticö tlin cocoxcötzetzi.

³ Hua oquemelfejque:

—Amo tli xebicacö para pa ojtle, nimpör cuajfortu, nimpör morröl, nimpör tlaxcale, nimpör tomi, nimpör amo xebicacö unte tlaquieme. ⁴ Hua ipa tli beletes chöntle nencalaquesque, ompa xomocöhuacö hasta que de ompa nenquisasque. ⁵ Pero tlö seque giente amo nemiechselisque, cuöc nenquisasque de inu nieca puieblo xectzetzelucö noche tlöle de nemocxehua. Yaja inu xechihuacö para quematesque que amo cuale tli oquechijque yejua.

⁶ Hua yejua onyajque, hua yajyajtenemeya ipa noche puieblos. Tlamachestejtöya de inu cuale tlamachestelestle, hua tlapajtejtöya ca nobeyo.

Rey Herodes omotequepacho

⁷ Hua Herodes inu tetrarca noso rey oquemat de noche ini söstantle tli omochi. Hua yaja amo quemateya tli quejtus, ipampa quejejtöya seque que Xohuö ye oyule de intzölö mimejque. ⁸ Hua ocseque quejejtöya que inu tlayulepante Elías ye onhuöla ocsajpa, hua ocseque quejejtöya beles yeca ocsente tlayulepante de ca ye niepa ye oyule. ⁹ Hua oquejto Herodes:

—Pos Xohuö naja onejquehtec. ¿Öquenu noso iyas ini nönca tlöcatl, de öque nejcaque tönto meyac söstantle?

Hua quetiemoöya manera quiene tieyejtas Jesús.

Jesús quentlamacaque möcuile mil tlöca

¹⁰ Hua omocuejque tietlateotitlanhua. Tiepubelejque noche tli oquechijque. Hua yejuatzi obiloac ca tiehua yejua sa nencua ca ipa tlöle itlac inu puieblo itucö Betsaida. ¹¹ Pero inu giente omomacaque cuenta de cöne obiloac, hua otietocaque. Hua yejuatzi oquenselejque. Quennunutzque de quiene Deus tlamandöruro, hua quenpajtiloöya tlin quenesesitöroöya. ¹² Mientras otlameya tunale. Inu majtlactle huan ume tiemachtejchöhua omopachojque tietlac. Otieyelfejque:

—Xequenmotitlane giente ma yöcö pa puieblos hua pa rönchos hua ca ompa ma mocaluticö hua ma tlacuöcö. Pues amo öque chönte necö cöne tecate.

¹³ Hua oquemelfejque:

—Nemejua xequentlamacacö.

Oquejtojque yejua:

—Amo tecpea tlöcamo möcuile pöntzi hua unte mimechte. Hua abele tejcoatibe tejua tlacuale para noche ini nöncate tlöca.

¹⁴ Pos oyeya quieme möcuile mil tlöca. Yecuöquenu oquemelfejque tiemachtejchöhua:

—Xequemelficö ma motlajtlamachtlölicö ca grupos de tlötlajco sientos.

¹⁵ Hua ejqueu oquechijque, oquenchihualtejque ma motlölicö innochie. ¹⁶ Entuneses ocönque inu möcuile pöntzi hua inu unte mimechte. Ajcopatlachealuc ca elfecac. Oque-teochijque tlacuale hua oquecocototzque. Entuneses oquenmacaque tiemachtejchöhua para ma quentlacualticö giente. ¹⁷ Hua otlacuajque innochie, hua ijixbeque. Hua ocajcojque majtlactle huan ume chequejme de tli omocö cojcototec.

Piero oquejto que Jesús iloac Cristo

¹⁸ Hua sötiepa yejuatzi iloaya tiesiel netlötlajtilutaya. Tietlac oyejyeya tiemachtejchöhua. Hua oquentlajtlanejque, oquemelfejque:

—¿Öquenu quejtoa giente que naja necaca?

¹⁹ Hua yejua onöhuatque, oquejtojque:

—Pos seque quejtoa que Xohuö Bautista. Ocseque quejtoa nele inu tlayulepante Elías. Hua ocseque quejtoa que beles yeca ocsente tlayulepante de ca ye niepa ye oyule.

²⁰ Hua oquemelfejque:

—Hua nemejua, ¿öquenu nenquejtoa que naja necaca?

Yecuöquenu onöhuat Semu Piero, oquejto:

—Tejuatzi tomobetzteca teCristo, öque metzmixpejpenelejque Deus.

²¹ Cache yejuatzi oquennahuatejque hua oquenmandörojque majcamo öque quelficö ini nönca.

Jesús tlamachestiluc que mecoas

²² Oquejtojque:

—Conbenierebe que naja öque onochi netlöcatl ma necsufriro meyac söstantle, hua ma niechtlajyelejtacö biebentzetzi hua jefes de teopexcötzetzi, hua tlamachtioneme de teotlajtule. Niechmectisque hua ipa yeye tunale neyulebes.

²³ Hua quemelfiloöya innoctie:

—Tlö canajyeca queneques niechtocas majcamo quechihua lo que tli sie yaja queneque. Cache ma iye listo para quesufrirus cöra tunale quiename öque quesufriroa ipa sente corujtzi, hua ma niechtoca. ²⁴ Pos öque beletes queneques quemalfis inemeles, quixniempolus. Hua öque beletes quetiempacas inemeles nopampa, quemalfis. ²⁵ Pues ¿tli para serbirebes tlö sente tlöcatl quetlönes noche tlöltecpactle, pero polebes o noso ixniempolebes yaja mismo? ²⁶ Tlö sente tlöcatl pinöhuas de naja hua notlajtul, nuyejque naja que onochi netlöcatl nepinöhuas de inu tlöcatl cuöc nehuölös ca notlaniexteles hua ca tietlaniexteles de noTajtzi hua de öngeles tli yecteque. ²⁷ Hua melöhuac nemiechelfea, que seque de tli oncö nencate amo mequesque hasta senamo quejtasque quiene tlamandörurus Deus.

Jesús nechihualuc ocsie

²⁸ Hua quiename checuieye tunale sötiepa de que oquejtojque ini nönca tlajtule, ejqueyi omochi. Oquenbicaque Piero hua Xohuö hua Jacobo, hua otlejcoac ipa tepietl para netlajtlötlajtiluto. ²⁹ Hua mientras netlajtlötlajtilutaya, tiexöyac omocuec ocsie, hua tietzotzomajua omochijque istöque hua tzotzotlaca. ³⁰ Hua unte tlöca tlajtlajtoöya tieca. Yejua oyeya Moisés hua Elías. ³¹ Omoniextejque ca tlaniextelestle. Tlajtlajtuloöya de quiene yejuatzi ye miero mecoas ipa inu ciudad de Jerusalén. ³² Hua Piero hua icompanierojua lalebes cojcochesnequeya. Pero cuöc otlachixque, oquejtaque tietlaniexteles, hua quemejtaque inu unte tlöca tli oyejyeya tieca. ³³ Hua omochi que cuöc inu tlöca ye omoxeloöya de yejuatzi, Piero otieyelfe Jesús:

—NoTlöcatzi, cuale que oncö tecate. Ma tequenchejchihuacö yete cuajtlapame: sente para tejuatzi, hua sente para Moisés, hua ocsente para Elías.

Pos yaja amo quemateya tli quejtojtaya. ³⁴ Hua cuöc yaja quejtojtaya ini nönca, ohuöla sente mextle hua oquentlapacho. Yejua omomajtejque cuöc ocalajque ijtec mextle. ³⁵ Ohuöla sente tlajtule de ijtec mextle. Quejtoöya:

—Yaja ini nönca noConie, öque naja nequixpejpe. Yaja xejcaquecö.

³⁶ Hua cuöc opanuc inu nieca tlajtule, Jesús sa tiesiel otiejtaque. Hua yejua amo tli oquejtojque. Hua ipa inu niecate tunalte nionöque amo tli oquepubelejque de tli yejua oquejtaque.

Jesús quepajtejque sente pelalactle tli quepeaya moxicoöne

³⁷ Hua omochi ipa mustlateca, cuöc ye hualtejtemoac de ipa inu nieca tepietl, que meyac giente tienömequeto. ³⁸ Yecuöquenu otzajtzec sente tlöcatl de tli ompa oyöya. Oquejto:

—Maestro, temetzmotlötajtlelea xomojtele noconie. Pos sa yaja necpea. ³⁹ Hua xtele sente moxicoöne case, hua sa trepiente tzajtzetequisa. Hua moxicoöne quechihualtea ma checöhuac mimeque hua ma camapoposune. Hua amo quecöhua nima hasta que ye lalebes quecocojtiehua. ⁴⁰ Hua nequentlötajte momachtejtcötzetzihua ma quequexticö hua abele oquechijque.

⁴¹ Hua onöhuatihuac Jesús, oquejtojque:

—¡Ay! ¡Nentlöca que amo nemoneltoca hua amo nenquepensöroa lo que tli melöhuac! ¿Hasta quiema nemotlac neyes, hua necpeas que necxicojtas ca nemejua? Xejcualeca moconie necö.

⁴² Hua cuöc yaja mopachoöya, inu demunio oquechihualte pelalactle ma betze hua ma checöhuac mimeque. Cache Jesús ocajajuaque inu moxicoöne, hua quepajtejqe inu pelalactle. Oquetiemöcte ca itajtzi. ⁴³ Hua innoctie oquetietzöbejqe de quiene bieye lalebes iloac Deus.

Ocsajpa Jesús otlamachestejqe que mecoas

Pero mientras innoctie oquetietzöbejtaya de noche söstantle tli oquechijque yejuatzi, oquemelfejque tiemachtejcöhua:

⁴⁴ —Xejcaquecö cuale para nenquelnömectasque tli nemiechelfis: que naja que onochi netlöcatl niechtiemöctisque inmöpa tlöca.

⁴⁵ Cache yejua amo casojcömateya ini nönca tlajtule, pues Deus amo quenmachestejqe para que ejqueu abele ocasejcömatque. Hua quenmajtiöya tietlajtlanesque Jesús de ini nönca tlajtule.

¿Öquenu cache bieye momajtas?

⁴⁶ Yecuöquenu yejua motlötlajtlaniöya öque de yejua cache bieye momajtas. ⁴⁷ Cache Jesús oquematque quiene ca monenebeliöya ipa inyulo. Entunses ocaseque sente peltzintle, hua oquetlölejque tietlac. ⁴⁸ Oquemelfejque:

—Öque queselis notucöyupa ini nönca peltzintle nuyejque naja niechselea. Öque niechselea naja nuyejque tieselea yejuatzi öque niechhualtitlanque. Pos öque mochihuas cache tzitzequetzi nemotzölö nemejua, yaja inu nieca bieye momajtas.

Öque amo icaca cuntra nemejua ca nemejua icaca

⁴⁹ Yecuöquenu onöhuat Xohuö, oquejto:

—ToTlöcatzi, otequejtaque sente tlöcatl motucöyupantzinco quenquextiöya demunios. Pues inu nieca tlöcatl amo tiechtoca, hua por inu otequelfejque ma ayecmo quesequiro.

⁵⁰ Jesús oquelfejque:

—Amo xecchihuacö ejqueu. Pues öque amo icaca cuntra nemejua, ca nemejua icaca.

Giente de sente puieblo de estado de Samaria amo oquenejqe ma calacoa Jesús

⁵¹ Hua omochi que oaseco tiempo para ye miero tlejcoas tlacpac tieca Deus. Hua yejuatzi cache quenelchijque para biloas ipa ciudad de Jerusalén. ⁵² Hua oquentitlanque seque mensajeros ma yöcö delönte de yejuatzi. Yejua uyajque hua ocalajque ipa sente puieblo de estado de Samaria, para ompa queyejyectlölisque locör para yejuatzi.

⁵³ Pero giente de inu puieblo amo tieselejqe, ipampa quemateya que yejuatzi biloaya ca Jerusalén, hua giente de Samaria amo quencualejta joriojte. ⁵⁴ Hua tiemachtejcöhua Jacobo hua Xohuö, cuöc oquejtaque, oquejtojqe:

—Tlöcatzintle, ¿tomonequitea ma tetlanahuaticö ma betze tletzintle de elfecac para ma quenpojpolo?

⁵⁵ Yecuöquenu onecuctzinuc yejuatzi, hua oquemajajuaque. ⁵⁶ Hua obejbiloac ipa ocseite puieblo.

Seque giente quejtoöya que quenequeya tietocasque Jesús

⁵⁷ Hua omochi que cuöc obejbiloac yejuantzetzzi, sente tlöcatl otieyelfe:

—Naja temetzmotoquelis ca cöne beletes tomobicas.

⁵⁸ Hua Jesús oquelfejque:

—Coyume quenpea inustuhua, hua tutume tli patlöne ipa yejyecatl quepea intepasol. Cache naja, öque onochi netlöcatl, amo necpea cöne necsiebis notzönteco.

⁵⁹ Hua oquelfejque ocseite:

—Xeniechtoca.

Pero yaja oquejto:

—Tlöcatzintle, xeniechmocöbele ma nebeya cachto ma nectlölpachute notöta.

⁶⁰ Hua Jesús oquelfejque:

—Xequencajcöhua que mimejque ma quentlölpachucö inmimejcohua. Taja xebeya, xetlanunutza de quiene tlamandöruro Deus.

⁶¹ Hua ocsente tlöcatl oquejto:

—Temetzmotoquelis, Tlöcatzintle, cache ma cachto nequennahuatite tli cate pa nochö.

⁶² Pero Jesús oquelfejque:

—Öque queneque mocuepas ica quiename sente tlöcatl que quetlölea imö ipa iaröro hua sötiepa tlachea ca icuetlapa. Amo conbenierebe ma quepea pörte inu tlöcatl cöne tlamandöruro Deus.

10

Jesús quantitlanque setenta y dos tlöca ca ojume

¹ Hua sötiepa de ini nönca söstantle, Tlöcatzintle Jesús oquemixpejpenque ocseque *setenta y dos tlöca. Ini nöncate oquantitlanque ca ojunte ipa noche puieblos hua noche locör cöne yejuatzi hualiloasquea. ² Hua quemelfiloöya:

—Inu meyac giente cate quiename sente tlamochihualestle tli bieye ica, pero tejua tli tepejpeca sa quiesquete tecate. Xetietlajtlötlajticö noso öque tiehuöxca tlatuctle ma quenhualentitlanecö cache meyactie tequetque para pexcasque. ³ Xeyöcö. Xequetjacö cuale que nemiechtitlane quieme cana nencalnielojcucone intzölö de coyume tiecuöneme. ⁴ Amo xecbicacö tomi, nimpör sente morröl, nimpör sapötoste. Hua nionöque amo xectlajpalucö ca pa ojtle. ⁵ Hua ipa tli beletes chöntle nencalaquesque, cachto xequetjucö: “Ma yecsiebelestle iye ca nemejua de ini nönca chöntle”. ⁶ Hua tlö ompayes sente tlöcatl tli quemeresieroa yecsiebelestle, inu bendeseyu de yecsiebelestle tli nenquemacaque mocöhuas ipa yaja. Hua tlö quejtus amo quemeresieroa, nemobendeseyu de yecsiebelestle amo mocöhuas ca yaja. ⁷ Hua ompa xomocaluticö ipa inu nieca chöntle. Xejcuöcö hua xeonico tli söstantle nemiechmacasque. Pos tequetque quepea deriecho de que motlaxtlöbis. Amo xomopatlacö de chöntle para nemocalutisque ipa ocsente chöntle. ⁸ Hua ipa tli beletes puieblo nencalaquesque, tlö nemiechselea, xejcuöcö tli söstantle nemiechmacasque. ⁹ Xequenpajticö tli cocoxcötzetzi ompa yesque, hua xequemelficö: “Ye oaseco tunalte para Deus tlamandörurus ca nemejua”. ¹⁰ Cache ipa tli beletes puieblo nencalaquesque, tlö amo nemiechselea, xequisacö ca ipa cayajunte. Xequetjucö: ¹¹ “Ini tlöle de nemopuieblo tli omotzeco ipa tocxe tectzetzeloa porque nenquechijque tli amo cuale. Pero xecmatecö ini nönca, que ye miero tlamandörurus Deus”. ¹² Hua nemiechselea que ipa inu nieca sölültimo tunale, cache petzotec iyes para inu puieblo que para inu ciudad de Sodoma que lalebes tlajtlacultec oyeya.

Jesús quantlajtlacaquitejque puieblos

¹³ ¡Porube de taja, puieblo de Corazín! ¡Porube de taja, puieblo de Betsaida! Ipampa tlö pa inu ciudades de Tiro hua Sidón omochihuane tietzöbetlachihualestle tli omochi ca nemejua, ye yecsa omoyulcuepane. Yejyehuataskiöne ica intlaquie de luto hua ca tlaconextle. ¹⁴ Por inu, cuöc Deus tlajuscörurus, cache petzotec iyes para nemejua que para inu ciudades de Tiro hua Sidón. ¹⁵ Hua taja, puieblo de Capernaum, ¿beles tecpensöroa temajcoques hasta elfecac? Pues amo, cache metztemobisque hasta meclöncale.

¹⁶ Öque nemiechcaque nemejua, naja nuyejque niechcaque. Öque nemiechtlayjeleja nemejua, naja nuyejque niechtlayjeleja. Hua öque niechtlayjeleja naja, tietlayjeleja nuyejque öque niechhualtitlanque.

Omocuejque inu setenta y dos tlöca

* **10:1** Seque manuscritos quejetoa: “setenta”.

17 Entunses onyajque inu *setenta y dos tlöca. Hua hualmocuejque ca meyac pöquelestle. Oquejtojque:

—Tlöcatzintle, hasta demunios mosujetöroa ca tejua cuöc tequennahuatea motucöyupantzinco.

18 Hua yejuatzi oquemelfejque:

—Naja nequejtaya cuöc inu Satanás obetz de elfecac quiename betze tlapetlönelestle.

19 Hua xequejtacö, nemiechmaca checöhuallestle para nemoquejquetzasque impa cuhuöme hua impa culume, hua ipa noche ichecöhuales de inu enemigo que yaja Diöblo. Hua niontle de inu sösantle abele nemiechcocus. 20 Cache amo xepajpöquecö sa ipampa inu moxicoöneme mosujetöroa nemoca, cache xepajpöquecö ipampa nemotucöyu ye tlajcuelulpanca ompa elfecac.

Jesús pajpocoac

21 Ipa inu nieca ura Jesús pajpocoac ca Espíritu Sönto. Oquejtojque:

—Naja temetzmomabesutelea, noTajtzi, Tlöcatzintle de elfecac hua de tlöltecpectle, pues tejuatzi otomojyönele ini nönca sösantle de tlin tlajmatque hua cajasojcömateneme hua otequenmonixtelele tli cate quiename pelantzeti. Pues ejqueu, noTajtzi, otomocualejtele.

22 'Noche sösantle ye niechmöctejque noTajtzi. Hua amo öque quemate öquenu tieConietzi tlöcamo sa yejuatzi Tajtle. Nuyejque amo öque quemate öquenu Tajtle, tlöcamo sa tieConietzi quemate öquenu Tajtle iloac, hua nuyejque quemates inu tlöcatl öque tieConietzi Deus queneques tieniextis ca yaja.

23 Hua onecuepaluc ocsajpa sa ca belejua tiemachtejcohua. Oquejtojque:

—Cuale nemocnupel ipampa nemoixtelololua quetztecate ini nönca sösantle. 24 Pues nemiechelfea que meyactie tlayulepantejque hua reyes de pa nieca tiempo quenejnequeya quejtasque tli nenquejta, pero abele quejtaque; hua quenejnequeya quecaquesque tli nenquecaque, pero abele oquecajque.

Cuento de sente tlöcatl cualtec de estado de Samaria

25 Hua necö, sente tlajmatque de inu ley de Moisés omoquetz. Quenequeya tieprobörus. Otieyelfe:

—Maestro, ¿tlin sösantle necchihuas para necpeas nemelestle nochepa?

26 Hua yejuatzi oquelfejque:

—¿Tli tlajcuelulpanca ipa inu ley? ¿Quiene tectlajtultea?

27 Hua yaja onöhuat, oquejto:

—“Tetietlasojtlas Tlöcatzintle moDeus ca noche sentetl moyulo, hua ca noche sentetl moölma, hua ca noche mochecöhuales, hua ca noche mopensamientos”. Hua “Motlöcaicni tectlasojtlas quiename taja mismo tomotlasojtla”.

28 Hua Jesús oquelfejque:

—Cuale otenöhuat. Xecchihua inu, hua tenemes.

29 Cache yaja quenequeya ma quejtucö Jesús que yaja quechihuaya cuale. Por inu, otieyelfe Jesús:

—¿Öquenu icaca notlöcaicni?

30 Hua onöhuatihuac Jesús, oquejtojque:

—Sente tlöcatl oquis de ipan ciudad de Jerusalén. Temoöya ipan ojtle pa ciudad de Jericó. Ocasseque ichtejque, hua quecuejcuelejque noche itzotzomajua hua noche tli quepeaya. Quetebejbitejque, hua hasta quemajcötiecaque, hua uyajque. 31 Hua omochi que ohuöla sente teopexque ipa inu ojtle. Hua cuöc oquejtac, sa oquepanabe pa ocsie löro de ojtle. 32 Hua ejqueu sente de inu levitas tli tlatequepanoa ipan teopantle nuyejque oaseto ipa inu nieca locör. Hua inu levita oquejtac tlöcatl, pero nuyejque sa oquepanabe pa ocsie löro. 33 Cache sente tlöcatl de Samaria ca ompa oyöya. Hua cuöc

ohuöla itlac hua oquejtac, oqueyulcoco. ³⁴ Hua omopacho itlac. Oquequemelo cöne quecocoa. Oquetlölele asiete hua vino para ma pajte. Oquetlejcabé ipa iyulcö, hua oquebicac ipa mersu, hua oquixute yaja. ³⁵ Hua ipa mustlateca cuöc ye iyös, oquequexte ume monedas, hua oquemacac chöne. Hua oquelfe: “Xeniechmixutelele, hua noche tli ocseque tomocastörfis por yaja, naja cuöc nocuepas temetzmotlaxtlöbelelis”.

³⁶ ¿Öquenu, noso, de ini nöncate yeteme ca tequejta icaca itlöcaicni de inu nieca öque obetz inmöpa inu ichtejque?

³⁷ Hua inu tlajmatque oquejto:

—Öque oquepile icnuejtelestle.

Yecuöquenu Jesús oquelfejque:

—Xebeya, hua xecchihua ejqueu nuyejque taja.

Jesús comentlajpalojque Marta hua María

³⁸ Hua cuöc obejbiloac, ocalacoato ipa sente puieblo. Hua sente sohuatl itucö Marta otiecalute. ³⁹ Yaja quepeaya sente icni itucö María. Inu María omotlöle tieicxetla Jesús. Queyejcaqueya tli yejuatzi quejtuloöya. ⁴⁰ Cache Marta motequepachoöya por quechihuaya meyac söstantle tequetl para quechihuas tlaquale. Hua omopacho, hua oquejto:

—Tlöcatzintle, ¿amo temetzmimportörfea que nocni sa nosiel niechcajchöhua ma netlatequepano? Xomolfele noso ma niechpaliebe.

⁴¹ Pero Tlöcatzintle onöhuatihuac, oquelfejque:

—Marta, Marta, lalebes tomotequepachoa hua tomopasoloa por meyac söstantle.

⁴² Cache sa sente söstantle inu monesesitöroa. Hua María oquixpejpe inu tlin cache cuale. Hua amo öque quecuejcuelis.

11

Quiene ma totlajtlötlajticö

¹ Hua omochi que yejuatzi netlajtlötlajtilutaya ipa sente locör. Cuöc nesencöhualuc, sente de tiemachtejchöhua otieyelfe:

—Tlöcatzintle, xetiechmomachtele quiene ca totlajtlötlajtisque. Pos ejqueu nuyejque Xohuö oquenmachte imachtejchöhua.

² Hua Jesús oquemelfejque:

—Cuöc nemotlajtlötlajtisque, xequejtucö ejqueyi:

ToTajtzi, ma innochie ma queyectieniehuacö motucöyutzi.

Ma aseque inu tunale cuöc tomotlamandörfis.

³ Xetiechmomaquele cöra tunale totlacual de inu tunale.

⁴ Hua xetiechmoperdonörfe totlajtlacul, pues nuyejque tejua tequenperdonöroa innochie quiejquech tiechtlajtlabiquelea.

Hua amo xetiechmocöbele ma tiechyulmajmötoca Amo Cuale Tlöcatl.

⁵ Oquemelfejque nuyejque:

—Beles canajyeca de nemejua quepeas sente amigo, hua iyös ica yaja quieme ca tlajco yohuac. Quelfis: “Amigo, xeniechtlacuilte yete pöntzi. ⁶ Pos sente noamigo ohuöla de ca pa ojtle noca naja, hua amo necpea tli necmacas ma quecua”.

⁷ Hua beles yaja nöhuates desde tlajtec, hua quejtus: “Amo xeniechpasolo. Pos pobielta ye tzacteca, hua nopelhua cate ca naja ipa tlapechte. Abele nemiehuas para temetzmacas”.

⁸ Nemiechelfea, que mös cana amo miehuas para quemacas porque cate amigos, pero ipampa iamigo quesequiroa quetlajtlanelejteca, miehuas hua quemacas quiejquech pöntzi quenesesitöroa.

⁹ Hua naja nemiechelfea: Xetlajtlanecö, hua nemiechmacasque. Xectiemucö, hua nenqueniextisque. Xetzajtzecö, hua nemiechtlajtlapolfisque. ¹⁰ Ipampa noche nieca

öque tlajtlane queselea, hua öque quetiemoa queniextea, hua öque tzajtze, quetlajtlapolvea. ¹¹ Amo onca nionöque tajtle de nemejua que tlö iconie quetlajtlanes sente meche, amo quemacas sente cuhuötl en locör de meche. ¹² O noso tlö quetlajtlanis sente tutoltetl, amo quemacas culutl. ¹³ Entunses tlö nemejua, mös amo nencualteque, pero nenquemate nenquetiemacasque lo que tlin cuale ca nemopelhua, pues cache ca meyac arrasu ejqueu quechihuasque nemoTajtzi ompa elfecac. Pos quetiemasque tieEspíritu Sönto ca öque tietlajtlanelis.

Giente quejtoöya que Jesús quepealoöya checöhuallestle de Amo Cuale

¹⁴ Hua yejuatzi quequextiloöya sente demunio tli quechihuaya ma tlöcatl iye mumorojtzi. Hua omochi que cuöc oquis inu demunio, inu mumorojtzi otlajtlajto, hua inu giente quetietzöbejque. ¹⁵ Cache seque de yejua quejtoöya:

—Quenquextea demunios ca ichecöhuales Beelzebú, tlajtoöne de demunios.

¹⁶ Hua ocseque, para tieprobörusque, tietlajtlaniöya ma quechihuacö sente sieñas de elfecac. ¹⁷ Cache yejuatzi quematiloöya tli yejua quepejpensöroöya, hua oquemelfeque:

—Tlö giente de sente nación seme momejmectisque entre yejua mismos, hua tlö giente de sente chöntle seme momagasque ca giente de ocseque chöntle, pues moxexetunis inu nación. ¹⁸ Hua tlö quejtus Satanás mopeleörojteca cuntra sie yaja, ¿quiene bejcöbes itlajtojcöteles? Pues ejqueu quechijteca tlö ica melöhuac lo que tli nenquejtoa nemejua, que nele ca ichecöhuales Beelzebú nequenquextea inu demunios. ¹⁹ Hua tlö naja por ichecöhuales Beelzebú nequenquextea demunios, ¿beles nenquejtusque que nemomachtejcohua nuyejque quenquextea por Beelzebú? Ejqueu yejua mismo nemiechpinöbea de lo que tli nenquejtoa. ²⁰ Cache tlö por tiechecöhuales Deus naja nequenquextea demunios, quejtusneque que de melöhuac Deus piehualuteca tlamandöruro nemotzölö. ²¹ Cuöc sente tlöcatl checactec quixutea ichö ca itepos pa imö, amo tli quepasöroa noche tli quepea. ²² Cache tlö huölös ocseque tlöcatl cache checactec que yaja, quexexicus, hua quequextelis noche iteposhua ica tli tlacujtlamajtaya. Entunses tiexelfea noche tli ihuöxca. ²³ Öque amo ica ca naja, encuntra de naja ica. Hua öque amo niechpaliebea para nejcuejcuis, quechayöjteca.

Quiene ocsajpa yebitz moxicoöne.

²⁴ 'Cuöc moxicoöne ye oquis de ijtecopa tlöcatl, nejnteneneme ipa tlölluöjque, quetiemojtteneme cöne mosiebis. Cuöc amo queniextea, quejtoa: “Nocuepas ca nochö de cöne onehualquis”. ²⁵ Hua cuöc yebitz, cualniextea tlachpöntle hua tlajtlayecchejchijtle.

²⁶ Yecuöquenu iya, hua quenbicatz oc checume moxicoöneme cache petzoteque que yaja. Cajcalaque ijtec tlöcatl hua ompa mochönte. Hua sötiepa mochihua cache lalibes petzotec para inu nieca tlöcatl que cuöc cachtö oyeya.

Öquenu de melöhuac cuale icnupel

²⁷ Hua omochi que cuöc oquejtojque ini nönca söstantle, sente sohuatl de tli ompa tlamachyeya otzajtzec, otieyelfe:

—Cuale icnupel inu sohuatl tli metzmotlöcatelele, öque ipa ichichehual otomochichite.

²⁸ Hua yejuatzi oquejtojque:

—Amo ejqueu, cache cuale imicnupel niecate tli quecaque tietlajtultzi Deus hua quechihua tli quemelfea.

Giente otlajtlanque sente sieñas de tietzöbetl

²⁹ Hua cache omotlamachtlöliöya giente tietlac. Entunses opiehualuc quejtuloöya:

—Giente de nönca tiempo sie tiro amo cualteque cate. Hua öxö nenqueneque ma nemiechmaca sente sieñas. Pero amo nemiechmacas nion sente sieñas, tlöcamo sa inu sieñas de Jonás tlayulepante. ³⁰ Pos quiename Jonás omochi sente sieñas para inu giente de ciudad de Nínive, ejqueu nuyejque naja öque onochi netlöcatl neyes nesieñas para

nemejua de ini nönca tiempo. ³¹ Inu reina de tlöle de Sur majcoques ca nemejua tli öxö nennejneme ipa inun tunale cuöc Deus tlajuscörurus, hua nemiechpinöbis. Pues yaja ohuöla desde lalebes ca bejca para quecaques imachesteles Salomón. Hua xequejtacö, que necö oncönca sente tlöcatl cache bieye que Salomón ipa ini nönca locör, pero nemejua amo nenqueneque nenquecaquesque. ³² Inu tlöca de inu ciudad de Nínive majcoquesque ca nemejua ipa inun tunale cuöc Deus tlajuscörurus, hua nemiechpinöbisque. Pues yejua omoyulcuejque cuöc oquennunutz Jonás. Hua xequejtacö que necö oncönca sente tlöcatl cache bieye que Jonás ipa ini nönca locör, pero nemejua amo nenqueneque nemoyulcuepasque.

Itlöbil de tocuiervo

³³ Cuöc canajyeca quexutlaltea sente cantil, amo quetlölea ijtec sente coyocle nimpotitzintla sente almu. Cache quetlölea ipa canteliero, para que ejqueu innochie tli calaque ijtec cale ma quejtacö tlöbile. ³⁴ Tlöbile de mocuiervo yaja moixtelolo. Cuöc moixtelolo amo mococoa, nuyejque noche mocuiervo quepea tlöbile; cache cuöc amo cuale ica, nuyejque mocuiervo quepeas tlajtlayohuaquelestle. ³⁵ Xecpea cueröro noso, majcamo mocuepa tlajtlayohuaquelestle inu tli uyesquea tlöbile para mocuiervo. ³⁶ Entunses tlö noche mocuiervo quepea tlöbile, hua amo quepea niontle tlayohuaquelestle, entunses noche tiemes de tlöbile, quieme cuöc sente cantil tlanixtea lalebes hua metzmaca tlöbile.

Jesús quemajajuaque fariseos hua tlajmatque de inu ley

³⁷ Mientras tlajtlajtuloöya, tietlötlaite sente fariseo nele ma tlacualo ca yaja. Hua ocalacoac Jesús ipa ichö, hua onetlöliluc ipa miesa. ³⁸ Hua inu fariseo oquetietzöbejtac cuöc otieyjtac que amo onepajpöco antes de de tlacualus. ³⁹ Hua Tlöcatzintle oquelfejque:

—Öxö nemejua nenfariseos nenquechepöhua sa tli ca pane de xocle noso casfiela, pero nenquecöhua petzöyutl tlaijtec. Pues nemojtecopa nentientecate de ichtejcöyutl hua noche tli amo cuale. ⁴⁰ ¡Nentuntojte! Deus, öque oquechejchijque tli ca paneca, ¿amo nuyejque oquechejchijque tli de tlaijtejca? ⁴¹ Xetietlöcolicö de lo que tlin cuale nenquepea nemojtecopa, hua noche iyec chepactec para nemejua.

⁴² ¡Porubejte de nemejua, fariseos! Pues nenquenejnehecoa ca meyac cueröro inu majtlactle pörte de nemoalfabieno, hua de iluta hua de noche queletl. Cache inu de que ma xecchihuacö tlin melactec hua ma xetietlasojtlacö Deus, pues sa nenquepanabea. Pues ica cuale ma xecchihuacö inu söstantle tli nenquechijtecate, pero cache lalebes conbenierebe xecchihuacö inu söstantle tli cache importönte.

⁴³ ¡Porubejte de nemejua, fariseos! Pues seme nenqueneque tlaixpa nenyecque ipa teopancucone hua nenquepea gusto ma nemiechyelectlajpalucö giente ipa plöza.

⁴⁴ ¡Porubejte de nemejua! Pues nencate quieme mejcöcoyocme tli amo nejniese, hua tlöca tli yajteneme icpac amo quemate que tlaijtec onca petzoyutl tli quenmajmöhua. Ejqueu giente amo quemate que cuale momajmöhuaque ca tlajtlacule por yesque ca nemejua.

⁴⁵ Hua onöhuat sente de inu tlajtlamatque de ley de Moisés. Otieyelfe:

—Maestro, cuöc tomojtalfea ini nönca nuyejque tetiechmopejpinöjtelea tejua.

⁴⁶ Hua yejuatzit quejtacque:

—¡Porubejte de nemejua nuyejque, nentlajmatque de inu ley! Pues nenquemelfea giente ma quechihuacö meyac söstantle tli cate quiename sente tlamömale tli abele öque quebicas. Cache nemejua nimpotca nemomajpel amo nenquemötoca inu tlamömale.

⁴⁷ ¡Porubejte de nemejua! Pues nemejua nenquechejchihua mejcöcoyocme de inu tlayulepantejque, pos nemobiebetcöhua oquenmejmectejque. ⁴⁸ Ejqueu sie nemejua nenquejtoa tli opasöre hua nenquetlöcayejta intlachihual de nemotötajua. Pues yejua oquenmejmectejque tlayulepantejque, hua nemejua nenquechejchihua inmejcöcoyocua.

⁴⁹ 'Por inu, tiemachesteles Deus oquejto ejqueyi: "Nequentitlanes inca yejua tlayulepantejque hua tlateotitlanme; hua quenmejmectisque seque hua quentepotztocasque ocseque". ⁵⁰ Ejqueu nemejua tli öxö nennentecate nenyisque nentlajtlacul-teque de innequeles de noche inu tlayulepantejque tli oquenmectejque desde cuöc omochejchi tlöltecpactle. ⁵¹ Desde imequeles de Abel, hasta imequeles Zacarías, öque omec entre ajtöl hua teopantle, seguramente nemiechelfea que Deus nemiechtlajtlacultisque por innequeles nemejua tli öxö nennentecate.

⁵² ¡Porubejte de nemejua, nentlajmatque de inu ley! Pues onenquenuextelejque de giente inu yöbe tli quetlapoa pobielta para öque calaques ipa machestelestle. Pos sie nemejua amo nemochijque nentlajmatque hua tli quenequeya mochihuasque tlajmatque amo onenquencöjque.

⁵³ Hua cuöc Jesús quixoac de ompa, inu tlamachtioneme hua fariseos opiejque motlamachtlölea lalebes tiepa, hua tiechihualtiöya ma tlajtlajtulo de meyac söstantle. ⁵⁴ Quenequeya casesque canajyetla tlajtule tli quejtusque para ejqueu cuale tieteyelfisque.

12

Ma tecpeacö cueröro de giente de ume inxöyac

¹ Mientras, omosentlölejque miles de giente, tönto lalebes meyactie que mocxepajpötzoöya sie yejua. Opiehualuc ca cachtö quemelfiloöya tiemachtejcohua:

—Xomotlachilicö de inu levadura de fariseos, que yaja inu ume inxöyac. ² Ipampa amo onca niontle mojoynteca, que amo moniextis; hua abele mojoyntas niontle, pues noche tiene que macheas. ³ Por inu, noche söstantle tli onenquejtojque ipan tlajtlayohuaquelestle, ipan tlanixtle mocaques. Tli nenquejtojque sa ichtecajtzi ijtec cale mopoas cöne cuale caquestes noche.

Öquenu ma tetiemabelicö

⁴ 'Hua nemiechelfea, noamigos, que amo xequenmabelicö tli cuale quemectea nemocuiervo, hua sötiepa ayecmo yetla onca tli cuale nemiechchibelisque. ⁵ Pero nemiechejtetis öque nentiemabelisque: xetiemabelicö inu nieiloac öque sötiepa de que quemectilo, quepealo checöhuallestle para quetlajcalesque ijtec tlecale. Quiema, nemiechelfea, yejuatzi xetiemabelicö. ⁶ ¿Amo monamaca möcuiltie tutume por ume tomi? Pues Deus amo quelcöhualo nion sente de yejua. ⁷ Hua nemejua, Deus quematihua hasta itlapoal de nemotzo. Amo xomomajticö noso, pos nemejua cache nenbajbalierebe que meyactie tutume.

Ma tetiereconosierucö Cristo

⁸ 'Hua nemiechelfea que tlö canajyeca niechtieniehuas hua tlajtus cuale de naja imixtla giente, nuyejque naja que onochi netlöcatl nectieniehuas hua netlajtus cuale de yaja imixpa tieöngeles de Deus. ⁹ Pero tlö canajyeca quejtus imixpa giente que amo niechixomate, nuyejque naja nequejtus imixpa tieöngeles Deus que amo nequixomate. ¹⁰ Noche nieca tli tlajtoa encuntra de naja öque onochi netlöcatl, cuale moperdonörus. Cache öque tiechecuayelfis hua tiepöpöcas Espíritu Sönto, Deus amo queperdonörusque. ¹¹ Hua cuöc nemiechhualecasque ipan teopancucone hua inca tlötlajtoönejme hua autoridades, amo xomotequepachucö por tli noso quiene nenquennönquelisque noso tli nenquejtusque. ¹² Pues yejuatzi Espíritu Sönto nemiechejtetisque ipa inu nieca ura tli conbenierebe ma xequajtucö.

Cuiento de sente tlöcatl rico hua tunto lalebes

¹³ Hua otieyelfe sente de inu giente:

—Maestro, xomolfele nocni ma quexelo ca naja lo que tli tiechcöbelejtiejque totöta cuöc omecoac.

¹⁴ Cache yejuatzi oquelfejque:

—Tlöcatl, ¿öquenu oniechtlöle para ma netlajuscöro noso ma netlaxiexelo entre nemejua?

¹⁵ Hua oquemelfejque giente:

—Xomotlachilicö hua xecpeacö cueröro amo nemoxicusque söstantle. Pues inemeles tlöcatl amo icaca por tlö quepea meyac tli ihuöxca.

¹⁶ Hua oquemelfejque sente cuiento. Oquejtojque:

—Oyeya sente tlöcatl rico. Hua sie xebetl itlölhua tlamochihualtejque meyac lalebes.

¹⁷ Hua yaja quepensöroöya ijtecopa, quejtoöya: “¿Tli naves? Pues amo necpea cöne nechtölis noche tli necpexcac”. ¹⁸ Hua oquejto: “Ini nönca necchihuas: Nequenxexetunis nobescomajua, hua cache bejbeye nequenchejchihuas, hua ompa necsentlölis noche tli necpexcac hua tli nohuöxca. ¹⁹ Hua nequelfis noölma: Ölma, meyac tli mohuöxca ye tlamachtlölejteca para meyac xebetl. Xomosiebe noso, xetlacua, xetlai, xepajpöque”.

²⁰ Pero Deus oquelfejque: “¡Tunto! Ipa ini nönca yohuale taja temeques. Hua noche tli otechtlölle, ¿para öque iyese?”

²¹ 'Ejqueu icaca öque quetlamachtlölea ricojyutl para yaja mismo, pero amo tli quepea de tli ricojyutl quecualejtalo Deus.

Majcamo totequepachucö

²² Hua yejuatzi oquemelfejque tiemachtejcöhua:

—Por inu nemiechelfea: Amo xomotequepachucö por nemonemeles, por tli nenquecuösque. Nimpör amo xomotequepachucö por quiene nenquetlaquentisque nemocuierpo. ²³ Pos ye nenquepea nemonemeles, hua yaja inu cache balierebe que tlacuale. Hua ye nenquepea nemocuierpo, que cache balierebe que tlaquentle.

²⁴ Xequemejtacö cöcölume. Yejua amo tlajtlatuca, nimpör amo pejpexca, nimpör amo quepea inbesco nimpör ocsie locör cöne quetlölisque tlacuale. Hua Deus quentlacualtilo.

Hua nemejua cache nenbajbalierebe lalebes que inu yulcöme. ²⁵ Hua nionöque de nemejua, por mös motequepachus lalebes, abele mobepöhuas nion tlajco mietro por yaja mismo. ²⁶ Entunses tlö abele nenquechihua nion lo que tli cache tzitzequetzi, ¿tli para nemotequepachoa por inu ocseque söstantle?

²⁷ Xequajtacö cuale quiene mobepöhua xucheme. Amo tejtequete, nimpör amo quechejchihua tlaquentle. Cache nemiechelfea, que nimpör Salomón ca noche icualniexteles ayec omotlaquente quiename sente de inu niecate xucheme. ²⁸ Hua tlö quejtus xebetl que öxö icaca caltienco, hua para mustla ye motlajcale ijtec tletzintle, Deus quetlaquentilo ejqueu, pos cache ca meyac arrasu nemiechtlaquentisque nemejua, tlöca que nemiechpoloa neltoquelestle.

²⁹ Nemejua, noso, amo sa xectiemucö tli nenquecuösque noso tli nenconisque, nimpör amo xomopreocupörucö. ³⁰ Pues giente de ocseque naciones de tlöltecpactle quietiemoa ini nönca söstantle. Pero nemoTajtzi quematihuataca de que nemiechpoloa ini nönca söstantle. ³¹ Pero primero xectiemucö ma tlamandörucö yejuatzi, hua noche ini nönca söstantle nuyejque nemiechmacasque.

³² 'Amo xomomajticö, nocalnielojcuconehua, pues nemoTajtzi quenequihua nemiechmacasque para nentlamandörusque nuyejque cöne yejuatzi tlamandöruro.

³³ Xecnamacacö tli nenquepejpea, hua xectietlöcolicö. Xomocubicö ejqueu puxajme tli ayec bejbiebejte, tietieme ca söstantle ricojyutl ompa elfecac que ayec polebe. Pos ca ompa ichtejque amo onase, hua amo tlacuacualoa. ³⁴ Pues cöne iyese nemoricojyu, ompa queneques iyese nemoyulo nuyejque.

Tlatequepanojque tli seme quechixtecate intieco

³⁵ 'Xomomöcheacö cuale, quiename giente tli motlaquentea para nima quisasque, hua incantilhua xoxutlatecate. ³⁶ Ejqueu xeyecö quiename tlöca tli quemöchixtecate cuöc intieco mocuepas de ipa nesohuajtiluyo, para cuöc huölös hua tzajtzes, sa nima

quetlajtlapolfisque. ³⁷ Cuale imicnupel inu niecate tlatequepanojque, quiejquech cuöc intieco huölös, ma quenniexte tlachixtecate. Melöhuac nemiachelfea que intieco motlajcoilpis para tlatequepanus hua quenchiualtis ma motlölicö ipa miesa, hua yaja mismo huölös para quentequepanus. ³⁸ Hua mös huölös hasta tlajco yohuac noso hasta ca ise cualco, hua quenniextisque ejqueu quemöchixtecate, cuale imicnupel inu niecate tlatequepanojque. ³⁹ Pero ini nönca xecmajtacö, que tlö chöne quematesquea tlin ura huölös ichtejque, amo quecöhuasquea ma calaque ichtejque ipa ichö. ⁴⁰ Nemejua nuyejque noso, xeyecö xelistos, porque naja que onochi netlöcatl nehuölös cuöc nemejua amo nenquepensöroa.

⁴¹ Piero otieyelfe:

—Tlöcatzintle, ¿tomojtalfea ini nönca cuiento sa para tejua, noso nuyejque para innochtie?

⁴² Hua oquejtojque Tlöcatzintle:

—¿Öquenu noso ica encargödo tlajmatque hua de confiönsa que itieco quencargörfe ichö, para ma quenmaca noche giente ipa ura intlacual tli quentocöroa? ⁴³ Cuale icnupel inu nieca tlatequepano, tlö itieco cuöc huölös, queniextiqui quechijteca ejqueu. ⁴⁴ De melöhuac nemiachelfea, que itieco quetlölis ma tlamandöro ipa noche tli ihuöxca. ⁴⁵ Pero beles inu nieca tlatequepano quejtus ipa iyulo: “Notieco oc bejcöbes para huölös”. Beles piehuas quenmaltratörus inu ocseque tlatequepanojque hua tlatequepanojque sohuame, hua tlacuös hua conis hua tlöhuönas. ⁴⁶ Huölös itieco de inu nieca tlatequepano ipan tunale cuöc yaja amo quechea, hua tlin ura amo quemate. Yecuöquenu quetlajcoteques hua quetlölis inca tli amo moneltocaneme. ⁴⁷ Hua tlö sente tlatequepano ocajocömat tli quenequeya itieco pero amo omochi listo para cuöc huölös nimpör amo oquechi lo que tli quenequeya, yaja quebitequesque lalebes. ⁴⁸ Pero tlö amo oquemat tli quenequeya itieco, mös oquechi söstantle tli quemeresieroa ma quebitequecö, pero amo lalebes quebitequesque. Ipampa öque lalebes meyac oquemajmacaque, lalebes meyac quepeas que quecuepas. Hua öque quencargörfeque meyac, cache meyac quetlajtlanelisque.

Uyes peleitos por tiepampa Cristo.

⁴⁹ Quienname tletzintle onejcalaquico ipan tlöltecpactle, tli quenxutlaltis tieenemigos Deus hua quenchepeöhuas tiegiente. Hua ayecmo yetla necneque tlö ye xutlateca. ⁵⁰ Cache necpea que nocuötiequis ca sente necuötiequelestle de tiecoco. ¡Hua necpea meyac tequepachule hua cuejcuesebelestle hasta senamo ma mochihua! ⁵¹ Amo xecpensörucö que naja onehuöla para necchihuas ma ayecmo uye peleitos ipan tlöltecpactle. Amo, cache nemiachelfea que giente mopeleörusque porque nehuöla. ⁵² Pues desde öxö möcuiltie ipa sente chöntle mopeleörusque. Yeteme yesque encuentra de unteme, hua unteme encuentra de yeteme. ⁵³ Tajtle mopeleörus encuentra de iconie, hua iconie encuentra de itajtzi. Nöntle mopeleörus encuentra de ichpuch, hua ichpuch encuentra de inöntzi. Mönontle mopeleörus encuentra de isohuamo, hua isohuamo encuentra de imöno.

Ma tecmatecö tli tunalte tecate

⁵⁴ Hua quemelfiloöya giente nuyejque:

—Cuöc nenquejta mextle quisa cöneca calaque tunale, nima nenquejtoa: “Huölös queyabetl”. Hua ejqueu pasörebe. ⁵⁵ Hua cuöc tlalpitza yejyecatl de ca tlatzintla, nenquejtoa: “Tunas lalebes”. Hua ejqueu mochihua. ⁵⁶ ¡Sa ume nemoxöyac! Nenquemate nenquestlocusque tli onca ixpa tlöltecpactle hua ixpa elfecac. ¿Tlica abele nenquestlocoa tli mochihuas ipa ini nönca tiempo?

Xomotlöle de acuerdo ca moenemigo

⁵⁷ Hua ¿tllica amo nenquestlocoa para nemejua mismos para nenquematesque tlin yectec hua melactec? ⁵⁸ Pos cuöc teya ixtla juez ica öque metztieyelfis, mientras oc teya pa ojtle xecpea cueröro por tequisas de inu lío, majcama cana metzbica ca tlajtoöne, hua tlajtoöne metztiemöctis ica tlajpexque, hua inu tlajpexque metzcalaquis ijtec cörsel. ⁵⁹ Temetzelfea que amo tequisas de ompa hasta senamo tectlaxtlöhuas inu sölültimo sentöo tli tectlabiquelea.

13

Xomoyulcuepacö para amo nenmejmequesque

¹ Hua ipa inu nieca tiempo ompa onhuölajque seque que tiepubelejta ya tli impa omochi inu giente de estado de Galilea, öque Pilöto oquenmecte cuöc tlabentlöliöya, hua inyeso oquenelulte ca iyeso de inu yulcöme de bentle. ² Hua onöhuatihuac Jesús, oquemelfejque:

—¿Beles nenquepensöroa que inu niecate galileos cache tlajtlaculteque oyeya que innochtie ocseque galileos, hua que por inu ejqueu impa omochi? ³ Nemiechelfea que amo, cache tlö amo nemoyulcuepa, nemonochtie ejqueu nenmejmequesque. ⁴ ¿Nenquelnömeque niecate giente öque impa obetz inu cale bejcapa ompa ipa Siloé, hua oquenmejmete? ¿Beles nenquepensöroa que yejua otlajtlacojque encuntra de Deus cache que innochtie ocseque tlöca tli neme ipa inu ciudad de Jerusalén? ⁵ Nemiechelfea que amo, cache tlö amo nemoyulcuepasque, nemonochtie nenmejmequesque ejqueu mismo.

Cuiento de icox cuabetl tli amo tlamochihualte

⁶ Hua oquejtojque ini nönca cuiento:

—Sente tlöcatl quepeaya sente icox cuabetl tuctaya ipa ihuierta de uvas. Oquetiemolico ifruto tli quietiemacasquea inu nieca icox cuabetl, pero amo oqueniexte. ⁷ Hua oquelfe inu jardiniero: “Ye necpea yeye xebetl que necualtiemolea fruto itech ini nönca icox cuabetl, hua amo necniextea. Xectequeno. ¿Tli para oc quecupörojtas tlöle?” ⁸ Yecuöquenu onöhuat inu jardiniero, oquelfe: “Tlöcatzintle, xomocöbele oc sie ini nönca xebetl, hasta senamo ma nectataca, hua ma neclölele majöra. ⁹ Hua tlö quietiemacas ifruto, pos cuale. Hua tlö amo, entunses quiema tomotequelis”.

Jesús quepajtejque sente sohuatl ipan söbron tunale

¹⁰ Hua tlamachtiloöya ipa teopanconetzi ipan söbron tunale, cuöc quepea costumbre mosejsieba joriojte. ¹¹ Hua ompa oyeya sente sohuatl que ye quepeaya caxtule hua yeye xebetl de que quecocoaya sente moxicoöne. Yaja motojtopochoöya, hua abele moquetzaya deriecho. ¹² Cuöc Jesús oquejtaque, oquenutzque hua oquelfejque:

—Sohuatl, ayecmo metzilpea mococolos.

¹³ Hua oquentlölejque tiemöhua ipa yaja, hua nima omoyebetequetz hua tiechamoöya Deus. ¹⁴ Hua inu tlayecönque de teopanconetzi ocualö ipampa Jesús otlapajtiluc ipan söbron tunale. Por inu oquemelfe giente tli ompa tlamachyeya:

—Checuasien tunalte cate cöne conbenierebe ma tetequetecö. Ipa inu niecate tunalte, noso, xehuölöcö hua xepajtecö, pero amo ipan söbro.

¹⁵ Pero Tlöcatzintle quenönqueliluc, oquejtojque:

—¡Sa ume nemoxöyac! Nemonochtie ipan söbron tunale nenquetojtoma nemocucobe noso nemopuro de cöne tlacua, hua nenquebica ma ötle. ¹⁶ Hua ini nönca ichpuch Abraham ye quepea caxtule hua yeye xebetl oquelpetaya inu Satanás. ¿Beles nenquetusque que amo conbenierebe que ipan söbron tunale ma motojtoma de inu cocolestle tli quelpetaya?

¹⁷ Hua cuöc oquejtojque ini nönca sösantle, pejpinohuaya innochie tli oyejyeya encuentra de yejuatzi. Cache noche ocseque giente mopöquelesmacaya de noche sösantle lalebes cuale tli quechihualöya yejuatzi.

Cuientos de mostöza hua levadura

¹⁸ Por inu yejuatzi oquejtojque:

—¿Tli sabele icaca quiename cuöc tlamandöruro Deus? ¿Ca tli nejcomparörus? ¹⁹ Icaca quiename ixenöch mostöza, que sente tlöcatl ocasec, oquetlajcal ipa ihuierta. Omobepö, hua omochi quiename sente cuabetl, hua tutume tli patlöne ipa yejyecatl oquetlölejque intepasol ipa imömöyo.

²⁰ Hua ocsajpa oquejtojque:

—¿Ca tli nejcomparörus quiename cuöc tlamandöruro Deus? ²¹ Icaca quiename levadura de pöntzi, que ucö sente sohuatl, hua quenelulte ca yeye tlatemachihuale de harina, hua noche oquesunie.

Ma tecalaquecö ca pa pobielta pitzutec

²² Hua biloaya ipa noche ciudades hua puieblos otlamachtikutöya, hua biloaya ca pa ciudad de Jerusalén. ²³ Hua sente tlöcatl otieyelfe:

—Tlöcatzintle, ¿sa quiesquete momöquextisque?

Hua yejuatzi oquemelfejque:

²⁴ —Xecuesebicö por nencalaquesque ca ipa pobielta tli sa pitzutec. Porque nemiechelfea que meyactie quenequesque calaquesque, pero abele quechihuasque. ²⁵ Iyes ejqueyi, quiename sente chöne tli miehuas hua quetzacuas pobielta. Entunes nemoquetzasque ca queyöhuac, hua nenpiehuasque nentzajtzesque ipa pobielta. Nenquejtusque: “Tlöcatzintle, Tlöcatzintle, xetiechmotlajtlapolfele”. Inu chöne nöhuates, nemiechelfis: “Amo nemiechixomate de cöne nencate”. ²⁶ Yecuöquenu nenpiehuasque nenquejtusque: “Mixpantzinco otelacuajque hua otötlisque, hua otomotlamachtele pa cayajunte de topueblo”. ²⁷ Hua seguramente nemiechelfis: “Amo nemiechixomate de cöne nencate. Xomoxelucö de naja nemonochtie, pues sa nenquechihua tli amo cuale”.

²⁸ 'Ompa nenchojchucasque hua nemotlantesesque, cuöc nenquejtusque inu Abraham, hua Isaac, hua Jacob, hua innochie tlayulepantejque de pa nieca tiempo. Yejua yesque cöne tlamandöruro Deus, hua nemejua nemiechtlajcalesque ca queyöhuac. ²⁹ Hua huölösque giente de cöneca quisa tunale hua de cöne calaque tunale, de ca tlapac hua de ca tlatzintla. Yejua motlölisque cöne Deus tlamandöruro. ³⁰ Hua xequejtacö, que seque tli öxö sölültimo cajcate, cachtö yesque. Hua seque tli öxö cachtö cate sölültimo yesque.

Jesús ochucoac por inu ciudad de Jerusalén

³¹ Ipa sie yaja tunale ohuölajque seque fariseos. Otieyelfejque:

—Xequisa, hua xebeya de necö, pues inu rey Herodes queneque metzmectis.

³² Hua oquemelfejque:

—Xeyöcö, hua xequelficö inu nieca coyuconetzi: “Xequejta necö, que nequenquextea demunios hua netlapajtea öxö hua mustla, hua hasta ipa yeye tunale netlames. ³³ Pero necpea que necsequirus noojfe öxö, hua mustla, hua bictla. Pues abele iyes que meques sente tlayulepante ipa ocsie pörte, tlöcamo noche tlayulepantejque quepejpea que mequesque ipa Jerusalén”.

³⁴ ¡Ay, Jerusalén, Jerusalén, que tequenmejmeatea tlayulepantejque hua tequentecaltea tli Deus quantitlanihua ca taja! ¡Meyacpa onecnec nequensentlölis tli chajchönte mopa, quieme sente piyolama quensentlölea ipeyocuhuehua itzintla iajfetzi! Cache taja ayec otecne. ³⁵ Xequejtacö que Deus ayecmo chöntihuas nemotzölö, cache nemiehcöjtiehuehua. Hua nemiechelfea que ayecmo nenniechejtusque, hasta senamo

huölös tunale cuöc nenquejtusque: “Ma tetieteochihuacö öque biloatz tietucöyupa Tlöcatzintle”.

14

Jesús quepajtejqe sente tlöcatl ijtesunectec

¹ Hua omochi que ocalacoac ipa ichö de sente tlayecönque de inu fariseos ipa sie söbro. Ocualluto tlacuale. Hua yejua tieyetzaya abier tli quechihuasque. ² Hua ompa sente tlöcatl ijtesunectec tieixtla oyeya de yejuatzi. ³ Hua onöhuatihuac Jesús, oquemelfejque inu tlajmatque de inu ley de Moisés hua inu fariseos:

—¿Conbenierebe öque tlapajtis ipan söbron tunale cuöc tosiebea?

⁴ Hua yejua amo onöhuatque. Yecuöquenu yejuatzi oquepajtejqe tlöcatl, hua oquetitlanque ma beya. ⁵ Hua oquemelfejque:

—¿Öquenu de nemejua tli quepea sente iconie noso sente cucobe, tlö cana betzes ijtec sente öpuso, amo sa nima quequextis mös ipan söbro?

⁶ Pero yejua abele tienönqueliöya cuöc quejtuloöya ini nönca söstantle.

Jesús quenmachtejqe giente ipan tlacuale

⁷ Hua yejuatzi ye nemacaloöya cuenta de quiene tli tlatlalfilte quenequea mosentlölisque ipa tli cache cuale locör itlac miesa. Oquemelfejque sente ejemplo. Oquejtojque:

⁸ —Cuöc canajyeca metztlalfis ipa sente nesohuajtiluyo, amo xomotlöle ipa tli cache cuale locör, amo cana de repiente iye que nuyejque quetlalfis yeca ocsente cache cuale que taja. ⁹ Hua yaja tli nemiechtalfe nemejua nemonehua huölös hua metzelfis: “Xecmaca inu locör ini nönca”. Cuöquenuju ye tepinöhuas hua teyös hasta inu locör tli cache amo cuale. ¹⁰ Cache cuale xecchihua ejqueyi: cuöc yeca metztlalfis, xebeya hua xomotlöle ipa locör tli cache amo cuale ica. Entunses huölös öque metzontlalfe. Metzelfis: “Amigo, xehualmobica necö pa locör cache cuale”. Entunses innochie tli ompa tlajtlacua metzyectieniehuasque. ¹¹ Ipampa noche öque mochajchamöhuas, quepichaquisque; pero öque mopichaquis, quechamöhuasque.

¹² Hua oquelfejque nuyejque inu tlöcatl öque tietlalfe:

—Cuöc tecchejchihua sente tlacuale ca pan tlajca noso ca ye yohuac, amo xequentlalfe moamigos, nimpör mocnihua, nimpör mogiente, nimpör tli ricojte motlac chajchönte. Pues tlö ejqueu beles de repiente yejua nuyejque metztlalfisque, hua metzcuepelisque.

¹³ Cache cuöc tecchejchihua tlacuale, xequennutza tli porubejte, tli möcotoctequa, tli cuxojtsetzi, tli ixcocoxcötsetzi. ¹⁴ Entunses cuale mocnupel iyas, ipampa yejua amo quepea ca tli metzcuepelisque, hua ejqueu Deus metzcuepelisque cuöc yulebesque yecteque.

Cuiento de bieye tlacuale

¹⁵ Sente de tli ompa yehuataya ca yejuatzi itlac miesa, cuöc oquecac ini nönca, oquejto:

—Cuale icnupel öque tlacuös cöne Deus tlamandöruro.

¹⁶ Pero yejuatzi oquelfejque:

—Sente tlöcatl oquechi sente bieye tlacuale, hua oquentlalfe meyactie. ¹⁷ Hua cuöc ye oaseco ura para tlacuale oquetitla itlatequepano ma quemelfe inu tlatlalfilte: “Xehuölöcö, que ye tlacajca para tetlacuösque”. ¹⁸ Pero innochie opiejqe motietiequextelea. Inu primero oquelfe: “Onejcu sie perözo tlöle. Necpea que nequejtati. Temetzmotlötajtelea xeniechmomöquextele ca ompa”. ¹⁹ Ocsente oquejto: “Onejcu möcuile yuntajte de cucobejqe, hua nequennenebeliti. Temetzmotlötajtelea xeniechmomöquextele ca ompa”. ²⁰ Hua ocsente oquejto: “Quiemach nosohuajte, hua por inu abele neyös”. ²¹ Hua cuöc omocuec inu tlatequepano, oquemacheste itieco de ini nönca söstantle. Yecuöquenu ocualö inu nieca chöne. Oquelfe itlatequepano:

“Xebeya sa nima ca pa cayajunte hua ojme de ini puieblo, hua xequencalaque necö tli porubejte, tli möcotoceteque, hua ixcocoxcötzetzi, hua cuxojtzetzi”. ²² Hua ejqueu oquechi tlatequepano. Entunses oquejto: “Tlöcatzintle, ye omochi tli teniechmonahuatele, hua oc turavea onca locör”. ²³ Hua oquelfe itieco inu itlatequepano: “Xebeya ipa ojme hua ipan colölte, hua xequennelchibele ma calaquecö, para ma tieme nochö. ²⁴ Pues nemiechelfea que nionöque de inu niecate tlöca tli onequentlalfe, amo quecuösque notlacual”.

Ica tequeyo öque iyes tiemachtejque de Cristo

²⁵ Hua meyac gente oyöya tieca. Hua onecuepaluc, hua oquemelfejque:

²⁶ —Tlö canajyeca yebitz noca, ma quetlajyelejta itajtzi, hua inöntzi, hua isohua, hua ipelhua, hua icnihua oquechte, hua icnihua sohuame, hua hasta nuyejque inemeles de yaja mismo ma quetlajyelejta. Pues tlö amo, abele iyes nomachtejque. ²⁷ Hua öque beletes amo iyes listo para quesufrirus quiename öque quesufriroa ipa sente corujtzi, hua amo huölös ca naja, abele iyes nomachtejque. ²⁸ Pues tlö canajyeca de nemejua queneque cajcoques sente cale bejcapa, cachtö motlölea hua quepoa quiejquech quecastörus, abier tlö quepea para quesencöhuas, ²⁹ majcamo de repiente iye que, sötiepa de que ye oquetlöle cimientö, abele quetlamis. Pues tlöjcu noche quiejquech quejtasque piehuasque quepinöbisque. ³⁰ Quejtusque: “Ini nönca tlöcatl oquepiehualte quechejchihua cale, hua abele oquesencö”. ³¹ Noso tlö sente rey iyös momagati ica ocsente rey, cachtö motlölea para quenenebelea tlö cuale quisas yaja encuentra de inu nieca tlö yaja sa quepea majtlactle mil soltörojte hua inu nieca quebicatz sempoale mil. ³² Pos tlö abele, cuöc inu nieca oc bejcanca, quentitlane irepresentöntes para carreglörusque quiene amo momagasque. ³³ Ejqueu noso, öque beletes de nemejua amo quecöhua noche sösantle tli quepea, abele iyes nomachtejque.

Yestat tli mocuepa öbielec

³⁴ 'Ejqueu yestat icaca cuale. Cache tlö yestat mocuepas öbielec, ¿tli ica öque quepoyelis? ³⁵ Amo serbirebe nimpör para tlöle, nimpör para majöra. Por inu motlajcalea ca queyöhuac. Öque quepea itlacaqueles para tlacaques, ma tlacaque.

15

Cuiento de calnielo tli opole

¹ Hua mopachoöya tieca noche tli tlanechecojque hua ocseque tlajtlaculteque para tiecaquesque. ² Hua moquejöröya inu fariseos ca tiehua tlamachtioneme de teotlajtule. Quejtoöya:

—Ini nönca tlöcatl quenselea tli tlajtlaculteque, hua ca yejua tlacua.

³ Hua yejuatzitzi oquemelfejque ini nönca cuiento. Oquejtojque:

⁴ —Tlö canajyeca de nemejua quepea sie sientos calnielojte, hua quepoloa sente de yejua, quencöhua inu noventa y nueve ipa munte, hua iya quetiemuti tli opole, hasta senamo queniextea. ⁵ Hua cuöc ye oqueniexte, quetlölea ipa iquechcochtla, hua pajpöque lalebes. ⁶ Hua cuöc yebitz ipa ichö, quensentlölea noche iamigos hua tli icaltech chajchönte. Quemelfea: “Xepajpöquecö ca naja, ipampa onecniexte ini calnielo tli onecpolo”. ⁷ Nemiechelfea, que ejqueu iyes meyac pöquelestle ompa elfecac por sente tlajtlacultec tli omoyulcuc, hua amo tönto por noventa y nueve tlöca yecteque tli amo quenejnesesitöroa moyulcuepasque.

Cuiento de tomi que opole

⁸ 'O noso tlö sente sohuatl quepea majtlactle monedas, tlö quepolus sente moneda, pues quexutlaltea icantil hua queyequechpöna cale. Quetiemoa ca cuesebelestle hasta senamo queniextea. ⁹ Hua cuöc ye oqueniexte, quensentlölea iamigos hua tli icaltech

chajchönte. Quemelfea: “Xepajpöquecö ca naja, ipampa ye onecniexite inu moneda tli onecpolo”. ¹⁰ Nemiechelfea que ejqueu mismo onca pöquelestle imixtla tieöngeles Deus, por sente tlajtlacultec tli moyulcuepa.

Cuiento de pelalactle tli tlamalcastöro

¹¹ Hua oquejtojqe:

—Sente tlöcatl quepeaya unte ipelhua. ¹² Hua inu pelalactle tli sötiepa jiebe oquelfe itajtzi: “Tata, xeniechmomaquele tli niechtocörus de tli mohuöxcatzi”. Entunses inu tajtle oquenxiexelfe ipelhua noche tli quepeaya. ¹³ Hua sötiepa de quiesquete tunalte, inu pelalactle tli sötiepa jiebe oquesentlöle noche tli ihuöxca, hua uya bejca ipa oc-sie tlöle. Ompa oqueniempolo noche tli ihuöxca, pos oquecastöro sin quepensöro. ¹⁴ Hua cuöc ye noche ye oquemalcastöro, ohuöla sente bieye öpestle ipa nieca tlöle, hua opie ye quepoloöya. ¹⁵ Entunses uya hua otequet ca sente tlöcatl de inu nieca tlöle. Inu tlöcatl oquetitla ipa ihacienda para ma quentlacuajcualte petzome. ¹⁶ Hua inu pelalactle quenequeya quecuös ixocoteyo puchucuabetl tli quecuöya inu petzome, pero nionöque amo quemacaya. ¹⁷ Pero sötiepa ye oqueyecpensöro. Oquejto: “Onca meyactie tequetque tiechö tli quepea meyac tli quecuösque, hua naja necö nöpesmecteca. ¹⁸ Noquetztiehuas, hua neyös tielac notöta. Netieyelfis: Taja, ye onetlajtlaco encuentra de Deus öque iloac elfecac, hua nuyejque encuentra de tejuatzi. ¹⁹ Ayecmo necmeresieroa neyes nemoconietzi. Xeniechmotratörfe quieme sente de inu motequetcötzetzihua”. ²⁰ Hua ca inu omie inu pelalactle, hua ohuöla itlac itajtzi.

’Pero mientras oc oyeya bejca, itajtzi oquejtac, hua oqueyulcoco. Hua omomerö, omopechtiecac iquechcochtla, hua oquepetzo. ²¹ Entunses inu pelalactle oquelfe: “Tata, ye onetlajtlaco encuentra de Deus öque iloac elfecac, hua nuyejque encuentra de tejuatzi. Ayecmo necmeresieroa para neyes nemoconietzi”. ²² Cache itajtzi oquemelfe itlatequepanojua: “Xejquexticö tlin cache cuale tlaquentle, hua xecöquicö. Xectlölelicö öniyo ipa imajpel, hua zapötoste ipa icxehua. ²³ Hua xecualecacö sente pesiero tomöhuac, hua xecmecticö. Ma tetlacuöcö, hua ma tepajpöquecö, ²⁴ ipampa ini nönca noconie ye mejque oyeya, hua ocsajpa yulejteca; oixniempolejtenemeya, hua onieseco”. Hua opiejqe opajpöjqe lalebes.

²⁵ Hua inu iconie tli cachtö jiebe oyeya caltienco. Cuöc ohuöla, oaseco itlac cale, hua oquencac tlajtlapitzaya hua tlajtlatzotzonaya hua mojojtutiöya. ²⁶ Hua oquenutz sente de inu llatequepanojque. Oquetlajtlane tlininuju oyeya inu nieca. ²⁷ Hua yaja oquelfe: “Mocni ye oaseco, hua motajtzi ye oquemectejque inu pesiero tli cache tomöhuac, ipampa mocni ohuöla ica cuale”. ²⁸ Yecuöquenu yaja ocualö, hua amo quenequeya calaques. Yecuöquenu oquis itajtzi, hua quetlölajtiöya ma calaque. ²⁹ Cache yaja onöhuat, oquelfe itajtzi: “Xomojtele meyac xebetl temetzmotequepanelfea, hua seme temetzmoneletoquelea noche tli teniechmomandörfea. Pero ayec teniechmomaquele nion sente chibojconetzi para nopöquelesmacas inca noamigos. ³⁰ Cache cuöc ohuöla ini nönca moconietzi, tli oquepojpolo tli mohuöxcatzi inca cachirilajte, para yaja otomomectele inu pesiero tli cache tomöhuac”. ³¹ Oquelfe itajtzi: “Ixo, taja seme notlac tecaca, hua noche tli nohuöxca icaca mohuöxca. ³² Pero conbenierebe ma tepajpöquecö hua ma tecchihuacö yelfetl, ipampa ini nönca mocni ye mejque oyeya, hua ye yulejteca; oixniempolejtenemeya, hua onieseco”.

16

Cuiento de maortumo tli amo melactec oyeya

¹ Hua oquemelfejque nuyejque tiemachtejcohua:

—Oyeya sente tlöcatl rico tli quepeaya sente maortumo encargödo de ichö. Hua ocseque quetieyelfejque inu maortumo ixtla ipatrón. Quejtoöya que sa queniempoloöya

tli ihuöxca ipatrón. ² Hua ipatrón oquenutz. Oquelfe: “¿Tlininiji nejcaque de taja? Xeniechmaca cuienta de noche tli otecchi cuöc teyeya encargödo. Pues ayecmo teyes teencargödo de nochö”. ³ Yecuöquenu inu maortumo oquejto ipa iyulo: “¿Tli necchihuas? Pues nopatrón niechquextelea ini tequetl. Amo nechecactec para netequeteti de peyu. Hua tlö notlajtlajtlanes, pos niechmaca pinöhuallestle. ⁴ Naja necmate tli necchihuas, para cuöc niechquextis de noteque, ocseque giente niechönasque ipa inchö”. ⁵ Hua oquenzajtzele quiejquech quetlabiquelejtaya ipatrón. Oquelfe inu cachtö: “¿Quiejquech tecbiquelea nopatrón?” ⁶ Hua yaja oquejto: “Sie sientos butejte de asiete”. Hua oquelfe: “Xecöna morecibo, hua xomotlöle sa nima, hua xequejcuelo que sa tlajco sientos tecbiquelea”. ⁷ Sötiepa oquelfe ocsente: “Hua taja, ¿quiejquech tectiebiquelea?” Hua yaja oquejto: “Sie sientos bultos de trigo”. Hua oquelfe inu maortumo: “Xecase nönca morecibo, hua xequejcuelo que sa ochenta bultos tecbiquelea”. ⁸ Hua ipatrón oquechamö inu maortumo mös quecajcayö. Oquechamö ipampa oqueyecpensöro cuöc oquechi inu nieca. Pues giente de nönca tlöltecpactle canajquiema cache cate listos de quiene motratöroa ca ocseque tlöltecpactlöca que giente tli quetiemoa tlanixtle de Deus.

⁹ Hua naja nemiechelfea: Xomochihuacö amigos de giente ca ini ricojyutl tli amo yectec, para que cuöc ini ricojyutl ayecmo cuale nemiechpaliebis, inu amigos nemiech-selisque ipan chönme tli mocöhuasque nochepa.

¹⁰ Öque ica de confiönsa cuöc öque quencargörfeä sa tzitzequetzi, nuyejque iyes de confiönsa cuöc iyes encargödo de meyac. Hua öque amo cuale quechihua cuöc quencargörfeä tli sa tzitzequetzi, nuyejque quechihuas tli amo cuale cuöc iyes encargödo de meyac. ¹¹ Porque tlö amo nencate de confiönsa ca ini ricojyutl amo yectec, amo öque nemiechencargörfis inu tlin melöhuac ricojyutl. ¹² Hua tlö amo nencate de confiönsa ca lo que tli ihuöxca ocsente, amo öque nemiechmacas tli nemohuöxca. ¹³ Nionöque tlatequepano abele quetequepanus umeme itiecohua. Pues quetlajyelejtas sente hua quetlasojtlas ocsente, o noso mopachus itlac sente hua quedespresiörus ocsente. Abele nentietequapanusque Deus mientras nuyejque nenquetequepanoa ricojyutl.

Inu ley de Moisés amo ica quiename cuöc Deus tlamandöruro

¹⁴ Hua inu fariseos nuyejque oquecaqueya ini nönca sösantle. Yejua lalebes quet-lasojtlaya tomi. Hua yejua ica biebetzcaya tli quejtuloöya yejuatzi. ¹⁵ Hua yejuatzi oquemelfejque:

—Nemeyua nencate giente tli sie nemeyua nemochihua nenyecteque imixtla giente. Cache Deus quixomatihua nemoyulo. Pues tlin tlöca quepensöroa lalebes cuale, yaja inu Deus quetlajyelejtalo.

¹⁶ Inu tiempo de inu ley hua de inu tlayulepantejque oyeya hasta cuöc ohuöla Xohuö. Desde cuöquenu monunutza de quiene Deus tlamandöruro. Hua öque queneques cuale calaques cöne tlamandöruro tlö ica pobierco. ¹⁷ Pero mös beles cuale panus elfecac hua tlöltecpactle, pero abele moniencuepas nion sente lietra de tli tlajcuelulpanca ipa inu ley.

¹⁸ Tlö canajyeca quecajcöhua isohua, hua mosohuajtea ica ocsente, yaja tlaumepea hua tlajtlacoa. Hua öque mosohuajtea ica inu sohuatl tli inömec oquecajcö, yaja tlajtlacoa porque inu sohuatl quepea inömec, mös amo quepexteca.

Cuento de tlöcatl rico hua Lázaro

¹⁹ Oyeya sente tlöcatl rico, que motlaquentiöya de cuale tzotzomajtle morörojtec hua de tzotzomajtle de lino arä ca cuale. Cöra tunale quechihuaya tlacuale lalebes cuale. ²⁰ Oyeya nuyejque sente motlajtlajtlane itucö Lázaro. Ini nönca obetztaya ipa iqueyöhuatie de inu rico. Quepeaya meyac söhuame. ²¹ Hua quenequeya quecuös mös sa lo que tli betzeya itzintla miesa de inu rico. Hasta huölöya checheme hua quepajpajlfioya isöhuhua. ²² Hua omochi que omec inu motlajtlajtlane, hua oquebicaque öngeles para iyes itlac Abraham. Omec nuyejque inu rico, hua oquetlölpachojque. ²³ Hua

ompa ijtec mectlöncale oajcopatlachix, cuöc oyeya ipa tietunie. Hua oquejtac Abraham bejcateca, hua inu Lázaro itlac. ²⁴ Yecuöquenu yaja otzajtzec. Oquejto: “Notajtzi Abraham, ma temetzmoyulcocolfe naja. Xomotitlanele inu Lázaro ma quepaltelite imajpel ijtec ötzintle, hua ma quetztelique nonenepil, ipampa necpea meyac tiecoco ijtec ini nönca tletzintle”. ²⁵ Hua oquelfe inu Abraham: “Ixo, xequelnömeque que otecpep meyac söstantle tlin cuale mientras tenemeya, hua Lázaro nuyejque oquepex tiecoco. Pero öxö yaja moyulölea necö, hua taja tecpea inu tiecoco. ²⁶ Hua amo sa inu, pero onca sente tlabejcatlalestle entre tejua hua nemejua. Ejqueu tli quenequesque panusque ca nemejua abele, nimpör de ca ompa para ca necö abele öque panus”. ²⁷ Hua oquejto: “Temetzmotlötajtelea noso, notajtzi, que xomotitlane ma beya ica ichö notöta. ²⁸ Pues necpea möcuiltie nocnihua. Ompa ma quennunutza yejua, para majcamo huölöcö nuyejque ipa ini nönca tiecoco”. ²⁹ Hua Abraham oquelfe: “Inu ömatl de Moisés hua de tlayulepantejque ompa quepea. Ma quecaquecö”. ³⁰ Yecuöquenu yaja oquejto: “Amo, notajtzi Abraham, cache tlö yeca iyös ca yejua de tli mimejque, moyulcuepasque”. ³¹ Cache Abraham oquelfe: “Tlö amo quecaque tli oquejtojque inu Moisés hua inu tlayulepantejque, nuyejque amo moneltocasque mös yulebes sente de intzölö mimejque”.

17

Ocseque söstantle tli oquelfejque Jesús

¹ Hua oquemelfejque tiemachtejcohua:

—Seme quepea que iyes que giente quenchiualtisque que ocseque giente betzesque ipa tlajtlacule. Pero ipörube de inu nieca tlöcatl tli ejqueu quechihuas! ² Cache cuale uyesquea para inu tlöcatl tlö quejilpelisquiöne sente tietetu de molino ipa icucutla hua ejqueu quetlajcalesquiöne ijtec lamör, hua ejqueu majcamo quechihualte sente de ini nöncate pelantzetzzi ma betze ipa tlajtlacule. ³ Xecpeacö cueröro por nemejua mismo. Tlö tlajtlacus mocni ca taja, xequelfe. Hua tlö moyulcuepa, xecperdonöro. ⁴ Tlö tlajtlacoa ca taja checumejpa ipa sente tunale hua checumejpa mocuepa ca taja hua quejtoa: “Noyulcuepa, xeniechperdonöro”, pos xecperdonöro.

⁵ Hua inu tlateotitlanme tieyelfejque Tlöcatzintle:

—Xetiechmopaliebele ma cache toneltocacö.

⁶ Yecuöquenu Tlöcatzintle oquejtojque:

—Tlö nenquepeasquiöya nemoneltoqueles quiename sente ixenöchyo mostöza, nenquelfisquiöya ini nönca cuabetl: “Xomocopina, hua xomotucate ijtec lamör”, hua nemiechneltocasquea.

⁷ Tlö canajyeca de nemejua quepea sente tlatequepano esclavo que tequete ca yunta noso quemixutea calnielöjte, cuöc yaja hualmocuepa de ca caltienco amo nenquelfisque sa nima: “Xecalaque, xomotlöle, xetlacua”. ⁸ Cache cuale nenquelfisque: “Xectlöle tli nejcuös, hua xecölolo momöngas hua xeniechtlatiequele hasta senamo ma netlacua hua ma netlaye”. ⁹ ¿Beles nenquetlasojcömateleale inu esclavo ipampa oquechi tli onenquemandörojque? Pos de mölas amo. ¹⁰ Sa ejqueu nuyejque nemejua, cuöc nenquechihuasque noche tli Deus nemiechmandörojque, xequajtucö: “Amo cualteque tlatequepanojque tecate tejua. Pues amo otecchijque cache de lo que tli conbenierebeya tecchihuasquea”.

Jesús quenpajtejque majtlactien tlöca sa söhuayojque

¹¹ Hua omochi que mientras yejuatzi biloaya ica ciudad de Jerusalén, panoaya tlanepantla de inu estados de Samaria hua Galilea. ¹² Hua cuöc ocalacoac ipa sente puieblo, ohuölajque tienömequeco majtlactien tlöca sa söhuayojque. Yejua omoquetzque bejcateca, ¹³ hua otzatzeque. Oquejtojque:

—Jesús, toTlöcatzi, ma temetzmoyulcocolficö tejua.

¹⁴ Hua cuöc yejuatzi oquemejtaque, oquemelfejque:

—Xeyöcö, xomotiejteticö inca teopexcötzetzi.

Hua omochi que cuöc uyajque yejua, opajteque. ¹⁵ Yecuöquenu sente de yejua, cuöc omojtac ye opajtec, omocuec, hua tiechamööya Deus ca checöhuac tlajtule. ¹⁶ Hua omopechtiecac tieicxetla yejuatzi hua tietlasojcömachele. Hua ini nönca oyeya de estado de Samaria. ¹⁷ Hua onöhuatihuac Jesús, oquelfejque:

—¿Amo nencate nenmajtlactie tli nenpajteque? Hua inu checnöbe, ¿cöne cate? ¹⁸ ¿Amo oyeya öque mocuepas para tietlasojcömachelis Deus tlöcamo sa yaja ini nönca estranjiero?

¹⁹ Hua oquelfejque:

—Xemiehua hua xebeya. Por tomoneltocac ye tepajtec.

Quiene iyes cuöc hualiloas Jesús para tlamandörurus

²⁰ Hua tietlajtlanejque inu fariseos, nele quiema huölös tunale cuöc Deus tlamandörurus. Oquennönquelejque, oquemelfejque:

—Giente amo quejtasque cuöc Deus piehualus tlamandörurus. ²¹ Nimpor amo quejtusque: “Xequejtacö necö”, o noso “Xequejtacö niepa”. Pues Deus tlamandöruro* nemotzölö nemejua.

²² Hua oquemelfejque tiemachtejcohua:

—Huölös tiempo cuöc nenquenequesque ma huöla tunale cuöc naja öque onochi netlöcatl neyes ca nemejua. Pero amo nima huölös inu tunale. ²³ Hua giente nemiechelfisque: “Xequejtacö necö”, o noso “Xequejtacö niepa”. Amo xeyöcö para nenquejtasque, nimpor amo xequentocacö. ²⁴ Ipampa iyes quiename sente tlapetlönelestle, que cuöc tlapetlöne ipa sie pörte de elfecac, tlaniese hasta ocsie pörte elfecac. Ejqueu nuyejque cuale niechejtasque ca nobeyo naja que onochi netlöcatl ipa inu nieca tunale cuöc nehuölös. ²⁵ Pero primero conbenierebe ma necsufriro meyac sösantle, hua niechtlajyejtasque ini nönca giente. ²⁶ Hua quiene omochi ipa inun tunalte de Noé, ejqueu nuyejque iyes ipa inun tunalte cuöc nehuölös naja que onochi netlöcatl. ²⁷ Giente tlajtlacuöya, cojconiya, mosohuajtiöya hua monajnömectiöya. Ejqueu quechihuaya hasta pa inun tunale cuöc ocalac Noé ijtec inu börcobiebe itucö örca. Hua ohuöla ötzintle, hua oquenpojpolo innochtie. ²⁸ Ejqueu nuyejque quieme ipa inun tunalte de Lot, giente tlajtlacuöya, cojconiya, tlajtlatucaya, motlacubiöya, tlanajnamacaya, hua quechejchi-huaya calte. ²⁹ Cache ipa inun tunale cuöc Lot oquis de inu ciudad de Sodoma, oqueya de elfecac tletzintle hua azufre, hua oquenpojpolo innochtie. ³⁰ Ejqueu mismo mochihuas inun tunale cuöc notiejteticis naja que onochi netlöcatl. ³¹ Ipa inun tunale, öque iyes icpac cale, hua tli ihuöxca icaca calejtec, majcamo temo para quequextiti. Hua ejqueu mismo öque icaca ca caltienco majcamo mocuepa pa ichö. ³² Xetlalnömequecö tli oquepasöro isohua Lot. ³³ Öque beletes queneques quemöquextis inemeles, quixniempolus. Hua öque beletes moconformörus para queniempolus, quemalfis. ³⁴ Hua nemiechelfea que ipa inu nieca yohuale yesque unte ipa sente tlapechtle. Sente quebicasque sa de repiente, hua ocsente quecöjtiehuasque. ³⁵⁻³⁶ Unte sohuame testasque innehua. Sente quebicasque sa de repiente, hua ocsente quecöjtiehuasque.

³⁷ Hua yejua onöhuatque, otieyelfejque:

—Tlöcatzintle, ¿cöne mochihuas ini nönca?

Hua yejuatzi oquemelfejque:

—Cöne iyes cuierpo mejque, ca ompa mosentlölisque tzopilume.

18

Cuento de tlajtoöne hua icnusohuatl

* **17:21** Cuale nuyejque motradusirus: “nemojtecopa nemejua”.

¹ Hua oquemelfejque sente cuiento para quemejtetsique que queconbenieroa öque ma seme motlajtlötlajtejta, hua majcamo quecöhua itlötlajteles. ² Oquejtojque:

—Oyeya sente tlajtoöne ipa sente puieblo. Yaja amo tiemabeliöya Deus, nimpor amo pa quemejtaya tlöca. ³ Nuyejque oyeya ipa nieca puieblo sente icnusohuatl. Yaja huölöya ica inu tlajtoöne, hua quejtoöya: “Xomoarreglörfe nopeleito tli necpea ica noenemigo hua xomocastecörfe por tli oquechi”. ⁴ Pero por quiesque tiempo yaja amo oquenec. Cache sötiepa de meyac tunale oquejto ipa iyulo: “Mös amo netiemabelea Deus, nimpor amo pa nequemejta tlöca, ⁵ pero ini nönca icnusohuatl seme niechpasolojteneme. Hua por inu necarreglörus ipeleito, para ma ayecmo niechpasoluque”.

⁶ Hua oquejtojque Tlöcatzintle:

—Xejcaquecö tli quejtoa inu tlajtoöne amo yectec. ⁷ Pues tlö yaja carreglörö inu peleito, cache ca meyac arrasu Deus quencastecörusque inenemigos de tiegiente tli quemixpejpenque, tli tietzajtzelea yohualen tunale. Pos amo bejcöbihuas para quencastecörusque. ⁸ Nemiechelfea que sa nima quechihuasque. Cache cuöc naja que onochi netlöcatl nehuölös, ¿beles nequenniextiqui gente tli moneltoca necö ipan tlöltecpactle, noso beles amo?

Cuiento de fariseo hua tlanecheco

⁹ Hua oquemelfejque ocsente cuiento ca seque tli quepeaya confiönsa de que yejua oyeya yecteque lalebes, hua quendespresiöroöya noche ocseque. Oquejtojque:

¹⁰ —Unte tlöca otlejcoque ompa teupa omotlajtlötlajtito. Sente oyeya fariseo, inu ocsente oyeya tlanecheco. ¹¹ Inu fariseo ijcataya hua motlajtlötlajtejtaya ca sie yaja. Oquejto ejqueyi: “Deus, temetzmotlasojcömachelelea que amo necaca quiename ocseque tlöca. Pos yejua cate ichtejque, amo cualteque, tlaumepeaneme. Nuyejque amo neca quiename ini nönca tlanecheco. ¹² Netlajyubea ujpa por semöna, hua nectiemaca inu majtlactle pörte de noche tli necpea”. ¹³ Cache inu tlanecheco bejcateca oyeya. Amo quenequeya nimpor ajcopatlacheas ca elfecac, tlöcamo omomacaya ipa ipiecho ipampa pinöhuaya lalebes. Quejtoöya: “Deus, xeniechmojtele ca cuale, pos naja netlajtlacultec necaca”. ¹⁴ Nemiechelfea que ini nönca tlanecheco uya ca ichö ye yectec tieixpa Deus, pero inu fariseo amo. Pues noche öque mochajchamöhuas, quepichaquisque. Cache öque mopichaquis, quechamöhuasque.

Jesús quenteochijque pelantzetzi

¹⁵ Hua gente nuyejque tiehualequeliöya inpelancuconehua para ma quenmötocacö. Pero cuöc oquejtaque tiemachtejcöhua, quemajajuaya gente tli quenhualécaya inpelhua. ¹⁶ Pero Jesús oquennutzque, hua oquemelfejque:

—Xequencöhuacö pelantzetzi ma huölöcö notlac, hua amo xequentzacuelicö. Porque gente tli cate quiename nochemeji pelantzetzi quepea pörte cöne Deus tlamandöruro. ¹⁷ Melöhuac nemiechelfea, que öque beletes amo tiecöhuas Deus ma tlamandörucö ipa iyulo quiename sente peltzintle tiecöhua, inu tlöcatl amo calaques cöne Deus tlamandöruro.

Sente tlöcatl rico quenequeya quepeas nemelestle nochepa

¹⁸ Hua otietlajtlane sente tlayecönque, otieyelfe:

—Maestro, lalebes tecuale tetlöcatl. ¿Tli naves para necpeas nemelestle nochepa?

¹⁹ Jesús quelfejque:

—¿Tlica teniechelfea necuale netlöcatl? Amo onca sente cualtec tlöcamo sa sietzi, yejuatzi Deus. ²⁰ Inu mandamientos ye tecmate: “Amo xecalaque ca isohua ocsente”. “Amo xetlamecte”. “Amo xetlachteque”. “Amo tiecamac xetieajaque”. “Pa xequemejta motajtzi hua monöntzi”.

²¹ Entunses inu tlöcatl oquejto:

—Noche inu sa onecchijtebitz desde netzitzequetzi hasta öxö.

²² Cuöc Jesús oquecajque ini nönca, oquelfejque:

—Sa sente cosa oc metzpoloa. Xecnamaca noche tli tecpea, hua xequenxiexelfe tli porubejte. Ejqueu tecpeas ricojyutl ompa elfecac. Entunses xehuöla, xeniechtoca.

²³ Cache yaja omotequepacho lalebes cuöc oquecac ini nönca sösantle, ipampa oyeya rico lalebes. ²⁴ Hua cuöc oquejtaque Jesús, nuyejque netequepachuluc. Oquejtojque:

—Bel lalebes tequeyo para calaquesque tlin ricojte cöne tlamandöruro Deus. ²⁵ Cache isejco calaques sente camello por ixtelolo de sente öcuxa, que sente rico calaques cöne tlamandöruro Deus.

²⁶ Hua tli oquecajque oquejtojque:

—¿Öquenu noso cuale momöquextis tlö ejqueu?

²⁷ Hua yejuatzi oquemelfejque:

—Lo que tli abele para tlöca, cuale quechihuasque Deus.

²⁸ Entunses Piero oquejto:

—Xomojtele tejua otejcöjque tlin tohuöxca, hua temetzmotoquelejteneme.

²⁹ Hua yejuatzi oquejtojque:

—Melöhuac nemiechelfea, öque tli cualcöjtiehuas ichö, noso isohua, noso icnihua, noso itötajua, noso ipelhua, por queneques ma tlamandöro Deus, ³⁰ ipa nönca tiempo yaja queselis cache meyac töntos. Hua ipa inu tiempo tli huölös quepeas nemelestle nochepa.

Ocsajpa Jesús tlamachestejque que mecoas

³¹ Hua yejuatzi oquenbicaque inu majtlactle huan ume nencua. Oquemelfejque:

—Xequejtacö que teyabe ca ciudad de Jerusalén. Hua mochihuas noche sösantle tli oquejcuelojque inu tlayulepantejque acerca de naja que onochi netlöcatl. ³² Pues niechtiemöctisque inca tli amo de topuieblo. Yejua moburlörusque de naja, hua niechtratörusque san petzotec, hua niechchejchasque. ³³ Hua sötiepa niechbitequesque, hua niechmectisque. Cache ipa yeye tunale neyulebes.

³⁴ Pero yejua niontle amo casojcömateya de ini nönca sösantle. Pos ini nönca tlajtule amo cantendierojque, hua amo casojcömateya tli quejtuloöya.

Jesús quepajtejque sente limosniero ixcocoxque

³⁵ Hua omochi que cuöc onepachulutöya itech ciudad de Jericó, sente ixcocoxque oyehuataya ipa ojtle motlajtlajtlanejtaya. ³⁶ Ini nönca cuöc oquecac quiene panuya tlöca, otlajtla tlininu oyeya inu nieca. ³⁷ Hua oquelfejque que nele panoöya ca ompa Jesús de puieblo de Nazaret. ³⁸ Yecuöquenu otzajtzec, oquejto:

—Jesús, iConie David, ma temetz moyulcocolfe.

³⁹ Hua tli tlayecönaya cajajuaya nele ma quetzacua icamac. Pero yaja cache lalebes tzajtzeja:

—Iconie David, ma temetz moyulcocolfe.

⁴⁰ Yecuöquenu onequetzaluc Jesús, hua otlanhuatiluc ma quehualcacö. Cuöc yaja oaseto, oquetlajtlanejque:

⁴¹ —Pos ¿tli tecneque ma temetzchibele?

Hua yaja oquejto:

—Tlöcatzintle, ma netlachea.

⁴² Entunses Jesús oquelfejque:

—Xetlachea. Por tomoneltocac ye tepajtec.

⁴³ Hua sa nima otlajtlachix, hua tietocaya tiechamöjtöya Deus. Hua noche giente cuöc oquejtaque otieyectieniejque Deus.

¹ Hua ocalacoac hua panoaya por inu ciudad de Jericó. ² Ompa oyeya sente tlöcatl itucö Zaqueo, öque oyeya tlayecönque de inu tlanechecojque, hua oyeya rico. ³ Hua quenequeya tieyejtas Jesús öquenu beles iloaya. Pero abele otieyejtac ipampa lalebes meyac giente, hua ipampa yaja oyeya chapörro. ⁴ Entunses omomerö cache adelönte, hua otlejcoc ipa sente cuabetl de sicómoro para tieyejtas, pos ca ompa panoas. ⁵ Cuöc Jesús onaxihuaco ipa nieca locör, oquejtaque, hua oquelfejque:

—Zaqueo, xecuesebe xetemo, ipampa öxö necpea que nosiebis ipa mochö.

⁶ Yecuöquenu yaja otemo isejcö, hua otieselejque ipa ichö ca meyac pöquelestle. ⁷ Hua cuöc oquejtaque ini nönca, innochie tieca tlajtoöya Jesús. Quejejtöya:

—Yaja inu Jesús ocalac para mosiebis pa ichö de sente tlöcatl tlajtlacultec.

⁸ Yecuöquenu Zaqueo omoquetz, hua otieyelfe Tlöcatzintle:

—Xomojtele, Tlöcatzintle, tlajcopa de tli nohuöxca nequenmacas tli porubejte. Hua tlö canajyetla nequechtequele canajyeca, nejcuepelea ca nöjpa.

⁹ Hua Jesús oquelfejque:

—Öxö ye omomöquextejque giente ipa ini nönca chöntle. Pues nönca Zaqueo melöhuac nuyejque icaca iconie Abraham hua moneltoca quiename Abraham. ¹⁰ Pues naja öque onochi netlöcatl onehuöla onectiemuco hua onecmöquextico tli oixniempolejtaya.

Cuiento de sente tlöcatl tli quetiemaacac itomi ca itlatequepanojua

¹¹ Mientras oquecaqueya yejua ini nönca söstantle, Jesús oquejtojque ocsente cuiento. Oquejtojque ipampa ye itlac oyeya de ciudad de Jerusalén, hua ipampa yejua quepensöroöya que nele sa nima Deus piehualusquea tlamandörurus pan tlöltecpactle.

¹² Por inu oquejtojque:

—Sente tlöcatl hacendödo uya ipa ocsente tlöle bejca, para ompa mochihuas rey, hua sötiepa mocuepas. ¹³ Antes de que onya oquennutz majtlactie itlatequepanojua, hua oquenmacac diez mil piesos ca cara sesen tlöcatl. Oquemelfe: “Xectlönelicö mientras nebitz”. ¹⁴ Cache giente de inu nieca tlöle quetlajyelejtaya, hua oquetitlanque inrepresentöntes ma quetocacö, ma quejtucö: “Amo tecneque ini nönca ma iye rey topa tejua”.

¹⁵ Hua omochi que hualmocuec yaja. Ye oyeya rey. Otlatitla ma huölöcö inu tlatequepanojque öque oquenmacac inu tomi, para quemates tli oquetlönelejque. ¹⁶ Hua ohuöla inu cachto, hua oquejto: “Tlöcatzintle, ca motomintzi onectlö oc majtlactle töntos”.

¹⁷ Hua yaja oquelfe: “Cuale otecchi. Taja teca tecuale tetlatequepano. Ye onequejtac que teca de confiönsa ca tli sa tzitzequetzi. Por inu öxö xetlamandöro ipa majtlactie ciudades”. ¹⁸ Hua ohuöla inu segundo, hua oquejto: “Ca motomintzi, Tlöcatzintle, onectlö oc möcuile töntos”.

¹⁹ Hua nuyejque oquelfe itieco: “Taja nuyejque xetlamandöro ipa möcuilte ciudades”. ²⁰ Hua ohuöla ocsente, hua oquejto: “Tlöcatzintle, nönca motomintzi. Nequejyöntaya ijtec sente tzotzomajtle. ²¹ Pos otemetzmomabelele tejuatzi, ipampa melöhuac techecöhuac tomobetzteca, que temönelea tli amo otomotlölele, hua tomopexquelea tli amo otomotuquele”.

²² Yecuöquenu yaja oquelfe: “Amo cuale moyulo hua amo tecuale tetlatequepano. Ca lo que tli taja mismo tequejto temetzcutenöroa. Tecmajtaya que naja necaca nechecöhuac netlöcatl, que necöna tli amo onectlöle, hua que necpexca tli amo onectucac. ²³ ¿Tlica noso amo siquiera amo oteciemacac notomi ipa böncö? Ejqueu cuöc nehuölösquiöya necönasquea siquiera ca tli otequet”.

²⁴ Hua oquemelfe tli ompa oyejyeya: “Xejcujcuelicö inu tomi hua xecmacacö öque oquetlö majtlactle töntos”. ²⁵ Hua yejua oquelfejque: “Tlöcatzintle, ye quepea majtlactle töntos”.

²⁶ “Pos naja nemiechelfea que öque quepea, quemacasque cache meyac. Cache öque amo bel quepea, quequextelisque hasta inu tepetzi tli oc quepea. ²⁷ Pero inu niecate noenemigos tli amo queneque ma neye rey impa, xequenhualcacö necö, hua xequenmecticö nixtla naja”.

Jesús calacoac Jerusalén pa purojconetzi

²⁸ Hua cuöc ye oquejtojque ini nönca, quesequiruroöya tlayecönalutöya giente para ca inu ciudad de Jerusalén. ²⁹ Hua omochi que ohualiloac itlac puieblos de Betfagé hua Betania, itech inu nieca munte itucö Tepietl de los Olivos. Ompa oquentitlanque unte de tiemachtejcohua. ³⁰ Oquemelfejque:

—Xeyöcö ipa inu puieblo niepaca. Cuöc nencalaquesque ompa, nenqueniextisque sente purojconetzi elpetas. Ayemo öque ipa tlejco. Xectojtomacö, hua xecualecacö. ³¹ Tlö canajyeca nemiechtajtlanis: “¿Tlica nenquetojtoma?” ejqueyi nenquenönquelisque: “Tlöcatzintle quenesisitöruro”.

³² Hua uyajque tli oquentitlanque, hua oqueniextejque quiene oquemelfejque. ³³ Hua cuöc oquetojtontaya inu purojconetzi, itiecohua de inu purojconetzi oquemelfejque:

—¿Tlica nenquetojtoma inu purojconetzi?

³⁴ Hua yejua oquejtojque:

—Tlöcatzintle quenesisitöruro.

³⁵ Yecuöquenu oquehualercaque tieca Jesús. Hua oquetlötlölejque intlaquie ipa inu purojconetzi, hua ipa tietlejcabejque Jesús. ³⁶ Hua cuöc ye biloaya yejuatzi, quesoaya intlaquie ipa ojtle. ³⁷ Hua ye axihuato itlac inu ciudad, cöne mopeloa ojtle itlac inu Tepietl de los Olivos. Noche inu meyactie tiemachtejcohua ca meyac pöquelestle opiejque tiechamoöya Deus ca checöhuac tlajtule por noche tli tietzöbetl oquejtaque yejua. ³⁸ Oquejtoöya:

—¡Ma tetietechihuacö tietucöyupa Tlöcatzintle nöiloac rey öque biloatz! ¡Ma uye yecsiebelestle ompa elfecac, hua yectieniebelestle ompa tlacpac!

³⁹ Yecuöquenu seque de inu fariseos de tli ompa tlamachyöya otieyelfejque:

—Maestro, xequenmajajfele inu momachtejcoztetzihua.

⁴⁰ Yejuatzi onöhuatihuac, oquemelfejque:

—Nemiechelfea que tlö ini nöncate quetzacuasque incamac, teme tzajtzejtesque.

⁴¹ Hua cuöc ye itlac onaxihuato oquejtaque inu ciudad, hua chucoac ipampa yaja.

⁴² Oquejtojque:

—¡Ay, Jerusalén! ¡Ojalá tequixomatesquiöne ipa ini nönca tunale tli söstantle metzhualequelisquea siebelestle! Cache öxö inu söstantle mojoynteca para amo tequejtas.

⁴³ Pues huölösque tunalte mopa, que inu moenemigos metzyehualusque quieme ca tepöntle, hua metztlölelisque quiename cerca, hua ca nobeyo metzyehualusque para amo tequisas. ⁴⁴ Hua metztlajcalesque ipan tlöle, ca noche tli mojtec neme. Hua amo quecöhuasque mopa sente tietetu icpac ocsente tietetu. Ini nönca mopa mochihuas ipampa amo otequixomat inin tunale cuöc onehuöla ca taja.

Jesús otlaquextejque pa teopantle

⁴⁵ Hua ocalacoac ipa teopantle, hua opiehualuc quenquextilo ca queyöhuac quiejquech tlajtlanamacaya. ⁴⁶ Quemelfiloöya:

—Tlajcuelulpanca que: “Nocal iyecale de netlötlajtelestle”. Pero nemejua ye onenconchijque tiecaltzi Deus quieme cana ustutl de ichtejcöztetzi.

⁴⁷ Hua cöra tunale tlamachtiloöya ipa teopantle. Pero inu jefes de teopexcöztetzi, ca tlamachtioneme de teotlajtule hua tli tlötlayecönque de inu giente, yejua quenequeya tiemectisque. ⁴⁸ Pero amo queniextejque quiene ca quechihuasque. Pues noche giente oquecactaya tli quejtuloöya.

¹ Hua omochi ipa sie tunale, cuöc yejuatzí quenmachtilutaya giente ipan teopantle hua tlanunutzaloöya de cuale tlamachestelestle, oaseto jefes de teopexcötzetzi ca inu tlamachtióneme de teotlajtule hua biebertzetzi. ² Hua otieyelfejque:

—Xetiechelfe, ¿ca tli beletelestle tecchihua ini nönca sösantle? Noso ¿öquenu ometzmacac ini nönca beletelestle?

³ Onöhuatihuac, hua oquemelfejque:

—Naja nuyejque nemiechtlajtlanes sente pregunta. Xeniechelficö nemejua. ⁴ Xohuö Bautista tlacuötiequiöya. ¿Beles Deus cualtitlanque ma tlacuötieque, noso tlöca cualtitlanque ma tlacuötieque?

⁵ Yecuöquenu yejua quepensörojque. Molfejque:

—Tlö tequejtusque que Deus, yaja quejtus: “¿Tlica noso amo nemoneltocaque ca yaja?” ⁶ Pero tlö tequejtusque que tlöca, noche ini giente tiechtecaltisque, ipampa yejua quepensöroa que Xohuö oyeya tlayulepante de Deus.

⁷ Entunses onöhuatque que amo quemate öquenu cualtitla. ⁸ Yecuöquenu Jesús oquemelfejque:

—Nuyejque naja amo nemiechelfis öquenu niechmacac beletelestle para ma necchihua ini nönca sösantle.

Cuiento de tequetque petzoteque

⁹ Hua piehualuc quemelfiloöya giente ini nönca cuiento:

—Sente tlöcatl oquetucac sente huierta de uvas temecat. Quentlaniejte tejtequetque, hua yaja uya ca bejca hua amo omocuec ca ompa por meyac tiempo. ¹⁰ Pos ca tiempo, ocualtitla sente itlatequepano inca inu tequetque, para yejua ma quemacacö de inu fruto de inu huierta. Pero inu tequetque oquebitejque, hua oquetitlanque sin niontle. ¹¹ Hua turavea cualtitla ocseite tlatequepano. Pero yaja nuyejque oquebitejque hua oquetratörojque san petzotec, hua oquetitlanque sin niontle. ¹² Hua oc turavea cualtitla ca yete tlatequepano, hua inu nieca nuyejque oquecocojque hua oquetojtocaque.

¹³ Yecuöquenu inu tlöcatl öque ihuöxca huierta oquejto: “¿Tli noso necchihuas? Nec-titlanes notlasojcöconie. Beles pa quejtasque yaja”. ¹⁴ Cache inu tequetque, cuöc oquejtaque, oquepensörojque entre yejua. Molfiöya: “Yaja ini öque mohuöxcatis de ini nönca huierta. Ma tecmecticö para que tli yaja mohuöxcatisquea tohuöxca iyes”. ¹⁵ Hua oquequextejque ca queyöhuac de inu huierta, hua oquemectejque. ¿Tli noso quenhibelis inu tlöcatl öque ihuöxca inu huierta? ¹⁶ Pos huölös quenpojpoluqui inu niecate tequetque. Hua inu huierta quentlaniejtis ocseque.

Hua cuöc oquecajque inu giente, oquejtojque:

—Majcama ejqueu mochihua.

¹⁷ Cache yejuatzí oquemejtaloöya, hua oquemelfejque:

—¿Tli noso icaca ini nönca tli tlajcuelulpanca?

Inu tietetu tli calchihuaneme quetlanielcöjque, yaja mismo omochihuaco esquinero principal.

Pos cöne tlajtlajtoa de inu tietetu, tlajtlajtoa de Cristo. ¹⁸ Öque beletes betzes ipa inu tietetu, motlajcocotunas. Cache tlö canajyeca ipa yaja betzes inu tietetu, quepajpötlas.

¹⁹ Hua inu jefes de teopexcötzetzi ca tiehua inu tlamachtióneme de teotlajtule quetiemoöya manera quiene tieasesque ipa inu nieca ura, porque yejua casojcömateya que ca nieca cuiento tlajtlajtuloöya de yejua. Pero amo tieaseque ipampa quenmabeliöya giente.

¿Motlaxtlöhuas contrebuseyu noso amo?

²⁰ Hua seme tieyetzta yejuatzí abier tli quechihuasque. Quenhualentitlaneto seque giente sa ichtacajtzí. Yejua quechihuaco quiename cana yecteque oyejyeya, para ejqueu

quecaquesque tlö cana yejuatzi quejtusque canajyetla tli itech cuale tietieyelfisque. Entunses cuale tietiemöctisque ica inu cubernadur para ma tiejuscöro hua ma tiecastecöro.

²¹ Ini nöncate giente otietlajtlanejqque, oquejtojque:

—Maestro, tecmajtecate que tomojtalfea hua tomotlamachtelea lo que tli melöhuac, hua que nionöque tlöcatl amo metzmoimportörfea tlö rico tlö porube tlö quiene, tlöcamo de melöhuac tequenmojtetelea giente ojtle de Deus. ²² ¿Beles conbenierebe tecmacasque inu emperador César tocontribuseyu, noso amo?

²³ Pos yejuatzi casojcömatque quiene mañusos oyejyeya. Oquemelfejque:

²⁴ —Xeniechejteticö denario tomi. ¿Öqueniji ixöyac quepea, hua öquenu ihuöxca inu tlajcuelule?

Yejua oquejtojque:

—De César.

²⁵ Yecuöquenu oquemelfejque:

—Pos xecmacacö César tli quetocöroa César, hua xetiemacacö Deus tli tietocöroa Deus.

²⁶ Hua abele tli oquejtojque amo cuale de tietlajtultzi ixtla inu puieblo. Queti-etzöbejqque quiene ca quennönquelejque, hua oquetzajque incamac.

Saduceos tlajtlanejqque tlö mimejqque yulebesque

²⁷ Entunses ohuölajque tietlac seque de inu saduceos, öque quejetoa nele mimejqque amo yulebesque. Yejua tietlajtlanejqque, ²⁸ tietiefejque:

—Maestro, Moisés otiechejcuelfe que tlö icni de sente tlöcatl meque, tli quepeaya isohua, pero amo quepeaya ipelhua, que nele icni ma case isohua para quentlöcatelelis ipelhua de icni. ²⁹ Oyeya, noso, checume icnijte. Inu cachtö jiebe oquepex isohua, pero omec sin quepeas ipelhua. ³⁰ Hua icni omosohuajte ca yaja, hua nuyejque ejqueu ipa omochi. ³¹ Hua ocsente icni ocasec, hua ejqueu mismo noche checumeme, hua innochtie omejmejque sin que amo quencöjtiejque inpelhua. ³² Sötiepa inu sohuatl nuyejque omequecö. ³³ Entunses, cuöc yulebesque mimejqque, ¿cötlaja de yejua iyeyes isohua ini nönca sohuatl? Pos innochtie checumeme oquepexque quiename insohua.

³⁴ Yecuöquenu Jesús oquemelfejque:

—Tlöltecpactlöca mosojsohuajtea hua monajnömechtea. ³⁵ Pero niecate öque quemeresieroa para asetibe ipa inu nieca tlöltecpactle yancuec hua para yulebesque de intzölö mimejqque, yejua nimpör amo mosojsohuajtea, nimpör amo monajnömechtea. ³⁶ Pos ayojcuele mejmequesque, pos ye cate iguöl quiename öngeles, hua cate tiepelhua Deus, pos ye onyojyulejqque. ³⁷ Pero que tiel mimejqque yulebesque, Moisés mismo otlamachte cöne tlajtoa de tebetztle. Pos tiecuitea Tlöcatzintle Deus de Abraham, Deus de Isaac, hua Deus de Jacob. ³⁸ Bieno pues, yejuatzi amo iloac Deus de mimejqque, tlöcamo Deus de tli yulejtecate. Pos noche nentecate para ca yejuatzi.

³⁹ Hua tienönquelejque seque tlamachtioneme de teotlajtule. Oquejtojque:

—Maestro, cuale tli otomojtalfe.

⁴⁰ Pos ayecmo öque matreviro para tietlajtlanes canajyetla.

¿Cristo iloac iconie de öquenu?

⁴¹ Hua yejuatzi oquemelfejque:

—¿Quiene mojtöa que nele inu Cristo öque Deus quixpejpenque icaca iconie de David?

⁴² Pos sie yaja David quejtoa ipa inu libro de Salmos:

Tlöcatzintle tiemolfeliluc notlöcatzintle:

“Xomötlöle ca nomöyecömpa,

⁴³ hasta senamo ma nequentiemöcte moenemigos momötla”.

⁴⁴ Ejqueu noso David quecuitea Cristo “Tlöcatzintle”. ¿Quiene noso icaca iconie?

Jesús tlamachtilöya ma giente quepeacö cueröro de tlamachtioneme de teotlajtule

⁴⁵ Hua mientras oquecaqueya noche puieblo, oquemelfejque tiemachtejcohua:

⁴⁶ —Xecpeacö cueröro de inu tlamachtioneme de teotlajtule. Pos yejua mocha-jchamöhua yajtenemesque ca bejbeye intlaquie. Quecualejta lalebes ma giente quenyectlajpalucö ipa plösa. Seme quetiemoa tlaixpa yesque ipa teopancucone, hua cöne tlajtlacua quetiemoa tli cache cuajcualle locör. ⁴⁷ Motejtechtea inchajchö de icnusohuame. Hua para nises que lalebes cualteque cate motlötlaitea lalebes meyac tiempo. Pero impa ini nöncate huölös cache bieye incastigo.

21

Sente icnusohuatl mös porube contlöle cache meyac que ricojte

¹ Hua otlichealuc, hua oquemejtaque tli ricojte quiene quetlöliöya intomi para bentle ijtec caxu. ² Hua nuyejque oquejtaque sente icnusohuatl porube, que quetlöliöya unte tomi istöque. ³ Hua oquejtojqe:

—Ica melöhuac tli nemiechelfea, que ini nönca icnusohuatl oquetlöle cache meyac que innoctie ocseque. ⁴ Pos innoctie ini nöncate sa de tli subra oquetlölejque para bentle. Cache ini icnusohuatl mös porube oquetlöle noche, hua amo tli mocöbe tli quecuös.

Jesús otlamachestejqe que teopantle xexetunes

⁵ Hua seque tlajtoöya de inu teopantle, que lalebes cuale tlachejchijtle ca cualtzetzi teme hua söstantle bentle. Yejuatzi oquejtojqe:

⁶ —Ini nönca söstantle tli nenquejta, huölösque tunalte que amo mocöhuas tietetu icpac ocsente tietetu, tlöcamo noche yecxexetunes.

Sieñas tli mochihuati antes que tlames tlöltecpectle

⁷ Hua otietlajtlanejqe, otieyelfejque:

—Maestro, ¿quiema noso mochihuas ini nönca söstantle? ¿Tli sieñas oyes cuöc ini nönca söstantle miero mochihuati?

⁸ Yejuatzi oquejtojqe:

—Xomotlachilicö majcamo öque nemiechcaycayöhua. Pues huölösque meyactie notucöyupa. Quejtusque: “Naja neCristo”, hua “Tiempo ye tlanteca”. Amo xequentocacö.

⁹ Cache cuöc nenquecaquesque de guerras hua que momagatecate lalebes, amo xomomajticö, porque ini nönca söstantle quepea que mochihuas cachtö. Pero amo sa nima tlames tlöltecpectle.

¹⁰ Yecuöquenu oquemelfejque:

—Majcoques nación cuntra nación, igiente de sente rey encuentra de igiente de ocsente rey. ¹¹ Tlaolines lalebes checöhuac ipa meyactie tlölte, hua ca nobeyo giente öpesmequesque hua iyebieye cocolestle. Hua nisesque söstantle tiemajte hua sieñas bejbeye ipa elfecac. ¹² Pero cachtö de que mochihuas ini nönca söstantle, giente nemiechasque, hua nemiechtepotztocasque, hua nemiechtiemacasque ipan teopancucone hua ipan cörseles, hua nemiechbicasque imixpa reyes hua imixpa cubernadurte ipampa nenquebica notucöyo. ¹³ Ejqueu cuale nenquemelfisque de lo que tli nemoneltoca. ¹⁴ Xecdesedirucö öxö ipa nemoyulo que amo tli nenquepensörojtasque cachtö de quiene nennöhuatesque. ¹⁵ Porque naja nemiechmacas tlajtule hua machelestle que nemoenemigos abele quexexicusque noso abele nemiechtlötlaitulcuepelisque. ¹⁶ Cache hasta nemotötajua nemiechtiemöctisque, hua nemocnihua, hua nemogientes, hua nemoamigos. Seque de nemejua nemiechmejmectisque. ¹⁷ Nemiechtlajyelejtasque noche giente por nopampa. ¹⁸ Cache nion sente tzontle de ipa nemotzonteco amo ixniempolebes. ¹⁹ Por xecxicojtacö xecmöquexticö nemoyulo.

²⁰ Pos nenquejtasque ini Jerusalén ye oqueyehualojque meyactie soltörojte. Xecmajtacö cuöquenu que ye miero tlaxexetotzas. ²¹ Cuöquenuju quiejquech yesque ipan Judea, ma cholucö hasta ipa tepieme. Quiejquech yesque ipa inu tlöle ma yöcö, hua tli yesque ipa ocsente tlöle majcamo huölöcö ca Judea. ²² Ipampa ipa inu niecate

tunalte Deus quencastecörusque giente por lo que tli amo cuale tiechibelejque, para ma mochihua noche sösantle tli tlajcuelulpanca. ²³ ¡Porubejte quiejquech tli uutzte, hua tli tlajtlabepöjtecate ipa inu niecate tunalte! Pues mochihuas sösantle petzotec ipa tlöltecpectle, hua tiecualöneles Deus betzes impa ini giente. ²⁴ Quenmejmectisque ca espöda, hua meyactie quenbicasque quiename priesoste ipa ocseque tlölte. Hua nönca ciudad de Jerusalén ipa moquetzasque giente de ocseque naciones hasta senamo ma tlame inu tiempo cuöc inu niecate giente tlamandörusque.

Jesús öque nechihualuc tlöcatl hualiloas ocsajpa

²⁵ Yecuöquenu yesque sieñas ipan tunale, hua ipa mietztle, hua ipa sitlalte. Ipan tlöltecpectle giente quepeasque tiecoco hua amo quematesque tli quechihuasque ipampa lamör moulinea lalebes hua tlatecuinea. ²⁶ Sa modesmayörusque giente ipampa majcömequesque de que meyac sösantle ye miero mochihuasque ipa tlöltecpectle. Pos inu sösantle checöhuac de elfecac moulinis. ²⁷ Yecuöquenu quejtasque cuöc naja que onochi netlöcatl nehuölös ipa sente mextle ca checöhualestle hua meyac tlanixtelestle. ²⁸ Hua cuöc ini nönca piehuas mochihuas, xejcopatlacheacö, xecajcoquecö nemotzonteco, ipampa nemomöquexteles ye miero aseteca.

Ejiemplo de icox cuabetl

²⁹ Hua oquemelfejque sente ejiemplo:

—Xequejtacö inu icox cuabetl hua noche ocseque cuajme. ³⁰ Cuöc ye itzmoline, nenquejta hua nemomaca cuienta que ye asequi xupantla. ³¹ Ejqueu nuyejque, cuöc nenquejtasque nemejua que ye mochijteca ini nönca sösantle, xecmatecö que ye miero piehualus tlamandörurus Deus. ³² Melöhuac nemiechelfea, que amo mequesque innochie tli *öxö nentecate hasta senamo mochihuas noche sösantle. ³³ Elfecac hua tlöltecpectle panusque, cache notlajtul amo panus.

Ma tetlachixtacö

³⁴ Xomojtacö sie nemejua, majcamo iye que cana pa nemoyulo nenquepensörusque sa de borrachera hua tlöhuöncölestle, hua de sösantle de ini nönca nemelestle de tli öque motequepachus. Pos ejqueu huölös nemopa inu nieca tunale sa isejco quiename sente trömpa sa isejco case yulcötl. ³⁵ Pos ejqueu huölös impa noche tli nentecate ipa noche tlöltecpectle. ³⁶ Seme xetlachixtacö noso. Xomotlajtlötlajtejtacö para ma xecpeacö checöhualestle para nemöquisasque cuöc noche ini nönca sösantle huölös, hua nenniesesque nixtla naja que onochi netlöcatl.

³⁷ Hua cöra tunale tlamachtiloöya ipa teopantle. Ca yohuale quixoaya hua nesiebitoöya ipa munte tli itucö Tepietl de los Olivos. ³⁸ Hua noche giente ohuölöya ca ise cualcö, para tiecaquesque ipa teopantle.

22

Quetiemoöya manera quiene tiemectisque Jesús

¹ Hua ye miero aseya inu tunale de yelfetl de pöntzi sin levadura, que itucö Pöscua. ² Jefes de teopexcötzetzi ca tiehua tlamachtioneme de teotlajtule quetiemoöya quiene tiemectisque. Pero quetraböjomatque porque quenmabeliöya inu giente.

³ Hua ocalac inu Satanás ijtecopa Judas, öque mocuitiöya Iscariote. Yaja oyeya sente de inu majtlactle huan ume tiemachtejcohua. ⁴ Hua uya otlajtlajtuto inca jefes de teopexcötzetzi hua inca capetönte. Tlajtlajtoöya de quiene tietiemöctis Jesús inca yejua. ⁵ Yejua opajpöjque, hua queprometierfejque nele quemacasque mieleyu. ⁶ Yaja oquejto que cuale, hua quetiemoöya quiene tietiemöctiti ca yejua sin que ompa yesque giente.

Jesús ocualuc sölültimo cena

* **21:32** Cuale nuyejque motradusirus: “entunses nemesque”.

⁷ Hua oaseco inu tunale de yelfetl de pöntzi sin levadura. Ipa inun tunale ijyaya para quemectisque inu calnieloyconetzi para bentle de pöscua. ⁸ Yejuatzi oquetitlanque inu Piero ca tiehua Xohuö. Oquejtojque:

—Keyöcö, xetlapreparörucö para tejuöcsque tlacuale de pöscua yelfetl.

⁹ Yejua otieyelfejque:

—¿Cöne tomonequitea ma tetlapreparörucö?

¹⁰ Yejuatzi oquemelfejque:

—Xequajtacö que cuöc nencalaquesque ipan ciudad, nemiachnömeques sente tlöcatl tli quebica sente öcumetl ca ötzintle. Xectocacö hasta ipa inu chöntle cöne calagues. ¹¹ Ompa xequelficö inu chöne: “ToMaestro metzelfilo: ¿Cönenca cale cöne nejcuös tlacuale de pöscua yelfetl ca nomachtejcohua?” ¹² Pos yaja nemiachjetetis sente bieye cuörto icpac cale que quepeas noche tli tecnesesitörusque. Ompa xetlamömanacö.

¹³ Uyajque noso, hua oqueniextejque san quiene ca oquemelfejque. Hua ompa otlamömanque para pöscua.

¹⁴ Cuöc ye oaseco ura onetlöliluc ipa miesa, hua ca yejuatzi tietlateotitlanhua. ¹⁵ Hua oquemelfejque:

—Bel lalebes onecnec nejcuös ini tlacuale de pöscua ca nemejua antes de que nec-sufirirus. ¹⁶ Pos nemiachelfea que amo nejcuös ocsajpa hasta senamo nejcuös inu melöhuac tlacuale de pöscua ompa cöne Deus tlamandöruro.

¹⁷ Ocönque sente bölsö, hua otimotojasojcömacheliluc. Entunses oquejtojque:

—Xecönacö ini nöncä, hua xomoxiexelfelicö entre nemejua. ¹⁸ Pues nemiachelfea, que ayecmo quiema neconis ocsajpa ini iöyo de uvas hasta senamo huölös tiempo cuöc Deus tlamandörurus.

¹⁹ Hua ocönque pöntzi, hua tiemotlasojcömacheliluc. Entunses oquecojcotunque, hua oquenmacaque. Oquejtojque:

—Yaja ini nöncä *ica nocuierpo **[que nemopampa nectiemaca. Xecchihuacö ini nöncä para nemiachelnömetasque.

²⁰ Ejqueu mismo oquechijque ca inu bölsö, sötiepa de cuöc ye otlajtlacualuc. Oquejtojque:

—Ini nöncä bölsö de vino *ica inu yancuec acuerdo tli mochihuas por noyeso, que nemopampa nunuquebes.]

²¹ Pero xequajtacö que öque niechantrecörus ica ca naja ipa miesa. ²² Melöhuac naja que onochi netlöcatl nemeques, pues Deus ejqueu oquetzontejque. Pero iporube de inu nieca tlöcatl öque niechantrecörus!

²³ Yecuöquenu yejua opiejque motlajtlaneya sie yejua öque de yejua beles quechihuas ini nöncä.

Öquenu cache bieye momajtas

²⁴ Hua omochi peleito intzölö yejua por öque de yejua momajtaya cache bieye.

²⁵ Yejuatzi oquemelfejque:

—Inu reyes de gente de ocseque naciones motiecojtea de yejua. Hua inu gente quepea que quencuitisque “toPaliebiöneme” inu niecate tli ca checöhuallestle quemandöroa. ²⁶ Cache nemejua majcama ejqueu xecchihuacö, tlöcamo öque cache bieye momajteca nemotzölö nemejua, ma mochihua quiename inu cache peltuntle. Hua öque icaca quiename tlayecönque, ma iye quiename tlatequepano. ²⁷ Pos ¿öque cache bieye momajteca, öque motlölea ipa miesa, noso öque tlatequepanoa? ¿Amo yaja öque motlölea ipa miesa? Hua naja necaca ca nemejua quiename öque tlatequepanoa.

* **22:19** Cuale nuyejque motradusirus: “querepresentöroa”.

** **22:19** De mölas inu tlajtulme tli cate intzölö corchetas [] amo oyejyeya ipa ömatl de San Lucas cuöc primero omojcuelo.

²⁸ 'Cache nemejua nencate tli seme nenquesequirojtaya ca naja ipa noche tli onec-sufriro. ²⁹ Naja nemiechmaca para nentlamandörusque, quieme noTajtzi niechmacaque naja ma netlamandöro. ³⁰ Nemejua nentlacuösque hua nentlaisque ipa nomiesa ompa cöne netlamandörus. Nemotlölisque ipa tronos para nenquenjuscöorusque inu majtlactle huan ume grupos de giente de Israel.

Jesús quelfejque Piero que yaja quejtus yexpa que amo tieixomate

³¹ 'Semu, Semu, xequejta que inu Satanás onemiechtajtlata para nemiechtzetzelus quiename öque quetzetzeloa trigo, abier tlö nenbetzesque ipa tlajtlacule. ³² Pero naja nontlajtlötlajte por taja ma moneltoqueles majcamo metzpolo. Taja, cuöc tomocuepas, xequencuajpetzo nöncate mocnihua.

³³ Hua yaja oquejto:

—Tlöcatzintle, ye neca nelisto para neyös ca tejuatziz mös ipan cörsel noso hasta ipa mequelestle.

³⁴ Hua yejuatziz oquejtojque:

—Piero, temetzelfea que öxö ayemo tzajtzes canteliex cuöc ye yexpa otecnegöorus que amo teniechixomate.

Ma quebicacö puxajtle, morröl, hua espöda

³⁵ Hua oquemelfejque:

—Cuöc onemiechtitla sin puxajtle, sin morröl, sin sapötoste, ¿nemiechpolo canajyetla?

Hua yejua oquejtojque:

—Amoyetla.

³⁶ Hua oquemelfejque:

—Pos öxö, öque quepea puxajtle, ma cöna, hua nuyejque morröl. Hua öque amo quepea espöda ma quenamaca ipelesol hua ma quecoa. ³⁷ Pos nemiechelfea que quepea que mochihuas nopa inu nieca tli tlajcuelulpanca: “Hua inca tli tlajtlaculteque omopu”. Pues tli tlajcuelulpanca de naja quepea que mochihuas.

³⁸ Yecuöquenu yejua oquejtojque:

—Tlöcatzintle, xomojtele necö unte espödas.

Hua yejuatziz oquemelfejque:

—*Sa ca inu ye cuale.

Jesús netlötajtiluc pan Tepietl de los Olivos

³⁹ Hua oquixoac. Quienamo quepealoöya costumbre, obiloac ipa inu Tepietl de los Olivos. Hua tiemachtejcohua nuyejque tietocaque. ⁴⁰ Hua cuöc ye onaxihuato ipa inu nieca locör, oquemelfejque:

—Xomotlajtlötajticö para amo nemiechyulmötocas Amo Cuale Tlöcatl.

⁴¹ Hua yejuatziz onenencuaxeluluc de yejua quieme cöne onase sente tietetu cuöc öque tlamutla. Ompa onetlancuöquetzaluc hua onetlajtlötajtiluc. ⁴² Oquejtojque:

—NoTajtzi, tlö tomonequitea, xomojcuenele nöncä bölsö de tietunie majcamo niech-tocöro. Cache majcamo mochihua tli notlanequeles, tlöcamo tli motlanequelestziz teju-atziz.

⁴³ *[Hua omoniexte tieca sente öngel de elfecac tiechecöhualesmacaco. ⁴⁴ Hua tlasufriruroöya lalebes, hua cache netlajtlötajtiloöya. Oquis tieitunal quiename yestle hua quechepinejque hasta tlölpa.] ⁴⁵ Hua neajcoqui huac de ipa netlajtlötajtelestle, hua ohualiloac intlac tiemachtejcohua. Oquenniextiluco cojcochtaya porque moyulcocoöya lalebes. ⁴⁶ Oquemelfejque:

* **22:38** Cuale nuyejque motradusirus: “Ma ayecmo tetlajtlajtuöc de ini”. * **22:43** De mölas inu tlajtulme tli cate intzölö corchetas [] amo oyejyeya ipa ömatl de San Lucas cuöc primiero omojcuelo.

—¿Tlica nencojcoche? Xemiehuacö, hua xomotlajtlötajticö para amo nemiechyulmötocas Amo Cuale Tlöcatl.

Enemigos de Jesús tieaseque

⁴⁷ Cuöc yejuatzi oc tlajtlajlututaya, necö ohuölajque meyac giente. Hua öque itucö Judas, sente de inu majtlactle huan ume tiemachtejcohua, quenyecöntöya. Hua omopacho tietlac Jesús para tiepetzus. ⁴⁸ Pero Jesús oquelfejque:

—Judas, ¿ica petzulestle teniechantrecöroa naja que onochi netlöcatl?

⁴⁹ Hua cuöc oquejtaque tli oyejyeya ca yejuatzi tli mochihuati, otieyelfejque:

—Tlöcatzintle, ¿ma tomagacö ca toespödas?

⁵⁰ Hua sente de yejua conmacac itlatequepano de tlajtojcöteopexque. Pos quetejtequele inacas tli ca imöyecmö. ⁵¹ Pero onöhuatihuac Jesús, oquejtojqque:

—Xejcöhuacö hasta necö.

Hua oquemötocaque inacas de inu tlatequepano, hua opajtec. ⁵² Hua ompa huölöya para tieasesque Jesús inu jefes de teopexcötzetzi hua capetönte de inu guardia de teopantle, ca tiehua biebertzetzi. Hua Jesús oquemelfejque:

—¿Nenhualiejque ca espödas hua ca cuabetl quiename cana cuntra sente ichtejque?

⁵³ Mös neyeya cara tunale nemotlac ipan teopantle, pero amo onenniechaseque. Pero öxö yaja ini nönca nemoura, hua iura de ichecöhuales de inu moxicoöne tli ica pa tlajtlayohuaquelestle.

Piero oquejto que amo tieixomate Jesús

⁵⁴ Hua tieaseque hua tiebicaque hasta ipa ichö tlajtojcöteopexque. Pero Piero tietocaya bejcateca. ⁵⁵ Hua giente oquetlölejque tletzintle ipa pötio. Omotlölejque innochie queyehualojque tletzintle. Entunses omotlöle nuyejque Piero intzölö yejua. ⁵⁶ Hua sente sohuatl tlatequepano oquejtac quiene yehuataya itlac tletzintle. Oquetejtieyejtac yaja, hua oquejto:

—Ini nönca nuyejque ca yaja oyeya.

⁵⁷ Pero yaja oquenegöro. Oquejto:

—Sohuatl, amo nequixomate.

⁵⁸ Hua oc tepetzi sötiepa, oquejtac ocsente, hua oquejto:

—Taja nuyejque teca de yejua.

Pero Piero oquejto:

—Tlöcatl, naja amo.

⁵⁹ Hua sötiepa de quieme sie ura ocsente quejtoöya ca confiönsa:

—Melöhuac ini nönca tlöcatl nuyejque oyeya ca yaja, pues icaca de inu estado de Galilea.

⁶⁰ Hua Piero oquejto:

—Tlöcatl, amo necmate tli tequejtoa.

Hua nima cuöc yaja oc tlajtlajtojtaya, inu canteliex otzajtzec. ⁶¹ Yecuöquenu Tlöcatzintle onecuepaluc, hua oquejtaque Piero. Entunses Piero oquelnömec de inu tietlajtul Tlöcatzintle, quiene oquelfejque: “Antes tzajtzes canteliex, tequejtus yexpa que amo teniechixomate”. ⁶² Entunses oquis ca queyöhuac hua ochucac lalebes.

Tieca moöbaltiöya Jesús hua tiebitequeya

⁶³ Hua inu tlöca tli tiepeaya Jesús moburlöroöya de yejuatzi hua tiebitequeya. ⁶⁴ Hua tietlapachelfiöya tiexöyac. Entunses tietlajtlaniöya, tieyelfiöya:

—Xetiechyulepante, xetiechelfe öquenu ometzmacac.

⁶⁵ Hua tieyelfiöya meyac ocseque söstantle, hua tiepöpöcaya.

Tiebicaque Jesús ipa junta

⁶⁶ Hua cuöc ye omochi ca tunale, omosentlölejque biebentzetzi de puieblo ca tiehua jefes de teopexcötzetzi hua tlamachtioneme de teotlajtule. Tiebicaque ipa injunta.

⁶⁷ Oquejtojque:

—Tlö tecaca teCristo xetiechelfe.

Pero yejuatzi oquemelfejque:

—Tlö nemiechelfis, amo nemoneltocasque. ⁶⁸ Hua tlö naja nemiechtlajtlanis, amo nenniechnönquelisque. ⁶⁹ Cache desde öxö naja que onochi netlöcatl neyehuatas ca tiemöyecmö Deus öque lalebes quepealo checöhuallestle.

⁷⁰ Hua oquejtojque innochie:

—Entunses ¿taja teca tetieConietzi Deus?

Quemelfejque:

—Nemajua nenquejtoa pos naja necaca.

⁷¹ Yecuöquenu yejua oquejtojque:

—¿Tli para cache tecneque öque tiechmelöjcpubelis de tli oquejto ini tlöcatl? Pos sie tiejua ye otejcajque tli yaja mismo oquejto.

23

Tietiemacato Jesús ca Pilöto

¹ Yecuöquenu omajcojque innochie yejua, hua otiebicaque ica Pilöto. ² Hua opiejque tietieyelfiöya. Oquejtojque:

—Ini nönca tlöcatl otecniextejque que quixniempolojteneme tonación. Amo quecöhua ma tecmacacö tocontrebuseyu ca César. Quejtoa nele yaja icaca Cristo, inu rey.

³ Pilöto otietlajtlane, oquejto:

—¿Taja terey de joriojte?

Onöhuatihuac yejuatzi, oquejtojque:

—Icaca quiename taja tequejto.

⁴ Hua Pilöto oquemelfe inu jefes de teopexcötzetzi, hua inu giente tli tlamachyeya:

—Niontle tlajtlacule amo necniextea ica ini nönca tlöcatl.

⁵ Cache yejua quenelchibeliöya. Quejejtoöya:

—Quechihua chöchalönalestle pa puieblo, hua tlamachteya ipa noche tlöle de joriojte. Oquepiehualte desde Galilea hasta necö.

Tiebicaque Jesús ca Herodes

⁶ Cuöc oquecac Pilöto, otlajtla tlö inu tlöcatl oyeya de Galilea. ⁷ Hua cuöc ocaojcömat que Jesús iloaya de inu tlöle tli ihuöxca inu Herodes, otietitla ica Herodes. Pos Herodes nuyejque ompa oyeya ipa Jerusalén ipa inu niecate tunalte. ⁸ Hua Herodes, cuöc otieyeytac Jesús, opajpöc lalebes. Pos quepeaya meyac tiempo que quenequeya tieyeytas, ipampa oquecac tlimach de yejuatzi, hua quenequeya quejtas quiene ca quechihualo canajyetla tietzöbetl. ⁹ Hua tietlajtlaniöya ca meyac tlajtule, cache yejuatzi amo tli nöhuatiloöya niontle. ¹⁰ Hua ompa ijcataya inu jefes de teopexcötzetzi ca tiehua tlamachtioneme de teotlajtule tietieyelfejtaya ica meyac nelchibelestle. ¹¹ Hua Herodes ca tiehua isoltörojua möbeltiöya ca yejuatzi hua moburlörojque tieca. Tietlaquentejque ca tzotzomajtle lalebes cuöcuatzi quiename tli möquea reyes. Entunses Herodes ocajpa otietitla ica Pilöto. ¹² Hua omochijque amigos Pilöto hua Herodes ipa inu niecaju tunale. Pos antes amo cuale mobicaya.

Pilöto tietiemacac Jesús ma tiecoruspelucö

¹³ Yecuöquenu Pilöto oquensentlöle inu jefes de teopexcötzetzi hua tlötlayecönque hua noche inu giente. ¹⁴ Oquemelfe:

—Nenniechtieijtético ini nönca por tlöcatl que ixniempolojteneme puieblo. Xequiejcäcö que naja ye onequestloco nemixtla nemajua, hua amo necniexte niontle tlajtlacule

ipa ini nönca tlöcatl de inu sösantle de tli nemejua ica nenquetieyelfea. ¹⁵ Hua nimpör Herodes; pos yaja oquetitla necö ocsajpa. Hua xequejtacö que amo quechijteca niontle canajyetla sösantle para ma meque. ¹⁶⁻¹⁷ Ejqueu nejcastecörus hua nejcajcöhuas.

¹⁸ Cache innochie giente tzajtzajtzeque juntos, oquejtojque:

—¡Ma meque ini nönca!

hua:

—¡Xetiechmocajcöbelele inu Barrabás!

¹⁹ Yaja Barrabás oyeya sente prieso tli oquetzajtzejque ipan cörsel ipampa omajcoc cuntra cubierno ipa inu nieca ciudad, hua oyeya tlamectiöne. ²⁰ Hua ocsajpa oquennunutz Pilöto, pos quenequeya tiecajcöhuas Jesús. ²¹ Cache yejua otzajtzajtzeque, oquejtojque:

—¡Xomocoruspelfe, xomocoruspelfe!

²² Hua yaja oquemelfe ocsajpa ca yexpa:

—¿Tlica? ¿Tli mal oquechi ini nönca? Niontle fölta tli quemeresieroa mequelestle amo necniexte ica yaja. Por inu sa nejcastecörus noso, hua nejcajcöhuas.

²³ Pero yejua cache quenelchibeliöya tzajtzajtzeja, hua tlajtlaniöya ma tiecoruspelo. Hua intzajtzajtzeles quexexicojque. ²⁴ Pilöto oquejuscöro que ma mochihua tli yejua quetlajtlanque. ²⁵ Hua oquencajcöbele inu nieca tli oquetzajtzejque ipampa omajcoc cuntra cubierno hua porque oyeya tlamectiöne. Pos yejua ejqueu oquetlajtlanque. Pero Jesús otietiemöcte para ma tiechibelicö lo que tli quenejnequeya.

Jesús omecoac pan corujtzi

²⁶ Hua otiebicaque ca queyöhuac. Ocaseque sente tlöcatl itucö Semu, de inu nación de Cirene, öque huölöya de ipa caltientle. Oquetlölejque ipa yaja inu corujtzi para ma quebica tiecuetlapa Jesús. ²⁷ Hua tietocaya lalebes meyac giente de puieblo, hua meyactie sohuame. Tiechuqueliöya ca meyac chuquelestle. ²⁸ Cache Jesús necuepaluc inca yejua, hua oquemelfejque:

—Sohuame de Jerusalén, amo xeniechchuquelicö naja, cache xechucacö por sie nemejua, hua por nemopejpelhua. ²⁹ Pues xequejtacö que huölösque tunalte que nenquejtusque: “Cuale imicnupel tli machurajte, hua tli ayec oquentlöcatelejque pelantzetzi, hua ayec quenichetejque inpelhua”. ³⁰ Yecuöquenu giente quemelfisque tepieme: “Topa xebetzecö”, hua quemelfisque muntas: “Xetiechtlapachucö”. ³¹ Pues tlö giente quechihua sösantle ejqueyi petzotec ca naja, pues cache petzotec sösantle quechihuasque ca nemejua. Tlö quexutlaltea sente cuabetl tli xoxoctec, cache ca meyac arrasu quenxutlaltisque cuajme tli ye huöjque.

³² Hua quenbicaya tieca yejuatzi oc unte tlöca ichtejque, para quenmejmectisque.

³³ Hua cuöc oaseco ipa sente locör itucö Mejcötzontecomatl, ompa tiecoruspelojque, ca tiehua inu ichtejque, sente ca tiemöyecmö, hua ocsente ca tiemöarrabis. ³⁴ * [Hua Jesús oquejtojque:

—NoTajtzi, xequenmoperdonörfe, pues amo quemate tli quechijtecate.]

Hua quexixeløjque tietlaquie, hua queriförojque. ³⁵ Hua meyac giente otlachixtaya. Nuyejque inu tlötlajtoönejme opajpöqueya tieca. Oquejtojque:

—Ocseque oquenmöquexste; ma momöquexste sie yaja, tlö yaja ini nönca tieCristo de Deus, öque yejuatzi quixpejpenque.

³⁶ Nuyejque moburlöroöya de yejuatzi inu soltörojte. Tietlac mopachojque tieitejque penögre. ³⁷ Quejtoöya:

—Tlö quejtus taja tecaca terey de joriojte, xomomöquexste sie taja.

³⁸ Hua oyeya icpac tiecorujtzi sente tucöyutl tlajcuelule ejqueyi: **YAJA INI NÖNCA ICACA REY DE JORIOJTE.**

* **23:34** De mölas inu tlajtulme tli cate intzölö corchetas [] amo oyejyeya ipa ömatl de San Lucas cuöc primiero omojcuelo.

³⁹ Hua sente de inu ichtejqe tli tömpelcataya tietlabejbicaltiöya. Quejtoöya:

—¿Amo taja tecaca teCristo? Xomomöquexste noso sie taja ca tiehua tejua.

⁴⁰ Hua onöhuat inu ocsente, hua ocajajuac. Oquelfe:

—¿Nimpor amo tetiemabelea Deus, mös nuyejque taja metzcuntenörojque? ⁴¹ Hua tejua, melöhuac conbenierebe ma topa mochihua ini nönca, pues sa tecselejtecate totlaxtlöbil tli tecmeresieroa por tli otecchijque. Cache ini nöiloac amo tli oquechijque tli amo cuale.

⁴² Hua otieyelfe:

—Jesús, xeniechmolnömequite cuöc tehualmobicas tomotlamandörfiqi.

⁴³ Yejuatzi oquelfejque:

—Melöhuac tli temetzelfea, que öxö teyes ca naja ipan Paraíso.

⁴⁴ Hua ye oyeya quieme ye pan tlajca. Omochi tlajtlayohuaquelestle ipa noche inu tlöle hasta ipa yeye ura, ⁴⁵ pues opole tunale. Hua inu cortina de ipa teopantle otzomu ca tlatlajco. ⁴⁶ Yecuöquenu Jesús otzajtzihuac ca checöhuac tlajtule, oquejtojque:

—NoTajtzi, temetzmotiemöctelea noyulo.

Hua cuöc oquejtojque ini nönca, omecoac. ⁴⁷ Cuöc inu capetö oquejtac tli omochi, otiechamöhuaya Deus, hua oquejto:

—Melöhuac ini nönca oyeya yectec tlöcatl.

⁴⁸ Hua noche inu giente tli onhuölajque oquejtaco ini nönca söstantle, cuöc oquejtaque tli omochi, omocuejqe ica yulcocalestle. Momacataya ipa inpiecho. ⁴⁹ Cache noche tli tieixomateya, hua inu sohuame tli otietocaque desde inu estado de Galilea, oyejyeya bejca oquejztaya noche ini nönca söstantle.

Tietlöltucaque Jesús ijtec sente mejcöustutl

⁵⁰ Hua oyeya sente tlöcatl itucö Josie. Yaja oyeya miembro de inu grupo de tlötlajtoönejme de joriojte que itucö Sinedrio. Yaja oyeya cualtientlöcatl hua yectec.

⁵¹ Amo oyeya de acuerdo ca lo que tli quejtojque hua quechijque icompanierojua. Yaja oyeya de Arimatea, sente puieblo de joriojte, hua lalebes quenequeya ma tlamandörucö Deus. ⁵² Hua yaja omopacho itlac Pilöto quetlajtlaneto tiecuiervo Jesús. ⁵³ Hua oquetemobe. Oquequemelo ica sente telmajtle de lino, hua oquetlölito ijtec sente mejcöustutl tli tlapojtaya ipa sente tepetlatl. Ayemo öque quetlölíöya ompa. ⁵⁴ Hua ye oyeya tunale de que öque mopreparörus, pues mustlateca iyes söbron tunale cuöc joriojte mosiebea. ⁵⁵ Hua inu sohuame tli ca yejuatzi ohuölajque desde pa estado de Galilea, oquetocaque Josie nuyejque, hua oquejtaque mejcöustutl, hua quiene oquetlölejque tiecuiervo Jesús. ⁵⁶ Hua omocuejqe. Oquechejchijque especias hua pajtle tli ijnecueste. Hua mosiebejqe ipan söbro san quiene ca momandöroöya.

24

Jesús oyulebihuac

¹ Ipa inun primero tunale de semöna, cualcö, antes quisas tunale, ohuölajque inu sohuame cöne mejcöustutl. Quehualecaya inu pajtle ijnecueste tli yejua ye oquechejchijque. ² Hua oqueniextejque inu tietetu ye tlacaltechule oyeya de ipa pobielta de mejcöustutl. ³ Hua ocalajque, pero amo oqueniextejque tiecuiervo de Tlöcatzintle Jesús. ⁴ Hua omochi que cuöc yejua amo quemateya tli quepensörusque de ini nönca, sie trepiente omoquetzque intlac yejua unte tlöca ca intlaque tzotzotlaca. ⁵ Hua yejua sohuame omomajtejque, hua omopiechojqe. Hua tlöca oquemelfejque sohuame:

—¿Tlica nentietiemoa intzölö mimejqe öque nemoa? ⁶ Amo oncö iloac necö, cache ye oyulebihuac. Xequelnömequecö de tli onemiechnunutzque cuöc oc iloaya ipan Galilea. ⁷ Pues oquejtojque que yejuatzi öque nechihualuc tlöcatl tieconbenieroöya ma

tietiemöcticö inmöpa tlöca tlajtlaculteque, hua ma tiecoruspelucö, hua ma yulebihua ipa yeye tunale.

⁸ Yecuöquenu yejua oquelnömejque de tietlajtl. ⁹ Hua omocuejque desde ipa mejcöustutl. Oquemelfejque de noche ini nönca sösantle ca inu majtlactle huansie tiemachtejcohua, ca tiehua ocseque. ¹⁰ Hua oyejyeya María Magdalena hua Juana, ca tiehua María inöntzi Jacobo. Hua tli ocseque tli oyejyeya ca yejua oquejtojque ini nönca inca llateotitlanme. ¹¹ Cache yejua quepensöroöya quieme cana lucojyutl inu tlajtule de yejua, hua amo oquenneltocaque. ¹² Cache omajcoctequis Piero, hua omomerö hasta ipa mejcöustutl. Hua omocototztlöle para otlachix ca tlajtec. Oquejtac sa yaja tzotzomajme ompa oyeya. Hua uya pa ichö. Pos quietietzöbejtaya tli omochi.

Jesús neniextiluc ca ume tli oyöya pa puieblo de Emaús

¹³ Hua omochi ipa inun tunale que unte de yejua oyöya ipa sente puieblo que itucö Emaús, tli oyeya quiename once kilómetros de inu ciudad de Jerusalén. ¹⁴ Otlajtlajtojtyöya de noche ini sösantle tli omochi. ¹⁵ Hua omochi que cuöc yejua otlajtlajtojtyöya hua omonunutztyöya, sie yejuatzí Jesús onepachuluc hua nejnemoöya ca yejua. ¹⁶ Pero yejua amo tieixomatque, pos Deus amo quencöjque ma tieixomatecö. ¹⁷ Hua oquemelfejque:

—¿Tli sösantle nemonunutztecate nemejua mientras nennejntebitze?

Hua yejua sa ijcataya, niese motequelpachoöya. ¹⁸ Onöhuat sente, öque itucö oyeya Cleofas. Otiyelfe:

—Pos noche giente quemate tli omochi ipa nöncate tunalte, mös cate estranjieros. ¿Taja amo tecmate?

¹⁹ Yejuatzí oquemelfejque:

—¿Tli sösantle?

Hua yejua otieyelfejque:

—Pos de Jesús de puieblo de Nazaret. Pos yejuatzí iloaya sente tlayulepante. Ca checöhuallestle tlajtuloöya hua quechihualoöya sösantle bejbeye tieixpa Deus hua imixpa noche giente. ²⁰ Hua inu jefes de toteopexcötzetzihua ca tiehua totlötlajtoönejua otietiemötejque para tiecuntenörojque ma mecoa. Hua tiecoruspelöjque. ²¹ Cache tejua teccheaya que yejuatzí iloaya öque quenmöquextilusquea giente de Israel. Hua amo sa inu, pos öxö ye ica yeye tunale que ini nönca omochi. ²² Mös öxö seque sohuame de tejua otiechmajcömectejque. Pos yejua antes tlanieses uyajque cöne mejcöustutl, ²³ hua amo oqueniextejque tiecuiervo. Entunses ohuölajque hua oquejtojque nele oquejtaque öngeles, tli oquejtojque nele nemoa. ²⁴ Hua uyajque seque de tejua ipa mejcöustutl, hua oqueniextejque quieme sohuame oquejtojque. Cache yejuatzí amo tiejtaque.

²⁵ Yecuöquenu yejuatzí oquemelfejque:

—¡Nentuntojte, hua nenyultepitzteque para que amo nemoneltoca de noche tli oquejtojque inu tlayulepantejque tli oquepojque tietlajtultzi Deus! ²⁶ Pos conbenierebeya ma Cristo öque Deus quixpejpenque ma ipa mochihua ini nönca sösantle, hua ma calaque ipa tlanixtelestle.

²⁷ Hua oquepiehualtejque desde tli oquejcuelo Moisés, hua de noche tli oquejcuelojque inu tlayulepantejque, hua quenpanquexteliloöya de noche tli tlajcuelulpanca inu sösantle tli tlajtoöya de yejuatzí.

²⁸ Oajaxihuato ipa inu puieblo cöne yejua oyöya. Yejuatzí oquechijque quieme tlö quesequirusque biloas. ²⁹ Cache yejua tiequetzque hua otieyelfejque:

—Xomocöhua ca tejua, ipampa ye yohuac, hua ye tlanteca tunale.

Entunses ocalacoac para necöhualus ca yejua. ³⁰ Hua omochi que cuöc onetlölliluc ca yejua para tlajtlacualus, ocönque pöntzi. Oqueteochijque, hua oquecocototzque, hua oquenmacaque. ³¹ Yecuöquenu quiename omotlapo imixtelolo de yejua, pos ye otieixomatque. Cache yejuatzí opolebihuac de imixtla de yejua. ³² Hua molfiöya:

—¿Tequelnömeque quiene tojtécopa pöqueya toyulo mientras tiechnunutzaloöya ipa ojtle, cuöc tiechesplicörfiloöya inu teotlajtule?

³³ Hua omiejque ipa inu ura, hua omocuejque ica ciudad de Jerusalén. Ompa oquenniextejque inu majtlactle huansie tiemachtejcohua. Pos ye omosentlölejque, hua ocseque nuyejque oyejyeya ca yejua. ³⁴ Yejua quejtoöya:

—Ica melöhuac que ye oyulebihuac Tlöcatzintle. Pos ye oneniextiluc ica Semu.

³⁵ Yecuöquenu inu unteme quepoaya de tli impa omochi pa ojtle, hua quiene tieixomatque cuöc oquecocototzque pöntzi.

Jesús oneniextiluc ca tiemachtejcohua

³⁶ Hua mientras yejua quepoaya ini nönca söstantle, yejuatzi mismo onequetzaluc tlanepantla de yejua, hua oquemelfejque:

—Xomoyulsiebicö nemejua.

³⁷ Pero yejua omomajtejque hua majmajcötlachixque. Oquepensörojque que beles quejtaya itunal mejque. ³⁸ Yejuatzi oquemelfejque:

—¿Tlica nemomajtea? ¿Tlica ejqueu nenquepensöroa ipa nemoyulo? ³⁹ Xequajtacö nomöhua hua nocxehua, que sie naja necaca. Xeniechmötocacö, hua xequajtacö, que sente espíritu noso itunal mejque amo quepea nacatl hua memetel, quieme nenquejta que naja necpea.

⁴⁰ Hua cuöc oquejtojque ini nönca, oquemejtetejque tiemöhua hua tieicxehua. ⁴¹ Hua yejua cöso ayemo moneltocaya, por quemachelejque tönto meyac pajpöquelestle. Pos quietietzöbejtaque. Yejuatzi oquemelfejque:

—¿Nenquepea canajyetla tli mocuös?

⁴² Yecuöquenu yejua otiemacaque sie peröso meche tli ye obecsec. ⁴³ Hua yejuatzi ocönque hua ocualuc imixtla yejua.

⁴⁴ Hua yejuatzi oquemelfejque:

—Yaja ini nönca tlajtule onemiechelfe cuöc oc neyeya ca nemejua, que quepeaya que mochihuas noche söstantle tli tlajcuelulpancate de naja ipa inu ley de Moisés, hua ipa inu ömame tli oquejcuelojque tlayulepantejque, hua ipa inu ömatl de Salmos.

⁴⁵ Yecuöquenu oquentlapolfejque inasojcömateles para ma casojcömatecö lo que tli tlajcuelulpanca. ⁴⁶ Oquemelfejque:

—Ejqueu tlajcuelulpanca, que inu Cristo öque Deus quixpejpenque quepeaya que quesufrirus tiecoco, hua que yulebes de intzölö mimejque ipa yeye tunale. ⁴⁷ Nuyejque quepea que monunutzas tietlajtul ca giente de noche naciones de tlöltecpectle, que ma moyulcuepacö para motlapojpolfis intlajtlacul. Ma piehua monunutzas desde Jerusalén. ⁴⁸ Hua nemejua nencate nentestigos de ini nönca söstantle. ⁴⁹ Xequajtacö que naja necualtitlanes nemopa lo que tli oqueprometierojque noTajtzi. Xomocöhuacö necö noso, ipa ini nönca ciudad hasta senamo nemopa huölös inu checöhualestle tli yebitz de tlapac.

Otlejcoac Jesús elfecac

⁵⁰ Hua oquenquextejque ca queyöhuac de inu ciudad hasta que oyejyeya itlac puieblo de Betania. Entunses oquemajcoque tiemöhua hua oquenteochijque. ⁵¹ Hua omochi que mientras oquenteochihualoöya, obiloac de yejua, hua otlejcoac ca elfecac. ⁵² Hua yejua tiemabesutiöya. Sötiepa omocuejque ica Jerusalén ca meyac pöquelestle. ⁵³ Seme mocöhuaya ipan teopantle, hua tieteochihuaya Deus.

Cuale Tlamachestelestle san quiene ca oquejcuelo SAN JUAN

Yejuatzi Tlajtule nechihualuc tlöcatl

¹ Cuöc noche opie ye iloaya Tlajtule, hua yejuatzi Tlajtule iloaya ca Deus, hua yejuatzi Tlajtule iloaya Deus. ² Yejuatzi oiloaya ca Deus desde cuöc opie noche söstantle. ³ Yejuatzi quechejchijque noche söstantle; hua sin yejuatzi amo omochihuane niontle de lo que tli omochejchi. ⁴ Tieca yejuatzi oyeya nemelestle, hua ini nönca nemelestle oyeya tlöbile para tlöca. ⁵ Hua tlöbile tlanixtea ipa tlajtlayohuaquelestle; cache tlajtlayohuaquelestle abele oquexexico tlöbile.

⁶ Ohuöla sente tlöcatl que Deus ocualtitlanque. Itucö oyeya Xohuö. ⁷ Ini nönca ohuöla para iyes testigo para ma tlatestificöro de inu tlöbile, para que por itlajtul ma moneltocacö innochtie. ⁸ Yaja amo oyeya inu tlöbile, tlöcamo ohuöla para ma tlatestificöro de inu tlöbile.

⁹ Yejuatzi öque iloac tlöbile tli melöhuac, öque quentlanixtelilo noche tlöca, ohualiloaya ipa ini nönca tlöltecpactle. ¹⁰ Ipa tlöltecpactle oiloaya, hua yejuatzi oquechejchijque tlöltecpactle; pero tlöltecpactlöca amo tieixomatque. ¹¹ Ohualiloac ipa tli tiehuöxca, pero tli tiehuöxcagua amo tieselejque. ¹² Cache innochtie öque tieselejque quenmacaque beletelestle para ma mochihuacö tiepelhua de Deus, quejtusneque noche tli moneltoca tietucöyupantzinco. ¹³ Pos otlöcatque quiename tiepelhua. Ini intlöcateles amo oyeya de yestle, nimpör amo omochi por itlaeliebeles de tonacayo, nimpör porque tlöcatl oquenec, cache Deus oquenchihualtejque ma tlajtlöcatecö.

¹⁴ Hua yejuatzi Tlajtule nechihualuc tlöcatl, hua totzölö nemoac, hua otequejtaque tiecualniexteles. Hua tiecualniexteles oyeya quieme sa de sente Conietzi de Deus tieTajtzi. Tiechbiquelitz tiemeyac favur Deus hua lo que tlin melöhuac.

¹⁵ Xohuö tlatestificöro de yejuatzi. Tzajtzec checöhuac hua oquejto:

—Yejuatzi nöiloac de öque nequejtoöya naja cuöc nequejto: “Öque biloatz sötiepa de naja, cache bieyetzintle iloac que naja; ipampa nemoaya cachtö de naja”.

¹⁶ Pos de noche tli quepealo otecselejque tejua tonochtie, hua tiechmacalo favur hua oc cache meyac favur. ¹⁷ Pos Moisés otiechmacac iley; cache tecpea favur hua tlin melöhuac por medio de Jesucristo. ¹⁸ Deus ayec yeca tieyejtac. TiesenteConietzi, öque iloac Deus, öque tieTajtzi laebes tietlasojtlalo, yejuatzi otiechniextelejque tieTajtzi ca tejua.

Xohuö Bautista tlajtlajto de Cristo

¹⁹ Yaja ini nönca lo que tli oquepu Xohuö. Joriojte de ciudad de Jerusalén oquentitlanque teopexcöztetzi hua levitas tli tequeteya ca yejua. Oquentitlanque para ma quetlajtlanicö Xohuö:

—¿Öquenu tecaca taja?

²⁰ Hua yaja amo quenegöro, cache oquejto:

—Amo naja neCristo.

²¹ Hua oquetlajtlanejque:

—¿Tli noso? ¿Taja tecaca teElías?

Oquejto:

—Amo necaca.

—¿Taja tecaca inu tlayulepante tli huölös?

Onöhuat:

—Amo.

²² Yecuöquenu oquelfejque:

—¿Öquenu noso taja? Xetiechelfe para tequenmelfisque öque tiechhualtitlanque. ¿Tli tequejtoa taja de taja mismo?

²³ Oquejto:

—Naja necaca tli netzajtze ipa locör cöne nionöque chönte hua nequejtoa: “Xecme-jmelöhuacö tieojfe Tlöcatzintle”. Pos ejqueu oquejto inu tlayulepante Isaías que naja necchihuasquea.

²⁴ Hua yejua fariseos oquentitlanque ini nöncate tlöca. ²⁵ Hua oquetlajtlanejque:

—¿Tlica noso tetlacuötiequea tlö amo taja tecaca teCristo, nimpör teElías, nimpör tetlayulepante tli huölös?

²⁶ Hua Xohuö oquennönquele, oquejto:

—Naja netlacuötiequea ca ötzintle; cache nemonepantla de nemejua ye iloac öque nemejua amo nentieixomate. ²⁷ Yejuatzi iloac öque biloatz sötiepa de naja. Naja amo necmeresieroa nion para netiequextelis tiecacua.

²⁸ Ini nönca söstantle omochi itlac inu puieblo de Betania, ca nepa löro de ötlactle Jordán, cöne Xohuö tlacuötiequiöya.

Tiecalnielajtzi Deus

²⁹ Ipa mustlateca Xohuö tieyejtac Jesús que hualiloöya ca itlac, hua oquejto:

—Xetieyejtacö tiecalnielajtzi Deus, öque quecuetlabiltisque para quequextisque tlatlacule de tlöltecpactlöca. ³⁰ Ini nöiloac de öque onequejto: “Sötiepa de naja biloatz sie tlöcatl que cache bieyetzintle iloac que naja, pos nemoaya cachtö de naja”. ³¹ Hua naja ayemo netieixomateya. Pero para ma tieixomatecö giente de Israel, ipampaju nehualtlacuötiequiöya ca ötzintle.

³² Hua Xohuö nuyejque oquejto:

—Onetieyejtac Espíritu Sönto hualtemoac de elfecac quiename palumax hua onesiebiluc tiepa. ³³ Hua naja ayemo netieixomateya, cache öque niechhualtitlanque ma netlacuötieque ca ötzintle, yejuatzi niechelfejque: “Ipa öque tetieyejtas temoas Espíritu Sönto hua ipa yejuatzi nesiebilus, yejuatzi tlacuötiequilus ca Espíritu Sönto”. ³⁴ Hua naja onetieyejtac, hua ye netlatestificörojteca que yejuatzi iloac tieConietzi Deus.

Jesús quennutzque seque tiemachtejcohua

³⁵ Ipa mustlateca ocsajpa ijcataya Xohuö ca unte de imachtejcohua. ³⁶ Hua cuöc tieyejtac Jesús que ca ompa nejnemoaya, oquejto:

—Xetieyejtacö tiecalnielajtzi Deus.

³⁷ Hua inu unte oquecajque lo que tli oquejto hua otietocaque Jesús. ³⁸ Hua cuöc nemacuc bielta Jesús hua oquenmejtaque quiene tietocaya, oquenmelfejque:

—¿Tli nenquetiemoa?

Hua yejua oquejtojque:

—Rabbí—quejtusneque Maestro—. ¿Cöne tomochöntelea?

³⁹ Oquenmelfejque:

—Xehuölöcö hua nenquejtasque.

Ohuölajque entunses hua oquejtaque cöne chöntihuaya, hua omocöjque tieca inu tunale. Pues ye oyeya quieme pa nöbe ura ca ye yohuac. ⁴⁰ Andrés, icni Semu Piero, oyeya sente de inu niecate unteme tli oquecajque tli oquejto Xohuö hua otietocaque Jesús. ⁴¹ Ini nönca nima oqueniexte Semu icni, hua oquelfe:

—Ye otetieniextejque Mesías—quejtusneque Cristo noso Tlaixpejpentle de Deus.

⁴² Hua oquehualcac tieca Jesús. Hua cuöc oquejtaque Jesús, oquelfejque:

—Taja tecaca teSemu, iconie Xohuö. Taja motucöyu iyec Cefas —quejtusneque Piero, noso Tietetu.

Quennutzque Felipe hua Natanael

⁴³ Hua pa mustlateca oquenejqe biloas ca estado de Galilea. Oqueniextejque Felipe. Jesús oquelfejque:

—Xeniechtoca.

⁴⁴ Pos Felipe oyeya de inu puieblo de Betsaida, cöne chajchönteya Andrés hua Piero.

⁴⁵ Felipe oqueniextito Natanael, hua oquelfe:

—Otetieniextejque inu tlöcatl de öque oquejcuelo Moisés ipa iley hua de öque oquejcuelojque inu tlayulepantejqe. Yejuatzi Jesús iconie Josie, de inu puieblo de Nazaret.

⁴⁶ Hua oquelfe Natanael:

—¿Cuale quisas de Nazaret canajyetla tlin cuale?

Oquenönquele Felipe:

—Xehuöla hua xequjetaque.

⁴⁷ Hua Jesús oquejetaque Natanael que ohuölöya tietlac, hua oquejtojque de yaja:

—Xequjetacö, de melöhuac yaja ini nönca ica sente israelita que amo tlacajcayöhua.

⁴⁸ Otieyelfe Natanael:

—¿De cöne teniechmixomachele?

Onöhuatihuac Jesús, hua oquelfejque:

—Antes que Felipe metznutzato, cuöc oteyeya itzintla icox cuabetl, temetzejtac.

⁴⁹ Onöhuat Natanael, hua oquejto:

—NoTiemachtejcötzi, tejuatzi tetieConietzi Deus; tejuatzi terey de Israel.

⁵⁰ Onöhuatihuac Jesús hua oquelfejque:

—Ipampa otemetzelfe que otemetzejtac itzintla icox cuabetl, ¿por inu tomoneltoca? Cache bejfeye söstantle tequejtas que ini.

⁵¹ Hua nuyejque oquelfejque:

—Melöhuac, melöhuac nemiechelfea: Nenquejtasque elfecac tlapojtas, hua nopa naja que onochi netlöcatl tlejusque hua temusque tieöngeles Deus.

2

Nesohuajtiluyo ipa Caná

¹ Hua pa yeye tunale omochi nesohuajtiluyo ipa puieblo de Caná de estado de Galilea. Ompa oyeya tienönajtzi Jesús. ² Nuyejque tielalfejque Jesús ipa nesohuajtiluyo ca tiehua tiemachtejcöhua. ³ Hua cuöc otlá vino, tienönajtzi de Jesús tieyelfe:

—Amo quepejpea vino.

⁴ Oquelfejque Jesús:

—¿Tli necpea ca tejuatzi, sohuatl? Ayemo yebitz noura.

⁵ Tienönajtzi oquemelfe tli tlaserbiroöya:

—Xecchihuacö noche tli yaja nemiechelfis.

⁶ Hua ompa oyejyeya checuasie öcume de teme, ipampa joriojte ipa inreligiön quepeaya costumbre de quepajpöcasque cöso noche söstantle. Aqueya ijtec cara sente öcumetl möcuile noso checuasie butejte. ⁷ Oquemelfejque Jesús:

—Xequentiemiticö ini nöncate öcume ca ötzintle.

Oquentiemitajque hasta que otienque. ⁸ Hua yejuatzi oquemelfejque:

—Öxö xejquexticö, hua xebicacö ca yaja tli encargödo de nönca yelfetl.

Hua oquebicaque. ⁹ Hua cuöc encargödo oquebelmat ötzintle tli ye omocuec vino, amo quemateya de cöne ohuöla, mös yejua tli tlaserbiroöya tli quequextejque ötzintle quimateya de cöne ohuöla. Yaja encargödo quetzajtzele montle. ¹⁰ Oquelfe:

—Noche tlöca quetlölea cachtö tlin cuale vino, hua cuöc giente ye oijixfeque, yecuöquenu quetlölea tli amo bel cuale; cache taja tecmalfejteca tlin cuale vino hasta öxö.

¹¹ Ca ini tlachihualestle Jesús oquepiehualtejqe ipa Caná de Galilea. Oquechijque tietzöbetl hua öquenmejtetejqe tiechecöhuales. Hua tiemachtejcohua omoneltocaque tieca.

¹² Sötiepa de ini nönca yejuatzi obiloac ca Capernaum, ca tiehua tienönajtzi, hua tieicnihua, hua tiemachtejcohua. Hua oijiloaya ompa quiesquete tunalte.

Jesús tlaquextejque pa teopantle

¹³ Hua ye miero mochihuas pöscua de joriojte. Hua obiloac Jesús ca Jerusalén.

¹⁴ Hua oquenniextiluto ipan teopantle giente tli quennamacataya cucobejqe, hua calnielojte, hua palumaxte, hua giente tli quepatlataya tomi yejyehuataya. ¹⁵ Yejuatzi oquechejchijque sente checute ca lösojcucone, hua quentojtocaque de ipan teopantle ca tiehua incalnielolja hua incucobejua. Quensemenelejque intomi de tli tlajtlapatlataya, hua quencuiecuejqe inmiesajua. ¹⁶ Hua inu giente tli quenajnamacataya palumaxte, oquenmelfejque:

—Xequejcuenicö de necö ini nöncate, hua amo xecchihuacö tiechöntzi noTajtzi quieme tlö oyene mercödo.

¹⁷ Yecuöquenu oquelnömejque tiemachtejcohua que tlajcuelulpa oyeya: “Bel lalebes nechohuates por mochöntzi”.

¹⁸ Hua joriojte onöhuatque, hua otieyelfejque:

—¿Tli tietzöbetl tetiechejtetis quiename sieñas, siendo que tecchijteca ini söstantle?

¹⁹ Hua onöhuatihuac Jesús, oquenmelfejque:

—Xecxetunicö ini nönca teopantle hua pa yeye tunale ocsajpa necchejchihuas.

²⁰ Cuöquenu oquejtojque joriojte:

—Ipa cuarenta y seis años omochejchi ini nönca teopantle. Hua taja ¿ipa yeye tunale tecchejchihuas?

²¹ Cache yejuatzi oquejtojque de inu teopantle que yaja tiecuierpo. ²² Hua ca inu, cuöc oyulebihuac de intzölö mimejqe, tiemachtejcohua oquelnömejque cuöc quejtojque ini nönca. Entunses omoneltocaque de lo que tli tlajcuelulpanca, hua omoneltocaque ica ini tlajtule tli Jesús oquejtojque.

Jesús quematihua tli onca pa inyulo tlöca

²³ Hua cuöc iloaya ipa Jerusalén ipa yelfetl de pöscua, meyactie omoneltocaque tietucöyupa ipampa oquejtaque sieñas de tietzöbetl tli quechihualoöya. ²⁴ Cache yejuatzi Jesús amo quenpíloöya confiónsa de yejua, ipampa yejuatzi quemixomatiloöya innochie. ²⁵ Hua amo quenesesitöruroöya ma canajyeca tiepubele de tlöca, ipampa yejuatzi quematihuataya tli onca pa inyulo tlöca.

3

Jesús hua Nicodemo

¹ Hua oyeya sente tlöcatl fariseo itucö Nicodemo, tlajtoöne de joriojte. ² Ini nönca ohuöla ca yohuale tieca Jesús hua otieyelfe:

—ToTiemachtejcotzi, tecmate que tejuatzi tehualmobicac de Deus para tomobetzta tomaestro. Pues abele öque quechihuas ini nönca sieñas de tietzöbetl tli tejuatzi tomochebelea, tlö amo iloasquea Deus ca yaja.

³ Onöhuatihuac Jesús, hua oquelfejque:

—Melöhuac, melöhuac temetzelfea: Öque amo tlöcates ocsajpa, abele quejtas cöne Deus tlamandöruro.

⁴ Tieyelfe Nicodemo:

—¿Quiene cuale tlöcates sente tlöcatl tli ye biebentzi? ¿Beles cuale calaques ocsajpa ijtecopa inöntzi, hua tlöcates?

⁵ Nöhuatihuac Jesús:

—Melöhuac, melöhuac temetzelfea: Öque amo tlöcates de ötzintle hua de tie *Espíritu de Deus, abele calaques cöne tlamandöruro Deus. ⁶ Lo que tli tlöcate de nacatl, nacatl ica; hua tli de *Espíritu de Deus tlöcate, *espíritu icaca. ⁷ Amo xectietzöbe que temetzelfe que nenquepea nentlöcatesque ocsajpa. ⁸ *Yejjecatli de cöne beletes tlalpitza, hua tejcaque quiene ca isoloca ijcueyoca; cache nimpör amo tecmate de cöne yebitz, nimpör cöne iya. Ejqueu icaca öque tlöcate de *tieEspíritu de Deus.

⁹ Onöhuat Nicodemo, hua otieyelfe:

—¿Quiene cuale mochihuas ini?

¹⁰ Onöhuatihuac Jesús, hua oquelfejque:

—¿Taja tetlamachtione de Israel, hua amo tecasojcömate ini? ¹¹ Melöhuac, melöhuac temetzelfea: Tli tecmate, inu tequejtoa, hua tli ye otequejtaque, inu tecpoa; hua amo nenqueselea totlajtul. ¹² Ye nemiechelfe söstantle de tlöltecpactle, hua amo nemoneltoca. ¿Quiene noso nemoneltocasque tlö nemiechelfis tlin de elfecac? ¹³ Hua ayec yeca otlejoc elfecac, tlöcamo naja que onehualtemuc de elfecac, naja öque onochi netlöcatl. ¹⁴ Hua quieme Moisés ocajcoc inu cuhuötl ipan locör cöne nionöque chönteya, para quenpajtis giente, ejqueu ijteca ma niechajcoquecö naja öque onochi netlöcatl. ¹⁵ Ejqueu mochihuas para que innochtie tli moneltocasque ma quepeacö nemelestle nochepa notech naja.

¹⁶ Pos Deus lalebes quentlasojtlaque tlöltecpactlöca, hua por inu tiemacuc tiesente Conietzi, para que noche tli moneltoca ca yejuatzi, majcamo ixniempolebecö, tlöcamo ma quepeacö nemelestle nochepa. ¹⁷ Pues tieConietzi Deus amo tiehualtitlanuc ipan tlöltecpactle para ma quencuntenörucö tlöltecpactlöca, tlöcamo cache para tlöltecpactlöca ma momöquexticö por medio de yejuatzi. ¹⁸ Öque moneltoca tieca yejuatzi, amo quecuntenöruro Deus; cache öque amo moneltoca, ye quecuntenorojque ipampa amo omoneltocac tietucoyupa tiesenteConietzi Deus. ¹⁹ Hua Deus quencuntenörusque por ini nönca: porque tlöbile que yaja machestlestle de Deus ohuöla ipan tlöltecpactle. Hua tlöltecpactlöca cache oquecualajtaque tlajtlayohuaquelestle que tlöbile. Cache quecualajtaque tlajtlayohuaquelestle ipampa intlachihual amo cuale oyeya. ²⁰ Pos noche öque quechihua tli amo cuale, quetlajyelejta tlöbile hua amo yebitz ipa tlöbile, para majcamo niese que amo cuale itlachihual. ²¹ Cache öque quechihua tlin melöhuac yebitz pan tlöbile, para ma yecniese itlachihual que de melöhuac quechihua quieme Deus quenequihua.

Jesús hua Xohuö Bautista

²² Sötiepa de ini nönca söstantle, obiloac Jesús ca tiemachtejcohua ipa tlöle de Judea; hua ompa iloaya ca yejua, hua tlacuötiequiloöya. ²³ Hua nuyejque Xohuö tlacuötiequiöya ipa inu puieblo de Enón itlac Salim, pos ompa oyeya meyac ötzintle. Hua ohuölöya giente, hua mocuötiequiöya. ²⁴ Pues cuöquenuju Xohuö ayemo tzajtzactaya ipan cörsel.

²⁵ Hua omochi que imachtejcohua de Xohuö mojjolfejque ca sente joreyo de quiene öque mochepöhuas. ²⁶ Hua ohuölajque ca Xohuö hua oquelfejque:

—ToTiemachtejcötzi, xomojtele öque iloaya mocatzinco ca nepa icuetlapa Jordán, hua de öque tomojtalfe, yejuatzi tlacuötiequilo hua meyactie bitze tieca.

²⁷ Onöhuat Xohuö, hua oquejto:

—Abele sente tlöcatl queselis canajyetla, tlö amo quemacalo Deus de elfecac. ²⁸ Nemejua mismos cuale nenquemajmate tli onequejto: “Naja amo necaca neCristo öque Deus quixpejpenque, tlöcamo Deus oniechhualtitlanque cachtö de yejuatzi”. ²⁹ Öque mosohuajtea ca sisehuanu, yaja montle. Pero iamigo de montle, öque itlac icaca hua quetiencaque, quepea bieye pöquelestle ipampa quetiencaque montle. Ejqueu noso, öxö lalebes nepajpöque naja. ³⁰ Ijteca que yejuatzi cache bieyetzintle iloas, hua naja ayecmo neyes nebieye.

* 3:5 “Espíritu” hua “yejjecatli” cate sa sie tlajtule ca griego.

Öque de tlacpac biloatz

³¹ Öque de tlacpac biloatz, cache bieyetzintle iloac de innochie. Öque icaca de tlöltecpactle de tlöltecpactle pertenesierebe, hua sösantle de tlöltecpactle quejtoa. Öque biloatz de elfecac cache bieyetzintle iloac de innochie. ³² Hua lo que tli quejtaque hua lo que tli quecajque, yaja inu quejtulo. Hua cöso nionöque amo queselea lo que tli quejtulo. ³³ Öque queselea lo que tli quejtulo, icaca testigo de que Deus iloac melöhuac. ³⁴ Pos öque Deus tiehualtitlanuc, tlajtule de Deus quejtulo. Pos Deus tiemacalo tieEspíritu amo sa tepetzi. ³⁵ Tajtle tietlasojtlalo tieConietzi, hua noche sösantle tietiemöcteliluc ipa tiemöhua. ³⁶ Öque moneltoca ca tieConietzi, quepea nemelestle nochepa. Cache öque amo tieneltoca tieConietzi, amo quepeas nemelestle, tlöcamo tiecualöneles Deus icaca ipa yaja.

4

Jesús hua sente sohuatl de estado de Samaria

¹⁻² Inu fariseos oquecajque que Jesús quemeyaqueliloöya cache meyactie tiemachtejcohua que Xohuö, hua cache meyactie quencuötiequeliloöya. Mös amo quencuötiequeliloöya Jesús, tlöcamo tiemachtejcohua quencuötiequiöya. Cuöc Jesús oquematque de tli tlajtoöya inu fariseos, ³ oquixoac de estado de Judea, hua obiloac ocsajpa ca estado de Galilea. ⁴ Hua tieconbenieroöya para panoas ca estado de Samaria. ⁵ Entunes ohualiloac ipa sente puieblo de Samaria itucö Sicar, itlac inu peröso de tlöle tli Jacob oquemacac iconie Josie. ⁶ Hua ompa oyeya öpuso de Jacob. Jesús ye oseyabihuac ipampa ojtle, hua por inu onetlöliluc itienco öpuso. Hua ye oyeya quieme ca pan tlajca.

⁷ Ohuöla sente sohuatl de Samaria para quequextis ötzintle. Hua Jesús oquelfejque:

—Xeniechmaca ma nötle.

⁸ Pos tiemachtejcohua ye onyajque ipan puieblo oquecoato tli quecuösque. ⁹ Hua inu sohuatl samaritana otieyelfe:

—Pues tejuatzi tejoreyo tomobetzteca. ¿Quiene noso teniechmotlajtlanelelea naja tli temitis? Pues naja necaca nesohuatl nesamaritana.

Oquejto ejqueu ipampa joriojte amo moneque ca samaritanos. ¹⁰ Onöhuatihuac Jesús hua oquelfejque:

—Tlö tequixomatesquea tietlööcoles Deus, hua tecmatesquea oquenuju metzelfea: “Xeniechmaca ma nötle”, taja tetlajtlanesquiöya de yaja, hua yaja metzmacasquiöya ötzintle tli quetiema nemelestle.

¹¹ Sohuatl otieyelfe:

—Señor, amo tomopilea tli ica tomoquextelis, hua öpuso bejcatla. ¿De cöne, noso, tomopilea inu ötzintle tli quetiema nemelestle? ¹² ¿Cache tebieye tomomajtzinojteca que totöta Jacob? Pues yaja inu öque tiechmacac ini nönca öpuso, hua de itech oötlic yaja mismo, hua ipeljua, hua iyulcöhua.

¹³ Onöhuatihuac Jesús hua oquelfejque:

—Öque conis de ini nönca ötzintle, ocsajpa ömeques; ¹⁴ cache öque conis ötzintle tli naja necmacas, ayecmo quiema ömeques. Cache ötzintle tli naja necmacas iyecopa yaja quieme sente ömieyale de ötzintle tli quistas para quetiemas nemelestle nochepa.

¹⁵ Entunes sohuatl otieyelfe:

—Señor, xeniechmomaquele inu ötzintle, para ma ayecmo nömeque, nimpör ma ayecmo nehuöla hasta necö nejquextiqui de ijtec pusö.

¹⁶ Jesús oquelfejque:

—Xebeya, xecnutzate monömec hua xehuöla necö.

¹⁷ Onöhuat sohuatl, hua oquejto:

—Amo necpea nonömec.

Quelfejque Jesús:

—Melöhuac tli tecualejto que amo tecpea monömec. ¹⁸ Pues möcuiltie monömecua ye otequempex, hua tli öxö tecpexteca amo monömec. Ini nönca tli tecualejto icaca melöhuac.

¹⁹ Otieyelfe sohuatl:

—Señor, niese ca nequejta tomobetzteca tetlayulepante. ²⁰ Tobiebetcöhua tietechihuaya Deus ipa nönca tepietl, hua nemejuantzetzti nemojtalfea nele ijteca que ipa Jerusalén öque tietechihuas.

²¹ Oquelfejque Jesús:

—Sohuatl, xeniechneltoca, que yebitz ura, cuöc nimpör ipa ini tepietl, nimpör ipa Jerusalén amo nentietechihuasque toTajtzi. ²² Nemejua nentietechihuas öque amo nentieixomate; tejua tetietechihuas öque tetieixomate. Pues nemöquextelestle yebitz por joriojte. ²³ Cache yebitz ura, hua öxö ye oncönca, cuöc yejua tli tlateochihuas de melöhuac tietechihuasque toTajtzi *ipa inyulo hua de melöhuac. Pues toTajtzi nuyejque quentiemulo giente ejqueu ma tietechihuacö. ²⁴ Deus iloac Espiritu, hua quiejquech tietechihuas conbenierebe ma tietechihuacö *ipa inyulo hua de melöhuac.

²⁵ Otieyelfe sohuatl:

—Necmate nele Mesías huölös, öque mocuitis Cristo öque Deus quexpejpenque. Cuöc yaja huölös tiechpanquextelis noche söstantle.

²⁶ Oquelfejque Jesús:

—Naja neca neCristo, naja tli nonunutzteca ca taja.

²⁷ Yecuöquenu ohuölajque tiemachtejcöhua, hua quetietzöbejque ipampa tlajtlajtulutaya ca sohuatl. Cache nionöque amo oquejto: “¿Tli tomotiemolea?” noso “¿Tlica tomonunujtzinoa ca inu sohuatl?”

²⁸ Yecuöquenu sohuatl oquecöjtie icu, hua uya ca pa puieblo, hua oquenmelfito niecate giente:

²⁹ —Xehualmobicacö, xomojtelicö sente tlöcatl oniechelfejque noche tli onecchi. Amo machea cox beles yejuatzil iloac Cristo öque Deus quixpejpenque.

³⁰ Yecuöquenu hualquistiejque de ipa inu puieblo, hua ohuölajque tietlac.

³¹ Mientras necö tiemachtejcöhua tietlötajtiöya, tieyelfejque:

—ToTiemachtejcötzi, xomotlacualte.

³² Hua yejuatzil oquenmelfejque:

—Naja necpea sente tlacuale tli nejcuas, tli nemejua amo nenquemate.

³³ Yecuöquenu tiemachtejcöhua entre yejua molfiöya:

—¿Quie beles canajyeca tiehualequele tlacuale?

³⁴ Oquenmelfejque Jesús:

—Yaja ini notlacual: que ma necchihuas tli tietlanequeles öque niechhualtitlanque, hua ma nictlame inu tequetl tli niechmacaque. ³⁵ ¿Amo nenquejtoa nemejua nele oc polebe nöbe mietztle para cuöc öque tlacosechörus? Xequetacö. Nemiechelfea nemejua: Xetlacheacö cuale ca caltienco que tlatuctle ye otlachecö para öque cuale quecuejcuis. Pos giente cate quiename tlatuctle hua tejua cuale tequenhualcasque para ma yecö tieca Deus. ³⁶ Hua öque quecuejcuis ini cosecha quepeas itlaxtlöbil, hua quesentlölis para quepeas nemelestle nochepa. Hua ejqueu öque tlatuca hua öque tlacosechöroa ma pajpöquecö sa secne. ³⁷ Pos necö tequejta que ica melöhuac quiene mojtöa: “Sente icaca öque tlatuca hua ocsente öque tlacosechöroa”. ³⁸ Naja onemiechtitla nentlacosechörusque cöne nemejua amo netejtequetque. Ocseque tejtequetque hua nemejua nenquepiejque para nentequetesque ca yejua.

³⁹ Hua meyactie samaritanos de inu nieca puieblo omoneltocaque tieca yejuatzil ipampa itlajtul sohuatl, quiene oquenpubele: “Oniechelfejque noche tli onecchi”.

* **4:23** Cuale nuyejque motradusirus: “Por tieEspiritu Deus”.

⁴⁰ Entuneses cuöc ohuölajque samaritanos tietlac tietlötajtejqe ma necöhualo ca yejua. Onecöhualuc ompa ume tunale. ⁴¹ Hua meyactie ocseque omoneltocaque tieca por tietlajtul de yejuatzi. ⁴² Hua oquelfiöya sohuatl:

—Ayecmo sa ca motlajtul toneltoca, tlöcamo sie tejua ye otetiecajqe, hua ye tecmate que de melöhuac ini nöiloac tlamöquextiöne de tlöltecactlöca.

Jesús quepajtejqe iconie sente tlatequepano de rey

⁴³ Hua sötiepa de inu ume tunale, oquixoac de ompa, hua biloac ca estado de Galilea. ⁴⁴ Pos sie yejuatzi Jesús oquejtojqe que sente tlayulepante ipa ipuieblo amo öque ipa quejta. ⁴⁵ Hua cuöc oaxihuaco pan Galilea, inu giente de Galilea tieselejqe, ipampa oquejtaque noche söstantle tli oquechijque ipa ciudad de Jerusalén ipa inu tunale de yelfetl. Pues yejua nuyejque ompa oyejyeya ipa yelfetl.

⁴⁶ Ohualiloac ocsajpa ipa Caná de Galilea, cöne inu ötzintle oquecujque vino. Hua oyeya ipa inu puieblo de Capernaum sente tlatequepano de rey. Iconie mococoöya.

⁴⁷ Ini nöncia, cuöc oquecac que Jesús hualiloac de Judea para Galilea, ohuöla tietlac, hua tietlötajtiöya ma biloa ichö, hua ma quepajticö iconie, ipampa ye oyeya para meques.

⁴⁸ Yecuöquenu oquelfejque Jesús:

—Nemajua de porsí amo nenqueneque nemoneltocasque tlö amo nenquejta sieñas de tietzöbetl hua bieye tlachihualestle.

⁴⁹ Itlatequepano rey oquejto:

—Tlöcatzintle, xemaxetite nochö antes meques noconie.

⁵⁰ Hua oquelfejque Jesús:

—Xebeya, moconie neme.

Hua inu nieca tlöcatl omoneltocac ica tietlajtul tli Jesús oquelfejque, hua uya. ⁵¹ Cuöc yaja ohualiehuaya itlatequepanojua oquenömequeto, hua quemachestejqe que iconie neme. ⁵² Yecuöquenu yaja oquentlajtlane tlin ura opie omoyectlöle. Entuneses oquelfejque:

—Iyöla pa sie ura oquecö totunealestle.

⁵³ Yecuöquenu yaja ocaojcömat que omochi ipa nieca ura cuöc Jesús oquelfejque: “Moconie neme”.

Omoneltocac yaja hua tli oyejyeya pa ichö nuyejque omoneltocaque. ⁵⁴ Ejqueu por segunda vez Jesús oquechijque sente sieñas de tietzöbetl, sötiepa de que ohualiloac de Judea ca pa Galilea.

5

Jesús quepajtejqe sente cocoxque itlac öpila

¹ Sötiepa de ini nöncia söstantle, omochihuaya yelfetl de joriojte. Hua biloac Jesús ca ciudad de Jerusalén.

² Hua pan Jerusalén cöne pobielta de calnielöjte onca sente öpila tli mocuitea Betzata ca hebreo. Ini nöncia quepea möcuile corredurte. ³⁻⁴ Ipa ini nöncate corredurte bejbetztotaya meyactie cocoxcötzetzi, ixcocoxcötzetzi, cucuxojtzetzi, hua cuajcuöhuöjqe.

⁵ Hua ompa oyeya sente tlöcatl tli ye quepeaya treinta y ocho años mococoöya. ⁶ Cuöc Jesús oquejtaque ini nöncia betzteca, hua oquematque que ye quepeaya meyac xebetl mococoa, quetlajtlanejqe:

—¿Tecneque tepajtes?

⁷ Tienönquele cocoxque:

—Señor, amo onca sie tlöcatl ma niechcalaque ijtec öpila cuöc ötzintle moyöbe; cache mientras naja nebitz para necalaques ocsente antes que naseti ye otemuc.

⁸ Oquelfejque Jesús:

—Xemiehua, xecöna mopetl hua xenejneme.

⁹ Hua sa nima inu nieca tlöcatl opajtec, hua ucö ipetl, hua onejne.

Hua oyeya söbro inu tunale, hua joriojte quepeaya costumbre que mosiebiöya pan söbro. ¹⁰ Yecuöquenu joriojte quelfiöya inu nieca öque opajtec:

—Söbro tecate. Amo mopermitiroa tecbicas mopetl.

¹¹ Oquennönquele:

—Öque oniechpajte, sie yaja oniechelfe: “Xecöna mopetl hua xenejneme”.

¹² Yecuöquenu quetlajtlanejque:

—¿Öquenu inu tlöcatl tli ometzefte: “Xecöna mopetl hua xenejneme”?

¹³ Hua yaja tli opajtec amo quemateya öquenu iloaya; pues Jesús onenencuaxeluluc ipampa meyactie giente oyejyeya ipa inu nieca locör. ¹⁴ Sötiepa Jesús oquenömejque ipa teopantle hua oquelfejque:

—Xequajta, ye otepajtec. Ayecmo xetlajtlaco, para majcamo metzase canajyetla cache petzotec.

¹⁵ Inu tlöcatl uya, hua oquenmacheste joriojte que yejuatzi Jesús öque quepajtejque.

¹⁶ Pos inu joriojte tietepotztocaya Jesús, ipampa quechihualoöya ini nönca söstantle ipa söbro. ¹⁷ Hua Jesús oquennonquelejque:

—NoTajtzi hasta öxö oc tequetihua, hua naja nuyejque netequete.

¹⁸ Yecuöquenu, noso, quenequeya joriojte tiemectisque, ipampa amo pa quejtaloöya inu tunale cuöc yejua mosiebiöya, hua cache quenequeya tiemectisque ipampa yejuatzi quejtojque que Deus ilocac tieTajtzi, hua ejqueu onechihualoöya iguöl que Deus.

TieConietzi Deus quepealo checöhualestle

¹⁹ Yecuöquenu onöhuatihuac Jesús, hua oquenmelfejque:

—Melöhuac, melöhuac nemiechelfea: Naja, öque neca netieConietzi Tajtle, abele tli necchihuas sa naja mismo, tlöcamo necchihuas lo que tli nequejta que quechihualuteca noTajtzi. Pues noche tli yejuatzi quechihualo, inu nuyejque necchihua naja san quiene ca yejuatzi quechihualo. ²⁰ Pues noTajtzi niechtlasojtlalo naja que neca netieConietzi, hua niechejtetilo noche söstantle tli yejuatzi quechihualo. Hua cache bejfeye tlachihualesme que ini nöncate niechejtetisque, para que ejqueu nemejua nenquetietzöbejtasque. ²¹ Porque noTajtzi quenyulebitilo mimejque, hua quenmacalo nemelestle, hua ejqueu nuyejque naja öque neca netieConietzi nectiemacas nemelestle ca öquenu necneques necmacas. ²² Pos noTajtzi amo öque quejuscöruo, cache naja niechmacaque checöhualestle para ma nequenjuscöro noche tlöca. ²³ Ejqueu innoctie ma tieyectieniehuacö tieConietzi, san quiene tieyectieniehua noTajtzi. Öque amo niechyectieniehua naja, nuyejque amo tieyectieniehua noTajtzi öque niechhualtitlanque. ²⁴ Melöhuac, melöhuac nemiechelfea: Öque quecaque notlajtul, hua moneltoca ca yejuatzi öque niechhualtitlanque, quepea nemelestle nochepa. Hua amo öque quecuntenörus, cache ye oquis de ipa mequelestle hua ye quepea nemelestle.

²⁵ Melöhuac, melöhuac nemiechelfea: Huölös ura hua öxö oncönca, cuöc mimejque quecaquesque notlajtul de naja öque neca netieConietzi Deus. Hua innoctie tli quecaque, yejua nemesque. ²⁶ Ejqueu quiename noTajtzi de porsí quepealo nemelestle, ejqueu nuyejque niechmacaque para que naja nuyejque de porsí necpeas nemelestle. ²⁷ Hua nuyejque niechmacaque checöhualestle para netlajuscörus ipampa onochi netlöcatl. ²⁸ Amo xectietzöbejtacö de ini nönca, pues huölös ura cuöc noche tli cate ijtec mejcöcoyocme quecaquesque notlajtul, ²⁹ hua quisasque de ijtec mejcöcoyocme. Niecate tli oquechijque tlin cuale yulebesque hua quisasque para nemesque. Cache tli oquechijque tli amo cuale, yulebesque hua quisasque para mocuntenörusque.

Testigos de öquenu Jesús

³⁰ 'Abele necchihuas niontle sa naja mismo. Quiene nejcaque, ejqueu netlajuscöroa. Hua netlajuscöroa quiene conbenierebe ipampa amo nectiemoa necchihuas tli notlanequeles de naja, tlocamo ma necchihua tietlanequeles de öque niechhualtitlanque. ³¹ Tlö naja netlajtusquiöne de naja mismo pues beles amo melöhuac uyesquea notlajtul. ³² Iloac ocsente tli tlajtulo de naja; hua necmate que tietlajtul tli quejtulo de naja icaca melöhuac. ³³ Nemejua nenquentitlanque tlöca ca Xohuö, hua yaja quenpubele tli melöhuac. ³⁴ Cache inu tlajtule tli naja necselea amo yaja itlajtul de sente tlöcatl. Pero nequejtoa ini nöncate söstantle para que ejqueu ma xomomöquexticö. ³⁵ Xohuö oyeya quieme tlöbile tli xutlaya hua tlöbiöya. Hua nemejua nenquecualtejaque para nenpajpöjque sie röto ipa itlöbil. ³⁶ Cache naja necpea sente testigo tli cache bieye que Xohuö. Pos inu tlachihualestle tli noTajtzi niechmacaque ma necchihua, pos sie yaja tlachihualestle tli necchihua tlajtoa de naja. Quejtoa que noTajtzi niechhualtitlanque. ³⁷ Hua yejuatzi noTajtzi öque niechhualtitlanque, yejuatzi tlajtulteca de naja. Hua nimpör ayec nentietiencajque nemejua nimpör ayec nentiejtaque. ³⁸ Nimpör amo nenquepea tietlajtultzi ipa nemoyulo; pues nemejua amo nemoneltoca noca naja öque yejuatzi niechhualtitlanque. ³⁹ Nentlatiemoa ipa teotlajtule, ipampa nenquepensöroa que itech teotlajtule nenquepea nemelestle nochepa; hua amo nemomaca cuienta que inu teotlajtule tlajtoa de naja. ⁴⁰ Hua amo nenqueneque nenhuölösque notlac para nenquepeasque nemelestle. ⁴¹ Chamöhualestle tli yebitz de tlöca amo necselea. ⁴² Cache naja nemiechixomate, que amo nenquepea tietlasojteles Deus ipa nemoyulo. ⁴³ Naja onehuöla de pörte de noTajtzi, hua amo nenniechselea. Tlö ocsente huölösquea de pörte de sie yaja, yaja inu nenqueselisquea nemejua. ⁴⁴ ¿Quiene noso quale nemoneltocasque, tlö nenqueselea chamöhualestle tli nemomaca sente ca ocsente, hua amo nenquetiemoa chamöhualestle tli quietiemaca öque sa yejuatzi Deus iloac? ⁴⁵ Amo xecpensörucö que naja nemiechtiyelfis tieixpa noTajtzi. Onca sente öque nemiechtiyelfea. Yaja Moisés, öque itech nenquepea confiönsa. ⁴⁶ Pos tlö nemejua nemoneltocane ica Moisés de melöhuac, nenniechneltocasquiöne naja; ipampa yaja otlajcuelo de naja. ⁴⁷ Hua tlö amo nemoneltoca ica tli yaja oquejcuero, ¿quiene nemoneltocasque de tli naja nemiechelfea?

6

Jesús quentlacualtejque cinco mil tlöca

¹ Cuöc opanuc ini nöncia söstantle, obiloac Jesús ca ocsie löro ötiescatl bieye de Galilea itucö Tiberias. ² Hua tietocaya meyac giente ipampa quejtaya tietzöbeme tli yejuatzi quechihualoöya inca cocoxcotzetzi. ³ Hua otlejcoac Jesús ipa sente tepietl, hua netlöliluc ompa inca tiemachtejcohua. ⁴ Hua ye miero asetaya tunale para pöscua, yaja yelfetl de joriojte. ⁵ Hua cuöc Jesús oquejtaque que ohuölöya tieca laebes meyactie, oquelfejque Felipe:

—¿Cöne tejcoasque pöntzi para ma tlacuöcö ini nöncate?

⁶ Cache ini nöncia quejtuloöya para queprobörusque. Pos yejuatzi ye quematihuataya tli quechihuasque. ⁷ Felipe otieyelfe:

—Ume cientos *denarios tomi de pöntzi amo axelis, para cara sesen tlöcatl quecuös tepetzi.

⁸ Otieyelfe sente tiemachtejque, yaja Andrés, icni Semu Piero:

⁹ —Oncönca necö sente pelalactle quepea möcuile pöntzi de ceböda hua unte mimechte. Pero ini tlacuale para meyac giente amo axelis.

¹⁰ Yecuöquenu Jesús oquejtojque:

—Xequenchihualticö giente ma motlölicö.

* **6:7** Sente tunale de tequetl motlaxtlöhuaya ca sie denario tomi.

Hua oyeya meyac xebetl niepa, hua omotlölejque quieme möcuile mil tlöca. ¹¹ Yecuöquenu ocönque Jesús inu niecaju pöntzi, hua cuöc ye tietlasojcömatelejque Deus, quenxiexelfejque giente tli ye motlölejtaya. Hua ejqueu nuyejque oquechijque ca mimechte, hua giente otlacuajque hasta cöne yejua ayecmo quenequeya. ¹² Hua cuöc yejua ye oijixbeque Jesús oquenmelfejque tiemachtejcohua:

—Xecuejucö tli ococotocac, majcamo tli niempolebe.

¹³ Entunses oquepejpenque, hua oquentiemitejque majtlactle huan ume chequejme ica pöntzi cojcototec de inu möcuile pöntzi de ceböda, tli oquixbecöjque cuöc ye otlacuajque. ¹⁴ Yecuöquenu niecate tlöca, cuöc quejtaque inu nieca tietzöbetl tli Jesús oquechijque, quejtojque:

—Ini nönca de melöhuac icaca inu tlayulepante öque huölösquea ipa nönca tlöltecpactle.

¹⁵ Cuöc casojcomatque Jesús que quenequeya huölösque para tieasesque, hua tiechi-hualtisque para iloas rey, ocsajpa obiloac ca ipa tepietl, yejuatzi tiesiel.

Jesús nejnemoaya ipa ötzintle

¹⁶ Hua cuöc ye yohuac, tiemachtejcohua hualtemuque ca itlac ötiescatl. ¹⁷ Hua ocalajque ijtec börco hua iyösquiöya ca ocsie löro ötiescatl hasta ca pa puieblo de Capernaum. Hua ye tlajtlayohua oyeya, hua Jesús ayemo ohualiloaya inca yejua. ¹⁸ Hua majcoqueya ötzintle ipampa lalebes tlalpitzaya yejyecatl. ¹⁹ Hua cuöc ye onejnemeya börco quieme checuasie noso checume kilómetros, tiejtaque Jesús quiene hualnejnemoatöya ipa ötzintle, hua hualnepachulutöya itlac börco. Hua yejua omajcömejque. ²⁰ Cache yejuatzi oquemelfejque:

—Naja necaca: amo xomomajticö.

²¹ Yecuöquenu yejua oquenejque ma calacoa ipan börco. Hua sa nima oaseto börco ipan tlöle cöne yejua oyöya.

²² Pa mustlateca inu giente tli oyejyeya ca nepa löro de inu ötiescatl oquejtaque que amo ompa oyejyeya ocseque börcöcucone, tlöcamo sa sente, hua nele Jesús amo calacoac ca tiemachtejcohua ijtec börcö, tlöcamo sa tiemachtejcohua onyajque insiesel. ²³ Cache ocseque börcös de puieblo de Tiberias ohuölajque cierca de inu locör cöne oquecuajque pöntzi sötiepa de cuöc Tlöcatzintle quemacaque tlasojcömatelestyle ca Deus. ²⁴ Entunses cuöc giente oquejtaque que Jesús amo ompa iloaya, nimpör tiemachtejcohua, ocalajque yejua ijtec börcöcucone, hua onyajque ca Capernaum tiehualtiemojtöya Jesús.

Jesús iloac pöntzi tli quetiemaacalo nemelestle

²⁵ Hua cuöc tieniextejque ca nepa löro de ötiescatl, tieyelfejque:

—ToTiemachtejcotzi, ¿quiema temaxitico necö?

²⁶ Oquennönquelejque Jesús, hua oquejtojque:

—Melöhuac, melöhuac nemiechelfea, que tlö nenniechtiemoa, amo ica porque nenquejtaque inu tietzöbetl, tlöcamo ipampa nenquecuajque pöntzi hua nenyequijixbeque.

²⁷ Amo xetequetecö por tlacuale tli sa tlame, cache xetequetecö por inu tlacuale tli ayec tlame hua tli quetiema nemelestle nochepa. Yaja naja öque onochi netlöcatl nemiechmacas de ini nönca tlacuale, pues noTajtzin Deus quecualejtalo ma necchihua inu.

²⁸ Hua tieyelfejque:

—¿Tli tayasque para tecchihuasque inu tequetl tli Deus quecualejtalo?

²⁹ Onöhuatihuac Jesús, hua oquemelfejque:

—Yaja ini nönca tequetl tli quecualejtalo Deus, que ma xomoneltocacö ca naja öque yejuatzi niechhualtitlanque.

³⁰ Yecuöquenu tieyelfejque:

—¿Tli söstantle tomochibelis noso tli sieña de tietzöbetl tomochibelis para tequejtasque hua toneltocasque mocatzinco? ³¹ Tobiebetcöhua quecuajque inu pöntzi itucö maná

ompa ipan locör cöne nionöque chönteya. Pues ejqueu tlajcuelulpanca: “Pöntzi de elfecac quenmacaque ma quecuöcö”.

³² Hua Jesús oquemelfeque:

—Melöhuac, melöhuac nemiechelfea: Amo Moisés nemiechmacac inu belaja pöntzi de elfecac cache noTajtzi nemiechmacalo inu belaja pöntzi de elfecac. ³³ Pos inu pöntzi de Deus, icaca tli hualtemuc de elfecac hua quennemitea tlöltecactlöca.

³⁴ Hua tieyelfeque:

—Tlöcatzintle, seme xetiechmomaquele ini nönca pöntzi.

³⁵ Hua Jesús oquemelfeque:

—Naja necaca neinu pöntzi tli quetiemaca nemelestle. Öque noca yebitz, ayec teosebes; hua öque noca moneltoca ayec ömeques. ³⁶ Cache ye onemiechelfe, que mös ye nenniechejtaque, pero amo nemoneltoca. ³⁷ Noche quiejquech niechmacalo noTajtzi huölösque notlac; hua öque beletes noca yebitz, ayec nectojtocas ca queyöhuac. ³⁸ Ipampa amo onehualtemuc de elfecac para necchihuas notlanequeles de naja, tlöcamo para necchihuas tietlanequeles de yejuatzí öque niechhualtitlanque. ³⁹ Hua yaja ini tietlanequeles de öque niechhualtitlanque, que de noche tli niechmacaque majcamo necpolo nion sente, tlöcamo cache ma nequenyulebite ipa inu sölültimo tunale. ⁴⁰ Pos yaja ini nönca tietlanequeles noTajtzi, que tlö canajyeca niechejtas naja que neca netieConietzi hua moneltocas ca naja, ma quepea inemeles nochepa. Hua naja necyulebitis ipan sölültimo tunale.

⁴¹ Cuöquenu joriojte moquejöröjque hua otlajtojque tiecuntra de yejuatzí ipampa yejuatzí quejtojque: “Naja nepöntzi tli hualtemuc de elfecac”.

⁴² Hua yejua oquejtojque:

—¿Amo yaja ini nönca Jesús iconie Josie hua itajtzi hua inöntzi tejua tequemixomate? ¿Quiene noso quejtoa ini nönca: “Naja onehualtemuc de elfecac”?

⁴³ Hua Jesús onöhuatihuac, hua oquemelfeque:

—Amo xetlajtucö ejqueu entre nemejua. ⁴⁴ Nionöque abele huölös noca naja, tlö amo queyulnutzasque noTajtzi öque niechhualtitlanque. Hua naja necyulebitis ipa sölültimo tunale. ⁴⁵ Tlajcuelulpanca ipa libro de tlayulepantejque: “Hua noche inu giente Deus quenmachtisque”. Noche giente tli tiecaque noTajtzi hua quetzecoa de tli quenmachtilo, yejuanu bitze noca. ⁴⁶ Amo quejtusneque que canajyeca tieyejtac noTajtzi, cache solamiente naja tli nebitz de Deus, naja quiema netieyejtac noTajtzi. ⁴⁷ Melöhuac, melöhuac nemiechelfea: Öque moneltoca quepea nemelestle nochepa. ⁴⁸ Naja necaca nepöntzi tli quetiemaca nemelestle. ⁴⁹ Nemobiebetcöhua oquecuajque inu maná ipan locör cöne nionöque chönte, pero sötiepa omejmejque. ⁵⁰ Cache ini belaja pöntzi tli ohualtemuc de elfecac, tlö canajyeca quecuös de ini nönca pöntzi, amo meques. ⁵¹ Naja nepöntzi tli quetiemaca nemelestle que nehualtemuc de elfecac. Tlö canajyeca quecuös de ini nönca pöntzi, nemes nochepa. Hua pöntzi tli naja necmacas, yaja nonacayo, yaja ini nönca nectiemacas para ma quepeacö nemelestle tlöltecactlöca.

⁵² Yecuöquenu joriojte mocöcamapanabiöya sente ca ocsente, hua oquejtojque:

—Ini nönca tlöcatl, ¿quiene noso tiechmacas inacayo ma tejcuöcö?

⁵³ Por inu Jesús oquemelfeque:

—Melöhuac, melöhuac nemiechelfea: Tlö amo nenquecuösque nonacayo de naja que onochi netlöcatl, hua tlö amo nenconisque noyeso, amo nenquepea nemelestle ipa nemoyulo. ⁵⁴ Öque quecua nonacayo hua cone noyeso, quepea nemelestle nochepa, hua naja necyulebitis ipa sölültimo tunale. ⁵⁵ Pues nonacayo ica melöhuac tlacuale, hua noyeso melöhuac ötlile. ⁵⁶ Öque quecua nonacayo hua cone noyeso seme noca iyes, hua naja neyes ca yaja. ⁵⁷ San quiene niechhualtitlanque noTajtzi öque nemoateca, hua naja neneme tiepampa noTajtzi, ejqueu nuyejque öque niehcua, yaja nuyejque nemes

nopampa. ⁵⁸ Yaja ini nōnca belaja pōntzi tli hualtemuc de elfecac, que amo ica quiename inu maná tli oquecuajque nemobiebetcōhua hua omejmejque. Pues öque quecuös ini nōnca belaja pōntzi nemes nochepa.

⁵⁹ Noche ini nōnca sōsantle oquejtojque cuōc quenmachtiloōya giente ipan teopanconetzi ompa Capernaum.

Tlajtule tli quetiemaca nemelestle nochepa

⁶⁰ Yecuōquenu meyactie de tiemachtejcohua cuōc oquecajque ini nōnca, oquejtojque:

—Lalebes checōjque cate ini nōncate tlajtulte. ¿Öquenu cuale queselis?

⁶¹ Pero Jesús quematihuaya ipa tieyulo que tiemachtejcohua moquejōroōya por tietlajtul, hua oquemelfejque:

—¿Quie beles ini nōnca nemiechcualōntea? ⁶² ¿Tli noso nenquepensōrusque, tlō nenniechejtasque naja tli onochi netlōcatl netlejus elfecac cōne cachtō neyeya?

⁶³ Solamiento yejuatzi Espiritu cuale quetiemacalo nemelestle; pues *tonacayo amo tli proviecho quetiemaca. Notlajtulhua tli nemiechelfea yejua cate espirituales hua quetiemaca nemelestle. ⁶⁴ Cache oncate segue de nemejua tli amo nemoneltoca.

Pues Jesús desde ca opie quematihuaya öquememu amo moneltocaya hua öquenu tieantrecōrusquea. ⁶⁵ Hua oquejtojque:

—Ipampaju onemiechelfe que nionōque abele huölös ca naja, tlō amo quemacasque noTajtzi para ma iye ca naja.

⁶⁶ Cuōc oquejtojque inu, meyactie de tiemachtejcohua omocuejque, hua ayecmo yajtenemeya tieca. ⁶⁷ Yecuōquenu oquemelfejque Jesús inu majtlactle huan ume tiemachtejcohua:

—¿Nemejua nenqueneque nuyejque nenyōsque?

⁶⁸ Otienōnquele Semu Piero:

—Tlōcatzintle, tlō temetzmocōbelisque, ¿öque ica teyōsque? Tejuatzi tomopilea tlajtule tli tiechmaca nemelestle nochepa. ⁶⁹ Hua tejua toneltocatebitze hua ye tecmate que tejuatzi tomobetzteca tetietlōcatl yectec de Deus.

⁷⁰ Hua Jesús oquenōnquelejque:

—Naja nemiechixpejpe nenmajtlactle huan ume, hua sente de nemejua ica diōblo.

⁷¹ Pues inu oquejtojque de Judas, iconie de Semu Iscariote. Ipampa Judas tieantrecōrusquea, hua yaja oyeya sente de inu majtlactle huan ume.

7

Tieicnihua Jesús amo moneltocaya tieca yejuatzi

¹ Sōtiepa de ini nōnca sōsantle biloatenemeya Jesús ipa estado de Galilea. Pos amo quenequihuaya biloatenemes ipa estado de Judea, ipampa joriojte quenequeya tiemectisque. ² Hua ye asetaya yelfetl de joriojte, inu yelfetl de cuajtlapame. ³ Hua otieyelfejque tieicnihua:

—Xebeya de necō, hua xebeya ipa Judea, para momachtejcohua ma quejtacō tli tlachihuale tecchihua. ⁴ Porque cuōc öque queneque ma giente quixomatecō yaja amo quechihua sōsantle ichtecajtzi. Tlō melōhuac tecchihua ini nōnca sōsantle xecchihua inmixtla noche giente.

⁵ Ejqueu tlajtoōya tieicnihua Cristo, ipampa yejua amo moneltocaya tieca yejuatzi.

⁶ Por inu Jesús oquemelfejque:

—Noura para necchihuas ayemo hualase; cache para nemejua amo nemiechimportōroa quiema nenquechihuasque canajyetla. ⁷ Abele tlōltecpactlōca nemiechtlajyelejtisque nemejua. Pero naja niechtlajyelejta, ipampa naja netlatestificōroa de yejua, que

* **6:63** Cuale nuyejque motradusirus: “nonacayo sa isiel”.

intlachihual amo cuale icaca. ⁸ Nemejua xeyöcö ipa ini nönca yelfetl. Naja amo neya ipa ini nönca yelfetl, ipampa ayemo hualase noura,

⁹ Hua cuöc oquemelfejque ini, necöhualuc ipan Galilea.

Jesús obiloac ipa yelfetl de cuajtlapame

¹⁰ Cache cuöc ye uyajque tieicnihua ipa yelfetl, yecuöquenu nuyejque yejuatzi obiloac, amo ixmantete, tlöcamo quieme sa ichtecajtzi. ¹¹ Hua tietiemoöya joriojte ipa inu nieca yelfetl, hua quejtoöya:

—¿Cöne icaca inu nieca?

¹² Hua chajchalöneya giente por yejuatzi, pues seque quejtoöya:

—Cuale tlöcatl icaca.

Hua ocseque quejtoöya:

—Amo, cache quencajcayöhua giente.

¹³ Cache nionöque amo tlajtlajtoöya ixmantete de yejuatzi, ipampa quenmabeliöya joriojte.

¹⁴ Hua cuöc tlajco yelfetl oyeya obiloac Jesús ipa inu teopantle bieye, hua tlamachtiloöya. ¹⁵ Hua quetietzöbejtaya joriojte. Quejtoöya:

—¿Quiene quemate ömatl ini nönca tlöcatl, hua ayec omomachte?

¹⁶ Oquennönquelejque Jesús, hua oquejtojque:

—Notlamachteles amo de naja icaca, tlöcamo de öque niechhualtitlanque. ¹⁷ Tlö canajyeca queneques quechihuas tietlanequeles Deus, quemates de tlö notlamachteles yebitz de Deus noso tlö naja netlajtlajtoa sa por nopörte de naja mismo. ¹⁸ Öque tlajtlatoa por pörte de yaja mismo, yaja quetiemoa ipropio chamöhuales; cache öque quetiemoa tiechamöhuales de yejuatzi öque oquehualtitlanque, ini nönca icaca melöhuac, hua ica intiero yectec. ¹⁹ Moisés nemiechmacac inu ley pero nionöque de nemejua amo quechihua cöso de inu ley. ¿Tli ipampa nenqueneque nenniechmectisque?

²⁰ Onöhuatque giente, hua oquejtojque:

—Demuño tecpea. ¿Öquenu queneque metzmectis?

²¹ Jesús onöhuatihuac, hua oquemelfejque:

—Sente tlachihuale onecchi, hua nemonochtie nenquetietzöbejtaque por inu.

²² Melöhuac, Moisés nemiechelfe ma xomonacayutequecö (möso amo opie ca Moisés, tlöcamo cachtö tobiebetcöhua omonacayutejque). Hua ipan söbro cuöc nele öque mosiebis, nemejua nenquenacayutejteque sente peltzintle. ²³ Ejqueu nenquenacayuteque tlöcatl ipan söbro, porque nenqueneque nenquecumplirusque inu ley de Moisés, ¿tlica noso nencuajcualöne nemejua ca naja ipampa onecpajte sente tlöcatl ipan söbro para ma iye intiero cuale icuierpo? ²⁴ Amo xetlajuscörucö sa lo que tli pane niese, cache xetlajuscörucö ca yectelestle.

¿Belis yaja ini icaca Cristo öque Deus quixpejpenque?

²⁵ Yecuöquenu quejtoöya seque tli oyeya de ciudad de Jerusalén:

—¿Amo yaja ini nönca öque quetiemojtecate para quemectisque? ²⁶ Hua xequejtacö tlajtlajtojteca ixmantete hua amo tli quelfea. ¿Quie beles tlötlajtoönejme ye ocaojcömatque de melöhuac, tlö yaja ini icaca Cristo öque Deus quixpejpenque? ²⁷ Cache ini tlöcatl, tecmate de cöne icaca; hua cuöc huölös Cristo öque Deus quixpejpenque nionöque amo quemates de cöne yebitz.

²⁸ Yecuöquenu tzajtzihuaya Jesús cuöc tlamachtiloöya ipa teopantle bieye. Quejtuloöya:

—Naja nenniechixomate, hua nenquemate de cöne neca. Hua amo onehuöla por nopörte de naja mismo. Cache niechhualtitlanque öque melöhuac iloac, hua yejuatzi amo nentieixomate nemejua. ²⁹ Naja netieixomate, ipampa de yejuatzi neca hua yejuatzi niechhualtitlanque.

³⁰ Por inu quenequeya tieasesque. Pero nionöque amo omöya tiepa, ipampa ayemo aseya tieura. ³¹ Hua meyactie de inu giente omoneltocaque tieca hua quejtoöya:

—Tlö huölösquiöne ocsente que uyesquiöne Cristo, abele quechihuasquea cache bejb-eye tietzöbeme, que tli quechihualo ini nönca tlöcatl.

Quentitlanque policías ma tieasecö Jesús

³² Hua inu fariseos oquecajque quiene giente tlajtlajtoöya de yejuatzi; hua jefes de teopexcötzetzi hua fariseos oquentitlanque policías ma tieasecö. ³³ Hua Jesús oquejtojque:

—Sa oc tepetzi oncö nemotlac neyes, hua sötiepa neyös tietlac öque niechhualtitlanque. ³⁴ Nenniechtiemusque, hua amo nenniechniextisque. Hua cöne naja neyes, nemejua abele nenyösque.

³⁵ Yecuöquenu joriojte oquejtojque sente ca ocsente:

—¿Cöne iyös ini nönca para amo tecniextisque? ¿Beles iyös intzölö inu ocseque tli uyajque intzölö griegos, para quenmachtis griegos? ³⁶ ¿Tli quejtusneque inu tlajtule tli oquejto: “Nenniechtiemusque, hua amo nenniechniextisque. Hua cöne naja neyes, nemejua abele nenyösque”?

Ötlacme de ötzintle tli quetiema nemelestle

³⁷ Cache pa sölültimo tunale, inu bieye tunale de yelfetl, Jesús onequetzaluc hua tzajtzihuac. Oquejtojque:

—Tlö canajyeca ömeque, ma huöla ca naja hua ma ötle. ³⁸ Öque moneltoca ca naja, ipa mochihuas quieme quejtoa teotlajtule, que de ijtecopa quisasque quieme ötlacme de ötzintle tli quetiema nemelestle.

³⁹ (Ini nönca oquejtojque de tieEspíritu de Deus, pues innochtie tli moneltocaque tieca Jesús tieselisquea tieEspíritu Deus. Pues ayemo hualiloöya Espíritu ipampa Jesús ayemo oqueselejque tietlaniexteles.)

Giente amo oyeya de acuerdo entre yejua

⁴⁰ Yecuöquenu seque de inu meyactie giente tli oquecajque ini nönca tlajtule, quejtoöya:

—De melöhuac ini nönca ica inu tlayulepante tli huölösquea.

⁴¹ Ocseque quejtoöya:

—Yaja ini nönca icaca Cristo öque Deus oquixpejpenque.

Ocseque quejtoöya:

—Pos amo. ¿De Galilea huölös Cristo? ⁴² ¿Amo quejtoa teotlajtule nele Cristo huölös de itech ixenöchpelhua rey David, hua de ipa Belén, de inu puieblo cöne nemeya David?

⁴³ Hua ca inu mocöcamapanabiöya giente tiepampa yejuatzi. ⁴⁴ Seque de yejua quenequeya tieasesque; cache nionöque amo omöya tiepa yejuatzi.

Tlötajtoönejme amo moneltocaque

⁴⁵ Hua inu policías ohuölajque intlac jefes de teopexcötzetzi hua inca fariseos. Hua yejua oquenmelfejque:

—¿Tlica amo nenquehualecaque?

⁴⁶ Policías onöhuatque:

—Ayec otlajtlajto ocsente tlöcatl quiename ini nönca tlöcatl.

⁴⁷ Yecuöquenu fariseos onöhuatque:

—¿Nuyejque nemejua nemiechcayö? ⁴⁸ ¿Beles nenquepensöroa que ye omoneltocaque ca yaja seque de tejua tli tetlötlayecönque hua tefariseos? ⁴⁹ Cache ini nöncate giente que amo quemate inu ley hua moneltoca ca inu tlöcatl, yejua cate malditos.

⁵⁰ Hua Nicodemo, öque antes uya tietlac Jesús, oyeya intzölo, pues yaja oyeya sente de inu fariseos. Yaja oquemelfe:

⁵¹ —¿Beles quejtoa toley que ica cuale ma tecjuscörucö sente tlöcatl, tlö amo cachtö tejcaquesque tli quejtus inu tlöcatl, hua tecasojcömatesque tli yaja oquechi?

⁵² Onöhuatque hua oquelfejque:

—¿Beles taja nuyejque teca de Galilea para tetlajtlajtus de inu maniera? Xectlatiemole teotlajtule hua xequejta que de Galilea ayec yebitz sente tlayulepante.

*[⁵³ Hua onyajque innochtie ca inchajchö.

8

[Sente sohuatl tlajtlacultec

[¹ Hua Jesús obiloac ipa tepietl itucö los Olivos.

² Hua ca ise cualcö ohualbiloac ipa teopantle bieye, hua meyac tlöca ohuölajque tietlac. Hua ompa onetlöliluc oquenmachtiloöya. ³ Yecuöquenu tlamachtioneme de teotlajtule hua fariseos tiehualquelejque sente sohuatl tli tlajtlaculchijtaya ca tlöcatl; hua oquetlöllejque tlanepantla. ⁴ Otieyelfejque Jesús:

—Maestro, ini nönca sohuatl otecaseque miero cuöc tlajtlaculchijteca ca inu tlöcatl.

⁵ Hua ipa toley Moisés otiechnahuete ma tectecalticö öque quechihua ini nönca. Tejuatzi noso ¿tli tomojtalfea?

⁶ Cache ini nönca tieyelfiöya para tietanteörusque, para cuale tietieyelfisque. Cache Jesús onepiechuluc tlölpä, tlajcueluloöya ipan tlöle ica tiemajpel. ⁷ Hua cuöc yejua quenelchihuaya tietlajtlaniöya, onequetzaluc, hua oquemelfejque:

—Öque de nemejua amo quepea tlajtlacule, ma case tietetu hua ma quemuchele yaja cachtö.

⁸ Hua ocsajpa onepiechuluc, hua tlajcueluloöya ipa tlöle. ⁹ Hua yejua cuöc oquecajque, opiejque oquequistajque ca sie sente; opiejque desde tli cache biebentzetzi hasta ca tli cache pelalacme. Hua onecöhualuc tieinsiel Jesús, hua sohuatl tli oyeya tlanepantla.

¹⁰ Hua cuöc nequetzaluc Jesús, oquelfejque:

—Sohuatl, ¿cöne cate niecate giente? ¿Nionöque amo metzcuntenöro?

¹¹ Hua yaja oquejto:

—Nionöque, Tlöcatzintle.

Yecuöquenu Jesús oquelfejque:

—Nimpor naja amo temetzcuntenöroa. Xebeya, hua desde öxö ayecmo xetlajtlaco.]

Jesús iloac tlöbile de tlöltecpactle

¹² Hua oquennunutzque Jesús pa ocsente tunale, hua oquejtojque:

—Naja necaca netlöbile de tlöltecpactlöca. Öque niechtoca, ayec nejnemes ipa tlay-ohuaquelestle, cache quepeas tlöbile tli quetiémaca nemelestle.

¹³ Yecuöquenu fariseos otieyelfejque:

—Taja tetlatestificöroa de taja mismo; lo que tli taja tequejtoa amo melöhuac.

¹⁴ Onöhuatihuac Jesús, hua oquemelfejque:

—Mös naja netlatestificöroa de naja mismo, pero lo que tli nequejtoa icaca melöhuac, ipampa necmate de cöne onehuöla hua cöne neya. Cache nemejua amo nenquemate de cöne nebitz, nimpor cöne neya. ¹⁵ Nemejua nentlajuscöroa san quiene ca pane niese; cache naja amo öque necjuscöroa. ¹⁶ Pero tlö naja netlajuscörus, netlajuscörus quiene melöhuac ica. Ipampa amo necaca nosiel, tlöcamo tecate sa secne naja hua noTajtzi öque niechhualtitlanque. ¹⁷ Hua ipa nemoley tlajcuelulpanca que cuöc ume tlöca tlatestificöroa intlamelöjcoales icaca melöhuac. ¹⁸ Naja neca sente tli netlatestificöroa de naja mismo, hua yejuatzi noTajtzi öque niechhualtitlanque nuyejque tlatestificöruro de naja.

* **7:52** Sa quiesquete manuscritos quepejpea 7.53—8.11. Seque quepejpea sötiepa de capítulo 21, ocseque quepea sötiepa de Lucas 21.38. Meyactie de tli cachtö omojcuelojque amo quepejpea.

¹⁹ Hua tieyelfejque:

—¿Cöne icaca motajtzi?

Onöhuatihuac Jesús:

—Amo nenniechixomate naja, nimpor noTajtzi amo nentieixomate. Tlö nenniechixomatesquea naja, nuyejque noTajtzi nentieixomatesquea.

²⁰ Ini nönca tlajtule oquejtojque Jesús cuöc tlamachtiloöya ipa teopantle bieye ipa inu nieca locör cöne giente oquetlöliöya tomi. Hua amo öque otieasec, ipampa ayemo aseya tieura.

Cöne naja neyös abele nenyösque

²¹ Hua ocsajpa oquemelfejque Jesús:

—Naja neyös, hua nenniechtiemusque, cache ipa nemotlajtlacul nenmejmequesque. Cöne naja neya, nemejua abele nenyösque.

²² Por inu quejtoöya joriojte:

—¿Beles mömectis yaja? Pues quejtoa: “Cöne naja neya, nemejua abele nenyösque”.

²³ Hua quemelfiloöya:

—Nemejua nencate de tlölpa; naja necaca de tlapac. Nemejua nencate de ini nönca tlöltecpactle; naja amo neca de ini nönca tlöltecpactle. ²⁴ Por inu onemiechelfe que nenmejmequesque ipa nemotlajtlacul; ipampa tlö amo nemoneltocasque que *naja necaca, nemejua ipa nemotlajtlacul nenmejmequesque.

²⁵ Entunses tieyelfejque:

—¿Taja öquenu teca?

Ejqueu noso Jesús oquemelfejque:

—Naja neca san quiene ca ye onemiechelfe desde cuöc onepie. ²⁶ Meyac söstantle necpea para nemiechelfis de nemejua mismo hua necpea que nemiechjuscörus. Pos yejuatzi öque niechhualtitlanque iloac melöhuac, hua lo que tli naja onejca de yejuatzi yaja inu nequenpubelea tlöltecpactlöca.

²⁷ Cache yejua joriojte amo casojcömatque que yejuatzi quennunutzaloöya de tieTajtzi.

²⁸ Entunses oquemelfejque Jesús:

—Cuöc niechajcoquesque naja, öque onochi netlöcatl, yecuöquenu nencasojcömatesque que *naja necaca. Hua amo yetla necchihua por nopörte de naja mismo; cache lo que tli noTajtzi niechmachtlo, yaja inu nequejtoa. ²⁹ Hua yejuatzi öque niechhualtitlanque noca iloac. Amo sa nosiel niehcöhualo, ipampa lo que tli yejuatzi quecualajtalo yaja inu seme necchihua.

³⁰ Hua cuöc Jesús quejtuloöya ini nönca söstantle, meyactie omoneltocaque tieca.

Lo que tli melöhuac nemiechlibrörus

³¹ Hua inu joriojte tli moneltocaque tieca Jesús quemelfiloöya ejqueyi:

—Tlö nemejua nenquesequirojtasque ipa notlajtul, nenyisque de melöhuac nomachtejcohua. ³² Hua nenquixomatesque tli melöhuac, hua inu tli melöhuac nemiechlibrörus para ayecmo nenyisque nenesclavos.

³³ Tienönquelejque:

—Teipeljua de Abraham tecate tejua, hua ayec tecate teiesclavos de nionöque canayeca. ¿Quiene noso tomojtalfea tejuatzi que tochihuasque telibres?

³⁴ Jesús quennönquelejque:

—Melöhuac, melöhuac nemiechelfea, que noche tli tlajtlacoa mochihua esclavo de tlajtlacule. ³⁵ Hua sente esclavo amo mocöhuas ipan chöntle nochepa, pero iconie de chöne mocöhuas nochepa. ³⁶ Hua ejqueu, tlö tieConietzi Deus nemiechlibrörus, nenlibres nenyisque de melöhuac. ³⁷ Necmate que nemejua nencate nenipeljua de Abraham, cache nenqueneque nenniechmectisque, ipampa notlajtul amo quepea locör

* **8:24** “Naja necaca” oyeya sente de tietucöyutzetzihua Deus. Xomojtelicö Exodo 3.14.

ipa nemoyulo. ³⁸ Naja nequejtoa lo que tli onequejtac tietlac noTajtzi; hua nemejua por nemopörte nenquechihua lo que tli onenquecajque de itlac nemotöta.

Amo Cuale Tlöcatl icaca nemotöta

³⁹ Onöhuatque hua otieyelfejque:

—Totajtzi icaca yaja Abraham.

Oquemelfejque Jesús:

—Tlö nenyeyene de melöhuac nenipeljua Abraham, itlachihual Abraham nenquechihuasquea. ⁴⁰ Cache öxö nenqueneque nenniechmectisque naja tli onemiechpubele tlin melöhuac, tli onejca de Deus. Amo ejqueu oquechi Abraham. ⁴¹ Nemejua nenquechihua itlachihual de ocsente nemotöta.

Yecuöquenu tieyelfejque:

—Tejua amo teichtecaconieme; tejua sa sie Tajtli tetiepea, yejuatzi Deus.

⁴² Yecuöquenu Jesús oquemelfejque:

—Tlö nemotajtzi iloasquiöne Deus, melöhuac nenniechtlasojtlasquiöne; pues naja de Deus onehualquis, hua onehuöla. Hua amo onehuöla por nopörte de naja mismo, cache yejuatzi niechhualtitlanque. ⁴³ ¿Tlica amo nencasojcömate tli nequejtoa? Ipampa abele nenqueyejcaque notlajtul. ⁴⁴ Nemejua inu Diöblo icaca nemotöta, hua lo que tli quelibea nemotöta yaja inu nenqueneque nenquechihuasque. Yaja omochi mequestiero desde ca opie, hua amo quechijtebitz tlin melöhuac, ipampa amo onca tlin melöhuac ica yaja. Istlacatlajtoa, porque ejqueu ica de porsí. Pues yaja icaca istlacatque, hua tajtle de niecate tli istlacatlajtoa. ⁴⁵ Pero naja nequejtoa tlin melöhuac, hua por inu amo nemoneltoca ca naja. ⁴⁶ ¿Öquenu de nemejua queniextis tlajtlacule notech? Entunes tlö nequejtoa tlin melöhuac, ¿tlica noso amo nemoneltoca ca naja? ⁴⁷ Öque ica de Deus, tietlajtultzi Deus quecaque. Por inu amo nenquecaque nemejua, ipampa amo nencate de Deus.

Antes que otlöcatene Abraham naja ye necaca

⁴⁸ Yecuöquenu onöhuatque joriojte, hua otieyelfejque:

—¿Amo tiel tequejtoa tejua, que taja tecaca tesamaritano hua tecpea demunio?

⁴⁹ Onöhuatihuac Jesús:

—Naja amo necpea demunio, tlöcamo pa netieyeta noTajtzi. Hua nemejua amo pa nenniechejta. ⁵⁰ Amo nectiemoa quiene necpeas chamöhualestle. Onca öque niechtiemolilo chamöhualestle, hua yejuatzi iloac öque tlajuscörruro. ⁵¹ Melöhuac, melöhuac nenniechelfea, öque queneltoca notlajtul, ayec meques.

⁵² Yecuöquenu joriojte tieyelfejque:

—Öxö melöhuac ye tecmate que taja tecpea demunio. Abraham omec hua nuyejque omejmejque tlayulepantejque, hua taja tequejtoa: “Öque queneltoca notlajtul, ayec meques”. ⁵³ ¿Cache tebieye tomomajteca que totöta Abraham, öque nuyejque omec? Hua inu tlayulepantejque omejmejque. ¿Öquenu tecpensöroa que taja tecaca?

⁵⁴ Onöhuatihuac Jesús:

—Tlö naja nochamöhua naja mismo, nochamöhua amo balierebe. Cache öque niechchamöhualo yejuatzi noTajtzi, öque nemejua nenquejtoa que nele iloac nemoDeus. ⁵⁵ Hua amo nentieixomate. Cache naja netieixomate. Hua tlö nequejtusquiöne que amo netieixomate, neyene quieme nemejua neistlacatene. Pero netieixomate hua necneltoca tietlajtultzi. ⁵⁶ Abraham nemotajtzi opajpöc cuöc oquepensöro de que naja nehuölös. Hua oquejtac tunale cuöc nehuöla hua oquepex meyac pöquelestle.

⁵⁷ Ejqueu noso otieyelfejque joriojte:

—Nimpor ayemo tecpea cincuenta años, hua ¿beles ye otequejtac Abraham?

⁵⁸ Oquemelfejque Jesús:

—Melöhuac, melöhuac nenniechelfea: Antes que tlöcatene Abraham *naja ye necaca.

⁵⁹ Yecuöquenu joriojte ocönque teme para tietecaltisque Jesús, porque quejtuloöya que iloac Deus. Cache onejyönaluc, hua oquixoac de ipan teopantle.

9

Jesús quepajteque sente tlöcatl tli otlöcat ixcocoxque

¹ Hua cuöc opanoac Jesús ca sie locör, oquejtaque sente tlöcatl que oyeya ixcocoxque desde cuöc otlöcat. ² Hua tiemachtejcohua tietlajtlanejque, oquejtojque:

—ToTiemachtejcotzi, ¿öquenu otlajtlaco, ini nönca noso yejua itötajua, para otlöcat ixcocoxque?

³ Onöhuatihuac Jesús:

—Nimpor ini amo otlajtlaco, nimpor itötajua. Cache omochi ini para ma moniexte tietlachihual Deus itech yaja. ⁴ Combenierebe ma tecchihuacö tli tietlachihual de yejuatzi öque niechhualtitlanque, mientras oc tlaniese. Ompabitz yohuale, cuöc nionöque abele tli ayes. ⁵ Mientras oncö neca ipa ini tlöltecpactle, netlöbile necaca para ca tlöltecpactlöca.

⁶ Cuöc oquejtojque ini, ochejchaluc tlölpa. Oquechejchijque soquetl ca tiechejchal, hua oquetlölelejque ipa ixtelolajua inu ixcocoxque. ⁷ Hua oquelfejque:

—Xebeya, xomoxömite ijtec xabie de Siloé. —Siloé quejtusneque, Tlatitlantle.

Yecuöquenu uya inu ixcocoxque, hua omoxöme, hua cuöc hualmocuec ye hualtlajtlachixtöya. ⁸ Yecuöquenu tli icaltech chajchönteya, hua tli ca ye niepa oquejtaque quiene motlajtlajtlaniöya, quejtoöya:

—¿Amo yaja ini öque motlajtlajtlaniöya?

⁹ Seque quejtoöya:

—Yaja icaca.

Hua ocseque:

—Amo. Sabele yaja.

Yaja quejtoöya:

—Naja necaca.

¹⁰ Hua oquelfejque:

—Entunses ¿quiene otetlachix?

¹¹ Onöhuat yaja hua oquejto:

—Inu tlöcatl öque tietucö Jesús, oquechejchijque soquetl, hua oquetlölelejque ipa nixtelolajua, hua oniechelfejque: “Xebeya ipa Siloé, hua xomoxöme”. Hua oneya, hua onoxöme, hua onecasec notlacheales.

¹² Yecuöquenu oquelfejque:

—¿Cöne ica inu nieca?

Yaja oquejto:

—Amo necmate.

Inu fariseos otlajtlanque quiene opajtec

¹³ Oquebicaque intlac fariseos inu tlöcatl tli ca ye niepa oyeya ixcocoxque. ¹⁴ Hua oyeya ipa söbro cuöc Jesús oquechejchijque soquetl, hua oquetlachealtejque. Pues joriojte seme mosiebea ipa söbro. ¹⁵ Oquetlajtlanejque nuyejque fariseos quiene ocasec itlacheales. Hua yaja oquemelfe:

—Oniechtlölelejque soquetl ipa nixtelolajua, hua onoxöme, hua ye netlachea.

¹⁶ Yecuöquenu seque de inu fariseos oquejtojque:

—Ini nönca Jesús amo de Deus, ipampa amo quemalfea söbro.

Cache ocseque quejtoöya:

—Pero sente tlöcatl tlajtlacultec ¿quiene cuale quechihuas tietzöbetl quiename ini?

Hua amo oyejyeya de acuerdo yejua. ¹⁷ Ocsajpa oquelfejque inu ixcocoxque:

—¿Taja, tli tequejtoa de inu nieca öque metztlachealte?

Yaja oquejto:

—Pues iloac tlayulepante.

¹⁸ Cache joriojte amo moneltocaya de yaja, quiene oyeya ixcocoxque, hua quiene ocasec itlacheales, hasta senamo oquennutzque itõtajua ¹⁹ hua oquentlajtlanejque, oquemelfejque:

—¿Yaja ini nõnca nemoconie, õque nemejua nenquejtoa otlõcat ixcocoxque? ¿Quiene, noso, ye tlachea õxõ?

²⁰ Onõhuatque itõtajua hua oquejtojque:

—Tejua tecmate yaja ini nõnca toconie, hua quiema otlõcat ixcocoxque. ²¹ Cache quiene õxõ ye tlachea, amo tecmate; noso õquenu oquetlachealte, tejua amo tecmate. Yaja ye tlõcatl icaca; xomotlajtlanelicõ yaja ma quejto.

²² Ini nõnca oquejtojque itõtajua, ipampa quenmabeliõya joriojte. Pues joriojte ye omotlõlejque de acuerdo que tlõ canajyeca quejtus que Jesús iloac Cristo õque Deus tieixpejpenque, ma quisa para que ayecmo ma calaque ipan teopanme hua ma ayecmo quepea pörte ca icompanierojua. ²³ Por inu oquejtojque itõtajua: “Ye tlõcatl icaca; xomotlajtlanelicõ yaja”.

²⁴ Hua ca inu, ocsajpa oquennutzque inu tlõcatl tli ixcocoxque oyeya. Oquelfejque:

—Sa Deus xetiemochamõbele. Pues tejua tecmate que nieca tlõcatl icaca tlajtlacultec lalebes.

²⁵ Yecuõquenu yaja onõhuat, hua oquejto:

—Tlõ lalebes tlajtlacultec, amo necmate. Pos sa ini necmate, que naja neyeya neixcocoxque, hua õxõ ye netlachea.

²⁶ Hua ocsajpa oquelfejque:

—¿Tli metzchibele? ¿Quiene metztlachealte?

²⁷ Oquenõnquele:

—Ye onemiechmolfele, hua amo nemocaquitea. ¿Tlica ocsajpa nemonequitea ma nemiechmolfele? ¿Nemonequitea nuyejque nemejuantzetzti nemobetztasque nentiemachtejcõhua de yejuatzti?

²⁸ Hua ocajajuaque, hua oquejtojque:

—Taja tecaca temachtejque de yaja; cache tejua teimachtejcõhua de Moisés tecate.

²⁹ Tejua tecmate que oquenunutzque Deus Moisés; cache ini nõnca amo tecmate de cõne icaca.

³⁰ Onõhuat inu nieca tlõcatl, hua oquemelfe:

—Melõhuac, naja nectietzõbejta ipampa nemejuantzetzti amo nemomachitea de cõne iloac ini nõnca tlõcatl, hua yejuatzti oniechtlachealtejque naja. ³¹ Hua tecmate que Deus amo quencaquihua tlin tlajtlaculteque. Cache tlõ canajyeca tiemabelea Deus, hua quechihua tli tietlanequeles, inun quiema quecaquihua yaja. ³² Desde cuõc opie tlõltecpactle ayec omocac que canajyeca oquetlachealte sente tlõcatl tli otlõcat ixcocoxque. ³³ Tlõ ini nõnca tlõcatl amo iloasquiõne de Deus, abele tli ayihuasquea.

³⁴ Oquenõnquelejque, hua oquelfejque:

—Ipan tlajtlacule de atiro otetlõcat, ¿hua taja tetiechmachtis tejua?

Yecuõquenu oquetojtoaque para ayecmo quiema iyõs ipa teopanme.

Ixcocolestle ipa õque iyulo

³⁵ Oquecajque Jesús quiene oquetojtoaque; hua oqueniextejque. Oquelfejque:

—¿Tomoneltoca taja tieca õque omochi tlõcatl?

³⁶ Hua onõhuat yaja, oquejto:

—Pos ¿õquenu yejuatzti, Tlõcatzintle, para noneltocas ca yejuatzti?

³⁷ Oquelfejque Jesús:

—Taja ye otequejtac, pues naja õque netlajtlajtojteca ca taja, naja necaca.

³⁸ Hua yaja oquejto:

—Noneltoca, noTlõcatzintle.

Hua tieteochi.

³⁹ Hua oquejtojqque Jesús:

—Naja para netlajuscörus onehuöla ipa ini tlöltecpectle: para que niecate tli amo tlajtlachea, ma tlacheacö; hua tlin tlajtlachea ma ixcocoxcöteacö.

⁴⁰ Hua seque de inu fariseos tli oyejyeya ca yejuatzi oquecajqque ini nönca, hua otieyelfejque:

—¿Belis tequejtus que tejua nuyejque tecate teixcocoxcötzetzi?

⁴¹ Oquenmelfejque Jesús:

—Tlö melöhuac nenixcocoxcötzetzi nenyene ipa nemoyulo, amo nenquepeasquiöne tlajtlacule. Cache öxö ica quiename nenquejtoa, pos nentlajtlachea. Pos por inu nemopanca nemotlajtlacul.

10

Ejemplo de calnielojte hua calnielojpexque

¹ Melöhuac, melöhuac nemiechelfea: Öque amo calaque ca pan trönca de corröl de calnielojte tlöcamo mocalactea ca ocsie löro, ini nönca tlachteque hua de porsicachtejqque icaca. ² Cache öque calaque ca pa trönca, yaja ini ica calnielojpexque de inu calnielojte. ³ Tlajpexque quetlajtlapolfea para calaques calnielojpexque, hua calnielojte quetiencaque. Hua icalnielolja quentzajtzelea quiene ca intojtucö hua quenquextea.

⁴ Hua cuöc ye oquenquexite ca queyöhuac noche tli ihuöxca, yaja quenyecöna hua calnielojte quetoca, ipampa calnielojte quixomate calnielojpexque cuöc yaja tzajtze.

⁵ Pero öque amo quixomate yejua amo quetoca, cache chucholaa cuöc tzajtze, ipampa amo quejixomate.

⁶ Yaja ini nönca ejemplo oquepujqque Jesús. Cache yejua amo casojcömatque tlica ejqueu oquemelfiloöya.

Jesús iloac tocuale calnielojpexque

⁷ Ejqueu noso Jesús ocsajpa oquemelfejque:

—Melöhuac, melöhuac nemiechelfea: Naja necaca netrönca de calnielojte. ⁸ Noche tli cachtö de naja ohuölajque, icachtejqque cate; cache calnielojte amo oquentiencajqque. ⁹ Naja netrönca. Öque por naja calaques, momöquextis; calaques hua quisas hua queniextis tlacuale. ¹⁰ Ichtejqque amo yebitz tlöcamo para tlachteques hua para tlamectis hua tlaniempolus. Naja onehuöla para ma quepeacö nemelestle, inu nemelestle tli bel lalebes cuale ica. ¹¹ Naja necuale necalnielojpexque. Sente cuale calnielojpexque quetiema inemeles por impampa calnielojte. ¹² Cache öque sa tequetque, tli amo icaca calnielojpexque, hua amo ihuöxcagua inu calnielojte, cuöc yaja quejta yebitz coyutl, quencajcöhua calnielojte, hua cholaa. Hua coyutl quemajase hua quencuaxieloa calnielojte. ¹³ Ejqueu cholaa tequetque ipampa sa tequetque icaca, hua amo de melöhuac quentlachilea calnielojte. ¹⁴ Naja necuale necalnielojpexque. Hua nequemixomate nocalnielolja, hua tli nohuöxcagua niechixomate. ¹⁵ NoTajtzi niechixomatihua, hua ejqueu nuyejque naja netieixomate noTajtzi. Hua nectiemaca nonemeles por impampa nocalnielolja. ¹⁶ Nuyejque nequenpea ocseque calnielojte tli amo cate ipa ini nönca colöl. Niecate nuyejque niechconbenieroa nequenhualecas, hua niechtiencaquesque notlajtul. Hua noche nocalnielolja yesque sa secne ca sa sente calnielojpexque. ¹⁷ Por inu niechtlasojtlalo noTajtzi, ipampa naja nectiemaca nonemeles, para ocsajpa necönas. ¹⁸ Amo öque niehcuejcuelea, cache naja mismo nectiemaca. Necpea beletelestle para nectiemacas, hua necpea beletelestle para ocsajpa necönas. Ejqueu oniechmandörojque noTajtzi.

¹⁹ Hua ocsajpa omocöcamapanabejqque joriojte ipampa ini nönca tlajtule. ²⁰ Hua meyac-tie de yejua quejtoöya:

—Quepea demunio, hua lulucojtzi icaca. ¿Tli para nenquecaque?

²¹ Quejtoöya ocseque:

—Ini nönca tlajtule amo yaja de öque quepea demunio. ¿A poco cuale demunio quetlachealtis sente ixcocoxque?

Joriojte amo moneltocaque tieca Jesús

²² Hua pa inu tiempo omochi yelfetl de oquededicörojque teopantle bieye ipa ciudad de Jerusalén. Hua oyeya tlaquiscötla cuöc lalebes siehua. ²³ Hua Jesús onejnemoaten-emeya pan teopantle cöne corredur de Salomón. ²⁴ Hua tieyhualojque joriojte, hua tieyelfejque:

—¿Hasta quiema tecneque tetiechtlapolultejas? Tlö taja teCristo öque Deus oquixpejpenque, xetiechelfe ixmantete.

²⁵ Oquennönquelejque Jesús:

—Ye onemiechelfe hua amo nemoneltoca. Ini tlachihualestle tli naja necchihua tietucöyupa noTajtzi, yaja tlachihuale tlatestificöroa de naja. ²⁶ Cache nemejua amo nemoneltoca, ipampa amo nencate de nocalnielouja. ²⁷ Nocalnielouja niechtiencaque, hua naja nequemixomate, hua niechtoca. ²⁸ Hua naja nequenmaca nemelestle nochepa. Hua ayec ixniempolebesque, hua nionöque amo niechenquextelis de nomötla. ²⁹ NoTajtzi Deus niechmacaque nocalnielouja. Yejuatzi cache checöhuac iloac que nionöque, hua nionöque abele quenquextelis de tiemöpa noTajtzi. ³⁰ Naja hua noTajtzi sasie tecate.

³¹ Yecuöquenu ocsajpa joriojte ocönque teme para tietecaltisque. ³² Oquennönquelejque Jesús:

—Meyac tlachihuale ye onemiechejtete de noTajtzi. ¿Ipampa cötla ja tlachihuale de ini nöncate nenniechtecaltea?

³³ Tienönquelejque joriojte:

—Ipampa tlin cuale tlachihuale amo temetztecaltisque, tlöcamo ipampa techecuatlajtoa. Pues taja tecaca tetlöcatl hua tomochihua quieme tlö teDeus.

³⁴ Oquennönquelejque Jesús:

—¿Beles amo nenquelnömeque de que tlajcuelulpanca ejqueyi ipa nemoömatl de ley: “Naja onequejto, nendeuste nencate”? ³⁵ Pues oquencuitejque deuste yejua niecate öque inca ohuöla tlajtule de Deus. (Hua teotlajtule abele öque quexexetunis.) ³⁶ ¿Tlica noso nenquejtoa nemejua que naja sa nechecuatlajtoa? Pos ejqueu nenquejtoa sampor naja onequejto que netieConietzi Deus necaca. Pues noTajtzi niechixpejpenque hua niechhualtitlanque ipan tlöltecpactle. ³⁷ Tlö amo necchihua tietlachihuales noTajtzi, amo xeniechneltocacö. ³⁸ Cache tlö necchihua, mös naja amo nenniechneltoca, xomoneltocacö ica tlachihualestle para que ejqueu nenquematesque hua nemomacasque cuienta que noTajtzi noca iloac hua naja neca tieca noTajtzi.

³⁹ Hua ocsajpa quenejnequeya tieasesque. Cache yejuatzi obiloac de inmöcopa.

⁴⁰ Hua ocsajpa obiloac ca nie löro de ötlactle de Jordán, ipa inu nieca locör cöne cachtö tlacuötiequiöya Xohuö; hua ompa necöhualuc. ⁴¹ Hua meyactie ohuölajque tieca. Hua quejtoöya:

—Xohuö melöhuac amo tli tietzöbetl oquechi. Cache noche tli oquejto Xohuö de ini nönca tlöcatl icaca melöhuac.

⁴² Hua ompa meyactie omoneltocaque ca yejuatzi.

11

Omec Lázaro

¹ Mococoöya sente tlöcatl itucö Lázaro, tli nemeya ipa puieblo de Betania, cöne nuyejque nejnemeya icnijte María hua Marta. ² (Pues ini María yaja öque tieajalöbele

Tlöcatzintle ica pajtle ajfeyoc, hua oquepojpu tieicxehua ca itzo. Pos mococoöya icni itucö Lázaro.)³ Icnihua tietlatitlanelejque Jesús, hua tieyelfejque:

—Tlöcatzintle, xomojtele, öque lalebes tomotlasojtelea mococoa.

⁴ Hua cuöc oquecajque Jesús, oquejtojque:

—Ini nönca cocolestle amo ica para ma meque, cache icaca para ma niese tietlachihuales Deus, para ejqueu Deus ma niechmacacö chamöhualestle naja que neca netieConietzi.

⁵ Hua Jesús quentlasojtlaloöya Marta, hua icni sohuatl, hua Lázaro. ⁶ Hua cuöc quecajque que mococoöya Lázaro, necöhualuc oc ume tunale ca ompa cöne oiloaya.

⁷ Entunses sötiepa de ini nönca oquemelfejque tiemachtejcohua:

—Teyabe ocsajpa pan estado de Judea.

⁸ Tieyelfejque tiemachtejcohua:

—ToTiemachtejcotzi, joriojte quemach quenejnequeya metzmotecaltelisque, ¿hua ocsajpa tomobicas ompa?

⁹ Nöhuatihuac Jesús:

—¿Amo quepea tunale majtlactle huan ume ura? Öque nejnemes ca tunale amo moteputamis, ipampa quejta tlöbile de ini nönca tlöltecpectle. ¹⁰ Cache öque nejneme ca yohuale, moteputlamea, ipampa amo onca tlöbile. Oc turavea ica ca tunale para naja; amoyetla niechpasörus.

¹¹ Cuöc oquejtojque ini, sötiepa oquenmelfejque:

—Toamigo Lázaro ye coche, cache neyös para nequexetiti de icocheles.

¹² Entunses tiemachtejcohua tieyelfejque:

—Tlöcatzintle, tlö quejtus coche, beles pajtes.

¹³ Cache ini quejtuloöya Jesús de imequeles. Hua yejua quepensörojque beles tlajtlajtuloöya de icocheles. ¹⁴ Yecuöquenu Jesús oquemelfejque ixmantete:

—Lázaro ye omec. ¹⁵ Hua necpea pöquelestle nemopampa porque ejqueu nemonelto-casque, porque naja amo ompa neyeya. Pero ma teyöcö itlac.

¹⁶ Yecuöquenu Tumös, öque mocuitea Dídimo noso Cuhuötzi, oquemelfe ocseque machtejque:

—Teyabe nuyejque tejua para temejmequesque ca yejuatzi.

Jesús iloac yulebelestle hua nemelestle

¹⁷ Entunses cuöc ohualiloac Jesús, oqueniextiluco que ye nöbe tunale quepea ijtec mejcöcoyocle. ¹⁸ Öxö, Betania oyeya itlac Jerusalén, quieme yeye kilómetros ca bejca.

¹⁹ Hua meyactie joriojte ohuölajque intlac Marta hua María, para quenyulölisque ipampa imicni que ye omec. ²⁰ Entunses Marta cuöc oquecac que Jesús hualiloöya, oquis para tienömequeto, cache María ompa omocö pa chöntle yehuataya. ²¹ Hua Marta otieyelfe Jesús:

—Tlöcatzintle, tlö oncö tomobetztane, nocni amo omequene. ²² Cache necmate nuyejque que oc turavea noche tli tomotlajtlanis ca Deus, Deus metzmomaquelilus.

²³ Oquelfejque Jesús:

—Yulebes mocni ocsajpa.

²⁴ Marta otieyelfe:

—Naja necmate que yulebes cuöc innoctie yulebesque ipa inu sölültimo tunale.

²⁵ Oquelfejque Jesús:

—Naja neyulebelestle hua nenemelestle. Öque moneltoca ca naja, mös ye omec, nemes. ²⁶ Hua noche öque neme hua moneltoca ca naja, ayec meques. ¿Tomoneltoca de ini?

²⁷ Otieyelfe:

—Quiema, Tlöcatzintle. Naja noneltocateca que tejuatzi teCristo tetieConietzi Deus, que tehualmobicac ipa ini nönca tlöltecpectle.

Jesús onchucoac

²⁸ Hua cuöc ye oquejto inu, uya, hua oquenutzato icni María sa ichtecajtzi, hua oquelfe:

—Tomaestro oncö iloac hua metznutzalo.

²⁹ Yaja cuöc oquecac, omoquetztequis sa nima hua uya tietlac. ³⁰ (Pos ayemo hualiloaya Jesús ca pa puieblo, cache oc iloaya ca queyöhuac cöne Marta tienömequeto.)

³¹ Entunses inu joriojte tli oyejyeya ca María ipa chöntle, hua queyulöliöya, cuöc oquejtaque quiene omoquetztequis hua oquistie, quetocaque. Pos oquepensörojque que iya chucati ompa cöne mejcöcoyoctle. ³² Cache María, cuöc onasec cöne iloaya Jesús hua otieyeltac, omotlancuöquetz tieixtla, hua otieyelfe:

—Tlöcatzintle, tlö oncö tomobetztane amo omequene nocni.

³³ Yecuöquenu Jesús, cuöc oquejtaque chucataya ca tiehua joriojte tli huölöya ca yaja, ocualönoac ipa tieyulo hua netequepachuluc. ³⁴ Hua oquejtojque:

—¿Cöne nenquetlöllejque?

Otieyelfejque:

—Tlöcatzintle, xehualmobicac hua xomojtelique.

³⁵ Hua ochucoac Jesús. ³⁶ Yecuöquenu oquejtojque joriojte:

—Xomojtelicö quiene lalebes quetlasöjtlaloöya.

³⁷ Hua seque de yejua oquejtojque:

—Ini nönca öque oquetlachealtejque ixcocoxque, ¿quie abele quechihualusquiöya majcama meque ini nönca?

Lázaro onyule

³⁸ Hua Jesús lalebes neyulcoculuc ocsajpa, hua ohualiloac ipa mejcöcoyoctle. Ini nönca oyeya sente ustutl tli quepeaya sente tietetu ipa. ³⁹ Oquejtojque Jesús:

—Xequiejcuenicö tietetu.

Marta, icni de öque omec, otieyelfe:

—Tlöcatzintle, ye iyyöc, ipampa ye quepea nöbe tunale.

⁴⁰ Jesús oquelfejque:

—¿Amo ye otemetzelfe, que tlö tomoneltocas, tequejtas quiene lalebes bieye iloac Deus?

⁴¹ Yecuöquenu oquejcuenejque tietetu. Hua Jesús oajcopatlachealuc hua oquejtojque:

—NoTajtzi, temetzmotlasojcömateleale ipampa teniechmocaquite. ⁴² Naja necmate que seme teniechmocaquitea; cache ipampa nöncate giente tli niechyehualojtecate onequejto, para ma moneltocacö que tejuatzi teniechhualmotitlanele.

⁴³ Hua cuöc oquejtojque ini nönca, oquetzajtzelejque checöhuac:

—Lázaro, xequisa ca queyöhuac.

⁴⁴ Hua öque oyeya mejque, oquis, hualijilpetöya pa imöhua hua pa icxehua ica tatapajtle; hua ixöyac hualquemelejtoya ica sente tzotzomajtle. Oquemelfejque Jesús:

—Xectojtomacö hua xejcöhuacö ma beya.

Joriojte quenequeya tiemectisque Jesús

⁴⁵ Yecuöquenu meyactie joriojte tli ohuölajque ca María, hua oquejtaque inu söstantle tli quechijque Jesús, omoneltocaque tieca. ⁴⁶ Cache seque joriojte onyajque intlac fariseos, hua oquemelfejque de lo que tli Jesús oquechijque. ⁴⁷ Yecuöquenu jefes de teopexcötzetzi hua fariseos omosentlöllejque, hua oquejtojque:

—¿Tli tecchihuasque? Pos ini nönca tlöcatl meyac tietzöbeme quechihua. ⁴⁸ Tlö tejcöhuasque ejqueu, noche giente moneltocasque ca yaja. Entunses huölösque romanos, hua tiechejcuanelisque tonación hua ini löcor yectec.

⁴⁹ Hua Caifás, sente de yejua tlayecönque de teopexcötzetzi, oyeya tlajtocöteopexque ipa inu nieca xebetl. Yaja oquemelfe:

—Nemejua amo tli nenquemate ⁵⁰ nimpör amo nenquenenebelea. Pos cache nemiechconbenieroa que sente tlöcatl ma meque hua amo noche puieblo, para majcamo noche nönca giente ixniempolebe.

⁵¹ Cache ini nönca oquejto amo por ipörte yaja mismo; tlöcamo ipampa yaja oyeya tlajtojcoöteopexque ipa inu nieca xebetl, por inu otlayulepante quiene Jesús mecoasquea por intequepa inu giente. ⁵² Hua amo sa por impampa inu nieca giente de joriojte, tlöcamo nuyejque mecoasquea para quensietelisque tiepelhua Deus tli ca nobeyo cate pan tlöltecäctle. ⁵³ Ejqueu noso desde pa inu nieca tunale inu teopexcötzetzi hua fariseos quetiemoöya manera quiene tiemectisque.

⁵⁴ Hua ipampaju Jesús ayecmo biloatenemeya ixmantete intzölö joriojte. Cache oquixoac de ompa hua biloac pa sente tlöle ca itienco cöne nionöque chönte, ipa sente puieblo itucö Efraín. Hua ompa iloaya ca tiehua tiemachtejcohua.

⁵⁵ Pos inu pöscua de joriojte ye sierca oyeya. Hua meyactie otlejcoque de inu nieca tlöle ca inu ciudad de Jerusalén antes ases pöscua, para mochepöhuasque para que ejqueu cuale quecuösque de inu tlacuale de pöscua. ⁵⁶ Hua tietiemoöya Jesús, hua monunutzaya ipa teopantle bieye, quejejtöya:

—¿Tli nenquejtoa? ¿Beles amo huölös ipa ini nönca yelfetl?

⁵⁷ Hua jefes de teopexcötzetzi hua fariseos otlanahuatejque tlö canajyecä quemate cöne iloac ma quejto, pues quenejnequeya tieasesque.

12

María quemejmelo pajtle ajfeyoc de nardo ipa tieicxehua Jesús

¹ Entunses checuasie tunale antes de pöscua Jesús obiloac ipa inu puieblo de Betania, cöne oyeya Lázaro öque oqueyulebitejque de intzölö mimejque. ² Hua quechejchijque sente tlacuale. Hua Marta tlaxiexeloöya, hua Lázaro nuyejque yehuataya ca ocseque itlac miesa tietlac yejuatzi. ³ Yecuöquenu María ucö tlajco kilo pajtle ajfeyoc de nochaja nardo laebes pateyo. Hua tieajalöbele Jesús pa tieicxehua hua tiepojpubele tieicxehua ca itzo. Noche cuale oijnecuestejtaya de inu pajtle ajfeyoc. ⁴ Hua sente de tiemachtejcohua, Judas Iscariote öque tieantrecörus, ejqueyi oquejto:

⁵ —¿Tlica amo omonamacac ini nönca pajtle por tres cientos denarios tomi hua öque quentlööcolióne porubejte?

⁶ Pos ejqueu oquejto, amo ipampa quentlachiliöya tli porubejte, tlöcamo ipampa oyeya ichtejque hua oyeya tesoriero de inu machejque, hua quechtequeya de inu tomi tli quebicateenemeya. ⁷ Yecuöquenu Jesús oquejtojque:

—Xejcajcohua. Pues quechihua ini nönca para nieca tunale cuöc niechtlölpachusque.

⁸ Pues tli porubejte seme nenquenpeasque nemotzölö, cache naja amo nochepa nen-niechpeasque.

Quetiemoöya manera para quemectisque Lázaro

⁹ Entunses meyactie tlöca de joriojte quematque que yejuatzi ompa iloaya. Hua ohuölajque amo sampör tiepampa Jesús, tlöcamo nuyejque para quejtasque Lázaro, öque queyulebitejque de intzölö mimejque. ¹⁰ Hua jefes de teopexcötzetzi motlölejque de acuerdo para nuyejque quemectisque Lázaro. ¹¹ Pues meyactie de joriojte oyöya hua moneltocaya tieca Jesús ipampa yaja.

Jesús ocalacoac pa Jerusalén ipa sente purojconetzi

¹² Pa mustlateca, meyac tlöca tli ohuölajque ipa yelfetl oquecajque que Jesús hualiloöya ca Jerusalén. ¹³ Entunses ocönque imömöyo suyötl, hua tienömequeto, hua tzajtzajtzetöya:

—¡Osana! Tonochtie ma tetieyectieniehuacö öque biloatz tietucöyupantzincö Tlöcatzintle, yejuatzi öque iloac Rey de Israel.

¹⁴ Hua oqueniextejque Jesús sente purojconetzi, hua ipa otlejcoac. Omochi quiene tlajcuelulpanca:

¹⁵ Amo xomomajticö, giente de Sión noso Jerusalén.

Xequejtacö nemoRey biloatz.

Yehualutebitz ipa sente purojconetzi, iconie purolama.

¹⁶ Ini nönca sösantle amo casojcömatque tiemachtejcohua ca opie; cache cuöc Jesús ye oqueselejque tietlaniexteles, entunses oquelnömejque quiene tlajcuelulpa oyeya de yejuatzi, hua quiene yejua oquechijque ini nönca sösantle para yejuatzi. ¹⁷ Hua meyactie tlöca ompa oyejyeya tli oquejtaque cuöc quenutzque Lázaro de ijtec mejcöcoyocle hua queyulebitejque de intzölö mimejque. Yejua quepoaya de inu sösantle. ¹⁸ Por inu nuyejque ohuölajque meyac giente tienömequeco, ipampa oquecajque que yejuatzi oquechijque ini nönca tietzöbetl. ¹⁹ Cache fariseos omolfejque sente ca ocsente:

—Xequejtacö quiene amo tetlaxexicoa. Xequejtacö. Pos noche tlöltecpactlöca quetoca.

Seque griegos quenequeya tiejtasque Jesús

²⁰ Hua oyeya seque griegos tli quepeaya costumbre tlejcusque ipa Jerusalén para tieteochihuasque Deus ipa yelfetl. ²¹ Hua ini nöncate omopachojque itlac Felipe, öque oyeya de Betsaida de estado de Galilea. Oquetlajtlanejque hua oquelfejque:

—Señor, tecneque tetieyektasque Jesús.

²² Ohuöla Felipe hua oquelfico Andrés. Yecuöquenu Andrés ohuöla ca tiehua Felipe hua yejua tieyelfejque Jesús. ²³ Yecuöquenu Jesús oquennönquelejque, oquemelfejque:

—Ye asec ura cuöc naja tli onochi netlöcatl necselis chamöhualestle. ²⁴ Melöhuac, melöhuac nemiechelfea: Tlö sente trigo amo quechayöhua ipan tlöle para meques hua motucas, pos mocöhua isiel. Cache tlö meque, lalebes mochihua. ²⁵ Öque quetlasojtla inemeles, quepolus. Hua öque quetlajyelejta inemeles ipa ini nönca tlöltecpactle, amo quepolus, tlöcamo quepeas nemelestle nochepa. ²⁶ Tlö yeca niechtequepanoa, ma niechtoca. Hua cöne naja neyes, nuyejque ompa iyec notlatequepano. Tlö canajyeca niechtequepanoa, noTajtzi quechamöhuasque.

Tiejcoquesque Jesús öque nechihualuc tlöcatl

²⁷ 'Öxö notequepachoa ipa noyulo. ¿Hua tli nequejtus? Beles nequejtus: “NoTajtzi, xeniechmocaltechelfe de ipa ini nönca ura”. Pero abele nequejtus inu, pues para inu onehuöla pa ini nönca ura. Cache cuale ma nequejto: ²⁸ “NoTajtzi, xomochamöbele motucöyutzi”.

Yecuöquenu ohuöla sente tlajtule de elfecac tli oquejto:

—Ye onecchamö hua ocsajpa necchamöhuas.

²⁹ Hua tlöca tli ompa oyejyeya hua tli oquecajque, quejtoöya que otlatlatzcuopo. Ocseque quejtoöya:

—Öngel tienunutza.

³⁰ Onöhuatihuac Jesús, hua oquejtojque:

—Amo ohuöla ini nönca tlajtule nopampa, tlöcamo nemopampa nemejua. ³¹ Öxö Deus quecuntenörusque ini nönca tlöltecpactle. Öxö tlajtoöne de ini nönca tlöltecpactle Deus quetojtocasque. ³² Hua naja, cuöc niechajcoquesque de ipa ini nönca tlöltecpactle, noche giente nequenhualecas para ma yecö ca naja.

³³ Hua ini nönca quejtuloöya para ma casojcömatecö de tli mequelestle mecoas.

³⁴ Entunses tienönquelejque tlöca:

—Pos tejua otejcajque que inu ley quejtoa que Cristo öque Deus quixpejpenque mocöhuas nochepa. ¿Quiene noso tequejtoa taja nele ijteca que öque omochi tlöcatl cajcoquesque para ma meque? ¿Öquenu ini nönca öque omochi tlöcatl?

³⁵ Yecuöquenu Jesús oquemelfejque:

—Sa oc tepetzi iyec tlöbile nemotzölö. Xenejnemecö mientras oc nenquepea tlöbile, para majcamo nemiechnöhualase tlajtlayohuaquelestle. Pues öque yajteneme ipan tlajtlayohuaquelestle amo quemate cöne iya. ³⁶ Mientras nenquepea tlöbile, xomoneltocacö ica tlöbile, para nemochihuasque nentiepeljua de yejuatzí öque iloac tlöbile.

Joriojte amo monejneltocaque

Ini nönca söstantle oquejtojque Jesús, hua obiloac, hua nejoyönaluto de yejua. ³⁷ Mösqe quechijque meyac tietzobeme imixtla yejua amo moneltocaya tieca. ³⁸ Ini nönca omochi para ma mocumpliuro inu tlajtule tli oquejto inu tlayulepante Isaías:

Tlöcatzintle, nionöque amo moneltocac de totlajtul,
hua nionöque amo oquejtac tiechecöhualas Tlöcatzintle.

³⁹ Por inu abele omoneltocaque. Pos ocsajpa oquejto Isaías:

⁴⁰ Quixcocoxcötelejque imixtelolajua de yejua,

hua quenyultepitzojque

para majcamo tlacheacö ca imixtelolajua

hua majcamo casojcömatecö ca inyulo

para amo moyulcuespasque hua naja amo nequenpajtis.

⁴¹ Ini nönca söstantle oquejto Isaías ipampa oquejtac quiene lalebes bieye iloac Cristo hua otlajtlajto de yejuatzí. ⁴² Hua meyactie hasta de tlötlayecönque omoneltocaque ca yejuatzí, cache ipampa quenmabeliöya fariseos amo ixmantete quejtoöya, para majcamo quentojtocacö para ayecmo calaquesque ipa teopanme. ⁴³ Pues cache quenequeya inu chamöhualastle tli yebitz de tlöca hua amo inu chamöhualastle tli yebitz de Deus.

Tietlajtultzi Jesús quenjuscöorus giente ipa solúltimo tunale

⁴⁴ Pero Jesús otzajtzihuac hua oquejtojque:

—Öque moneltoca ca naja, amo moneltoca sa ca naja, tlöcamo ca öque niechhualtitlanque. ⁴⁵ Hua öque niechejta naja tieyejta öque niechhualtitlanque. ⁴⁶ Naja onehuöla quieme netlöbile pa ini nönca tlöltecpactle para que noche öque noca moneltoca, majcamo mocöhua pa tlajtlayohuaquelestle. ⁴⁷ Hua öque quecaques notlajtul hua amo quechihua cöso, naja amo necjuscöroa, ipampa amo nehuöla nequenjuscöruco tlöltecpactlöca, cache nequenmöquextico tlöltecpactlöca. ⁴⁸ Öque niechtlajjelejta, hua amo quesele notlajtul, onca tli quejuscöroa. Tlajtule tli naja nequejtoa, yaja inu quejuscörus ipa inu solúltimo tunale. ⁴⁹ Pues naja amo netlajtlajto sa por nopörte naja, cache noTajtzí öque niechhualtitlanque, yejuatzí niechmandörojque de tli netlanunutzas hua de tli nequejtus. ⁵⁰ Hua necmate que lo que tli yejuatzí tlamandöruro quetiema nemelestle nochepa. Por inu, cuöc naja netlajtlajto es que nequejtoa san quiene ca noTajtzí niechelfejque.

13

Jesús quemecxepajpöjque tiemachtejcohua

¹ Öyeya antes de cuöc mochihuas inu yelfetl de pöscua. Ye quematihuaya Jesús que tieura ye oaseco para biloas de ipa ini nönca tlöltecpactle para ca tiecatzinco tieTajtzí. Quentlasojtlaöya inu giente tli tiehuöxcahua tli oyejyeya pan tlöltecpactle. Hua ejqueu quentlasojtlaque tönto lalebes que oquenejque mecoaco por yejua. ² Hua ye asec ura para tlacuösque, hua Diöblo ye oquetlöle ipa iyulo Judas, iconie Semu Iscariote, para ma tieantrecöro. ³ Hua Jesús quematihataya que tieTajtzí tiemöctelejque noche söstantle, hua que hualquixoac de Deus, hua ye miero biloas tieca Deus. ⁴ Ca inu, onequetzaluc

de cöne tlacualoöya hua oquequextejque tietlaquie. Hua ocönque sente babiero, hua netlajcoilpiluc. ⁵ Yecuöquenu oquetiecaque ötzintle ijtec ajpöstle, hua quepiehualtejqque quemecxepajpöcaloöya hua quenhuötzque inmecxehua ca inu babiero tli ica netlajcoilpiluc. ⁶ Entunses ohualbiloac itlac Semu Piero. Hua yaja otieyelfe:

—Tlöcatzintle, ¿tejuatzi teniechmoyecxepajpöquelis?

⁷ Onöhuatihuac Jesús hua oquelfejque:

—Tli naja necchihua, taja amo tecmate öxö; cache tecasojcömates sötiepa.

⁸ Otieyelfe Piero:

—Amo quiema teniechmoyecxepajpöquelis.

Onöhuatihuac Jesús:

—Tlö amo temetzexepajpöcas, amo tecpeas pörte ca naja.

⁹ Otieyelfe Semu Piero:

—Tlöcatzintle, majcama sa nocxehua, tlocamo nuyejque nomöhua hua notzonteco.

¹⁰ Oquelfejque Jesús:

—Öque ye omajölte, ayecmo quenesesitöroa mopajpöcas, tlöcamo ma sa quepajpöca icxehua, hua ye noche chepöhuac ica. Hua nemejua ye nenchepöjqque nencate, mös amo nemonochtie.

¹¹ Pues yejuatzi quematihuaya öque tieantrecörusquea, hua por inu oquejtojque: “Amo nenchepöjqque nemonochtie”.

¹² Ejqueu, sötiepa de cuöc oquemecxepajpöjqque, oneöquiluc tietlaquie hua ocsajpa netlöliluc itlac miesa, hua oquemelfejque:

—¿Nenquemate tlininu nemiechonchibele? ¹³ Nemejua nenniechcuitea Maestro hua Tlöcatzintle. Hua cuale tli nenquejtoa, ipampa tiel melöhuac ejqueu necaca. ¹⁴ Entunses tlö naja nenemoTlöcatzintle hua nenemoMaestro necaca hua nemiechecxepajpöc, conbenierebe que nemejua nuyejque ma xomoyecxepajpocacö sie tlöcatl ca ocsie tlöcatl. ¹⁵ Ipampa ini nönca nemiechejtetejtiehua ejiemplo, para que quiename naja onecchi ca nemejua, nemejua nuyejque ejqueu xecchihuacö. ¹⁶ Melöhuac, melöhuac nemiechelfea: Sente esclavo amo cache bieye ica que itieco, nimpör sente tlatitlantle amo cache bieye que öque cualtitla. ¹⁷ Tlö nenquemate ini nönca sösantle, cuale nenyisque tlö nenquechijasque. ¹⁸ Amo nequejtoa ini de nemonochtie; naja necmate oquemeju nequemixpejpe. Cache ini nönca pasorebes para ma mochihua tli tlajcuelulpanca: “Oque quecua de nopöntzi, yaja ye omocuec cuntra de naja”. ¹⁹ Desde öxö nequejtoa antes de cuöc mochihuas, para que cuöc mochihuas, nemoneltocasque que *naja neca. ²⁰ Melöhuac, melöhuac nemiechelfea: Öque queselis öque naja nectitlanes, naja niechselea, hua öque naja niechselea, tieselea öque niechhualtitlanque.

Jesús oquejtojque que yeca tieantrecörus

²¹ Cuöc Jesús ye oquejtojque ini nönca, onetequepachuluc ipa tieyulo, hua oquejtojque ixmantete:

—Melöhuac, melöhuac nemiechelfea, sente de nemejua niechantrecörus.

²² Yecuöquenu tiemachtejcöhua sa mojojtaya entre yejua, pues öquenu de yejua iyes. ²³ Hua sente de inu tiemachtejcöhua, öque Jesús quetlasojtlaloöya, obetztaya ipa tiepiecho Jesús. ²⁴ Hua Semu Piero oquenutz ini nönca hua oquelfe ma tlajtlane öquenu noso iyes de öque yejuatzi tlajtlajtulo. ²⁵ Por inu yaja omonacascatiecac ipa tiepiecho Jesús, hua otieyelfe:

—NoTlöcatzintle, ¿öquenuju?

²⁶ Entunses onöhuatihuac Jesús:

—Yaja inu nieca öque naja necmacas pöntzi tli necpolactis.

* **13:19** Xomojtelicö 8.58.

Yecuöquenu quepolactejque pöntzi hua oquemacaque Judas, iconie Semu Iscariote.
²⁷ Hua sötiepa de inu sencamatl, Satanás ocalac ipa iyulo. Yecuöquenu Jesús oquelfejque:
 —Tli taja tecchihuas, pues isejco xecchijtebetze.

²⁸ Cache nionöque de tli oyejyeya ipa miesa amo casojcomatque tli ipampa quejtojque ini nönca. ²⁹ Pues seque quepensöroöya que beles oquejtojque ipampa Judás oyeya tesoriero, hua beles yaja ica Jesús quelfiloöya: “Xejcoate tli tiechpoloa para yelfetl”, noso beles ma quenmaca yetla öque porubejte. ³⁰ Hua cuöc yaja oquecua inu sencamatl, sa nima oquistie. Ye oyeya ca yohuale cuöquenuju.

Sente mandamiento yancuec

³¹ Yecuöquenu cuöc yaja oquistie, oquejtojque Jesús:

—Öxö ye necselis chamöhualestle naja tli onochi netlöcatl, hua Deus nuyejque quepeasque chamöhualestle por naja. ³² Pos tlö Deus quepeasque chamöhualestle por naja, entunes yejuatzí mismo nuyejque niechmacasque chamöhualestle, hua sa nima niechmacasque. ³³ Nopeljua, sa oc tepetzi nemotlac neyes. Nenniechtiemusque. Pero quieme ye onequemelfe joriojte, öxö ejqueu nemiechelfea nemejua, que cöne naja neya, nemejua abele nenyösque. ³⁴ Sente yancuec mandamiento naja nemiechmaca, que yaja ini nönca: Xomotlajtlojtlacö entre nemejua. Quiene naja nemiechtlajtlacö, nuyejque nemejua xomotlajtlacö. ³⁵ Ejqueu noche giente nemiechixomatesque que nemejua nencate nennomachtejcohua, tlö nemotlajtlajtlacö que sente ca ocsente.

Jesús oquejtojque que Piero quejtus que amo tieixomate

³⁶ Otiyelfe Semu Piero:

—Tlöcatzintle, ¿cöne tomobicas?

Onöhuatihuac Jesús:

—Cöne naja neya, abele teniechtocas öxö, cache sötiepa teniechtocas.

³⁷ Otiyelfe Piero:

—Tlöcatzintle, ¿tlica abele temetzmotoquelis öxö? Nonemeles nectiemacas mopampantzinco.

³⁸ Oquenönquelejque Jesús:

—¿Monemeles tectiemacas nopampa? Melöhuac, melöhuac temetzelfea, que ye yexpa tequejtus que amo teniechixomate antes de que tzatzes canteliex.

14

Jesús iloac ojtle para öque iyös ca tieTajtzi

¹ Ma ayecmo xomoyultequepachucö. Xecsequirojtacö xomoneltocacö ca Deus; xecsequirojtacö xomoneltocacö nuyejque ca naja. ² Ipa tiechö noTajtzi meyactie calme oncate, hua tlö cana amo ejqueu oyene ye nemiechantesipöroöne. Pues neya necyejyectlöli locör para nemejua. ³ Hua tlö neya hua necyejyectlöli locör para nemejua, nehuölös ocsajpa, hua naja nemiechönaqui, para que cöne naja neyes, nemejua nuyejque ompa nenyésque. ⁴ Hua cöne naja neyös nemejua nenquemate ojtle.

⁵ Otiyelfe Tumös:

—Tlöcatzintle, amo tecmate cöne tomobica, ¿quiene noso tecmatesque ojtle?

⁶ Oquelfejque Jesús:

—Naja neojtle hua nemelöhuac hua nenemelestle. Abele öque huölös tietlac noTajtzi, tlöcamo por naja. ⁷ Tlö ye nenniechixomate naja, nuyejque nentieixomatesque noTajtzi. Pos desde öxö ye nentieixomatejtecate, hua ye onentiejtaque.

⁸ Otiyelfe Felipe:

—Tlöcatzintle, xetiechmojtetele moTajtzi hua sa ca inu basta para tejua.

⁹ Jesús oquelfejque:

—Ye onebejcö lalebes ca nemejua, hua ¿beles ayemo teniechixomate, Felipe? Öque ye niechejtac naja, nuyejque ye otieyejtac noTajtzi. ¿Quiene noso teniechelfea taja: “¿Xetiechmojtetele moTajtzi?”¹⁰ ¿Beles amo tomoneltoca cuöc nequejtoa que naja necaca tieca noTajtzi, hua noTajtzi iloac ca naja? Inu tlajtulme tli nemiechnunutzta naja, amo nemiechnunutzta por nopörte de naja; cache noTajtzi öque seme iloac ca naja, yejuatzi quechihualo tielachihual.¹¹ Xeniechneltocacö que naja necaca tieca noTajtzi hua noTajtzi iloac ca naja. Cache tlö amo nemoneltocasque sampor naja nequejtoa, xomoneltocacö ipampa inu mismo tlachihuale tli necchihua.

¹² Melöhuac, melöhuac nemiechelfea, que inu tlachihuale tli naja necchihua nuyejque quechihuas öque noca moneltoca. Hua cache bieye tlachihuale quechihuas que ini, ipampa naja neyös ca noTajtzi.¹³ Hua noche sösantle tli nentlajtlanesque notucöyupa, inu necchihuas, para ejqueu noTajtzi queselisque chamöhuallestle por medio de naja tli netieConietzi neca.¹⁴ Tlö yetla nenniechtajtlanesque notucöyupa naja mismo necchihuas.

Hualiloas Espíritu de Deus

¹⁵ Tlö nenniechtlasojtla, nenquechihuasque lo que tli nemiechmandöroa.¹⁶ Hua naja netietlölajtis noTajtzi hua nemiechmacasque ocsente Tlapaliebiöne, para ma iloa ca nemejua nochepa,¹⁷ yejuatzi Espíritu tli melöhuac. Hua tlöltecactlöca abele tieselea, ipampa amo tieyejta, nimpör amo tieixomate. Cache nemejua nentieixomate, ipampa biloateneme nemoca hua ipa nemoyulo *iloac.

¹⁸ Amo nemiehcöhuas nenicnutzetzi; nehuölös ca nemejua.¹⁹ Sa oc tepetzi, hua tlöltecactlöca ayecmo niechejtasque; cache nemejua nenniechejtasque. Porque naja neneme, por inu nemejua nuyejque nennemesque.²⁰ Ipa inu nieca tunale nemejua nenquematesque que naja neca tieca noTajtzi, hua nemejua nencate ca naja, hua naja ca nemejua.²¹ Öque quepea nomandamiento, hua quechihua, yaja inu tlöcatl niechtlasojtla. Hua öque niechtlasojtla, quetlasojtlasque noTajtzi, hua naja nectlasojtlas hua noniextis ca yaja.

²² Otieyelfe Judas, amo yaja Iscariote:

—Tlöcatzintle, ¿tlica tomoniextejtzinus ca tejua, hua amo ca tlöltecactlöca?

²³ Onöhuatihuac Jesús, hua oquelfejque:

—Tlö canajyeca niechtlasojtla, entunses quechihuas tli naja nequejtoa. Hua noTajtzi quetlasojtlasque, hua tehuölösque ica yaja, hua tochöntisque ica yaja.²⁴ Öque amo niechtlasojtla, amo quechihua cöso de notlajtul. Ini tlajtule tli nenquecajque amo nohuöxca, pues tiehuöxca noTajtzi öque niechhualtitlanque.

²⁵ Ini nönca sösantle ye onemiechnunutz mientras oc turavea neca nemotlac.²⁶ Cache Tlapaliebiöne, yejuatzi Espíritu Sönto öque noTajtzi tiehualtitlanesque notucöyupa, yejuatzi nemiechmachtisque noche sösantle. Hua nemiechtalalnömectisque noche sösantle tli naja ye onemiechelfe.²⁷ Yulsiebestle nemiehcöbelejtiehua. Naja mismo nemiechyulsiebea. Amo nemiechyulsiebea naja san quiene ca tlayulsiebea tlöltecactlöca. Majcama xomoyultequepachucö nimpör majcama xomomajticö.²⁸ Ye onenquecajque que naja mismo ye onemiechelfe: “Neya ocsie löro, hua nehuölös ocsajpa ca nemejua”. Tlö nenniechtlasojtlane de melöhuac, nenquepeasquiöne pöquelestle de que naja neya tieca noTajtzi. Pues noTajtzi cache bieye iloac que naja.²⁹ Öxö noso ye onemiechelfe antes de cuöc mochihuas, para que cuöc mochihuati nemoneltocasque.³⁰ Ayecmo meyac tiempo netlajtlajtus ca nemejua, ipampa ompabitz tlajtoöne de nönca tlöltecactle. Hua yaja amo tli quepea ca naja.³¹ Cache pasörebes ini nönca para ma quemajtacö tlöltecactlöca que netietlasojtla noTajtzi hua que san quiene ca noTajtzi niechhualtitlanque ma necchihua, ejqueu necchijtebitz. Xomoquetzacö. Teyabe de necö.

* **14:17** Meyactie manuscritos quejtoa: “iloas”.

15

Jesús iloac uvastemecatli tli melöhuac

¹ 'Naja necaca neuvastemecatli tli melöhuac, hua noTajtzi queixutilo. ² Cöra sente nomömöyo tli notech ica hua amo tlamochihualtea, quecaltechusque. Hua cöra sente tli tlamochihualtea, quetejtequelisque imömöyocuconehua para ma tlamochihualte cache. ³ Nemejua ye nenchepecteque nencate por inu tlajtule tli naja ye onemiechnunutz. ⁴ Xeyetacö notech naja hua naja neyes ca nemejua. San quiene ca sente mömöyutl abele tlamochihualtis sie yaja, tlö amo iyech itech temecatli, ejqueu nuyejque nemejua abele tli nequechihuasque tlö amo nenyetasque notech naja. ⁵ Naja netemecatli, nemejua nennomömöyo. Öque yetas notech naja hua naja ca yaja, yaja ini tlamochihualtis lalebes. Pues sin naja abele tli nenquechihuasque. ⁶ Tlö canajyeca amo yetas notech naja Deus quetlajcalesque ca queyöhuac quiename sente amo cuale mömöyutl, hua huöques. Hua quenpejpenasque inu mömöyume amo cualteque hua quentlajcalesque ijtec tletzintle, hua xutlasque. ⁷ Tlö nenyetasque notech hua notlajtul yetas ca nemejua, xetlajtlanecö noche tli nenquenequesque, hua ejqueu mochihuas ca nemejua. ⁸ Cuöc nemejua nenqueneltoca notlajtul hua ixmantete niese que nencate nennomachtejcohua, entunses quepealo chamöhuallestle noTajtzi. ⁹ San quiene ca noTajtzi niechtlasojtlalo, nuyejque naja ejqueu nemiechtlasojtlac. Xeyetacö ipa notlasöjteles. ¹⁰ Tlö nenquechihuasque tli nemiechmandöroa, nenyetasque ipa notlasöjteles. Pos ejqueu naja nuyejque necchihua tli niechmandörojque de noTajtzi hua neyete ca ipa tietlasöjteles. ¹¹ Yaja ini nönca söstantle ye onemiechelfe, para que nopajpöqueles ma iye ca nemejua, hua nemopajpöqueles ma momeyaquele.

¹² 'Yaja ini tli nemiechmandöroa: Xomotlajtlasojtlacö quieme naja nemiechtlasojtla. ¹³ Abele öque quepeas cache bieye tlasojtelestle de que öque quetiemas inemeles por impampa iamigos. ¹⁴ Nemejua nencate nennoamigos, tlö nenquechihua noche söstantle tli naja nemiechmandöroa. ¹⁵ Ayecmo nemiechcuitis nennoesclavos, ipampa sente esclavo amo quemate tli quechihua itieco. Cache nemiechcuitea nennoamigos, ipampa noche söstantle tli onejca de noTajtzi, ye onemiechmache. ¹⁶ Nemejua amo neniechixpejpenque naja, tlöcamo naja nemiechixpejpe nemejua; hua onemiechtlöle para nenquechihuasque tli nemiechelfe. Hua nemotlachihuales mocöhuas nochepa. Ejqueu noche lo que tli nentietlajtlanelisque noTajtzi notucöyupa, yejuatzi nemiechmacasque. ¹⁷ Yaja ini nemiechmandöroa: Xomotlajtlasojtlacö.

Tlöltecpactlöca nemiechtlayejejtisque

¹⁸ 'Tlö tlöltecpactlöca nemiechtlayejejta, xecmajtacö que niechtlayejejtaque naja cacho de nemejua. ¹⁹ Tlö nenyene de tlöltecpactlöca, tlöltecpactlöca nemiechtlasojtlasquiöne porque quentlasojtla tli de yejua cate. Cache ipampa amo nencate de tlöltecpactlöca, tlöcamo naja nemiechixpejpe de intzölö tlöltecpactlöca, ipampaju tlöltecpactlöca nemiechtlayejejta. ²⁰ Xequelnömequecö ini tlajtule tli onemiechelfe. Sente esclavo amo ica cache bieye que itieco. Tlö naja niechtepotztocaque nuyejque nemejua nemiechtepotztocasque. Tlö amo oquechijque tlöltecpactlöca lo que tli onequejto naja, nuyejque amo quechihuasque tli nenquejtisque nemejua. ²¹ Cache noche ini nönca söstantle nemiechchibelisque ipampa nenquebica notucöyu, pues amo tieixomate öque niechhualtitlanque. ²² Tlö amo nehuölöne, nimpör amo nequennunutzane, amo quepeasquiöne tlajtlacule, cache öxö amo quepea tli ipampa quejtisque que amo tlajtlaculteque. ²³ Öque niechtlayejejta, nuyejque tietlayejejta noTajtzi. ²⁴ Tlö intzölö yejua amo necchihuane tlachihuale tli ocseque amo oquechijque, amo quepeasquiöne tlajtlacule. Cache öxö ye otiechejtaque hua otiechtlayejejtaque naja ca tiehua noTajtzi. ²⁵ Ini nönca pasöre para ma mochihua inu tlajtule tli tlajcuelulpanca pa inu libro de ley tli yejua quetoca: "Sin arasu niechtlayejejtaque".

²⁶ 'Cache hualiloas Tlapaliebiöne, yejuatzi Espíritu tli melöhuac, hua yejuatzi biloatz de noTajtzi. Naja netiehualtitlanes ca nemejua de ompa tietlac noTajtzi. Hua cuöc hualiloas tlatestificörurus de naja. ²⁷ Hua nemejua nuyejque xetlatestificörucö, ipampa notlac neyeyeya desde ca opie.

16

¹ 'Ini nönca sösantle ye onemiechelfe para majcamo xejcöhuacö nemoneltoqueles. ² Giente nemiechtojtocasque de ipan teopame. Hasta yebitz ura que noche quiejquech nemiechmectisque quepensörusque que ca inu tietequapanojtecate Deus. ³ Hua ini nönca sösantle quechihuasque ipampa amo tieixomatque noTajtzi nimpör naja amo niechixomatque. ⁴ Cache ini nönca sösantle ye onemiechelfe para que cuöc nieca ura huölös, nenquelnömequesque de lo que tli naja onemiechelfe.

Tli quechihuasque yejuatzi Espíritu

'Cache ini nönca sösantle amo onemiechelfe ca opie, ipampa naja neyeya ca nemejua. ⁵ Cache öxö neya tieca öque niechhualtitlanque. Hua nionöque de nemejua niechtlajtlanea: "¿Cöne tomobica?" ⁶ Cache ipampa onemiechelfe ini nönca sösantle, tequepachule ocalac ipa nemoyulo. ⁷ Pero naja nemiechpubelis tli melöhuac, que cache cuale iyeyes para nemejua por que naja neyös. Ipampa tlö naja amo neyös Tlapaliebiöne amo hualiloas nemoca. Cache tlö neyös, netiehualtitlanes ca nemejua. ⁸ Hua cuöc ye ohualiloac quenchiuualtisque ma moyulnunuzacö tlöltecpactlöca de intlajtlacul, hua de yectelestle hua de inu condenación. ⁹ Moyulnunuzasque de tlajtlacule ipampa amo monejneltoca ca naja. ¹⁰ Hua moyulnunuzasque de yectelestle, ipampa neya tieca noTajtzi, hua ayecmo nenniechejtasque. ¹¹ Hua moyulnunuzasque de condenación ipampa Deus ye öquecuntenörojque tlajtoöne de ini nönca tlöltecpactle.

¹² 'Oc necpea meyac sösantle tli nemiechpubelis, cache ayebele nenquexicusque öxö. ¹³ Cache cuöc ye ohualiloac Espíritu tli melöhuac, yejuatzi nemiechyecönasque ipa noche tli melöhuac. Pues amo tlajtlajtulus por tiepörte de yejuatzi mismo, tlöcamo noche tli quecaquesque yaja inu quejtusque. Hua nemiechmächstisque de meyac sösantle tli sötiepa mochihuas. ¹⁴ Hua yejuatzi niechchamöhuasque naja porque nemiechmächstisque meyac sösantle de naja. ¹⁵ Noche inu sösantle tli de noTajtzi nuyejque de naja ica. Por inu onequejto que nemiechmächstisque sösantle de naja.

Tequepachule mocuepas pöquelestle

¹⁶ 'Sa oc tepetzi hua ayecmo nenniechejtasque; hua oc tepetzi hua ye ocsajpa nenniechejtasque.

¹⁷ Yecuöquenu omolfejqe seque de tiemachtejcohua:

—¿Tlininiji tli tiechelfilo: "Sa oc tepetzi hua amo nenniechejtasque; hua ocsajpa sa oc tepetzi hua nenniechejtasque", hua: "Naja neyös tieca noTajtzi"?

¹⁸ Pos oquejtojque:

—¿Tlininiji quejtulo: "Sa oc tepetzi"? Amo tecasojcömate tli quejtulo.

¹⁹ Hua ocaojcömatque Jesús que quenequeya tietlajtlanesque, hua oquemelfejque:

—¿Nentlajtlane nemotzölö de ini nönca tli onequejto: "Sa oc tepetzi hua amo nenniechejtasque, ocsajpa oc tepetzi hua nenniechejtasque"? ²⁰ Melöhuac, melöhuac nemiechelfea: Nemejua nenchucasque hua nemotlöocoltisque, hua tlöltecpactlöca pajpöquesque. Nemejua nenquepeasque tequepachule, cache nemotequepachul mocuepas pöquelestle. ²¹ Sente sohuatl cuöc mixebe, quecocoa icuierpo, ipampa oasico iura. Cache sötiepa de cuöc ye oquetlocatilte peltzintle ayecmo quelnömeque tietunie, tlöcamo quepea pöquelestle ipampa otlöcat sente peltzintle ipan tlöltecpactle. ²² Pos nuyejque nemejua öxö nenquepea tequepachule. Cache ocsajpa nenniechejtas, hua nemoyulo pajpöques, hua amo öque nemiechcujcuelis nemopajpöqueles. ²³ Hua ipa inu

nieca tunale amo nenniechtlajtlanisque niontle. Melöhuac, melöhuac, nemiechelfea: NoTajtzi nemiechmacasque noche tli nentietlajtlanelisque notucöyupa. ²⁴ Hasta öxö amo tli nentlajtlantecate notucöyupa. Xetlajtlancö noso, hua nenquepeasque para que nemopajpöqueles ma momeyaquele.

Ye onecxexico tlöltecpactle

²⁵ 'Ini nönca sösantle onemiechnunutz ca tlajtule tli amo nencasojcömate. Yebitz ura cuöc ayecmo nemiechnunutzas ca tlajtule tli amo nencasojcömate, cache ixmantete nemiechmachesis de noTajtzi. ²⁶ Ipa inu nieca tunale nentlajtlanesque notucöyupa. Hua amo nemiechelfea que netietlölajtis noTajtzi nemopampa. ²⁷ Pues sie yejuatzi noTajtzi nemiechtlasojtlalo, porque nemejua nenniechtlasojtlaque, hua nemoneltocaque que naja onehuölie de Deus. ²⁸ Onehuölie de tietlac noTajtzi hua onaseco ipa nönca tlöltecpactle. Öxö ye nejcöjtiehuas nönca tlöltecpactle hua ocsajpa neyös tieca noTajtzi.

²⁹ Oquejtojqe tiemachtejcöhua:

—Xomojtele, öxö tetiechmonunuchelea ixmantete, hua amo ca tlajtule tli amo teca-sojcoömate. ³⁰ Öxö tecmate que tejuatzi tomomachitea noche sösantle, hua amo tomone-sesitörfea ma canajyeca metzmotlajtlanele pues ye tomomachitea tlin inu queneque tlajtlanes. Por inu toneltoca que tejuatzi melöhuac tehualmoquextejtie de Deus.

³¹ Oquennönquelejque Jesús:

—¿Öxö nemoneltoca? ³² Xequejtacö, que yebitz ura, hua ye oasisico, cuöc nemiechnen-cuaxelusque, cara sente ipa iöjfe, hua nenniehcöjtiehuasque nosiel. Cache amo nosiel neca, porque noTajtzi notlac iloac. ³³ Ini nönca sösantle ye onemiechelfe para noca nenquepeasque yulsiebestle. Ipan tlöltecpactle nenquepeasque tequempachule, cache xecpeacö confiönsa, porque naja ye onecxexico tlöltecpactle hua itlachihual.

17

Jesús netlajtlölajtiluc ca tieTajtzi

¹ Ini nönca sösantle oquejtojqe Jesús. Hua ajcopatlachealuc ca elfecac hua oquejtojqe:

—NoTajtzi, ye oaseco ura. Xeniechmomaquele chamöhuallestle naja tli neca nemo-Conietzi, para nuyejque ejqueu naja temetzmochamöbelis tejuatzi. ² Pos ye teniechmomaquele noche checöhuallestle para ca noche giente para que innochtie quiejquech teniechmomaquele ma nequenmaca nemelestle nochepa. ³ Hua nemelestle nochepa ica que ma metzmixomachelicö que sa tejuatzi teDeus tomobetzteca de melöhuac hua ma niechixomatecö naja neJesucristo öque tejuatzi oteniechhualmotitlane. ⁴ Naja ye temetzmamacac chamöhuallestle ipa tlöltecpactle. Ye oneclame motequeyojtzi tli teniechmomaquele ma necchihua. ⁵ Öxö noso, noTajtzi, xeniechmomaquele chamöhuallestle tejuatzi mismo, inu nieca chamöhuallestle tli necpeaya motlactzinco cachtö de cuöc oyeya tlöltecpactle.

⁶ 'Inu niecate tlöca tli teniechmomaquele de intzölö tlöltecpactlöca ye onequemelfe ixmantete de quiene tomobetzteca tejuatzi. Mohuöxcatzetzihua oyejyeya, hua teniechenmomaquele, hua yejua oqueneltocaque motlajtultzi. ⁷ Öxö quemajtecate que noche sösantle tli teniechmomaquele yebitz de tejuatzi. ⁸ Pues inu tlajtule tli teniechmomaquele, onequenmacac. Hua yejua oqueselejque, hua oquematque que de melöhuac onehuölquis de tejuatzi. Hua omoneltocaque que tejuatzi teniechhualmotitlane. ⁹ Naja notlajtlölajtea por yejua. Amo notlajtlölajtea por tlöltecpactlöca, tlöcamo por niecate tli teniechenmomaquele, ipampa mohuöxcatzetzihua cate. ¹⁰ Hua noche sösantle tli nohuöxca, mohuöxcatzi, hua tli mohuöxcatzi, nohuöxca. Hua naja necpea chamöhuallestle por medio de yejua. ¹¹ Hua ayecmo neyes ipan tlöltecpactle, cache ini nöncate mocöhuasque ipan tlöltecpactle hua naja neya mocatzinco. NoTajtzi yectec, xequenmomalfele para

ma quesequirucö ca tejuatzi, quiename teniechmojtetele que tejuatzi tomobetzteca. Xequenmomalfele para ma yecö saside, quieme nuyejque tejua saside tecate. ¹² Cuöc naja neyeya inca yejua, naja nequenmalfiöya para ma quesequirucö ca tejuatzi, quiename teniechmojtetele que tejuatzi tomobetzteca. Naja onequenmalfe hua nionöque de yejua amo oixniempole, tlöcamo solamiente nieca tli de porsí iya ipa ixniempolebelestle para ma mochihua tli tlajcuelulpanca. ¹³ Cache öxö neya mocatzinco. Hua nequejtoa ini nönca söstantle ipan tlöltecpactle, para ma quepeacö nopajpöqueles hua ma momeyaquele inca yejua. ¹⁴ Naja ye onequenmacac motlajtultzi, hua tlöltecpactlöca ye quentlajyeleja, ipampa amo cate de tlöltecpactlöca quieme naja nuyejque amo neca de tlöltecpactlöca. ¹⁵ Amo notlajtlötlajtea para tequenmoquextelis de ipa ini nönca tlöltecpactle, tlöcamo para tequenmomalfelis de noche tlin amo cuale. ¹⁶ Amo cate de ini nönca tlöltecpactle, quieme naja nuyejque amo neca de tlöltecpactle. ¹⁷ Xequenmonencuaxelfe por medio de lo que tli melöhuac para ma yecö yecteque. Motlajtultzi, yaja inu icaca melöhuac. ¹⁸ Quieme tejuatzi teniechhualmotitlane ipa tlöltecpactle, ejqueu nuyejque nequentitla ipan tlöltecpactle. ¹⁹ Hua por impampa yejua naja mismo nonencuaxeloa para necchihuas ini tequetl, para nuyejque yejua ma monencuaxelucö hua ma yecö yecteque por medio de lo que tli melöhuac.

²⁰ 'Cache amo notlajtlötlajtea sa para ini nöncate nomachtejcohua, tlöcamo nuyejque para quiejquech moneltocasque noca por intlajtul de nomachtejcohua. ²¹ Notlajtlötlajtea para que innochie ma yecö saside, san quiene ca tejuatzi, noTajtzi, tomobetzteca ca naja hua naja ca tejuatzi, ejqueu nuyejque yejua ma yecö ca tejua. Hua ejqueu tlöltecpactlöca ma moneltocacö que tejuatzi teniechhualmotitlane. ²² Hua inu tlaniextelestle tli teniechmomaquele nuyejque naja onequenmacac, para ma yecö saside quieme tejua tecate nuyejque saside. ²³ Naja ma neye ca yejua, hua tejuatzi ca naja, para ma yecö yejua saside de melöhuac. Ejqueu tlöltecpactlöca ma momacö cuenta que tejuatzi teniechhualmotitlane hua que tequenmotlasojtelea yejua quieme nuyejque teniechmotlasojtelea. ²⁴ NoTajtzi, necneque que niecate tli teniechenmomaquele nuyejque ma yecö ca naja cöne naja neyes, para ma quejtacö notlaniexteles tli teniechmomaquele porque teniechmotlasojtele desde antes que omochejchi ini nönca tlöltecpactle. ²⁵ NoTajtzi yectec, tlöltecpactlöca amo metzmixomachelejque, cache naja temetzmixomachele, hua ini nöncate ye oquematque que tejuatzi teniechhualmotitlane. ²⁶ Hua naja nequemelfe ixmantete de quiene tomobetzteca tejuatzi, hua nequemelfis cache. Ejqueu inu tlasojtelestle tli ica teniechmotlasojtele ma iye ipa inyulo, hua naja ma neye ca yejua.

18

Enemigos de Jesús tieaseque

¹ Cuöc Jesús ye oquejtojque ini nönca söstantle, biloac ca tiemachtejcohua ca ocsie löro öpöntle itucö Cedrón, cöne oyeya sente locör cuajcamac. Ipa inu locör calacoac Jesús ca tiehua tiemachtejcohua. ² Hua Judas, öque tieantrecörusquea inca tieenemigos, quixomateya inu nieca locör. Pos meyacpa Jesús nesentlöliloöya ompa ca tiemachtejcohua. ³ Judas, noso, quemönato soltörojte ca tiehua policías de tlötlayecönque de teopexcotzetzi hua de fariseos. Hua oaseto ompa ica tlobilte, hua tlobilecutl, hua teposme. ⁴ Cache Jesús, ipampa quematiloöya noche inu söstantle tli tiepa huölös, oquixoac ca cöne yejua oyejyeya hua oquemelfejque:

—¿Öquenu nenquetiemoa?

⁵ Otieyelfejque:

—Jesús de puieblo de Nazaret.

Oquemelfejque Jesús:

—Naja neca.

(Hua nuyejqe ompa oyeya ca yejua Judas, öque tietiemöctiöya ca yejua.) ⁶ Hua cuöc oquemelfejque: “Naja necaca”, otzinqisque hua obejbiebetzeto ipan tlöle.

⁷ Ocsajpa oquentlajtlanejqe:

—¿Öquenu nenquetiemoa?

Hua yejua oquejtojque:

—Jesús de Nazaret.

⁸ Onöhuatihuac Jesús:

—Ye onemiechelfe que naja neca. Tlö quejtus naja nenniechtiemoa, xequencöhuaco ini nöncate ma yöcö.

⁹ Ejqueu oquejtojque Jesús para ma mochihua inu tlajtule tli oquejtojque: “Öque teniechenmomaquele, nion sente de yejua amo necpolo”.

¹⁰ Yecuöquenu Semu Piero, öque quepeaya sente espöda, oquequexte, hua oquemacac iesclavo de tlajtojcöteopexque, hua oquetequele inacas tli ca imöyecmö. Hua inu esclavo mocuitiöya Malco. ¹¹ Yecuöquenu Jesús oquelfejque Piero:

—Xejcalaque moespöda ijtec icuetlaxyo. Inu bölsö de tiecoco tli oniechmacaque noTajtzi necpea que neconis.

Tiebicaque Jesús ca tlajtojcöteopexque

¹² Yecuöquenu soltörojte hua coroniel, hua guardia de joriojte, tieaseque Jesús hua tieijilpejqe. ¹³ Hua cachtö tiebicaque itlac Anás, pues yaja oyeya imönta de Caifás, öque oyeya tlajtojcöteopexque ipa inu nieca xebetl. ¹⁴ Hua yaja ini Caifás öque oquentlajtlamacac joriojte nele conbenierebe ma meque sente tlöcatl por intequepa puieblo.

Piero oquejto que amo tieixomate Jesús

¹⁵ Hua Semu Piero hua ocsente de tiemachtejcohua tietocaque Jesús. Hua tlajtojcöteopexque quixomateya inu ocsente machtejqe, hua yaja ocalac ca Jesús ipa ipötio de tlajtojcöteopexque. ¹⁶ Cache Piero omocö ca queyöhuac ipa trönca. Hua oquis inu ocsente machtejqe öquenu tlajtojcöteopexque quixomateya. Hua inu machtejqe oquenunutz sohuatl tlajpexque hua oquecalaque Piero. ¹⁷ Yecuöquenu inu sohuatl öque quexutiöya trönca oquelfe Piero:

—¿Beles nuyejqe taja tecaca sente de imachtejcohua de ini nönca tlöcatl?

Oquejto yaja:

—Naja amo.

¹⁸ Hua ompa ijicataya policías hua esclavos. Ye oquechejchijque tletzintle de tecole, ipampa lalebes siehua, hua yejua omotojtötunejtaya. Hua nuyejqe ijcataya Piero inca yejua omotötunejtaya.

Tlajtojcöteopexque otlajtlajto ca Jesús

¹⁹ Entunes inu tlajtojcöteopexque tietlajtlane Jesús de tiemachtejcohua hua de tietlamachteles. ²⁰ Jesús oquelfejque:

—Naja ixmantete onequennunutz ca noche giente. Naja seme onequenmachiöya ipa teopancucone hua ipa teopantle bieye cöne mosentlolea noche joriojte, hua amo tli onequejto sa ichtecajtzi. ²¹ ¿Tli ipampa teniechtlajtlanea naja? Xequentlajtlane yejua tli oquecajqe de lo que tli onequennunutz; yejuanu quemate tli naja onequejto.

²² Hua cuöc yejuatziz oquejtojque ini, sente policía tli ompa ijcataya, tiecamatetlatzcuepune Jesús, hua oquejto:

—¿Ejqueu tecnönquelea tlajtojcöteopexque?

²³ Nöhuatihuac Jesús:

—Tlö onequejto tli amo cuale, xecmelöjcopoa de tli amo cuale onequejto. Hua tlö cuale tli nequejtoa, ¿tli ipampa teniechmaca?

²⁴ Entunes Anás tietitla ica Caifás tlajtojcöteopexque. Ilpihuatöya.

Ocsajpa Piero oquejto que amo tieixomate Jesús

²⁵ Ompa ijcataya Semu Piero omototunejtaya. Hua inu giente oquelfejque:

—¿Beles taja nuyejque tecaca sente imachtejque?

Yaja oquenegöro, hua oquejto:

—Pues naja amo.

²⁶ Sente esclavo de tlajtojcöteopexque oyeya de ifamilia de öquenuju Piero oquenacastejtec. Yaja oquelfe Piero:

—¿Amo temetzejtac naja ica Jesús mismo ompa cöne cuajcamac?

²⁷ Hua Piero ocsajpa quenegöro. Hua nima otzajtzec canteliex.

Jesús ca Pilöto

²⁸ Entunses tiebicaque Jesús de itlac Caifás ca pa inu palacio noso Pretorio cöne chönteya inu cubernadur que itucö Pilöto. Hua cualco oyeya. Hua yejua amo ocalajque ipa Pretorio para majcamo mopetzonelucö porque quenequeya yesque chepöjque para cuale quecuösque inu tlacuale de pöscua. Pues tlö joriojte calaque ipa inchö de tli amo joriojte, quejtoa yejua que ye omopetzoneløjque. ²⁹ Yecuöquenu oquis Pilöto ca queyöhuac intlac, hua oquejto:

—¿De tli nenquetieyelfejtecate ini nönca tlöcatl?

³⁰ Onöhuatque hua oquelfejque:

—Tlö ini nönca amo quechihuasquiöya tli amo cuale, amo temetzmomöctelisquiöne.

³¹ Yecuöquenu oquejto Pilöto:

—Xebicacö nemejua hua xecjuscörucö por nemoley.

Hua joriojte oquelfejque:

—Mocubiernojtzi amo tiechpermitiroa yeca tecmectisque.

³² Ejqueu oquejtojque para ma mochihua tietlajtultzi Jesús tli oquejtojque cuöc quenmacheste de tli mequelestle mecoas.*

³³ Entunses Pilöto ocsajpa ocalac ipa Pretorio hua otienutz Jesús. Otieyelfe:

—¿Taja tecaca terey de joriojte?

³⁴ Onöhuatihuac Jesús:

—¿Tequejtoa ini nönca sampor tequejtoa noso yeca ometznunutz de naja?

³⁵ Pilöto tienönquele.

—¿Beles nejoreyo naja? Amo, cache motlöcaicnihua, hua jefes de teopexcötzetzi metzmöctejque nomöpa. ¿Tli otecchi?

³⁶ Nöhuatihuac Jesús:

—Noreino amo icaca de nönca tlöltecpactle. Tlö neyene nerey de sente reino ipa ini nönca tlöltecpactle notlatequepanojua momagasquiöne para majcamo niechtiemöcticö inca joriojte. Al contrörio, noreino amo de necö.

³⁷ Yecuöquenu tieyelfe Pilöto:

—¿Tlöjcu taja tecaca terey?

Onöhuatihuac Jesús:

—Naja necaca nerey quieme taja tequejto. Pos para ini naja onetlöcat, hua onehuöla ipa nönca tlöltecpactle para ini, para ma necmelöjcopoa de lo que tlin melöhuac. Noche öque moneltoca ica tli melöhuac niechtienciaque.

³⁸ Otieyelfe Pilöto:

—¿Hua tlin inu yaja lo que tli ica melöhuac?

Pilöto tietiemacac Jesús ma tiecoruspelucö

Hua cuöc oquejto ini nönca, oquis ocsajpa inca joriojte, hua oquemelfe:

* **18:32** Joriojte amo tlacoruspelo.

—Naja amo nequejtelea niontle tlajtlacule. ³⁹ Cache nemejua nenquepea costumbre, nele naja nemiechcajcöbeles sente tlöcatl ma quisa de ipan cörsel ipan pöscua. ¿Nenqueneque noso ma nejcajcöhua ini nönca Rey de joriojte?

⁴⁰ Yecuöquenu innochtie otzajtzejtzeque ocsajpa, oquejtojque:

—Ini nönca amo xomocajcöbele, tlöcamo xomocajcöbele yaja Barrabás.

Pos Barrabás oyeya ichtejque.

19

¹ Entunses Pilöto tlanahuate ma tiemönelicö Jesús, hua ma tiebejbitequecö. ² Hua soltörojte queyejectienque sente coruna de betztle, hua tietlölelejque ipa tietzonteco hua tietlaquentejque ca tatapajtle mororojtec quiename möquea reyes. ³ Hua ohuölöya ca yejuatzi hua oquejtoöya:

—¡Ma neme Rey de joriojte!

Hua tiecamatetlajtlatzcuepuniöya.

⁴ Yecuöquenu Pilöto oquis ocsajpa, hua oquemelfe joriojte:

—Xequetacö, necö necbicatz ca queyöhuac para nenquejtasque que naja amo tli tlajtlacule necniextelea.

⁵ Entunses oquixoac Jesús ca queyöhuac. Quebicaloöya inu coruna de betztle hua tietlaquie mororojtec. Hua oquemelfe Pilöto:

—Xequetacö, nönca tlöcatl.

⁶ Hua cuöc tieijtaque jefes de teopexcötzetzi hua policías, otzajtzejtzeque:

—Xomocoruspelfe, xomocoruspelfe.

Oquemelfe Pilöto:

—Xecönaco nemejua hua xejcoruspelucö, ipampa naja amo tli necniextelea tlajtlacule.

⁷ Oquenönquelejque joriojte:

—Tejua tecpea sente ley hua san quiene ca quejtoa inu ley ijteca ma meque ini nönca, ipampa quejtoa nele iloac tieConietzi Deus.

⁸ Hua cuöc Pilöto oquecac ini nönca tlajtule, omomajte cache. ⁹ Hua ocalac ocsajpa ipa Pretorio hua otieyelfe Jesús:

—¿De cöne taja teca?

Cache Jesús amo oquenönquelejque. ¹⁰ Yecuöquenu tieyelfe Pilöto:

—¿Naja amo teniechnönquelea? ¿Amo tecmate que naja necpea checöhuallestle para temetzajcöhuas, hua nuyejque necpea checöhuallestle para temetzcoruspelus?

¹¹ Onöhuatihuac Jesús:

—Niontle checöhuallestle amo tecpeane ca naja, tlö amo metzmacasquiöya de tlapac. Por inu öque niechmöcte ca taja cache bieye tlajtlacule quepea.

¹² Desde cuöquenu quenequeya Pilöto tiecajcöhuas, cache joriojte tzajtzejtzeja, hua quejtoöya:

—Tlö ini nönca tomocajcöbelis, amo tomobetzteca teamigo de César. Öque beletes quejtoa que ica rey, ica enemigo de inu belaja rey César.

¹³ Entunses Pilöto cuöc oquecac ini nönca tlajtule, tiebicac Jesús ca queyöhuac hua omotlöle ipa sieta de tlajtoöne ipa inu löcor tli quecuitea Tepejpechtle, hua ca hebreo Gabata. ¹⁴ Hua ye oyeya viernes de inu semöna de pöscua hua quieme pan tlajca. Hua oquemelfe joriojte:

—Xequetacö nemorey.

¹⁵ Cache yejua otzajtzejtzeque:

—Xomoquextele, xomoquextele. Xomocoruspelfe.

Oquemelfe Pilöto:

—¿Nemorey nejcoruspelus?

Onöhuatque jefes de teopexcötzetzi:

—Amo tecpea rey tlöcamo sa yaja César.

¹⁶ Entuneses Pilöto tietiemöcte inca yejua para ma tiecoruspelucö.

Jesús omecoac pan corujtzi

Hua otieaseque Jesús. ¹⁷ Hua yejuatzi oquixoac, oquebicaloöya tiecorujtzi. Biloac hasta inu locör tli mocuitea Calaviera noso Locör de Mejcötzontecomatl, hua mocuitea ca hebreo Gólgota. ¹⁸ Hua ompa tiecoruspelojque. Hua tieca quencoruspelojque unte ocseque, ca sie löro sente hua ca ocsie löro ocsente hua yejuatzi nepantla. ¹⁹ Hua oquejcuelo nuyejque Pilöto sente tucöyutl hua oquetlöle icpac corujtzi. Hua tlajcuelule ejqueyi oyeya: JESÚS DE PUIEBLO DE NAZARET, REY DE JORIOJTE. ²⁰ Hua meyactie joriojte oquetlajtultejque ini nönca tucöyutl. Pues cöne tiecoruspelojque Jesús amo bejca oyeya de inu ciudad. Hua tlajcuelulpa oyeya ca hebreo, hua ca latín, hua ca griego. ²¹ Hua jefes de teopexcötzetzi de joriojte oquelfejque Pilöto:

—Amo xomojcuelfe, “Rey de Joriojte”, tlöcamo xomojcuelfe que yaja oquejto que ica Rey de Joriojte.

²² Onöhuat Pilöto:

—Tli onequejcuelo, ye onequejcuelo.

²³ Hua cuöc soltörojte ye tiecoruspelojque Jesús, ocönque tietzotzomajua, hua oquechijque nobe pörtes, para cara siesente soltöro sente pörte. Hua nuyejque tietlaquie ocönque. Cache tietlaquie amo tlajtzöntle oyeya, tlöcamo noche intiero oyeya desde tlapac. ²⁴ Entuneses omolfejque sente ca ocsente:

—Majcamo tectzomunicö, tlöcamo ma tecriförucö, abier öquenu quetlöne.

Ejqueu oquechijque para ma mochihua tli tlajcuelulpanca cöne quejtoa: Quexixelojque intzölö yejua notzotzomajua, hua queriförojque notlaquie.

Hua soltörojte ejqueu oquechijque.

²⁵ Hua itlac tiecorujtzi de Jesús ijijcataya tienönajtzi hua icni sohuatl de tienönajtzi, ca tiehua María, isohua Cleofas, hua nuyejque María de puieblo de Magdala. ²⁶ Entuneses Jesús oquejtaque tienönajtzi, hua inu tiemachtejque öque lalebes quetlasojtlaloöya, ompa ijcataya. Cuöquenu quelfejque tienönajtzi:

—Sohuatl, xomojtele niecaju moconietzi.

²⁷ Entuneses oquelfejque tiemachtejque:

—Xequajta niecaju monöntzi.

Hua desde nieca ura inu tiemachtejque oquebicac tienöntzi ca ichö.

²⁸ Sötiepa de ini nönca, cuöc Jesús oquematque que noche sösantle ye omochi, para ma mochihua tli tlajcuelulpanca, oquejtojque:

—Naja nömeque.

²⁹ Hua ompa oyeya sente xoctle tientaya de pinögre. Entuneses giente oquetiemitejque sente sunectle ca pinögre, hua queyehualuchtelejque sente tlapac de hisopo, hua oquepachojque itlac tiecamac. ³⁰ Hua cuöc Jesús ye oconihuac pinögre oquejtojque:

—Ye omosencö noche.

Hua oquepiechojque tietzonteco, omecoac.

Sente soltöro tietecoyöbele tiemesecuelnacastla Jesús

³¹ Hua oyeya viernes de inu semöna. Inu joriojte amo quenejnequeya ma mocöhuacö mimejque ipa coruscujme ipa söbro, ipampa inu söbro bieye tunale de yelfetl oyeya. Por inu oquelfejque Pilöto ma quenpojpstequelicö imecxehua de niecate tli coruspelcataya para ma mejmequecö nima, hua ejqueu ma quemejcuenicö de ompa. ³² Hua ohuölajque soltörojte, hua oquenpojpstequelico imecxehua de inu unteme ocseque tli quencoruspelojque ca yejuatzi. ³³ Cache ohuölajque tieca Jesús, hua tieijtaque quiene

ye omecoac. Entunses ayecmo tiepojpostejquelejque tieicxehua. ³⁴ Cache sente de inu soltörojte tietecoyöbele tiemesecuelnacastla ca ilönsa, hua sa nima oquis yestle hua ötzintle.

³⁵ Hua öquenu oquejtac yaja quepujteca. Hua ica melöhuac lo que tli quepoa. Hua yaja quemate que quejtojteca tli melöhuac. Ejqueu quechihua para que nemejua nuyejque ma xomoneltocacö. ³⁶ Pos ini nönca söstantle omochi para ma mochihua tli tlajculelulpanca: “Amo queposteqesque nion sente de tiememetehua”. ³⁷ Hua nuyejque ocsente tlajcuelule quejtoa: “Tieijtasque öque tietecoyöjque”.

Tietlöltucaque Jesús ijtec sente mejcöustutl

³⁸ Sötiepa de ini nönca söstantle, Josie de Arimatea, öque oyeya tiemachtejque de Jesús, mös sa ichtecajtzi ipampa quenmabeliöya joriojte, yaja oquetlötlahte Pilöto para quejcuenis tiecuiervo Jesús. Hua Pilöto oquecö ma quejcuene. Yecuöquenu ohuöla hua oquejcuene tiecuiervo. ³⁹ Hua ohuöla nuyejque Nicodemo, öque tli cachtö ohuöla tieca Jesús ca yohuale. Yaja oquehualcac quieme cincuenta kilos de pajtle tli mocuitea mirra hua aloes para quequemelusque tiecuiervo. ⁴⁰ Entunses oquebicaque tiecuiervo Jesús, hua oquequemelöjque ca tzotzomajtle ca tiehua inu pajme san quiene ca quepea costumbre joriojte ca motojtuca. ⁴¹ Hua ca ompa cöne tiecoruspelöjque oyeya sente locör cuajcamac hua ijtec cuajcamac oyeya sente mejcöustutl yancuec cöne ayemo öque motuca. ⁴² Ompa noso quetlölejque tiecuiervo Jesús, porque oyeya viernes de inu semöna de pöscua de joriojte, hua inu nieca mejcöustutl sa nima ompa oyeya.

20

Jesús oyulejque

¹ Pos ipa primero tunale de semöna, María Magdalena ohuöla itlac mejcöustutl ca ise cuöc oc tlajtlayohua oyeya. Hua oquejtac que inu tietetu ye omojcuene de itech pobielta de inu mejcöustutl. ² Yecuöquenu otzecuintie, hua ohuöla ica Semu Piero, hua ca inu ocsente de tiemachtejcöhua öque quetlasojtlaloöya Jesús. Hua oquemelfe:

—Ye quebicaque tiecuiervo Tlöcatzintle de ijtec mejcöustutl, hua amo tecmate cöne quetlölejque.

³ Hua oquistiejque Piero hua inu ocsente machejque, hua uyajque cöne oyeya mejcöustutl. ⁴ Hua omomiemerojque inehua. Hua inu ocsente tiemachtejque cache omomero que Piero hua oaseto cachtö itlac mejcöustutl. ⁵ Hua otlachix hua oquejtac tatapajme ompa betztaya. Cache amo ocalac. ⁶ Entunses oaseto Semu Piero nuyejque, öque quetocaya, hua ocalac ijtec mejcöustutl hua oquejtac tatapajme betztaya. ⁷ Hua inu cuötztotzomajtle tli oyeya ipa tietzönteco amo betztaya ica ocseque tzotzomajme tlöcamo tejcuxetaya ipa locör nencua. ⁸ Yecuöquenu ocalac inu ocsente machejque nuyejque, öque ohuöla cachtö itlac mejcöustutl. Hua oquejtac hua omoneltocac. ⁹ Pos ayemo quemateya tli tlajcuelulpa oyeya, que quepeaya que mochihuasquea ejqueu ma yulebihua de intzölö mimejque. ¹⁰ Hua omocuejque tiemachtejcöhua ca inchajchö.

Jesús neniextiluc ca María de puieblo de Magdala

¹¹ Pos María oyeya ca queyöhuac chucataya itlac mejcöustutl. Entunses cuöc ochucataya otlachix ijtec mejcöustutl. ¹² Hua oquemejtac unte öngeles motlajtlaquentejtaya ica tzotzomajtle istöc. Oyejyehuataya sente cöne ca oyeya tiecuötzoncuöc hua ocsente cöne ca oyeya tieicxetla, cöne oquetlölejque tiecuiervo Jesús. ¹³ Hua oquelfejque:

—Sohuatl, ¿tlica techuca?

Oquemelfe:

—Ipampa ye tiebicaque noTlöcatzintle hua amo necmate cöne tietlölito.

¹⁴ Hua cuöc oquejto ini nönca, omocuec ca icuetlapa, hua tieyejtac Jesús ijcatihuataya. Cache amo quemateya tlö yejuatzi Jesús. ¹⁵ Jesús oquelfejque:

—Sohuatl, ¿tlīca techuca? ¿Öquenu tectiemoa?

Yaja oquepensōro beles yaja tlajpexque. Otiyelfe:

—Señor, tlō tejuatzi tetiemobiquele, xeniechmolfele cōne tetiemotlōlelito, hua naja netiebricas.

¹⁶ Jesús oquelfejque:

—María.

Omocuec yaja, hua otieyelfe ca hebreo:

—¡Rabboni! —Quejtusneque, NoTiemachtejcōtzi.

¹⁷ Jesús oquelfejque:

—Amo xeniechquejquitze, ipampa ayemo netlejco tieca noTajtzi. Cache xebeya intlac nocnihua hua xequemelfe: “Netlejcus tieca noTajtzi öque nuyejque iloac nemoTajtzi, tieca noDeus öque nuyejque iloac nemoDeus”.

¹⁸ Uya María Magdalena quenpubelito tiemachtejcōhua que otieyeltac Tlōcatzintle, hua que yejuatzi oquelfejque ini nōnca sōsantle.

Jesús neniextiluc ca tiemachtejcōhua

¹⁹ Hua cuōc ye yohuac oyeya ipa inu nieca tunale, inu primero tunale de semōna, tzōtzactaya cōne tiemachtejcōhua omosentlōlejque. Pos oquenzajtzajque pobieltajte ipampa quenmabeliōya joriojte. Yecuōquenu ohualiloac Jesús, hua nepantla de yejua onequetzaluc. Hua oquemelfejque:

—Xomoyulsiebicō.

²⁰ Hua cuōc oquejtojqe ini nōnca, oquemejtetejqe tiemōhua hua tiemesecuel-nacastla. Hua tiemachtejcōhua opajpōjqe cuōc tieijtaque Tlōcatzintle. ²¹ Yecuōquenu Jesús oquemelfejque ocsajpa:

—Xomoyulsiebicō. Ejqueu quiene ca oniechhualtitlanque noTajtzi, ejqueu nuyejque nemiechtitlane naja.

²² Hua cuōc oquejtojqe ini nōnca, oquemelpitzque hua oquenmelfejque:

—Xetieselicō Espīritu Sōnto. ²³ Öque beletes tlōca nenquentlapojpolfisque intlajtlacul, ye tlapojpolfefe icaca. Hua tlō nenquejtusque que intlajtlacul de seque ma impa mocōhua, ye impa mocōhua.

Jesús hua Tumös

²⁴ Cache Tumös, sente de inu majtlactle huan ume, öque nuyejque mocuitea Dídimo (quejtusneque Cuhuōtzi), yaja amo ompa oyeya ca yejua cuōc Jesús ohualiloac.

²⁵ Entuneses oquelfiōya ocseque tiemachtejcōhua:

—Tetieijtaque Tlōcatzintle.

Cache yaja oquemelfe:

—Tlō amo nequejtas tiemōhua hua nejcalaquis nomajpel ijtec cōne cojcoyunteca de calōbōste hua nejcalaquis nomō ijtec tiemesecuel, amo noneltocas de porsī.

²⁶ Sōtiepa de checuieye tunale tiemachtejcōhua oyejyeya ocsajpa tlaijtec, hua ca yejua oyeya Tumös. Ohualiloac Jesús, mōs tzōtzactaya pobieltajte, hua innepantla onequetzaluc. Hua oquemelfejque:

—Xomoyulsiebicō.

²⁷ Sa nima oquelfejque Tumös:

—Xejcualca momajpel necō hua xequemejta nomōhua. Hua xebetlōtzo momō, hua xejcalaque ijtec nomesecuel. Hua amo xeye ejqueu que amo tomoneltocane tlōcamo xomoneltoca.

²⁸ Tumös onōhuat hua otieyelfe:

—NoTlōcatzintle hua noDeus.

²⁹ Jesús oquelfejque:

—Tomoneltocac, Tumös, ipampa teniechejtac. Cuale inmicnupel noche niecate tli moneltoca mōs amo niechejtaque.

Tlica omojcuelo nönca ömatl

³⁰ Hua nuyejque oquechijque Jesús meyac ocseque sösantle de tietzöbetl imixtla tiemachtejcohua. Cache amo nequemejcuelo ipa ini nönca ömatl. ³¹ Noche tli quepea nönca ömatl onequejcuelo para ma xomoneltocacö que Jesús iloac Cristo, öque Deus tieixpejpenque, hua que iloac tieConietzi Deus. Pues tlö nemoneltoca nenquepeasque nemelestle tietucöyupantzinco.

21*Jesús neniextiluc ca checume tiemachtejcohua*

¹ Sötiepa de ini nönca sösantle oneniextiluc Jesús ocsajpa inca tiemachtejcohua ipa inu ötiescatl de Tiberias. Hua ejqueyi opasöre. ² Sa secne oyejyeya Semu Piero, hua Tumös, öque mocuitea Dídimö (quejtusneque Cuhuötzi), hua Natanael, öque oyeya de Caná de Galilea, hua ipeljua Zebedeo, hua oc unte de tiemachtejcohua. ³ Oquemelfe Semu Piero:
—Neya netlajtlamöti.

Oquelfejque:

—Teyabe tejua nuyejque ca taja.

Uyajque hua tlejcoque ipa sente börco, hua pa inu yohuale amo tli ocaseque.

⁴ Hua cuöc ye tlanestaya Jesús onequetzaluc itienco ötiescatl. Cache tiemachtejcohua amo quemateya tlö yejuatzi Jesús. ⁵ Entunses Jesús oquemelfejque:

—Pelantotu, amo nenquepea tli nenquecuösque ¿motiel?

Tienönquelejque:

—Amo.

⁶ Hua yejuatzi oquemelfejque:

—Xectlajcalecö tarröya ca imöyecömpa börco, hua nenqueniextisque.

Yecuöquenu oquetlajcalque ca ompa, hua öxö abele quequextiöya, ipampa lalebes meyactie mimechte. ⁷ Yecuöquenu inu nieca tiemachtejque öque quetlasojtlaloöya Jesús oquelfe Piero:

—Yejuatzi Tlöcatzintle iloac.

Entunses Semu Piero, cuöc oquecac que yejuatzi Tlöcatzintle, omotlajcoilpe ca itzotzomajua, pues ye oquequexte itlaquie. Hua omotlajcal ijtec ötzintle. ⁸ Cache ocseque tiemachtejcohua ohuölajque pa börco (pues amo bejca oyejyeya de itiencö ötiescatl tlöcamo quieme sie sientos mietros), hua quehualécaya tarröya ca mimechte.

⁹ Hua cuöc ohuölajque cöne tlölhuöjque, oquejtaque que ompaca tletzintle de tecole, hua sente meche icpac, hua pöntzi. ¹⁰ Oquemelfejque Jesús:

—Xejcualécacö mimechte tli quemach nenquemaseque.

¹¹ Entunses otlejcoc Semu Piero ipa börco, hua oquehualécac tarröya ca ipa tlölhuöjque. Hualtientöya ca meyactie mimechte bejbeye. Oquepex ciento cincuenta y tres. Hua mös meyactie oyejyeya amo otzomu tarröya. ¹² Oquemelfejque Jesús:

—Xehuölöcö, xetlacuöcö.

Hua nionöque de tiemachtejcohua amo quenequeya tietlajtlanesque:

—¿Öquenu tejuatzi?

Pues quemajtaya que bel yejuatzi Tlöcatzintle. ¹³ Ohualiloac Jesús hua ocönque pöntzi hua oquenmajmacaque, hua meche nuyejque. ¹⁴ Ca ini nönca ye oyeya yexpa neniextiloöya Jesús inca tiemachtejcohua sötiepa de cuöc oyulebihuac de intzölö mimejque.

Jesús hua Piero

¹⁵ Hua cuöc ye otlacuajque, Jesús oquelfejque Semu Piero:

—Semu, iconie Xohuö, ¿teniechtlasojtla cache que ini nöncate?

Otieyelfe:

—Quiema, noTlöcatzintle. Tejuatzi tomomachitea que temetzmonequitea.

Oquelfejque:

—Xequentlacualte nocalnielojcuconehua.

¹⁶ Ca ujsa ocsajpa oquelfejque:

—Semu, iconie Xohuō, ¿teniechtlasojtla?

Otieyelfe:

—Quienamo, noTlōcatzintle. Tejuatzi tomomachitea que temetzmonequitea.

Oquelfejque:

—Xequenmixute nocalnielolja.

¹⁷ Ca yexpa oquelfejque:

—Semu, iconie Xohuō, ¿teniechneque?

Omotequepacho Piero ipampa oquelfejque öxö ca yexpa: “¿Teniechneque?”

Hua otieyelfe:

—NoTlōcatzintle, tejuatzi tomomachitea noche sösantle. Tejuatzi tomomachitea que temetzmonequitea.

Oquelfejque Jesús:

—Xequentlacualte nocalnielolja. ¹⁸ Melöhuac, melöhuac temetzelfea: Cuöc cache tepelalactle oteyeya, sie taja tomotlaquentiöya, hua teyöya cöne tecnequeya. Cache cuöc ye tebiebentzi, temösohuas para yeca ocsente metztlaquentis, hua metzbicas cöne taja amo tecneques.

¹⁹ Hua ini nönca oquelfejque para quemachestisque ica tli mequelestle mequesquea para que ejqueu quepeasque chamöhualestle Deus. Hua cuöc ye oquejtojque ini, oquelfejque:

—Xeniechtoca.

Jesús hua tiemachtejque öque quetlasojtlaloöya

²⁰ Nuyejque tlatocatöya nieca tiemachtejque öque quetlasojtlaloöya Jesús, öque nuyejque omonacascaticac ipa tiepiecho cuöc otlacualuc, hua tietlajtlane Tlōcatzintle: “¿Öquenu metzmantrecörfis?” Öxö cuöc omocuec Piero, oquejtac nieca tlatocatöya.

²¹ Hua cuöc oquejtac ini nönca, otieyelfe Jesús:

—Tlōcatzintle, ¿hua ini tlōcatl, tli quepasörus?

²² Oquelfejque Jesús:

—Tlō quejtus que naja necneques ma yaja mocöhua hasta senamo naja nehuölös, ¿taja tli tecpea tequejtac ca inu? Pues taja xeniechtoca.

²³ Entunes ini nönca tlajtule oquis intzölö tocnihua, nele ini nönca tiemachtejque amo meques. Cache Jesús amo oquelfejque que amo meques, tlōcamo oquejtojque: “Tlō quejtus que naja necneques ma yaja mocöhua hasta senamo naja nehuölös, ¿taja tli tecpea tequejtac ca inu?”

²⁴ Yaja ini nönca tiemachtejque ica öque quepujteca de ini nönca sösantle, hua oquejculo ini nönca sösantle. Hua tecmajtecate que lo que tli quepoa icaca melöhuac.

²⁵ Hua onca nuyejque ocseque meyac sösantle tli oquechijque Jesús, que tlō mojcuelusquiöya sente por sente, necnenebelea beles nimpör ipa noche tlöltecpectle amo aquesquiöya inu ömame tli mojcuelusquiöya.

QUIENE CA OQUECHIJQUE TLATEOTITLANME

Jesús oquemelfejque tietlateotitlanhua ma tiecheacö Espiritu Sönto

¹ Temetzmojcuelfele antes, Teófilo. Temetzmolfele noche tli Jesús oquechijque hua otlamachtejque. Ejqueu oquechijque desde que oquepiehualtejque tietequé. ² Oquesequirojque hasta cuöc Deus otiebicaque elfecac. Antes de que obiloac ca elfecac Jesús oquemixpejpenque inu majtlactle huan ume tietlateotitlanhua. Espiritu Sönto tiepaliebiluc Jesús para oquenmacaque mandamientos. ³ Sötiepa de que ome-coac Jesús, oneniextiluc intzölö yejua. Oneniextiluc meyac veces ipa cuarenta días. Ca meyac söstantle tli oquechijque quemejtetejque perfectamente que yulebihuateca. Oquennunutzaloöya de quiene Deus tlamandöruro. ⁴ Mientras onecöhualuc ca yejua oquenmandörojque nele majcama yöcö de Jerusalén. Oquejtojque:

—Xeccheacö ma mochihua lo que tli toTajtzin Deus oqueprometierojque. Ye onemiechelfe de inu. ⁵ Tiel Xohuö otlacuötieque ca ötzintle, cache pa quiesquete tunalte nemocuötiequisque ca Espiritu Sönto cuöc yejuatzi calacoas ipa nemoyulo.

Otlejcoac elfecac Jesús

⁶ Cuöc ye omosentlölejque tlateotitlanme, otietlajtlanejque Jesús:

—Tlöcatzintle, ¿öxö tomotlölelis tonación Israel ocsajpa para tlamandörus?

⁷ Pos oquemelfejque:

—Amo nemiechtocöroa nenquematesque quiema mochihuas canajyetla quieme inu. ToTajtzin Deus oquemalfejque inu para que sa yejuatzi quejtusque hasta quiema Israel tlamandörus ocsajpa. ⁸ Cuöc calaquesque Espiritu Sönto pa nemoyulo nemejua, nencasesque checöhuallestle. Nenquisasque quieme nentestigos de naja amo sa pa ciudad de Jerusalén tlöcamo ipa noche estado de Judea hua estado de Samaria hua hasta cache bejca locör pan tlöltecpactle.

⁹ Cuöquenuju Jesús opiehualuc neajcoquiluc ca elfecac mientras yejua tieyetzaya. Por fin ayecmo otieijtaque porque opolebihuac ijtec mextle. ¹⁰ Mientras Jesús biloaya, yejua ajcopatlajtlachixtaya. Sa de repiente intlac omoquetzaco unte öngeles ca intlaquie istöc. ¹¹ Oquemelfejque:

—Señores de estado de Galilea, ¿tlica nentlajtlachixtecate ca elfecac? Deus tieönaluc Jesús de entre nemotzölö hua otiebicaque hasta elfecac. Pos quieme onentiejtaque obiloac elfecac, ejqueu mismo sie yejuatzi Jesús hualiloas ocsajpa.

Creyentes oquixpejpenque Matías ma calaque itequipa Judas

¹² Yecuöquenu tietlateotitlanhua uyajque de ipa nieca tepietl tli itucö Tepietl de Olivos. Inu tepietl mocöhua itech Jerusalén, quieme sie kilómetro ca bejca. Omocuejque ca Jerusalén. ¹³ Cuöc ocalajque pa Jerusalén, otlejcuque ipa sente calejtec icpac cale. Ompa mocalutiöya Piero, Xohuö, Jacobo, Andrés, Felipe, Tumös, Bartolomé, Mateo, Jacobo iconie Alfeo, Semu el Celador, hua Judas *iconie de Jacobo. ¹⁴ Yejua ompa oyejyeya ca tiehua segue sohuame hua María tienönajtzi Jesús hua tieicnihua Jesús. Nochemejua seme ca sa sie tlanequelestle motlajtlötlajtiöya.

¹⁵ Cuöquenuju Piero omoquetz intzölö inu hermanos tlö quieme ciento veinte ca meyactie. Oquejto:

¹⁶ —Nocnihua, David oquejcuelo lo que tli Espiritu Sönto oquejtojque de Judas. Hua inu teotlajtule quepeaya ma mochihuate. Pos Judas oquenyecö tli tieaseque Jesús.

¹⁷ Totzölö oyeya Judas hua quepeaya ipörte de nönca tequetl de Deus.

* **1:13** Cuale nuyejque motradusirus: “icni”.

¹⁸ Pos inu Judas oquecu sente tlöle. Oquetlaxtlö ca inu tomi tli oquemacaque por itlajtlacul. Ixtlajpach betzeto. Oijtepetzi hua noche tli ijtecajca ocuaxiele. ¹⁹ Oquematque noche tli chajchönte pa Jerusalén hua oquecuitejque nieca tlöle Acéldama, que ca intlajtul de yejua quejtusneque Tlöle de Yestle.

²⁰ —Pos tlajcuelulpanca ipa libro de Salmos:

Ma quisa de ipa ichö,
hua majcamo öque ompa chönte.

Nuyejque quejtoa pa Salmos:

Ma yeca ocsente case inu tequetl tli yaja oquepeaya.

²¹ 'Conbenierebe, noso, ma mixpejpna sente tlöcatl de intzölö nöncate tlöca. Ma mixpejpna sente tlöcatl tli seme totlac icaca desde cuöc Tlöcatzintle Jesús biloatenemeya totzölö. ²² Ma mixpejpna sente de yejua tli seme totlac icaca desde cuöc Xohuö tiecuötieque Jesús hasta öxö cuöc Deus tieönaluc de totzölö para ca elfecac. Conbenierebe que yaja san quiene ca oquejtac noche inu sösantle ma iye testigo ca tejua de quiene ca oyulebihuac Jesús.

²³ Pos yejua oquenquetzque unteme. Sente yaja Josie Barsabás, öque nuyejque mocuitiöya Justo. Hua ca ume yaja Matías. ²⁴ Entunses omotlajtlötlajtejque ejqueyi:

—Tlöcatzintle, tejuatzit tequemixomachelea toyulo de tonochtie. Xetiechmojtetele öquenu ye otemixpejpenele de nöncate unteme. ²⁵ Ye otemixpejpenele sente para ma quechihua nönca motequeyojtzi de que iyes tlateotitlantle. Pos Judas ye oquecöjtie para iyös pa inu locör tli quetocöro.

²⁶ Entunses oqueriforojque abier öque quetocörus. Pos oquetocöro yaja Matías. Así es que yaja omopu inca inu majtlactle huan sie tlateotitlanme.

2

Espíritu Sönto ocalacoac ipa inyulo creyentes

¹ Cuöc oaseco inu yelfetl de Pentecostés, noche inu creyentes oyejyeya sa secne ipa sie locör. ² Sa de repiente ocaquestec checöhuac sente ruido tli ohuöla de elfecac. Bel checöhuac ocaquestec ompa calejtec cöne yejua oyejyehuataya. Ocaquestec quiename sente yejyecatl cuöc checöhuac tlapitza. ³ Inca yejua omoniexte sana imöönalo tletzintle. Pos inu sana imöönalo tletzintle omocuöxielo hua omotlörito ipa cara sesen tlöcatl. ⁴ Hua inyulo de innochtie otie de Espíritu Sönto. Entunses yejua opiejque tlajtlajtoa ca ocsesen idiomas tli Espíritu Sönto oquenmacaque ma quejtucö.

⁵ Pa inu yelfetl joriojte tli lalebes moneltocaneme ohuölajque hasta pa ciudad de Jerusalén. Ohualiejque de ipa noche ocseque naciones. ⁶ Cuöc yejua oquecajque inu ruido, sa nima omosentlölejque meyactie. Oquetietzöbejque porque oquecaqueya que inu creyentes otlajtlajtoöya ca idiomas de cara sesen tlöcatl. ⁷ Pos yejua sö otlacactaque hua oquetietzöbejtajque. Oquejtojque:

—¿Pos quie amo yejua de estado de Galilea tli tlajtlajtojtecate? ⁸ ¿Quiene, noso, tequencaque tejua que tlajtlajtoa ca belaja toidioma de cara sesen tlöcatl quieme tejua tetlajtlajtoa desde cuöc otetlajtlöcatque? ⁹ Pos oncönate giente de meyac naciones. Oncate de Partia, de Media, de Elam, de Mesopotamia, hua tli chajchönte ipa Judea, hua ipa Capadocia, ipa Ponto hua ipa Asia. ¹⁰ Cate de Frigia hua Panfilia, de Egipto hua de noche pörtes de Africa ca nepa löro de inu puieblo de Cirene. Nuyejque oncate de Roma tli oncö chajchönte. Seque de yejua cate joriojte hua ocseque mös amo joriojte ye ocalajque ipa toreligiön. ¹¹ Oncate nuyejque giente de tlöle de Creta hua de Arabia. Pos tonochtie tequenyajcaque que tlajtlajtoa ipa totlajtul quieme tejua tetlajtlajtoa. Tiechpubelea de quiene ca Deus oquechijque tietzöbetl tlachihuale.

¹² Pos innochtie oquetietzöbejtaya. Amo oquematque quiene oquepensörojque. Omolfejque:

—¿Tli quejtusneque ini tli mochijteca?

¹³ Cache ocseque omoburlörojque. Oquejtojqque:

—Pos nöncate ye otlöhuönque ca meyac vino tli tzopielec.

Piero oquennunutz inu giente

¹⁴ Yecuöquenu Piero omoquetz ca tiehua inu majtlactle huansie tlateotitlanme. Oquejto:

—Señores nenjoriojte hua tli nennejneme pa Jerusalén. Xecyejcaquecö tli nequejtus hua xecmajtacö nönca. ¹⁵ Ini nöncate tlöca amo bejbentetecate quieme nemejua nenquenenebelea. Pos quemach tecate pa checnöbe ura ca ise. ¹⁶ Nönca mochijteca lo que tli Deus oquejtojqque por icamacopa de inu tlayulepante Joel ca ye niepa:

¹⁷ Quejtulo Deus:

“Ejqueyi mochihuas ipa niecate sölültimo tunalte.

NoEspíritu nequenmacas noche tlöca.

Nemotiehpuchhua hua nemoichpuchhua tlayulepantisque de tietlajtultzi Deus.

Nuyejqque tlacocheyejtasque tli de nemejua ayemo biebertzetzi,

hua tlacochiemequesque tli biebertzetzi de entre nemejua.

¹⁸ Melöhuac. Ipa niecate tunalte noEspíritu nequenmacas inu tlöca hua sohuame tli niechtequepanusque,

hua yejua tlayulepantisque de tietlajtultzi Deus.

¹⁹ Giente quietietzöbejtasque lo que tli necchihuas ompa elfecac,

hua pan tlöltecpactle necchihuas sieñas

ca yestle hua ca tletzintle hua ca puctle.

²⁰ Tunale ayecmo quietiemacas itlaniexteles,

hua mietztle chichilibes quiename yestle

antes que tecalaquesque pa inun tunale de Tlöcatzintle.

²¹ Inun tunale bieye iyes, hua tlatieniehuale.

Hua mochihuas que momöquextisque innoctie tli tietlajtlanelisque nemöquextelestle tietucöyupantzinco Tlöcatzintle”.

²² 'Señores de tonación Israel, xejcaquecö de lo que tli nequejtus. Jesús oiloaya de puieblo de Nazaret. Deus otieixpejpenque. Ye nenqueyecmate inu porque Jesús oquepexque meyac checöhualestle nemotzölö para oquechijque tietzöbeme hua sieñas hua bieye tlachihualestle. ²³ Ini nöiloac Jesús Deus otietiemöctejque ca nemejua, porque ejqueu Deus oquetzontejque antes hua oquematque que quechihualusquiöya ejqueu. Hua inmöcopa giente petzoteque nentiecoruspelojqque Jesús hua ejqueu onentiemectejque. ²⁴ Pero Deus otieyulebitiluc Jesús hua otiequextiluc de ipa mequelestle. Pos abele necöhualestle ipa mequelestle. ²⁵ David otlajtlajto de Cristo hua oquejto:

Seme biloateneme Tlöcatzintle ca naja.

Amo niechtajcales tequepachule porque yejuatzi iloac ca nomöyecömpa para niechpaliebito.

²⁶ Por inu noyulo opajpöc,

hua ca nocamac onequejto de ini nönca nopajpöqueles.

Nuyejqque naja necpea meyac confiönsa hua nemöchealestle que nocuierpo yulebes.

²⁷ Porque tejuatzi amo tomocöbelis nöilma ma seme mocöhua ipa meclöncale,

nimpor amo tomocöbelis nocuierpo ma palöne, porque naja nemoConietzi hua neyectec.

²⁸ Oteniechmojtetele ojtle tli nectocas para necpeas nemelestle nochepa.

Teniechmomaquelis pöquelestle porque seme temetzmotztelejtas.

²⁹ 'Señores, nemiechelfis claramente que totajtzi David omec hua omotlöltucac. Hasta öxö oncönca imejcöcoyoc. ³⁰ Pos David oyeya tlayulepante hua quepoaya tietlajtultzi Deus. Oquemat que lo que tli Deus oquejtojqque que quechihuasque para David, Deus quecumplirusque de melöhuac. Pos Deus oquejtojqque ca juramento que yejuatzi

quixpejpenasque sente de ipelhua para tlamandörus quieme rey itequipa David. ³¹ Inu ocajocōmat David ca ye niepa. Oquejto noso de quiene Cristo yulebihuas, pos oquejto que Deus amo quecōhuasque tieōlma ipa meclōncale meyac tiempo. Nimpōr amo palōnes tiecuierpo. ³² Pos inu Cristo iloac bel yejuatzi Jesús. Deus otieyulebitiluc hua tejua tecate tetestigos de inu. ³³ Así es que Deus otiemacuc beletelestle para netlōlilus ca tiemōyecōntzi. Yecuōquenu toTajtzi Deus otiemacuc Jesús tieEspíritu Sōnto quiename ca ye niepa tieprometierfejqe. Öxō Jesús tiehualtitlanuc Espiritu Sōnto öque quechihualuteca nōnca tli nemejua nenquejta hua nenquecaque. ³⁴ Pos amo yaja David que otlejuc ca elfecac. Tlōcamo David oquejto ejqueyi:

Tlōcatzintle otieyelfe noTlōcatzi:

“Xomotlōle ca nomōyecōmpa

³⁵ hasta senamo ma nequemumiyōro moenemigos hasta itzintla mocxehua”.

³⁶ Nemejua onentiecōruspelojque Jesús. Pero xecyecmajtacō nemonochtie de Israel, que Deus ye otiemacuc miero yejuatzi Jesús beletelestle para que iloac Tlōcatzintle, hua iloac Cristo, öque Deus tieixpejpenque para iloas tlamōquextiōne.

³⁷ Cuōc inu giente oquecajqe inu, lalebes omoyulcōcojqe. Oquemelfeqe Piero hua ocseque tlateotitlanme:

—Tocnihua, ¿tli noso tecchihuasque?

³⁸ Pos Piero oquemelfe:

—Xomoyulcūepacō hua xomocuōtiequicō tietucōyupantzinco Jesucristo cara sesen tlōcatl de nemejua. Ejqueu Deus nemiechperdonōrfisque nemotlajtlacul hua nemiechtlōocolisque tieEspiritu Sōnto. ³⁹ Pos cuale nenqueselisque lo que tli Deus queprometierojque nemejua ca tiehua nemopelhua hua nochemejua tli bejca cate, innochie quiejquech Deus quennutzasque.

⁴⁰ Pos ca meyac ocseque tlajtule Piero oquennunutz hua quentlalfiōya. Oquejto:

—Xomomōquexticō de intzōlō nōncate tlōca yulpetzoteque.

⁴¹ Entunses omocuōtiequejqe noche giente tli oquenparesiero inu tlajtule. Pa niecaju tunale omaxiltejqe ca yejua oc yeye mil tlōca. ⁴² Inu creyentes oquesequirojqe momachtejqe ca inu tlateotitlanme. Oquepeaya gusto yesque intzōlō imicnihua. Sa secne otlacuōya hua motlajtlōtlajtiōya.

Primeros creyentes omotlasojtlaya meyac

⁴³ Noche giente tiemabejqe Deus. Hua Deus oquenpaliebejqe tietlateotitlanhua para que yejua oquechijque meyactie sieñas hua tietzōbeme. ⁴⁴ Noche quiejquech omoneltocaya, sa secne oyejyeya. Tli oquepejpeaya oquexiexelōjqe ca ocseque imicnihua. ⁴⁵ Oquenajnamacaya noche intlōlhua hua lo que tli oquepeaya. Entunses oquexiexelfiōya innochie san quiejquech oquenchibeliōya fōlta. ⁴⁶ Innochie ca sentetl inyulo omosentlōlejque mumustla ipan teopantle bieye. Otlacuōya chōntle por chōntle ca meyac pōquelestle hua yulsiebelestle. ⁴⁷ Otieyectieniejque Deus, hua noche giente oquentlōcayetaque yejua. Cara tunale omomeyaquelejque quiejquech Deus quenmōquextisque.

3

Opajtec sente tlōcatl cucuxojtzi

¹ Piero hua Xohuō otlejcoque ca teupa bieye quieme ca pa yeye ura ca ye yohuac ipa ura de oración. ² Seque giente seme quehualecaya sente tlōcatl tli cucuxojtzi desde que otlōcat. Mumustla oquetlōliōya ompa pa teopantle bieye itech queyōhuatiente tli mocuiea la Hermosa. Oquetlōliōya ompau para motlajitlanis ca tli cōcalactaya teupa. ³ Cuōc inu tlōcatl oquemejtac Piero hua Xohuō que ye calaquesque pan teopantle, omotlajitlane ca yejua. ⁴ Piero hua Xohuō oquetejteijtaque. Entunses oquejto Piero:

—Xetiechejta.

⁵ Yecuöquenu yaja quemetzta. Quechixtaya ma canajyetla quemacacö. ⁶ Pero Piero oquejto:

—Amo necpea plöta nimpör oro, pero lo que tli necpea temetzmaca. Tietucöyupantzinco Jesucristo de Nazaret xenejneme.

⁷ Yecuöquenu Piero ocasec ca imöyecmö hua oquequetz. Sa nima omoyectlölejque icxehua hua icöcayolhua. ⁸ Yecuöquenu omoquetztie. Omoquetz hua onejne. Ocalac ca yejua ipan teopantle. Ompa onejnemeya hua ajcotzecuineya. Otieyectieniehuaya Deus. ⁹ Noche giente oquejtaque que yaja nejnemeya hua otieyectieniehuaya Deus. ¹⁰ Oquixomatque inu tlöcatl que oyeya yaja öque motlajtlanejtaya ompa teupa itech inu queyöhuatiente itucö la Hermosa. Pos oquetietzöbejqe lalebes por lo que tli omochi ca yaja.

Piero oquennunutz giente pa corredur itucö Corredur de Salomón

¹¹ Inu tli oyeya cucuxojtzi moquejquitzquejtaya intech Piero hua Xohuö. Noche giente mosentlöliöya intlac yejua ipa corredur itucö Corredur de Salomón. Lalebes quetietzöbiöya. ¹² Cuöc Piero oquejtac que giente mosentlöliöya, oquemelfe:

—Señores de tonación Israel, ¿tlica nenquetietzöbea ini nönca? ¿Tlica nentiechetztecate tejua quieme tlö ca tobeleteles de tejua otecpajtejque nönca cucuxojtzi para ma nejneme? Noso ¿tlica nentiechetztecate quieme tlö por teyecteque otecpajtejque?

¹³ Abraham tietechihuaya Deus. Nuyejque Isaac hua Jacob hua noche totötajua tietechihuaya. Yejuatzi miero Deus de totötajua iloac öque quepajtejque nönca cucuxojtzi. Oquepajtejque para tiechajchamöhualuc Jesús öque iloac *tieTlatequepano. Pos nemejua nentietiemöctejque Jesús ca Pilöto hua nenquejtojque que amo nentienequeya cuöc Pilöto oquenec tiecäjcöhuas. ¹⁴ Pos nemejua nenquejtojque que amo nentienequeya Jesús öque yectec hua yulmelactec, cache nentlajtlanque ca Pilöto ma quecäjcöhua sente mequestiero ma quisa ca nemejua. ¹⁵ Pos nentiemectejque miero yejuatzi öque tiechnemitilo. Bel yejuatzi Jesús Deus tieyulebitiluc de intzölö mimejqe, hua tejua tecate tetestigos de inu. ¹⁶ Ini nönca tlöcatl oyeya cucuxojtzi. Nemejua nenquejta hua nenquixomate. Pos Deus oquepajtejque yaja, porque tejua toneltoca tietucöyupantzinco Jesús. Pos tiel por toneltoca tieca Jesús, yejuatzi queyecpajtejque nönca tlöcatl nemixpa nemejua.

¹⁷ Hua öxö, nocnihua, naja necmate que nentiemectejque Jesús porque amo nenque-majmatque tli nenquechihuaya. Nuyejque tlötlajtoönejme de nemejua amo quematque tli oquechijque. ¹⁸ Ca ye niepa Deus oquemelfejque por incamacopa tlayulepantejqe que tiepa tieCristo huölösqüiöya tiecoco tietunie. Hua öxö pa nönca tiempo de tejua Deus oquecumplirojqe tli antes oquejtojque. ¹⁹ Así es que xomoyulcuepacö hua xomocuepacö ca Deus para ma nemiechperdonörucö nemotlajtlacul. Yecuöquenu Deus cualtitlanesque tiempos de yulpöquelestle. ²⁰ Entunses Deus ocsajpa tiehualtitlanesque Cristo öque yejuatzi otieixpejpenque, es decir, tiehualtitlanesque yejuatzi Jesús. ²¹ Pos onca nesesidad que Jesús ompa iloas elfecac hasta senamo asequi tiempo cuöc noche söstantle ye ocarreglöröjqe Deus. Yejuatzi otlajtlajtojque de inu tiempo desde ca ye niepa por incamacopa tlayulepantejqe. ²² Pos Moisés oquemelfe totötajua: “Quieme Tlöcatzintle toDeus oniechtitlanque naja, nuyejque tiehualtitlanesque ocsente tlayulepante. Tieixpejpenasque de entre nemotzölö. Nenquecaquesque noche tli nemiechelfisque. ²³ Öque beletes tli amo quechihuas cöso de inu tlayulepante, Deus quepojpolusque de intzölö tiepelhua”.

²⁴ Noche tlayulepantejqe desde Samuel para ca necö, otiechyulepantejqe de nönca tiempo. ²⁵ Nemejua nencate nenimpelhua de inu niecate tlayulepantejqe.

* **3:13** Cuale nuyejque motradusirus: “tieTiehpuch”.

Nemiechtocöroa inu acuerdo tli Deus oquechijque ca totötajua. Deus oquelfejque Abraham: “Por medio de mopelhua nequenteochihuas giente de noche naciones”.²⁶ Deus tieyulebitiluc *tieTlatequepano. Tiehualtilanque ca nemejua cachto para que tieConietzi ma nemiechbendeseyumacacö. Oquechijque ejqueu para ma quisa cara sesen tlöcatl de ipa itlajtlacul.

4

Quenhualecaque Piero hua Xohuö pa junta

¹ Piero hua Xohuö oc tlajtlajtojta ya ca giente cuöc ajaseto teopexcötzetzi. Jefe de guardia de teopantle bieye hua inu grupo de joriojte itucö saduceos nuyejque ajaseto ompa. ² Innochie ocuajcualöneya porque Piero hua Xohuö quenmachtejtaya giente. Oquejtoque Piero hua Xohuö que yulebesque giente de intzölö mimejque porque Jesús oyulebihuac. ³ Entunses oquemaseque Piero hua Xohuö hua oquenzajtzajque para ma ompa yecö hasta pa mustlateca. Pos ye yohuac oyeya. ⁴ Pero meyactie de tli oquecajque tietlajtultzi Deus omoneltocaque. Tlö mopoasque sa tlöca, quieme cinco mil ye moneltocaya.

⁵ Pa mustlateca tlajtoönejme hua biebertzetzi de joriojte hua tlamachtioneme de teotlajtule omosentlölejque pa Jerusalén. ⁶ Nuyejque omosentlöle ca yejua tlajtojcöteopexque Anás, nuyejque Caifás, Xohuö hua Alejandro hua noche yejua quiene quemejta tlajtojcöteopexcötzetzi. ⁷ Quenhualecaque Piero hua Xohuö ca intzölö yejua hua quentlajtlanejque:

—¿Ca tli beletelestle, noso itucöyupa de öquenu nenquepajtejque inu tlöcatl cucuxojtzi?

⁸ Yecuöquenu Piero oquemelfe ca checöhualestle de Espíritu Sönto:

—Señores nentlötlajtoönejme. Señores nenbiebertzetzi, xomocaquiticö. ⁹ Öxö ye nentiechmotlajtlanelejque de nönca tlöcatl cucuxojtzi que ye opajtec. Nemotlajtlaneja quiene noso opajtec. ¹⁰ Nemejuantzetzti nentiemocoruspelfejque Jesucristo de puieblo de Nazaret, pero Deus tieyulebitiluc de intzölö mimejque. Xomomachitejtacö nemonochtientzetzi. Nuyejque ma quemajtacö noche tlöca de Israel. Pos nönca tlöcatl tli oncönca nemotzölöntzincö ye opajtec tietucöyupantzincö Jesucristo de Nazaret. ¹¹ Así es que nemejuantzetzti nemobetztecate quiename nenölbañilte. Jesús iloac quiename sente cuale tietetu. Inu tietetu tlin cuale nemejuantzetzti nemotlajcalelejque. Hua öxö inu tietetu ye hualmochi esquiniere de tepöntle. ¹² Pos nionöque ocsente cuale tiechmöquextis, porque amo onca ocsente tlöcatl tli Deus tiechmacaque para itech ma tomöquexticö.

¹³ Teopexcötzetzi oquejtaque que Piero hua Xohuö quepeaya meyac balur. Oquematque que amo bel tlaestudiörojque tlöcamo cate quieme cualquiera. Pos queti-etzöbejque. Cuöquenuju omomacaque cuienta que nele oyejyeya ca Jesús. ¹⁴ Quetzta ya que niecaju tlöcatl tli opajtec ijcataya ca Piero hua Xohuö. Por causa de inu tlöcatl tli opajtec abele tli oquejtoque cuntra Piero hua Xohuö. ¹⁵ Entunses yejua quennahatejque Piero hua Xohuö nele ma quisacö tepetzi de ipa inu junta. Cuöquenuju molfiöya entre yejua. ¹⁶ Oquejtoque:

—¿Tli tequenchibelisque nöncate tlöca? Melöhuac, sente tietzöbetl bieye ye oquechijque. Noche giente tli cate pa Jerusalén ye oquejtaque. Abele tequijyönasque. ¹⁷ Sin embargo, para amo cache mosoas ini tlajtule ca ocseque giente, ma tequenmajmajcömecticö Piero hua Xohuö para ma ayecmo tlanunutzacö de Jesús.

¹⁸ Entunses ocsajpa quenzajtzalejque Piero hua Xohuö ma calaquecö. Quennahatejque nele majcamo tlajtlajtucö nimpör majcamo tlamachesticö de Jesús. ¹⁹ Yecuöquenu Piero hua Xohuö onöhuatque:

—Xomonenebelejtzinucö tlö conbenierebe para ca Deus ma tetlaneltocacö ca nemejuantzetzti noso cache cuale ma tetieneltocacö Deus. ²⁰ Pero de todos modos abele tectzacuasque tocamac de lo que tli otequejtaque hua de lo que tli otejcayque.

²¹ Entunses inu tlötlajtoönejme quenmajmajcömetejque Piero hua Xohuö hua quencacjcojque ma yöcö. Abele queniextejque de tli manera quencastecörusque. Pos quenmabeliöya giente porque giente tiechajchamöjque Deus por tli yejua quechijque. ²² Niecaju tlöcatl tli opajtec oquepex cache de cuarenta años cuöc opajtec.

Inu creyentes tietlajtlanelejque Deus ma quenmacacö confönsa hua balur

²³ Cuöc ye oquencajcöjque Piero hua Xohuö, yejua ohuölajque intlac incompanieros. Quenpubelejque noche lo que tli jefes de teopexcötzetzi hua biebentzetzi de joriojte oquemelfejque. ²⁴ Cuöc oquecajque inu, innochie omotlajtlötlajtejque ca Deus. Oquejtojque:

—ToTiecojtzi Deus, tejuatzi tomochejchibele elfecac, tlöltecpactle, hua lamör, hua noche tli quepea. ²⁵ Por medio de Espíritu Sönto icamacopa de totöta David motlatequepanojtzi tomojtalfe ejqueyi:

¿Tlica otlabielchöchälönque giente?

¿Tlica quenenebelejtaya tlimach tli yejua abele quechihuasquea?

²⁶ Omosentlölejque reyes de noche tlöltecpactle.

Nuyejque tlötlajtoönejme omochijque quieme sasio tlöcatl cuntra Deus hua cuntra Cristo öque yejuatzi tieixpejpenque.

²⁷ 'Pos melöhuac Herodes hua Poncio Pilöto mosentlölejque pa nönca Jerusalén ca nieca giente tli amo joriojte hua ca togiente de Israel. Omosentlölejque cuntra Jesús *moTlatequepanojtzi yectec öque tetiemixpejpenele. ²⁸ Oquechijque lo que tli ca ye niepa tomozontequele que tomochibelis porque tomonequite ma ejqueu mochihua. ²⁹ Hua öxö, Tlöcatzintle, xomojtele quiene queneque tiechmajmajcömetisque. Xequenmopaliebele motlatequepanojcötzetzihua ma tlajtlajtucö de motlajtultzi ca meyac balur. ³⁰ Xomotequetelejta para ma pajtecö giente. Ma mochihua sieñas hua tietzobeme tietucöyupantzinco Jesús *moTlatequepanojtzi yectec.

³¹ Cuöc ye omotlajtlötlajtejque omouline cale cöne yejua otlamachyejyeya, quiename cuöc otlöoli. Innochie ocaseque checöhualestle de Espíritu Sönto. Entunses otlannutzque de tietlajtultzi Deus ca meyac balur.

Inu creyentes quexiexelojque lo que tli quepeaya ca ocseque creyentes

³² Nochemeju tli omoneltocaque sasio quemachelejque hua sasio quepensörojque. Nionöque amo oquejto que lo que tli quepeaya sa yaja ihuöxca tlöcamo quejtoöya que oyeya inhuöxca innochie. ³³ Tlateotitlanme oquesequirojque tlanunutzque quiene ca Tlöcatzintle Jesús oyulebihuac. Quepexque meyac beletelestle hua Deus quenpaliebejque lalebes. ³⁴ Amo omocö nionöque majcamo quepea de lo que tli quechibeliöya fölta. Noche tli quepeaya intlöl noso incalhua quennamacaque hua quehualercaque inu tomi. ³⁵ Inu tomi quemacaque tlateotitlanme, hua yejua quenxiexelfejque nochemeju tli quenhibeliöya fölta. ³⁶ Por ejemplo, oyeya intzölö yejua sente levita joreyo itucö Josie. Tlateotitlanme quecuitejque inu tlöcatl Bernabé, tli quejtusneque sente tlöcatl tli tlayulölea. Otlöcat pa sente tlöltojpole ipa lamör que itucö Chipre. ³⁷ Bernabé oquenamacac sente itlöl tli yaja quepeaya. Quehualercac inu tomi hua oquemacac tlateotitlanme.

5

Ananías hua Safira oistlacatque

* 4:27 Cuale nuyejque motradusirus: “moTielpuchtzi”.

¹ Sente tlöcatl itucö Ananías ca isohua Safira nuyejque oquenamacaque intlöl. ² Ananías oquejyö seque tomi hua seque oquetiemacato. Oquenmacato tlateotitlanme inu pörte de tomi quieme tlö oyene noche. Nuyejque isohua oquemat. ³ Oquejto Piero:

—Ananías, ¿tlica Satanás oquetlöle ipa moyulo para tistlacates ca Espíritu Sönto? ¿Tlica otequejyö seque tomi de quiejquech ca otecnamacac motlö? ⁴ Mientras tecpeaya motlö, ¿amo mohuöxca oyeya? ¿Hua cuöc otecnamacac, ¿amo mohuöxca inu tomi? ¿Tlica otepensöro tecchihuas ejqueu? Amo otistlacat sa ca tlöca tlöcamo otistlacat miero ca Deus.

⁵ Cuöc Ananías oquecac lo que tli Piero oquejto, ombetzeto hua omec. Pos omajcomejque noche tli oquematque de inu. ⁶ Entunses omoquetztiejque pelantotu hua oquetejcuexque icuierpo de inu tlöcatl. Quequextejque hua oquetlölpachuto.

⁷ Opanuc quieme yeye ura. Ocalac isohua. Amo oquemat tli oquepasöro inömec. ⁸ Yecuöquenu Piero oquelfe:

—Xeniechelfe. ¿Nenquenamacaque nemotlö por ini tönto?

Yaja oquejto:

—Pos por inu tönto.

⁹ Entunses Piero oquelfe:

—¿Tlica nemotlölejque de acuerdo para ejqueu nentieprobörojque Espíritu Sönto? Xequajta. Ompa bitze tli quetlölpachuto monömec. Öxö metzbicasque nuyejque taja.

¹⁰ Sa nima obetzeto icxetla Piero hua omec. Cuöc ocalajque inu pelantotu oqueniextito que ye omec sohuatl. Oquequextejque. Quetlölpachuto itlac inömec. ¹¹ Tiemabelejque Deus noche inu grupo de creyentes hua noche ocseque tli oquecajque de inu.

Omochi meyactie sieñas hua tietzöbeme

¹² Inu tlateotitlanme oquechijque meyactie sieñas hua tietzöbeme intzölö giente. Noche creyentes ca sentetl inyulo mosentlöliöya ipan Corredur de Salomón. ¹³ Ocseque giente amo quenequeya mosietelisque ca inu creyentes pero nuyejque quenyec-tienihuaya creyentes. ¹⁴ Noche tlöca hua sohuame tli omoneltocaque tieca Jesús memeyaqueliöya. ¹⁵ Pos giente quenquextiöya cocoxcötzetzi ca pa ojtle. Quentlöliöya ipa tlapechme hua ipa petlame para cuöc panus Piero siquiera ma pano itunal impa seque de yejua para ma pajtecö. ¹⁶ Nuyejque mosentlölejtöya meyac giente de puieblös tli cache ciera cate de Jerusalén. Quenhualcaya cocoxcötzetzi hua quiejquech quen-pasoloöya moxicoöneme. Nochemejua opajteque.

Giente quentepotztocaque tlateotitlanme

¹⁷ Entunses omajcojque tlajtojcoöteopexque hua noche icompanierojua de inu grupo de joriojte itucö saduceos, pos lalebes ochöhuatque. ¹⁸ Oquemaseque tlateotitlanme hua quentzajtzejque pan cörsel del puieblo. ¹⁹ Pero ca yohuale tieöngel Deus oquentlapolfe pobieltajte de cörsel hua oquenquexte tlateotitlanme. Oquejto:

²⁰ —Xeyöcö. Xecalaquecö ipa teopantle. Xequemelficö giente noche söstantle de nönca yancuec nemelestle.

²¹ Oquecajque tli oquejto. Entunses ocalajque ipa teopantle cuöc ye otlanies. Ompa tlamachtejtaya.

Tlajtojcoöteopexque hua tli oyejyeya ca yaja oquechijque junta. Oquesentlölejque inu grupo de tlöca tli cache bejfeye momajtaya hua noche biebtentzetzi de Israel ipa inu junta. Cuöquenuju otlatitlanque ipa cörsel para ma quenhualcacö tlateotitlanme.

²² Pero cuöc ompa oaseto guardias ipan cörsel amo oquenniextejque. Entunses omocuejque hua otlanhuatejque. ²³ Oquejtojque:

—Pos otecniextejque cörsel yectzacteca hua tli tlaixutea ompa ijcatecate itlac pobielta. Cuöc tetlajtlapojque amo öque tecniextejque ca tlajtec.

²⁴ Inu tlajtojcöteopexque hua inu jefe de guardia de teopantle hua teopexcötzetzi oquecajque tli oquejtojqque guardias. Quetietzöbejqque. Quejtojqque:

—¿Tli beles pasörebese ca noche ini nönca?

²⁵ Cuöquenuju oaseto sente tli quenmachestito:

—Xomojtelicö. Inu tlöca tli nenquenmotzajtzacuelejque ipan cörsel ompa cate teupa ahorita quenmachtejtecate giente.

²⁶ Entunsese jefe de guardia uya ca igiente. Oquenhualecaque tlateotitlanme sa ca cuale porque omomajtejqque que beles giente quentecaltisquiöya yejua. ²⁷ Cuöc yejua ye quenhualecaque tlateotitlanme, quenpresentörojque pa junta. Inu tlajtojcöteopexque oquemelfe tlateotitlanme, oquejto:

²⁸ —Tejua nemiechnahuatejqque ca checöhuac tlajtule para ayecmo xetlamachticö itucöyupa nieca tlöcatl Jesús. Hua öxö noche lo que tli nemejua nentlamachteya ye oquecajque noche giente ipa Jerusalén. Pos nenqueneque nentiechtlajtlajcultisque tejua nele otecmetejque inu tlöcatl Jesús.

²⁹ Onöhuatque Piero hua ocseque tlateotitlanme:

—Tejua tecpea que tetieneltocasque Deus antes que tequenneltocasque tlöca. ³⁰ Yejuatzí Deus de totötajua tieyulebitiluc Jesús öque nemejuantzetzí onentiemomectelejqque cuöc onentiemotömpelfejque ipan corujtzí. ³¹ Deus otiebieyetlöliluc Jesús cuöc otieyelfejque ma netlölilo ca tiemöyecömpa para iloas Tlajtoöne hua Tlamöquextiöne. Ejqueu Deus oquechijque para ma moyulcuepacö giente de Israel para que Jesús quenperdonörfisque intlajtlacul. ³² Pos tejua tecate tetestigos de noche ini. Nuyejque Espiritu Sönto iloac testigo. Deus otiechmacaque Espiritu Sönto tonochtie tli tetieneltoca.

³³ Pos tli oyejyeya pa junta lalebes ocuajcualönque cuöc oquecajqque inu. Oquenejnejqque quenmejmectisquea tlateotitlanme. ³⁴ Pero Gamaliel omoquetz. Gamaliel oyeya de inu grupo de joriojte itucö fariseos. Nuyejque oyeya tlamachtione hua maestro de inu ley de Moisés. Noche giente oquerespetöroöya yaja. Pos Gamaliel otlanahuate nele ma tepetzí quenquexticö ca queyöhuac niecate tlateotitlanme. ³⁵ Entunsese oquejto:

—Señores de tonación Israel, xomopilicö cueröro de lo que tli nemochibelisque ca nöncate tlöca. ³⁶ Xomolnömequiticö que amo quepea bejca tunale que omajcoc Teudas. Omobieyechi. Pos quieme nöbe cientos tlöca quetocaya. Por fin quemectejque hua noche tli quetocaya ochucholajque. Pos amo yetla oquechijque. ³⁷ Sötiepa de Teudas omajcoc Judas de estado de Galilea. Omajcoc miero cuöc omochi censo de giente, hua meyactie oquetocaque. Pero yaja nuyejque omec, hua nochemeju tli quetocaya ochucholajque. ³⁸ Hua öxö nemiechmolfelea, xequenmocöbelicö nöncate tlöca. Amo tli xequenmochibelelicö. Tlö quejtus que intlamachteles icaca de tlöca pos seguramente pojpolebeti. ³⁹ Pero tlö intlamachteles icaca de Deus, abele nemoxetunelisque tlöcamo nemochibelisque mal porque nentiemixnömequelisque Deus.

⁴⁰ Pos oquenparesiero lo que tli oquejto. Oquentzajtzelejque inu tlateotitlanme hua oquenbejbitejqque. Oquemelfejque ca checöhuac tlajtule nele majcamo tlanunutzacö de Jesús. Entunsese oquencajcöjqque. ⁴¹ Tlateotitlanme uyajque de ipa inu junta ca meyac pöquelestle. Opajpöjqque porque Deus oquenmacaque locör para oquesufrirojque tiecoco por tiepampa Jesús. ⁴² Pos yejua amo oquetzajque incamac tlöcamo mumustla otlamachtejqque. Otlanunutzque ipan teopantle bieye hua chöntle por chöntle que Jesús iloac inu Cristo öque Deus tieixpejqque.

6

Inu creyentes oquixpejqque checume tlöca para quentlacualtejqque giente

¹ Pa nieca tiempo cuöc momeyaqueliöya creyentes seque tli tlajtlajtoöya ca griego opejque omoquejöröjque. Omoquejöröjque cuntra joriojte tli tlajtlajtoöya ca hebreo. Oquejtojque que mumustla cuöc quentlacualtea giente, amo oquentlacualtejque cuale imicnususohuöhua. ² Entunses inu majtlactle huan ume tlateotitlanme oquensentlölejque creyentes. Oquemelfejque:

—Amo conbenierebe que tejua tejcöhuasque tietlajtultzi Deus para tequentlacualtisque tocnihua. ³ Hua öxö, tocnihua, xequemixpejpenacö checume tlöca de entre nemejua tli quepejpea innemeles melactec. Xequemixpejpenacö tli tlajmatque hua tli cache nejniese que yejuatzi Espiritu tlamandöruro ipa inyulo. Entunses tequencargörfisque yejua para ma quentlacualticö tocnihua. ⁴ Ejqueu tecsequirusque tejua totlajtlötlajtejasque hua tetlamachtejasque de tietlajtultzi Deus.

⁵ Pos oquenparesiero lo que tli oquejtojque tlateotitlanme. Oquixpejpenque Esteban porque lalebes moneltocaya hua omacheac que Espiritu Sönto tlamandörurutebitz ipa iyulo. Nuyejque oquemixpejpenque Felipe, Prócoro, Nicanor, Timón, Parmenas hua Nicolös. Pos inu Nicolös oyeya de puieblo de Antioquía. Mös amo joreyo pero ye ocalac ipa religión de joriojte. ⁶ Oquebicaque nöncate checume intlac tlateotitlanme. Omotlajtlötlajtejque tlateotitlanme hua impa inu checume oquentlölejque inmöhua.

⁷ Tietlajtultzi Deus ohualmosu cache hua cache. Inu creyentes tli oyejyeya ompa Jerusalén omomeyaquelejque bel meyac. Meyactie teopexcötzetzi moneltocaque tieca Cristo.

Biebentzetzi de joriojte ocaseque Esteban

⁸ Deus oquemacaque Esteban bieye tiefavur, pos quemacaque beletelestle para quechihuas sieñas hua tietzöbeme bejbeye intzölö giente. ⁹ Omajcojque giente de sente teopantle itucö Teopantle de los Libertados. Yejua oyejyeya de puieblos de Cirene hua Alejandría hua de tlöle de Cilicia hua Asia. Inu giente omixcomacaque ca Esteban. ¹⁰ Cache abele oquexexicojque Esteban porque Espiritu Sönto oquepaliebejque tlajtlajtus hua oquemacaque machelestle quiene ca quennönquelis. ¹¹ Entunses oquentlajtulmacaque seque giente ma ejistlacatecö. Inu tlöca oquejtojque:

—Tejua otejcajque Esteban que checuatlajto cuntra Moisés hua cuntra Deus.

¹² Pos ejqueu ocuolinejque giente hua biebertzetzi de joriojte hua tlamachtioneme de teotlajtule. Ipa Esteban omomeröjque hua ocaseque. Oquebicaque ipa junta. ¹³ Oquentlölejque seque istlacatque tli quejtojque:

—Ini nönca tlöcatl amo quequetza icamac para quejtojtas checuayutl cuntra ini nönca locör sönto hua cuntra inu ley. ¹⁴ Pos otejcajque que oquejto que inu Jesús de Nazaret quexetunis ini locör hua quepatlas noche costumbres tli Moisés tiehcöbelejtie.

¹⁵ Entunses noche tli ompa oyejyeya pa junta oquetztaya Esteban. Oquejtaque que ixöyac oyeya quiename ixöyac de sente öngel.

7

Giente oquemectejque Esteban

¹ Entunses tlajtojco teopexque oquejto:

—¿Ejqueu icaca?

² Esteban oquejto:

—Señores tli nennocnihua hua nentötajme de Israel, xeniechmocaquiticö. Deus öque lalebes quepealo tlanixtelestle ca ye niepa otlajtlajtuluc ca totajtzi Abraham. Neniex-tiluc ca yaja cuöc oc chönteya pa tlöle de Mesopotamia antes que uya para mochöntito pa puieblo de Harán. ³ Deus oquelfejque: “Xequisa de ipa motlöl. Xequencöhua moparientes. Xebeya hasta nieca tlöle tli temetzejtetis”. ⁴ Entunses Abraham oquis de inu tlöle de Caldea. Uya para chönte hasta puieblo de Harán. Pa quiesque tiempo itajtzi omec. Entunses Deus oquehualecaque Abraham hasta pa nönca totlöl cöne

nemejuantzetz nemochajchöntelea öxö. ⁵ Deus amo oquemacaque Abraham niontle de nönca tlöle. Nion tepetzi siquiera para cuale quejtus que de melöhuac ihuöxca. Pero melöhuac oqueprometierfejque Abraham que quemacasque nönca tlöle para ihuöxca iyés. Oqueprometierfejque nuyejque que sötiepa de que ye omec, nönca tlöle mocöhuas para ipelhua. Cuöc oqueprometierfejque ini nönca, nimpör ayemo quepeaya Abraham nion sente iconie. ⁶ Deus oquejtojque que ipejpelhua Abraham chajchöntesque ipa oc-sente nación. Chajchöntesque ipa sente tlöle tli amo inhuöxca. Ompa yesque esclavos de niecate gientes porque yejua tlamandörusque impa. Niecate gientes quenmaltratörusque ipejpelhua Abraham por cuatro cientos años. ⁷ Nuyejque oquelfejque ejqueyi: “Nejcun-tenörus inu nación tli tlamandörus ipa mopelhua hua quenpeas quieme esclavos. Sötiepa mopelhua quisasque de ompa hua niechtequepanusque naja ipa nönca locör”. ⁸ Deus oquechijque sente acuerdo ca Abraham hua oquemacaque Abraham tocostumbre de nacayutlatequelestle, para ma quechihua Abraham quieme sieñas de que quepeaya sente acuerdo ca Deus. Por inu cuöc otlöcat iconie itucö Isaac, Abraham oquenacayutec. Cuöquenuju Isaac quepeaya quemach checume tunale. Ejqueu nuyejque oquechi Isaac ca iconie itucö Jacob, hua Jacob ca ipejpelhua. Pos ipejpelhua Jacob oyejyeya tötajte de noche doce tribus noso grupos de Israel.

⁹ Niecate totötajua, es decir, ipejpelhua Jacob, omoxicojque de imicni itucö Josie. Oquenamacaque Josie ca ocseque giente ma quebicacö ca nación de Egipto. Pero Deus iloaya ca Josie. ¹⁰ Oquequextejque de ipa noche tiecoco tietunie. Deus oquemacaque Josie machestelestle hua oquepaliebejque para oquepex favur ca Faraón, rey de Egipto. Inu rey Faraón oquetlöle Josie para cubernadur de Egipto hua nuyejque para cubernadur de ical de inu rey.

¹¹ Entunses omochi öpestle hua meyac tiecoco tietunie ompa pa Egipto hua pa tlöle de Canaán. Pos totötajua amo oquepexque tli quecuösque. ¹² Pero cuöc oquemat Jacob que giente quepeaya tli quecuösque ompa pa Egipto, oquentitla ipelhua noso totötajua ca ompa. Ejqueu ca sajpa oquentitla. ¹³ Ca ujpa Josie oquixomatque icnihua. Hua ca inu Faraón oquemat de tli giente oyeya Josie. ¹⁴ Entunses Josie otlatitla ma quehualcacö itajtzi Jacob ca noche igiente. Nele igiente oyejyeya setenta y cinco ca meyactie cuöquenuju. ¹⁵ De inu manera Jacob omochöntito pa Egipto. Ompa omec. Nuyejque totötajua ompa omejmejque. Oquenbicaque incuierpo hasta puieblo de Siquem. ¹⁶ Oquentlölpachojque incuierpo ijtec imejcöcoyoc de Abraham. Abraham omocube inu mejcöcoyocle de ipelhua Hamor ompa pa Siquem.

¹⁷ Cuöc ye miero mochihuasquea lo que tli Deus oqueprometierfejque Abraham, tonación de Israel ompa pa Egipto momeyaqueliöya cache hua cache. ¹⁸ Pero sötiepa ocalac oc-sente rey ompa pa Egipto hua inu rey amo quixomat Josie. ¹⁹ Inu rey oquenajcayö totötajua. Inu giente de Egipto quenmaltratöröjque porque san tequetl que otlajtlöcatque inpelhua, inu rey oquenchihualte ma quecajchöhuacö inpelhua ca sie löro insiel para ma mejmequecö. ²⁰ Cuöquenuju otlöcat Moisés. *Hua oyeya lalebes cuöcualtzi peltzintle. Por yeye mietztle itötajua oquebepöjque pa inchö. ²¹ Pero por fin oquepexque para quecajchöhuasque ca sie löro. Cuöquenuju ichpuch de inu rey Faraón oqueniextito hua oquebepö Moisés quieme tlö iconie. ²² Ejqueu omomachte Moisés de noche lo que tli oquematque niecate gientes de Egipto. Lalebes tlajmatque oyeya Moisés para tlajtlajtus hua para tequetes.

²³ Cuöc quepeaya cöso cuarenta años oquepensöro quentlajpalus igiente de Israel. ²⁴ Ompa oquejtac que sente egipcio oquemaltratöröjtaya sente tlöcatl de Israel. Moisés omoquetzato ihua inu israelita hua oquepaliebe. Pos Moisés oquemecte inu egipcio. ²⁵ Moisés oquemecte porque oquepensöro que icnihua de Israel ye ocasojcömatque que

* **7:20** Cuale nuyejque motradusirus: “Deus lalebes quecualjetaque”.

Deus cusöorusque Moisés para quenmöquextis de ipa Egipto. Pero la cosa es que israelitas amo ocaojcömatque ejqueu. ²⁶ Ipa mustlateca Moisés quenniextito unte israelitas tli momacataya. Oquenec quenyulsiebis. Oquemelfe: “Señores, nemejua nenicnijte nencate. ¿Tli para nemomacatecate?” ²⁷ Entunes niecaju tli cachtu oquemacac inu ocsente oquemöpie Moisés. Oquelfe: “¿Öquenu metztlöle taja para tetlajtoöne noso tejuez topa tejuja? ²⁸ ¿Tecneque taja teniechmectis nuyejque quieme otecmete inu egipcio iyöla?” ²⁹ Cuöc Moisés oquecac inu, ocholo. Uya ca pan tlöle de Madián. Ompa chönteya quiename sente nejnenque, hua ompa oquepex unte ipelhua.

³⁰ Sie tunale cuöc ye opanuc cuarenta años, Moisés oyeya cöne nionöque chönte. Oyeya itlac sente tepietl itucö Sinaí. Xutlataya sente tebetztle ompau, hua ijtec inu tletzintle ohualneniextiluc sente öngel. ³¹ Moisés oquetietzöbe cuöc oquetztequis noche inu. Pos omopacho itlac para cache cuale quejtas. Cuöquenuju oquecac que Tlöcatzintle oquelfejque ejqueyi: ³² “Naja neDeus, öque motötajua niechteochijque. Naja neca neDeus de Abraham, hua de Isaac, hua de Jacob”. Entunes Moisés obebeyocac por lalebes omajcömec. Ayecmo oquenec quejtas inu tebetztle. ³³ Entunes Deus oquelfejque: “Xequenquexte mocacua porque taja nixtla tecaca hua naja neyectec necaca. ³⁴ Naja nequetztebitz tiecoco tietunie tli mochihua pa nogiente ompa pa Egipto. Nejcactebitz quiene ca yejua yejyelsebe. Onehuöla noso para nequenquextis de ipa inu tiecoco. Xequajta. Öxö temetztitlanes ompa pa Egipto”.

³⁵ Pos totötajua amo quetlöcayejtaque Moisés, cache oquelfejque: “¿Öquenu metztlöle quieme tetlajtoöne noso tejuez?” Pero Deus oquetitlanque miero yaja Moisés quieme tlajtoöne hua tlamöquextiöne. Oquetitlanque cuöc neniextiluc inu öngel ica Moisés itech inu tebetztle tli xutlataya. ³⁶ Pos miero yaja Moisés oquenquexte totötajua de ipa Egipto. Miero yaja Moisés oquechi sieñas hua tietzöbeme pa inu tlöle de Egipto hua ipa Lamör Chichiltec hua nuyejque por cuarenta años pa inu bieye locör cöne nionöque chönte. ³⁷ Pos sie yaja Moisés oquemelfe niecate israelitas: “Quieme Deus oniechhualtitlanque naja ca nemejua, ejqueu Deus tiehualtitlanesque ca nemejua ocsente tlayulepante tli tlajtlajtusque de tiepörte. Inu tlayulepante Deus tieixpejpenasque de nemotzölö nemejua. Xetieyecaquécö”. ³⁸ Cuöc otlajtlamachyejyeya israelitas pa nieca locör cöne nionöque chönte, miero yaja Moisés otlajtlajto ca inu öngel tli quennunutzaya pa nieca tepietl de Sinaí, hua tli nuyejque otlajtlajto ca totötajua. Miero yaja Moisés ucö tlajtule tli quietimaca nemelestle. Ucö inu tlajtule para tiechelfis tejuja.

³⁹ Pero totötajua amo oquenejque queneltocasque Moisés, tlöcamo quetlajyelejtaque. Ipa inyulo oquenejque mocuepasque ca Egipto. ⁴⁰ Entunes oquelfejque Aarón: “Tejuja tecneque tomochejchibelis deuste para ma tiechyecönacö. Pos inu nieca Moisés otiechquexte de ipa Egipto cache tejuja amo tecmate tli opasöre ca yaja”. ⁴¹ Entunes oquechejchijque sente pesiero. Quenmejmectejque yulcöme para oquebentlölelejque inu ixniehualo. Oquenpöquelesmacac lo que tli oquechejchijque ca inmöhua. ⁴² Entunes Deus onenencuaxeluluc de yejua. Oquencöjque ma quenteochihuacö sitlalte de elfecac. Pos ejqueu tlajcuelulpanca pa libros de inu tlayulepantejque cöne Deus oquejtojque:

O giente de Israel,

nenyajtenemeya por cuarenta años pa nieca locör cöne nionöque chönte.

¿Beles onenquemejmectejque yulcöme para onenniechtlölelejque naja bentle cuöquenuju?

⁴³ Pos amo. Ca rabies onenquechijque.

Onenquebicaque ca nemejua inu teocale de nemodeus Moloc.

Onenquebicaque inu sitlale de nemodeus Renfán.

Inu nemoixniehualojua onenquechejchijque nemejua para onenquenteochijque.

Por inu naja nemiechquextis de ipa nemotlöl para nemiechbicas cache bejca que inu nieca nación de Babilonia.

⁴⁴ Pa nieca locör cöne nionöque chönte totötajua quebejbicatenemeya inu teocale cöne oquemalfejqe teme tli intech oejcuelojtaya inu mandamientos de Deus. Inu teocale Moisés oquechejchi confurme inu plan tli Deus oquejtetejqe cuöc oquelfejque ma quechejihua. ⁴⁵ Inu teocale hualpanutöya de seque tlöca ca ocseque hasta totötajua ohuölajque ca tiehua Josué. Oquehualecaque inu teocale pa nönca tlöle. Pos totötajua oquencuejcuelejque nönca tlöle ocseque naciones porque Deus oquenpaliebiluc oquenuextejque inu gientes para tiechmacasque tejua nönca tlöle. Así es que totötajua oquepexque inu teocale hasta ipa tiempo de David. ⁴⁶ Pos David oquepex favur ca Deus. Oquenec quechihuas sente teopantle bieye para ipelhua Jacob. ⁴⁷ Pero amo yaja David oquechejchi, tlöcamo Salomón oquechejchi inu teopantle bieye para Deus. ⁴⁸ Pos Salomón oquechejchi inu teopantle mös Deus amo nemoa miero pa teopanme tli tejua tecchejihua ca tomö. Icamacopa sente tlayulepante Deus oquejtojque:

⁴⁹ Elfecac icaca notrono,
hua pan tlöltecpactle nequentlölea nocxehua.

¿Cötlaja cale noso nenniechchejchibelisque?

¿Cöne noso cuale nechöntes hua nosiebis?

⁵⁰ ¿Quie amo onecchejchi noche inu ca nomö?

⁵¹ Oquejto Esteban:

—Nemejua siempre nenyultepitzteque. Nenquepea nemoyulo quieme tlö amo nenyene nengiente de Deus. Amo nenquepea inu nacayutlatequelestle tli ipa öque iyulo. Amo nenqueneque nenquecaquesque tli Deus nemiechelfilo. Seme nentiecuaajnömeque Espiritu Sönto. Nemotötajua ejqueu quechijtebitze, hua ejqueu nuyejqe nenquechihua nemejua. ⁵² ¿Cuale nenquetieniehuasque mös sente tlayulepante tli amo quetepotztocaque nemotötajua? Pos nemotötajua quenmejmectejque niecate tlayulepantejqe tli ca ye niepa oquejtojque que sie tunale axihuaqui yejuatzi öque yectec. Pos quemach onaxihuaco hua nemejua onentiemöctejque ca ocseque tlöca hua nentiemectejque. ⁵³ Nemejua nencönque inu ley de Deus tli onemiechnahuatejqe öngeles, pero amo nenquechihua tli quejtoa.

⁵⁴ Cuöc inu giente oquecajqe inu, lalebes ocuajcualönque cuntra Esteban, hua hasta motlajtlantesque. ⁵⁵ Pero iyulo Esteban otie de Espiritu Sönto. Cuöc oajcopatlachix ca elfecac, oquejtac tietlaniexteles Deus. Otieyjtac Jesús ijcatihuateca ca tiemöyecömpa Deus. ⁵⁶ Entunses oquejto:

—Nequejta elfecac tlapojteca. Xequajtacö, netieyjtca Jesús öque nechihualuc tlöcatl ijcatihuateca ca tiemöyecömpa Deus.

⁵⁷ Pero inu giente oquetlapachojque intlacaqueles para amo oquecajqe hua bel checöhuac otzajtzejteque. Omomeröjqe ipa Esteban. ⁵⁸ Oquequextejque Esteban de ipa puieblo hua oquetecaltejque. Tli oquetecaltejque hua tlatestificörojque cuntra yaja oquetlölejque intzotzomajua icxetla sente peltuntle itucö Saulo. ⁵⁹ Mientras quetecaltea, Esteban omotlajtlötlajte. Oquejto:

—Tlöcatzintle Jesús, xomönele noölma.

⁶⁰ Cuöquenuju motlancuöquetz hua oquejto checöhuac:

—Tlöcatzintle, amo xomotlölele ipa cuienta nönca tlajtlacule tli quechijtecate.

Cuöc ye oquejto inu, omec.

8

Saulo quentepotztocac creyentes

¹ Saulo oquecualejtac que oquemectejque Esteban. Ipa inu tunale giente quentepotztocaque inu grupo de creyentes tli oyejyeya pa Jerusalén. Inu creyentes moxiexelöjqe

ca estado de Judea hua ca estado de Samaria. Solamente tlateotitlanme amo moxiexelojque. ² Tlōca tli moneltocaneme quetlōlpachuto icuierpo de Esteban. Ochucaque lalebes por yaja. ³ Saulo oquesequiro quentepotztocac creyentes. Calaqueto chōntle por chōntle. Quentlōlochpōnaya tlōca hua sohuame. Oquentzajtzac ipan cōrsel.

Inu creyentes tlanunutzque de Jesucristo pa estado de Samaria

⁴ Inu creyentes tli moxiexelojque quennunutzque giente ca nobeyo de inu tlajtule de cuale tlamachestelestle. ⁵ Entunses Felipe uya hasta sente puieblo de estado de Samaria. Oquennunutz giente de yejuatzi ōque iloac Cristo. ⁶ Mosentlōlejque meyac giente. Oquecajque ca meyac gōnas lo que tli oquejto Felipe. Quejtaque inu sieñas de tietzōbetl tli oquechi Felipe. ⁷ Opajteque meyactie giente tli imijtecopa quepeaya moxicoōneme. Pos moxicoōneme otzajtzeque lalebes hua oquisque de imijtecopa yejua. Opajteque meyactie tli incuierpo cuajcuajpetzajque hua meyactie cojcultzetzi. ⁸ Así es que pa inu puieblo lalebes pajpōqueya giente.

⁹ Pero ompa oyeya sente tlōcatl itucō Semu. Quechihuaya sōsantle de magia pa nieca puieblo. Por inu lalebes quetietzōbejtaya inu giente de estado de Samaria. Lalebes bieye omomat ca inu giente. ¹⁰ Nochemeju giente, desde giente humilde hasta tli bejbeye, oqueneltocaque inu Semu. Oquejtojque:

—Deus oquemacaque tiebeleteles tli bieye ca nōnca tlōcatl.

¹¹ Pos oquechibelejque cōso inu Semu porque por meyac tiempo oquehualencajcayōjtōya ca sōsantle de magia. ¹² Pero cuōc oquecajque inu cuale tlamachestelestle tli Felipe oquennunutz pos monejneltocaque. Felipe quemelfe quiene ca Deus tlamandōruro hua quemelfe de Jesucristo. Omocuōtiequejque tlōca hua sohuame. ¹³ Sie yaja Semu moneltocac hua omocuōtieque. Opie yajtenemeya ca Felipe. Oquetietzōbejtac Semu porque Felipe quechihuaya tlachihuale de sieñas hua tietzōbetl bejbeye.

¹⁴ Pa Jerusalén oyejyeya tlateotitlanme. Quecajque que giente de estado de Samaria oqueselejque tietlajtultzi Deus. Entunses quentitlanque Piero hua Xohuō hasta ompau. ¹⁵ Piero hua Xohuō ajaseto ompa. Motlajtlōtlajtejque que pa inyulo de inu creyentes ma axihuaque Espiritu Sōnto. ¹⁶ Pos ayemo hualaxihuaya pa iyulo de nionōque, tlōcamo sa omocuōtiequejque tietucōyupantzinco Tlōcatzintle Jesús. ¹⁷ Entunses Piero hua Xohuō oquentlōlejque inmōhua impa yejua hua ca inu ocalacoac Espiritu Sōnto ipa inyulo.

¹⁸ Semu oquejtac que cuōc tlateotitlanme oquentlōlejque inmōhua impa inu creyentes ocalacoac Espiritu ipa inyulo. Semu quencuetlabilte tlateotitlanme tomi. ¹⁹ Oquejto:

—Xeniechmomaquelicō naja nuyejque inu beletelestle para que cuōc naja nequentlōlis nomōhua ipa canajyeca ma calacoa Espiritu Sōnto pa iyulo.

²⁰ Entunses Piero oquelfe:

—Ma pojpolebe motomi ca tiehua taja porque taja tecpensōroa que lo que tli Deus tiechmacalō mocha ca tomi. ²¹ Taja amo tecpea pōrte nimpōr deriecho para tecalaques pa nōnca tequetl de Deus porque moyulo amo melactec tieixtla Deus. ²² Xomoyulcuepa noso de motlajtlacul hua xomotlajtlōtlajte ca Deus abier tlō metzperdonōrfisque tli tecpensōroa pa moyulo. ²³ Pos temetzejta taja lalebes teyulchehec. Quieme cuōc ōque tzajtzacteca pa cōrsel abele quisa, ejqueu abele tequisa taja de ipa motlajtlacul.

²⁴ Entunses Semu onōhuat:

—Xomotlajtlōtlajtejtzinucō por naja majcamo tli niechpasōro de lo que tli nenniechmolfelejtecate.

²⁵ Ompa pa inu puieblo Piero hua Xohuō tlamelōjcōpujque de tietlajtultzi Tlōcatzintle hua quennunutzque giente. Sōtiepa de inu, tlanunutzque de cuale tlamachestelestle ipa meyac puieblos de estado de Samaria. Entunses omocuejque ca Jerusalén.

Felipe oquenunutz sente tlōcatl de tlōle de Etiopía

²⁶ Sente ōngel de Deus oquelfe Felipe:

—Xebeya ca tlatzintla. Xectoca ojtle tli iya de Jerusalén para ca puieblo de Gaza.

Inu ojtle pano pa sente locör cöne nionöque chönte. ²⁷ Entunses uya. Ipa oaseto sente tlöcatl de sente tlöle itucö Etiopía. Inu tlöcatl oyeya sente tlajtoöne hua tesoriero de Etiopía cöne Candace oyeya reina. Inu tlöcatl hualiehuaya de Jerusalén cöne tietechihuato Deus. ²⁸ Öxö mocuectaya para ca ichö. Yajtebitz ipa icörrojconie de unte caretotu tli queteröntöya caböyojte. Inu tlöcatl cualtlajtultejtöya libro tli oquejcuelo inu tlayulepante Isaías. ²⁹ Entunses Espiritu Sönto oquelfeque Felipe:

—Xomopachute itlac hua xectocate inu carrojconetzi.

³⁰ Hua Felipe omomerö para omopachuto. Entunses oquecac que inu tlöcatl quetlajtultejtaya inu libro de Isaías. Quetlajtlane:

—¿Tecasojcömate tli tectlajtultea?

³¹ Inu tlöcatl oquejto:

—¿Quiene necasojcömates tlö amo necpea öque niechesplicörus?

Entunses oquenec ma Felipe ma tlejco hua ma motlöle itlac yaja.

³² Inu tlöcatl de Etiopía quetlajtultejtaya teotlajtule cöne quejtoa:

Quienname öque quebica sente calnielo para quemectis

ejqueu giente quebicaya sente tlöcatl para quemectisque.

Quieme sente calnielo amo tzajtze cuöc öque quepejpe itojmeyo,

ejqueu nuyejque amo tli oquejto inu tlöcatl cuöc oquemectejque.

³³ Oquetratörojque quienname sente tlöcatl amo cualtec.

Quemectejque sin arasu.

¿Quiene ca quenpeas ipelhua tlö antes que quenpeas ye oquemectejque?

³⁴ Inu tlajtoöne de Etiopía quetlajtlane Felipe:

—Xeniechelfe, por favur. ¿De öquenu quejtoa ini nönca? ¿Tlajtlajtoa inu tlayulepante Isaías de sie yaja noso de ocsente?

³⁵ Entunses itech inu pörte de teotlajtule Felipe opie oquenunutz inu tlöcatl de cuale tlamachestelestle de Jesús. ³⁶⁻³⁷ Pos monunutztebe pa ojtle hasta oaseto pa sie locör cöne oyeya ötzintle. Oquejto inu tlöcatl de Etiopía:

—Oncönca ötzintle. ¿Abele naja nocuötiequis?

³⁸ Oquenahuate itlatequepano ma quequetza carrojconetzi. Entunses inu tlöcatl de Etiopía hua Felipe otemuque hua uyajque inehua cöne ötzintle. Felipe oquecuötieque inu tlöcatl de Etiopía. ³⁹ Cuöc oquisque de ijtec ötzintle, tieEspiritu Tlöcatzintle sa de repiente quecuenejtequisque Felipe de ompau. Inu tlajtoöne ayecmo oquejtac Felipe tlöcamo quetocac iojfe ca meyac pöquelestle. ⁴⁰ Felipe onies pa puieblo de Azoto. Desde ompau puieblo por puieblo tlanunutztenemeya de cuale tlamachestelestle hasta oaseto ipa puieblo de Cesarea.

9

Saulo omoyulcuec

¹ Turavea Saulo lalebes checöhuac cualöneya cuntra inu creyentes tli tietocaya Tlocatzintle. Hasta quenequisquea ye oquenpojpölo. Yaja ica uya oquejtato tlajtojcöteopexque.

² Oquetlajtlanele ma quemaca ömatl para iyös pa teopame de sente ciudad itucö Damasco. Oquenec quemases noche tlöca ca tiehua sohuame tli tietocaya tieojfe Deus. Quenhualecasquea ca Jerusalén quieme priesoste. ³ Oyöya Saulo pa ojtle. Amo bejca oyeya de inu ciudad de Damasco cuöc sa de repiente otlaniextejtequis ipa yaja sente tlanixtle de elfecac. ⁴ Cuöquenu ombetzeto. Entunses oquecac öquenu quelfiöya:

—Saulo, Saulo. ¿Tlica teniechtepotztocateneme?

⁵ Entunses Saulo otlajtla:

—¿Öquenu tejuatzi?

Yejuatzi oquelfejque:

—Pos naja ne Jesús. Taja miero teniechtepotztocateneme naja cuöc tequentepotztoca tli niechtoca. ⁶ Xemiehua hua xebeya pa puieblo. Ompa metzelfisque tli tecchihuas.

⁷ Niecate tlöca icompanierojua Saulo omajmajcömejque lalebes porque oquecajque öquenu tlajtlajtoa pero amo öque oquejtaque. ⁸ Sa nima Saulo omajcoc de cöne betztaya. Cuöc oquentlapo ixtelolujua abele otlachix. Entunses icompanierojua caseque ca imö hua quebicaque pa inu ciudad de Damasco. ⁹ Ompa oyeya yeye tunale sin abele tlacheas. Amo tli oconic nimpor amo otlacua.

¹⁰ Ompa pa Damasco chönteya sente creyente itucö Ananías. Tlöcatzintle netieyejtetiluc ca yaja hua oquelfejque:

—Ananías.

Hua Ananías onöhuat:

—Nö neca, noTlöcatzintle.

¹¹ Entunses Tlöcatzintle oquelfejque:

—Xebeya sa nima hasta pa inu cayaju itucö Melactec. Ompa pa ichö de sente tlöcatl itucö Judas xetlajtlane por sente tlöcatl itucö Saulo. Yaja icaca de puieblo de Tarso. Motlajtlötlajteteca. ¹² Pos quiename ipa cochiemequelestle metzetzteca taja, Ananías, que taja tecalaque ipa ichö hua tequentlölea momöhua ipa yaja para ma tlachea ocsajpa.

¹³ Entunses Ananías oquejto:

—Tlöcatzintle, meyactie ye oniechpubelejque de inu tlöcatl Saulo. Nele quenchiebele tli-mach tlin yecteque tli nejneme pa Jerusalén. ¹⁴ Hua öxö onhuöla ca necö para tiechases tonochtie tli temetzmotlötlajtelelea. Pos inu jefes de teopexcötzetzi oquemacaque beletelestle para tiechbicas quieme tepriesoste.

¹⁵ Pero Tlöcatzintle oquelfejque:

—Xebeya, porque onequixpejpe inu tlöcatl Saulo. Tlanunutzas de naja ca giente de ocseque naciones hua ca reyes. Nuyejque quennunutzas giente de Israel. ¹⁶ Naja necmachestis inu Saulo quiene ca quepea quesufirus por causa de naja.

¹⁷ Entunses Ananías uya ipan chöntle cöne Saulo oyeya. Ocalac hua quentlöle imöhua ipa Saulo. Oquejto:

—Nocni Saulo, Tlöcatzintle Jesús oneniexstiluc ca taja pa ojtle cöne tehuölöya. Yejuatzi oniechhualtitlanque para cuale tetlacheas ocsajpa, hua para ma tieme moyulo ca Espíritu Sönto.

¹⁸ Cuöquenuju quiename tlö obetz de itech ixtelolujua canajyetla sana imiemieleyo meche. Entunses ye cuale otlachix ocsajpa. Saulo omoquetz hua mocuötieque. ¹⁹ Sötiepa otlacua hua ocasac fuiersa ocsajpa. Entunses ompa omocö quiesquete tunale ca niecate creyentes tli chajchönteya pa Damasco.

Saulo oquennunutz giente de Jesucristo pa Damasco

²⁰ Sa nima opie Saulo otlanunutz pa teopancucone. Quemelfe giente que Cristo iloac tieConietzi Deus. ²¹ Innochie tli quecactaya quietetzöbejtaya lalebes. Quejtojque:

—¿Amo yaja nönca tlöcatl tli pa Jerusalén oquenpojpolo tli motlajtlötlajtea ca inu Jesús? ¿Amo ipampaji nuyejque ohuöla necö para quenbicas priesoste hasta Jerusalén hua ompa quentiemöctis ca jefes de teopexcötzetzi?

²² Pero Saulo tlanunutzaya cache ca meyac balur. Oquencamatzac inu joriojte tli chajchönteya pa Damasco. Ca tietlajtultzi Deus oquemejtete que Jesús iloac Cristo öque Deus otieixpejpenque para tlamöquextiöne.

Saulo ocholo de intzölö joriojte

²³ Cuöc ye opanuc meyac tiempo, joriojte ocarreglörojque para quemectisque Saulo. ²⁴ Pero Saulo oquemat de inu. Yohualen tunale joriojte quechixtaya Saulo ca calquisyo

para quemectisque. ²⁵ Cache imachtejcohua quecalaquejque Saulo ijtec sente pes-cunchequebetl. Quetemubejque ca yohuale desde sente bentöna pa inu tepöntle tli queyehualojtaya inu ciudad de Damasco. De inu manera ocholo Saulo.

Saulo uya ca ciudad de Jerusalén

²⁶ Cuöc Saulo oaseto pa Jerusalén oquenec mosentlölis ca inu creyentes. Innochie omajcömejque porque oquepensörojque que Saulo amo de melöhuac creyente oyeya. ²⁷ Sin embargo, Bernabé oquebicac Saulo oquepresentöruto ca tlateotitlanme. Oquen-pubele quiene ca Saulo otieyjtac Tlöcatzintle cuöc oyöya ca Damasco hua quiene ca yejuatzi quenunutzque. Oquenpubele quiene ca Saulo oquepex meyac balur para otlanunutz de Jesús ompa pa Damasco. ²⁸ Saulo omocö pa Jerusalén. Yajtenemeya ca inu tlateotitlanme. ²⁹ Oquepex meyac balur para otlanunutz de Tlöcatzintle. Monunutztaya hua mixcomacataya ca joriojte tli tlajtlajtoöya ca griego. Inu joriojte oquetiemojque manera para quemectisque. ³⁰ Cuöc inu hermanos oquematque de inu, oquebicaque Saulo hasta puieblo de Cesarea. De ompau oquetitlanque ma beya hasta ipuieblo de Tarso.

³¹ Pa inu tiempo giente ayecmo oquenpasolojque inu creyentes ipa estados de Judea hua de Galilea hua de Samaria. Yecuöquenu inu creyentes ocaseque fuiera hua mobepöhuaya, porque tiemabeliöya Deus. Espíritu Sönto oquenpaliebejque. Hua ca inu omomeyaquelejque.

Opajtec Eneas

³² Cuöc Piero quentlajpalojtenemeya yecteque, nuyejque uya quemejtato tli chönteya pa sente puieblo itucö Lida. ³³ Ompa oqueniextito sente tlöcatl itucö Eneas. Ye ocuajcuapitza icuierpo. Pos betztaya checuieye xebetl ipa ipetl. ³⁴ Piero oquelfe:

—Eneas, Jesucristo metzpajtilo. Xemiehua hua xejquemelo mopetl.

Sa nima omie. ³⁵ Innochie tli chönteya pa puieblo de Lida hua pa puieblo de Sarón oquejtaque que opajtec Eneas. Pos omoneltocaque ca Tlöcatzintle.

Dorcas oyule

³⁶ Pa niecaju tiempo oyeya pa puieblo de Jope sente sohuatl creyente itucö Tabita. Ca griego mocuütiöya Dorcas, quejtusneque sohuamasötl. Inu sohuatl seme quechihuaya tlin cuale hua quenpaliebiöya tlin porubejte. ³⁷ Entunses pa niecate tunalte Dorcas omococo hua omec. Cuöc ye ocajöltejque icuierpo, oquetlölejque pa sente calejtec icpac cale. ³⁸ Inu puieblo de Jope amo bejca de Lida cöne Piero oyeya. Cuöc inu creyentes oquematque que Piero oyeya pa Lida, oquentitlanque unte tlöca ma quetlalfite Piero:

—Xehualmobica ca tejua hasta Jope. Amo xomobejcoöbite para sa nima teyösque.

³⁹ Entunses Piero uya ca yejua. Cuöc Piero oaseto, quebicaque pa inu calejtec icpac cale cöne oyeya icuierpo de Dorcas. Noche icnusohuame mopachojque itlac Piero. Oquechojchuqueliöya Dorcas. Oquejtetejque Piero vestidos hua intzojtzomajua tli Dorcas quechibeliöya cuöc turavea onemeya. ⁴⁰ Cache Piero oquenquexte innochie de inu calejtec. Omotlancuöquetz hua omotlajtlötlajte. Yecuöquenu omocuec cöne icuierpo Dorcas yutaya. Oquelfe Dorcas:

—Tabita, xemiehua.

Entunses yaja omixtlapo. Cuöc oquejtac Piero, omotlöle. ⁴¹ Piero ocasec ca imö hua oquequetz. Yecuöquenu oquennutz inu icnusohuame hua ocseque yecteque. Oquenpre-sentörfe Dorcas ye yulejteca. ⁴² Ini nönca omacheac ipa noche puieblo de Jope. Meyactie omoneltocaque ca Tlöcatzintle. ⁴³ Entunses Piero omocö ompa pa Jope meyac tiempo. Omocö pa ichö de sente curtidor itucö Semu.

10

Piero hua Cornelio

¹ Oyeya ipa puieblo de Cesarea sente tlöcatl itucö Cornelio. Cornelio oyeya capetö de sie sientos soltörojte. Oyeya de inu grupo de soltörojte tli mocuitiöya Trupa Italiana. ² Cornelio ca tiehua isohua hua ipelhua tiemabeliöya Deus hua tieteochihuaya. Nuyejque oquetiemacac meyac tomi para quenpaliebe joriojte. Seme tietlajtlötlajteliöya Deus. ³ Sente tunale quieme ca pa yeye ura ca ye yohuac Cornelio oquecochejtac. Oquejtac ixmantete sente öngel de Deus tli ocalac icalejtec. Öngel oquejto:

—Cornelio.

⁴ Pos Cornelio quetejtieteyetzaya öngel hua majcömectaya lalebes. Oquejto:

—¿Tlica, Señor?

Entunses inu öngel oquelfe:

—Deus ye metzcaquihua porque tomotlajtlötlajte ca yejuatzí. Nemaalo cuenta quiene ca tequenpaliebea tlin porubejte. ⁵ Xequentitlane seque tlöca ma yöcö pa puieblo de Jope para quenutzatibe Semu, öque nuyejque mocuitea Piero. ⁶ Mocalutea pa ichö ocsente Semu. Inu ocsente Semu curtidor icaca. Quepea ichö itech lamör.

⁷ Cuöc ye uya inu öngel, Cornelio quentzajtzele unte ipeyuhua hua sente soltöro lalebes moneltocane de tli quetequepanoöya. ⁸ Oquenpubele noche tli omochi ca yaja. Sötiepa oquentitla ca Jope.

⁹ Pa mustlateca inu tlöca oyajtöya ipa inu ojtle. Quieme ca pan tlajca oyöya ciera de Jope. Cuöquenuju Piero otlejoc icpac cale para motlajtlötlajtis. ¹⁰ Lalebes oteose hua oquenec tlacuös. Mientras tli chönejque tlajtlacualchihua, Piero quiename tlö omimec.

¹¹ Oquejtac tlininuju quiename sente bieye tatapajtle que oquis de ompa elfecac. Otemuc hasta pan tlöle. Ilpetaya ca nöjcö löro. ¹² Noche clases de yulcöme tli quepea nöbe imecxehua huölöya ijtec inu tatapajtle. Nuyejque quepeaya yulcöme quiename cuhuöme hua tutume. ¹³ Entunses Piero oquecac canajyecaca tlajtlajtoa. Oquejto öquenuju:

—Xemiehua Piero. Xetlamecte hua xetlacua.

¹⁴ Pero Piero onöhuat:

—Abele, Señor. Ayec nejcuca canajyetla tli amo cuale noso amo chepöhuac para nejcuös confurme tocostumbre. Así es que abele.

¹⁵ Ca ujpa Piero oquecac ocsajpa öquenu tlajtlajtoa:

—Deus quejtulo que ye cate cuajcuale hua chepöjque para tequencuös. Amo xequeto taja que amo mocuöne lo que tli Deus quejtulo que ye ica chepöhuac para cuale tejcuös.

¹⁶ Pos ejqueu omochi yexpa. Hua sötiepa inu tlininuju quieme tatapajtle nima uya ocsajpa ca elfecac. ¹⁷ Piero lalebes oquetietzöbe. Cuöquenuju inu tlöca tli quehualentitla Cornelio hualtlajtlantöya cöne ichö Semu. Miero cuöc quepensörojta ya Piero tli quejtusneque lo que tli oquejtac, oaseco inu tlöca ipan queyöhuatiente. ¹⁸ Cuöc oaseto, otlajtlanque tlö omocalute ipa inu chöntle sente tlöcatl itucö Semu, öque onuyejque mocuitiöya Piero. ¹⁹ Mientras Piero quepensörojta ya de lo que tli oquejtac, Espíritu Sönto oquelfejque:

—Yete tlöca metztiemoa. ²⁰ Xemiehua hua xetemo. Xebeya ca yejua hua majcamo quiene quechihua moyulo, porque naja necualentitla.

²¹ Entunses Piero otemuc ca cöne oyejyeya inu tlöca que Cornelio cualentitla. Oquemelfe:

—Nele nenniechtiemuco naja. ¿Tli nenqueneque?

²² Yejua onöhuatque ejqueyi:

—Otiechhualtitlanque sente capetö tietucö Cornelio. Lalebes cuale tlöcatl iloac hua tiemabelilo Deus. Noche joriojte tieyectieniehua. Sente öngel de Deus otieyelfe nele ma tlatitlanihua para metzmonucheliqui tejuatzí. Nele tomobicas ca tiechö para que yejuatzí metzmocaquitisque lo que tli tomopilea tetiemolfelis.

²³ Entunses Piero quentlalfejque ma calaquecö. Omocöjque ca Piero inu yohuale. Pa mustlateca Piero uya ca yejua. Nuyejque uyajque ca yejua ocseque hermanos tli

chönteya pa Jope. ²⁴ Pa ocsente tunale aseto pa Cesarea cöne quenchixtaya Cornelio. Nuyejque ompa oyejyeya ifamiliares hua iamigos Cornelio, pues oquentlalfe. ²⁵ Cuöc Piero oaseto pa ichö Cornelio hua ye calaquesquea, Cornelio oquis hua motlancuöquetz ixtla Piero para queteochihuas. ²⁶ Pero Piero ocajcoc. Oquelfe:

—Xomoquetza. Naja nuyejque necaca netlöcatl iguöl quieme taja.

²⁷ Piero monunutzaya ca Cornelio hua ocalac. Oquenniextito meyactie tli omosentlölejque. ²⁸ Entunses Piero oquemelfe:

—Nemejua nenquemate que para sente joreyo ireligión amo quecöhua ma mosentlöle ca sente tli amo joreyo. Pero Deus oniechmachejque nele quenequihua majcamo nequejto que canajyeca amo chepöhuac para amo nosentlölis ca yaja. ²⁹ Porieso, san tequetl que oniechnutzque tlöca, onehuöla hua amo tli onequejto. Hua öxö necneque necmates noso tli ipampa nenniechnutzque.

³⁰ Entunses Cornelio onöhuat:

—Quiemach quepea nöbe tunale cuöc ca imani quieme ca pa yeye ura ca ye yohuac notlajtlötlajtiöya necö nocalejtec. Sa de repiente omoquetztequis nixtla quiename sente tlöcatl ca itlaque hasta tzotzotlaca. ³¹ Oniechelfe: “Cornelio, Deus ye metzcajque porque tomotlajtlötlajte ca yejuatzi. Quelnömequihua quiene ca tequenpaliebe tli porubejte. ³² Xequentitlane seque tlöca ma yöcö pa puieblo de Jope para ma huöla Semu öque nuyejque mocuitea Piero. Mocalutea pa ichö de ocsente Semu. Inu ocsente Semu icaca curtidor hua chönte itienco lamör”. ³³ Hua ca inu sa nima temetztlatlanelle. Pos lalebes cuale que otehuöla. Öxö oncö tecate tonochtie tieixtla Deus. Pos tejua tecneque tejaquesque noche lo que tli Tlöcatzintle metzmacaque para tetiechelfis.

Piero otlanunutz ipa ichö Cornelio

³⁴ Entunses Piero opie tlajtlajtoa. Oquejto:

—Öxö necasojcömte que de melöhuac Deus amo cache quetlöcaejtalo sente tlöcatl que ocsente. ³⁵ Tlöcamo ipa noche naciones Deus quenselilo noche quiejquech tiemabelea hua quechihua tlin cuale. ³⁶ Deus tiechmacaque tietlajtultzi ca tejua tli cate de ini nación de Israel. Tiechmacaque inu cuale tlamachestelestle tli tiechelfea que cuale tecpeasque siebelestle ca yejuatzi por medio de Jesucristo. Yejuatziji Jesús iloac Tlöcatzintle, que tlamandöruro ipa tonochtie. ³⁷ Nemejua ye nenquemate de lo que tli omojto pa tlöle de joriojte, primieramente pa estado de Galilea. Cuöquenuju Xohuö Bautista ye tlanunutzaya hua ye otlacuötiequiöya. ³⁸ Nenquemate quiene ca Deus otiemacuc Jesús de Nazaret beletelestle de Espíritu Sönto. Nenquemate quiene ca Jesús quechihualutenemeya tlin cuale. Oquenpajtejque innochie tli inu diöblo oquenchiualtiöya ma quesufrirucö. Jesús oquechijque noche inu porque Deus otiepaliebejque. ³⁹ Tejua tecate tetestigos de noche lo que tli oquechijque Jesús ipa estado de Judea hua ipa ciudad de Jerusalén. Sötiepa giente otiemecteque. Otiecoruspeloque. ⁴⁰ Pero Deus otieyulebitiluc pa yeye tunale. Oyeya tietlanequeles Deus para neniextiluc Jesús ca tejua. ⁴¹ Amo neniextiluc ca noche giente tlöcamo ca tejua, porque ca ye niepa Deus tiechixpejpenque para teyesque tetestigos. Tejua tetlacuajque hua tötlieque ca Jesús sötiepa de que ye oyulebihuac de intzölö mimejque. ⁴² Jesús tiechtitlanque para tetlanunutzasque intzölö giente hua para tequenmelöjcöpubelisque que Deus tieixpejpenque Jesús para quenjuscörusque noche tli turavea neme hua nuyejque tli ye omejmejque. ⁴³ Nuyejque ca ye niepa noche tlayulepantejque otlajtlajtojque de Jesús. Oquejtojque que noche tli tiecatzincö moneltoca moperdonörusque de intlajtlacul.

⁴⁴ Turavea tlajtlajtojaya Piero cuöc Espíritu Sönto ocalacoac ipa inyulo de innochie tli quecactaya inu tlajtule de Piero. ⁴⁵ Inu joriojte tli nuyejque moneltocaque ca Jesús hua tli ohuölajque ca Piero oquetietzöbejque que Deus quenmacaque tieEspíritu Sönto ca tli amo joriojte para ma calacoa ipa inyulo. ⁴⁶ Inu joriojte oquecajque inu ocseque

que tlajtlajtojta ya ca ocse sen idiomas que amo quematque hua tiechajchamöjque Deus.
⁴⁷ Entunses Piero oquejto:

—¿Quiene ca öque quejtus que nõncate abele mocuötiequisque? Pos ye ocalacoac Espíritu Sõnto ipa inyulo nuyejque quieme ocalacoac pa toyulo tejua.

⁴⁸ Entunses Piero otlanahuate ma mocuötiequicö tietucöyupantzinco Jesucristo. Entunses oquetlalfejqque Piero ma mocöhua turavea ocseque tunale.

11

Piero oquenpubele creyentes pa Jerusalén noche tli omochi pa Cesarea

¹ Tlateotitlanme hua ocseque hermanos tli oyejyeya pa estado de Judea oquecajqque que giente tli amo joriojte nuyejque omoneltocaque ca tietlajtultzi Deus. ² Cuöc Piero omocuec ca Jerusalén, seque joriojte tli omoneltocaque ca Jesús ocajajuaque Piero.
³ Oquejtojque:

—¿Tlica tequentlajpaluto giente tli amo joriojte hua otetlacua ca yejua?

⁴ Entunses Piero oquenpubele noche lo que tli omochi desde ca opie. Oquejto:

⁵ —Naja oneyeya pa puieblo de Jope. Notlajtlötlajtejtaya, hua quiename onemimec, hua onequejtac tlininuju quieme sente tatapajtle bieye. Inu tatapajtle hualtemuc de elfecac. Ilpetaya ca nõjcö löro. Ohualasec hasta notlac. ⁶ Nectejteyeytac lalebes cuale para nequejtas tli oyeya ijtec inu tatapajtle. Nequemejtac yulcöme de nõbe imecxehua hua tli tiecuöneme, cuhuöme hua tutume. ⁷ Onejcaac öque oniechelfe: “Xemiehua, Piero. Xetlamecte hua xetlacua”. ⁸ Pero naja onenöhuat: “Abele, Señor. Ayec canajquiema nejcua canajyetla tli amo chepöhuac noso tli amo mocuöne confurme tocostumbre. Así es que abele”. ⁹ Ca ujpaa onejcaac öquenu tlajtlajtoa desde elfecac. Oniechelfe: “Deus quejtulo que ye cate cuajcuale hua chepöjqque para cuale tequencuös. Amo xequejto que amo mocuöne lo que tli Deus quejtulo que ye ica chepöhuac para cuale tejcuös”. ¹⁰ Ejqueu omochi yexpa, hua entunses noche inu sösantle tli nequejtac uya ocajpa elfecac. ¹¹ Miero cuöquenuju oaseto yete tlöca ompa pa inu cale cöne oteyeya. Sente tlöcatl oquentitla desde Cesarea para oniechtiemuto naja. ¹² Espíritu Sõnto oniechelfejque nele ma nebeya ca yejua hua majcamo noportöro de ocsie manera ca yejua. Uyajque ca naja nuyejque nõncate checuasieme tocnihua. Tonochtie otecalajque ipa ichö de inu tlöcatl pa Cesarea. ¹³ Inu tlöcatl otiechpuebele quiene oquejtac sente öngel tli ocalac pa ichö. Oquelfe öngel: “Xequentitlane seque tlöca ma yöcö pa puieblo de Jope para quenutzatibe Semu öque nuyejque mocuitea Piero. ¹⁴ Yaja metzelfis quiene ca taja hua innochtie tli cate mochö nemomöquextisque de nemotlajtlacul”. ¹⁵ Quiemach onepie nequennunutz cuöc Espíritu Sõnto ocalacoac ipa inyulo iguöl quieme antes ocalacoac ipa toyulo tejua. ¹⁶ Entunses onequelnöme lo que tli oquejtojque Tlöcatzintle: “Xohuö otlacuötieque ca ötzintle, pero nemejua nemocuötiequisque ca Espíritu Sõnto”. ¹⁷ Pos Deus quenmacaque Espíritu Sõnto ma calacoa ipa inyulo quieme otiechmacaque tejua por toneltocaque ca Tlöcatzintle Jesucristo. ¿Öquenu noso necaca naja para ma netietzacuele Deus?

¹⁸ Entunses cuöc inu creyentes tli oyejyeya pa Jerusalén oquecajqque inu, amoyetla cache oquejtojque, tlöcamo sa tieyectieniejqque Deus. Oquejtojque:

—Tlöjcu Deus oquenejqque que tli amo joriojte nuyejque ma moyulcuepacö para quepejpeasque nemelestle nochepa.

Quiene omochi intzölö creyentes ipa Antioquía

¹⁹ Cuöc giente oquemectejque Esteban, opiejqque quentepotztocaque ocseque creyentes nuyejque. Inu creyentes omoxiexelöjqque. Seque uyajque hasta pa nación de Fenicia, seque pa nación de Chipre, hua seque hasta pa puieblo de Antioquía. Pa niecate locör inu creyentes quennunutzque sa joriojte de cuale tlamachestelestle. Amo quennunutzque ocseque tli amo joriojte. ²⁰ Seque creyentes de inu nación de Chipre hua

de puieblo de Cirene de ocsente nación oaseto ompa pa Antioquía. Oquennunutzque giente tli tlajtlajtoöya ca griego de cuale tlamachestelestle de Tlöcatzintle Jesucristo. ²¹ Tlöcatzintle quenmacaque beletelestle para tlanunutzasque cuale, hua meyactie moneltocaque hua mocuejque ca Tlöcatzintle.

²² Cuöc inu grupo de creyentes pa Jerusalén oquecajque inu, oquetitlanque Bernabé hasta Antioquía. ²³ Cuöc oaseto ompa, Bernabé oquejtac quiene ca Deus quenmacaque tiefavur, hua opajpöc lalebes. Oquentlajtulmacac inu creyentes ma quesequirucö ca sentetl inyulo hua ma seme tietocacö Tlöcatzintle. ²⁴ Pos Bernabé oyeya sente cuale tlöcatl, hua iyulo tientaya de Espíritu Sönto, hua seme moneltocaya ca Deus. Ejqueu noso, meyactie omotlölejque de pörte de Tlöcatzintle.

²⁵ Sötiepa Bernabé uya ca puieblo de Tarso. Quetiemuto Saulo. Cuöc oqueniexte, oquebicac hasta puieblo de Antioquía. ²⁶ Bernabé hua Saulo sie xejtejque ompa intzölö inu creyentes. Quenmachtiöya meyactie. Giente quencuitejque inu creyentes “cristianos”. Así es que omocuiejque “cristianos” cachtö ipa puieblo de Antioquía.

²⁷ Pa niecaju tiempo seque tlayulepantejque tli quennunutzaya giente de tietlajtultzi Deus uyajque desde Jerusalén para ca Antioquía. ²⁸ Sente de yejua itucö Agabo. Omoquetz intzölö creyentes. Espíritu Sönto oquepaliebejque para quemates quejtus que mochihuas ca nobeyo sente bieye öpestle. Pos ejqueu omochi pa inu tiempo cuöc Claudio oyeya emperador. ²⁹ Entunses inu creyentes de Antioquía quetzontejque quetitlanesque seque tomi ca hermanos tli chönteya pa estado de Judea. Cara sesen tlöcatl ma quetiemaca lo que tli podierebeya. ³⁰ Ejqueu oquechijque. Oquetitlanque inu tomi ma quebicacö ca biebertzetzi tli quentlachiliöya creyentes ompa pa Judea, para ma quenxiexelfelicö hermanos. Oquetitlanque inu tomi tli omonecheco ca Bernabé hua Saulo.

12

Herodes quemecte Jacobo hua oquetzajtzac Piero

¹ Pa niecaju tiempo inu rey Herodes opie quentepotztoca seque creyentes. ² Quemecte Jacobo icni Xohuö ca espöda. ³ Cuöc oquejtac que oquenparesiero joriojte, pos nuyejque ocasec Piero. Ejqueu oquechi rey Herodes miero pa yelfetl de pöntzi tli amo quebica levadura. ⁴ Cuöc Herodes ocasec Piero, oquetzajtzac ipan cörsel. Oquentlöle nöbe grupos de soltörojte ma quixuticö. Cara grupo quepeaya nönöbe soltörojte. Herodes oquepensöro que san tequetl panus pöscua quequextisquea Piero para quepresentörus ca giente. ⁵ Así es que soltörojte quixutiöya Piero pa cörsel. Cache inu creyentes oquesequirojque motlajtlötlajtiöya ca Deus ca meyac tlanequelestle.

Deus oquequextejque Piero de ipa cörsel

⁶ Inu yohuale antes que Herodes quequextisquea Piero para quepresentörus ca giente, Piero cochtaya entre unte soltörojte. Ipetaya ca unte carienajte. Ocseque soltörojte oyejyeya ca queyöhuac itech pobielta. Tlajpeaya pa cörsel. ⁷ Sa de repente sente öngel de Deus oniestequis hua otlaniestequis pa cörsel. Inu öngel oquetepine Piero pa isieyecatetla. Oquexete hua oquelfe:

—Xemiejtiehua.

Entunses inu carienajte obetzque de ipa imöhua Piero. ⁸ Inu öngel oquelfe:

—Xomotlajcoilpe hua xomocacte.

Cuöc Piero omotlajcoilpe hua omocacte, inu öngel oquelfe:

—Xomöque ocseque motatapa hua xeniechtocate.

⁹ Cuöc Piero oquistie, oquetocac inu öngel. Amo quemateya que de melöhuac mochij-taya lo que tli inu öngel quechihuaya, tlöcamo oquepensöro que a lo mejur inu öngel sa omotiejtete ca yaja quieme cana cochtiemequelestle. ¹⁰ Oquepanabejque inu primiero

guardia hua inu ocsente guardia. Oajaseto itlac inu pobielta de tepostle tli quisa pa cayaju de inu ciudad. Sa isiel omotlapo. Pos inu öngel hua Piero oquisque. Cuöc ye onejnengue sie cuadra, inu öngel sa nima oquecöjtie Piero sa isiel. ¹¹ Entuneses Piero omoteteiscale hua oquejto:

—Öxö necmate por seguro que es de melöhuac. Deus ocualtitlanque tieöngel para niechmöquextis de imöpa rey Herodes hua para niechmöquextis de lo que tli joriojte oquepensörojque niechchibelisquea.

¹² Cuöc Piero omomacac cuenta que de melöhuac oquis de ipa cörsel, uya ca ichö María inöntzi de Xohuö, öque nuyejque mocuitiöya Mörcos. Ompa pa ichö María meyactie ye omosentlölejque hua motlajtlötlajtejtaya. ¹³ Cuöc Piero oquetzotzo pobielta pa cayaju, sente sisehuantu itucö Rode oquis de icalejtec hasta pa pötio. Oquejtato abier öquenu quetzotzona pobielta. ¹⁴ Pero cuöc oquixomat que yaja Piero öque tzajtze pa pobielta, opajpöc tönto que amo oquetlajtlapolfe, tlöcamo omocuec ca icalejtec para tlanahuatito que Piero ompaca pa pobielta. ¹⁵ Entuneses oquelfejque sisehuantu Rode:

—Taja ye telucojte.

Cache yaja ipa hua ipa oquejto que melöhuac hua que melöhuac. Pero yejua oquejtojque:

—Amo yaja. Beles cana iöngel.

¹⁶ Pero Piero oquesequiro quetzotzontaya pobielta. Por fin otlajtlapojque. Oquejtaque Piero hua oquetietzöbejque. ¹⁷ Pero Piero ca imö oquechibele sieña nele ma sa yetacö. Entuneses Piero oquenpubele quiene ca Deus oquequextejque de ipa cörsel. Oquemelfejtie Piero:

—Xequemelficö Jacobo hua noche ocseque tocnihua de lo que tli omochi.

Entuneses Piero oquistie de ompa hua uya ca ocsie löro.

¹⁸ Cuöc otlanies, lalebes omopasolajque inu soltörojte porque amo ocajocömatque tli beles omochi ca Piero. ¹⁹ Rey Herodes otlatitla ma quietiemucö Piero pero amo oqueniextejque. Entuneses Herodes oquentlajtlane inu soltörojte de inu asunto, pero abele oquemacaque arrasu. Yecuöquenu otlatitla ma quenmejmecticö inu soltörojte. Sötiepa Herodes oquis de estado de Judea para ca puieblo de Cesarea. Omochöntito ompa.

Rey Herodes omec

²⁰ Rey Herodes cualöntaya inca giente de puieblos de Tiro hua de Sidón ipa ocsente nación. Inu giente sa secne omopresentörojque pa palacio de inu rey. Sente tlöcatl itucö Blasto oyeya sente tlajtoöne para inu rey. Yejua de Tiro hua Sidón oquechijque Blasto amigo de yejua. Oquenejque ma quenpaliebe queyulsiebisque inu rey porque de yaja queresibirojtaya meyac tlacuale de ipa tlöle de inu rey. ²¹ Entuneses Herodes oquetzontec que pa töl tunale quetratörus inu asunto ca yejua. Cuöc oaseco inu tunale omöque Herodes itzotzomajua de rey. Motlölito ipa itrono imixtla meyac giente. Cuöquenuju oquennunutz. ²² Pos giente otzajtzejteque lalebes. Oquejtojque:

—¡Tlajtlajtulteca sente Deus! ¡Nöiloac tlöcatl amo sa tlöcatl iloac, tlöcamo sente Deus!

²³ Pa inu momento sente öngel de Deus oquechihualte Herodes ma mococo porque amo otiechamöjque Deus, tlöcamo oquencö giente ma quechamöhuacö sie yaja. Pos meyactie ocuelte oquecuajque icuierpo de inu rey hua ocueloac hasta cöne omec.

²⁴ Cache hua cache meyac giente oquecactaya tietlajtultzi Deus hua ca nobeyo inu creyentes oquennunutzque giente de tietlajtultzi.

²⁵ Cuöc Bernabé hua Saulo oquetlamejque inteque ipa Jerusalén, omocuejque. Oquebicaque Xohuö öque nuyejque mocuitiöya Mörcos.

13

Bernabé hua Saulo oquepiehualtejqe inteque quieme misioneros

¹ Intzölö inu grupo de creyentes pa Antioquía oyejyeya seque tlayulepantejqe hua seque tli tlamachtioneme. Por ejemplo, Bernabé, Semu öque mocuitiöya Negro, Lucio de puieblo de Cirene, Saulo, hua Manaén, öque omobepö sa secni ca Herodes tli sötiepa oyeya tetrarca noso rey de estado de Galilea. ² Sie tunalé inu creyentes tlajyubejtaya hua mosentlölejque para tietochihuasque Deus. Cuöquenuju Espíritu Sönto oquemelfejque:

—Xeniechnencuaxelfelicö Bernabé hua Saulo para tequetl tli nequixpejpe para yejua.

³ Entunses cuöc otlajyubejqe hua ye omotlajtlötlajtejqe, quentlölejque inmöhua impa Bernabé hua Saulo hua quentitlanque ma yöcö.

Bernabé hua Saulo otlanunutzque de Jesús ipa tlötojpole de Chipre

⁴ Ejqueu noso Espíritu Sönto quentitlanque Bernabé hua Saulo. Uyajque ca puieblo de Seleucia, hua desde ompa uyajque pa börco hasta pa tlötojpole de Chipre. ⁵ Cuöc oaseto ompa, oaseto miero pa puieblo de Salamina. Opiejque tlanunutzque de tietlajtultzi Deus pa inu teopanconcone cöne joriojte mosentlöliöya. Bernabé hua Saulo quebicaque Xohuö para ma quenpaliebe. ⁶ Opanuque ipa noche tlöle de Chipre hasta oaseto pa puieblo de Pafos. Ompau oquenömejque sente joreyo itucö Barjesús. Inu Barjesús quechihuaya söstantle de magia hua quencajgayö giente. Oquejto que yaja icaca sente tlayulepante de Deus, pero amo melöhuac. ⁷ Inu Barjesús oyeya itlac inu cubernadur itucö Sergio Paulo. Inu cubernadur cuale casojcömateya söstantle. Tlatitla ma quentzajtzelicö Bernabé hua Saulo porque oquenec quecaques tietlajtultzi Deus. ⁸ Barjesús mocuitiöya nuyejque Elimas. Elimas quejtusneque öque quechihua söstantle de magia. Elimas omoponiero cuntra Bernabé hua Saulo. Oquetratöro quechihualtis cubernadur majcamo moneltoca. ⁹ Pero iyulo de Saulo, öque nuyejque mocuitiöya Pöblo, tientaya de Espíritu Sönto. Entunses Pöblo quetejtieyjtac Elimas. ¹⁰ Oquelfe:

—¡Taja tetlacajgayöhuane! ¡Teyultepitztec! ¡Tecchihua lo que tli queneque yaja Diöblo! ¡Seme tecaca en cuntra de tlin cuale! Tiejofe Tlöcatzintle melactec ica, pero taja tequenmachtea giente lo que tli amo melöhuac para majcamo calaquecö ipa tieojfe Deus. ¿Ayec tejcöhuas tequenmachtis ejqueu? ¹¹ Öxö Tlöcatzintle metzcastecörusque. Tixcocoxcöteas hua abele tetlacheas por sie tiempo.

Sa nima yaja omocö pa tlayohuaquelestle hua pa tlanextecumelestle. Pos oquetiemo canajyeca ma quebica ca imö porque abele tlachea. ¹² Cuöc inu cubernadur oquejtac lo que tli omochi, omoneltocac. Quetietzöbejtac quiene ca Pöblo hua Bernabé tlamachtioya de söstantle de Tlöcatzintle.

Pöblo hua Bernabé oyejyeya pa Antioquía pa tlöle de Pisidia

¹³ Pöblo hua icompañerójua uyajque pa börco desde puieblo de Pafos para ca puieblo de Perge tli mocöhua pa tlöle itucö Panfilia. Xohuö oquencöjtie hua omocuec ca Jerusalén. ¹⁴ Pöblo hua Bernabé oquisque de Perge para ca inu puieblo de Antioquía tli ica itlac tlöle de Pisidia. Pan söbro, cuöc joriojte mosiebea, ocalajque pa teopanconetzi. Omotlölitö. ¹⁵ Entunses canajyeca oquetlajtulte tietlajtultzi Deus ipa ömame de inu ley de Deus hua ipa ömame tli oquejcuelojque inu tlayulepantejqe. Yecuöquenu tlayecönque de inu teopanconetzi oquetitlanque sente tlöcatl ma quemelfite Pöblo hua Bernabé ejqueyi:

—Tlö quejtus nemejua nenquepea canajyetla consiejo para giente cuale nenquejtusque ahorita.

¹⁶ Entunses Pöblo omoquetz. Oquenchibele giente sieña ca imö ma sa yetacö. Oquejto: —Señores de tonación Israel, hua nemejua tli nentiemabelea Deus, xejcaquecö noso.

¹⁷ Deus de tonación Israel oquemixpejpenque totötajua. Oquensentlölejque para yesque sente bieye nación. Inu omochi cuöc turavea oyejyeya pa nieca nación de Egipto. Entunses quenquextejque de ompau ca meyac beletelestle. ¹⁸ Por cuarenta años Deus

quexicojque quiene ca quechihuaya pa inu locör cöne nionöque chönte. ¹⁹ Deus quenpo-
jpolojque giente de ipa checume naciones tli chönteya pa tlöle de Canaán. Noche intlöl
de yejua Deus quenmacaque totötajua. ²⁰ Inu omochi sobre cuatro cientos cincuenta
años. Nuyejque por meyac xebetl Deus quentlölelejque tlötlajtoönejme que mocutiöya
jueces, hasta tiempo de inu tlayulepante Samuel. ²¹ Totötajua oquenejque quepeasque
sente rey. Entunses Deus quenmacaque Saúl quieme rey por cuarenta años. Saúl oyeya
iconie Cis hua oyeya de inu grupo de Israelitas itucö Benjamín. ²² Sötiepa Deus ayecmo
quecöjque Saúl ma iye rey tlöcamo quetlölelejque David quieme rey. Deus quecualejtaque
David. Oquejtojque ejqueye: “Ye onecniexte ini nönca David iconie Isaí. Yaja icaca sente
cuale tlöcatl tli nejcualejta lalebes. Icaca seguro que yaja quechihuas noche tli naja
necneque”.

²³ Jesús iloac iConie David. Entunses confurme lo que tli Deus oquejtojque ca ye
niepa que quechihualusquea, yejuatzi tietitlanuc Jesús para tiechmöquextisque tejua
teisraelitas. ²⁴ Antes Jesús ohualiloac, Xohuö Bautista otlanunutz intzölö noche giente
de Israel. Oquemelfe nele ma moyulcuepacö de intlajtlacul hua ma mocuötiequecö.
²⁵ Tepetzi antes que Xohuö Bautista omec, oquejto: “¿Öquenu nenquepensöroa que
naja necaca? Pos naja amo necaca öque nenquepensöroa necaca. Pero sötiepa de naja
hualiloas ocsie tlöcatl, öque nimpör amo necmeresieroa para nequenquextis tiecacua”.

²⁶ Nocnihua, tli nencate nenipelhua de Abraham, hua nuyejque nencate tli nencate
totzölö tli nentiemabelea Deus, xecmatecö que Deus quenequihua que tonochtie ma
tejcaquecö nönca tlajtule tli tiechelfea quiene ca tomöquextisque. ²⁷ Pa teopanme giente
quentlajtultea ömame de tlayulepantejque. Ejqueu quechihua cara semöna pan söbro,
cuöc tosiebea tli tejoriojte. Sin embargo, giente tli chönteya pa Jerusalén, ca tiehua
intlajtoönejua, amo casojcömatque tli quejejtoa inu ömame, nimpör amo tieixomatque
Jesús. Cache yejua mismos oquecumplirojque lo que tli ca ye niepa oquejtojque inu
tlayulepantejque. Oquecumplirojque cuöc inu tlötlajtoönejme tiecuntenörojque Jesús
para ma mecoa. ²⁸ Mös amo oqueniextejque niontle arasu para ma tiemecticö, de todos
modos yejua quetlajtlanejque Pilöto ma tiecoruspelo Jesús. ²⁹ Pos ejqueu oquecumpliro-
jque noche lo que tli tlajcuelulpa oyeya de yejuatzi ipa teotlajtule que tiepa mochi-
huasquea. Yecuöquenu oquetemubejque tiecuiervo de ipa corujtzi hua quetlölelejque ijtec
mejcöcoyoctle. ³⁰ Cache Deus tieyulebitiluc Jesús de intzölö mimejque. ³¹ Hua seque tlöca
onyajque ca Jesús de ipa estado de Galilea para ca Jerusalén. Inu omochi antes que Jesús
omecoac. Sötiepa de que oyulebihuac, inu tlöca tieijtaque Jesús por meyac tunalte. Öxö
yejua cate quiename testigos de inu söstantle, hua tlajtlanunutzteneme intzölö giente de
topuieblo de joriojte. Quennunutzta de yejuatzi Jesús.

³²⁻³³ 'Así es que tejua nemiechmachejtecate de nönca cuale tlamachestelestle,
que Deus ye oquecumplirojque lo que tli yejuatzi quenprometierfejque totötajua que
quechihualusquea. Tejua tecate teinpelhua de totötajua. Por inu lo que tli Deus
quenprometierfejque totötajua, ye quecumplirojque ca tejua. Quecumplirojque cuöc
tieyulebitiluc Jesús. Ca ye niepa Deus oquejtojque que sie tunale tieyulebitilus Jesús cuöc
oquejtojque ejqueyi ipa Salmo dos:

Taja tenoConie;

öxö temetzchihualte para ma xeye tenoConie.

³⁴ Hua de que tieyulebitiluc Jesús para majcamo palöne tiecuiervo, Deus oquejtojque
ejqueyi:

Seguramente nemiechmacas nemejua noche inu bendiciones lo que tli onequelfe David
que necmacas yaja.

³⁵ Ejqueu quejtulo ipa ocsente Salmo:

Tejuatzi amo tomocöbelis tiecuiervo de tlöcatl yectec ma palöne.

³⁶ David omec cuöc ye oquentequepolo igiente quieme Deus oquenejqque. Pos giente oquetlölejque icuierpo ijtec mejcöcoyocle cöne oyejyeya incuierpos de itötajua. La mera verdad es que ompa icuierpo de David nuyejque opalö. ³⁷ Pero tiecuierpo Jesús amo opalö porque Deus tieyulebitiluc Jesús. ³⁸ Xecmajtacö noso, nocnihua, que tejuu nemiechmachestejtecate que solamente Jesús cuale nemiechtlapojpolfisque nemotlajtlacul. ³⁹ Noche tli moneltoca ca Jesús, Deus quenselilo quiename yecteque, hua amo quelnömequihua de intlajtlacul. Pos inu abele mochihuas por öque mocuajpetzus para nemes confurme inu ley de Moisés. ⁴⁰ Xecpeacö cueröro noso, majcamo mochihua ca nemejua lo que tli oquejcuelojque inu tlayulepantejqque. Oquejtojque ejqueyi:

⁴¹ Xequetacö nemejua tli nemoburlöroa.

Nenquetietzöbejtisque hua nemixniempolusque.

¿Tlica? Porque naja necchihuas ca nemejua canajyetla tönto bieye

que nimpör amo nemoneltocasque mös öque nemiechpubelis lo que tli necchihuas.

⁴² Sötiepa de que Pöblo oquejto inu, yaja ca Bernabé oquisque de ipa inu teopanconetzi. Hua inu giente quentlajtlanque ma quennunutzacö ocsajpa de Jesús pa ocsie söbro.

⁴³ Cuöc giente omoxiexelojque de ipa inu teopanconetzi, meyactie joriojte quentocaya Pöblo hua Bernabé. Nuyejque quentocaya meyactie tli amo joriojte pero que ye ocalajque pa inu religión de joriojte. Pöblo hua Bernabé quentlajtulmacaya innochie que ma quesequirucö ca sentetl inyulo ipa tiefavur Deus.

⁴⁴ Pa checume tunale cöso noche giente de inu puieblo omosentlölejque para quecaquesque tietlajtultzi Tlöcatzintle. ⁴⁵ Cuöc inu joriojte oquejtaque tönto giente, lalebes omoxicojqque. Opiejque tlajtlajtoa en cuntra de lo que tli quejtoöya Pöblo. Checuatlajtojque. ⁴⁶ Entunses Pöblo hua Bernabé otlajtlajtojque ca meyac balur. Quemelfejque joriojte:

—Tejua tecpeaya que cachtö nemiechnunutzque nemejua nenjoriojte de tietlajtultzi Deus. Hua öxö amo nenqueneque nenqueselisque tietlajtultzi Deus. Ejqueu nenquedemoströroa que amo nenquemesieroa nenquepeasque nemelestle nochepa. Ejqueu noso öxö tequennunutzatibe giente tli amo joriojte. ⁴⁷ Ejqueu tecchihuasque porque Tlöcatzintle ejqueu otiechmandörojque cuöc oquejtojque:

Naja temetzixpejpe para teyes quiename sente tlöbile para tequentlöbis giente tli amo joriojte.

Temetzixpejpe para tequenmacas nemöquextelestle ca giente de ca nobeyo pa tlöltecpactle.

⁴⁸ Cuöc giente tli amo joriojte oquecajqque inu, lalebes quenpöquelesmacac. Opiejque quejtoa que tietlajtultzi Tlöcatzintle lalebes cuale icaca. Omoneltocaque innochie tli oquemixpejpenque Deus para quepeasque nemelestle nochepa. ⁴⁹ Hua ca inu, giente de ca nobeyo pa niecaju tlöle oquecajqque de tietlajtultzi Deus. ⁵⁰ Pero inu joriojte tlajtlajtojque ca seque sohuame tli seme quecumpliroa ca inreligión hua tli cache bejbeye momajtaya pa puieblo. Nuyejque tlajtlajtojque ca tlötlajtoönejme de puieblo. De inu manera ocacajque giente ma quentepotztocacö Pöblo hua Bernabé. Oquentojtocaque de pa inpuieblo hua de pa inu puieblos tli cache cierca oyejyeya. ⁵¹ Entunses Pöblo hua Bernabé oquetzetzelojqque tlölcuiechtle de ipa imecxehua para quemejtetejqque inu giente que amo queselejque tietlajtultzi Deus. Uyajque hasta pa puieblo de Iconio.

⁵² Pero tli tietocaya Cristo inyulo tientaya de pöquelestle hua de Espíritu Sönto.

14

Pöblo hua Bernabé oyejyeya pa puieblo de Iconio

¹ Pa puieblo de Iconio Pöblo hua Bernabé insiepa ocalajque pa inu teopanconetzi de joriojte. Otlannunutzque ca meyac beletelestle, de maneras que meyactie joriojte hua tli amo joriojte moneltocaque. ² Pero inu joriojte tli amo tlaneltoaque cajcojqque giente

tli amo joriojte. Quenchihualtejqque ma quepensörucö mal de inu creyentes. ³ Ejqueu noso Pöblo hua Bernabé omocöjqque ompa meyac tiempo. Otlajtlajtojque ca meyac balur, pos oquepexque meyac confiönsa ca Tlöcatzintle. Hua yejuatzi quenchihualtejqque giente ma casojcömatecö que Pöblo hua Bernabé quennunutztaya de tietlajtultzi tli quejtoa quiene ca öque quepeas tiefavur de Deus. Pos Tlöcatzintle quenmacaque beletelestle para oquechijque tlachihuale de sieñas hua tietzöbeme. ⁴ Pero seque giente de inu puieblo omoquetzque ihua joriojte hua seque omoquetzque ihua inu llateotitlanme Pöblo hua Bernabé. Pos amo quenparesiero innochie iguöl. ⁵ Entuneses joriojte hua tli amo joriojte omotlölejque de acuerdo ca tlötlajtoönejme para quenchicuaelfisque hua quentecaltisque Pöblo hua Bernabé. ⁶ Pero cuöc Pöblo hua Bernabé oquematque de inu, ocholojqque hasta inu puieblos pa tlöle de Licaonia intucö Listra hua Derbe hua ca ocseque puieblos ca ompau. ⁷ Ompa nuyejque quennunutzque giente de cuale tlamachestelestle.

Giente oquetecaltejqque Pöblo ipa puieblo de Listra

⁸ Pa puieblo de Listra oyeya sente tlöcatl tli abele nejneme. Sa yehuataya porque oyeya cucuxojtzi desde que otlöcat hua ayec onejne. ⁹ Inu cucuxojtzi quecactaya lo que tli oquejto Pöblo. Pöblo quetejtieyejtac inu tlöcatl hua oquemat que inu cucuxojtzi moneltocaya hua por inu cuale pajtes. ¹⁰ Entuneses Pöblo oquelfe checöhuac:

—Xomoyejquetza pa mocxehua.

Pos yaja omoquetztequis hua opie nejneme. ¹¹ Cuöc giente oquejtaque lo que tli oquechi Pöblo, opiejque tzajtzejtze ca inidioma tli tlajtlajtoöya ipa inestado de Licaonia. Oquejtojque:

—Ini tlöca ijiloac deuste. Ye onecuejcuepaluc quiename tlöca hua ye ohualtejtemoac totzölö.

¹² Oquejtojque que Bernabé oyeya sente deus itucö Júpiter hua que Pöblo oyeya sente deus itucö Mercurio, porque yaja Pöblo öque tlajtlajtoöya. ¹³ Giente de inu puieblo quepeaya sente teopantle ca calquisyo cöne queteochihuaya indeus Júpiter. Inu teopexque de inu teopantle de Júpiter quenhualcac turojte tli inquechtlä quehualcaya xuchetlatoscatl. Pos giente ca tiehua inu teopexque oquenejqque quemectisquea inu turojte quieme bentle para Pöblo hua Bernabé. Ejqueu oquenejqque queteochihuasquea yejua. ¹⁴ Pero cuöc inu llateotitlanme Bernabé hua Pöblo ocasejcömatque lo que tli quechihuasquea, opiejque quetzutzomunejqque intzotzomajua hua ocalactequisque intzölö giente. Otzajtzejtzeque. Oquejtojque:

¹⁵ —Señores, ¿tlica nenquechihua ejqueu? Tejua tecate tetlöca iguöl quieme nemejua. Pos otehuölajque miero para nemiechelfisque de cuale tlamachestelestle para nenquecöhuasque noche ini nönca tli nenquechihua, porque amo serbirebe. Cache cuale xetietocacö yejuatziju Deus tli nemoa. Yejuatzi iloac öque oquechejchijque elfecac, tlöltecpactle hua lamör hua nuyejque noche tli quepejpea. ¹⁶ Ca ye niepa Deus oquencöjqque noche grupos de giente ma quechihuacö confurme lo que tli yejua oquenejqque. ¹⁷ Pero yejuatzi quenhibelejqque noche giente tlin cuale. Hua ca inu que-mejtetejqque öquentzi yejuatzi. Pos yejuatzi tiechajcöhualo queyabetl. Quechihualtilo tlöle ma quetiemaca cuale cosiechas. Yejuatzi tiechmacalo noche tli tiechpoloa para ejqueu tecpeasque tli tejcuösque hua toyulo pajpöques.

¹⁸ Mös oquejtojque ejqueu, oquencostöro Pöblo hua Bernabé meyac traböjo para quentzacuelejqque giente, pos oc turavea oquenejqque quenmectisquea inu turojte quieme bentle para ejqueu queteochihuasquea.

¹⁹ Pero sötiepa seque joriojte de puieblos de Antioquía hua de Iconio oaseto intzölö giente pa puieblo de Listra. Quentlötlabielmectejque inu giente para que yejua oquetecaltejqque Pöblo. Entuneses oquepensörojque que ye oquemectejque Pöblo hua quetlölochpöntöya hasta ca calquisyo de inu puieblo. ²⁰ Pero cuöc inu creyentes

mosentlölejque itlac Pöblo, yaja omie hua ocalac ocsajpa pa puieblo. Pa mustlateca Pöblo ca tiehua Bernabé oquisque de ompau para ca puieblo de Derbe.

²¹ Ompa pa puieblo de Derbe oquennunutzque giente de inu cuale tlamachestelestle. Meyac giente opiejqque tietocaya Jesús. Entunses omocuejqque ca puieblos de Listra hua Iconio hua Antioquía. ²² Pa inu puieblos Pöblo hua Bernabé oquenyulchecöjqque tli tietocaya Jesús. Quentlajtulmacaque ma quesequirucö ca noche sentetl inyulo ipa lo que tli ye moneltocaque. Quemelfejque que para öque aseti tietlac Deus cöne yejuatzi tlamandöruro onca nesesidad que öque quesufrirus meyac söstantle. ²³ Nuyejque Pöblo hua Bernabé quixpejqpenque biebentzetzi de cara grupo de creyentes para que inu biebentzetzi ma quentlachilicö ocseque creyentes. Innochie otlajyubejtaya hua omotlajtlötlajtejque. Yecuöquenu oquejtojque:

—Ma Deus nemiechixutilo porque ye nemoneltoca ca yejuatzi.

Pöblo hua Bernabé omocuejqque ca puieblo de Antioquía pa tlöle de Siria

²⁴ Sötiepa Pöblo hua Bernabé opanuque pa tlöle de Pisidia hua oaseto hasta pa tlöle de Panfilia. ²⁵ Oquennunutzque giente de tietlajtultzi Deus pa puieblo de Perge. Sötiepa uyajque hasta puieblo de Atalia. ²⁶ Ompa otlejqcoque pa sente börco. Uyajque hasta pan puieblo de Antioquía. Pöblo hua Bernabé antes oquisque de Antioquía cuöc primero opiejqque inbiöje. Pa inu tunale cuöc Pöblo hua Bernabé oquisque, inu creyentes omotlajtlötlajtejque que ma Deus quemixutilo hua ma quenmacalo tiefavur pa inu tequetl. Hua öxö ye omocuejqque Pöblo hua Bernabé porque ye oquetlamejqque inu tequetl. ²⁷ Cuöc oaseto ompa pa Antioquía oquensentlölejque noche creyentes. Oquenpubelejque noche tli Deus oquechijque por yejua. Quenpubelejque quiene ca Deus oquenmacaque locör ca giente nuyejque tli amo joriojte ma moneltocacö ca Jesús. ²⁸ Pöblo hua Bernabé omocöjqque meyac tiempo ompa intzölö creyentes.

15

Tlateotitlanme hua biebentzetzi omosentlölejque pa Jerusalén

¹ Pa inu tiempo seque tlöca oquisque de ipa estado de Judea hua uyajque pa puieblo de Antioquía. Opiejqque quenmachtea inu hermanos ompau. Oquejtojque:

—Onca nesesidad ma xomonacayutequecö confurme inu costumbre tli oquetlöle yaja Moisés. Pos tlö amo ejqueu nenquechihuasque, abele nemomöquextisque.

² Pöblo hua Bernabé omixcomacaque ca yejua checöhuac. Entunses por fin inu creyentes oquemixpejqpenque Pöblo hua Bernabé hua ocseque hermanos para yösqque ca Jerusalén. Quetratörusque ini nönca asunto ca tlateotitlanme hua ca biebentzetzi tli quentlachilea inu creyentes pa Jerusalén.

³ Inu creyentes de Antioquía oquentitlanque ma yöcö. Ipa ojtle opanuque pa tlöle de Fenicia hua pa estado de Samaria. Cöne beletes ca uyajque otlapujtöya quiene ca giente tli amo joriojte oquecöjqque de tli moneltocaya para tietocaya Deus. Pos noche hermanos opajpöjqque lalebes cuöc oquecajqque inu.

⁴ Cuöc Pöblo hua Bernabé oaseto pa Jerusalén, noche inu creyentes hua tlateotitlanme hua biebentzetzi oquenselejque ca meyac pöquelestle. Pöblo hua Bernabé oquenpubelejque noche lo que tli Deus oquechijque ca yejua. ⁵ Pero omoquetzque seque de inu grupo de joriojte itucö fariseos. Yejua ye omoneltocaque tieca Jesús. Oquejtojque:

—Onca nesesidad ma tli amo joriojte ma monacayutequecö. Onca nesesidad nuyejque ma tequenchiualticö yejua ma quechihuacö confurme lo que tli quejtoa inu ley de Moisés.

⁶ Entunses omosentlölejque tlateotitlanme hua biebentzetzi tli quentlachiliöya creyentes. Omosentlölejque para questudiörusque inu asunto. ⁷ Sötiepa que yejua ye omonunutzque meyac tiempo, Piero omoquetz hua oquemelfe:

—Hermanos, nenquemate que pa tunalte tli topa ohualpanuc Deus oniechixpejpenque naja de entre nemejua para onequennunutzato giente tli amo joriojte. Pos ejqueu oquenejque ma yejua quecaquecö inu tlajtule de cuale tlamachestelestle hua ma moneltocacö. ⁸Deus quematihuataca toyulo de tonochtie, hua yejuatzi otiechejtetejque quiene oquenselejque inu giente tli amo joriojte. Oquenmacaque Espiritu Sönto ma calacoa ipa inyulo iguöl quieme otiechmacaque tejua. ⁹Así es que Deus amo sa tejua otiechselejque tlöcamo nuyejque yejua. Yejua nuyejque oquenchepöjque inyulo de tlajtlacule porque monejneltocaque. ¹⁰Hua öxö, ¿tlica noso nentiecualöntea Deus? Pos nenquenmömaltejtecate inu creyentes tli amo joriojte meyac söstantle. Nimpor totötajua abele oquecumplirojque noche inu, nimpor abele tejcumpliroa tejua. ¹¹Pos amo ejqueu xecchihuacö por ini nönca arrasu. Tecpea confiönsa que Tlöcatzintle Jesucristo tiechmöquextisque solamiente por tiefavur, hua ejqueu mismo quenmöquextisque tli amo joriojte.

¹²Entunses noche tli tlamachyejyeya ompa sa otlacactajque. Oquentiencajque Pöblo hua Bernabé porque Pöblo hua Bernabé oquenpubelejque de inu sieñas hua tietzöbeme tli Deus oquenpaliebejque para oquechijque intzölö giente tli amo joriojte. ¹³Cuöc ye oquenpubelejque de inu, Jacobo oquejto:

—Hermanos, xeniechcaquecö. ¹⁴Simón Piero otiechpubele quiene ca Deus oquechijque cuöc ca primera vez oquemixpejpenque seque giente de intzölö tli amo joriojte para tiehuöxcagua yesque. ¹⁵Lo que tli oquejto Simeón icaca de acuierto ca lo que tli oquejcuelojque niecate tlayulepantejque. Pos tlajcuelulpanca ejqueyi:

¹⁶Sötiepa de ini nönca tiempo, nehuölös ocsajpa.

Ocsajpa necyectlölis inu teopantle tli oquechejchijque David, tli ye oxexetu.

Ocsajpa necajcoques tli ye obetz,

hua ocsajpa necchejchihuas.

¹⁷Ejqueu necchihuas para que noche ocseque giente tietiemusque Tlöcatzintle,

hua innochtie tli amo joriojte quenequesque niechtocasque, porque nohuöxcagua yesque.

Ejqueu quejtulo Tlöcatzintle, oque quechihualo noche ini nönca söstantle ¹⁸tli omacheac desde yecsa tiempo.

¹⁹'Bieno, naja nequejtoa ejqueyi. Inu giente tli amo joriojte hua tli quecöhua de tli primiero moneltocaya para tietocasque Deus majcamo tequenpasolucö tejua.

²⁰Sa tequemejcuelfisque ejqueyi, que majcamo öque quecua niontle tlacuale tli giente quebentlölelea ixniehualojme. Majcamo öque mopöcte ca sente sohuatl noso sente tlöcatl que amo yaja incompaniero. Majcamo öque quecua nacatl de sente yulcötli tli ocucupötzmec. Nuyejque majcamo öque *quecua yestle. ²¹Ma ejqueu tequemejcuelficö porque ejqueu quejtoa inu ley de Moisés, hua desde ca ye niepa oncate giente ipa cara puieblo tli tlanunutztebitze de inu ley de Moisés. Pos quentlajtultelea inu ley pa teopancucone cara semöna pan söbro.

²²Entunses inu tlateotitlanme hua inu biebertzetzi ca tiehua innochtie creyentes oquenparesiero cuale para quemixpejpenque seque de yejua. Quemixpejpenque para ma yöcö ca Pöblo hua Bernabé hasta pa puieblo de Antioquía. Entunses oquemixpejpenque Judas Barsabás hua Silas. Inu hermanos quenpeaya Judas hua Silas entre tli cache bieye momajtaya intzölö yejua. ²³Entunses inu hermanos oquentitlanque inu tlöca ma quebicacö sente cörta tli quejtoöya ejqueyi:

“Tonochtie nemiechtlajpaloa nemejua nentocnihua tli amo nenjoriojte. Nemiechtlajpaloa nemonochtie tli nenchönte pa Antioquía hua pa tlöle de Siria hua pa tlöle de Cilicia. Tejua tetlateotitlanme hua tebiebertzetzi tli tequentlachilea tocnihua necö. Tejua tecate tecnijte de nemejua. ²⁴Tejua ye tecmate que seque onyajque de necö

* **15:20** Cuale nuyejque motradusirus: “tlamecte”.

ca nemotlac sin que tejua otequentitlanque. Yejua onemiechpasolojque ca lo que tli oquejtojque. Hua öxö amo nenquemate tli nenquepensörusque ipa nemoyulo. ²⁵ Porieso otounutzque sobre inu. Tonochtie oteyeyeya de acuerdo hua otiechparesiero cuale para otequemixpejpenque seque tlöca de toztölö. Otecnejque ma quemöcompaniörucö totlasojcöicnihua Pöblo hua Bernabé para nemiechtaljpalutibe nemejua. ²⁶ Pöblo hua Bernabé yajyajteneme ipa meyac peligro hua cajcate dispuestos para mejmequesque tiepampa toTlöcatzintle Jesucristo. ²⁷ Así es que nemiechtitlanelejtecate Judas hua Silas. Yejua nemiechpubelisque de noche ini nönca asunto. ²⁸ Espíritu Sönto otieparesiero hua tejua nuyejque otiechparesiero cuale ma tecchihuacö ejqueyi. Tejua amo nemiechmömaltisque canajyetla ocsente para nenquechihuasque tlöcamo sa nönca. ²⁹ Amo xejcuöcö söstantle tli giente oquetlölejque quieme bentle para ixniehualojme. Nuyejque amo *xejcuöcö yestle. Amo xejcuöcö nacatl de sente yulcötl tli ocucupötmec. Majcamo öque mopöcte ca canajyecaca sente sohuatl noso tlöcatl que amo yaja icompaniero. Tlö ejqueu nenquechihuasque, lalebes cuale nenquechihuasque entunses. Noche ma iye cuale ca nemejua”.

³⁰ Así es que inu creyentes oquentitlanque Judas hua Silas ca Pöblo hua Bernabé. Uyajque hasta pa Antioquía. Ompa oquensentlölejque noche creyentes hua oquenmacaque inu cörta. ³¹ Inu creyentes oquetlajtultejque. Lalebes oquenpöquelesmacac inu cörta por inu consiejo tli quebicaya. ³² Judas hua Silas oquennunutztenemeya giente de tietlajtultzi Deus, pues yejua nuyejque oyejyeya tlayulepantejque. Oquencuajpetzojque inu creyentes hua lalebes oquenyulchecöjque tieca Cristo. ³³⁻³⁴ Judas hua Silas oyejyeya ompa quiesque tunalte. Cuöquenuju oquepensörojque que ye mocuepasque ca hermanos tli ocualentitlanque. Entunses inu creyentes oquemelfejque ma yöcö ca cuale. ³⁵ Pero Pöblo hua Bernabé omocöjque pa Antioquía. Yejua ca tiehua meyactie ocseque hermanos oquesequirojque quenmachtea giente hua oquesequirojque tlanunutzta de tietlajtultzi Deus.

Pöblo oquis ca uja quieme misionero

³⁶ Cuöc ye opanuc seque tunalte, Pöblo oquelfe Bernabé:

—Ma teyöcö ocsajpa para ma tequentlajpalucö tocnihua ipa noche inu puieblos cöne otetlanunutzque de tietlajtultzi Deus abier quiene cajcate.

³⁷ Bernabé oquenec quebicas Xohuö öque nuyejque mocuitiöya Mörcos. ³⁸ Pero Pöblo oquepensöro que amo cuale quebicasque porque antes Xohuö oquencöjtie pa Panfilia, hua amo oquesequiro ca yejua pa inu tequetl. ³⁹ Omixcomacataya tönto hua tönto hasta que omoxixelojque. Bernabé oquebica Mörcos hua innehua otlejcoque ipa börco para yösque hasta Chipre. ⁴⁰ Entunses Pöblo oquenec ma beya Silas ca yaja. Inu creyentes omotlajtlötlajtejque que ma Deus quemixutele hua ma quenmacacö tiefavur. Ca inu Pöblo hua Silas uyajque. ⁴¹ Ejqueu Pöblo opanuc hasta pa tlöle de Siria hua pa tlöle de Cilicia. Oquenyulchecö noche grupos de creyentes pa noche locör cöne opanuc.

16

Timoteo uya ca Pöblo hua Silas

¹ Hua aseto pa puieblos de Derbe hua Listra. Ompa oquenömejque sente creyente itucö Timoteo. Timoteo oyeya iconie de sente sohuatl joreyo tli omoneltocac ca Cristo. Itajtzi oyeya griego. ² Inu hermanos tli chajchönteya pa Listra hua pa Iconio oquejtojque que Timoteo lalebes cuale tlöcatl. ³ Pöblo oquenec ma beya Timoteo ca yaja. Entunses Pöblo oquenacayutec Timoteo, porque joriojte pa niecate puieblos cöne yösque oquematque que itajtzi Timoteo oyeya griego. Pöblo amo oquenec ma quejtucö inu joriojte que Timoteo amo quecumpliroa ca inu costumbre de nacayutlatequelestle. ⁴ Pa

* **15:29** Cuale nuyejque motradusirus: “xetlamecticö”.

puieblös cöne Pöblos, Silas hua Timoteo opanuque, oquennunutzque noche creyentes. Oquemelfejque lo que tli tlateotitlanme hua biebertzetzi pa Jerusalén oquetzontejque ma quechihuacö creyentes. ⁵ Así es que ipa noche locör noche grupos de creyentes ocaseque cache hua cache meyac neltoquelestle, hua cara tunale omomeyaquelejque.

Pöblos oquejtac quieme ipa cochtiemequelestle sente tlöcatl tli oyeya de tlöle de Macedonia

⁶ Espiritu Sönto amo quencöjque Pöblos hua Silas ma yöcö para tlanunutzasque pa inu tlöle de Asia. Por inu, opanuque pa tlöle de Frigia hua pa tlöle de Galacia. ⁷ Ajaseto cöne monetechojtecate inu tlöle de Misia hua inu tlöle de Bitinia. Oquepensörojque calaquesque pa inu tlöle de Bitinia, pero Espiritu Sönto, öque Jesús tiehualtitlanuc, amo oquencöjque ma calaquecö ompau. ⁸ Entunses opanuque pa Misia sa itienco. Ajaseto itech lamör pa sente puieblo itucö Troas. ⁹ Ompau Pöblos oquejtac quiename sente cochtiemequelestle ca yohuale. Oquejtac sente tlöcatl de tlöle de Macedonia. Inu tlöcatl omotlötlajte ca Pöblos, hua oquejto: “Xepano ca nö löro ca ipan tlöle de Macedonia. Xetiechpaliebique”. ¹⁰ Cuöc Pöblos ye oquejtac hua otlachix, entunses otectiemojque sente börco para teyösque ca Macedonia. Otecpexque por seguro que Deus otiechnutzaloöya ma tequennunutzacö inu giente de inu cuale tlamachestelestle.

Pöblos hua Silas ajaseto pa puieblo de Filipos

¹¹ Entunses oteljeoque pa börco pa puieblo de Troas. Oteyajque deriecho para inu tlöltojpole ijtec lamör que itucö Samotracia. Pa mustlateca otaseto pa puieblo de Neápolis noso Pueblo Nuevo. ¹² De ompau oteyajque hasta inu puieblo itucö Filipos. Filipos oyeya sente puieblo de inu romanos. Cache bieye omomajtaya intzölö ocseque puieblös de inu pörte de Macedonia. Ompa oteyeyeya seque tunalte. ¹³ Sie semöna pan söbro otequisque de ipa puieblo. Oteyajque itlac sente ötlactle porque otecpensörojque que ompau oyes sente locör cöne giente quepeaya costumbre motlajtlötlajtiöya. Cuöc otaseto, seque sohuame ye ompa oteyeyeya. Entunses otötlölejque ompau hua otequennunutzque. ¹⁴ Sente de inu sohuame itucö Lidia. Oyeya de sente puieblo itucö Tiatira. Lidia quenamacaya cuajcuale tzotzomajtle tli morörojtec. Nuyejque tietechihuaya Deus. Lidia oquecac lo que tli tequejtojtaya. Hua Deus oqueyulomajmötocaque para ma quechihua cöso de lo que tli Pöblos quejtoöya. ¹⁵ Mocuötieque yaja hua noche tli chajchönteya ipa ichö. Sötiepa de inu Lidia otiechtialfe. Oquejto:

—Tlö nemopensörfea que naja de melöhuac noneltoca tieca Tlöcatzintle, xehualmobicacö xomocalutejtzinucö pa nochö.

Pos otiechnelchibele ma tocöhuacö pa ichö.

¹⁶ Sie tunale oteyöya para inu locör cöne totlajtlötlajtiöya. Otecnömejque sente sisehuanu tli quepeaya sente moxicoöne. Inu moxicoöne cuale quejtoöya tli pasörebes antes que mochihuas. Itiecojua de yaja oquetlönque meyac tomi porque inu sisehuanu cuale quemelfea giente tli pasörebes ca yejua mustla bictla. ¹⁷ Inu sisehuanu opie tiechtoca Pöblos hua tejua. Oquejto checöhuac:

—Nöncate tlöca tietequapanoa Deus tli lalebes bieyetzintle. Yejua nemiechnunutzta quiene ca nemomöquextisque.

¹⁸ Ejqueu oquechi por meyac tunalte. Por fin Pöblos oquesentiro hua omocuetequis. Oquelfe inu moxicoöne:

—Tietucöyupantzinco Jesucristo temetznahuatea: Xequisa de ijtecopa inu sisehuanu. Pos sa nima inu moxicoöne oquis.

¹⁹ Pero itiecojua de inu sisehuanu oquejtaque que ayecmo oquepexque manera quiene ca quetlönisque tomi por medio de inu sisehuanu. Entunses oquemaseque Pöblos hua Silas. Oquenbicaque ca tlötlajtoönejme ca tlaijtec pa plösa. ²⁰ Quenpresentörojque ca inu tlötlajtoönejme. Oquejtojtque:

—Nöncate tlöca cate joriojte. Chöchälöne pa topuieblo. ²¹ Quenmachtea giente de costumbres tli tejua abele tecselisque nimpör amo conbenierebe tecchihuasque porque tejua teromanos tecate.

²² Entunses inu giente omajcojque cuntra Pöblo hua Silas. Inu tlötlajtoönejme otlanahu-atejque ma quenquextelicö intzotzomajua para ma quenbitequecö ca tlacutl. ²³ Cuöc ye oquenbitejque meyac, tlötlajtoönejme oquencalaquejque pa cörsel. Oquelfejque inu cörseliero ma quemixute ca meyac cueröro. ²⁴ Cuöc oquecac inu cörseliero quiene ca oquenahuatejque, oquencalaque Pöblo hua Silas ipa inu calejtec cache ca tlaijtec pa cörsel. Ompa oquencöjtie ca imecxehua tzecajtaya entre unte bepalte.

²⁵ Quieme ca tlajco yohuac Pöblo hua Silas motlajtlötlajtiöya hua tiecuicatiöya Deus. Hua inu ocseque priesoste quencactaya. ²⁶ Sa de repiente otlöole lalebes checöhuac hasta que oquetzetzelo inu cimientos de cörsel. Pa inu momento noche pobieltajte omotlapojque. Noche carienajte omotojtonque de ipa priesoste. ²⁷ Yecuöquenu inu cörseliero otlachix. Oquejtac que noche pobieltajte tlajtojaya. Ca inu oquequexte iespöda para momectisquea porque oquepensöro que inu priesoste ye ochucholajque. ²⁸ Pero Pöblo oquetzajtzele:

—Amo xomomecte. Nö tecate tonochtie.

²⁹ Entunses inu cörseliero otlajtla por sente tlöbile. Ocalactequis. Omotlajcal imicxetla Pöblo hua Silas. Pos omajcöbebeyocaya. ³⁰ Entunses cörseliero oquenbicac Pöblo hua Silas ca queyöhuac. Oquentlajtlane:

—Señores, ¿tli necchihuas para nomöquextis?

³¹ Yejua oquejtojque:

—Xomoneltoca ca Tlöcatzintle Jesús hua tomomöquextis taja ca noche tli cajcate pa mochö.

³² Entunses Pöblo hua Silas oquenunutzque yaja de tietlajtultzi Tlöcatzintle ca tiehua noche tli oyejyeya ipa ichö. ³³ Mös turavea ca yohuale oyeya, inu cörseliero oquenpöcac heridas de Pöblo hua de Silas. Entunses inu cörseliero ca noche isohua hua ipelhua sa nima mocuötiequejque. ³⁴ Sötiepa inu cöseliero oquenbicac Pöblo hua Silas ca ichö. Ompa oquentlamacac. Yaja ca noche tli oyejyeya pa ichö opajpöjque porque ye omoneltocaque ca Deus.

³⁵ Ca ise inu tlötlajtoönejme cualentitlanque policías. Oquelfejque inu cörseliero:

—Xequencajcöhua inu niecate tlöca ma quisacö.

³⁶ Entunses inu cörseliero oquelfe Pöblo:

—Ye oniechnahuatejque inu tlötlajtoönejme nele ma nemiechajcöhua. Xehuölöcö noso, hua xeyöcö ca cuale.

³⁷ Pero Pöblo oquemelfe inu policías:

—Tejua tecate teciudadanos romanos. Tlötlajtoönejme otiechbitejque imixtla giente. Otiechbitejque mös amo yetla oqueniextejque cuntra tejua para otiechbitejque. Sötiepa otiechcalaquejque ijtec cörsel. Hua öxö ¿beles tiechajcöhuasque sa ichtecajtzi? Majcamo ejqueu. Ma huölöcö yejua mismo para tiechquextisque.

³⁸ Inu policías oquemelfito tlötlajtoönejme de noche inu. Pos inu tlötlajtoönejme omajcömejque cuöc oquematque que Pöblo hua Silas oyejyeya ciudadanos romanos. ³⁹ Entunses uyajque hua oquentlajtlanejque Pöblo hua Silas ma quenperdonörucö lo que tli oquenchibejque. Sa nima oquenquextejque de ipa cörsel. Oquentlölajtejque ma quisacö de inu puieblo. ⁴⁰ Entunses Pöblo hua Silas oquisque de ipa cörsel hua uyajque ca ichö de Lidia. Cuöc ye oquemejtaque hermanos hua oquentlajtulmacaque, entunses uyajque.

¹ Pöbło hua Silas opanuque pa puieblos de Anfípölis hua Apölonia. Sötiepa ajaseto pa puieblo de Tesalónica. Ompa oyeya sente teopanconetzi de joriojte. ² Confurme inu costumbre tli quepeaya, Pöbło uya pa inu teopanconetzi. Por yeye semöna pa cara söbro tlajtlajtoöya ca yejua. Ocasesc tietlajtultzi Deus ³ para oquemelfe que inu Cristo öque Deus otieixpejpenque oquepexque que quesufrirusque hua que mecoas hua que yulebihuas. Pöbło oquejto:

—Naja nemiechnunutzta de Jesús. Bel yejuatzi Jesús iloac Cristo.

⁴ Entunses seque de yejua omoneltocaque hua mosietelejque ca Pöbło hua Silas. Ompa oyejyeya griegos tli tieteochihuaya Deus. Omoneltocaque meyactie de inu griegos nuyejque hua meyactie sohuame tli cache bejbeye momajtaya pa puieblo. Yejua nuyejque mosietelejque ca Pöbło hua Silas. ⁵ Pero inu joriojte tli amo moneltocaque ochöhuatque lalebes. Oquensentlölejque seque tlöca tli tlatzejque hua yulpetzoteque. Ca yejua ocajcojque giente hua chöchälönque pa puieblo. Otlatiemuto pa ichö de Jasón. Quentimoöya Pöbło hua Silas. Oquenejque quenquextisquea para quenbicasquea pa junta. ⁶ Cuöc amo oquenniextejque ompa, oquenbicaque ca fuiersa Jasón hua ocseque hermanos. Oquenbicaque ca intlac tlötlajtoönejme de inu puieblo. Oquejtojque:

—Nöncate tlöca quenpasolojteneme giente ca nobeyo ipa noche tlöltecpectle. Hua öxö ye ohuölajque ca necö. ⁷ Nönca Jasón ye oquencalute pa ichö. Yejua quechihua cuntra inu leyes de torey César. Quejetoa que onca ocsente rey que yaja Jesús.

⁸ Cuöc giente hua tlötlajtoönejme oquecajque inu, omotequepachojque. ⁹ Jasón hua inu ocseque creyentes oquenmacaque fiönsa de tomi hua ca inu oquencöjque ma yöcö.

Pöbło hua Silas ajaseto pa puieblo de Berea

¹⁰ Sa nima inu hermanos oquenchihualtejque Pöbło hua Silas ma quisacö inu yohuale para ca pan puieblo de Berea. Cuöc Pöbło hua Silas ajaseto pa Berea, uyajque miero pa teopanconetzi de joriojte. ¹¹ Inu joriojte de Berea cache cuale giente oyejyeya que inu joriojte de Tesalónica. Oquecajque tietlajtultzi Deus ca meyac gönas. Mumustla oquetiemojque ipa teotlajtule para abier tlö oyeya ejqueu quiene Pöbło hua Silas oquemelfejque. ¹² Hua ca inu meyactie joriojte omoneltocaque. Nuyejque entre inu griegos omoneltocaque meyactie sohuame tli bejbeye omomajtaya pa inu puieblo, hua omoneltocaque meyactie tlöca. ¹³ Pero cuöc inu joriojte de Tesalónica oquematque que Pöbło oyeya pa Berea hua quennunutztaya giente de tietlajtultzi Deus, entunses yejua uyajque pa Berea. Oquentlötlabielmectejque giente hua giente chöchälönque. ¹⁴ Cuöquenuju inu hermanos sa nima oquetitlanque Pöbło ma beya hasta itech lamör. Pero Silas hua Timoteo omocöjque pa Berea. ¹⁵ Inu tlöca tli uyajque ca Pöbło oquebicaque hasta pa puieblo de Atenas. Entunses yejua omocuejque ca Berea. Oquemelfejque Silas hua Timoteo lo que tli Pöbło oquejto, que ma Silas hua Timoteo ma yöcö sa nima para ipa asesque Pöbło pa Atenas.

Pöbło oquennunutztaya giente de Jesús pa puieblo de Atenas

¹⁶ Mientras que Pöbło quenchihtaya Silas hua Timoteo pa Atenas, omotlöocolte porque oquemejtac meyactie ixniehualojme pa inu puieblo. ¹⁷ Yaja ica pa inu teopanconetzi Pöbło tlajtlajtoöya ca joriojte hua ca giente tli tieteochihuaya Deus. Nuyejque mumustla tlajtlajtoöya ca giente tli quennömejque pa plösa. ¹⁸ Ompa oyejyeya seque tlöca tli questudiörojque libros de giente tli mocuitejque epicureos hua ocseque tli questudiörojque libros de giente tli mocuitejque estoicos. Seque oquejtojque:

—¿Tlininu tiechelfisneque nönca tlöcatl tli tönto tlajtlajtoa?

Ocseque oquejtojque:

—Niese que quechihua propaganda para ocseque deuste.

Ejqueu oquejtojqe porque Pöblo oquennunutz de Jesús hua de Yulebelestle. ¹⁹ Entunses inu giente oquebicaque Pöblo ipa sente locör itucö Areópago cöne seme quepeaya juntas. Yejua oquetlajtlanejqe Pöblo:

—¿Cuale tetiechelfis claramente tli quejtusneque ini yancuec tlamachtelestle tli tecualecac? ²⁰ Pos tetiechelfea tlimach tli amo tecasojcömate hua tecneque tecmatesque tli quejtusneque noche ini.

²¹ Ejqueu oquejtojqe porque noche giente de Atenas hua nuyejqe noche giente tli amo de ompa oyeya però ochajchöntejque ompa, amo quemimportöroa ocsente canajyetla tlöcamo sa queneque quejtusque hua quecaquesque noche tli yancuec.

²² Entunses Pöblo omoquetz intzölö yejua pa inu locör de Areópago. Oquejto:

—Señores de Atenas. Ca nobeyo nequejta que nemejua lalebes nenreligiosos nencate.

²³ Naja netlachixtenemeya noche sösantle tli nencusöroa para nenquenteochihuasque noche nemodeushua. Onecniextito sente ajtöl cöne quejtoa ejqueyi: “Nönca ajtöl icaca para inu Deus tli amo tetieixomate”. Bieno, yejuatziju Deus öque nemejua nentieteochihua sin que amo nentieixomate, naja ahorita nemiechnunutzas.

²⁴ Yejuatziju Deus oquechejchijque tlöltecpactle hua elfecac ca tiehua noche sösantle tli quepejpea. Por inu tiehuöxcaju noche elfecac hua tlöltecpactle. Así es que yejuatzi amo nemoa ipa teopame noso ipa ocsente locör tli tejua tequenchejchihua ca tomö.

²⁵ Nuyejqe tejua tli tetlöca abele tli tecchihuasque para yejuatzi, pos yejuatzi amo tli quenesesitöruro. Cache cuale yejuatzi tiechnemitilo tonochtie. Tiechchihualtilo tijyutea hua tiechmacalo noche sösantle.

²⁶ Deus oquechijque sente tlöcatl. Itech inu tlöcatl Deus oquenchijque noche grupos de giente tli cate pa noche naciones, para ma nemecö ca nobeyo pa tlöltecpactle. Yejuatzi oquetzontejque tli tiempo nemesque inu grupos de tlöca hua quentlölejque inu grupos de tlöca ipa locör cöne yesque. ²⁷ Oquechijque ejqueu para que giente ma tietiemucö yejuatzi ca inu esperanza de que cuale mopachusque tietlac hua ejqueu tieixomatesque yejuatzi. Pos de melöhuac Deus amo bejca iloac de cara sente de tejua. ²⁸ Tejua teneme por yejuatzi hua tojulina hua oncö tecate por yejuatzi. Pos seque poetas de nemejua oquejtojqe: “Tejua tecate tetiepelhua Deus”. ²⁹ Entunses tlö tejua tecate tetiepelhua Deus, majcamo tecpensörucö que Deus iloac quiename sente ixniehualo de canajyetla tli öque quechejchihua de oro noso de plöta noso de tietetu. Tlöca quechejchihua cualtzetzi noche inu ixniehualojme sa quiene ca yejua quenenebelea, però amo ejqueu iloac Deus.

³⁰ Ca ye niepa amo casojcömatque tlöca lo que tli oquechijque cuntra Deus. Por inu Deus oquechijque quiename tlö amo yetla tlajtlacoöne. Cache öxö Deus quennahuatilo tlöca ipa noche locör que ma moyulcuepacö de intlajtlacul. ³¹ Ejqueu Deus quenequihua ma toyulcuepacö porque quexelojqe sente tunale para pa inu tunale ma quenjuscörucö noche giente de tlöltecpactle. Otieixpejpenque sente tlöcatl para que pa inun tunale inu tlöcatl quenjuscörusque giente san quiene ca conbenierebe. Pos Deus tieyulebitiluc inu tlöcatl de intzölö mimejqe hua de inu manera otiechejtetejqe que tieixpejpenque para quechihuasque inu tequetl.

³² Cuöc inu griegos oquecajqe que Jesús oyulebihuac de intzölö mimejqe, seque omoburlörojque de inu. Ocseque oquejtojqe:

—Cache cuale tejcaquesque pa ocsente tunale lo que tli taja tetiechnunutzteca.

³³ Ejqueu noso Pöblo oquis de ipa inu junta. ³⁴ Però seque giente oquetocaque Pöblo hua omoneltocaque. Sente de yejua itucö Dionisio. Dionisio oyeya sente de yejua tli seme oyeya pa junta pa inu locör de Areópago. Nuyejqe intzölö yejua oyeya sente sohuatl itucö Dámaris tli omoneltocac. Ocseque nuyejqe omoneltocaque.

18

Pöblo omocö pa puieblo de Corinto por sie xebetl huan tlajco

¹ Sötiepa de inu, Pöbło oquis de Atenas hua uya hasta puieblo de Corinto. ² Ompa oquenömec sente joreyo itucö Aquila. Inu tlöcatl oyeya de sente tlöle itucö Ponto. Aquila hua isohua Priscila quemach ohualiejque de inu nación de Italia porque inu emperador Claudio otlanahuate que noche joriojte ma quisacö de Roma, inu capital de Italia. Hua öxö ompa pa Corinto Pöbło oquentlajpalo pa inchö. ³ Pöbło oquepex inu mismo tequetl tli yejua oquepexque. Por inu omocalute pa inchö hua ompa tequeteya. Pos yejua quechejchihuaya möntajcalte para quenamacasque. ⁴ Cara söbro Pöbło oyöya pa teopanconetzi. Ompa tlajtlajtoöya ca joriojte hua ca giente tli amo joriojte. Pöbło oquenec ma moneltocacö tieca Cristo.

⁵ Silas hua Timoteo ohualiejque de inu tlöle de Macedonia hua oaseto pa Corinto. Cuöquenuju Pöbło ye quennunutztaya giente de tietlajtultzi Deus mumustla. Oquemelfe joriojte que inu Cristo tli yejua quechixtaya ye ohualiloac. Oquemelfe claramente que Jesús iloac Cristo. Cristo quejtusneque Tlaixpejpentle de Deus. ⁶ Pero inu joriojte opiejque omoponierojque hua ochecuatlajtojque. Entunses Pöbło oquetzetzelo itlaquie quieme sieñas de que amo oqueselejque tietlajtultzi Deus. Oquemelfe:

—Nemejua nenixniempolebesque pero nenquepea tlajtlacule nemejua mismo porque amo nenqueneque nemoneltocasque. Naja amo necpea tlajtlacule porque ye onemiechnunutz de Jesucristo. Desde öxö para ca adelönte naja neyös ca giente tli amo joriojte para nequennunutzas de yejuatzli.

⁷ Pöbło oquis de inu teopanconetzi hua uya ca ichö de sente tlöcatl itucö Tito Justo. Inu tlöcatl tieteochihuaya Deus, hua chönteya itlac inu teopanconetzi. ⁸ Sente tlöcatl itucö Crispo oyeya tlayecönque de inu teopanconetzi. Omoneltocac tieca Tlöcatzintle ca noche isohua hua ipelhua. Nuyejque meyac giente de Corinto tli amo oyöya pa inu teopanconetzi oquecajque tietlajtultzi Deus. Omoneltocaque hua omocuötiequejque. ⁹ Sente yohuale Pöbło oquejtac quiename ipa cochtiemequelestle que Deus oquelfejque:

—Amo xomomajte. Xecsequiro tetlanunutzas. Amo xejquetza mocamac. ¹⁰ Naja temetzixutejteneme. Amo öque nejcöhuas ma metzase para metzcocus. Pos oc meyactie giente pa ini puieblo moneltocasque ca naja.

¹¹ Pöbło omocö pa Corinto sie xebetl huan tlajco. Quenmactiöya giente de tietlajtultzi Deus. ¹² Pa inu tiempo Galiön oyeya cubernadur de inu tlöle de Acaya. Entunses joriojte omajcojque cuntra Pöbło. Oquebicaque ca itlac cubernadur Galiön. ¹³ Oquelfejque cubernadur:

—Ini nönca tlöcatl quenmachtejteneme giente ma tieteochihuacö Deus de sie maniera tli amo icaca confurme toley.

¹⁴ Pöbło tlajtlajtusquea pero Galiön oquemelfe joriojte:

—Xequajtacö nenjoriojte. Amo xeniechpasolucö. Tlö nönca tlöcatl otlachtequene noso otlamectiöne noso canajyetla ejqueu, quienamo nemiechcaquesquea. ¹⁵ Pero amo ejqueu icaca. Nemejua nencualöne por lo que tli quemachtea nönca tlöcatl hua por asuntos de tlajtulme hua tucöyume hua por inu ley tli nenquepea. Xecarreglörucö nemejua mismos. Naja quieme necubernadur amo necneque necalaques ipa ini nöncate asuntos.

¹⁶ Yecuöquenu ca fuiersa oquenquexte inu joriojte ca queyöhuac. ¹⁷ Entunses innoctie ocaseque Sóstenes öque tlayecönque pa inu teopanconetzi. Oquebitejque miero ompa ixtla inu cubernadur. Pero niontle de inu amo oquetlöocolte inu cubernadur Galiön.

¹⁸ Pöbło omocö pa Corinto meyac tiempo turavea. Sie tunale sötiepa oquennahuate hermanos que ye iya. Entunses Pöbło otlejcoc pa sente börco para iyös ca inu nación de Siria. Nuyejque Priscila hua Aquila uyajque ca Pöbło. Pa puieblo de Cencrea Pöbło omocuöpejpec hasta itzintech itzo quieme sieña de que oquepex sente compromiso ca Deus. ¹⁹ Cuöc ajaseto pa puieblo de Efeso, Pöbło oquencöjtie Priscila hua Aquila. Ocalac ipa inu teopanconetzi hua tlajtlajtoöya ca joriojte tli ompa mosentlöliöya. ²⁰ Yejua

oquetlalfejqe Pöbło ma mocöhua cache meyac tiempo ca yejua pero amo oquenec.

²¹ Entunses Pöbło oquennahuete inu joriojte que ye iya. Oquejto:

—Mach Deus quenèquesque nocuepas ocsajpa nemiechejtaqui.

Entunses Pöbło otlejcoc pa börco hua oquistie de Efeso.

Pöbło omocuec ca Antioquía hua oquis ca yexpa quieme misionero

²² Pöbło opanuc pa puieblo de Cesarea. Yecuöquenu uya ca Jerusalén. Oquentlajpaluto inu creyentes tli omosentlöliöya ompa. Sötiepa omocuec ca Antioquía. ²³ Pöbło oyeya pa Antioquía quiesque tiempo. Yecuöquenu oquis ocsajpa. Oyöya primero ipa tlöle de Galacia hua entunses ipa tlöle de Frigia. Cöne oyöya oquenyulchecöjtöya noche creyentes.

Apolos tlanunutzaya de Jesús ipa puieblo de Efeso

²⁴ Sente joreyo itucö Apolos oaseto pa puieblo de Efeso. Oyeya de ciudad itucö Alejandría. Quepeaya manera cuöcualtzi para tlanunutzas. Oquixomat tietlajtultzi Deus lalebes cuale. ²⁵ Oqueyequixomat tieojfe Deus hua tlanunutzaya ca meyac gönas. Tlajtlahtoöya hua tlamachtioöya de Jesús perfectamente bien mös sa quemateya quiene ca öque mocuötiequis quieme Xohuö Bautista tlacuötiequiöya. ²⁶ Apolos opie tlajtlahto ca meyac balur pa inu teopanconetzi. Cuöc Priscila hua Aquila oquecajqe Apolos, omonunutzque ca yaja. Oquemachtejqe ocseque söstantle de tieojfe Deus tli Apolos quepoloöya. ²⁷ Cuöc Apolos oquenec iyös ca pa tlöle de Acaya, inu hermanos de Efeso oqueyulchecöjqe ma beya. Oquentlajcuelfejque creyentes de Acaya ma queselicö Apolos ca meyac confiönsa. Inu creyentes Deus oquenchibelejqe bieye favur porque yejuatzi quenpaliebejqe ma moneltocacö. Cuöc Apolos oaseto pa tlöle de Acaya, oquenpaliebe inu creyentes lalebes meyac. ²⁸ Oquenpaliebe meyac porque cuöc omosentlölejque oquemejtete quiene ca joriojte motlapolultiöya. Pos inu joriojte amo quepeaya tli quejtusque. Joriojte quepeaya esperanza que sie tunale Deus tiehualtitlanesque inu Cristo öque yejuatzi tieixpejpenque. Apolos ocasec tietlajtultzi Deus hua oquemejtetejqe gente que yejuatzi Jesús iloac Cristo.

19

Pöbło oaseto pa puieblo de Efeso

¹ Mientras que Apolos oyeya pa Corinto, Pöbło ocasec ojtle tli oyöya ca tlapac. Oaseto pa Efeso cöne oquennömec seque creyentes. ² Oquentlajtlane:

—¿Onentieresibirojqe Espíritu Sönto ipa nemoyulo cuöc nemoneltocaque?

Oquenönquelejque:

—Pos nimpor ayemo tejqaque tlö onca Espíritu Sönto.

³ Entunses Pöbło oquentlajtlane:

—¿Quiene ca nemocuötiequejqe?

Oquenönquelejque:

—Otocuötiequejqe quieme Xohuö Bautista otlacuötieque.

⁴ Pöbło oquemelfe:

—Xohuö tlacuötiequiöya quieme sieñas de que gente ye omoyulcuejqe. Nuyejque Xohuö oquemelfe gente ma moneltocacö ca yejuatzi tli hualiloas sötiepa de Xohuö, es decir, ca yejuatzi Jesús.

⁵ Cuöc yejua oquecajqe lo que tli Pöbło oquejto, omocuötiequejqe tietucöyupantzincö Tlöcatzintle Jesús. ⁶ Cuöc Pöbło oquentlöle imöhua impa yejua, ocalacoac Espíritu Sönto ipa inyulo. Cuöquenuju yejua otlajtlahtojqe ca ocsejen idiomas tli amo quemateya, hua otlayulepantejqe de tietlajtultzi Deus. ⁷ Oyejyeya quieme majtlactle huan ume tlöca por noche.

⁸ Por yeye mietztle Pöblo oyöya pa inu teopanconetzi. Tlajtlajtoöya ca meyac balur. Seme quennunutztaya giente hua quemelfejtaya quiene ca Deus tlamandörurus, para ma moneltocacö ca yejuatzi. ⁹ Pero seque omoyultepitzojque hua amo oquenejque tlaneltocaque ca tietlajtultzi Deus. Imixtla noche giente ochecuatlajtojque cuntra tieojfe Deus. Entunses Pöblo omoxelo de yejua. Oquenbicac inu creyentes pa sente esfiela cöne nuyejque tlamachtioöya sente tlöcatl itucö Tiranno. Pöblo monunutztaya mumustla ca yejua pa inu esfiela. ¹⁰ Ejqueu oquechi por ume xebetl. Porieso noche giente tli oyejyeya pa inu tlöle de Asia oquecajque tietlajtultzi Deus. Noche joriojte hua noche giente tli amo joriojte oquecajque. ¹¹ Deus oquemacaque Pöblo beletelestle para oquechi tietzöbeme bejbeye. ¹² Tönto lalebes bieye tlachihuale quechihuaya Pöblo que hasta panitojme hua babierojte oquentlölejque giente itech icuierpo. Yecuöquenu oquenbicaque ca intlac cocoxcötzetzi. Hua ca inu opajteque inu cocoxcötzetzi de incocoleshua hua moxicoöneme oquisque de imijtecopa.

¹³ Ompa pa Efeso oyejyeya seque joriojte tli sa tiepa quequistenemeya. Yejua oquejtojque nele quepeaya beletelestle para quechihualtisque moxicoöneme ma quisacö de imijtecopa giente. Oquenejque cusörsusque tietucöyutzi Tlöcatzintle Jesús para quenquextisque inu moxicoöneme de imijtecopa giente. Por inu cara sesen tlöcatl de yejua oquemelfe moxicoöneme:

—Pos Pöblo tlanunutzta de Jesús. Hua öxö naja nemiechnahuatea tietucöyupantzinco sie yejuatzi Jesús, xequisacö.

¹⁴ Ejqueu oquechijque inu checumeme ipelhua de sente joreyo itucö Esceva. Esceva oyeya sente jefe de teopexcötzetzi. ¹⁵ Pero cuöc inu checumeme tlöca oquejtojque ejqueu, sente moxicoöne oquennönquele. Oquejto:

—Nequixomate Jesús hua necmate öquenu Pöblo. Pero nemejua, ¿öquenu nencate?

¹⁶ Hua ca inu, inu tlöcatl tli quepeaya inu moxicoöne ijtecopa omomerö impa inu tlöca. Oquemasec *innocchie ca meyac fuiersa. Oquencoco tönto hua tönto que hasta ochucholajque de ichö xipetzteque hua ca meyac heridas. ¹⁷ Noche joriojte pa Efeso hua noche tli amo joriojte oquematque de inu hua lalebes omomajtejque. Pos giente otiechamöjque Tlöcatzintle Jesús. ¹⁸ Nuyejque meyactie de tli ye omoneltocaque ajaseto ompa. Omoyulcuitejque hua oquejtojque ixmantete lo que tli antes oquechijque tli amo cuale. ¹⁹ Meyactie tli antes oquechihuaya söstantle chichyutl oquenhualecaque inömahua. Oquenzutlaltejque imixtla noche giente. Oquechijque cuenta para abier quiejquech obaliere noche inu ömame. Obaliere quieme cincuenta mil piasas de plöta. ²⁰ Así es que Deus ocusörojque tietlajtultzi ca meyac beletelestle ca giente. Cache meyac giente hua cache meyac giente oquecajque tietlajtultzi.

²¹ Sötiepa de que omochi noche inu, Pöblo omocuaipetzo para oquentlajpaluto noche locör pa tlöle de Macedonia hua pa tlöle de Acaya. Oquenec quesequirus hasta Jerusalén. Oquejto:

—Cuöc ye ompa neyes quiesque tunalte pa Jerusalén, entunses necpea neyös nuyejque ca Roma.

²² Timoteo hua Erasto seme quepaliebiöya Pöblo. Yaja oquentitla inu unteme ma yöcö hasta pan tlöle de Macedonia. Mientras que uyajque yejua, Pöblo omocö turavea pa tlöle de Asia quiesque tunalte.

Ochöchalönque giente pa Efeso

²³ Pa nieca tiempo lalebes ochöchalönque giente porque amo oquecualajtaque quecaquesque tli Pöblo oquejto de tieojfe Deus. ²⁴ Sente tlöcatl itucö Demetrio oyeya platiero. Ca plöta quenchiuaya teopancucone tzequetzetzi de sente deus itucö Diana.

* **19:16** Cuale nuyejque motradusirus: “innehua”.

Inu tlöca tli otequetque ca Demetrio oquentlönque cuale tomi. ²⁵ Demetrio oquensentlöle noche inu tequetque hua ocseque tli oquechijque tequetl quiename inu. Oquemelfe:

—Señores, nemejua nenquemate que tejua lalebes cuale teneme por ini nönca tequetl tli tecpea. ²⁶ Pero ye onenquejtaque inu Pöblo. Ye onenquecajque quiene ca yaja tlanunutzteneme. Quejtoa que inu ixniehualojme tli tlöca quechejchihua amo deuste cate. Por inu meyactie giente öxö quechihua cöso de yaja. Amo sa giente de Efeso tlöcamo nuyejque giente pa cöso noche tlöle de Asia. ²⁷ Sie tiro amo cuale inu. Quepea riesco que ayecmo tecpeasque ini nönca tequetl. Hua amo sa inu, tlöcamo nuyejque giente ayecmo pa tlacheasque inu teopantle de Diana öque todeus bieyetzintle. Giente de noche tlöle de Asia hua tlöca ca nobeyo ahorita tietechihua Diana. Pero quepea riesco que ayecmo tietechihuasque.

²⁸ Cuöc inu tlöca tli quechejchihuaya ixniehualojme oquecajque inu, lalebes ocualönque. Oquejtojque checöhuac:

—¡Bieyetzintle iloac tonöntzi Diana! ¡Yejuatzi iloac deus de tonochtie de Efeso!

²⁹ Yecuöquenu giente ochöchalönque pa inu puieblo. Ompa oyejyeya Gayo hua Aristarco, öque oyejyeya de tlöle de Macedonia. Yejua yajtenemeya ca Pöblo. Inu giente oquemaseque Gayo hua Aristarco, hua oquenbicaque ca fuiersa ipa locör cöne quechihuaya juntas cuöc noche giente mosentlöliöya. ³⁰ Pöblo oquenec calaquesquea ompa cöne ochöchalöntaya para tlajtlajtusquea ca inu giente, pero inu creyentes amo oquecöjque ma calaque. ³¹ Seque tlötlajtoönejme oyejyeya amigos de Pöblo. Yejua otlatitlanque para oquelfejque Pöblo nuyejque majcamo calaque ompau. ³² Ompa pa inu locör cöne tlamach yejyeya giente, seque oquejtojque una cosa hua ocseque oquejtojque ocsente porque inu giente sa chöchalöntequisque. Cöso innochtie amo oquematque tli ipampa omosentlölejque. ³³ Entunses inu joriojte oquemöpiejque sente tlöcatl itucö Alejandro. Oquenejque ma yaja ma moquetzate imixtla giente. Seque giente oquelfejque tli ipampa omosentlölejque. Entunses Alejandro oquenchibele sieña ca imö ma sa yetacö. Oquenec tlajtlajtus para que giente majcamo cualönecö cuntra joriojte. ³⁴ Cuöc inu giente oquejtaque que Alejandro oyeya joreyo, oquejtojque checöhuac quieme tlö sa sie tlöcatl:

—¡Bieyetzintle iloac tonöntzi Diana! ¡Yejuatzi iloac deus de tonochtie de Efeso!

Oquesequirojque otzajtzajzeque quieme ume ura.

³⁵ Entunses inu secretario de inu puieblo oquechibele giente ma sa yetacö. Oquejto:

—Señores de Efeso. Noche giente ca nobeyo quemate que tejua de Efeso tequixutea ini teopantle de Diana todeus bieyetzintle. Quemate que tejua tequixutea nuyejque inu ixniehualo de yejuatzi tli obetzeco de elfecac. ³⁶ Pos abele öque quejtus que amo melöhuac. Sa xeyetacö noso. Amo xecchihuacö niontle quieme ini sin cachtö nenqueyecpensörusque cuale. ³⁷ Nöncate tlöca tli nenquenhualecaque necö nimpör amo otlachtejque pa teopantle de Diana nimpör amo checuatlajtojque cuntra Diana öque todeus. ³⁸ Tlö Demetrio hua inu tlöca tli tequete ca yaja queneque moquejörusque cuntra canajyeca, pos oncate tlötlajtoönejme pa juscöro para inca motejtiefisique. ³⁹ Tlö nenquepea canajyetla ocsente asunto cuale carreglörusque ipa sente junta. ⁴⁰ Pos onca peligro de que ocseque giente motiefisique cuntra tejua ahorita. Quejtusque que tejua otajcojque cuntra cubierno hua por inu otechöchalönque öxö. Pos abele tequemelfisquea nion sente arasu tli ipampa otechöchalönque öxö tlö tiechtajtlanisquea.

⁴¹ Cuöc inu secretario oquejto inu, oquemelfe giente ma moxiexelucö.

20

Pöblo uya ca ipa tlöle de Macedonia hua ipa tlöle de Grecia

¹ Cuöc giente de Efeso ayecmo ochöchalönque, Pöblo otlatitla ma mosentlölicö inu creyentes para oquentlajtulmacac. Entunses oquemelfe que ye iya. Oquis para

Macedonia. ² Pöbło oquentlajpalo noche creyentes ipa niecate puieblos cöne ca yaja oyöya. Oquenyulchecö lalebes meyac por lo que tli oquemelfe. Sötiepa oaseto pa tlöle de Grecia. ³ Ompa omocö yeye mietztle. Sötiepa tlejcosquea ipa sente börco para iyösquea ca inu nación de Siria. Yecuöquenu oquemat que joriojte queplaneöroöya quiene casesquea yaja. Entunses oquepensöro que cache cuale iyös ca ocsente ojtle. Por inu uya ocsajpa ca Macedonia. ⁴ Ocseque hermanos uyajque ca Pöbło hasta Asia. Sópater de puieblo de Berea uya. Sópater oyeya iconie de Piro. Aristarco hua Segundo de puieblo de Tesalónica uyajque. Gayo de Derbe uya. Timoteo uya. Nuyejque Tíquico hua Trófimo de Asia uyajque. ⁵ Ini nöncate hermanos uyajque adelönte. Otiechchixque pa puieblo de Troas. ⁶ Omochi inu yelfetl cuöc joriojte quecua pöntzi sin levadura. Sötiepa de inu yelfetl tejua otetlejcoque pa börco hua otequisque de puieblo de Filipos. Otiechcostöro möcuile tunale para impa otaseto tocnihua pa Troas. Ompa otechecumetejque.

Pöbło oquentlajpalo creyentes pa puieblo de Troas

⁷ Pa primero tunale de semöna tonochtie tecreyentes otosentlölejque para otecchijque inu santa cena. Pöbło omonunutz ca tli ompa oyejyeya. Oquepex que quisas pa mustlateca. Por inu oquesequiro otlajtlajto hasta tlajco yohuac. ⁸ Tlamachyejyeya pa inu calejtec icpac cale. Oyejyeya meyactie lömparas tli xutlataya. ⁹ Sente peltuntle itucö Eutico yehuataya pa ventöna. Mientras que Pöbło cache hua cache tlajtlajtojtaya, entunses inu peltuntle cache cochesnequeya. Por fin ocochtac hua obetzeto desde ipa tercer piso. Seque ocönato icuierpo porque ye omec. ¹⁰ Entunses Pöbło otemuc. Omotlancuöquetz itlac icuierpo de inu peltuntle hua oquenöhuajtec. Entunses oquemelfe inu ocseque:

—Amo xomomajticö porque yulejteca.

¹¹ Entunses Pöbło otlejcoc ocsajpa. Otlacua. Yecuöquenu oquesequiro omonunutz ca inu creyentes hasta otlanies. Yecuöquenu uya. ¹² Inu creyentes oquebicaque inu peltuntle ye yulejtaya. Lalebes opajpöjque por inu.

Pöbło ca ocseque uyajque de puieblo de Troas hasta puieblo de Mileto

¹³ Tejua oteyajque adelönte. Otetlejcoque pa börco hasta puieblo de Asón para tecnömequesque Pöbło ompau. Ejqueu otecarreglöröjque porque Pöbło oquenec yajtös ipa inu ojtle hasta ompa. ¹⁴ Cuöc otecnömejque Pöbło pa puieblo de Asón, yaja otlejcoc pa börco ca tejua. Oteyajque ca puieblo de Mitilene. ¹⁵ Entunses otequisque de Mitilene. Pa mustlateca otepanuque itlac sente tlöltojpole ijtec lamör que itucö Quió. Pa ocsente tunale otaseto pa inu tlöltojpole de Samos. Entunses otaseto pa mustlateca pa puieblo de Mileto. ¹⁶ Amo oteyajque hasta puieblo de Efeso porque Pöbło amo oquenec iyes pa tlöle de Asia meyac tiempo. Oquenec aseti sa nima pa Jerusalén tlö posible para ompa iyes para inu yelfetl de joriojte itucö Pentecostés.

Pöbło oquennunutz biebertzetzi de puieblo de Efeso

¹⁷ Cuöc Pöbło oyeya pa puieblo de Mileto, otlatitla ma huölöcö inu biebertzetzi tli quentlachiliöya inu creyentes de Efeso. ¹⁸ Cuöc ajaseto inu biebertzetzi itlac Pöbło, oquemelfe:

—Nemajua nenquemate quiene ca noportöröjtebitz desde inu primero tunale cuöc cachtö onehuöla necö pa Asia. ¹⁹ Nenquemate que noche tiempo que oneyeya nemotzölö netietequapanoöya Tlöcatzintle. Onopichaque hua onequenchuquele giente, hua onecsufriro meyac por lo que tli oniechchibelejque joriojte. ²⁰ Nenquemate que amo onoquetz de nemiechnunutz noche söstantle tlin cuale para bien de nemajua. Onemiechmachte cuöc nemosentlölejque. Nuyejque onemiechmachte chöntle por chöntle. ²¹ Onequemelfiöya joriojte hua giente tli amo joriojte ma moyulcuepacö ca Deus hua ma moneltocacö tieca toTlöcatzintle Jesús. ²² Hua öxö neya ca Jerusalén porque Espiritu Sönto niechchihualtilo ma nebeja. Amo necmate tli niechpasörus ompau. ²³ Solamiente

necmate que puieblo por puieblo cõne nepanutebitz Espíritu Sõnto niechelfilutebitz que giente niechtzajtzacuasque pa cõrsel hua necsufrirojtas meyac tietunie tiecoco. ²⁴ Pero amo niechimportõroa tlõ niechquextelisque nonemeles. Lo que tli niechimportõroa es que ma neclame noteque. Ma nejcumpliro noche lo que tli Tlõcatzintle Jesús oniechmacaque ma necchihua. Es decir, ma netlamelõjcõpoa inu cuale tlamachestelestle de quiene Deus tiechmacalo tiefavur.

²⁵ 'Naja onemiechnunutztenemeya de quiene ca Deus tlamandõruro. Öxõ necaca seguro que nionõque de nemejua ayecmo quiema niechejtas ocsajpa. ²⁶ Porieso necneque nemiechelfis ahorita que amo necpea niontle tlajtlacule tlõ canajyeca amo momõquextis. ²⁷ Pos ca noche noyulo naja onemiechnunutz noche lo que tli Deus tiechtlajtulmacalo. Amo yetla polebe para nemiechelfis. ²⁸ Xomotlachilicõ noso hua xequemixuticõ noche tocnihua quiename sente calnielojpexque quemixutea icalnielõjua. Espíritu Sõnto ye onemiechtlõlejque para nenyisque nenobispos para xequentlachilicõ. Hua quiename sente calnielojpexque quentlamaca icalnielõjua, ejqueu xequenpaliebicõ tli cate creyentes ca Deus, tli yejuatzi oquencujque *ca tieyesojtzi. ²⁹ Necmate que cuõc ayecmo oncõ neca, huõlõsque tlõca petzoteque nemotzõlõ, quiename coyume tli quencuasemana calnielojte. ³⁰ Entre nemejua mismos majcoquesque seque tli nemiechmachtisque tli amo melõhuac para que seque creyentes ma quentocacõ yejua. ³¹ Xecpeacõ cuerõro, noso. Xequelnõmequecõ que por yeye xebetl naja ipa hua ipa yohualen tunale onemiechmachtioya nemonochtie hasta que onechucaya por nemejua.

³² 'Hua öxõ, ma Deus nemiechixuticõ hua ma seme xeyetacõ ca yejuatzi. Tietlajtultzi nemiechelfea de tiebieye favur tli tiechmacalo, hua nemiechtlajtulmacatiehua que ma xecchihuacõ confurme lo que tli quejtoa tietlajtultzi Deus. Tlõ ejqueu nenquechihuasque entunses Deus cuale nemiechchihualtisque nenyisque nenyulchecõjque. Nuyejque cuale nemiechmacasque locõr ca noche giente tli yejuatzi oquechijque ma yecõ yecteque. ³³ Ayec nequeliabe naja itomi de nionõque nimpõr itzotzomajua. ³⁴ Nemejua mismos nenquemate que onetequet ca nomõhua para onecpex lo que tli otiechpolo naja hua tli yajtenemeya ca naja. ³⁵ Seme nemiechejtetejtibitz sente ejiemplo, para nenquematesque que ejqueu moneque ma õque tequete hua ma quenpaliebe tli quenchibelea fõlta. Xequelnõmequecõ lo que tli oquejtojque Tlõcatzintle Jesús: "Cache cuale icnupel õque quetiema que õque cõna".

³⁶ Cuõc Põblo ye oquejto inu, omotlancuõquetz hua omotlajtlõtlajte ca noche inu biebentzetzi de Efeso. ³⁷ Noche inu biebentzetzi lalebes ochucaque. Oquenõhuajtejqe Põblo hua oquepetzõjque. ³⁸ Omotequepachõjque tõnto porque Põblo oquejto que yejua ayecmo quiema quejtasque yaja. Entunses yejua uyajque ca yaja hasta cõne oyeya bõrco.

21

Põblo uya ca Jerusalén

¹ Cuõc otequencõjtiejque tocnihua, otetlejcoque pa bõrco. Oteyajque deriecho ca inu tlõltojpole ijtec lamõr que itucõ Cos. Pa mustlateca oteyajque ca pa tlõltojpole itucõ Rodas hua sõtiepa oteyajque ca ocsie lõro hasta pa sente puieblo itucõ Pátara. ² Ompa pa Pátara otecniextejque sente bõrco tli oyõya ca pan tlõle de Fenicia. Otetlejcoque ipa inu bõrco hua oteyajque. ³ Otequejtaque inu tlõltojpole pa lamõr itucõ Chipre pero sa otepanuque ca mõyecõmpa de Chipre. Oteyajque hasta otaseto pa Siria. Ompa otecalajque pa puieblo de Tiro porque inu bõrco oquepex que moquetzas ompau para quecõjtiehuas icõrga. ⁴ Otecnõmejque inu creyentes ompau. Otechecumejtejqe ca yejua. Inu creyentes oquelfejque Põblo majcama beya ca Jerusalén. Ejqueu Espíritu Sõnto oquemelfejque ma

* **20:28** Cuale nuyejque motradusirus: "ca tieyesojtzi de tieTlasõjõconie".

quelficö Pöbło. ⁵ Cuöc ye otehecumejtejqe ca yejua, otequisque. Noche inu creyentes ca tiehua insosohuöhua hua inpelhua uyajque ca tejua hasta ca calquisyo de inu puieblo. Ompa ototlancuöquetzque ca itienco lamör hua ototlajtlötlajtejqe. ⁶ Entunses otodespedirojqe. Tejua otetlejqe pa börco hua yejua omocuejqe ca inchajchö.

⁷ Oteyajque de puieblo de Tiro hasta puieblo de Tolemaida. Otequentlajpalojqe tocnihua ompau. Otocöjqe ca yejua sie tunale. ⁸ Pa mustlateca otequisque. Otaseto pa puieblo de Cesarea. Ompa oteyajque ca ichö de Felipe, öque oyeya sente de inu checume tlöca tli quentlacualtejqe hermanos pa Jerusalén. Nuyejque Felipe seme quennunutzaya giente de inu cuale tlamachestelestle. Tejua otocöjqe pa ichö yaja. ⁹ Felipe oquempaya nöbe ichpuchhua tli ayemo omonömeteya. Yejua tlayulepan-tiöya de tietlajtultzi Deus. ¹⁰ Oteyeyeya ompa quiesque tunalte. Yecuöquenu sente tlayulepante itucö Agabo ohualie de estado de Judea. ¹¹ Cuöc otiechejtato, ocasesc icinturón de Pöbło hua omojolpe pa icxehua hua pa imöhua. Oquejto:

—Ejqueu quejtulo Espíritu Sönto, que pa Jerusalén inu joriojte quejilpisque öque ihuöxca nönca cinturón. Yecuöquenu inu joriojte quetiemoctisque yaja ca giente tli amo joriojte.

¹² Cuöc tejua hua tocnihua de Cesarea otejcayque inu, otectlötlajtejqe Pöbło majcamo beya ca Jerusalén. ¹³ Entunses Pöbło onöhuat:

—¿Tlica nenhuca hua nenniechmaca tequepachule ipa noyulo, para majcamo nebeya? Pos naja necaca listo amo sa para ma niechejilpicö tlöcamo hasta para nemeques pa Jerusalén por tiepampa Tlöcatzintle Jesús.

¹⁴ Así es que abele otetzacuilejqe para majcamo beya ca Jerusalén. Entunses ayecmo tli otequejtojqe. Solamente otequejtojqe:

—Ma mochihua tietlanequelestzi Deus.

¹⁵ Sötiepa de quiesque tunalte otopreparörojque hua oteyajque ca Jerusalén. ¹⁶ Seque creyentes de Cesarea uyajque ca tejua. Sente tlöcatl itucö Mnasón oyeya de Chipre hua oyeya creyente por meyac tiempo. Tocihua de Cesarea otiechbicaque pa ichö de Mnasón. Ompa otocalutejqe.

Joriojte ocaseque Pöbło pa teopantle bieye pa Jerusalén

¹⁷ Ompa pa Jerusalén tocnihua otiechselejqe ca meyac pöquelestle. ¹⁸ Pa mustlateca Pöbło uya ca tejua para otectlajpaluto Jacobo. Ompa oteyeyeya nuyejque noche biebzetzzi tli quentlachiliöya inu creyentes. ¹⁹ Pöbło oquentlajpalo. Oquenpubele noche lo que tli Deus oquepaliebejqe para oquechi intzölö giente tli amo joriojte. ²⁰ Cuöc oquecajqe noche inu, otieyectieniejqe Deus. Entunses oquelfejque Pöbło:

—Bieno, hermano. Pero ye tecmate que oncate miles de joriojte tli ye omoneltocaque ca Jesucristo. Pos innoctie quecsijiroa ma noche giente ma quechihuacö tli quejtoa inu ley de Moisés. ²¹ Yejua oquecajqe que taja de ocsie modo tequenmachtejteneme noche joriojte tli chajchönte pa ocseque naciones. Nele tequenmachte que majcamo quechihuacö cöso de lo que tli oquemandöro Moisés. Yejua quejtoa que tequemelfea joriojte nele majcamo quennacayutequecö inpejpelhua nimpör majcamo quechihuacö confurme ocseque costumbres de toreligiön. ²² ¿Tli pasörebes noso? Icacá seguro que inu joriojte quecaquesque que ye otehuöla. ²³ Xecchihua noso ini nönca tli temetzelfisque. Oncate nöbe tlöca totzölö tli quepejpea quecumplirusque sente compromiso ca Deus. ²⁴ Xequenbica inu nöbeme ca taja. Xecchihua nuyejque ca yejua confurme costumbre de joriojte para tomochepöhua hua teyes cuale ca Deus. Xectlaxtlöhua noche göstos para que yejua cuale mocuajcuöpejqe hasta itzintech intzo. De inu manera noche joriojte momacasque cuienta que amo melöhuac lo que tli oquecajqe de taja, tlöcamo quematesque que taja nuyejque tejcumpliroa cuale ca inu ley de Moisés. ²⁵ Ye otequemelfejque giente tli mös amo joriojte ye omoneltocaque. Otequemelfejque lo

que tli otiechparesiero bien para yejua, que majcamo öque quecua lo que tli giente oquetlölejque quieme bentle para ixniehualojme. Majcamo öque *quecua yestle. Majcamo öque quecua nacatl de sente yulcötl tli oquechpötmec. Majcamo öque mopöcte ca sente sohuatl noso sente tlöcatl que amo yaja icompaniero.

²⁶ Pa mustlateca Pöblo oquenbicac inu nöbe tlöca ca yaja. Pöblo nuyejque ca tiehua yejua oquechi confurme costumbres de joriojte para mochepöhuas hua iyes cuale ca Deus. Yecuöquenu Pöblo ocalac pa teopantle bieye. Otlanhuate pa tlin tunale mocumplirus lo que tli oquechijque confurme inu costumbres. Es decir, otlanhuate tlin tunale oquepexque yejua para quenmejmectisque yulcöme quieme bentle para Deus.

²⁷ Cuöc ye miero tlamescüöya inu checume tunale, seque joriojte de tlöle de Asia oquejtaque Pöblo pa teopantle bieye. Pos oquentlötlabielmectejque noche giente tli ompa oyejyeya. Ocaseque Pöblo. ²⁸ Oquejtojque checöhuac:

—¡Señores de tonación Israel! ¡Xetiechpaliebicö! Ini nönca tlöcatl yajteneme pa ocseque naciones. Quenmachtejteneme noche giente tlimach cuntra tonación hua cuntra toley hua cuntra ini nönca teopantle. Hua amo sa inu, tlöcamo ahorita oquencalaque seque giente griegos pa ini teopantle hua ca inu ye oquepetzotele tietepantzi Deus.

²⁹ Oquejtojque ejqueu porque oquepensörojque que Pöblo oquebicac sente griego itucö Trófimo pa inu teopantle bieye mös amo melöhuac. Trófimo oyeya de puieblo de Efeso hua inu joriojte antes oquejtaque Pöblo ca Trófimo pa cayajunte de Jerusalén.

³⁰ Noche giente de Jerusalén ochöchalönque hua meyactie giente omosentlölejtequisque. Entunses ocaseque Pöblo. Oquetlölochpöntajque ca queyöhuac de inu teopantle bieye, hua sa nima oquentzajtzejque pobieltajte de inu teopantle. ³¹ Oquetratörojque quemectisquea Pöblo pero seque giente oquelfito inu coroniel de inu trupa de soltörojte. Oquelfejque nele noche giente de Jerusalén chöchalöntaya. ³² Entunses inu coroniel oquemöntie seque soltörojte hua seque capetönte. Oaseto sa nima cöne giente chöchalöntaya. Cuöc giente oquejtaque inu coroniel ca isoltörojua, ayecmo oquebitejque Pöblo. ³³ Entunses inu coroniel omopacho. Ocasesc Pöblo para quebicas prieso. Oquemelfe isoltörojua ma quejilpicö ca unte carienajte. Sötiepa inu coroniel otlajtla nele öquenu Pöblo hua tlininu oquechi. ³⁴ Seque giente oquejtojque sente cosa hua ocseque giente ocsente. Porieso inu coroniel abele tli oquecac por tönito chöchalönelestle tli oquechijque giente. Entunses otlatitla ma quebicacö Pöblo pa cuartel. ³⁵ Cuöc ajaseto pa inu escalón de cuartel inu soltörojte oquenöpalojtajque Pöblo porque lalebes checöhuac ocualönque giente ca yaja. ³⁶ Pos noche giente tli quentocatöya oquejtojtöya checöhuac:

—¡Xecmecticö!

Pöblo omodefendiero imixtla giente

³⁷ Cuöc soltörojte quecalaquejtaya Pöblo pa inu cuartel, Pöblo oquelfe inu coroniel:

—¿Cuale temetzmolfelis canajyetla?

Inu coroniel oquenönquele:

—¿Tecmate taja tetlajtlajtus ca idioma griego? ³⁸ Entunses ¿taja amo tecaca inu tlöcatl de Egipto tli antes omajcoc cuntra cubierno hua oquenbicac inu cuatro mil mequestierojte pa inu locör cöne nionöque chönte?

³⁹ Entunses Pöblo oquelfe:

—Naja amo. Naja nejoreyo. Onetlöcat pa puieblo de Tarso pa tlöle de Cilicia. Necaca neciudadano de inu puieblo tli bieye momajteca. Xeniechmocöbele, por favur, ma nonnutza ca giente.

* **21:25** Cuale nuyejque motradusirus: “tlamecte”.

⁴⁰ Inu coroniel oquecö Pöblo ma quennunutz giente. Entunses omoquetz ipa inu escalón de cuartel. Oquechi sieña ca imö ma sa yetacö inu giente. Cuöc otlacactajque, oquennunutz ca hebreo. Oquejto:

22

¹ —Señores tli nennocnihua hua nentötajme de Israel. Xejcaquecö lo que tli nemiechelfis öxö que necpea locör para nodefendierus.

² Cuöc inu joriojte oquecajque que Pöblo otlajtlajto ca hebreo cache otlacactajque. Pöblo oquemelfe:

³ —Naja necaca nejoreyo. Onetlöcat pa puieblo de Tarso de tlöle de Cilicia. Cache onobepö necö pa Jerusalén. Onetlaestudiöro ca profesor Gamaliel. Así es que onetzeco exactamente lo que tli quejtoa inu ley de totötajua. Lalebes oneyeya nechöhuatu para netietequapanoöya Deus, iguöl quiename nemejua nemonochtie nencate öxö. ⁴ Naja antes nequentepotztocatenemeya joriojte tli quietocaya inu ojtle de Jesús hua hasta necnequeya ma mejmequecö. Onequenbicac tlöca hua sohuame quieme priesoste. Onequencalaque pa cörsel. ⁵ Tlajtojcoöteopexque hua inu grupo de biebertzetzi de joriojte cuale quejtusque quiene oniechmacaque cörtas para ca tocnihua joriojte ompa pa puieblo de Damasco. Oneya ompa para nequentiemuto inu creyentes. Nequenhualcasquea quieme priesoste necö ca Jerusalén para ma quencastecörucö.

Pöblo oquenpubele joriojte quiene ca omoyulcuc

⁶ 'Oneyöya pa ojtle. Ayecmo bejca oneyeya de Damasco. Quieme ca pan tlajca oyeya cuöc omochi ejqueyi: que sa de repente otlaniextejtequis nopa sente tlaniextle checöhuac de elfecac. ⁷ Onombetzeto pan tlöle. Cuöquenuju onejca öquenu oniechelfe: “Saulo, Saulo, ¿tlica teniechtepotztocateneme?” ⁸ Entunses onetlajtla: “¿Öquenu tejuatzi?” Oniechelfejque: “Naja neJesús de puieblo de Nazaret. Taja miero teniechtepotztocateneme naja”. ⁹ Pos inu tlöca tli oyejyeya ca naja oquejtaque inu tlaniextle. Cache yejua amo oquecajque inu tosquetl tli oniechnutz. ¹⁰ Entunses onequejto: “¿Tli noso necchihuas, Tlöcatzintle?” Hua Tlöcatzintle oniechelfejque: “Xemiehua hua xebeya ca Damasco. Ompa metzelfisque noche tli moneque tecchihuas”. ¹¹ Inu tlaniextelestle hua tlöbile checöhuac oniechixcocoxcötele. Por inu nocompanionerojua oniechaseque ca nomö hua oniechbicaque pa inu puieblo de Damasco.

¹² 'Ompa oyeya sente tlöcatl itucö Ananías. Seme quecumpliroöya lo que tli quejtoa inu ley de Moisés. Noche inu joriojte tli chajchönte ompa queyectieniehuaya Ananías. ¹³ Yaja oniechejtato. Cuöc aseto, oniechelfe: “Nocni Saulo, xecpea motlacheales ocsajpa”. Sa nima onecasec notlacheales. Onequejtac Ananías. ¹⁴ Entunses Ananías oniechelfe: “Deus öque totötajua tietechijque ye ometzixpejpenque desde ca ye niepa. Ometzixpejpenque para que tetieyejtas öque lalebes yulmelactec hua para tejcaques tietosque. Hua öxö ye tetieyejtac hua tetietienac. ¹⁵ Deus ometzixpejpenque porque taja quieme testigo tetlanunutzas de yejuatzi Jesús. Pos noche giente tequenpubelis de noche tli otequejtac hua otejca. ¹⁶ Hua öxö, ¿tli para cache teccheas? Sa nima xomocuötieque. Xetietlajtlane tietucöyupantzinco ma metzyulchepöhuacö de motlajtlacul”.

Pöblo oquenpuebele joriojte quiene ca Deus oquetitlanque ma beya ca giente tli amo joriojte

¹⁷ 'Cuöc onocuec ca necö pa Jerusalén, oneya pa teopantle bieye. Hua omochi que mientras onetlajtlötlajtiöya, quiename cana onemimec, ¹⁸ hua onetieyejtac yejuatzi. Oniechelfejque: “Xemöpröro. Xequistiehua de Jerusalén porque giente amo metzchibelisque cöso de lo que tli tequejtus de naja”. ¹⁹ Entunses onetieyelfe: “Tlöcatzintle, yejua mismos quemate que oneyöya pa teopanconetzi para nequenbicaya ipa cörsel

quiejquech moneltocaya ca tejuatzi, hua onequenbitequeya. ²⁰ Cuöc giente quemecte-
jque Esteban, naja ompa neijcataya. Esteban tlanunutztaya de tejuatzi, cache naja
oneyeya de acuerdo ca giente ma quemeticö. Naja miero onequixute intzotzomajua
de inu giente tli oquemectejque Esteban”. ²¹ Hua yejuatzi oniechelfejque: “Xebeya
porque naja temetzitlanes bejca ca giente tli amo joriojte”.

Pöblo oyeya prieso de inu coroniel

²² Inu joriojte oquetiencajque Pöblo hasta oquejto inu. Yecuöquenu otzajtzejteque.
Oquejtojque:

—¡Ma meque nönca tlöcatl! ¡Amo conbenierebe ma yaja neme!

²³ Yejua oquesequirojque otzajtzejteque. Oquentzotzomunque hua oquenquex-
tejque intzotzomajua hua oquesemanque tlölcuiechtle pa yejyecatl porque ocua-
jcialönque. ²⁴ Porieso inu coroniel otlanhuate ma quecalaquicö Pöblo pa cuartel.
Otlanhuate ma quebejbitequecö para ma tlajtlajto. Oquenec quemates tli ipampa
giente tzajtzejtetzaya tönto cuntra yaja. ²⁵ Entunses oquejilpejque Pöblo para quebite-
quesquea. Yecuöquenu Pöblo oquelfe inu capetö tli ompa oyeya. Oquejto:

—¿Beles nenquepea deriecho nenniechbitequesque naja? Pos naja necaca neciu-
dadano romano, hua amo nenniechcuntenörojque de niontle.

²⁶ Cuöc inu capetö oquecac inu, uya oquemachestito coroniel. Oquelfe:

—Xomopile meyac cueröro por lo que tli tomochibelis porque ini tlöcatl icaca ciu-
dadano romano.

²⁷ Entunses inu coroniel oquejtato Pöblo. Oquetlajtlane:

—¿De melöhuac taja tecaca teciadadano romano?

Pöblo onöhuat:

—De melöhuac.

²⁸ Entunses inu coroniel oquelfe Pöblo:

—Para naja oniechcostöro meyac tomi para onochejchi neciadadano romano.

Pöblo oquejto:

—Pero naja amo. Naja ejqueu onetlöcat neciadadano romano.

²⁹ Entunses inu tlöca tli quebejbitequesquiöya Pöblo sa nima oquecöjtiejque. Nuyejque
inu coroniel mismo omajcömec cuöc oquemat que Pöblo oyeya ciudadano romano.
Omajcömec tönto porque yaja ye oquejilpe.

Pöblo oyeya pa junta de joriojte

³⁰ Inu coroniel oquenec quemates exactamente de tli omotejtiyelfiöya inu joriojte
cuntra Pöblo. Pa mustlateca inu coroniel oquenquextele Pöblo inu carienajte. Nuyejque
otlatitla ma mosentlöllicö jefes de teopexcötzetzi hua noche biebentzetzi pa junta.
Entunses oquebicac Pöblo pa junta hua oquequetz imixtla innochie.

23

¹ Pöblo quemetztaya noche tli oyejyeya pa inu junta. Oquemelfe:

—Señores, hasta öxö necaca tieixtlantzinco Deus, hua noyulo amo niechtiyelfea de
niontle.

² Entunses inu tlajtojcöteopexque Ananías oquennahuate tli oyejyeya itlac Pöblo ma
quecamatetlatzcuepunicö. ³ Pöblo oquelfe:

—Deus metztlatzcuepunelisque taja. Pos taja teca quiename sente tepöntle tli
yequistöc, tli niese checöhuac hua cuale pero amo melöhuac. Necö teniechpea para
teniechjuscörus confurme inu ley de totötajua. Entunses ¿tlica tetlanahuate ma niech-
camatetlatzcuepunicö cuntra inu ley?

⁴ Inu biebentzetzi de joriojte tli itlac Pöblo oyejyeya oquelfejque Pöblo:

—¿Ejqueu techecuatlajtoa ca tlajtojcöteopexque de Deus?

⁵ Oquejto Pöblo:

—Señores, amo onecmat tlö iloac tlajtojçöteopexque. Tlö onecmatene amo onequejtoöne ejqueu, porque tlajcuelulpanca: “Amo techecatljatus cuntra sente tlayecönque de mopaieblo”.

⁶ Entunses Pöblo omomacac cuienta que seque tlöca pa inu junta oyejyeya de inu grupo de joriojte itucö saduceos hua ocseque oyejyeya de inu grupo itucö fariseos. Por inu, Pöblo oquejto checöhuac:

—Señores, naja necaca nefariseo hua notötajua ijiloaya fariseos. Öxö nenniechmopilea necö para nenniechmojuscörfisque sampor que naja necpea confiönsa de que mimejque yulebesque ocsajpa.

⁷ Cuöc Pöblo oquejto ejqueu, inu fariseos hua saduceos opiejque mixcomacataya entre yejua mismo. Yecuöquenu inu joriojte oyejyeya de unte pensamientos. ⁸ Pos saduceos quejejtoa que mimejque amo yulebesque hua que amo onca öngeles nimpör amo onca espíritu noso ölmajtle. Pero fariseos quejejtoa que mimejque yulebesque hua que onca öngeles hua onca espíritu noso ölmajtle. ⁹ Innochtie otzajtzejteque. Inu tlamachtioneme de teotlajtule tli oyejyeya ompa oyejyeya fariseos. Seque de yejua omoquetzque ihua Pöblo. Oquejtojque:

—Amo tecniextea niontle tli amo cuale ca ini nöncia tlöcatl. Pos beles sente espíritu noso sente öngel oquenunutz, hua tlöjcu ¿tli cuale tequejtusque?

¹⁰ Cuöc ochöchalönque cache hua cache, inu coroniel omomajte que tal vez quecusquea Pöblo lalebes. Por inu otlatitla ma huölöcö soltörojte para quequextisque Pöblo de ipa inu junta hua quebicasque ocsajpa pa cuartel.

¹¹ Pa mustlateca Tlöcatzintle oneniextiluc ca Pöblo ca yohuale. Oquelfejque:

—Xepajpöque, pos ejqueu quieme otetlanunutz de naja necö pa Jerusalén, ejqueu nuyejque tecpea que tetlajtlajtus de naja pan ciudad de Roma.

Joriojte quetiemojque manera para quemectisquea Pöblo

¹² Pa mustlateca seque joriojte omotlölejque de acuerdo para quemectisquea Pöblo. Oquejtojque:

—Ma teyecö temaldecidos tlö amo tecchihuasque ejqueyi: que amo tetlacuösque nimpör amo tötlisque hasta senamo tecmectisque Pöblo.

¹³ Cache de cuarenta tlöca oquejtojque ejqueu. ¹⁴ Entunses uyajque ca intlac tlajtojçöteopexque hua ca intlac biebertzetzi de joriojte. Oquejtojque:

—Tejua tequejtoa hua amo tetlacuösque nimpör amo tötlisque hasta senamo tecmectisque Pöblo, hua tlö amo ejqueu tecchihua, ma teyecö temaldecidos. ¹⁵ Öxö nemejuantzetzzi hua ocseque biebertzetzi de inu junta xomotlajtlanelicö ca coroniel ma quehualca Pöblo nemixtla pa junta mustla. Xomolfelicö que nemejuantzetzzi nemonequitea nemomachetisque cache cuale de yaja. Entunses tejua teyesque telistos para tecmectisque inu Pöblo antes que aseti pa junta.

¹⁶ Pero iconie de icni sohuatl de Pöblo oquemat de lo que tli joriojte oquejtojque quechibelisquea itlötzi. Oquemachestito Pöblo ipa cuartel. ¹⁷ Entunses Pöblo oquenutz sente de inu capetönnte. Oquelfe:

—Por favur, xecbica ini nöncia pelalactle ca coroniel porque quepea ölgo para quelfis coroniel.

¹⁸ Inu capetö oquebicac ca coroniel. Oquelfe:

—Inu prieso Pöblo oniechnutz hua oniechtlajtlanele ma nejcualca ini nöncia peltzintle. Nele quepea ölgo tli metzmolfelis.

¹⁹ Inu coroniel ocasec inu pelalactle ca imö. Oquebicac ca sie löro. Oquetlajtlane:

—¿Tli tecneque teniechelfis?

²⁰ Entunses inu pelalactle oquelfe:

—Inu joriojte ye omotlölejque de acuerdo para metzmotlajtlanelisque nele que mustla tetiemobiquelis notlötzi Pöblo pa junta de yejua. Metzmolfelisque nele que neque

quematesque cache cuale de notlötzi. ²¹ Pero amo xomoneltocatzino. Pos cache de cuarenta tlöca mojoyñasque itienco ojtle para tiecheasque notlötzi ma panoa. Yejua ye oquejtojque que ma yecö maldecidos tlö tlajtlacua noso ajötle antes de que tiemectisque notlötzi. Hua öxö yejua sa quechixtecate que tejuatzi xequenmonönquelele.

²² Entunses inu coroniel oquecö inu pelalactle ma beya. Oquenahuate:

—Amo öque xequelfe de que oteniechmachestico de ini nönca asunto.

Inu coroniel oquetitla Pöblo ma beya ca cubernadur itucö Félix

²³ Entunses inu coroniel oquennutz unte de inu capetönte. Oquemelfe:

—Xequemixpeppenacö ume sientos soltörojte tli sa de icxepa hua setenta soltörojte de caböyo hua ume sientos soltörojte ca lönsajte. Ma yöcö innochie ca Cesarea quieme ca pa checnöbe ura öxö ca yohuale.

²⁴ Nuyejque oquenmandöro ma quebicacö tli ipa tlejcos Pöblo, hua ma quebicacö Pöblo ca cuale hasta itlac cubernadur Félix. ²⁵ Hua inu coroniel oquejcuelo sente cörta. Oquejcuelo ejqueyi:

²⁶ “Naja neClaudio Lisias. Temetzmotlajpalfea tejuatzi tecubernadur Félix por medio de nönca cörta. ²⁷ Joriojte necö ocaseque nönca Pöblo quieme prieso hua ye oquemectisquiöya. Cuöc naja onecmat que Pöblo icaca ciudadano romano, onecalac ca nosoltörojua intzölö joriojte hua otejuextejque Pöblo de inmötla. ²⁸ Sötiepa onecnec necmates de tli motejtieyelfiöya cuntra yaja. Por inu onecbicac pa inu junta de joriojte. ²⁹ Onequejtac que joriojte ocualönque cuntra Pöblo por asuntos de inley. Pero amo quepeaya niontle arasu para quemectisque nimpör para quecalaquesque ipa cörsel. ³⁰ Sötiepa onecmat que inu joriojte quetiemoöya sente manera para quemectisque ini nönca tlöcatl Pöblo. Por inu sa nima nectitlanteca ca tejuatzi. Nuyejque onequennahu-atejteca tli motejtieyelfea cuntra Pöblo ma quetratörucö ca tejuatzi noche asuntos tli quepejpea cuntra yaja”.

³¹ Entunses inu soltörojte ocaseque Pöblo hua oquebicaque ca yohuale hasta puieblo itucö Antípatris. Ejqueu oquennahuate inu coroniel ma quechihuacö. ³² Pa mustlateca oquisque de Antípatris inu soltörojte tli sa de icxepa. Omocuejque ca cuartel pa Jerusalén. Inu soltörojte de caböyo oquesequirojque pa ojtle ca Pöblo. ³³ Cuöc ajaseto pa Cesarea oquemacaque cubernadur inu cörta. Nuyejque oquetiemöctejque Pöblo ca inu cubernadur. ³⁴ Cuöc inu cubernadur ye oquetlajtulte inu cörta, otlajtla de cöne oyeya Pöblo. Cuöc oquemat que Pöblo oyeya de Cilicia, ³⁵ oquelfe Pöblo:

—Temetzcaques cuöc huölösque inu tlöca tli motejtieyelfisque cuntra taja.

Entunses oquennahuate isoltörojua ma quetlöllicö Pöblo pa palösio tli oquechi inu rey Herodes hua ma quetlöllicö guardia para quixutisque.

24

Pöblo omodefendiero ixtla cubernadur Félix

¹ Opanuc möcuile tunale. Cuöquenuju inu tlajtojcöteopexque Ananías oaseto pa Cesarea ca tiehua seque biebentzetzi de joriojte de Jerusalén hua ca sente licenciödo itucö Tértulo. Noche inu tlöca oquepubelejque cubernadur cuntra Pöblo. ² Cuöc oquehualercaque Pöblo, Tértulo opie metejtieyelfea cuntra Pöblo. Tértulo oquelfe Félix:

—Por tejuatzi, señor cubernadur, seme tecpea paz pa tonación. Öxö pa tonación onca lalebes meyac mejoramiento ca nobeyo. Tecpea noche inu por tejuatzi. ³ Pos lo que tli tomochibelejteca ca nobeyo tejua tecresibiroa noche inu ca tlasojcömacheleleste, señor cubernadur Félix. ⁴ Hua öxö para amo temetzmoquextelisque meyac tiempo, xetiechmochibelele sente bieye favur. Xomopile paciencia ca tejua hua xetiechmo-caquite. ⁵ La cosa es que ini nönca tlöcatl lalebes papasol. Ca pa noche ocseque naciones motojtopiejteneme intzölö joriojte ca ocsente tlamachteleste. Icacca cabeza de sente

grupo itucö nazarenos. ⁶ Ini nönca tlöcatl ye quepetzotelisquea inu teopantle bieye pa Jerusalén cuöc otecaseque. * ⁸ Hua öxö tejuatzi mismo cuale tomotlajtlanelis ini nönca tlöcatl hua tomomachitis tlö melöhuac noche lo que tli totejtiyelfea cuntra yaja.

⁹ Joriojte tli oyejyeya ompa ixtla cubernadur oquejtojque nuyejque que noche lo que tli oquejto Tértulo icaca melöhuac. ¹⁰ Entunses inu cubernadur oquechibele Pöblo sieña ca imö ma tlajtlajto. Pöblo oquejto:

—Necpea gusto no defendierus mixtlantzinco tejuatzi porque necmate que tejuatzi tomobetzteca tecubernadur de ini nönca nación por meyac xebetl. ¹¹ Quiemach quepea doce días que naja onaseto pa Jerusalén para netietechihuato Deus. Tejuatzi mismo cuale tomoniextelis tlö melöhuac. ¹² Amo nixcomacataya ca nionöque nimpör amo nequentlötlabelmectiöya giente pa teopantle bieye, nimpör pa teopancucone nimpör pa cayajunte. ¹³ Ini nöncate abele queprobörusque niontle de lo que tli motejtiyelfea cuntra naja. ¹⁴ Temetzmolfelis ixmantete que netietequelpa Deus öque notötajua tietequelpojque. Ini nöncate tiechcuitea grupo de nazarenos porque tejua tectoca ini tieojfetzi Deus yancuec. Noneltoca ca noche lo que tli tlajcuelulpanca pa inu ömatl de ley hua inu ömame tli oquejcuelojque tlayulepantejque. ¹⁵ Iguöl que ini nöncate naja necpea confiönsa ca Deus de que mimejque yulebesque ocsajpa. Yulebesque mimejque tli cualteque oyejyeya quieme nuyejque yulebesque tli amo cualteque oyejyeya. ¹⁶ Por inu confiönsa tli necpea ca Deus, seme nocuajpetzoa para necpeas noyulo chepöhuac que amo niehtiyelfea de niontle söstantle. Pos amo onecchi niontle amo cuale encuntra de giente, nimpör amo onecchi niontle encuntra de Deus.

¹⁷ Quiesque xebetl neyajtenemeya pa ocseque naciones. Sötiepa onocuec ca nonación para necxiexelo limosnas noso inu tomi tli omonecheco. ¹⁸ Pa teopantle bieye onecchi confurme costumbres de joriojte para ma nochepöhua para neyes necualtec ca Deus. Ejqueu necchihuaya cuöc seque joriojte de tlöle de Asia oniechnömejque pa inu teopantle. Amo oyejyeya giente ca naja nimpör amo onequentlötlabelmectejque giente. ¹⁹ Öxö lo que tli moneque es que tlö inu joriojte de tlöle de Asia quepejpea canajyetla cuntra naja ma huölöcö necö hua ma motejtiyelficö cuntra naja. ²⁰ Tlö abele ejqueu entunses ini nöncate ma quejtucö tlö oqueniextejque canajyetla tli amo cuale ca naja cuöc oneyeya pa junta ca yejua hua ca ocseque joriojte. ²¹ Amo machea tlö motejtiyelfea cuntra naja porque onetzajtzec ejqueyi pa inu junta. Onequejto: “Öxö nenniechmopilea necö para nenniechmojuscörfisque sampör naja necpensöroa que mimejque yulebesque ocsajpa”.

²² Cuöc Félix oquecac inu, oquenec quetratörus inu asunto pa ocsente tunale. Pos ye oquemat ölgo de inu creyentes tli quetocaya tieojfe de Jesús. Oquejto:

—Cuöc inu coroniel Lisias huölös, entunses necneque nectratörus ini nönca asunto ocsajpa ca nemejua.

²³ Entunses Félix oquenahuate inu capetö ma quixute Pöblo turavea. Oquenahuate majcamo quetzajtzacua Pöblo pa cörsel nimpör majcamo quelpa, hua ma quencöhua iamigos de Pöblo ma quetlajpalucö hua ma quemacacö tli quechibeliöya fölta.

²⁴ Cuöc ye opanuc quiesque tunalte oaseto Félix ocsajpa pa Cesarea. Oquehualcac isohua itucö Drusila, öque oyeya joreyo. Félix otlatitla ma quehualcacö Pöblo para que Pöblo quenunutzas Félix de quiene ca öque moneltoca tieca Cristo Jesús. ²⁵ Pöblo oquelfe Félix que onca nesidad para tlöca ma yecö yulmelacteque quieme Deus iloac yulmelactec. Oquelfe que Deus quenequihua que tlöca ma modominörucö para majcamo quechihuacö tli amo cuale. Oquelfe nuyejque que sie tunale Deus quenjuscörusque noche giente. Cuöc oquecac noche inu, Félix omajcömec lalebes. Oquelfe Pöblo:

* **24:6** Seque manuscritos quetlasolultea: “Tecchihuasquea junta para tecjuscörusquea confurme toley. v. 7 Pero inu coroniel Lisias ocalac ipa inu asunto. Ca meyac fuierca otiechquextele ini nönca tlöcatl. v. 8 Oquejto que tlö tejua otecejque totejtiyelfisque cuntra yaja ma tehuölöcö necö ca tejuatzi”.

—Xebeya ahorita. Cuöc necpea tiempo temetznutzas ocsajpa.

²⁶ Nuyejque Félix oquepensöro que tal vez Pöblo quemacasquea tomi para que Félix ma quecöhua iyös. Por inu Félix oquenutz Pöblo meyacpa para tlajtlajtus ca yaja. ²⁷ Ejqueu oquechi Félix por ume xebetl. Pa inu tiempo ayecmo oyeya de cubernadur, tlöcamo Porcio Festo ocalac itequipa. Félix oquenectaya ma yecö inu joriojte amigos de yaja. Por inu oquecöjtie Pöblo turavea prieso.

25

Pöblo omodefendiero ixtla Festo

¹ Entunses Festo oaseto pa Cesarea para calaques quieme cubernadur. Sa nima pa yeye tunale Festo oquis de Cesarea para Jerusalén. ² Inu jefes de teopexcötzetzi hua joriojte tli cache bejbeye omomajtaya pa Jerusalén oquepubelejque Festo de Pöblo. ³ Oquetlötajtejque Festo para ma quenchibele sente favur, que ma cualtitlane Pöblo ca Jerusalén. Yejua oquepensörojque que tlö Pöblo huölösquea, entunses yejua cuale quecheasque Pöblo pa ojtle para quemectisque. ⁴ Festo oquennönquele que Pöblo oyeya prieso pa puieblo de Cesarea. Oquejto que sötiepa de quiesquete tunalte yaja mismo iyös ompa nuyejque. ⁵ Oquemelfe:

—Así es que ma yöcö seque tlöca tli cache bejbeye momajtecate nemotzölö. Ma yöcö ca naja hasta Cesarea. Tlö Pöblo oquechi canajyetla tli amo cuale, entunses yejua cuale motejtieyelfisque cuntra yaja.

⁶ Festo omocö pa Jerusalén sa checuieye noso majtlactle tunalte. Entunses omocuec ca Cesarea. Pa mustlateca omotlölito pa isiya de cubernadur pa junta. Otlatitla ma quehualcacö Pöblo. ⁷ Cuöc Pöblo ocalac, inu joriojte tli ohualiejque de Jerusalén omopachojque. Ca tlimach omotejtieyelfejque cuntra Pöblo. Oquejtojque que oquechi meyac sösantle san petzotec. Sin embargo, abele oqueprobörojque niontle. ⁸ Entunses Pöblo omodefendiero. Oquejto:

—Naja amo tli necchihua nimpör cuntra inu ley de joriojte nimpör cuntra inu teopantle de Jerusalén, nimpör cuntra inu emperador César.

⁹ Festo oquenec que inu joriojte ma yecö amigos de yaja. Por inu oquelfe Pöblo:

—¿Tecneque teyös ca Jerusalén para que naja temetzjuscörus ompa de noche ini sösantle tli motejtieyelfea cuntra taja?

¹⁰ Pöblo onöhuat:

—Necaca mixtientlantzinco pa junta de cubierno romano. Conbenierebe necö ma xeniechmojuscörfe. Tejuatzí mismo tomomachitea que amo tli necchihua cuntra joriojte. ¹¹ Tlö onecchi canajyetla tli amo cuale hua por inu moneque ma nemeque pos amo nequejtus que amo. Pero tlö amo melöhuac lo que tli quejejtoa cuntra naja entunses amo öque quepea deriecho para niechtiemöctis ca yejua. Naja necneque ma niechjuscörucö inu emperador César, rey de giente romano.

¹² Cuöquenuju Festo omonunutz ca seque tlötajtoönejme. Sötiepa oquelfe Pöblo:

—Tecneque ma metzjuscörucö César. Pos tieixtla César teyös.

Rey Agripa oquenec quecaques tli quejtus Pöblo

¹³ Cuöc ye opanuc seque tunalte rey Agripa hua icni Berenice uyajque pa puieblo de Cesarea para oquetlajpaluto Festo. ¹⁴ Ompa oyejyeya meyactie tunalte. Festo oquepubele rey Agripa de Pöblo. Oquelfe:

—Onca sente tlöcatl tli Félix oquecöjtie prieso ca naja cuöc onecalac de necubernadur. ¹⁵ Cuöc oneyeya pa Jerusalén inu jefes de teopexcötzetzi hua biebertzetzi de joriojte oniechpubelejque de ini nönca tlöcatl, öque itucö Pöblo. Oniechtlajtlanejque ma necjuscöro. ¹⁶ Naja onequennönquele que sente tlajtoöne romano amo quepea deriecho para quetiemöctis sente tlöcatl ca ienemigos sampör yaja queneque. Onca nesesidad

que tlö giente quepea canajyetla cuntra sente tlöcatl ma quepea inu tlöcatl locör para modefendierus cuntra yejua imixtla tlötlajtoönejme hua ma quejto quiene oyeya inu asunto. ¹⁷ Por inu, cuöc inu joriojte ohualiejque necö amo onecpolo tiempo tlöcamo sa nima pa mustlateca onotlöle pa nosiya de cubernadur. Onetlatitla ma quehualicacö Pöblo. ¹⁸ Pero la cosa es que inu joriojte tli motejtieyelfejque amo oquejtojque niontle söstantle san petzoteque cuntra yaja tli onecpensöro que quejtusquiöya. ¹⁹ Solamente omotejtieyelfejque tlimach de inreligiön hua de sente tlöcatl Jesús tli omec. Pöblo quejtoa que inu Jesús yulejteca. ²⁰ Naja amo onecmat tli necchihuas ca sente asunto quieme ini nönca. Por inu onectlajtlane Pöblo tlö oquenec iyös ca Jerusalén para necjuscöorus ompa de noche söstantle ca tli motejtieyelfea cuntra yaja. ²¹ Entuneses yaja oquejto que queneque que inu emperador ma quejuscöro. Por inu onecpex Pöblo quieme prieso turavea hasta que nectitlanes ca emperador César.

²² Entuneses inu rey Agripa oquelfe Festo:

—Naja nuyejque necneque nejcaques ini nönca tlöcatl tlininu quejtoa.

Festo onöhuat:

—Sa nima mustla tejcaques.

²³ Pa mustlateca rey Agripa hua Berenice omöquejque intzotzomajua pateyojque de rey. Agripa hua Berenice ca tiehua seque intlátequepanojua ajaseto ompa itlac Festo. Ocalajque pa sente bieye cale cöne oyejyeya meyac coronielte ca tiehua ocseque tlöca tli cache bejbeye momajtaya pa inu puieblo. Festo otlatitla ma quehualicacö Pöblo.

²⁴ Entuneses Festo oquejto:

—Tejuatzi, rey Agripa, xomocaquite, hua nemonochtie tli necö nencate ca tejua. Necö nemopilea ini nönca tlöcatl Pöblo. Meyactie joriojte niechpubelea meyac söstantle cuntra yaja. Amo sa necö pa Cesarea tlöcamo pa Jerusalén nuyejque cuöc onebeya ompa, niechelfea que conbenierebe ma ayecmo neme ini Pöblo. ²⁵ Pero la cosa es que niechparesieroa que amo yetla oquechi para quemeresierus mequelestle. Pöblo mismo oniechtlajtlane ma quejuscörucö inu emperador César. Pos ye onectzontec nectitlanes ca César. ²⁶ Pero siendo que amo necpea tli netietlajcuelfis norey, onecualecac nönca tlöcatl nemixtlantzinco hua especialmente mixtlantzinco tejuatzi rey Agripa. Cuale tomotlajtlanelis nönca prieso tlininu oquechi para ma necpea tli netietlajcuelfis torey César. ²⁷ Pos niechparesieroa ölgo netunto tlö naja nectitlanes nönca prieso ca César cuöc abele netieyelfis de tli motejtieyelfea joriojte cuntra yaja.

26

Pöblo omodefendiero ixtla rey Agripa

¹ Entuneses Agripa oquelfe Pöblo:

—Tecpea permiso tetlajtlajtus por taja mismo.

Entuneses Pöblo opie tlajtlajtoa ejqueyi:

² —Nepajpöque porque teniechmomaquelea locör para netlajtlajtus mixtlantzinco tejuatzi, rey Agripa. Teniechmomaquelea locör öxö para nodefendierus de noche lo que tli joriojte oquejtojque cuntra naja. ³ Nepajpöque tönto porque tejuatzi timixomachelea noche costumbres tli tejua tejoriojte tecpea. Temixomachelea noche asuntos tli tiechim-portöroa. Por inu temetzmotlajtlanelejteca xeniechmocaquite ca meyac paciencia.

Pöblo oquejto quiene ca nemeya antes que omoneltocac ca Jesús

⁴ Noche joriojte quemate quiene ca naja onoportöro intzölö yejua hua ipa Jerusalén desde que oneyeya nepeltuntle. ⁵ Tlö yejua queneque, quale quejtusque que naja oneyeya nefariseo porque yejua ye quemate por meyac tiempo que naja oneyeya nefariseo. Inu grupo de fariseos cache quechihua confurme costumbres de toreligiön

que noche ocseque grupos de joriojte. ⁶ Hua öxö nenniechmopilea necö para nenniechmojuscörfisque porque joriojte motejtieyelfea cuntra naja. Motejtieyelfea porque naja necmöchea lo que tli Deus quenprometierfejqe tobiebetcöhua. ⁷ Giente de noche inu doce grupos noso tribus de tonación Israel quepea confiönsa que queresibirisque inu tli Deus queprometierojque. Porieso inu joriojte tieteochihua Deus ca noche inyulo hua tietequepanoa yohualen tunale. Hua öxö, rey Agripa, seque joriojte motejtieyelfejqe cuntra naja sampor que naja nuyejqe necpea inu confiönsa. ⁸ ¿Tlica noso nemiechmoparesierfea quieme tuntojyutl que Deus quenyulebitisque mimejqe?

Pöblo oquepu quiene ca antes oquentepotztocac creyentes

⁹ 'Pos antes naja nuyejqe onecpensöro ocsie. Onecpensöro que conbenierebeya necchihuas meyac söstantle en cuntra de tli moneltocaya tietucöyupantzinco Jesús de Nazaret. ¹⁰ Ejqueu onecchi pa Jerusalén. Ca permiso de jefes de teopexcötzetzi, naja mismo onequentzajtzac meyactie de inu giente yecteque ipa cörsel. Hua amo sa inu tlöcamo cuöc oquenmejmectejqe naja mismo onetlabotöro ma quenmejmecticö. ¹¹ Meyacpa naja onequenbejbitec para ma checuatlajtucö cuntra Jesús. Ejqueu onecchijtenemeya pa noche teopancucone. Onecualöneya cuntra yejua pero bel meyac, hasta onequentejtepottocac hasta pa puieblös de ocseque naciones.

Ocsajpa oquepu Pöblo quiene ca omoneltocac ca Jesucristo

¹² 'Sie tunale oneyöya ca Damasco para nequentepotztocasquea inu creyentes. Onecbicaya permiso hua beletelestle de inu jefes de teopexcötzetzi. ¹³ Pero pa inu ojtle, señor rey, onequejtac pan tlajca sente tlaniextle de elfecac cache checöhuac que tunale cuöc tlaniextea. Inu tlaniextle otlaniestequis nopa hua impa tli huölöya ca naja. ¹⁴ Entunses tonochtie otebejbetzeto pan tlöle. Onejcac öquenu oniechelfe ca hebreo: "Saulo, Saulo, ¿tlica teniechtepotztocateneme? Para taja icaca tiecoco quieme cuöc sente cuöcobe queterecsa inu corpus hua molastimöroa sa ye yaja". ¹⁵ Entunses onequejto: "¿Öquenu tejuatzi, Tlöcatzintle?" Hua Tlöcatzintle oniechelfejqe: "Naja neJesús, öque teniechtepotztocateneme. ¹⁶ Xemiehua hua xomoquetza. Amo tli ipampa ononiexte ca taja. Sa necneque que taja teniechtequepanus. Nuyejqe teyes tetestigo para xequennunutzta giente de lo que tli otequejtac de naja hua de lo que tli tequejtas de naja sötiepa. ¹⁷ Sötiepa tequejtas quiene ca temetzmöquextis de inmöpa joriojte hua nuyejqe de inmöpa de tli amo joriojte. Ahorita naja temetztitlane para teyös ca giente tli amo joriojte. ¹⁸ Temetztitlane ca yejua para ma mixtlapucö hua para majcamo yajtenemecö pa tlayohuaquelestle tlöcamo pa tlöbile. Temetztitlane ca yejua para ma ayecmo nemecö imöpa Satanás tlöcamo ma tietocacö Deus. Ejqueu ma nequentlapojpolfe intlajtlacul hua ma quepeacö locör ca innochtie ocseque tli Deus oquenchijque ma yecö yejcualteque cuöc omoneltocaque ca naja".

Pöblo oquechi lo que tli Jesús oquelfejqe

¹⁹ 'Así es que, señor rey Agripa, onecchi confurme lo que tli oniechelfejqe cuöc oneniextiluc desde elfecac. ²⁰ Onequennunutz joriojte cachto pa puieblo de Damasco hua sötiepa pa Jerusalén hua pa noche estado de Judea. Nuyejqe onequennunutz giente tli amo joriojte. Innochtie onequennunutz nele ma moyulcuepacö hua ma tietocacö Deus. Onequemelfe ma quechihuacö söstantle tli conbenierebe ma quechihuacö giente que de melöhuac ye omoyulcuejqe. ²¹ Por inu, seque joriojte oniechaseque pa teopantle bieye hua oquetratörojque niechmectisquea. ²² Pero turavea netlanunutzta de Jesucristo hasta öxö porque Deus niechpaliebilo. Nequennunutzta giente humilde ca tiehua giente tli bejbeye momajtecate. Ayec nequemelfea giente niontle ademös de lo que tli inu tlayulepantejqe ca tiehua Moisés oquejtojque que mochihuas sie tunale. ²³ Pos yejua oquejtojque que inu Cristo öque Deus tieixpejpenque quepealo mecoas hua que sötiepa yulebihuas de intzölö mimejqe. Yejuatzi yulebihuas primero de tonochtie.

Inu tlayulepantejqe oquejtojqe que de inu manera Cristo quemejtisque joriojte hua giente tli amo joriojte que de melöhuac giente yulebesque porque yejuatzi ye oyulebihuac.

Pöblo oquenec que Agripa ma moneltoca ca Jesús

²⁴ Cuöc oquejto Pöblo noche inu para omodefendiero, entunses Festo oquejto checöhuac:

—¡Taja ye otelucjtec, Pöblo! Tönto hua tönto que otetlaestudiöro ye telucjtejteca.

²⁵ Pero Pöblo onöhuat:

—Amo nelucjtec, señor cubernadur Festo. Al contrario, necpensörojteca cuale, hua lo que tli nequejtoa icaca melöhuac. ²⁶ Nöiloac señor Rey quematihua noche ini nönca perfectamente bien. Por inu netlajtlajtoa ca meyac confiönsa tieixpa yejuatzi. Necaca seguro que yejuatzi nuyejque quematihua de noche ini lo que tli naja nemiechmopubelele porque amo sa ichtejcatzi omochi. ²⁷ ¿Tomoneltocatzinoa, señor rey Agripa, ca lo que tli oquejtojqe inu tlayulepantejqe? Naja necmate que tomoneltocatzinoa.

²⁸ Agripa oquelfe:

—Pos taja tecpensöroa que sa nima teniechchihualtisquea ma nocuepa necristiano.

²⁹ Entunses Pöblo oquejto:

—Amo machea tlö sa nima noso tlö iyes tequeyo para temetzmochihualtelis tomocuetzinus tecristiano. Pero delönte de Deus, lo que tli naja necnequesquea es que amo sa tejuatzi tomoneltocatzinus tlöcamo nuyejque ma nenejneltoco tieinnochtie ini nöjiloac tli niechcajcaquihua öxö. Ma Deus quemonequite que nemobetztaque quieme naja pero sin ini nönca carienajte.

³⁰ Cuöc Pöblo oquejto inu, rey Agripa omoquetz hua cubernadur Festo ca tiehua Berenice hua noche tli yehuataya ca yejua. ³¹ Uyajque ca sie löro para monunutzasque de Pöblo. Omolfejque:

—Amo tli oquechi ini nönca tlöcatl para quemeresierus mequelestle nimpör amo quemeresieroa ma tzajtzacta pa cörsel.

³² Rey Agripa oquelfe Festo:

—Cuale oquisane libre ini tlöcatl tlö yaja mismo amo oquejtoöne ma quejuscöro César.

27

Festo oquetitla Pöblo ca Roma

¹ Cubernadur Festo oquetzontec que yaja quetitlanes Pöblo ca tlöle de Italia. Oquetiemöcte Pöblo hua ocseque priesoste imöc sente capetö itucö Julio. Julio oyeya capetö de sie sientos soltörojte. Oyeya de inu grupo de soltörojte itucö Trupa Augusta.

² Nuyejque oyeya ca tejua Aristarco, öque oyeya de puieblo de Tesalónica pa tlöle de Macedonia. Tonochtie otetlejqe pa sente börco tli oyeya de puieblo itucö Adramitio. Inu börco oyeya listo para quisas ca puieblos ipan tlöle de Asia. Otequisque de puieblo de Cesarea. ³ Pa mustlateca otaseto pa puieblo de Sidón. Inu capetö Julio lalebes cuale oquetratöro Pöblo. Oquecö Pöblo ma quentlajpalo iamigos pa inu puieblo para que yejua quepaliebisque yaja. ⁴ Sötiepa otequisque de Sidón. Otepanuque ca tlacpac de inu tlöltojpole itucö Chipre porque yejyecaya cuntra tobörco. Inu tlöltojpole oquetzacuele inu yejyecatl. ⁵ Otepanuque pa lamör hasta otaseto itlac tlöle de Cilicia hua tlöle de Panfilia. Entunses otaseto pa puieblo de Mira pan tlöle de Licia.

⁶ Ompa pa Mira inu capetö oqueniexste sente börco tli ohualie de ciudad de Alejandría. Oyöya ca ipan tlöle de Italia. Capetö otiechchihualte ma tetejucucö pa inu börco para teyösque ca Italia. ⁷ Por meyactie tualte otenejnunque pa lamör. Lalebes yuyulictzi oteyöya. Ca meyac traböjo otaseto itlac puieblo de Gnido. Turavea oquesequiro yejyecaya cuntra tejua. Por inu oteyajque ca tlatzintla ca itlac inu tlöltojpole itucö Creta. Otepanuque ca itlamejyo Creta cöne itucö Salmón. Ompa otopostejque ca tomöyecömpa

hua otecsequirojque ca itech Creta pero ca tlatzintlacopa cöne tlöltojpole oquetzacuele inu yejyecatl. ⁸ Ca traböjo otecsequirojque itech inu tlöltojpole. Otaseto pa sente locör itucö Buenos Puertos cierca de inu puieblo de Lasea.

⁹ Meyac tiempo otebejcöjque pa lamör. Oyeya lalebes peligroso para tecsequirusquea porque ye opanuc inu yelfetl de tlajyubelestle hua pa inu mietztle ye piehua queyabe hua yejyeca checöhuac. Por inu Pöblo oquentlajtulumacac. ¹⁰ Oquejto:

—Señores, niechparesieroa que lalebes peligroso tlö cache tecsequirusque pa lamör. Quepea riesco que nönca börco pötzcalaques hua que tecpolusque ini nönca cörga hua hasta temequesque tejua.

¹¹ Inu capetö amo oquechi cöso de Pöblo. Cache oquechi cöso de öque ihuöxca inu börco hua de inu piloto tli quemanejöroöya inu börco. ¹² Inu locör de Buenos Puertos amo cuale locör para inu börco porque ompa seme queyabe hua mocajcöhua yejyecatl por cöso tlajco xebetl. Cöso innoctie oquepensörojque que cache cuale ma tequisacö de ompa. Oquenejque tlö posible ajasesquea hasta puieblo de Fenice pa inu mismo tlöltojpole de Creta. Yejyecatl de ca tlapac hua yejyecatl de ca tlatzintla abele tlalpitzya pa inu puieblo de Fenice. Oquenejque quecheasque ompau hasta cuöc ayecmo tönto yejyecas pa lamör.

Lalebes petzotec oqueya hua oyejyecac pa lamör

¹³ Entunses cuöc opie tepetzi tlalpitza yejyecatl tli yebitz de ca tlatzintla, yejua oquepensörojque que cuale tecsequirusque pa lamör. Entunses otequisque de inu locör hua oteyajque pa lamör. Oteyöya itech Creta. ¹⁴ Pero tepetzi bejcöjpa sente yejyecatl lalebes checöhuac ohualie de Creta hua oquebitec inu börco. Inu yejyecatl mocuitiöya Euroclidón, noso Norte. ¹⁵ Inu yejyecatl ocasac tobörco checöhuac hua abele tli otecchijque cuntra inu yejyecatl. Por inu otejcöjque inu börco ma quebica yejyecatl. ¹⁶ Entunses otepanuque ca tlatzintla de sente tlöltojpolconetzi itucö Clauda. Inu tlöltojpole oquetzacuele yejyecatl para ayecmo otlalpitzya tönto lalebes checöhuac. Oteualbelöntöya sente börcojconetzi. Hua öxö ca meyac traböjo oteclejcabejque hasta ipa inu börco bieye. ¹⁷ Cuöc ye oteclejcabejque inu börcojconetzi, inu tlöca oquejilpeque inu börco bieye ca lösojte tli chejchecacteque. Oquetlöleque inu lösojte ca itzintla inu börco para majcama xexetune börco. Yejua omomajtejque porque oquepensörojque que inu börco calaquesquea pa sente locör de meyac xöle itucö Sirte. Itech cuajme pa tobörco mosujtaya tzotzomajme bejbeye para que yejyecatl ma quenejnemite börco. Pero öxö yejua oquetemubejque inu tzotzomajme para majcama quebica börco ipa inu xöle. Ejqueu oquecöjque börco sa ma motlalojte ipa lamör. ¹⁸ Pa mustlateca turavea oyejyecaya checöhuac hua amo cuale oyöya inu börco. Por inu yejua opiejque quetlajcale ijtec lamör inu cörga tli börco quebicaya. ¹⁹ Pa ocsente tunale noso yejua mismos oquetlajcalque noche sösanle tli ihuöxcayo börco. ²⁰ Por meyac tunalte abele otequejtaque tunale nimpör sitlalte. Inu öyejyecatl bel checöhuac oquesequiro oquebitec tobörco. Ayecmo otecpexque esperanza que tomöquextisquea de ompau.

²¹ Cuöquenuju ayecmo otlacujque inu giente pa börco por meyac tiempo. Entunses Pöblo omoquetz intzölö hua oquejto:

—Señores, cache cuale oyene tlö onenquechihuane lo que tli onequejto. Cache cuale amo tequisane de Creta. Entunses amo nenquepolusquiöne inu cörga hua noche sösanle de ini börco. ²² Pero öxö amo xepöjöpolebecö porque nionöque de nemejua meques. Pero inun quiema nönca börco polebes. ²³ Quieme nenquemate, naja neca netiehuöxcatzí Deus hua netietequapanoa. Pos nönca yohuale tli topa ohualpanuc omoniexte ca naja sente öngel de Deus. ²⁴ Inu öngel oniechelfe: “Pöblo, amo xomomajte. Tecpea que tomopresentörus ca emperador César. Nuyejque Deus metzchebelisque sente favur pos quenmöquextisque de ipa peligro noche tli cajcate pa börco ca taja”. ²⁵ Por inu, señores,

xomoyulölicö. Naja necpea confiönsa ca Deus. Necaca seguro que mochihuas ejqueu quiene ca oniechelfe inu öngel. ²⁶ Pero quepea que mobiteques tobörco itech sente tlötojpole.

²⁷ Oteyöya pa lamör por caxtule tunale. Sie yohuale oteyeyeya pa lamör cöne mocuiteda Adria. Yejyecatl oquebicatenemeya tobörco. Entunes quieme tlajco yohuac inu tlöca oquepensörojque que tobörco mopachoöya cache sierca de tlöle. ²⁸ Oquetemachejque quiejquech ca bejcatla oyeya lamör. Quepeaya treinta y seis metros. Tepetzi ca adelönte oquetemachijque ocsajpa. Quepeaya veintisiete metros. ²⁹ Omomajtejque que beles inu börco motebiti cuntra teme bejbeye hua xexetunesquea. Porieso inu tlöca oquentlajcalque nöbe teposme yetique tli mocuiteda anclas de icuetlapa börco. Oquentemobejque ijtec lamör ca lösojte para ma tlölaquecö. De inu manera inu anclas cuale quequitzquisque inu börco. Öporöro oteyeyeya ma isejco tlaniese. ³⁰ Seque tlöca oquenejque chucholusque de ipa inu börco. Por inu yejua opiejque quetemobea inu börcojconetzi hasta ipa lamör. Oquetemobejtaya inu börcojconetzi quieme tlö yösque para quetlajcalesquea anclas de ca ixtla de börco bieye. Oquechijque inu para que majcama niese que oquenejque cholusque. ³¹ Pöblo oquenahuate inu capetö ca tiehua isoltörojua, oquejto:

—Tlö niecate tlöca amo mocöhuasque necö pa börco bieye, abele nemomöquextisque de ipa nöncä peligro.

³² Entunes inu soltörojte oquetejque inu lösojte de börcojconetzi. Oquecajcojque ma betze pa lamör. ³³ Cuöc turavea ayemo otlanieseya, Pöblo oquentlajtulmacac innochie ma tlacuöcö. Oquejto:

—Ye quepea caxtule tunale que lalebes nemöporöroa hua amo nentlacua. ³⁴ Por favur xetlacuöcö. Lalebes impurta para que nemomöquextisque de ipa nöncä peligro. Pos nion sente tlöcatl meques nimpör quisas herido nion tepetzi.

³⁵ Cuöc ye oquejto inu, ocasec sente pöntzi. Otietlasojcömachele Deus imixtla innochie. Oquecocototz inu pöntzi hua opie quecua. ³⁶ Ca inu innochie ocaseque pöquelestle hua otlacuajque. ³⁷ Oteyeyeya dos cientos setenta y seis tlöca ca meyactie. ³⁸ Cuöc yejua ye otlacuajque hasta cöne oquenejque, entunes oquetlajcalque inu cörga de trigo ijtec lamör. Oquetlajcalque para amo tönto yetic iyes inu börco.

Oxexetu inu börco

³⁹ Cuöc otlanies, amo öque oquixomat inu tlöle. Pero oquejtaque sente locör itienco tlöle cöne ötzintle cache tlacactaya hua amo quepeaya meyac teme. Yejua oquenejque quechihuasque lucha para quecalaquisquea inu börco ompau tlö posible. ⁴⁰ Entunes oquetejque lösojte de inu anclas tli quequitzquiöya börco. Oquencöjtiejque anclas ijtec lamör. Nuyejque oquetojtonque inu bepalte tli ica modirijero inu börco. Entunes oquetlejcabejque inu tzotzomajme ipa cuabetl cache ixpa de inu börco para inu yejyecatl ma quemöpiehua börco. Yecuöquenu inu börco omopachuto ca inu locör cöne cache tlacactaya ötzintle. ⁴¹ Pero inu börco ocalac pa locör cöne omonömejque ötlacme ijtec lamör. Ompau omoyectzeco börco. Itzonteco börco omotlölaqueto ca fuiersa ijtec xöle hua nimpör abele muline. Ca icuetlapa börco lalebes opojpostec porque inu lamör lalebes checöhuac oquebitec. ⁴² Entunes inu soltörojte oquenejque quenmejmectisquea noche priesoste porque oquepensörojque que beles möbelöntösque ijtec lamör para chucholusque. ⁴³ Pero inu capetö amo oquenec ma meque Pöblo. Por inu amo oquencö ma quenmejmecticö priesoste. Oquennahuate innochie nele quiejquech quemate möbelöna ijtec ötzintle ma cachtö motlajcalicö ijtec lamör para asetibe pa tlöle. ⁴⁴ Oquennahuate ocseque ma momöquexticö ipa bepalte noso ipa perösos de börco. De inu manera tonochtie tajaseto pa tlölluöjque.

28

Pöblo oyeya pa tlötojpole itucö Malta

¹ Cuöc ye otomöquextejque de ijtec lamör, otiechelfejque inu gente que inu tlötojpole mocuitiöya Malta. ² Gente pa inu tlötojpole otiechtratörojque lalebes ca cuale. Pos oquetlölejque sente tletzintle porque siehuaya hua queyajtaya. Otiechtlalfejque tonochtie ma topachucö para tototunisque. ³ Entunses Pöblo oquecuc nönöjtetzi cuabetl tli huajuöque hua oquetie pa tletzintle. Yecuöquenu sente cuhuötl oquistequis por inu totunque hua oquequejtzo Pöblo pa imö. ⁴ Cuöc inu gente de ompa oquejtaque que inu cuhuötl tzeataya itech imö, omolfejque:

—De mölas nönca tlöcatl icaca mequestiero porque mös omomöquexste de ijtec lamör, Deus amo quecöhualo ma neme.

⁵ Pero Pöblo oquetzetzelo imö. Obetzeto inu cuhuötl ijtec tletzintle hua amo tli oquepasöro Pöblo. ⁶ Innochie oquepensörojque que posöbesquea icuierpo noso que sa de repente betzesquea Pöblo porque ye omec. Sötiepa de meyac röto oquepensörojque de ocsie modo. Oquejtojque que Pöblo oyeya sente deus.

⁷ Tepetzi ca niepa oyejyeya itlölhua de sente tlöcatl itucö Publio. Publio cache bieye momajtaya de innochie pa inu tlötojpole. Yaja otiechtlöcayejtac hua tiechtratöro lalebes cuale. Ompa oteyeyeya ca yaja por yeye tunale. ⁸ Omochi que itajtzi Publio betztotaya pa tlapechtle. Oquepex totunealestle hua tiequelestle. Pöblo oquetlajpaluto. Omotlajtlötlajte hua oquentlöle imöhua ipa inu cocoxque. Ca inu opajtec. ⁹ Por inu uyajque itlac Pöblo noche cocoxcötzetzi tli nemeya pa inu tlötojpole. Noche opajteque. ¹⁰ Lalebes otiechtlöcolejque meyac söstantle. Sötiepa cuöc ye tetejcosquea pa ocsente börco para oteyajque, otiechmacaque noche tli tiechchibeliöya fölta para teyösque.

Pöblo oaseto pa Roma

¹¹ Ejqueu oteyeyeya yeye mietztle pa inu tlötojpole. Yecuöquenu otetejcoque pa sente börco tli ompa oyeya quieme tlajco xebetl mientras queyajtaya hua yejyecataya checöhualo pa lamör. Antes de inu ohualie inu börco de ciudad de Alejandría. Itech inu börco oyeya ixniehualo de unte deuste cuhuötzetzi que intucö Cástor hua Pólux. ¹² Otaseto pa puieblo de Siracusa cöne otocöjque yeye tunale. ¹³ Otequisque de Siracusa hua oteyöya hasta otaseto pa puieblo de Regio. Pa mustlateca ohualie yejyecatl desde ca tlatzintla hua pa ume tunale otaseto pa puieblo de Puteoli. ¹⁴ Ompa otequennömejque seque tocnihua. Otiechtlalfejque ma tocöhualo ca yejua por sie semöna hua otocöjque. Sötiepa de inu otequisque para Roma. ¹⁵ Tocnihua pa Roma ye oquecajque que tejua ye tebitze pa ojtle. Por inu oquisque de Roma para tiechnömequesque pa ojtle. Pos ohualiejque hasta puieblo de Foro de Apio hua hasta inu locör itucö Tres Tabernas. Cuöc Pöblo oquemejtac inu tocnihua, otietlasojcömachele Deus hua lalebes opajpöc. ¹⁶ Entunses otaseto pa Roma. Ompa oquecöjque Pöblo ma neme isiel ca sa sente soltöro tli quixutis.

Pöblo otlanunutz de Jesús pa Roma

¹⁷ Cuöc opanuc yeye tunale, Pöblo otlatitla ca joriojte tli cache bejbeye momajtaya pa Roma ma mosentlölicö ca yaja. Cuöc ye omosesentlölejque, Pöblo oquemelfe:

—Señores, mös amo tli onecchi cuntra joriojte nimpör cuntra costumbres de totötajua, de todos modos joriojte pa Jerusalén oniechtiemöctejque prieso ca tlötlajtoönejme romanos. ¹⁸ Cuöc inu tlötlajtoönejme romanos oniechecsaminörojque abier tlö canajyetla delito onecchi, oquenejque niechcajcohuaquea libre porque amo oniechniextelejque arasu para ma nemeque. ¹⁹ Cache inu joriojte omoponierojque. Por inu oyeya nesidad para onetlajtla ma niechjuscöro César mös amo tli onecpex para notejtieyelfis

cuntra nogiente joriojte. ²⁰ Por inu noso naja onemiechnutz porque onecnec nemiechejtas hua nemiechnunutzas. Öxö nemejua nenniechejta necö nelpeteca ca carienajte precisamente por inu esperanza tli tejua tejoriojte tecpea.

²¹ Entunes yejua oquelfejque Pöblo:

—Tejua amo tecaresibirojque nion sente cörta de joriojte tli cate pa estado de Judea. Nimpör nionöque de tocnihua joriojte tli ajaseco necö amo tiechelfea niontle cuntra taja. ²² Tejua tecpea meyac gönas temetzcaquesque lo que tli tecpensöroa porque tejua tecmate que ca nobeyo giente tlajtlajtoa cuntra ini nönca yancuec tlamachtelestle.

²³ Entunes oquetzontejque sie tunale para mosentlölisque. Pa inu tunale meyactie omosentlölejque pa cale cöne Pöblo omocalutiöya. Pos desde ca ise hasta ca ye yohuac Pöblo oquennunutz quiene ca Deus tlamandörurus. Omasec itech inu ley tli oquejcuelo Moisés hua itech lo que tli quejtoa ömame de tlayulepantejque. Ejqueu oquennunutz para ma moneltocacö ca Jesús. ²⁴ Seque joriojte oquenparesiero lo que tli Pöblo oquejto hua omoneltocaque pero ocseque amo omoneltocaque. ²⁵ Pos inu joriojte amo oyejyeya de acuerdo entre yejua mismo. Por inu opiejque moxiexeløjque. Pero antes que oquisque, Pöblo oquemelfe:

—Espíritu Sönto ara ca cuale oquemelfejque nemotötajua cuöc oquelfejque inu profeta Isaías ejqueyi:

²⁶ Xebeya ca ini nönca giente hua xequemelfe ejqueyi:

“Mös seme nentlacaquesque nemejua, pero amo nencasojcömatesque.

Mös seme nentlacheasque pero amo nenqueyequejtasque”.

²⁷ Pos inyulo de nönca giente lalebes tepitztec,

hua cate tzatzatzetzi de intlacaqueles.

Hua oquenzajque imixteloljua

para majcamo queyequejtacö ca imixteloljua,

hua majcamo tlacaquecö ca intlacaqueles,

hua majcamo casojcömatecö ca inyulo,

hua majcamo moyulcuepacö,

hua ejqueu amo nequenpajtis.

²⁸⁻²⁹ Öxö nemejua nenjoriojte xecmajtacö ini, que desde öxö para ca adelönte Deus quenmacasque locör para giente tli amo joriojte ma momöquexticö. Inun quiema que yejua queyejcaquesque.

³⁰ Pöblo ume xejte pa Roma pa sente cale tli canajyeca ocarendörfe. Ompau oquensele noche giente tli oquejtato. ³¹ Oquennunutz giente de quiene ca Deus tlamandöruro. Ca meyac confiönsa oquenmachte noche söstantle de Jesucristo, hua amo öque oquetzacuele.

Sente cörta tli San Pöblo oquemejcuelfe ROMANOS

¹ Naja nePöblo, que neca netietlatequepano de totieJesucristo. Yejuatzi oniechnutzque para ma niye netlateotitlantle. Oniechapartörojque para ma netequete de netlanunutzas de inu cuale tlamachestelestle de Deus. ² Yejuatzi oqueprometierojque inu cuale tlamachestelestle desde pa niecaju tiempo por incamacopa de inu tlayulepan-tejque tli oquejcuulojque teotlajtule. ³ Ini nönca cuale tlamachestelestle tlajtlajtoa de tieConietzi Deus. Otlöcatihuac de ixenöchpelhua de David, ⁴ pero ca checöhuallestle Deus quedemoströrojque que yejuatzi iloac tieConietzi Deus. Pos tieyulebitiluc de intzölö mimejque por tieEspíritu öque yectec iloac. Yejuatzi tieConietzi Deus iloac toTlöcatzintle Jesucristo. ⁵ Por medio de yejuatzi otecselejque tiefavur de Deus. Nuyejque otecselejque ini nönca tequetl de que tecate tetlateotitlanme. Tecchihua ini tequetl para que ejqueu giente de meyactie naciones ma moneltocacö hua ma tieneltocacö Deus. Ejqueu ma quepeacö yejuatzi yectieniebestle. ⁶ De intzölö inu niecate giente nuyejque nemejua nencate, öque yejuatzi nemiechnutzque para nenyisque nende Jesucristo.

⁷ Nemiechejcuelfe ini nönca cörta para noche nemejua tli nencate ipa Roma, öque Deus nemiechtlasojtlalo, hua nemiechnutzque para ma xeyecö xeyecteque. Ma Deus toTajtzi, hua Tlöcatzintle Jesucristo ma nemiechmeyaquelicö tieinfavur hua neyulsiebestle.

Pöblo quenequeya iyös ca Roma

⁸ Ca cachto, netietlasojcömatea noDeus por medio de totieJesucristo por nemonochtie nemejua, ipampa nemoneltoqueles ye macheateca ipa noche tlöltecpactle. ⁹ Netietequetepanoa Deus ica noche sentetl noyulo. Pues noteque ica de que netlanunutza de inu cuale tlamachestelestle tli tiechelfe de tieConietzi. Hua yejuatzi quematihua de quiene seme nemiechelnömeteca nemejua ipa notlajtlötlajteles. ¹⁰ Notlajtlötlajtejteca beles quiemaneyo isejco necpeas locör para neyös ca nemejua, tlö Deus quenequihua. ¹¹ Pues lalebes necneque nemiechejtas, para ma nemiechmaca canajyetla tli nemiechpaliebis ipa nemoyulo, de inu sösantle tli quietimacalo Espiritu Sönto, para ejqueu nemoyulchecöjtasque. ¹² Es decir necneque neyös nemotlac para nequejtas quiene ca nemoneltoca, hua nuyejque nemejua nenquejtasque quiene naja noneltoca. Hua ejqueu nemejua nenniechanimörusque naja, hua naja nuyejque nemiechanimörus nemejua. ¹³ Cache necneque, nocnihua, xecmatecö que meyacpa ye onocujajpetzo para neyös ca nemejua, cache hasta öxö abele neya. Necneque nemiechpaliebis hua nequejtas entre nemejua nemotlachihual tli yebitz por que nemoneltoca. Pos ejqueu ye onequenpaliebe hua onequejtac intlachihual de tocnihua de ocseque naciones. ¹⁴ Pues noobligöroa para nequenpaliebis noche giente, sea que tlajtlajtoa ca griego, noso cox amo tlajtlajtoa ca griego; sea tlin tlajmatque o noso niecate tli amo tlajmatque. ¹⁵ Hua ca inu, san quiene ca nebeletes, necuejcuesebe para netlanunutzas de inu cuale tlamachestelestle nuyejque ca nemejua tli nencate ipa Roma.

Inu cuale tlamachestelestle quepea checöhuallestle

¹⁶ Pues amo nepinöhua de inu cuale tlamachestelestle. Pues por cuale tlamachestelestle Deus quemoströruo tiechecöhuales para quenmöquextisque noche tli moneltoca; cachto tli joriojte, hua nuyejque tli amo joriojte. ¹⁷ Pues ini nönca cuale tlamachestelestle tiechejtetea de inu yectelestle tli Deus tiechmacalo cuöc toneltoca hua porque toneltoca. Pues ejqueu tlajcuelulpanca: “Öque iyec yectec, por ineltoqueles nemes”.

Noche giente tlajtlaculcate

¹⁸ Pos ye quemoströrojque Deus tietlabielmequeles desde elfecac cuntra noche giente porque tlajtlacoa hua amo tierespetöroa Deus. Pues yejua, ipampa tlajtlaculteque cate, amo queneque quecöhuasque ma machea lo que tlin melöhuac. ¹⁹ Ejqueu quechihua yejua mös cuale quejta quiene iloac Deus, pues yejuatzi quemejtetejque. ²⁰ Abele tetieyetasque Deus ca toixtelololjua, pero yejuatzi quechejchijque tlöltecpactle, hua itech inu söstantle tli conchejchijque, cuale tequejta que yejuatzi iloac Deus, hua que quepealo checöhuallestle nochepa. Ejqueu abele yeca quejtus que amo oquemat de Deus. ²¹ Pues mös que giente tieixomateya Deus, pero amo tiechamöjque quiename quemeresieruro porque iloac Deus, nimpör amo tietlasojcömatelejque. Cache opiejque oquepensörojque de söstantle tli amo quepea proviecho, hua inyulo omochi tunto hua ayecmo cuale casojcömateya. ²² Oquejtojque que nele lalebes tlajmatque oyejyeya, cache omochijque tuntojte. ²³ Hua ayecmo tietechijque Deus, öque quepealo tlanixtelestle hua ayec mecoa. Cache quenteochijque ixniehualojme de tlöca tli mejmeque, hua ixniehualojme de yulcöme tli patlöne, hua de yulcöme quiename cuiecuetzpalte hua de ocseque yulcöme.

²⁴ Hua por inu, nuyejque Deus oquencajcöjque ma quechihuacö söstantle petzoyutl tli yejua quejeliebiöya ipa inyulo, hua ejqueu entre yejua oquechijque söstantle tiepinöjte ca incuierpo. ²⁵ Yejuatzi oquencajcöjque ma quechihuacö ejqueu ipampa yejua oquetlabielcöjque lo que tli melöhuac tli tiechelfea de Deus, hua cache oquetocaque inu istlacatelestle. Pues quenteochijque hua quentequepanojque lo que tli Deus quechejchijque, hua amo tietechijque nimpör amo tietequapanojque yejuatzi miero öque oquenchejchijque noche inu söstantle. Yejuatzi ma quepeacö teochibelestle semej-cac. Amén. Ma ejqueu iye.

²⁶ Ipampaju Deus oquencajcöjque ma quejeliebicö söstantle tiepinöjte, hua hasta inso-huöhuö oquecöjque de mopöctisque ca innajnömecua quiename conbenierebe, hua cache maseque entre mismo yejua sohuame. ²⁷ Hua ejqueu nuyejque tlöca oquecöjque de mopöctisque ca insojsohuöhuö quiename conbenierebe, hua ototuneaque ipa intlaix-eliebes ca sie yejua. Oquechijque tli sie atiro amo cuale, tlöca ca tlöca. Hua yejua queselejque inu tlaxtlöbile tli quemeresierojque porque otiecöjque Deus.

²⁸ Yejua amo oquenejque tierereconosierusque Deus ipa inpensamientos. Hua por inu, Deus oquencajcöjque ma quepensörucö sie atiro tli amo cuale, para ma quechihuacö tli amo conbenierebe. ²⁹ Ejqueu seme quechijtecate de noche tlajtlacule, hua de petzoyutl. Hua lalebes mijicoltea de lo que tli amo inhuöxca, hua quechihua tli amo cuale. Seme moxicoa, hua tlajtlamectea, hua quetiemoa peleitos, hua tlacajcayöhua, hua quetiemoa quiene quenhibelisque amo cuale ca ocseque. Tlatieyelfea, ³⁰ istlacatljtoa, tietlajyele-jta Deus, mochajchamöhua hua amo tlarespetöroa. Momachelea bieye, hua quenemelea tlin amo cuale. Amo quenneltoca intötajua, ³¹ amo quenejneque cajasojcömatesque. Amo quecumpliroa intlajtul, amo tietlasojtla, amo quepejpea tieicnuejtelestle. ³² Yejua cuale ocasojcömatque que Deus oquejtojque que noche giente tli quechihua inu nieca söstantle imicnupel yaja mequelestle. Pero mös quemate inu, yejua quechihua inu söstantle, hua hasta nuyejque quecualejta tlö quechihua ocseque.

2

Deus tlajuscöruro san quiene ca ica melöhuac

¹ Por inu, tlö taja tetlapinöbea, abele tequejyönas motlajtlacul, amo importörebe öquenu taja. Pos cuöc tecpinöbea noso tequestlocoa yeca ocsente, tomocuntenöroa taja mismo; porque taja nuyejque tecchijteca lo mismo que inu nieca öquenu taja tecpinöbea. ² Cache tecmajtecate que Deus tlajuscöruro san quiene ca ica melöhuac cuöc quencuntenöruro noche tli quechijtecate inu nieca söstantle. ³ Hua taja, öque tequenpinöbea ocseque tli quechihua inu söstantle, hua taja nuyejque tecchihua lo mismo, ¿beles tecpensöroa

que temöquisas para amo metzcuntenörsque Deus? ⁴ Noso ¿amo tecneque tecchihuas cöso de tiemeyac icnuejtelestle tli momeya quelea ca taja? Pues yejuatzi quexiculuteca motlajtlacul hua amo nima metzcastecöruro. Xecmate noso que metzpelilo inu icnuejtelestle porque quenequihua ma xomoyulcuepa. ⁵ Cache por tecaca teyultepitztec hua por que amo moyulcuepa moyulo, tectlamachtlölejteca para sie taja cualönelestle. Inu cualönelestle mopa betzes ipa inun tunale cuöc Deus quemoströrsque tiecualöneles hua ca yectelestle quenjuscörsque giente. ⁶ Hua yejuatzi quentlaxtlöbisque cara sesen tlöcatl san quiene ca itlachihual. ⁷ Seque giente beles seme quechijtecate tlin cuale, hua ejqueu quetiemoa tlanixtelestle, hua queneque ma quenhamöhuacö Deus, hua quetiemoa lo que tli ayec tlame. Para inu niecate giente, Deus quenmacasque nochepa nemelestle. ⁸ Pero giente tli tieixnömequeneme, hua tli amo queneltoca tlin melöhuac, cache queneltoca lo que tli amo yectec, yejua impa betzes tiecualöneles hua tietlabielmequeles Deus. ⁹ Porque queselisque sufrimientos hua meyac tiecoco noche giente tli quechihua amo cuale, primero joriojte, hua nuyejque tli amo joriojte. ¹⁰ Cache queselisque chamöhualestle hua yulsiebestle hua quejtasque tietlanixteles Deus, noche niecate tli quechihua tlin cuale, primero joriojte, hua nuyejque tli amo joriojte. ¹¹ Pos Deus amo tlachecuaejtalo.

¹² Pues noche giente tli tlajtlacoa sin que amo quemajmate inu ley de Moisés, pos nuyejque mejmequesque, mösque amo quepejpea inu ley. Hua noche tli otlajtlacojque mösque quemateya inu ley, inu ley quencuntenörs. ¹³ Pos amo mochihua yecteque para ca Deus niecate tli sa quecaque inu ley, tlöcamo niecate tli quechihua lo que tli quejtoa inu ley, yejua Deus cuale quenselisque quiename yecteque. ¹⁴ Pues seque giente amo cate joriojte hua amo quepea inu ley, pero yejua sa de porsi quechihua tli quejtoa inu ley porque ejqueu yejua cate. Yejua amo quepea inu ley de Moisés, pero yejua mismos cate quiename sente ley para yejua mismos. ¹⁵ Pues lo que tli quemarcöroa inu ley de Moisés cuale tequejta que quiename tlö tlajcuelulpanca ipa inyulo de inu giente. Pues cuöc quechihua tli amo cuale, inyulo quenpinöjtea; hua cuöc quechihua cuale, inyulo quenyectionehua. Hua ejqueu inpensamiento paques quentieyelfea, hua paques impa tlajtoa por yejua. Pero cox quecumpliroa inu ley o noso cox amo quecumpliroa, ¹⁶ noche macheas ipa inu sölültimo tunale. Pos cuöquenu Deus questlocusque por medio de Jesucristo noche söstantle tli giente quijyöna ipa inyulo. Pos ejqueu tiechelfea inu cuale tlamachestelestle tli netlanunutza.

Joriojte nuyejque mocuntenöroa

¹⁷ Pero beles taja tequejtus que taja teca tejoreyo hua que tomoquitzequejteca itech inu ley de Moisés. Beles tomochamöhua de que tetietechihua bel yejuatzi Deus. ¹⁸ Hua tecmajteca tli tietlanequeles, hua tecmate tlin cuale, porque otemoyecmachte ipa inu ley de Moisés. ¹⁹ Beles tecpensöroa que taja tecaca quiename tetlayecönque de ixcoxcöztetzi, noso quiename tetlöbile de tli cate ipa tlajtlayohuaquelestle, porque taja cache tecmate que ocseque. ²⁰ Beles tomomachelea que tecaca tetlamachtione de tli amo tlajmatque, hua que tecaca temachestiero de tli cate quiename pelantzetzi porque ayemo quemajmate. Beles taja temase de que tecpea inu ley tli metzmaca machelestle de tlin melöhuac. ²¹ Taja, noso, tli tequenmachte ocseque, ¿tlica amo tomomachte taja mismo? Taja tli tetlanunutza nelé majcamo öque tlachteque, ¿tlica tetlachteque? ²² Taja que tequejtoa nele majcamo öque calaque ca isohua ocseque, ¿tlica taja tecchihua? Taja, que hasta tequentlajyelejta ixniehualojme, ¿tlica tetlachteque ipa teopantle? ²³ Taja que tomochajchamöhua de que tecpea inu ley, taja tetiepejpinöjtea Deus, ipampa amo tecchihua lo que tli quejtoa inu ley. ²⁴ Pos inu ocseque giente tieca tlajtoa Deus por nemopampa nemejua nenjoriojte. Ejqueu mochijteca lo que tli tlajcuelulpanca.

²⁵ Pues ica cuale tomonacayutec tlö tecchihuas lo que tli quejtoa inu ley. Pero tlö amo tecchihuas lo que tli quejtoa ley, tomocöhuas iguöl quiename tlö amo tomonacayutequene. ²⁶ Entunses, tlö canajyeca tli amo nacayutlatectle quechihuas lo que tli tlajtlane inu ley, Deus queselisque inu tlöcatl para iyese de tiepuieblo quiename tlö oyene joreyo, mösque amo monacayutec. ²⁷ Pues inu tlöcatl ayec omonacayutec, pero quechihua de melöhuac lo que tli quejtoa inu ley. Hua ejqueu niese que yaja ica cache cuale que taja, ipampa taja mös tecpea inu ömatlajcuelule de inu ley hua mös tomonacayutec, pero amo tecchihua tli quejtoa inu ley. ²⁸⁻²⁹ Pos amo ica joreyo de melöhuac öque sa niese que ica pero que amo tlaneltoca tieca Deus ipa iyulo. Hua inu nacayutlatequelestle tli balierebe amo yaja tli mochibelea ipa öque icuierpo, tlöcamo cache balierebe inu nacayutlatequelestle tli ica pa toyulo, tli mochihua por tieEspíritu Deus hua amo por inu ley tli tlajcuelulpanca. Sente tlöcatl tli ejqueu icaca nacayutlatectle ipa iyulo, yaja ica de melöhuac joreyo, hua *queselea chamöhuallestle tli yebitz de Deus hua amo de tlöca.

3

¹ ¿Tli proviecho noso quebiczat öque iyese joreyo? Noso ¿tli proviecho quebiczat inu nacayutlatequelestle? ² Pos lalebes meyac proviecho quebiczat. Primero, Deus quenmöctejque tietlajtultzi ca joriojte. ³ Hua ica melöhuac que seque de yejua amo moneltocaque, pero inu abele quejtus que Deus ayecmo iloac de confiönsa para ayecmo cuale toneltocasque tieca yejuatzi. ⁴ Majcamo tecpensörucö ejqueu, cache ma tequejtucö que lo que tli Deus quejtulo ica melöhuac, mösque beles noche tlöca quejtusque ocseque söstantle. Pos ejqueyi tlajcuelulpanca:

Ejqueu niese que tomopilea arasu de lo que tli tomojtalfe, hua ejqueu tomotlaxexicalfis cuöc giente metzmoestlocolfisque.

⁵ Pero totlajtlacul serbirebe para ma cache niese tieyecteles Deus. Entunses, ¿cuale tequejtusque que amo iloac yectec cuöc cualönoa para tiechcastecörusque? (Netlajtlajtoa quiename tlajtlajtoa tlöltecpactlöca.) ⁶ Pues abele ejqueu iyese, porque tlö Deus amo iloane yectec, abele quenjuscörurusquea giente de tlöltecpactle. ⁷ Pero beles yeca quejtus: “Por noistlacatlajtul cache cuale niesteca que Deus tlajtlajtulo ca melöhuac. Hua ejqueu giente cache tiechamöhua. Entunses Deus amo quepealo tlica niechcuntenörusque quiename netlajtlacultec”. Yeca cuale quejtus ejqueu. ⁸ Hua nuyejque cuale quejtus: “Tlöjcu, ma tecchihuacö tlin amo cuale para que ejqueu huölös tlin cuale”. Yaja ini nönca lo que tli seque istlacatlajtoa de tejua que nele tequejtoa inu. Pero ica cuale que Deus ma quencuntenörucö giente tli quejtoa inu söstantle.

Amo onca nion sente tlöcatl yectec

⁹ ¿Tli noso tequejtusque? ¿Beles tecate cache cuale tejua tli tejoriojte que nemejua que amo nenjoriojte? Pues amo. Pues ye tequejtaque que cuale tequentieyelfea joriojte ca tiehua tli amo joriojte, que innochtie cate ipa tlajtlacule. ¹⁰ Quieme tlajcuelulpanca: Amo onca tlöcatl tli yectec, nion sente.

¹¹ Amo onca öque casojcömate, amo onca öque tietiemoa Deus.

¹² Innochtie monencuaxelöjque, ayecmo quepea niontle tlin cuale ipa inyulo. Amo onca öque quechihua tlin cuale; amo onca nion sente.

¹³ Quienname mejcöcoyoctle tlapojteca incamac; ca innenepil tlacajcayöjteneme; quiename venieno de cuhuötl icaca ijtec incamac.

* **2:28-29** “Joreyo” quejtusneque “tlöcatl de Judá”, hua “Judá” quejtusneque “chamöhuallestle” ca hebreo.

14 Seme cusöroa incamac para tietlabejbicaltea hua para quejtoa söstantle tli tiecoco.

15 Imicxehua cuejcuesebe para tlamöyabetibe.

16 Yejua quexexetotza söstantle hua quecajcohua tietunie tiecoco inca tlöca.

17 Ojtle de yeeciebestle amo oquixomatque.

18 Amo quepejpea majcömabelestle de Deus.

19 Tecmajmate que noche tli quejtoa inu ley quemelfea yejua tli quepea obligación para queneltocasque inu ley. Ejqueu nionöque abele quejtus canajyetla cuöc Deus quejuscörusque. Hua noche tlöltecpactlöca quetiemasque cuenta ca Deus. 20 Pues abele öque iyec yectec tieixpa Deus, nion sente tlöcatl, ipampa abele öque quechihuas noche lo que tli quejtoa inu ley. Pues inu ley tiechejtetea que tecate tetlajtlaculque.

Teyesque teyecteque por toneltoqueles

21 Pero öxö Deus otiechmacaque ocsie maniera para teyesque teyecteque, que amo yebitz por inu ley. Hua inu teotlajtule tli oquejcuelojque Moisés hua inu ocseque tlayulepantejque tiechelfea de ini nönca. 22 Pues Deus tiechchihualtilo para ma teyecö teyecteque por toneltoqueles tieca Jesucristo. Ejqueu quechihualo ca innochie quiejquech moneltoca, pos amo quechihualo diferencia entre sie tlöcatl ca ocsie tlöcatl. 23 Pos tonochtie tetlajtlacojque, hua tiechpoloa para teyesque intiero tecualteque quiename Deus iloac. 24 Pero por tiefavur yejuatzi tiechselilo quiename teyecteque hua teyulmelacteque, sin que niontle tectlaxtlöhuasque. Pos Cristo Jesús oquetlaxtlöjque para tiechmöquextejque. 25 Deus otietiemacuc Cristo para que tieyesojtzi ma iye sente cuetlabilestle. Ejqueu Deus cuale quenperdonörfisque intlajtlacul de noche giente tlö moneltoca tieca Cristo. Ejqueu cuale tequejta que Deus oquechijque cuale cuöc pa nieca tiempo amo oquechijque cöso de intlajtlacul giente porque quenpililoöya paciencia. 26 Ejqueu noso tiechdemoströrfilo öxö que mösque yectec iloac yejuatzi hua tetlajtlaculque tejua, pero cuale tiechselilo quiename teyecteque tonochtie tli toneltoca tieca Jesús.

27 Entunses, ¿cuale tochamöhuasque? Pues abele. Pues tlö cuale tomöquextiöne por lo que tli tecchihua entunses cuale tochamöhuasquiöne. Pero tejua tomöquextea san por sa toneltoca, hua ejqueu abele tochamöhuasque. 28 Bieno pues, cuale tequejta que yeca cuale iyec yectec por neltoquelestle sin que amo quepeas que quechihuas lo que tli quejtoa inu ley. 29 Pos Deus amo iloac sa Deus de joriojte tlöcamo melöhuac nuyejque iloac Deus de tli amo joriojte. 30 Pos iloac sa sie Deus, hua giente tli monacayuteque yejuatzi quenselisque quiename yecteque ipampa moneltoca. Hua tli amo joriojte hua amo monacayuteque, nuyejque quenselisque porque moneltoca. 31 ¿Beles quejtusneque que cuöc toneltoca tequejtusque que ayecmo balierebe inu ley? Pues amo ejqueu ica; cache tecafirmörojtecate ibalur de inu ley.

4

Quiene omochi yectec Abraham por que omoneltocac

1 ¿Tli noso tequejtusque de quiene oyeya Abraham, öque ica totöta de tejua tli tejoriojte? 2 Tlö quejtus Abraham icaca yectec para ca Deus san por itlachihual, quepea de tli mochamöhuas. Pero abele omochamö tieca Deus. 3 Pos ¿tli quejtoa teotlajtule? “Hua omoneltocac Abraham tieca Deus, hua Deus quepubelejque ineltoqueles quiename yectelestle”. 4 Pues tlö canajyeca tequete para tlatlönas amo quepubelea itlaxtlöbil quieme cana sente favur tlöcamo quieme tietlabiquelestle. 5 Cache Deus amo queselilo quiename yectec nieca tlöcatl tli quechihua tlachihuale, tlöcamo yaja tli moneltoca ca yejuatzi. Pos yejuatzi iloac öque queselilo tlajtlacultec tlöcatl quiename yectec. Hua Deus quepubelelo ineltoqueles quiename yectelestle. 6 Ejqueu David nuyejque oquejto

que cuale icnupel tlöcatl öque Deus quepoalo quiename yectec sin que quepeas que quechihuas canajyetla. ⁷ Pues ejqueu oquejto David:

Cuale imicnupel quiejquech tlöca intlajtlacul ye oquenperdonörfejqe, hua intlajtlacul ye oquepojpolojqe.

⁸ Cuale icnupel tlöcatl cuöc Tlöcatzintle amo quepubelilo itlajtlacul.

⁹ Bieno pues, ini nönca cuale icnupelstle, ¿ica sa para niecate tli nacayutlatecme noso nuyejque ica para tli amo nacayutlatecme? Pues tequejtojtecate que nele Abraham oquepubelejque Deus ineltoqueles quiename yectelestle. ¹⁰ ¿Quiene noso, oquepubelejque? ¿Oquechijque cuöc ye omonacayutejtec noso cuöc turavea ayemo monacayutequeya? Pos amo cuöc ye oyeya nacayutlatecme, tlöcamo cuöc turavea ayemo monacayutequeya. ¹¹ Hua cuöc omonacayutejtec inu quemoströro hua caseguröro de que ye oyeya yectec porque omoneltocac, mös turavea ayemo monacayutequeya. Ejqueu Abraham icaca quiename tajtle de noche moneltocaneme, mösque beles amo nacayutlatecme yesque. Pues nuyejque yejua tlö moneltoca Deus quenpubelisque yectelestle. ¹² Hua ejqueu nuyejque Abraham icaca tajtle de tli nacayutlatecme; quejtusneque amo de niecate tli sa monacayutejteque de incuierpo, tlöcamo de tli nuyejque moneltoca, san quiene omoneltocac totöta Abraham antes de que monacayuteques.

Abraham oquesele tli Deus queprometierojque porque omoneltocac

¹³ Pues Deus queprometierfejqe Abraham hua ixenöchpelhua que nele mohuöxcatis noche tlöltecpectle. Pero amo queprometierfejqe porque yaja queneltocaya inu ley, tlöcamo porque oyeya yectec por ineltoqueles. ¹⁴ Pero tlö mohuöxcatesquiöne niecate tli mase itech inu ley, quejtusnequesquea que amo balierebesquea neltoquelestle, hua amo quepeasquea balur tiepromiesa de Deus. ¹⁵ Pues inu ley quebicatz castigo. Pues tlö cana amo uyene ley tli tiechelfea quiene ma tecchihuacö, tlöjcu abele tetlajtlacusquea encuentra de inu ley. ¹⁶ Por inu, tecselea lo que tli Deus queprometierojque por toneltoqueles, para que ejqueu tecselea por tiefavur. Hua ejqueu ica seguro para cuale queselisque noche tlöca tli quechihua quiene oquechi Abraham. Pues amo queselisque sa niecate tli queneltoca inu ley, tlöcamo niecate quiejquech moneltoca san quiene ca omoneltocac Abraham, öque icaca tajtle de tonochtie. ¹⁷ Pos ejqueyi tlajcuelulpanca: “Por tajtle de meyactie naciones otemetztlöle”. Pues yaja omoneltocac tieca Deus. Pos moneltocaya que yejuatzi cuale quenyulebitilo mimejqe, hua tlajtlajtulo de söstantle tli ayemo cate, quiename tlö ye oyene. ¹⁸ Cuöc ayecmo öque quecheasquea para öque quepeas iconie, Abraham oc turavea omöchix porque omoneltocac. Hua ejqueu omochihuaco tajtle de meyactie naciones, san quiene ca oquelfejque Deus: “Ejqueyi de meyactie yesque moxenöchpelhua”. ¹⁹ Hua amo omodesanimöro de ineltoqueles, mös oquemat que ye opanuc tiempo de que cuale quepeas ipelhua. Pues ye quepeaya cöso sie sientos xebetl. Nimpör amo omodesanimöro mös oquelnömec que Sara machura oyeya. ²⁰ Cache cuale omofijöro ipa tiepromiesa de Deus. Hua amo oquepolo ineltoqueles, cache omocuaipetzo porque moneltocaya, hua otiechajchamöhuaya Deus. ²¹ Pues yaja oyeya seguro de que Deus cuale quechihualusquea de lo que tli queprometierojque. ²² Hua por inu, Deus oquepubelejque ineltoqueles quiename yectelestle. ²³ Hua inu tli tlajcuelulpanca de que Deus ejqueu oqueselejque ineltoqueles, amo omojcuelo sa para yaja Abraham, ²⁴ tlöcamo omojcuelo nuyejque para tejua. Pues nuyejque tejua Deus tiechpubelilo toneltoqueles quiename yectelestle, tlö cana toneltocatecate tieca yejuatzi öque tieyulebitiluc toTöcatzintle Jesús de intzölö mimejqe. ²⁵ Deus tietiemacuc totieJesucristo para ma mecoa ipampa totlajtlacul. Hua tieyulebitiluc para que ejqueu Deus cuale tiechselilo quiename teyectequ.

5

Quiene tecate cuöc Deus tiechselilo quiename teyecteque

¹ Bieno pues, ye tecate teyecteque para ca Deus porque toneltoca. Ejqueu ayecmo tecate tetiecontrörrios de Deus, cache toTlöcatzintle Jesucristo ye tiechmacaque yeicsiebestle entre tejua hua Deus. ² Hua ipampa toneltoca tecselea tiefavur Deus por medio de totieJesucristo. Pues toquitzquea itech tiefavur hua ejqueu tepajpöque ipampa tecchea que tecpeasque pörte de tietlaniexteles de Deus. ³ Hua amo sa yaja ini nönca, cache nuyejqe tepajpöque cuöc tecsufriroa, ipampa tecmajtecate que itech inu sufrimientos tectzecusque quiene ca tecxicojtasque. ⁴ Hua cuöc ye tecmajmate cuale quiene tecxicusque, ye tecpeasque checöhualestle ipa toyulo. Hua cuöc ye tecpea yulchecöhualestle, cuale tecpeasque checöhuac tlamöchealestle. ⁵ Hua inu tlamöchealestle amo quebicatz tequepachule, cache mocumplirus. Tecmate que mocumplirus ipampa toyulo tienteca de tietlasojteles Deus por medio de tieEspíritu Sönto tli tiechmacaque yejuatzi. ⁶ Pos cuöc abele topaliebiöya, cuöquenu, cuöc conbenierebeya, Cristo omecoaco por topampa tejua por que tetlajtlaculteque tecate. ⁷ Melöhuac amobel queneques meques sente tlöcatl por ocsente, mösque omequene por sente cuale tlöcatl. Pero beles yeca matrebierus hasta meques por sente cuale tlöcatl. ⁸ Pero Deus tiechejtetilo quiene tiechtlasojtlalo lalebes, pues mösque oc turavea tetlajtlaculteque teyejyeya, Cristo omecoaco por topampa. ⁹ Hua ca inu, ye tecate teyecteque para ca Deus por tieyesojtzi Cristo. Entunses cache ca meyac arrasu tiechmöquextisque yejuatzi para que amo topa betzes tiecualöneles Deus. ¹⁰ Pues cuöc oc teyejyeya tienemigos de Deus, yejuatzi ocsajpa tiechsentrölölejque ca yejuatzi por medio de tiemequeles tieConietzi, para ma ayecmo teyecö tienemigos. Hua öxö ye otiechsentrölölejque ca yejuatzi por que omecoac. Entunses cache ca meyac arrasu tiechmöquextisque por que nemoateca. ¹¹ Hua amo sa yaja ini nönca, cache nuyejqe tecpea pajpöquelestle tiecatzinco Deus por medio de toTlöcatzintle Jesucristo, pues ye tiechsentrölölejque tieca Deus.

Adán hua Cristo

¹² Bieno pues, por sa sie tlöcatl yaja Adán ocalac tlajtlacule ipan tlöltecpactle. Hua por tlajtlacule ocalac mequelestle nuyejqe, hua ejqueu noche tlöca meque por que noche otlajtlacojqe. ¹³ Pos hasta cuöc onieseco inu ley de Moisés tlajtlacule ye oyeya ipan tlöltecpactle; mösque Deus amo quepoalo intlajtlacul tlöca mientras amo onca ley. ¹⁴ Cache desde cuöc Adán hasta cuöc Moisés noche tlöca omejmejque porque innochie otlajtlacojqe, mös seque intlajtlacul amo oyeya quieme otlajtlaco Adán. Hua yaja Adán icaca tieixniehualo de yejuatzi öque sötiepa ohualiloac. ¹⁵ Pero inu tlajtlacule tli oquechi Adán hua tietlachihual de Cristo abele tecnenebelisque. Pues lo que tli oquechijque Cristo tiechmaca nemöquextelestle. Pues por itlajtlacul de inu nieca sie tlöcatl omejmejque meyactie. Pero cache lalebes turavea omomeyaquele inca meyactie tiefavur Deus hua inu tietlöocolelestle tli tecselea porque Cristo tiechchibelejque favur. ¹⁶ Hua itlajtlacul de nieca tlöcatl abele tecnenebelisque ca inu nemöquextelestle tli tiechtlöocolfilo Cristo. Pos por inu sie tlajtlacule Deus oquepexque tlica quencuntenörusque giente. Pero inu tietlöocolelestle oquenchihualte yecteque gientes, mösque yejua oquechijque meyac tlajtlacule. ¹⁷ Pues inu sente tlajtlacule quenchihualte tlöca ma mejmequecö por causa de inu sente tlöcatl. Pero cache ca meyac arrasu por causa de sie tlöcatl Jesucristo nemesque hua tlamandörusque tieca yejuatzi innochie tli queselea tiebieye favur hua inu tiebieye tlöocoleles que yaja yectelestle. ¹⁸ Ejqueu pues san quiene ca por itlajtlacul de sente tlöcatl noche tlöca ocalajque ipa condenación, ejqueu nuyejqe por tieyeteles de ocsente tlöcatl noche tlöca cuale calaquesque ipa yectelestle hua nemelestle. ¹⁹ Pues por sente tlöcatl tli amo otlaneltocac meyactie omochijque tlajtlaculteque. Ejqueu nuyejqe por sente tli otlaneltocaluc meyactie mochihuasque

yecteque. ²⁰ Hua inu ley nuyejque onhuöla para ma cache tlajtlacucö giente. Pero cuöc omobieyele tlajtlacule, cache lalebes omobieyele tiefavur Deus. ²¹ Ejqueu quiene tlajtlacule quenchiualte tlöca ma mejmequecö, ejqueu nuyejque öxö tiefavur Deus quenchiualtea tlöca para ma yecö yecteque para que ejqueu nemesque nochepa por medio de toTlöcatzintle Jesucristo.

6

Ye otemejmejqe para ca tlajtlacule, pero teyulejtecate para ca Deus

¹ ¿Tli tequejtusque noso? ¿Oc turavea tetlajtlacojtasque para ma momeyaquele tiefavur Deus? ² Majcamo ejqueu mochihua. Pues icaca quiename tlö tejua ye otemejmejqe para ca tlajtlacule. Hua ejqueu tlajtlacule ayecmo tiechpeas imöc. ¿Quiene noso oc turavea tetlajtlacojtasque? ³ Pos ¿amo nenquemajmate que tonochtie tejua tli tocuötiequejqe para teyesque tieca Cristo Jesús, inu cuötiequelestle quejtusneque que tejua tecate tieca yejuatzi ipa tiemequeles? ⁴ Hua por inu cuötiequelestle ica quieme tlö otomejcötucaque tiehua yejuatzi. Hua ejqueu noso ye otemejmejqe para ca tlajtlacule. Hua ejqueu quieme Cristo oyulebihuac de intzölö mimejqe por tieyecchecöhuales de tieTajtzí, ejqueu nuyejque tejua ma tenemecö ca inu nemelestle yancuec. ⁵ Pues tiehua yejuatzi quieme ye otemejmejqe ejqueu quiename omecoac yejuatzi. Hua ejqueu nuyejque teyulebesque ejqueu quiename oyulebihuac. ⁶ Tecmajtecate ini nönca, que tonemeles tli oyeya tecpeaya ye omocoruspelo tiehua yejuatzi, para ejqueu tonacayo tlajtlacultec ma xexetune. Hua ejqueu ma ayecmo tectequopanucö tlajtlacule. ⁷ Pos öque ye omec, ayecmo icaca imöc tlajtlacule. ⁸ Hua tlö ye otemejmejqe tiehua Cristo, toneltoca que nuyejque tenemesque tieca yejuatzi. ⁹ Pues tecmajmate que Cristo ye oyulebihuac de intzölö mimejqe, hua ejqueu ayecmo quiema mecoas. Mequelestle ayecmo quepea checöhuallestle ca yejuatzi. ¹⁰ Pos cuöc omecoac, omecoac sa sajpa para que tlajtlacule ayecmo quepeas checöhuallestle tiepa. Cache öxö que nemoa, nemoa para Deus. ¹¹ Ejqueu nuyejque nemejua, xomonenebelicö que tiel melöhuac ye nencate nenmimejqe para ca tlajtlacule. Cache nenyulejtecate para Deus porque nencate tieca Cristo Jesús.

¹² Por inu, amo xomocöhuacö ma tlamandöro tlajtlacule ipa nemocuiervo tli meques. Majcamo nemiechchihualte nenquechihuasque itlaixeliebeles. ¹³ Nimpör amo xecmöcticö nemocuiervo ica tlajtlacule para quetequepanus hua quechihuas amo cuale tlachihuallestle. Cache cuale xequelnömequecö que ye nenyulejqe de intzölö mimejqe. Hua ejqueu xomotiemöcticö ca Deus hua xectiemöcticö nemocuiervo ca Deus para ma tlatequepano ca yejuatzi hua ma quechihua de lo que tli yectec. ¹⁴ Pues tlajtlacule amo quepea checöhuallestle nemopa nemejua. Pues ayecmo nenquepea tli nenquejtasque ca inu ley, cache nemoquitzquea itech tiefavur de Deus.

Ma tectequopanucö yectelestle

¹⁵ ¿Tli noso? ¿Tetlajtlacojtasque ipampa ayecmo tecate ipa inu ley, tlöcamo ipa tiefavur Deus? Majcamo ejqueu. ¹⁶ ¿Amo nenquemajmate que tlö nemotiemöctea ca canajyeca para nenquetequepanusque hua nenqueneltocasque, nencate nentlatequepanojque noso nenesclavos de nieca öque nenqueneltocatecate? Pues tlö nenqueneltocasque tlajtlacule nenyisque nenesclavos de tlajtlacule hua nenmejqesque. Pero tlö nentieneltocasque Deus nenyisque nentiesclavos de yejuatzi hua nenyisque nenyecteque. ¹⁷ Cache tetietlasojcömateleca Deus, que mös nenquetequepanoöya tlajtlacule, öxö ye nenqueneltocaque ca noche nemoyulo de inu cuale machestelestle, hua ye nemotiemöctejque ica. ¹⁸ Hua nemomöquextejque de imöc tlajtlacule, hua ye nemochijque nenesclavos de yectelestle. ¹⁹ Xeniechperdonörucö que necpea que netlajtlajtus ejqueyi, pero conbenierebe porque nemiechpoloa beletelestle para cuale

nencasojcömatesque. Pero ca ye niepa onenquetiemöctejque nemocuiervo para ma iye tlatequepano de petzoyutl hua de tlajtlacule, hua ejqueu oquechi tlajtlacule. Öxö, noso, ejqueu mismo xectiemöcticö nemocuiervo para ma iye tlatequepano de yectelestle, para ma xeyecö xeyecteque.

²⁰ Pues cuöc nenquetequepanoöya tlajtlacule, amo nenquepeaya tlica nenqueneltocasque yectelestle. ²¹ Hua ¿tli proviecho nenquepeaya de inu söstantle tli nenquechi-huaya, de tli öxö ye nenpejpinöhua? Pues pa itlamejyo noche inu söstantle quebicatz mequelestle. ²² Cache öxö, ayecmo nenquepea tlica nenqueneltocasque tlajtlacule, hua ye nencate nentlatequepanojque de Deus, hua ejqueu nenquepea proviecho de que nencate nenyecteque. Hua itlamejyo de ini nönca ica nemelestle nochepa. ²³ Pues itlaxtlöbil tlajtlacule yaja mequelestle; cache tietlöcoholes Deus yaja nemelestle nochepa tieca toTlöcatzintle Cristo Jesús.

7

Ayecmo tiechmandöroa inu ley, quiename sente tlöcatl tli ye omec aijcocuele quemandörus isohua

¹ Bieno, nocnihua, nemejua nenquemajmate cuale de inu ley, hua nenquemate que inu ley quepea checöhuallestle ipa sente tlöcatl mientras yaja neme. ² Por ejiemplo, sente sohuatl tli quepea inömec, mientras neme inömec inu ley quejtoa que quepea que iyes ca inömec. Cache tlö ye omec inömec, ye omöquis de lo que tli quejtoa inu ley de que quepea que iyes ca inömec. ³ Por inu, tlö neme inömec inu ley quejtoa que inu sohuatl iyes tlaumepiane tlö cana quepeas ocsente tlöcatl. Cache tlö inömec ye omec, pos entunses yaja ye omöquis de inu ley. Ca inu ayecmo iyes tlaumepiane mös quepeas ocsente inömec.

⁴ Ejqueu nuyejque nemejua, nocnihua, nencate quieme tlö ye onemejmejque para ca inu ley ipampa omecoac Cristo. Hua ejqueu ayecmo nencate imöc de inu ley. Ejqueu cuale nemosietelisque ca ocsente tlöcatl, yejuatzi öque oyulebihuac de intzölö mimejque. De inu manera ma cache momeyaquale toyectlachihual tieixpa Deus. ⁵ Pues cuöc oc tectocaya tonacayo, inu ley otiechpiepiehualte para ma tecnequecö tetlajtlacusque. Hua ejqueu ca tocuervo tecchihuaya lo que tli quebicatz mequelestle. ⁶ Cache öxö ye temöquisque de imöc inu ley hua ayecmo tiechmandörus. Pos ye tecate quiename temimejque para ca inu ley. Ejqueu cuale tetietequapanusque Deus ica yancuec beletelestle tli tiechmacalo tieEspíritu Deus. Hua ejqueu ma ayecmo iye quieme pa nieca tiempo cuöc sa tecchihuaya lucha de tejcumplirusque ca inu ley tli tlajcuelulpanca.

Tlajtlacule tli icaca totech

⁷ ¿Tli noso tequejtusque? ¿Beles tequejtusque que inu ley ica intiero amo cuale? Abele ejqueu iyes. Pues naja amo nequixomatene tlajtlacule tlö amo niechmoströrfisquea inu ley. Amo nomacane cuenta de que notlaicolteles icaca amo cuale, tlö inu ley amo niechelfisquiöne: “Amo xemicolte lo que tli amo mohuöxca”. ⁸ Cache inu tlajtlacule tli ica notech ocasec locör por lo que tli oquejto inu ley, hua ejqueu oniechchihualte ma nicolte de meyac söstantle. Pos cöne amo onca ley amo tomaca cuenta tlö tetlajtlacoa. ⁹ Hua ejqueu antes que naja onequixomat inu ley, onecpensöro que nenemeya cuale. Cache cuöc onecasojcömat inu mandamiento de inu ley, entunses tlajtlacule ocasec beletelestle, hua naja onecmachele que ayecmo nenemeya cuale hua que inu ley niehcuntenöroöya para nemeques. ¹⁰ Hua ejqueu onecniexte que inu ley, mös niechmacasquea nemelestle, cache niehcuntenöro para ma nemeque. ¹¹ Pues inu tlajtlacule tli icaca notech omoöprovehöro de inu ley para que oniechcajcayö, hua por inu ley oniehcuntenöro para ma nemeque. ¹² Ejqueu noso, inu ley ica yectec, hua melactec, hua cuale.

¹³ Entuneses, ¿beles tequejtusque que lo que tlin cuale omocuec mequelestle para ca naja? Amo ejqueu icaca. Cache inu tlajtlacule, para ixmantete nieses que yaja tlajtlacule, nopa omochi mequelestle itech inu ley tlin cuale. Ejqueu omochi para que inu ley ma quedemostrōro que tlajtlacule ara ca lalebes tlajtlacultec ica. ¹⁴ Pues tecmajtecate que inu ley yebitz de tieEspíritu Deus. Cache naja nectoca nonacayo, hua necaca quieme sente esclavo tli niechcujque para ma necchihua tlajtlacule. ¹⁵ Pos tli naja necchihua, amo necasojcōmate. Nimpor tli necneque, inu amo necchihua. Pero tli nectlajyelejta, yaja inu necchihua. ¹⁶ Ejqueu cuōc netlajtlacoa necchijteca de lo que tli amo necneque. Entuneses quejtusneque que nomaca cuienta de que inu ley icaca cuale. ¹⁷ Hua quejtusneque que amo naja neca que necchijteca inu tlajtlacule, tlōcamo quechijteca yaja tlajtlacule tli ica notech. ¹⁸ Hua naja necmate que amo onca tlin cuale notech (quejtusneque itech nonacayo amo cuale). Pues mōs necneque necchihuas tlin cuale cache abele necchihua. ¹⁹ Pues amo necchihua tlin cuale tli necnequesquea necchihuas cache inu tlin amo cuale hua tli amo necyequejta yaja inu necchihua. ²⁰ Hua tlō necchihua tli amo necneque, ayecmo naja necchihua, tlōcamo quechijteca yaja tlajtlacule tli notech ica.

²¹ Entuneses nequejta que seme ejqueyi ica, que mōs naja necneque necchihuas tlin cuale, cache necniextea notech lo que tli petzotec hua amo cuale. ²² Pues ipa noyulo nejcualejta tieley de Deus. ²³ Cache nequejta ocsente beletelestle ipa nonacayo que yaja inu beletelestle de tlajtlacule, hua quecuajnömeque beletelestle de noyulo. Hua inu beletelestle niechxexicoa hua niechpea quiename neprioso, mientras tlamandōroa ipa nocuierpo. ²⁴ ¡Porube de naja! ¿Ōquenu niechmōquextis de nōnca nonacayo tli niechbicateca para ma nemeque? ²⁵ Pues netietlasojcōmatelea Deus, pues yejuatzi niechmōquextilo por medio de toTlōcatzintle Jesucristo. Bieno, pues, ejqueu ica que tlō amo niechpaliebilo Deus, ca noyulo naja necneque necchihuas lo que tli niechmandōruro yejuatzi, cache ca nocuierpo necchihua lo que tli niechmandōroa tlajtlacule.

8

Nemelestle por tieEspíritu Deus

¹ Ōxō noso, Deus amo tiechcuntenōrusque tejua tli tecate tieca Cristo Jesús. ² Pues inu Espíritu tiechmacalo nemelestle tieca Cristo Jesús, hua por tiebeleteles ye otiechmōquextejque de inu beletelestle de tlajtlacule hua de mequelestle. ³ Pos Deus oquechijque lo que tli inu ley de Moisés abele oquechi. Pos inu ley amo checōhuac oyeya porque tonacayo tlajtlacultec abele queneltocaya. Pero Deus tiehualtitlanuc tieConietzi ipampa tejua tetlajtlacojque. Otiamacuc tiecuierpo quiename tocuerpo tli ica tetlajtlacoa. Hua ejqueu, itech tiecuierpo de Jesús, Deus quexexicojque tlajtlacule hua quequextejque ichecōhuals. ⁴ Ejqueu oquechijque para ma tecchihuacō tejua lo que tli tlajtlane inu ley. Pues tejua ayecmo teneme san quiene ca queneque tonacayo, tlōcamo san quiene ca quenequihua tieEspíritu Deus. ⁵ Pues tlō öque quetoca inacayo, quetiemoa inu sōsantle tli queneque inacayo. Pero tlō öque tietoca tieEspíritu Deus, quetiemoa sōsantle tli quenequihua yejuatzi Espíritu. ⁶ Pues tlō canajyeca quetiemoa lo que tli queneque inacayo, ipa huölōs mequelestle. Pero tlō quetiemoa tli quenequihua yejuatzi Espíritu, quepeas nemelestle hua yulsiebelestle. ⁷ Pues öque quetiemoa tli queneque inacayo tieixcuajnömeque Deus, ipampa amo queneltoca tieley de Deus, nimpor amo belete para tlaneltocas. ⁸ Hua ejqueu tlō canajyeca quetoca inacayo abele tiepōquelesmacas Deus.

⁹ Cache nemejua amo nenquetoca nemonacayo, tlōcamo nentietoca Espíritu, tlō quejtus tieEspíritu Deus nemoa ipa nemoyulo. Pero tlō canajyeca amo tiepea tieEspíritu Cristo, quejtusneque que amo icaca tiehuōxca yejuatzi. ¹⁰ Cache tlō Cristo nemoa ipa nemoyulo, nemoyulo neme ipampa nenyectequenecate, mōs que nemocuierpo

meques ipampa tlajtlacule. ¹¹ Hua tlö inu Espiritu de yejuatzi öque tieyulebitiluc Jesús de intzölö mimejque, tlö yejuatzi nemoa ipa nemoyulo, pos yejuatzi öque tieyulebitiluc Cristo de intzölö mimejque nuyejque queyulebitisque nemocuiervo tli meque, por tieEspiritu tli nemoa ipa nemoyulo.

¹² Ejqueu noso, nocnihua, amo tecpea obligación para ma tenemecö san quiene queneque tonacayo, cache ma tenemecö san quiene quenequihua Espiritu. ¹³ Pues tlö tenemesque san quiene queneque tonacayo, temejuquesque. Cache tlö por tieEspiritu tecmectea itlachihual de tonacayo, tenemesque. ¹⁴ Porque innochie tli quenyecönaló tieEspiritu Deus, yejuanu cate tiepelhua Deus. ¹⁵ Pues Deus amo nemiechmacaque sente espíritu tli nemiechchihualtea nenyeseque nenesclavos para ocsajpa nemomajtisque. Cache cuale onemiechmacaque tieEspiritu öque nemiechchihualtea para nenyeseque nentiepelhua de Deus. Pues por yejuatzi Espiritu tequejtoa: “*Abba, toTajtzi”. ¹⁶ Pues nuyejque sie yejuatzi Espiritu tiechelfilo ipa toyulo que tecate tetiepelhua Deus. ¹⁷ Hua tlö tetiepelhua Deus tecate, quejtusneque que tohuöxcatisque de inu sösanle de toTajtzi. Tejua ca tiehua Cristo tohuöxcatisque sösanle de Deus, tlö quejtus tecsufrirusque tiecoco tietunie tiehua yejuatzi, para que ejqueu tiehua yejuatzi tecpeasque pörte ipa tlanixtelestle.

Tlanixtelestle tli moniextis topa

¹⁸ Pues necpensöroa que noche tli tecsufriroa ipa ini nönca tiempo abele tecnenebelisque ca inu tlanixtelestle tli moniextis topa. ¹⁹ Pues noche tlöltecpactle hua noche lo que tli Deus oquechejchijque möchixtecate ca meyac cuejcuesebelestle para ma toniexticö ca tlanixtelestle tejua tli tecate tetiepelhua de Deus. ²⁰ Pues noche tlöltecpactle omotlöle ipa niempolebelestle. Inu amo omochi porque oquenec yaja tlöltecpactle, tlöcamo porque yejuatzi Deus ejqueu oquenejque hua ejqueu oquechijque. Pero tlöltecpactle möchea ²¹ que nuyejque möquisas de imöc inu palönelestle. Hua entunses quepeas libertad ejqueu quiename tejua tli tecate tetiepelhua Deus tecpeasque libertad cuöc tecselisque tlanixtelestle. ²² Pues tecmate que noche tlöltecpactle quiename yelsesebe hua tena hua hasta öxö quesufrirojteca. ²³ Hua amo sa yaja tlöltecpactle, tlöcamo hasta tejua nuyejque. Tetiepextecate tieEspiritu de Deus öque tiechmacalo tepetzi de lo que tli sötiepa tecselisque, hua tiechgarantizörfilo que tecselisque noche niecaju sösanle. Tejua nuyejque teyelsejtecate ipa toyulo hua tecmöchixtecate para inu tiempo cuöc nises que tecate tetiepelhua de Deus. Quejtusneque que tecmöchixtecate para cuöc tocuiervo möquisas de ipa niempolebelestle. ²⁴ Pues por tomöcheales otomöquextisque. Pero cuöc ye niese lo que tli öque quechixteca, ayecmö quenesesitöroa tlamöchealestle. Pos tli öque quejta, ¿tli para oc quemöcheas? ²⁵ Pero tejua tecmöchea tli ayemo tequejta, hua ca paciencia tecmöchixtecate.

²⁶ Hua ejqueu nuyejque yejuatzi Espiritu tiechpaliebito por que amo techejchecacteque tecate. Pues amo tecmate quiene tetlajtlanesque quiename conbenierebe. Cache sie yejuatzi Espiritu netlajtlötlajtilo por tejua, ca yelsesebelestle tli abele tequejtusque ca tlajtule tli quejtusneque. ²⁷ Cache Deus, öque quetlatiemolilo toyulo, yejuatzi quematihua tli quepensöruro Espiritu. Pues san quiene ca tietlanequales Deus, ejqueu tlajtlanhua Espiritu para ca tejua tli teyecteque.

²⁸ Hua tejua tetietlasojtla Deus, hua yejuatzi otiechnutzque ejqueu quiename oqueplaneörojque. Por inu tecmajmate que noche sösanle quisas cuale para toproviecho de tejua. ²⁹ Pues quiejquech antes oquemixomatque, pues yejuanu mismos oquentzon-tejque para ma yecö san quiene ca iloac tieConietzi. Ejqueu ma yejuatzi tieConietzi ma iloa mayur intzölö meyactie icnijte. ³⁰ Hua innochie tli oquentzontejque, yejuanu

* **8:15** “Abba” icaca sente tlajtule aramaico tli quejtusneque “tata”, noso, “notöta”. Xomojtelicö Mr. 14.36, Gá. 4.6

mismos oquennutzque. Hua innochtie tli oquennutzque, yejuanu mismos oquenselejque quiename yecteque. Hua innochtie tli oquenselejque quiename yecteque, yejuanu mismos oquenmacaque para quepeasque tietlaniexteles.

Tiebieye tlasojteles de Deus

³¹ Pos ¿tli tequejtusque ca noche inu? Tlō Deus iloac por topörte, ¿öquenu iyeyes encuentra de tejua? Pos nionöque. ³² Pues Deus nimpör tieConietzi amo tiechnegörfejqque, cache otieantrecöruruc para ma mecoa por topampa tonochtie. Entunses cache ca meyac arrasu tiechmacasque noche ocseque sösantle ca tiehua tieConietzi. ³³ Entunses, ¿öquenu cuale tiechtieyelfis tejua tli Deus tiechixpejpenque? Pues abele öque, porque yejuatzí Deus iloac öque tiechselilo quiename teyecteque. ³⁴ Entunses ¿öquenu cuale tiehcuntenörus? Pues nionöque. Pues Cristo iloac öque omecoac, cache nuyejque oyulebihuac, hua nuyejque iloac ca tiemöyecmö de Deus, hua nuyejque netlajtlötlajtiluteca por topampa tejua. ³⁵ Entunses ¿öquenu cuale tiechnencuaxelus de ipa tietlasojteles Cristo? ¿Beles tequepachule? ¿Noso tiecoco? ¿Noso tepotztocalestle? ¿Noso teosebelestle? ¿Noso xipetzebelestle? ¿Noso tiemajmajtelestle? ¿Noso inespödas de toenemigos? ³⁶ Pues tecsufrirusque noche ini nönca sösantle. Pos iyeyes quiename tlajcuelulpanca:

Mopampantzinco temejmectecate noche semelfetl;
tiechpextecate quiename tecalnielöjte para tiechmectisque.

³⁷ Pero ipa noche ini nönca sösantle tetlaxexicoa, hua turavea cache cuale tequisa, por medio de yejuatzí öque tiechtlasojtlalo. ³⁸ Pues neca seguro que nimpör mequelestle, nimpör nemelestle, nimpör öngeles, nimpör tlötlajtoönejme, nimpör tli onca, nimpör tli huölös, nimpör checöhualesme, ³⁹ nimpör tli tlacpajca, nimpör tli bejcatlanca, nimpör niontle tli Deus oquechejchijque, abele tiechnencuaxelus de ipa tietlasojteles Deus, tli tietechca toTlöcatzintle Cristo Jesús.

9

Deus oquixpejpenque Israel

¹ Nequejtojteca tlin melöhuac porque neca tieca Cristo. Amo nistlacatlajtoa. Noyulo nuyejque ica testigo tieca Espíritu Sönto. ² Lalebes niechtlöocoltea hua seme niechyulcocoa. ³ Hasta necnequesquiöne ma niechtlabejbicalticö Deus, hua ma nonencuaxelo de Cristo, tlö inu cuale quenpaliebisquea nocnihua, tli cate de nogiente. ⁴ Netlajtlajtojteca de joriojte noso israelitas. Pues yejua Deus oquenmacaque deriecho para yesque tiepelhua, hua yejua oquejtaque tietlaniexteles, hua Deus oquechijque tieacuerdos ca yejua, hua quenmacaque inu ley. Hua yejua tejtequeteya de tietechihuaya Deus, hua Deus oquenmacaque promesas. ⁵ Hua inu tötajte quiename Abraham, hua Isaac, hua Jacob, yejua oyejyeya intötajua israelitas. Hua nuyejque Cristo tlöcatihuac de israelita. Yejuatzí Cristo iloac Deus öque tlamandöruro ipa noche sösantle, öque quepealo yectieniebelestle nochepa. Amén. Ejqueu icaca.

⁶ Cache amo nequejtojteca que sa omonienchejchi tietlajtultzi Deus. Pues amo innochtie tli otlöcatque ipa puieblo de Israel cate israelitas de melöhuac. ⁷ Nimpör amo innochtie tli cate de ixenöchpelhua Abraham, cate ipelhua de melöhuac. Cache Deus oquejtojque que: “Itech Isaac tecpeas moxenöchpelhua”. ⁸ Quejtusneque que inu ipelhua Abraham tli otlöcatque quiename tlajtlöcate noche pelantzetzí, yejua amo cate tiepelhua de Deus. Pero niecate tli otlöcatque por tiepromiesa de Deus, yejua quenpoalo quiename ipelhua Abraham. ⁹ Pues ejqueu oqueprometierojque Deus: “Ipa sie xebetl naja nehuölös, hua quepeas Sara sente iconie”. ¹⁰ Hua amo sa inu, cache nuyejque Rebeca omoutztlöle por sie tlöcatl, que yaja Isaac öque ica totöta de tejua tli tejoriojte. ¹¹ Hua ayemo tlajtlöcateya pelantzetzí, nimpör ayemo quechihuaya tlin cuale nimpör tlin amo cuale, cuöc Deus quixpejpenque sente de yejua. Ejqueu cuale tequejta

que Deus quedesediruro öquenu quixpejpenasque, hua quixpejpenalo, amo por lo que tli quechihua yaja, tlöcamo por que yejuatzi quenequihua quenutzasque. ¹² Por inu oquelfeque Rebeca ejqueyi: “Moconie tli cachtojyebes quetequepanus tli sötiepajyebes”.

¹³ Pos nuyejque tlajcuelulpanca:

Yaja Jacob onectlasojtlac,
cache Esaú onectlajyelejtac.

¹⁴ ¿Tli noso tequejtusque? ¿Beles tequejtusque que Deus oquechijque lo que tli amo yectec cuöc ejqueu quemixpejpenque? Abele ejqueu iyec. ¹⁵ Cache cuale icaca quiename Deus quelfilo Moisés:

Necpilis icnuejtelestle de öque naja necneque necpilis icnuejtelestle,
hua niechtlöocoltis öque necneque ma niechtlöocolte.

¹⁶ Entunses amo dependierebe de öquenu queneque, nimpore de öquenu cache cuale momeröhua, cache dependierebe de Deus, öque tiechpililo icnuejtelestle. ¹⁷ Pues teotlajtule quelfea Faraón: “Para ini nönca otemetztlöle, para nectieyjetetis motech noche nochecöhuales, hua para que notucöyu ma mopoa ipa noche tlöltecpectle”. ¹⁸ Entunses tequejta que cuöc Deus quenequihua quicnuejtasque canajyeca, pues quicnuejtalo, hua cuöc quenequihua queyultepitzusque canajyeca, queyultepitzulo.

Deus cualönoa ca seque, hua seque quenpililo icnuejtelestle

¹⁹ Beles teniechelfis: “¿Tlica, noso, tiechtlajtlacultilo? Pues mös amo tecnequesquiöne pero tecpea que tecchihuasque tietlanequeles”. ²⁰ Cache naja temetztlajtlanes: “¿Öquenu taja, para ejqueu tetiecuajnömeques Deus?” Sente xoctle abele quelfea öque oquechijchi: “¿Tlica oteniechchijchi ejqueyi?” ²¹ Noso ¿beles tequejtus que inu casfielajtiero amo quepea deriecho para quechihuas de sie tapalcatl sente xoctle para tlin cuale hua ocsente para ma quetietiemacö tlasole ijtec? ²² Pues ejqueu nuyejque Deus quepealo deriecho para quechihuasque tli quenequihua. Pues yejuatzi oquenejque quetieyjetetisque tiecualöneles hua nuyejque oquenejque ma machea de tiechecöhuales. Hua por inu oquexicojque ca meyac paciencia inu giente tli cate quiename xocme de tlabiele, tli tlachejchijme para tlaxexetunelestle. ²³ Hua ejqueu nuyejque oquenejque quetieyjetetisque tietlaniexteles inca xocme de icnuejtelestle, tli yejuatzi oquenechijchijque para ma quepeacö de tietlaniexteles. ²⁴ Ini nöncate xocme tecate tejua, öque tiechnutzque yejuatzi. Hua amo sa tiechnutzque tli tejoriojte, tlöcamo nuyejque meyactie de tejua amo cate joriojte. ²⁵ Pues ipa inu libro de Oseas quejtulo ejqueyi:

Nequennutzas yejua tli amo nopuieblo, para ma yecö nopuieblo;
hua inu nación tli amo tlasojtlale, nejcuitis notlasojtlale.

²⁶ Hua mochihuas que ipa inu locör cöne onequemelfe: “Nemejua amo nencate nennopuieblo”,

ompa miero mocuitisque tiepelhua de Deus öque nemoateca.

²⁷ Nuyejque Isaías quejtoa de inu puieblo de Israel: “Mös uyesquiöya meyactie ipelhua Israel quiename xöle de itienco lamör, pero momöquextisque sa quiesquete de yejua.

²⁸ Pos Tlöcatzintle quecumplirusque tietlajtultzi ipan tlöltecpectle. Quetlamisque, hua sa nima quesencöhualasque”. ²⁹ Hua nuyejque oquejto Isaías quiene mochihuasquea:

Tlö Tlöcatzintle *Sabaot amo tiehcöbeliloöne quiesquete toxenöchpelhua,
tetlamesquiöya quiename inu ciudad de Sodoma,
hua tocöhualasquiöya quiename Gomorra.

Meyactie de Israel amo moneltocaque

* **9:29** “Sabaot” ica sente tlajtule hebreo tli quejtusneque “ejércitos”. Nele tlajtlatoa de tieöngeles de Deus. Xomojtelicö Stg. 5.4

³⁰ ¿Tli tequejtusque noso? Pues que inu giente tli amo joriojte, mös amo quetiemoöya yectelestle, yejua oquepexque inu yectelestle tli yebitz por öque ineltoqueles. ³¹ Cache giente de Israel, que quietocaya inu ley para ma quepeacö yectelestle, yejua abele quecumplirojque inu ley. ³² ¿Tli ipampa abele oquepexque inu yectelestle? Ipampa amo quetiemoöya ca neltoquelestle, tlöcamo quepensöroöya que cuale quepeasquea inu yectelestle por intlachihual. Ejqueu omoteputlamejque ica tietetu de teputlamelestle. ³³ Pos tlajcuelulpanca:

Xequejtacö. Naja neclölis ipa Siön sente tietetu tli ica moteputlamesque, hua tietebiebentzi tli quenchiuالتis ma betzecö. Hua öque moneltocas ca yaja ayec mopejpinöjtis.

10

¹ Nocnihua, melöhuac necneque ca noche noyulo, hua notlajtlötlajtea Deus por no-giente de Israel, para ma momöquexticö. ² Pues naja nequejta que yejua lalebes tietiemoa Deus, cache amo cajasojcömate cuale. ³ Pues yejua amo quemateya de inu yectelestle tli Deus quietiemacalo, hua quenejneque mochihuasque yecteque sa yejua mismo. Hua amo mosujetöroa para queselisque inu yectelestle tli Deus quietiemacalo. ⁴ Pos ye omocumpliro inu ley cuöc hualiloac Cristo. Ejqueu cuale iyec yectec noche tlöcatl tli moneltoca.

Noche giente cuale momöquextisque

⁵ Pues Moisés quejcueloa que tlö sente tlöcatl quechihuas inu söstantle yectec tli quemarcöroa inu ley, ejqueu quepeas nemelestle. ⁶ Cache cuöc mojtoa de inu yectelestle tli yebitz por neltoquelestle, quejtoa ejqueyi:

Amo xequejto ipa moyulo: “¿Öque cuale tlejcus elfecac?”

(Pos amo nesesitörebe öque tlejcus elfecac para öque tietemobis Cristo, pos ye ohualte-moac.)

⁷ Nimpor amo xequejto: “¿Öquenu cuale temus cöne tlatecoyöbelespa?”

(Pos amo nesesitörebe öque temus para tiehualecas Cristo de intzölö mimejque, pos ye ohualnecuepaluto de ompa.) ⁸ Cache ¿tli quejtoa? Pues quejtoa ejqueyi:

Motlanca tlajtule,

ipa mocamac hua ipa moyulo.

Hua inu tlajtule icaca yaja tlajtule de neltoquelestle de tli tejua tetlanunutzta: ⁹ Que tlö tetietieniehuas ca mocamac que Jesús iloac Tlöcatzintle, hua tomoneltocas ca moyulo que Deus otieyulebitiluc de intzölö mimejque, tomomöquextis. ¹⁰ Pues ca öque iyulo moneltoca para iyec yectec, hua ca icamac öque tietieniehua para momöquextis. ¹¹ Pues quejtoa teotlajtule: “Öquenu beletes moneltocas tiecatzincö ayec mopejpinöjtis”. ¹² Pues amo onca diferencia entre joreyo hua tli amo joreyo. Pues sie yejuatzi iloac Tlöcatzintle de tonochtie, hua rico iloac para tiechpaliebisque tonochtie quiejquech tetietzajtzelea. ¹³ Pues: “Tlö canajyeca tietzajtzelis por tietucöyutzi Tlöcatzintle, yaja momöquextis”.

¹⁴ ¿Quiene, noso, tietzajtzelisque por tietucöyutzi tlö amo moneltoca? Hua ¿quiene moneltocasque tieca tlö ayec quecajque de yejuatzi? Hua ¿quiene quecaquesque tlö amo onca öque quennunutzas? ¹⁵ Hua ¿quiene tlanunutzasque tlö amo öque quentitlane? Pues ejqueu tlajcuelulpanca: “Lalebes cuöcualtzi cuöc hualase niecate tli tlanunutzasque de cuale tlamachestelestle de tlin cuale”.

¹⁶ Pero amo innochtie oquechibelejque cöso de inu cuale tlamachestelestle. Pos Isaías quejtoa: “Tlöcatzintle, ¿öquenu omoneltocac ca totlanunutzales?” ¹⁷ Ejqueu noso tequejta que toneltoqueles yebitz por totlacaqueles, cuöc tejcaque que tlajtlanunutztecate de tietlajtultzi Cristo. ¹⁸ Pero netlajtlane: ¿quie beles amo oquecajque inu giente de pa nieca tiempo? Pos quiema oquecajque. Pues ejqueu quejtoa: Ipa noche tlöltecpactle ye omosu intlajtul de yejua,

hua hasta cöne tlame tlöltecpactle oaseto intlajtulhua.

¹⁹ Pero ocsajpa netlajtlane: ¿quie beles inu israelitas amo ocaojcömatque ini nönca? Pues quiema ocaojcömatque. Hua por inu quejtoa Moisés ejqueyi:

Naja nemiechchihualtis xechajchöhuatecö ca giente tli amo de nopuieblo, hua nemiechchihualtis xecualönecö por medio de giente tli amo quemajmate.

²⁰ Hua sötiepa Isaías matreviero para quejtus:

Oniechniextejque giente tli amo niechtiemoöya;

Ononiexte inca giente tli amo noca tlajtlaneya.

²¹ Cache de inu puieblo de Israel quejtulo ejqueyi: “Noche semelfetl nemösujtaya ca sente puieblo tli tlaixnömequene hua amo tlaneltocane. Necnequeya nequennöhuajteques, pero amo oquenejque”.

11

Mocöhua seque de Israel tli moneltoca

¹ Bieno pues, ¿beles quejtusneque que Deus intiero quetlabielcöjque tiepuieblo? Amo ejqueu ica. Pues naja nuyejque necaca neisraelita, de ixenöchpelhua Abraham, de inu tribu noso grupo de Benjamín. ² Deus amo quetlabielcöjque tiepuieblo, tli oquemixomatque antes que otlajtlöcatene. Xequelnömequécö quiene quejtoa teotlajtule de Elías. Pues yaja otlajtlajto tieca Deus cuntra Israel, hua oquejto: ³ “Tlöcatzintle, noche motlayulepantejtzetzihua ye oquenmejmectejque, hua moajtöltzetzihua ye oquenxexetotzque. Hua sö naja ye onocö sa nosiel, hua quenejneque niechmectisque”. ⁴ Cache ¿tli oquenönquelejque Deus? “Ye nequenmalfe para naja checume mil tlöca que amo motlancuöquetzque ixtla nieca ixniehualo de Baal”. ⁵ Ejqueu mismo, ipa ini nöncate tunalte omocöjque seque tli cate tlaixpejpenque por tiefavur Deus. ⁶ Hua tlö omixpejpenque por tiefavur Deus, entunses quejtusneque que amo ica por tlachihualestle. Porque tlö ejqueu oyene por tlachihualestle, ayecmo monesesitörusquea tiefavur de Deus.

⁷ Bieno pues, inu yectelestle tli quetiemoöya inu israelitas, inu amo oqueniextejque. Pero niecate tli quemixpejpenque Deus ye oqueselejque yectelestle, hua inu ocseque omoyultepitzoque. ⁸ Ica quiename tlajcuelulpanca:

Deus oquenchihualtejque ma ayecmo quemachele inyulo

hua ma abele tlacheacö inca imixtelolujua,

hua ma abele tlacaquécö inca innacashua.

Hua ejqueu cate hasta öxö.

⁹ Hua David quejtoa:

Inu söstantle cuale tli quepejpea ma mochihuacö quiename trömpa, hua quieme tarröya, para que por medio de inu söstantle queselisque intlaxtlöbil de intlajtlacul.

¹⁰ Hua imixtelolujua ma yecö ipa tlanextecume para majcamo tlacheacö, hua seme xequenmochihualtele ma mopiechojtenemecö hua ma tlamömajtenemecö.

Momöquextea tli amo joriojte

¹¹ Netlajtlane noso: ¿quie beles moteputlamejque para ma betzecö hua ma ayecmo majcoquécö? Majcamo ejqueu iye. Cache cuale, por que yejua joriojte ombetzque ipa tlajtlacule ohuöla nemöquextelestle para ocseque giente, para que yejua joriojte ma chöhuatecö. ¹² Pues por que yejua obetzque giente de noche tlöltecpactle oquepexque inu ricojyutl que yaja nemöquextelestle. Ejqueu inporubejyo de yejua omochihuaco ricojyutl para ocseque giente. Entunses cache ca meyac arrasu cuöc yejua ocsajpa moricojtisque, cache lalebes iyec cuale para ocseque giente.

¹³ Pues nemiechnunutzteca nemejua tli amo nenjoriojte nencate. Naja neca netlatitlantle para ca nemejua tli amo nenjoriojte. Hua necchamöhua noteque. ¹⁴ Pues necneque ejqueu nequenchihualtis ma chöhuatecö joriojte, abier tlö cana ejqueu cuale

nequenmöquextis seque de yejua. Pues yejua cate nogiente. ¹⁵ Pues cuöc Deus oquent-labielcöjque joriojte, omochi para ma mosietelicö ca Deus giente de noche tlöltecpactle. ¿Tli noso mochihuas cuöc Deus ocsajpa quenselisque? Pues mochihuas yulebelestle de mimejque. ¹⁶ Hua tlö inu primero pörte de sente textle omoxelo para Deus, pues ejqueu icaca noche. Noso tlö inelhuayo de sente cuabetl icaca cuale, entunses nuyejque ica cuale imömöyo. Ejqueu omoxelojque para Deus inu tötajte de israelitas, hua por inu nuyejque ejqueu cate innochtie israelitas.

¹⁷ Pero ica quieme tlö cana seque imömöyo opojpostejque de inu cuabetl tli querepresentöroa inu nación de Israel. Hua taja tli amo tejoreyo teca teimömöyo de ocsente cuabetl de munte. Hua itech inu belaja cuabetl de olivo otomotzecuto intzölö imömöyo. Hua ejqueu tecpea pörte de inu iöyo bielec tli quisa de itech inelhuayo cuabetl. ¹⁸ Amo xomochajchamöhua cuntra de tli belejua imömöyo cuabetl. Cache tlö tomochajchamöhuas, xequelnömeque que amo taja tequescaltejteca inu nelhuayutl, tlöcamo yaja nelhuayutl metzescaltejteca taja. ¹⁹ Pero beles tequejtus: “Imömöyo cuabetl opojpostejque para que naja ipa ilocör netzecojtas”. ²⁰ Pues cuale; ipampa amo omoneltocaque, yaja ica opojpostejque. Cache taja cuale tecaca ipampa tomoneltocateca. Amo xomochamöhua tlöcamo xecpea mabelestle. ²¹ Tlö quejtus Deus amo tietlöocoltejteque tli belejua imömöyo cuabetl, nuyejque taja amo tetietlöocoltis. ²² Xomomaca cuenta, noso, quiene Deus quepealo tlasojtelestle, pero nuyejque checöhuac tietlachihual. Ca sie löro tiechecöhuac tlachihual niese inca niecate tli obetzque. Cache ca ocsie löro tietlasojteles ica para ca taja, tlö quejtus tecsequirojtas tomoquitzejtus de itech tietlasojteles. Hua tlö amo, nuyejque taja metztesquesque. ²³ Hua nuyejque yejua, tlö cana ocsajpa moneltocasque, pues ocsajpa motzecsque itech inu cuabetl, pues Deus quepealo checöhuallestle para ocsajpa quentzecsque. ²⁴ Pos taja sa tecaca sente tetlatectle de itech sente cuabetl de munte, hua otomotzecuto itech tlin cuale cuabetl de olivo cöne amo tetlöcat. Entunses cache ca meyac arrasas tli belejua otlöcatque itech tli belaja cuabetl de olivo, yejua ocsajpa motzecsque, porque de ompa tlatqueme.

Sötiapa momöquextisque israelitas

²⁵ Pues necneque, nocnihua, ma xecmatecö ini nönca secreto, para majcamo xomobieyemajtacö: que inu yultepitzabelestle omochi inca meyactie de Israel. Pero solamiento iyes hasta senamo moneltocasque inu meyactie giente tli amo joriojte. ²⁶ Hua entunses noche inu giente de Israel momöquextisque. Iyes quiename tlajcuelulpanca: Hualiloas de Siön öque tlamöquextisque hua quejcuenisque inu tlajtlacule de Jacob.

²⁷ Yaja ini icaca noacuerdo tli necchihuas ca yejua, de que nequejcuenis intlajtlacul.

²⁸ Pues por ipampa inu cuale tlamachestelestle, inu joriojte cate quiename enemigos de Deus. Hua ejqueu nenquepea locör nemejua tli amo nenjoriojte. Pero Deus turavea quentlasojtlalo ipampa quemixpejpenque intötajua. ²⁹ Pues cuöc Deus quetiemaalo canajyetla noso quenutzalo canajyeca, ayec neyulcuepalo. ³⁰ Pues nemejua nuyejque ca ye niepa amo nentieneltocaque Deus. Cache öxö Deus ye nemiechicnuejtaque ipampa inu joriojte amo tieneltocaque. ³¹ Ejqueu nuyejque joriojte öxö amo moneltoca, para que ejqueu, san quiene ca Deus onemiechicnuejtaque nemejua, nuyejque ma quemicnuejtacö yejua. ³² Pues Deus innochtie oquencöjque para amo tieneltocaque, para que ejqueu quemicnuejtasque innochtie.

³³ ¡Lalebes ca bieye hua rico lalebes tiemachesteles hua tietlamateles de Deus! ¡Lalebes amo masojcömate quiene yejuatzi questloculo, hua abele öque quixnenebelea tieojfe!

³⁴ Pues:

¿Öquenu ocaojcömat tiepensamiento Tlöcatzintle?

Noso ¿öquenu tietlajtulmacac?

³⁵ Noso ¿öquenu cachtö otiemacac canajyetla, para sötiepa Deus quetlaxtlöhuasque?

³⁶ Pues de yejuatzi, hua por yejuatzi, hua para yejuatzi, icaca noche söstantle. Yejuatzi ma quepeacö yectieniebestle nochepa. Amén. Ma ejqueu iye.

12

Yancuec nemelestle tieca Cristo

¹ Öxö, noso, nocnihua, lalebes nemiechtlötlajtea ipampa tieicnuejteles de Deus, xectiemöcticö nemocuiervo ca Deus quiename sente bentle tli yulejteca, tli yectec, hua tli tlacuajetale. Ejqueu nentietequépanusque Deus ca mabesutelestle quiename moneque. ² Hua ayecmo xenemecö san quiene ca neme tlöltecpactlöca, cache xomoyancuelicö ipa nemopensamientos, para ejqueu nenquenenebelisque cötlaja tietlanequelestzi Deus, tli cuale hua yectec hua tlacuajetale.

³ Nequejtoa noso por tiefavur tli niechmacaque Deus, öque beletes tli icaca nemotzölö majcama mobieyenenebele cache de lo que tli conbenierebe. Cache cuale ma queyecpensöro cuale de yaja mismo hua ma monenebele, hua ejqueu ma quejta quiejquech neltoquelestle oquetocöro de inu tli Deus quexiexelfilo cara sesen tlöcatl.

⁴ Pues tecpea meyac pörtes ipa tocuiervo, cache amo noche pörtes sasie tequetl quepea.

⁵ Ejqueu temeyactie tecate ipa sa sie cuiervo tieca Cristo. Hua tonochtie tecate pörtes de inu cuiervo, hua tosietelea sente ca ocsente. ⁶ Hua tecpea ocsesen tequetl cara sesen tlöcatl san quiene ca Deus por tiefavur oquetiemacaque ocsesen beletelestle para cara sente de tejua. Tlö tecselejque favur para teyesque tetlayulepantejque, ma tetlayulepanticö según toneltoqueles. ⁷ Hua tlö tiechtocöroa *tetlatequepanusque ma tetlatequepanucö. Nosö öque quetocöroa tlamachtelestle, ma tlamachte. ⁸ Tlö öque quetocöroa para tietlajtulmacas, ma tietlajtulmaca. Tlö öque tlaxiexeloa ma quechihua sin quetiemus canajyetla para yaja mismo. Tlö öque tlayecöna, ma queyectlachile. Tlö öque quechihua tlin cuale inca ocseque, ma quechihua ca meyac pöquelestle.

Quiene ma tenemecö

⁹ Nemotlasojteles ma iye de melöhuac. Xectlajyelejtaö tlin amo cuale, hua xecnequecö lalebes lo que tlin cuale. ¹⁰ Xomotlasojtlacö entre nemejua ca tlasojtelestle quiename nenicnijte. Amo xextratörucö de nenchecuaquisasque, cache xomoyectieniehuacö entre nemejua. ¹¹ Xetequetecö ca meyac gönas hua amo xeyecö nentlajlatzejque, cache ipa nemoyulo xecnequecö lalebes nentietequépanusque Tlöcatzintle.

¹² Xepajpöquecö por inu nemöchealestle tli tecpejpea. Xecxicojtaö cuöc nenquesufrirojtocate. Seme xomotlajtlötlajtejtacö. ¹³ Xequenpaliebicö yecteque ipa tli quenpoloa. Lalebes xecnequecö nenquencalutisque tli comentlajpaloa.

¹⁴ Xequenbediseyumacacö tli nemiechtepöztoca. Xequenbediseyumacacö hua amo xequentlabejbalticö. ¹⁵ Xepajpöquecö ca quiejquech quepejpea pöquelestle; xechojchucacö ca quiejquech chojchua. ¹⁶ Nemonochtie ma xecnequecö tlin cuale para nemocnihua. Amo xectiemucö para nenyasque nenimportöntes. Amo xecdespresiörucö lo que tli sensiyo ica. Amo xomobieyenenebelicö quieme nentlajmatque. ¹⁷ Tlö yeca nemiechonchibele tlin amo cuale, amo xejcuelicö ca tli amo cuale. Cuöc nenquechihua canajyetla, xechihuacö cuale para cuale quejtasque innochtie que nenquechihua quiene conbenierebe. ¹⁸ Tlö cuale mochihuas, san quiene ca dependierebe de nemejua, amo xecpeacö niontle peleito ca nionöque. ¹⁹ Notlasojcöicnihua, amo xejcuelicö tli yeca nemiechchibelea, cache xetiemaacacö locör ma Deus cualönoa ca niecate tli nemiechchibelea amo cuale. Pues tlajcuelulpanca:

Naja niechtocöroa nobengörus,

* **12:7** Cuale nuyejque motradusirus: “teyesque diáconos”.

naja nequencuepelis lo que tli quemejmeresieroa por intlajtlacul, quejtulo Tlôcatzintle.

²⁰ Ejqueu, tlô moenemigo teosebe, xectlamaca. Tlô ömeque, xecötilite. Pues tlô tecchihuas ejqueu, tecpejpinöjtis, hua iyees quiename tlô tectlötölamachtlölea tlecuabetl ipa itzonteco. ²¹ Majcamo cache nemiechxexico tlin amo cuale, cache xecxexicucö tlin amo cuale ca tlin cuale.

13

Ma tequenneltocacö tlötlajtoönejme

¹ Nemonochtie ma xomosujetörucö inca tlötlajtoönejme. Pues amo oncate tlötlajtoönejme tlöcamo por Deus. Pues tli cate, cate porque Deus oquentlölejque. ² Por inu, öque quecuajnömeque tlajtoöne, quecuajnömeque lo que tli Deus oquetlölejque. Hua innochie tli tlacujajnömeque, quetlöne para sie yejua condenación. ³ Pues tlötlajtoönejme amo cate para quemajcömectisque öque tlin cuale quechihua, tlöcamo niecate tli amo cuale quechihua, yejua quenmajcömectea. ¿Tecneque amo tecmajcöyeytas tlajtoöne? Xecchijta tlin cuale, hua ejqueu metzyectieniehuas yaja. ⁴ Pues yaja ica tlatequepano de Deus para moproviecho. Cache tlô tecchihua tlin amo cuale, xemajcömeque, pues amo sa nienca quepea checöhualestle para tlastecörus. Pues yaja icaca tlatequepano de Deus, para tlabengörus hua quecastecörus öque amo cuale quechihua. ⁵ Por inu moneque ma xomosujetörucö ca yaja. Amo solamente por que cuale nemiechcastecörus, tlöcamo nuyejque por que nenquemate ipa nemoyulo que ejqueu conbenierebe. ⁶ Por inu nuyejque xectlaxtlöhuacö noche contrebuseyu hua impuesto, ipampa tlötlajtoönejme cate tlatequepanojque de Deus, hua modedicöroa ipa inu söstantle. ⁷ Xectiemacacö ca innochie lo que tli quentocöroa. Tli quetocöroa quecubrörus contrebuseyu, xecmacacö. Tli quetocöroa quecubrörus impuestos, xecmacacö. Tli quetocöroa öque querespetörus, xecmacacö respieto. Tli quetocöroa öque quechamöhuas, hua quetratörus cuale, xecchamöhuacö hua xetratörucö cuale.

Ma totlasojtlacö quieme teicnijte

⁸ Ayecmo öque xectlabiquelicö de canajyetla. Sa sente obligación xecpeacö, que yaja ma xomotlasojtlacö entre nemejua. Pues öque quetlasojtla itlöcaicni quechihua noche de lo que tli quejtoa inu ley. ⁹ Pues inu ley quejtoa: “Amo xecalaque ca isohua ocsente”. “Amo xetlamecte”. “Amo xetlachteque”. “Amo xemicolte lo que tli ihuöxca ocsente”. Ini nöncate hua noche ocseque mandamientos de inu ley mocumpliöra por sa sie mandamiento, que yaja ini nöncia: “Xectlasojtla motlöcaicni quiename taja mismo tomtlasojtla”. ¹⁰ Cuöc tecpea tlasojtelestle amo tecchihua tli amo cuale ca totlöcaicnihua. Ejqueu tlasojtelestle quecumpliöra inu ley.

Ye aseteca tunale

¹¹ Ma xenemecö ejqueu porque nenquixomate ini nöncia ura, que ye ica tiempo para ma xemiehuacö hua ma ayecmo xecochtacö. Pos öxö cache ye totlanca tomöquexteles que cuöc otoneltocaque. ¹² Ye panuteca yohuale, hua ye aseteca tunale. Ma tectlajcalecö noso itlachihual amo cuale de tlajtlayohuaquelestle. Hua ma totlaquenticö ca itlachihual tlöbile. Pos inu tlachihuale iyees quiename totlaquie de guierra. ¹³ Ma tenemecö quiename conbenierebe quieme ca tunale. Majcamo teyajtenemecö ipa elfeme de tlöhuöncölestle, nimpör ipa tlapechtle de cacherilajte, nimpör ipa bisio de tlajtlacule, nimpör ipa chalönelestle hua nexiculestle. ¹⁴ Cache cuale xomotlaquenticö de tienemeles Tlôcatzintle Jesucristo, hua ayecmo xectiemucö quiene nenquechihuasque lo que tli amo cuale tli queliebea nemonacayo.

14

Majcamo tequendespresiörucö tocnihua

¹ Xecselicö öque amo ica checactec de ineltoqueles, pero amo para tlimach nemojolfisque. ² Pos meyac veces ica ejqueyi, que sente tlöcatl moneltoca que cuale mocuös de noche sösantle. Hua ocsente, por amo yulchecactec, quecua sa queletl. ³ Öque quecua, majcamo quedespresiöro öque amo quecua. Hua öque amo quecua, majcamo questloco öque quecua, ipampa Deus ye queselejque. ⁴ ¿Öquenu taja para tectlajtlacultis itlatequepano de ocsente tlöcatl? Yaja itieco quejtus tlö quechihua tlin cuale noso tlin amo cuale. Cache quisas cuale, ipampa toTieco, öque iloac Tlöcatzintle, quepealo checöhuallestle para quechihualtis que ma quisa cuale.

⁵ Beles canajyeca de nemejua quepensöroa que sente tunale cache importönte ica que ocseque tunalte. Cöra sesen tlöcatl ma iye seguro ipa iyulo de lo que tli quepensöroa. ⁶ Öque pa quejta sie tunale, quechihua para Tlöcatzintle. Öque tlacua, tlacua para Tlöcatzintle, pues tietlasojcömatelea Deus. Hua öque amo queneque quecuös canajyetla, nuyejque quechihua para Tlöcatzintle, hua tietlasojcömate Deus. ⁷ Pues nionöque de tejua neme sa para ca sie yaja mismo, hua nionöque de tejua meque sa para sie yaja mismo. ⁸ Pues tlö quejtus teneme, para Tlöcatzintle teneme, hua tlö temejmeque, para Tlöcatzintle temejmeque. Ejqueu, tlö quejtus teneme noso cox temequé, de Tlöcatzintle tecajcate. ⁹ Pues Cristo para inu omecoac hua ocsajpa nemoac, para que ejqueu iloac Tlöcatzintle de tli mimejque hua de tli yulejtecate.

¹⁰ Cache taja, ¿tli ipampa tectlajtlacultea mocni? Noso, ¿tlica tecdespresiöroa mocni? Pues tonochtie teniesetibe tieixtla Deus, cöne tiechjuscörusque. ¹¹ Pues tlajcuelulpanca: Melöhuac ica que naja neneme, quejtulo Tlöcatzintle, hua melöhuac nuyejque ica que noche tlöca motlancuöquetzasque nixtla, hua noche camactle tietechihuas Deus.

¹² Ejqueu noso cara sesen tlöcatl quietiemacas cuienta tieca Deus de inemeles.

Majcamo tequenchihualticö tocnihua ma betzecö ipan tlajtlacule

¹³ Por inu, ma ayecmo tostlocucö entre tejua. Cache ma tostlocucö tejua mismos, para que ejqueu amo tecchihuasque niontle tli quechihualtis ma moteputlame sente tocní hua ma betze ipa tlajtlacule. ¹⁴ Naja necmate, hua necpea por seguro tieca Tlöcatzintle Jesús, que de noche sösantle tli Deus oquechejchijque amo onca niontle amo cuale. Pero nieca öque quenenebelea nele canajyetla icaca amo cuale, pos para yaja icaca amo cuale. ¹⁵ Hua tlö por lo que tli taja tejcua tecchihualtea ma motequepacho mocni, ayecmo teneme san quiene ca tlasojtelestle. Ayecmo xecxetunele noso ineltoqueles mocni por lo que tli tejcua, pues por ipampa yaja omecoac Cristo. ¹⁶ Amo xecöhüacö noso ma giente tlajtucö amo cuale de lo que tli ica cuale para nemejua. ¹⁷ Pos cöne tlamandöruro Deus, amo sa ica de lo que tli öque quecua nimpör de lo que tli öque cone, tlöcamo cache tratörebe de yectelestle hua yeysiebelestle hua pöquelestle tietech Espíritu Sönto. ¹⁸ Pues öque tietequépanoa Cristo ica inu sösantle, yaja tiepöquelesmaca Deus, hua noche tlöca pa quejta yaja. ¹⁹ Por inu, ma tectiemucö inu sösantle tli quebicatze yeysiebelestle, hua inu sösantle ca tli cuale tobepöhüasque entre tejua. ²⁰ Amo xecniempolucö tietequé de Deus por causa de tli nenquecua. Noche sösantle de melöhuac cate chepöjque para cuale tejcua. Pero amo cuale ica tlö sente tlöcatl quecuös canajyetla hua por inu quechihualtis ocsente ma betze ipa tlajtlacule. ²¹ Ica cuale öque amo quecuös nacatl, noso amo conis tlaile, noso amo quechihuas niontle tlö cana por inu quechihualtisquiöne ma betze icni. ²² Beles taja tecpea checöhüac moneltoqueles para cuale tejcüös de noche sösantle. Pues xecpea inu neltoquelestle para taja mismo tieixpa Deus. Cuale icnupel öque amo motlajtlacultea cuöc quepensöroa que canajyetla icaca cuale para yaja. ²³ Cache öque ica ca ume iyulo cuöc tlacua, iyex tlajtlacultec tlö tlacuös, ipampa amo tlacua ca inu neltoquelestle de que

quechijteca tlin cuale. Pos noche sösantle tli öque amo quechihua ca neltoquelestle, ica tlajtlacule.

15

Ma tecchihuacö tli quecualejta ocseque

¹ Bieno pues, tejua tli techecacteque tecate de toneltoqueles, ma tequencuajpetzojtacö tli amo checacteque hua majcamo tecchihuacö sa lo que tli tejua mismo tejcualejta. ² Cöra sesen tlöcatl de tejua ma quechihua lo que tli quecualejta icni para iproviecho icni, para ma mobepöhua ipa iyulo. ³ Pos Cristo nuyejque amo oquechijque sa lo tli quecualejtaque para yejuatzi mismo, cache tiepa omochi quiene tlajcuelulpanca: “Inu tiepejpinöjtelestle hua tiepöpöquelestle de nieca giente tli metzmopöpöquelejque ohuöla noche nopa naja”. ⁴ Pos noche sösantle tli ca ye niepa omojcuelo, para totlamachteles omojcuelo, para que ejqueu ma tecxicojtacö ca paciencia hua ma tanimörucö por inu teotlajtule, hua ejqueu ma tecpeacö nemöchealestle. ⁵ Öxö, Deus, öque tiechmacalo paciencia hua tiechanimöruro, yejuatzi ma nemiechpaliebicö para nenquemachelisque que sa secne nencate, hua para ejqueu nennemesque porque nenquechihuasque san quiene ca oquechijque Cristo Jesús. ⁶ Hua ejqueu ca sasio tlanequelestle hua quieme ca sasio nemocamac nentiechajchamöhuasque yejuatzi öque iloac tieDeus hua tieTajtzi de Tlöcatzintle totieJesucristo.

Inu cuale tlamachestelestle ica para tli joriojte hua tli amo joriojte

⁷ Por inu, xomoyecnutzacö cuale sie tlöcatl ca ocsie tlöcatl, quieme nuyejque Cristo onemiechyecnutzque. Ejqueu ma quepeacö chamöhualestle Deus. ⁸ Nequejtoa noso, que Cristo Jesús onechihualuc tlatequepano de joriojte para ma niese que Deus iloac melöhuac, hua para ma cafirmörucö inu promesas tli Deus oquenmacaque ca intötajua de joriojte. ⁹ Hua nuyejque onechihualuc tlatequepano para que giente tli amo joriojte ma tiechajchamöhuacö Deus ipampa quenpililo icnuejtelestle. Pues ejqueu tlajcuelulpanca:

Por inu naja temetzmochohajchamöbelis intzölö giente tli amo joriojte, hua necuicas motucöyupantzinco.

¹⁰ Hua pa ocsie pörte quejtoa:

Xepajpöquecö, nemejua tli amo nenjoriojte, ca tiepuieblo de Deus.

¹¹ Hua ipa ocsie pörte:

Xetieteochihuacö Tlöcatzintle noche quiejquech amo nenjoriojte nencate, hua xetiemabesuticö giente de noche puieblos.

¹² Hua pa ocsie pörte Isaías quejtoa ejqueyi:

Iloas de Isaí sente inelhuayo, tli neajcoquilus para quenyecönasque noche naciones, hua tietech yejuatzi momöchixtasque tli amo joriojte.

¹³ Öxö, Deus, öque quieti macalo tlamöchealestle, ma nemiechtiemiticö de pöquelestle hua de yulsiebelestle porque nemoneltoca, para que ejqueu ca nemejua momeyaqueles nemotlamöcheales por tiechecöhuales Espiritu Sönto.

Pöblo oyeya tlateotitlantle de Deus.

¹⁴ Cache naja neca seguro, nocnihua, que sie nemejua nencate lalebes cuale, hua que Deus nemiechmacaque meyac machelestle, hua que por inu cuale nemotlajtulmacasque entre nemejua. ¹⁵ Cache ye onemiechejcuelfe, pero beles tepetzi checöjque notlajtulhua. Pero sa necnequeya nemiechtlalnömectis de lo que tli ye nenquemate, porque ejqueu Deus niechmacaque tiefavur ma necchihua ejqueu. ¹⁶ Niechtlölejque para ma neye netlatequepano de Jesucristo para ca giente tli amo joriojte, hua noteque ica de que ma nequennunutzta de inu cuale tlamachestelestle de Deus. Hua nequenbicatz inu giente para Deus, quiename sente teopexque quebicatz bentle para ma

quecualajtacö Deus. Hua yejuatzi quencualejtasque inu giente hua quenselisque, porque Espíritu Sönto quenchiualtejqe ma yecö yecteque. ¹⁷ Necpea, noso, de tli cuale nochamöhuas por medio de totieJesucristo ipa sösantle de Deus. ¹⁸ Pues solamiente netlajtlajtojteca de inu sösantle tli oquechijque Cristo por nopampa para ma moneltocacö tli amo joriojte. Oquechijque ica tlajtule hua ica tlachihualeste. ¹⁹ Ca beletelestle oquechijque tietzöbetl por tiechecöhuales de tieEspíritu Deus. Ejqueu omochi que desde Jerusalén, hasta ompa Ilírico, ca nobeyo locör ye onetlanunutz ca innochie de inu cuale tlamachestelestle de Cristo. ²⁰ Pues ejqueu onecnec netlanunutzas de inu cuale tlamachestelestle cöne ayemo öque otlanunutzaya de Cristo, para que majcamo necchihua cöne ocsente ye quepiehualte tequetl. ²¹ Pues ejqueu mochihuas quiename tlajcuelulpanca:

Nieca giente tli ayec yeca oquennunutz de yejuatzi, yejua quejtasque, hua niecate tli ayec oquecajqe, casojcömatesque.

Pöblo quenequeya iyös ca Roma

²² Ejqueu noso, ye meyacpa necnequeya neyös ca nemejua, pero abele. ²³ Cache öxö ye onecsencö noteque ipa ini nöncate tlölte, hua ye quepea meyac xebetl que lalebes necneque neyös ca nemejua. ²⁴ Por inu cuöc neyös ca España nepanus ca nemejua. Pues necchea que cuöc nepanus nemiechejtas, hua nenniechitlanesque nemejua ca cuale para ompa España, tlö quejtus cachtö necpeas inu pöquelestle de neyes ca nemejua. ²⁵ Cache öxö neya ca Jerusalén para nequenpaliebiti yecteque tli ompa cate. ²⁶ Pos tocnihua de inu estados de Macedonia hua Acaya oquenejqe para quechihuasque tlanecheculestle para quenpaliebisque tlin porubejte de entre yecteque tli cate ompa Jerusalén. ²⁷ Pues icaca cuale que oquenejqe quechihuasque ini nönca, pues melöhuac quetlabiquelea. Pues yejua tli amo joriojte nuyejqe oquepexque pörte de inu sösantle espiritual tli quentocoroöya joriojte. Por inu noso conbenierebe ma quenpaliebicö joriojte ca tli quenpoloa para incuierpo. ²⁸ Entunses, cuöc ye oneclame ini nönca tequetl, hua ye onequenmöcte ini nönca tietlöocolelestle, nemiechetztequisas cuöc nepanus para neyös España. ²⁹ Hua necmate que cuöc naseti ca nemejua, naseti ca inu meyac bendeseyu tli quetiemaalo Cristo.

³⁰ Nemiechtlötlajtea noso, nocnihua, por toTlöcatzintle Jesucristo, hua por tietlasojteles Espíritu, ma xeniechpaliebicö ca nemotlajtlötlajteles tieca Deus por naja. ³¹ Xomotlötajticö para ma nemöquisa de inmök nieca giente tli amo tlaneltoca tli cate ipa Judea. Hua xomotlötajticö que ini nönca tlanecheculestle tli necbica inca tli yecteque ipa Jerusalén ma quecualajtacö. ³² Ejqueu ma naseti ca pöquelestle ca nemejua por tietlanequeles Deus, hua ma nosiebe ca nemejua. ³³ Öxö, Deus, öque quetiemaalo yulsiebelestle, ma iloa ca nemonochtie nemejua. Amén. Ma ejqueu iye.

16

Tlajpalulestle

¹ Nemiechrecomendörfea tocní sohuatl Febe, öque *tlatequepanoa por inu grupo de creyentes tli ica ipa Cencrea. ² Xecselicö tietucöyupantzincö Tlöcatzintle, quiename nemiechconbenieroa ipampa nencate nenyecteque. Hua xecpaliebicö ipa noche sösantle tli quepoloa. Pues yaja ye oquenpaliebe meyactie de tocnihua, hua naja nuyejqe niechpaliebe.

³ Xequentlajpalucö Prisca hua Aquila, öque cate nocompañeros ipa tequetl de totieJesucristo. ⁴ Yejua omotlölejque ipa peligro para niechmöquextejque. Hua amo sa naja nequentlasojcömatelea, tlöcamo noche tocnihua de ca nobeyo. ⁵ Hua nuyejqe xequentlajpalucö inu creyentes tli mosentlölea ipa inchö Aquila hua Prisca. Xectlajpalucö

* **16:1** Cuale nuyejqe motradusirus: "icaca diaconiza de inu grupo".

Epeneto, öque neclasojtla, öque cachtö de innochie de inu estado de Asia omoneltocac tieca Cristo. ⁶ Xectlajpalucö María, öque lalebes ye otequet ca nemejua. ⁷ Xectlajpalucö Andrónico ca tiehua Junias, tli cate de nogiente. Yejua tzajtzactaya ca naja ipan cörsel. Hua inu tlateotitlanme quenyectieniehua; hua yejua cachtö omoneltocaque que naja tieca Cristo. ⁸ Xectlajpalucö Amplias, öque neclasojtla tieca toTlöcatzintle. ⁹ Xectlajpalucö Urbano, tocompaniero de inu tequetl de Cristo Jesús, ca tiehua Estaquis, öque neclasojtla. ¹⁰ Xectlajpalucö Apeles, öque ye quetiemaacac meyac pruebas de que cuale ica ineltoqueles tieca Cristo. Xequentlajpalucö nuyejque tli cate ipa ichö Aristóbulo. ¹¹ Xectlajpalucö Herodiön, öque ica de nogiente. Xequentlajpalucö tli cate ipa ichö Narciso, tli moneltoca tieca toTlöcatzintle. ¹² Xectlajpalucö Trifena ca tiehua Trifosa. Ini nöncate lalebes tejtequete tiepampa Tlöcatzintle. Xectlajpalucö Pérsida, öque tectlasojtla. Yaja lalebes ye otequet tiepampa Tlöcatzintle. ¹³ Xectlajpalucö Rufo, öque toTlöcatzintle quixpejpenque, hua nuyejque xectlajpalucö inöntzi öque ica para naja quiename nonöna. ¹⁴ Xequentlajpalucö Asíncrito, hua Flegonte, hua Hermes, hua Patrobas, ca tiehua Hermas, hua quiejquech tocnihua cate ca yejua. ¹⁵ Xequentlajpalucö Filólogo, hua Julia, Nereo hua icni sohuatl, hua Olimpas, hua noche tli yecteque tli cate ca yejua. ¹⁶ Xomotlajtlajpalucö entre nemejua ca sente petzulestle yectec. Nemiechtlajpaloa noche grupos de creyentes tieca Cristo.

¹⁷ Öxö nemiechtlötlajtea lalebes, nocnihua, xequemejtacö öquemejua quennencuaxeloa tocnihua hua quenchiualtea ma betzecö. Pues inu sösanle ica encuentra de inu tlamachestelestle tli nemejua ye nenquetzecoque. Por inu xomonencuaxelucö de inu nieca giente tli quechihua. ¹⁸ Pos yejua amo tietequapanoa Tlöcatzintle Cristo tlöcamo quetequepanoa yaja inmijte. Hua ca tlajtulme cualtzetzi quencajcayöhua inyulo de tli ayemo quemate. ¹⁹ Pos ye omacheac inca giente de ca nobeyo de quiene nemejua nentieneltoca Deus, hua por inu nepajpöque de nemejua. Pero necneque xeyecö nentlajmatque ipa tlin cuale, hua amo xecmatecö nenquechihuasque tlin amo cuale. ²⁰ Hua Deus, öque quetiemaacalo neyulsiebelestle, sa nima quexaxacualus inu Satanás itzintla nemocxehua.

Tiefavur toTlöcatzintle Jesús ma iye ca nemejua. ²¹ Nemiechtlajpaloa Timoteo, nocompaniero de traböjo, hua Lucio hua Jasón ca tiehua Sosípater, öquemejua cate de nogiente.

²² Naja neTercio, öque nequejcuelojteca ini nönca cörta de tocní Pöblo, naja nuyejque nemiechtlajpaloa tieca toTlöcatzintle.

²³⁻²⁴ Nemiechtlajpaloa Gayo, öque niechcalutejteca naja hua quencalutea noche tocnihua. Nemiechtlajpaloa Erasto, tesoriero de ini nönca ciudad, hua tocní Cuarto.

Ma tetiechamöhuacö Deus

²⁵ Öxö, ma tetiechamöhuacö Deus, öque cuale nemiechchecöjtas san quiene ca quejtoa inu cuale tlamachestelestle de tli naja netlanunutza, tli tlajtlajtoa de totieJesucristo. Pues netlanunutza de inu secreto tli omojyöntaya desde nochepa, desde ca opie tlöltecpactle, pero öxö ye tiechejtetejque Deus, ²⁶ hua ye cuale niese. Hua öxö macheateca ca nobeyo por medio de inu teotlajtule tli oquejcuelojque tlayulepantejque. Pues Deus, öque iloac nochepa, yejuatzi oquemandörojque ma machea intzölö giente de noche naciones para ma tieneltocacö hua ma moneltocacö tiecatzinco. ²⁷ Yejuatzi Deus, öque solamente yejuatzi iloac tlajmatque, ma quepeacö chamöhuallestle nochepa tietlacopantzinco totieJesucristo. Amén. Ma ejqueu iye.

Primero cörta tli San Pöblo oquemejcuelfe CORINTIOS

¹ Naja nePöblo. Cristo Jesús niechnutzque para ma neye netietlateotitlantle, pues ejqueu oquenejque Deus. Naja ca tiehua tocni Sóstenes ² nemiechejcuelfe ini nönca cörta para nemejua tli nencate de inu grupo de creyentes ca toDeus ompa Corinto. Nemejua nencate solamente para Cristo Jesús, hua Deus onemiechnutzque para ma xeyecö neneyecteque. Nequejcuelfe ini nönca cörta nuyejque para noche giente de noche tlöltecpactle tli tiemotlölajtelea Deus tietucöyupantzinco totieJesucristo; pues yejuatzi iloac Tlöcatzintle de yejua nuyejque quieme de tejua. ³ Deus toTajtzi hua Tlöcatzintle Jesucristo ma nemiechmomeyaquelicö tieinfavur hua neyulsiebelestle.

Deus tiechpaliebilu por medio de Cristo

⁴ Seme netietlasojcömatalea noDeus por nemejua, porque yejuatzi nemiechpaliebilu por medio de Cristo Jesús. ⁵ Siendo que nencate ca Cristo, ye nenquepea ricoyutl de noche söstantle, pos nenquepea de noche tlajtule hua de noche machestelestle. ⁶ Ejqueu lo que tli omojto de Cristo ye onies nemotech nemejua que ica melöhuac. ⁷ De inu manera amo tli nemiechpolo niontle söstantle tli Deus tiechmacalo. Hua mientras, nenquechea inu tunale cuöc neniextilus toTlöcatzintle Jesucristo. ⁸ Yejuatzi nemiechchecöhualutas hasta inu sölültimo tunale, para que nionöque abele nemiectieyelfis ipa inu tunale de toTlöcatzintle Jesucristo. ⁹ Deus, öque nemiechnutzque para xomosietelicö ca tieConietzi Jesucristo toTlöcatzintle, yejuatzi iloac de confiönsa para quechihuasque ini nönca.

Majcamo tonencuaxelucö

¹⁰ Öxö, nocnihua, nemiechtlötlajtea tietucöyupantzinco totieJesucristo, xeyecö nemonochtie de acuerdo. Majcamo xomonencuaxelucö, tlöcamo cache xomosietelicö ca sasia nemopensamiento hua sasia nenebelestle. ¹¹ Nemiechelfe ini nönca, nocnihua, ipampa ifamiliares de Cloé niechelfe que onca peleitos entre nemejua. ¹² Ca ini nönca nequejtoa, que cara sente de nemejua quejtoa ocsente söstantle. Pos seque quejtoa ejqueyi: “Naja ne de Pöblo”, o noso seque quejtoa: “Naja ne de Apolos”. Hua ocseque quejtoa: “Naja ne de Cefas o noso Piero”, hua ocseque quejtoa: “Naja ne de Cristo”. ¹³ Pero ¿quiene? ¿Quie beles Cristo iloac por pörtes? ¿Quie beles Pöblo omocoruspelo nemopampa? O noso ¿beles nemocuötiequejque itucöyupa Pöblo? ¹⁴ Netietlasojcömatalea toDeus que naja amo öque de nemejua onejcuötieque tlöcamo solamente yaja Crispo hua nuyejque Gayo. ¹⁵ Ejqueu abele yeca quejtus que omocuötieque notucöyupa. ¹⁶ Nuyejque onequencuötieque ifamilia de Estéfanos. Pero tlö onejcuötieque canajyeca ocsente, ayecmo nequelnömeque. ¹⁷ Pues Cristo amo niechtitlanque para ma netlacuötieque, tlöcamo para ma netlanunutta de inu cuale tlamachestelestle. Pero amo niechtitlanque para ma netlanunutta ca tlajtulme cualtzetzi tli cusöroa öque cuale quemate tlajtlajtus. Amo necusöroa inu tlajtulme para majcamo cana nemiechyulcuepa sa ca tlajtulme. Cache cuale necneque ma iye ca ichecöhuales de inu mensöje de quiene omecoac Cristo ipan coruscuaetl.

Cristo iloac checöhualestle hua machestelestle de Deus

¹⁸ Pues inu tlamachestelestle de quiene omecoac ipan coruscuaetl icaca quiename lucojyutl para niecate tli ixniempolejtecate. Pero para tejua tli tomöquextejtecate, inu mensöje icaca tiechecöhuales Deus. ¹⁹ Pues tlajcuelulpanca: Necxetunis inmachesteles tlajmatque, hua inasojcömatales de tli casojcomate nequejcuensis.

²⁰ Bieno pues, ¿tli para serbirebe tlajmatque? ¿Tli para sejserbirebe inu tlamachtioneme de inu ley de Moisés? ¿Tli para serbirebe niecate tli tladiscutiroa de sösantle de nönca tlöltecpactle? Pues amo serbirebe para niontle. Pues Deus ye tiechejtetejque que inmachesteles tlöltecpactlöca icaca lucojyutl. ²¹ Deus, öque cache tlajmatque iloac, oquecöjque que tlöltecpactlöca majcama tieixomatecö por medio de inmachesteles. Cache cuale quenmöquextisque tli moneltocasque. Hua yejua moneltoca por medio de inu mensöje tli tejua tetlanunutza, tli giente quejtoa que yaja lucojyutl. ²² Pues melöhuac joriojte queneque quejtasque tietzöbetl para moneltocasque, hua tli amo joriojte quietiemoa machestelestle de tlajmatque. ²³ Pero tejua sa tetlanunutza que Cristo otiecoruspelojque. Hua inu tlajtule quencualöntea joriojte, hua tli amo joriojte quejtoa que yaja lucojyutl. ²⁴ Pero para niecate tli Deus oquennutzque, sea joriojte o noso amo, para yejua Cristo iloac checöhuallestle hua machestelestle de Deus. ²⁵ Porque lo que tli lucojyutl de Deus ica cache tlajmatque que tlöca, hua lo que tli amo checöhuac de Deus icaca cache checöhuac que tlöca.

²⁶ Pues xequejtacö, nocnihua, quiene oyeya cuöc Deus onemiechnutzque. Amo nenyeyactie nentlajmatque nenyeyeya de nönca tlöltecpactle. Amo nenyeyactie nenquepeaya checöhuallestle. Amo nenyeyactie nenyeyeya de familias importöntes. ²⁷ Cache quöc Deus nemiechixpejpenque, oquixpejpenque lo que tli tunto de nönca tlöltecpactle para que ca inu tli tunto quepejpinöjtilo lo que tli tlajmatque. Hua oquixpejpenque lo que tli amo checöhuac para que ca inu tli amo checöhuac quepejpinojtilo lo que tli checöhuac. ²⁸ Hua lo que tli amo quepea importönsia, lo que tli giente quetlabielcöhua, lo que tli amoyetla icaca, yaja inu oquixpejpenque Deus para ica inu sösantle quenquextelilo inchecöhuales de niecate tli motieniehua que yejua cate canajyetla. ²⁹ De inu manera nionöque abele mochamöhua tieixpa Deus. ³⁰ Nemejua nencate tieca Cristo Jesús por que Deus oquechijque ejqueu. Hua yejuatzi oquechijque ma Cristo iloa tomachesteles, hua toyecmelacteles, hua toyecteles, hua tomöquexteles. ³¹ De inu manera icaca san quiene ca tlajcuelulpanca: “Öque mochamöhua, ma mochamöhua solamiente de Tlöcatzintle”.

2

Pöbbo solamiente tlanunutza de Cristo hua de quiene tiecoruspelojque

¹ Hua naja, nocnihua, cuöc oneya ca nemejua para onemiechnutz de inu mensöje secreto de Deus, amo necusöro inu tlajtulme lalebes cualtzetzi, nimpör amo netlajtlajto quieme sente tlajmatque. ² Cache cuöc naja neyeya ca nemejua, amo onecnec necmates niontle de ocseque sösantle, tlöcamo solamiente de Jesucristo, hua de quiene otiecoruspelojque. ³ Hua cuöc oneyeya nemotzölö onomachele quiename amo nechejchecactec, hua hasta nomachele quiename nomajtiöya, hua nebebeyocaya. ⁴ Pues cuöc onemiechnutz de inu mensöje, amo onecnec ma xomoyulcuepacö por notlajtulhua lalebes tlajmatque. Cache nemiechyulcuec ca tieEspíritu hua tiechecöhuales Deus. ⁵ Ejqueu onecchi para que nemoneltoqueles ma iye itech tiechecöhuales Deus, hua amo itech inmachesteles tlöca.

Sösantle de Deus tiechejtetisque tieEspíritu

⁶ Pues melöhuac tetlanunutza tlajtulme de meyac machestelestle entre tli ye cuale cajasojcömate. Pero inu machestelestle amo icaca de nönca tlöltecpactle nimpör de tlajtoönejme de nönca tlöltecpactle, que isejco tlamisque. ⁷ Cache tetlanunutza tiemachesteles Deus tli amo nieseya, inu machestelestle tli mojoyöntaya, lo que tli Deus oquenejque para quechihuasque desde cachtö que cuöc omochejchi tlöltecpactle. Por inu machestelestle tejua tecpeasque tlanixtelestle. ⁸ Nionöque de tlötlajtoönejme de nönca tlöltecpactle amo ocaojcömatque inu machestelestle, pues tlö casojcomatene, amo tiecoruspeloöne

toTlöcatzintle öque lalebes quepealo tlanixtelestle. ⁹ Cache icaca quieme tlajcuelulpanca:

Sösantle tli ayec yeca oquejtac, tli ayec yeca oquecac, nimpör ayec yeca oquepensöro, yaja inu sösantle Deus oquepreparörojque para niecate tli tietlasojtla.

¹⁰ Hua yaja inu sösantle tli Deus otiechmachejque tejua por tieEspíritu. Pues tieEspíritu Deus quejtalo noche sösantle, hasta sösantle de Deus que abele tecajasojcömate.

¹¹ Pues ¿öque quemate lo que tli onca ipa iyulo ocsente tlöcatl? Inu solamiente quemate iespíritu de yaja tli icaca ijtecopa. Ejqueu icaca que nionöque quemate tli onca ipa tieyulojtzi Deus, tlöcamo solamiente tieEspíritu Deus quematihua. ¹² Pero tejua amo tecselejque sente espíritu de nönca tlöltecpactle, tlöcamo otetieselejque inu Espíritu tli biloatz de Deus, para que ejqueu ma tecasojcömatecö inu sösantle tli Deus tiechmacaque. ¹³ Hua de ini nönca sösantle tetlanunutza, amo ca inu tlajtulme tli tectzeco de machelestle de tlöca, tlöcamo ca tlajtulme tli tiechmachtilo tieEspíritu Deus. De inu manera *tecyeyecpoa sösantle de tieEspíritu Deus ca tlajtulme tli yejuatz Espíritu tiechmacalo. ¹⁴ Pero sente tlöcatl tli amo espiritual icaca, quejtusneque que amo quepea tieEspíritu Deus, yaja amo queselea inu sösantle de tieEspíritu Deus. Pues para yaja inu sösantle icaca lucojyutl, hua abele casojcömate. Pues inu sösantle öque quejtas hua questlocus sa ca tiepaliebes Espíritu. ¹⁵ Cache inu tlöcatl tli espiritual, tli neme por tieEspíritu Deus, yaja cuale quejtas hua questlocus noche sösantle. Hua abele yeca ocsente questlocus inu tlöcatl, pues abele casojcömate.

¹⁶ Pues ¿öquenu cuale casojcömates tiepiensamiento Tlöcatzintle, para ejqueu cuale tiemachtis yejuatz?

Pero tejua Deus tiechmacalo tiepiensamiento de Cristo.

3

Tetequete tonehua para Deus

¹ Hua naja, nocnihua, abele onemiechnunutz nemejua quiename nequennunutz giente tli espirituales. Cache conbenierebeya nemiechnunutzas quiename nentlöca que oc turavea nenquetoca nemonacayo, o noso quiename nenpelantzetz de nomoneltoqueles ca Cristo. ² Amo nemiechmacac nacatl para nenquecuösque tlöcamo sa lieche, ipampa turavea ayebele nenquecuöya tli checöhuac. ³ Hua hasta öxö turavea ayebele nenquecua, pues oc turavea nenquetoca nemonacayo. Pues cuöc nenchajchöhuate hua nenchöchalöne ¿amo nenquetocatecate nemonacayo? ¿Amo nenquechijtecate quiename quechihua ocseque tlöca? ⁴ Porque cuöc canajyecaque quejtoa: “Naja ne de Pöblo”, hua ocsente quejtoa: “Naja neca para Apolos”, ¿amo melöhuac que nenquechijtecate quiename tlöca, hua amo quiename Deus quenequihua?

⁵ Pues ¿öquenu yaja Apolos? ¿Öquenu yaja Pöblo? Naja hua Apolos solamiente tetietlatequepanojua Deus, öque por medio de tejua onemoneltocaque. Hua tejua sa otechijque inu tequetl tli toTlöcatzintle otiechmacaque cara sente de tejua. ⁶ Naja onectucac. Apolos ocajfele. Pero Deus iloac öque quebepöhualoöya tlatuctle. ⁷ De maneras que yaja tli quetuca amo tli icaca niontle, nimpör tli cajfelea amo tli icaca niontle. Solamiente Deus tli quebepöhualo, yejuatz iloac. ⁸ Ejqueu tli quetuca hua tli cajfelea iguöl cate, hua Deus quetlaxtlöhuasque cara sente según quiene ca tequete. ⁹ Naja hua Apolos tecate ticnijte de inu tequetl de Deus. Nemejua nencate quiename nentietlatuc de Deus, o noso quiename sente cale tli quechejchihualuteca Deus.

¹⁰ Naja onecchi según Deus oniechmacaque ma necchihua. Onecpiehualte inu cimientto de inu tepöntle, quiename nemöystro de ölbañil que necmate. Hua ocseque

* **2:13** Cuale nuyejque motradusirus: “tequenyecpubelea sösantle de tieEspíritu Deus ca tlöca tli espirituales cate”.

quechejihitecate tepöntle ipa. Pero cöra sente ma quepea cueröro quiene quechejihua tepöntle. ¹¹ Pues abele quetlölisque ocsente cimientö tlöcamo solamiente inu tli ye icaca, que iloac yejuatzi Jesucristo. ¹² Pero yeca cuale quechejihuas inu tepöntle de söstantle cuale quiename oro, o noso plöta, o noso teme tli lalebes cualtzetzi. Nuyejque cuale quechejihuas de söstantle tli amo bel cuale: de cuabetl, noso de chenömetl, noso de sacatl. ¹³ Inu tequetl tli oquechi cara sente nises cuale ipa inu nieca tunale, porque inu tunale queniextis. Pues moniextis ca tletzintle, hua inu tletzintle queprobörus itraböjo de cara tlöcatl, ca tli oquechejchi. ¹⁴ Tlö cana amo xutlas iteque tli oquechejchi yeca ipampa ica cuale, entunses Deus quetlaxtlöbisque inu tlöcatl. ¹⁵ Pero tlö inu tequetl tli oquechejchi yeca amo ica cuale hua xutlas, inu tlöcatl quepolus itlaxtlöbil, mösque yaja mismo momöquextis, quiename tlö yeca momöquextea de ijtec tletzintle.

¹⁶ ¿Amo nenquemajmate que nemejua nencate nenteopantle de Deus, hua que tieEspíritu Deus chöntihua nemojtecopa? ¹⁷ Tlö canajyeca quexetunis inu teopantle de Deus, quexetunisque inu tlöcatl. Pues tieteupa Deus ica yectec hua ica solamiente para yejuatzi. Hua inu teopantle nencate nemejua mismo.

¹⁸ Majcamo yeca mocajcayöhua. Tlö canajyeca de nemejua momachelea tlajmatque ipa ini nönca tlöltecpactle, ma mocuepa quiename öque amo quemate niontle, para que ejqueu mochihuas de melöhuac tlajmatque. ¹⁹ Porque machestelestle de nönca tlöltecpactle icaca lucojyutl para toDeus. Pues tlajcuelulpanca:

Yejuatzi quemixtlajpachelfea tlajmatque

Por medio de innenebeles de yejua.

²⁰ Nuyejque tlajcuelulpanca:

Tlöcatzintle quematihua lo que tli quepejpensöroa tlajmatque que amo tli balierebe niontle.

²¹ Por inu, nionöque ma quechamöhua tlöcatl. Noche söstantle ica nemohuöxca hua ica para nemoproviecho. ²² Sea Pöblo, noso Apolos, noso Cefas, noso tlöltecpactle, noso nemelestle, noso mequelestle, noso lo que tli ejcöne, o noso lo que tli yebitz cache sötiepa: noche söstantle icaca nemohuöxca. ²³ Pero nemejua netiehuöxcagua de Cristo, hua Cristo iloac tiehuöxcatzi Deus.

4

Quiene tejtequete tlateotitlanme

¹ Xetiechpeacö entunses quiename tetlapaliebeöneme de Cristo, tli tiechmötejqe inu tequetl de que ma tetlamachesticö de inu machestelestle de Deus tli mojoyöntaya.

² Bieno, conbenierebe sente encargödo ma iye de confiönsa. ³ Pero para naja, amo niechtequepachoa tlö nenniechestlocoa nemejua nimpör tlö niechestlocoa ocseque tlöca. Pues nion naja mismo amo nostlocoa. ⁴ Pues mös noyulo amo niechtiyelfea, pero inu amo quejtusneque que amo netlajtlacultec. Pues yejuatzi Tlöcatzintle iloac öque niechestloculo. ⁵ Por inu amo xetlaestlocucö antes de que ases tiempo. Xomocheacö hasta cuöc hualiloas Tlöcatzintle. Lo que tli öxö mojoyönteca ijtec tlajtlayohuaquelestle, yejuatzi quequextisque hua quetlölisque ipan tlöbile. Tiechejtetisque itlanequeles hua ipensamiento de toyulo. Hua entunses Deus cöprobörurus cara sesen tlöcatl quiene quemeresieroa.

⁶ Nocnihua, nemiechnunutza de nöncate söstantle para nemoproviecho. Nectlölea quieme ejiepmo Apolos, hua naja nuyejque notlölea, para que por medio de tejua nemejua xectzecucö para que amo xecpanabicö cache de lo que tli tlajcuelulpanca, hua para majcamo yeca de nemejua mochamöhua ipampa quetoca sente tlöcatl hua amo quetoca ocsente. ⁷ Taja tli tomochamöhua, ¿öquenu noso metzchihualtea cache cuale teyes que ocseque? Noso ¿tli tecpea taja que amo yeca ometzmacac? Entunses tlö noche tli tecpea sa tecsele, ¿tllica tomochamöhua quieme tlö amo tecseliöne? ⁸ Pues ¿quie beles

ye nenquepea noche sösantle? ¿Beles ye nenricojte nencate? ¿Beles ye nenreyes nencate, mösque tejua ayemo tereyes? Ojalá melöhuac nenyejyene nenreyes, para que ejqueu tejua tecpejpeasquiöne pörte ipa nemoreinado. ⁹ Pero niechparesieroa naja que Deus otiechtlölejque hasta sölültimo locör tejua tli tecate tietlateotitlanhua. Tecate quiename tlöca tli cate cuntenöros para mequesque. Pues noche tlöltecpectle tiechetztecate, hua noche öngeles hua noche tlöca tiechejta.

¹⁰ Pues tejua tecate quiename tetuntojte por tiepampa Cristo, pero nemejua nemomachelea nentlajmatque por Cristo. Tejua amo techecacteque tecate, pero nemejua nemomachelea nenchejchecacteque. Giente tiechdespresiöroa tejua, pero nemejua nemomachelea que giente nemiechyectioniehua. ¹¹ Pues hasta öxö mismo tetejteusebe hua tajömectecate, amo tecpejpea toztotzomajua, giente tiechmaltratöroa, amo tecpea tochajchö, ¹² hua tetejtequete lalebes ca tomöhua. Cuöc giente tiechpöpöca, tejua tequenteochihua. Cuöc tiechtepotztoca, tejua tecxicoa. ¹³ Cuöc tlajtlajtoa amo cuale de tejua, tequentlajtulmaca ca cuale tlajtulme. Hasta öxö tiechtratöroa quiename tlasole noso quiename petzoyutl de tlöltecpectle.

¹⁴ Amo nemiechejcuelfea ini nöncate tlajtulme para nemiechpejpinöjtis, tlöcamo cache para nemiechtlajtulmacas quiename nennopelhua tli nemiechtlasojtla. ¹⁵ Pues mösque cuale nenquenpeasque meyactie tli nemiechyecöna ca Cristo, pero abele nenquenpeasque meyactie nemotötajua. Hua naja neca nenemotöta de nemoneltoqueles tieca Cristo Jesús ipampa naja cachtö onemiechnunutz de inu cuale tlamachestelestle. ¹⁶ Por inu, nemiechtlötlajtea, xecchihuacö quiename naja necchihua.

¹⁷ Por inu, nectitlane Timoteo, öque icaca quiename noconie ca toTlöcatzintle, que nectlasojtla hua necpilea meyac confiönsa. Yaja nemiechtlalnömectis de quiene naja necneque ma öque neme ca Cristo Jesús, ejqueu quiene nequenmachtea noche grupos de creyentes ca nobeyo. ¹⁸ Seque de nemejua ye mochajchamöjtecate lalebes ipampa quepejpensöroa que naja ayecmo nocuepas ca nemejua. ¹⁹ Pero necpensöroa que isejco neyös nemiechejtati, tlö toTlöcatzintle quenequesque. Hua entunses nequenmejtas ini nöncate tli mochajchamöhuaneme. Hua amo nequencagues intlajtulhua, tlöcamo nequejtas tlö melöhuac quepejpea checöhuallestle. ²⁰ Porque cöne Deus tlamandöruro de melöhuac, amo icaca sa de tlajtulme, tlöcamo cuale niese tiechecöhuales. ²¹ ¿Tli nenqueneque nemejua? ¿Nenqueneque ma nasete ca sente cuabetl para nemiechcastecörus? ¿Nosö nenqueneque ma naseque ca tlasojtelestle ipa noyulo?

5

Xejquexticö inu tlöcatl tlajtlacultec de nemotzölö

¹ Pues ye omacheac que onca tlajtlacule nemotzölö, que sente tlöcatl quepexteca ichöhuano. Hua inu tlajtlacule lalebes petzotec, que hasta amo mopermitiroa entre giente tli amo creyentes. ² Hua oc turavea nemochamöjtecate, mösque cache cuale conbenierebesquiöne nenquepeasquiöne yulcocolestle, para ejqueu xejquexticö de nemotzölö inu tlöcatl tli oquechi. ³ Pues naja, mösque amo neca nemotzölö ca nocuierpo, ompa neca ca noyulo. Hua ye nequestloco inu nieca tli oquechi tlajtlacule, quiename tlö ompa neyene ca nemejua. ⁴ Tietucöyupantzinco Tlöcatzintle Jesús xomosentlölicö, hua naja neyes ca nemejua ca noyulo. Entunses ca tiechecöhuales toTlöcatzintle Jesús ⁵ xecmöcticö inu tlöcatl ica Satanás para ma niempölebe inacayo, hua iyulo ma momöquexte ipa inu tunale de Tlöcatzintle.

⁶ Amo cuale ica nemochajchamöhuales. ¿Amo nenquemajmate que tlajtlacule icaca quiename levadura de pöntzi, que sa tepetzi de inu levadura cuale quemöhua noche textle? ⁷ Xejquexticö ca queyöhuac inu levadura tli ye yecsa nequepeaya, para ejqueu neyesque yancuec textle, quiename tli quecua joriojte ipan tunalte de pöscua. Pues de melöhuac nencate quiename nochaja textle, sin niontle de levadura. Hua quiename

goriojte seme quemectea sente calnielojconetzi para sente cuetlabiltelestle ipan pöscua, ejqueu nuyejque tiemectejque toCristo. Yejuatzí iloac toCalnielo de pöscua. ⁸ Por inu ma tecselebrörucö inu yelfetl, amo ca inu levadura tli ye yecsa tecpeaya, inu levadura de petzoyutl hua tlajtlacule hua noche tli amo cuale. Cache ma tecselebrörucö ca lo que tli melöhuac hua melactec, tli ica quiename nochaja pöntzi sin niontle de levadura.

⁹ Ipa inu ocsente cörta nemiechejcuelfe que majcamo tli xecpeacö ca niecate tli mopöctea ca sohuame tli amo insohua. ¹⁰ Amo nequejtusnequeya que ma xomox-elucö por complieto de noche giente de tlöltecpactle tli tlajtlacojtecate ejqueyi, nimpör de tli moxicoa noso tli tlachteque, noso tli quenteochihua ixniehualojme. Para nemoxelusque de noche niecate, solamiente que ayecmo nenchajchöntene ipa ini nönca tlöltecpactle. ¹¹ Lo que onecnec nemiechelfis ica ini nönca: Amo tli xecpeacö ca canajyeca tli mocuitea tocni pero mopöctea ca ocseque sohuame, noso moxicoa, noso quenteochihua ixniehualojme, noso petzotlajtlajtoa, noso tlöhuöna, noso tlachteque. Ni siquiera amo xetlacuöcö ca sente tli mocuitea tocni hua quechihua de niecate söstantle. ¹²⁻¹³ Pues amo tiehtocöroa tequenmestlocusque giente tli amo cate de togrupo—Deus quemestlocusque. Pero tejua tiehtocöroa tequenmestlocusque tli cate de togrupo. Por inu, xejquexticö inu tlajtlacoöne de nemotzölö.

6

Majcamo motieyelficö creyentes inmixtla tli amo creyentes

¹ Cuöc canajyeca de nemejua motieyelfea cuntra ocsente tocni, ¿quiene ica inu de que nenyabe ca tlötlajtoönejme de giente tli amo moneltoca, hua amo cache cuale nenyabe ca tli yecteque, tli moneltoca? ² Noso ¿amo nenquemajmate que tli yecteque questlocusque noche tlöltecpactle? Entunses tlö nemejua nenquestlocusque tlöltecpactle, ¿tlica abele nenquestlocoa nönca söstantle que sa tzitzequetzi ica? ³ ¿Amo nenquemajmate que hasta inu öngeles tequenmestlocusque? Pues ini nöncate söstantle de nönca nemelestle cache tebejbelete tequestlocusque. ⁴ Hua tlö nemoquejörusque de ini söstantle de nönca nemelestle, *¿tlica nenquentlölea para questlocusque nemoqueija niecate tli amo tli cate de togrupo? ⁵ Ini nönca quiema nemiechelfea para xecpinöhuacö. ¿Quie beles amo onca nion sente tlajmatque de entre nemejua tli cuale questlocus sente cöso entre icnihua? ⁶ ¿Quie beles conbenierebe que sente tocni ma quebica iqueija cuntra ocsente tocni, hua hasta quemachestes inmixtla de niecate tli amo moneltoca? Amo, nocnihua; ⁷ pues de melöhuac ye ica sente fracaso sa inu de que nenquepea inu peleitos, mös amo nenquebicane nemoqueija inmixtla tli amo moneltoca. ¿Tlica amo cache cuale xexxicucö lo que tli nemiechchihualtea? ¿Tlica amo cache cuale xejcöhuacö ma nemiechtlachtequelicö? ⁸ Pero nemejua amo nenquechihua ejqueu; cache nemejua mismo nenquenchibealea tli amo cuale ca ocseque, hua nenquentlachtequelea, hua hasta tlin cate nemocnihua nenquenchibelejtecate inu söstantle.

⁹⁻¹⁰ ¿Amo nenquemajmate que tli amo cualteque amo quepeasque pörte cöne Deus tlamandöruro? Amo xomocajcayöhuacö. Amo quepeasque pörte cöne Deus tlamandöruro niecate tli mopöctea ca ocseque sohuame tli amo insohua, nimpör tli quenteochihua ixniehualojme, nimpör tli mopöctea ca isohua ocsente, nimpör niecate tlöca tli moliebea entre yejua mismos hua motieca tlöca ca tlöca, nimpör tli tlachteque, nimpör tli moxicoa, nimpör tli tlöhuöna, nimpör tli petzotlajtlajtoa, nimpör tli ichtejque cate; nionöque de niecate quepeas pörte cöne Deus tlamandöruro. ¹¹ Hua de niecate nenyeyeyea seque de nemejua. Pero Deus ye onemiechchepöjque, hua ye nemiechyectejque, hua ye nemiechchejchijque cuale para que cuale nemiechselejque. Noche inu omochi por tietucöyutzí Tlöcatzintle Jesucristo, hua por tieEspíritu de toDeus.

* **6:4** Cuale nuyejque motradusirus: “xequentlölicö niecate de togrupo tli amo quepea cörgo, para yejua ma questlocucö nemoqueija”.

Tocuiervo amo icaca para tlajtlacule tlöcamo para toTlöcatzintle

¹² Icaca melöhuac que öque ica creyente cuale quechihuas de noche söstantle. Pero onca seque söstantle tli amo tlapaliebea. Melöhuac cuale necchihuas de noche söstantle, pero amo nocöhuas que canajyetla niechdominörus. ¹³ Noche tlacuale cuale para tojte, hua nuyejque tojte cuale para ma ompa beya tlacuale, pero Deus quensencöhuasque, hua sötiepa ayecmo yesque. Pero tocuiervo amo icaca para inu tlajtlacule de öque mopöctea ca ocseque sohuame tli amo isohua. Cache icaca para Tlöcatzintle, hua Tlöcatzintle para tocuiervo. ¹⁴ Hua Deus ye tieyulebitiluc toTlöcatzintle, hua tiechyulebitisque tejua nuyejque por tiehecöhuales.

¹⁵ ¿Amo nenquemajmate que tocuiervo ica pörte de tiecuiervo Cristo? Entuneses ¿quiene necönas inu pörte de tiecuiervo Cristo para necchihuas ma iye pörte de sente cacherila? ¡Majcayec necchihua! ¹⁶ Noso ¿beles amo nenquemajmate que öque mosietelea ca sente cacherila, innehua hualmochihua quiename sa sie cuiervo? Pos quejtoa teotlajtule: “Inu unteme yesque sa sie cuiervo”. ¹⁷ Pero öque mosietelea ca Tlöcatzintle iyes sa sie espíritu ca yejuatzi.

¹⁸ Por inu, seme xecholucö de inu tlajtlacule ca sohuame tli amo nemosohua. Ocseque tlajtlacule tli öque cuale quechihuas, amo encuentra de icuiervo tlajtlacoa, pero öque mopöctea ca ocseque sohuame tli amo isohua, yaja tlajtlacojteca cuntra icuiervo. ¹⁹ ¿Amo nenquemajmate noso que nemocuiervo ica tieteupa de inu Espíritu tli yectec iloac, tli iloac nemojtec, tli Deus nemiechmacaque? Hua nemocuiervo hua nemoespíritu amo nemohuöxca, ²⁰ pues Deus oquetlaxtlojque nemopatie para onemiechcujque. Por inu, noso, lalebes xetiechamöhuacö yejuatzi ca nemocuiervo.

7

¿Conbenierebe öque mosohuajtis?

¹ Öxö, ma tetlajtlajtucö de lo que tli onenniechtlajtlanejque ipa nemocörta. Tlö sente tlöcatl amo mosohuajtea, cuale ica. ² Pero ipampa cuale öque betzes ipa tlajtlacule ca ocseque sohuame, por inu cara sesen tlöcatl ma quepea isohua, hua cara sohuatl ma quepea inömec. ³ Tlöcatl ma quechihua ca isohua lo que tli queliebea isohua, hua ejqueu nuyejque sohuatl ma quechihua ca inömec lo que tli yaja queliebea. ⁴ Icuervo sohuatl amo ica ihuöxca, tlöcamo quepertenesieroa inömec. Ejqueu nuyejque icuervo tlöcatl amo ica ihuöxca, cache quepertenesieroa isohua. ⁵ Amo xomonegörucö, o noso solamente tlö beles nemotlölisque de acuerdo para amo nemosietelisque quiesquete tualte, para nemodedicörusque ipa netlajtlötlajtelestle. Hua sötiepa oc-sajpa xomosietelicö, para majcamo de repiente amo nemosietelisque hua Satanás nemiechchihualtis nentlajtlacusque ipampa abele cuale nemodominöroa.

⁶ Noche ini nönca nemiechelfea quiename sente permiso: amo nemiechmandöroa ma xomosohuajticö. ⁷ Pues naja por nopörte necnequesqueya que innoctie ma yecö quiename naja, pero cara sente iyes quiename Deus quemacasque beletelestle. Sente iyes de sie manera; ocsente iyes de ocsie manera.

⁸ Öxö nequenmelfea pelalacme hua sehuantotu, hua nuyejque icnusohuame; cuale iyes tlö mocöhua sa insiesiel, quiename nuyejque naja. ⁹ Pero tlö abele modominöroa, ma mosohuajticö. Pues cache cuale ma öque ma mosohuajte hua que amo seme ma queliebejta.

¹⁰ Pero para niecate tli ye omosohuajtejque noso omonömetejque, nemiechmandöroa, cache amo naja, tlöcamo toTlöcatzintle quemandöruro, que sohuatl majcamo quecajcohua inömec. ¹¹ Pero tlö ye oquecajco, ma yeta sa isiel hua majcamo monömetce, o noso ma mosietele oc-sajpa ca inömec. Hua tlöcatl majcamo quecajcohua isohua.

¹² Ocseque nequenmelfea, naja, amo toTlöcatzintle, que tlö sente tocni quepea isohua tli amo moneltoca, hua yaja ica de acuerdo para ma yeta ca yaja, inu tlöcatl majcamo

quecajcohua isohua. ¹³ Hua tlö sohuatl inömec amo moneltoca, pero ica confurme para mosequirusque mosietelejtisque, inu sohuatl majcamo quecajcohua inömec. ¹⁴ Pues inu tlöcatl tli amo moneltoca ye nencuajca para ca Deus ipampa quepexteca isohua tli moneltoca. Hua inu sohuatl tli amo moneltoca nuyejque ye icaca para Deus ipampa quepexteca inömec que ica tocni. Tlö cana amo ejqueu uyesquea, nemopelhua uyesquea quiename inpelhua de niecate tli amo moneltoca. Tiel noso nemopelhua ye nencuajcate para ca toDeus. ¹⁵ Pero tlö canajyeca tli amo moneltoca queneque quecajcohua icompaniero, ma quecajcohua. Pos tlö ejqueu icaca, tocni icaca libre de icompaniero. Pues Deus nemiechnutzque para ma xenemecö cuale ca ocseque, para ma uye siebelestle. ¹⁶ Pues taja, sohuatl, ¿quiene tecmate tlö cuale tecmöquextis monömec? Noso taja, tlöcatl, ¿quiene tecmate tlö cuale tecmöquextis mosohua?

¹⁷ Pero necneque ma cara sente ma neme quiename icnupel tli toTlöcatzintle quemacaque, quiename yaja oyeya cuöc Deus oquenutzque. Ejqueu nequenmandöroa tocnihua ipa nobeyo locör. ¹⁸ Tlö canajyeca oyeya nacayutlatectle cuöc Deus oquenutzque, ma ejqueu mocöhua. Tlö yeca amo nacayutlatectle oyeya, majcamo monacayuteque. ¹⁹ Porque amo importörebe öque iyey nacayutlatectle noso amo; lo que tli importörebe ica ma öque quechihua lo que tli Deus tiechmandöruro. ²⁰ Cara sente ma mocöhua san quiene oyeya cuöc Deus oquenutzque. ²¹ Beles taja oteyeya teesclavo noso tetlatequepano cuöc ometznutzque. Amo xomotequepacho por inu. Mösqe tlö cana cuale tequisas para ayecmo tetlatequepanojtas, cache cuale xecchihua inu. ²² Pues nieca tli oyeya esclavo cuöc oquenutzque Deus, öxö icaca tlöcatl libre por toTlöcatzintle. Hua ejqueu nuyejque tli oyeya libre cuöc Deus oquenutzque, öxö icaca tieesclavo de Cristo. ²³ Deus onemiechcujque ca bieye nemopatíe. Por inu amo xomocöhuacö tlöca ma nemiechchihualticö xeyecö esclavos. ²⁴ Ejqueu noso, nocnihua, cöra sente de nemejua ma mocöhua quiename oyeya cuöc Deus oquenutzque. Ejqueu ma iye öxö ca Deus.

²⁵ Öxö, para niecate tli ayemo monajnömectea noso mosohuajtea, amo necpea sente mandamiento de toTlöcatzintle para nemiechmacas, pero naja nequejtoa quiene naja necpensöroa, quiename sente tli neca de confiönsa ipampa tietlasojteles Tlöcatzintle. ²⁶ Naja necpensöroa noso que ini nönca icaca cuale: que ica cuale ma öque mocöhua san quiene ca icaca, ipampa nöncate tunalte lalebes tequeyo. ²⁷ Tlö ye tesohuöhua, amo xectiemo para tomosohuacajcohua. Tlö amo tesohuöhua, amo xectiemo sohuajtelestle. ²⁸ Pero tlö tomosohuajtis amo icaca tlajtlacule. Hua tlö sisehuantu monömectea, amo tlajtlacoa. Pero tli mosojsohuajtea hua tli monajnömectea quepeasque problemas ipa ini nönca nemelestle, hua naja necnequesquiöne nemiechquextelis inu niecate problemas.

²⁹ Pero nemiechelfis ini nönca, nocnihua, que sö quiesque tiempo mocöhua. Desde öxö conbenierebe öque sohuöhua ma momachele quiename tlö amo sohuöhua, ³⁰ hua öque chuca ma iye quiename tlö amo chucane, hua öque pajpöcteca, quename tlö amo pajpöctane. Öque tlacoa, ma iye quiename tlö amo quepeane, ³¹ hua öque maprovechöroa de nönca tlöltecpactle ma iye quiename tlö amo quequextejtane iproviecho necö. Pues nönca tlöltecpactle ye tlanteca.

³² Lo que tli naja necneque ica majcamo xomotequepachojtacö. Cuöc sente tlöcatl amo sohuöhua, motequepachoa por söstantle de Tlöcatzintle, hua por quiene quecualajtisque Tlöcatzintle. ³³ Pero tlö ye omosohuajte, motequepachoa ipa söstantle de tlöltecpactle, hua por quiene ma quecualajta isohua. Hua de inu manera itlanequeles ica de ume. ³⁴ Nuyejque sohuatl tli amo nömecteca hua tli sisehuantu, motequepachoa por söstantle de Tlöcatzintle, para iyey yectec de icuierpo hua iyulo. Pero tli nömecteca motequepachoa por söstantle de nönca tlöltecpactle, hua por quiene ma quecualajta inömec. ³⁵ Nemiechelfea ini nönca para nemoproviecho, amo para ayecmo nenquepeasque libertad. Sa necneque ma xenemecö cuale, hua xomodedicörucö xetietlatequepanucö toTlöcatzintle ca noche nemoyulo.

³⁶ Tlō canajyeca quepensōroa que amo cuale quetratōroa *ichpuch ipampa amo quecōhua ma monōmecte, hua tlō cana **ichpuch ye panuteca de xebetl; tlō cana ejqueu conbenierebe, ma quechihua quiename yaja queneque, pues amo tlajtlacule icaca: ma mosietelicō pelalactle hua sisehuanu. ³⁷ Pero tlō canajyeca amo momachelea obligado hua momachelea que cuale *quechihuas lo que tli yaja queneque, hua tlō yaja ye quedese diro quemalfis inu sisehuanu, cuale icaca. ³⁸ Ejqueu icaca que öque *quetiemaca ichpuch para ma monōmecte, cuale quechihua. Hua öque amo quetiemaca ichpuch para majcamo monōmecte, cache cuale quechihua.

³⁹ Sohuatl abele monōmectis ca ocsente tlōcatl mientras neme inōmec, pero tlō cana meque inōmec yaja ica libre para monōmectis ca öque yaja queneques, solamente ma iye creyente ca toTlōcatzintle. ⁴⁰ Pero lo que tli naja necpensōroa icaca que cache cuale iyes icnupel tlō mocōhua sa isiel, hua necpensōroa que naja nuyejque necpea tieEspíritu de Deus.

8

¿Conbenierebe öque quecuōs tlacuale tli quentlōlelejque ixniehualojme noso amo?

¹ Öxö, noso, nemiechelfis de inu tlacuale tli quentlōlelea ixniehualojme. Melōhuac tonochtie tejua tecmajmate de ini nōnca. Pero ini nōnca tomachesteles paque tiechbejcapanoa sa para tochamōhuasque. Cache tlasojtelestle tlabepōhua de melōhuac. ² Tlō canajyeca momachelea que quemate lalebes, quejtusneque que ayemo quemate quiename conbenierebe quemates. ³ Pero tlō canajyeca tietlasojtla Deus, Deus quixomatihua inu tlōcatl.

⁴ Por inu, noso, de inu tlacuale tli quentlōlelea ixniehualojme, pues tecmajmate que ixniehualojme amo tli cate pa tlōltecpactle, hua que amo oncate ocseque deuste tlōcamo sa sietzi yejuatzi iloac. ⁵ Melōhuac oncate pa elfecac hua ipa tlōltecpactle niecate tli giente quencuitea deuste, hua de inu manera cuale tequejtusque que oncate meyactie deuste hua meyactie tlōcatzetzinte. ⁶ Pero mösque oncate inu niecate, para tejua iloac sa sietzi Deus Tajtle, öque oquechejchijque noche sōsantle, hua tonemeles ica para yejuatzi. Hua iloac sa sietzi Tlōcatzintle Jesucristo. Por medio de yejuatzi icaca noche sōsantle, hasta tejua tecpejpea tonemeles por yejuatzi.

⁷ Pero amo innochtie quepejpea ini nōnca machestelestle. Seque cachtō monemachtejque quenteochihuasque ixniehualojme, hua oc turavea quepensōroa que inu tlacuale ica de ixniehualo hua por inu amo cuale para tejcuōsque. Hua tlō quecua momachelea ipa iyulo que tlajtlacoa, ipampa ayemo checōhuac inneltoqueles. ⁸ Pues melōhuac, tlacuale amo tiechchihualtea que Deus tiechselisque. Amo teyesque cache tecualteque ipampa tejcuā, nimpōr amo teyesque cache amo tecualteque ipampa amo tejcuā. ⁹ Pero xecpeacō cuerōro majcamo iye que canajyeca tli amo checōhuac ineltoqueles ombetzes ipa tlajtlacule ipampa nemiechejtas que cuale nenquecua. ¹⁰ Pues beles taja que tecmate ini sōsantle teyōs pa teopantle cōne cate ixniehualojme hua ompa tejcuōs inu tlacuale, hua beles sente tli amo checōhuac ineltoqueles metzejtas. Entunses yaja cuale moyulchecōhuas para nuyejque quecuōs inu tlacuale tli quentlōlelejque ixniehualo. ¹¹ De inu manera taja ca momachesteles texexetunteca ineltoqueles de inu niecaju tli ica debil. Hua yaja ica mocni, öque nuyejque por yaja omecoac Cristo. ¹² Ejqueu nentlajtlacojtecate encuntra de nemocnihua, pues nenquencocoa inyulo ipampa amo checōhuac inneltoqueles, hua de inu manera nentlajtlacojtecate cuntra Cristo mismo. ¹³ Por inu, tlō nocni betzes ipa tlajtlacule ipampa nejcua tlacuale, ayec nejcūōs inu nacatl semejac, para majcamo necchihualte ma tlajtlaco nocni.

* **7:36** Cuale nuyejque motradusirus: “sisehuanu ipampa amo mosohuajtea ca yaja”. ** **7:36** Cuale nuyejque motradusirus: “lalebes ye quedeseōroa”. * **7:37** Cuale nuyejque motradusirus: “mocontrolōroa”. * **7:38** Cuale nuyejque motradusirus: “mosohuajtea ca sisehuanu”.

9

Sente tlateotitlantle quepea deriechos

¹ Melöhuac naja neca nelibre para cuale necchihuas lo que tli necneque. Nuyejque necaca netlateotitlantle, pues netieyejtac Jesús toTlöcatzintle, hua nemejua mismo nencate nennotlachihualhua de noteque para toTlöcatzintle. ² Mös ocseque amo niechpeane quiename netlateotitlantle, pero nemejua nenniechpeasque quiename netlateotitlantle, pues nemejua mismos nencate quiename sieñas de que de melöhuac neca netietlateotitlantle de toTlöcatzintle.

³ Ini nönca nequennönquelea niecate tli quejejtoa que amo netlateotitlantle. ⁴ ¿Amo melöhuac necpea deriecho para necselis notlacual hua ca tli noötis? ⁵ ¿Beles öque quejtus que amo necpea deriecho de necpeas nosohua tli ica tocni, hua necbicas ca cöne naja neya? Pues ejqueu quechihua ocseque tlateotitlanme, hua nuyejque tieicnihua de toTlöcatzintle, hua mismo Cefas noso Piero. ⁶ Noso ¿beles nenquepensöroa que solamiente naja hua Bernabé amo tecpejpea deriecho de que tejcöhuasque de tetequetesque hua sa tecselisque totlacual? ⁷ Pues ¿öquenu soltöro tli yaja mismo motlacualtea mientras tlatequepanojteca? Noso ¿öquenu quetuca sente huierta de uvas hua amo quecuös de inu fruta? Noso ¿öquenu calnielojpeque amo conis lieche de calnielojte? ⁸ Hua amo xecpensörucö que nemiechelfea ini nönca solamiente porque necpensöroa naja; ⁹ pues inu ley de Moisés quejtoa lo mismo. Pues tlajcuelulpanca ipa inu ley: “Amo xectlölicö ibarsinas cucobe cuöc tlatriyöroa”. Pues Deus amo quejtulo san porque netequapachulo de cucobejque. ¹⁰ Cache quejtulo quiename sente ejemplo para tejua, porque conbenierebe öque tlabarbiechoa hua öque tlatriyöroa ma quecheacö inpörte de lo que tli mochihuas. ¹¹ Entunes tlö tejua nemiechmacaque lo que tlin cuale para nemoyulo, ¿beles nemiechparesierus lalebes meyac tlö tecselisque de nemejua quiename sente cosecha lo que tlin cuale para tocuierpo? ¹² Tlö ocseque quepejpea ini nönca deriecho ca nemejua, tejua cache tecpejpea deriecho.

Pero hasta öxö amo tecusöroa inu deriecho. Cache tecxicoa noche tli topa yebitz, para majcamo tectzacuelicö inu cuale tlamachestelestle de Cristo. ¹³ Pero ¿amo nenquemajmate que niecate tli tlatequepanoa ipa tieteupa Deus tlajtlacua de sösanle de inu teopantle? Hua tli tlatequepanoa ipa inu ajtöl tlajtlacua de inu bentle tli motlölea ipa ajtöl. ¹⁴ Ejqueu otlamandörojque Tlöcatzintle, que niecate tli tlajtlanunutza cuale tlamachestelestle ma motlacualticö de inu mismo tequetl. ¹⁵ Pero naja ayec onecusöro niontle de nöncate deriechos, nimpör amo nemiechejcuelfejteca ini nönca para nenniechmacasque canajyetla. Cache cuale necnequesquea ma nemeque hua majcamo yeca niechquextele ini nönca nochamöhuales tli necpea.

¹⁶ Pues tlö netlanunutza de cuale tlamachestelestle, abele nochamöhuas sampör inu. Pues naja necpea que necchihuas; jporube de naja, tlö amo netlanunutza de inu cuale tlamachestelestle! ¹⁷ Pero tlö necchihua por notlanequeles naja, necpeas nopremio. Pero tlö necchihuas ca fuierza hua amo por notlanequeles, de porsiyaja noteque tli Deus niechmöctejque. ¹⁸ Entunes ¿tli premio necpeas? Nopremio iyes que necmachelis inu gusto de que netlanunutza de inu cuale tlamachestelestle sin tlaxtlöbile. Ejqueu amo necusörus inu noderiecho tli necpea de que necpeas notlacual ipampa netlanunutza de cuale tlamachestelestle.

¹⁹ Pues mösque nelibre neca hua amo neesclavo de nionöque, ye onochi para neyes neesclavo de innochtie tlöca para nequentlönis cache meyactie para Cristo. ²⁰ Hua nochihua quiename sente joreyo cuöc neca intzölö joriojte, para nequentlönis joriojte. Para niecate tli nentecate ipa inu ley de Moisés nochihua quiename tlö nuyejque nentane ipa inu ley, mösque de melöhuac abele niechmandörus ley. Ejqueu necchihua para nequentlönis tli nentecate ipa inu ley. ²¹ Para nequentlönis tli amo queneltoca inu ley de Moisés, nocuepa quiename sente de yejua, mösque de melöhuac amo netlacuajnömeque

ca tieley de Deus, cache necneltoca tieley de Cristo. ²² Cuöc neca intzölö tli amo checacteque de inneltoqueles, nocuepa quiename yejua, para nequentlönis. Nocuepa de noche sösantle para noche tlöca para que ca noche inu nequenmöquextis seque. ²³ Hua noche sösantle necchihua ipampa cuale tlamachestelestle, para necpeas nopörte ipa inu cuale sösantle tli quebicz.

²⁴ Ye nenquemajmate que ipa sente carriera, innochie tzitzecuine, pero sa sente quetlöne inu premio. Xetzecuinecö nemejua checöhuac para nenqueselisque inu premio. ²⁵ Pues niecate tli mopreparöroa para sente campeonato mocontrolöroa ipa noche sösantle. Yejua quechihua para quetlönisque sente coruna tli amo bejcöbes, pero tejua tecneque tectlönisque sente coruna tli ayec tlames. ²⁶ Pues por nopörte, naja amo netzecuine quiename tlö amo necmatene cöne neya. Amo nomaca quiename tlö sa necmacane yejyecatl. ²⁷ Cache netlatzcuepunele nocuierpo hua necdominöroa, para que majcamo de repiente niechejcuenisque, sötiepa de que ye nequennunutz ocseque.

10

Majcamo tequenteochihuacö ixniehualojme

¹ Pues necneque ma xecmatecö, nocnihua, que tobiebetcöhua innochie oyejyeya itzintla mextle, hua innochie opanuque ijtec inu lamör. ² De maneras que innochie, por tequejtusque ejqueu, quiename tlö omocuötiequejque para ca Moisés cuöc oyejyeya itzintla mextle hua ijtec lamör. ³ Nuyejque innochie oquecuajque sa sie tlacuale espiritual. ⁴ Hua innochie onötlique sa de sie ötzintle espiritual. Pues onötlique de inu ötzintle tli quisaya de ijtec tepetlatl espiritual tli oquentocaya pa inojfe. Hua inu tepetlatl yejuatzí Cristo. ⁵ Pero mösque quepejpeaya inu cuale sösantle, Deus amo quencualejtaque meyactie de yejua, pues cöso innochie omejmejque ca ompa cöne nionöque chönte.

⁶ Öxö, nönca sösantle omocö quieme sente ejiepmo para tejua, para majcamo tequeliebicö tli amo cuale quiename yejua oquechijque. ⁷ Por inu, noso, amo xequenteochihuacö ixniehualojme, quiename oquechijque seque de yejua. Pues tlajcuelulpanca: “Inu giente omotlölejque hua tlajtlacuöya hua cojconiya, hua omoquetzque para mojojtutisque hua tlalfequextisque”. ⁸ Nuyejque majcamo tetlajtlacucö ca sohuame, quiename oquechijque seque de yejua, hua omejmejque ipa sa sente tunale veintitrés mil. ⁹ Nuyejque majcamo tetieprobörucö Cristo, quiename seque de yejua oquechijque, hua omejmejque por cuhuöme oquenquejquetzonque. ¹⁰ Nuyejque amo xomoquejörucö, quiename oquechijque seque de yejua, hua oquenmectejque inu öngel de mequelestle.

¹¹ Inu sösantle impa omochi para ma iye ejiepmo para tejua, hua tlajcuelulpanca para tiechnahuatis tejua. Pues topa tejua ye onaseco sölültimo tiempo. ¹² Por inu, öque momachelea que yaja mocuajpetzojteca de ineltoqueles, ma quepea cueröro majcamo cana de repiente ombetzes ipa tlajtlacule. ¹³ Ayec *nemiechyulpiepiehualtea Amo Cuale cache de lo que tli öque cuale quexicus. Pues cuale tecpeasque confionsa ca Deus, porque yejuatzí amo quecöhuasque ma **tiechyulpiepiehualte cache de lo que tebejbelete tecxicusque. Cache, yejuatzí seme tiechmacalo sente maniera para majcamo tebetzecö, para que cuale tecxicusque.

¹⁴ Por inu, notlasojcöicnihua, xecholucö de tlateochihualestle de ixniehualojme. ¹⁵ Nemiechnunutzta quiename giente tli nencasojcömate; nemejua mismo xequestlocucö lo que tli nequejtoa. ¹⁶ Inu bölsö tli tecbendesiroa, ¿amo melöhuac que cuöc tecone quejtusneque que *tecate unidos ca Cristo por tieyesojtzi tli quenuquejque? Hua inu

* **10:13** Cuale nuyejque motradusirus: “nenquepea pruebas”. ** **10:13** Cuale nuyejque motradusirus: “tecpeacö pruebas”. * **10:16** Cuale nuyejque motradusirus: “tecate unidos entre tejua”.

pöntzi tli tequixtlapöna, ¿amo melöhuac que cuöc tejcua quejtusneque que tecate unidos ca Cristo por tiecuiervo? ¹⁷ Hua onca sa sente pöntzi, hua ejqueu tejua tli temeyactie tecate quiename sa sie cuiervo, ipampa tonochtie tejcua de sa sie pöntzi.

¹⁸ Xequetacö quiene ica ipa inu puieblo de Israel. Tli quecua bentle de ipa inu ajtöl, yejua mosietelea ca inu ajtöl hua ca iDeus de inu ajtöl, ipampa yejua quecua inu bentle. ¹⁹ Pues amo nequejtusneque que ixniehualo quepea balur, pues amo quepea. Nimpor amo nequejtusneque que inu tlacuale tli quetlölelea ixniehualo icaca ocsie que noche ocseque tlacualme, pues noche tlacuale icaca lo mismo. ²⁰ Cache lo que tli nequejtusneque icaca ini nönca: que cuöc giente quetlölelea bentle, quentlölelea demunios, hua amo tielölelea Deus. Hua naja amo necneque ma xomosietelicö ca demunios. ²¹ Abele nenconisque de inu bölsö de toTlöcatzintle hua nuyejque de inu bölsö de demunios. Abele nenquecuösque tlacuale de ipa tiemiesa toTlöcatzintle hua nuyejque de inu miesa de demunios. ²² ¿Quie beles tecnejneque tetiechihualtisque ma chöhuatihua Tlöcatzintle? ¿Beles tecpensöroa que cache techecteque tecate que yejuatzi?

Cuale tecchihuasque de noche söstantle, pero seque söstantle amo tlapaliebea

²³ Melöhuac ica que öque icaca creyente cuale quechihuas de noche söstantle. Pero onca seque söstantle tli amo tlapaliebea. Cuale tecchihuasque de noche söstantle, pero amo noche söstantle tlabepöhua. ²⁴ Majcamo öque quetiemo lo que tli cuale iyese sa para yaja. Cache ma quetiemo lo que tlin cuale iyese para ocseque.

²⁵ Lo que tli monamaca ipa mercödo, xejcuöcö. Hua amo xetlajtlanicö de cöne yebitz, mösque queneque quemates nemoyulo. ²⁶ Pues:

Noche tlöltecpactle tiehuöxcatzi Tlöcatzintle,
hua noche tli ica ipa nuyejque tiehuöxcatzi.

²⁷ Tlö canajyeca tli amo moneltoca nemiechtalfeea para nentlacuösque, hua nenque neque nenyösque, pues xejcuöcö lo que tli nemiechmaca sin que amo xetlajtlanecö de cöne yebitz, mösque nemoyulo queneque quemates. ²⁸ Pero tlö canajyeca nemiechelfea: “Nönca tlacuale oquetlölelejque ixniehualo”, entunses amo xejcuöcö por ipampa inu tlöcatl hua porque iyulo quemates lo que tli nenquechihuasque, hua quepensörus que amo cuale ica. ²⁹ Nequejtoa ini nönca de iyulo de inu tlöcatl, amo de nemoyulo de nemejua. Pues *tli para tejcöhuasque ma tiechestlocoa iyulo de ocsente ipampa tecate telibres para cuale tejcüösque de noche söstantle? ³⁰ Tlö naja netlacua ca tlasojcömatelestle, *¿quiene nejcajchöhuas que ocsente ma noca tlajto ipampa inu tlacuale por tli ye netieontlasojcomatele Deus? ³¹ Bueno, pues tlö nentlajtlacua, noso nencocone, noso nenquechihua canajyetla ocseque söstantle, xecchihuacö para tieyectieniehualas Deus. ³² Amo xectiemacacö locör para betzesque ipa tlajtlacule joriojte, nimpor tli amo joriojte, nimpor tli monejneltoca ca Deus. ³³ Pues ejqueu nuyejque naja nectratöroa de necchihuas tlin cuale para noche giente, hua amo nectiemoa lo que tli niechpaliebis naja. Cache nectiemoa lo que tli quenpaliebis cache meyac giente, para ma momöquexticö.

11

¹ Xecchihuacö quiename naja necchihua, ipampa naja nuyejque necchihua quiename oquechijque Cristo.

Quiene ma moportörocö sohuame cuöc mosentlölelea creyentes

² Öxö, necneque nemiechchamöhuas ipampa seme nenniechelnömeque de naja hua de tli nemiechejtete, hua nenquechihua. ³ Pero necneque ma xecasojcömatecö que Cristo iloac cachtö ipa noche tlöca. Icacá quiename tlö tlöcatl oyene cuiervo, hua Cristo

* **10:29** Cuale nuyejque motradusirus: “¿quiene tiechestlocus iyulo ocsente para ayecmo teyesque libres...?”

* **10:30** Cuale nuyejque motradusirus: “¿tlíca noca tlajtoa ocsente ipampa...?”

itzonteco. Ejqueu nuyejque *tlöcatl icaca quiename itzonteco sohuatl ipampa ica cachto que sohuatl. Hua ejqueu nuyejque Deus iloac quiename tietzonteco de Cristo. ⁴ Tlö cana sente tlöcatl quetlapachusquea itzonteco cuöc motlajtlötlajtea noso cuöc tlayulepantea de tietlajtultzi Deus, quepejpinöjtea itzonteco. ⁵ Pero tlö sente sohuatl motlajtlötlajtea noso tlayulepantea hua amo quetlapachoa itzonteco, yaja quepejpinöjtea itzonteco. Pues icaca iguöl quiename tlö mocuöpejpiöne itzonteco. ⁶ Pues tlö amo queneque mocuötlapachus, sie tiro ma mocuöpejpe. Pero tlö pinöhua mocuöpejpes hasta itzintech itzo, ma mocuötlapacho. ⁷ Tlöcatl amo queconbenieroa ma mocuötlapacho, pues yaja ica ixniehualo de Deus, hua itech tlöcatl cuale tequejtasque tiecualniexteles Deus. Pero itech sohuatl niese icualniexteles tlöcatl. ⁸ Pues amo oquis tlöcatl de itech sohuatl, tlöcamo sohuatl oquis de itech tlöcatl. ⁹ Nimpör amo omochejchi tlöcatl ipampa sohuatl, tlöcamo sohuatl omochejchi ipampa tlöcatl. ¹⁰ Por inu, queconbenieroa sohuatl ma quepea sente tzojtzomajtle ipa itzonteco quiename sieñas de que mosujetöroa ca ideriecho tlöcatl, hua nuyejque por impampa öngeles. ¹¹ Pero mösque ejqueu ica, para tejua tli tecate ca toTlöcatzintle, tlöcatl amo tli icaca sin sohuatl, hua sohuatl amo tli ica sin tlöcatl. ¹² Pues quiename sohuatl oquis de itech tlöcatl, ejqueu öxö tlöcatl tlöcate de itech sohuatl. Hua noche söstantle yebitz de Deus.

¹³ Pues xequejtucö nemejua, tlö cuale icaca ma motlajtlötlajte sohuatl ca Deus sin que amo mocuötlapachus. ¹⁴ Pues ¿amo tiechmachestea mismo tonemeles que icaca pinöhualastle para sente tlöcatl tlö quepea beyac itzo? ¹⁵ Pero itzo beyac icaca cualniextelestle de sohuatl, pues itzo oquemacaque para ica ma motlapacho. ¹⁶ Pero tlö canajyeca queneque tladiscutirus, xequelficö que amo tecpea ocseste costumbre tejua nimpör ocseque grupos de creyentes ca toDeus, tlöcamo sohuame creyentes ca nobeyo mocuötlapachoa.

Amo mochejchijteca tietlacual Tlöcatzintle quiename conbenierebe

¹⁷ Pero öxö lo que tli nemiechejcuelfis, abele nemiechchamöhuas. Pues niese que cuöc nemosentlölea nemiechchibelea döño, hua amo nemiechchibelea proviecho. ¹⁸ Cachto, nemiechelis ini nönca, que según nejcaque, que cuöc nemosentlölea nele nemonen-cuaxeloa entre nemejua. Hua cöso noneltoca. ¹⁹ Pues melöhuac seme ejqueu iyes, que nemonencuaxelusque entre nemejua para ma cuale niese öquenu de melöhuac cate creyentes. ²⁰ Bieno pues, pero niese que amo nemosentlölea para nenquecuösque tietlacual Tlöcatzintle. ²¹ Cache cara sente sa nima piehua tlacua itlacual yaja mismo, sin que quecheas ocseque. Ejqueu seque mocöhua tejteusejtecate, mientras ocseque hasta tlajtlöhuöna. ²² ¿Quie beles amo nenquepea nemochajchö cöne nentlacuösque? Cuöc nenquechihua ejqueyi nenquendespresiörojtecate tiegiente de Deus, hua nenquenpejpinöjtea tli prubejte. ¿Tli noso nemiechelfis? ¿Cuale nemiechchamöhuas por lo que tli nenquechihua? Abele nemiechchamöhuas.

Tietlacual Tlöcatzintle

²³ Pues naja onecsele de toTlöcatzintle ini enseñönsa tli ye onemiechmöcte, que ipa inu yohuale cuöc inu Judas otieantrecöro, totieJesucristo ocönque pöntzi. ²⁴ Hua sötiepa de que otietlasojcömatque Deus, oquixtlapönque. Oquenmelfejque: “Nönca pöntzi *ica nocuierpo, tli necantrecörus nemopampa. Xecchihuacö ini nönca para nenniechelnömetasque”. ²⁵ Ejqueu nuyejque ocönque inu bölsö sötiepa de cuöc otlacua-jque, hua oquejtojque: “Ini nönca bölsö de vino *ica yancuec acuiendo tli mochihuas por medio de noyeso de naja. Quiejquech veces nenconisque, xecchihuacö para nenniechelnömetasque”. ²⁶ De maneras que quiejquech veces nenquecua de inu pöntzi

* **11:3** Cuale nuyejque motradusirus: “inömec”.

* **11:24** Cuale nuyejque motradusirus: “querepresentöroa”.

noso nencone de inu bõlso, nencanunsiõroa tiemequeles Tlõcatzintle hasta cuõc yejuatzi hualiloas ocsajpa.

Quiene conbenierebe ma mochihua tietlacual Tlõcatzintle

²⁷ Pues ejqueu tlõ canajyeca quecua põntzi noso cone inu bõlso de toTlõcatzintle de sente manera que amo conbenierebe, ica tlajtlacultec por lo que tli quechihua ca tiecuiervo hua tieyesojtzi Tlõcatzintle. ²⁸ Por inu õque ma mostloco yaja mismo hua sõtiepa ma quecua de inu põntzi hua ma cone de inu bõlso. ²⁹ Porque tlõ quecua hua cone sin que momacas cuenta de que *icaca tiecuiervo Tlõcatzintle, quecua hua cone para que quecastecõrusque Deus. ³⁰ Icacã por inu que meyactie de nemejua mocoj cocoa hua amo chejchecacteque cate, hua seque hasta ye omejmejque. ³¹ Pero tlõ tejua tostlocusquiõne tejua mismos, Deus amo tiechjuscõrurusquiõne. ³² Pero cuõc yejuatzi tiechjuscõruro, tiechcastecõruro para majcãmo teyecõ tecuntenõdos ca tlõltecpactlõca.

³³ Ejqueu noso, nocnihua, cuõc nemosentlõlea para nenquecuõsque inu tlacuale, xomocheacõ para sa secne nenquecuõsque. ³⁴ Hua tlõ canajyeca teusebe lalebes, ma tlacua pa ichõ. Ejqueu xecchihuacõ para majcãmo nemiehcuntenõrucõ Deus. Hua inu ocseque sõsantle necarreglõrus cuõc neyõs nemiechejtati.

12

Beletelesme tli tiechmacalo Espõritu Sõnto

¹ Nocnihua, nemiechelfis de inu beletelesme tli tiechmacalo Espõritu Sõnto. Pues necneque ma xecmatecõ de inu sõsantle.

² Pues nenquelnõmequesque que cuõc ayemo neyejeya nencreyentes, giente amo cualteque onemiechbicaque para nenquenteochihuasque ixniehualojme que amo tlajtlajtoa. Hua seme nenquentocaya. ³ Por inu necneque ma xecmatecõ que abele õque quejtus por tieEspõritu de Deus: “Ma iye maldecido Jesús”. Nuyejque abele õque quejtus que “Jesús iloac Tlõcatzintle” tlõ amo quejtus ca Espõritu Sõnto.

⁴ Pero onca meyactie beletelesme tli tiechxiexelfilo. Pero sa sie Espõritu iloac õque quenxiexelulo. ⁵ Hua meyactie maneras onca para tetlatequepanusque, pero sa sie Tlõcatzintle iloac õque tetietequpanoa. ⁶ Hua Deus tequetihua totlac de meyactie maneras, pero sa sie Deus iloac õque quechihualo noche inu sõsantle totlac tonochtie. ⁷ Hua Deus quietiemaçalo ca cara sente sente prueba de que tieEspõritu iloac ca yaja. Hua inu prueba tli quemacalo ica para toproviecho de tonochtie. ⁸ Pues sente queselea por tieEspõritu beletelestle para tlanunutzas ca meyac machestelestle. Hua ocseque queselea, quiename mismo Espõritu quemacaque, beletelestle para tlanunutzas ca meyac asojcõmatelestle. ⁹ Ocseque queselea neltoquelestle por mismo tieEspõritu, hua ocseque queselea beletelestle para tlapajtis por sie yejuatzi Espõritu. ¹⁰ Hua ocseque queselea beletelestle para quechihuas tietzõbetl, hua ocseque queselea beletelestle para tlayulepantis noso quietiemaças tietlajtultzi Deus. Hua ocseque queselea beletelestle para quale quemates tlõ sente espõritu ica quale noso amo, hua ocseque queselea beletelestle para tlajtlajtus de ocseque tlajtulme, hua ocseque queselea beletelestle para quetradius de inu ocseque tlajtulme. ¹¹ Pero noche ini nõnca sõsantle quechihualo sa sie yejuatzi mismo Espõritu, õque quexiexelulo para cara sesen tlõcatl según quiename yejuatzi quenequihua.

Tonochtie tecate quiename põrtes de sa sie cuiervo

¹² Pues icaca quiename tocuiervo. Pues sa sente cuiervo tecpea, pero quepea meyac põrtes. Pero mõs cate meyactie, noche inu põrtes queformõroa sa sie cuiervo. Hua ejqueu iloac Cristo. ¹³ Pues tonochtie tejua, sea tejoriojte noso tegriegos, sea teesclavos noso telibres, tonochtie tobautizõrojque ca sa sie yejuatzi Espõritu, para ma teyecõ sa sie cuiervo, hua tonochtie otiechmacaque ma tecselicõ de sa sie Espõritu.

¹⁴ Sente cuierpo amo moformöroa sa de sie pörte tlöcamo de meyactie. ¹⁵ Tlö cana öque icxe quejtoöne: “Amo neca imö cuierpo hua por inu amo nepertenesierebe de cuierpo”, pues amo quejtusneque que ayecmo iyec de cuierpo. ¹⁶ O noso tlö cana quejtusquiöne öque inacas: “Amo neca nixtelolojtle hua por inu amo nepertenesierebe de cuierpo”, pues amo quejtusneque que ayecmo iyec de cuierpo. ¹⁷ Pues tlö noche cuierpo uyesquiöne ixtelololjtle, ¿cöne uyesquea totlacaqueles? Tlö noche cuierpo uyesquiöne tonacas, ¿quiene tetlajnequesquiöne? ¹⁸ Pero Deus oquetlölejque cara sesen pörte de tocuierpo ipa ilocör que yejuatzi oquenejque. ¹⁹ Pues tlö noche uyesquiöne sa sie pörte, ayecmo uyesquiöne cuierpo. ²⁰ Pero melöhuac onca meyactie pörtes, pero sa sie cuierpo icaca.

²¹ Toixtelolo abele quelfis tomö: “Amo temetznesesitöroa”. Nimpör tozonteco abele quemelfis tocexhua: “Amo nemiechnesesitöroa”. ²² Cache, inu pörtes de tocuierpo tli niese que amo checacteque, yejuanu cache tequennesesitöroa. ²³ Hua inu pörtes de tocuierpo tli tecpensöroa que quenpoloa cualniextelestle tequenyectlaquentea cache. Hua inu pörtes tli amo conbenierebe ma nejniesecö, cache ca meyac cuerörö tequentlaquentea. ²⁴ Pues inu pörtes tli cuale nejniese amo quenenesesitöroa ma tequentlaquenticö ejqueu. Bieno, Deus oquechejchijque tocuierpo ejqueu, para que cache quepeasque cualniextelestle inu pörtes tli quenpoloa. ²⁵ Ejqueu ica para majcamo monencuaxelucö pörtes de tocuierpo, tlöcamo cache cara sesen pörte ma motequepacho para tlapaliebis inca ocseque. ²⁶ Hua cuöc quesufriroa sie pörte de tocuierpo, innochie ocseque pörtes quesojsufriroa nuyejque. Hua cuöc sie pörte queselea tlin cuale, innochie ocseque pörtes pajpajpöque nuyejque.

²⁷ Pues nemejua nencate nentiecuierpo de Cristo, hua cara sente de nemejua ica sente pörte de inu cuierpo. ²⁸ Hua Deus oquentlölejque meyactie gientes diferentes entre tejua tli tecate tetieiglesia. Primero cate tlateotitlanme. Segundo cate tlayulepantejque tli tlajtlajtoa de pörte de Deus. Yeye cate tli tlajtlamachtea. Sötiepa cate tli quechihua tietzöbetl, sötiepa tli tlajtlapajtea, tli tlajtlapaliebea, tli tlajtladirijiroa, hua tli tlajtlajtoa de ocseque tlajtulme. ²⁹ ¿Quie beles tonochtie tecate tetlateotitlanme? O noso ¿beles tonochtie tecate tetlayulepantejque? O noso ¿beles tonochtie cuale tetlajtlamachtea? Noso ¿beles tonochtie tecchihua tietzöbetl? ³⁰ ¿Beles tonochtie tecpejpea beletelestle para tetlapajtisque? Noso ¿beles tonochtie tetlajtlajtoa de ocseque tlajtulme? Noso ¿beles tonochtie cuale tectradusirusque de inu ocseque tlajtulme? Amo, nocnihua. ³¹ Pero xecnequecö hua xextratörucö de nenquenselisque inu beletelesme tli cache cuajcuale. Pero naja nemiechejtetis sente maniera de quiene nennemesque tli oc turavea cache cuale.

13

Tlasojtelestle

¹ Mös naja netlajtlajtoöne ca tlajtulme de tlöca hua hasta de öngeles, tlö amo necpeane tlasojtelestle, neyesquiöne quiename sente campöna tli sa tzeline noso quiename platiyos tli sa tzeline. ² Hua mös neyene netlayulepante, mös necasojcömatene noche tiesecrietos de Deus, mös necpeane meyac neltoquelestle para nequemejcuenis tepieme, pero tlö amo necpeane tlasojtelestle, amo tli necaca niontle. ³ Hua mös nectiemacane noche tli necpea para nequenxiexelfis porubejte, hasta mös nectiemacane nocuierpo para nemeques hua ejqueu nochamöhuas, tlö amo necpeane tlasojtelestle, de niontle niechserbirusquiöne.

⁴ Cuöc tecpejpea tlasojtelestle cuale tecxicoa lo que tiechchibelea gigante, hua hasta toportöroa cuale ca yejua. Cuöc tecpejpea tlasojtelestle, amo toxicoa nimpör amo teji-coltea. Amo tochamöhua nimpör amo tochihua tebejbeye. ⁵ Cuöc tecpejpea tlasojtelestle amo toportöroa amo cuale. Amo tectiemoa sa tli tohuöxca. Amo nima tecuajcualöne.

Tequelcöhua lo que tli amo cuale tiechchibele yeca. ⁶ Cuöc tecpejpea tlasojtelestle amo tiechpöctea tli amo cuale cache tiechpöctea lo que tli melöhuac icaca. ⁷ Cuöc tecpejpea tlasojtelestle cuale tecxicoa noche tli tiechpasöroa. Tecate telistos para toneltocasque noche lo que tlin cuale tiechelfea de ocseque. Seme tecchea ma cuale mochihua impa ocseque. Seme tecöquantöroa noche sösantle.

⁸ Tlasojtelestle ayec tlamés. Ocseque sösantle, sea tlayulepantelestle de tietlajtultzi Deus, noso sea que öque tlajtlajtus de ocseque tlajtulme, o sea machestelestle; noche inu sencöbes hua tlamés. ⁹ Pues amo noche tecmajmate, sa sie pörte. Hua amo noche tequejtoa cuöc tetlayulepantea, sa sie pörte. ¹⁰ Pero cuöc huölös inu tli intierojca, entunses lo que tli ica sa sie pörte tlamés.

¹¹ Cuöc nepeltzintle oneyeya, netlanunutzaya quiename peltzintle, hua necpensöroöya quiename peltzintle, hua necnenebeliöya quiename peltzintle. Pero öxö que ye neca netlöcatl, ye onejcö inu sösantle de peltzintle. Öxö tomachesteles ica quiename imachesteles peltzintle. ¹² Ica quiename tlö öxö tequejtane ocsente ipa sente tiescatl que amo bel cuale öque ipa niese. Pero sötiepa tetieyejtasque tiexöyactzi ca toixtelolöjua cuale. Öxö tecmajmate sa sie pörte; sötiepa tecasojcömatesque por completo, quiename tiechasojcömathua Deus. ¹³ De maneras que mocöhuasque neltoquelestle, nemöchealestle, hua tlasojtelestle semejcac. De noche tli öxö tecpea, sa inu yeteme amo tlamésque. Hua de inu yeteme cache mayur ica tlasojtelestle.

14

Quiene icaca cuöc öque tlajtlajtoa ca ocseque tlajtulme

¹ Xectocacö tlasojtelestle. Nuyejque xequennequecö inu beletelesme tli quentiemacalo tieEspíritu de Deus. Hua cache xecnequecö inu beletelestle de tlayulepantelestle, quejtusneque de öque tlajtlajtus de pörte de Deus. ² Pues öque tlajtlajtoa ca ocseque tlajtulme tlajtlajtoa ca Deus, hua amo ca tlöca. Pues amo öque casojcömate, cache quejtojteca sösantle secrieto *ca iyulo. ³ Pero öque tlayulepantea quennunutzta tlöca para quenbepöhua hua quenyulchecöhua hua quemanimörus. ⁴ Öque tlajtlajtoa de ocsente tlajtule mobepöhua sa yaja, cache öque tlayulepantea quenbepöhua innochie creyentes. ⁵ Necnequesquiöne ma nemonochtie ma xetlajtlajtucö de ocseque tlajtulme, pero cache necnequesquiöne ma xetlayulepanticö. Pues ica cache cuale öque ma tlayulepante que ma tlajtlajto de ocseque tlajtulme, tlö cana amo quejtojtös para ma mobepöhuacö noche creyentes.

⁶ Bieno, nocnihua, tlö naja nebitz ca nemejua hua nemiechnunutzta ca ocseque tlajtulme, ¿tli proviecho nenquepeasque? Amo nenquepeasque proviecho tlö amo nemiechelfis de secrietos de Deus, noso de machestelestle, noso de tlayulepantelestle de tietlajtultzi Deus, noso de enseñönsas, de sente manera que cuale nencasojcömatesque.

⁷ Ma tectlölicö quiename ejemplös tlapitzalte hua quetörajte hua ocseque instrumentos tli amo quepea nemelestle. Pues tlö amo cuale caqueste inu notas de inu música, ¿quiene cuale öque casojcömates cötlaja cuicatelestle motzotzona noso motlapitza? ⁸ Hua ipan guierra, tlö inu tlapitzale amo tlapitzas cuale, nionöque amo mopreparörus para momacas. ⁹ Ejqueu nuyejque ica ca nemejua. Tlö ca nemocamac amo nenquejtusque tlajtulme tli cuale masojcömate, ¿quiene noso cuale öque quemates tli sösantle nenquejtojtecate? ¹⁰ Sa de embölde iyes nemotlajtul. Pues beles oncate meyactie tlajtulme ipan tlöltecpactle, hua ejqueu noso iyes que innochie quepejpea significado. ¹¹ Pero tlö naja amo nencasojcömate inu tlajtule tli yeca niechnunutzta, neyes quiename sente estrangiero para inu tlöcatl, hua yaja nuyejque quiename estrangiero iyes para naja. ¹² Por inu,

* **14:2** Cuale nuyejque motradusirus: “por tieEspíritu Deus”.

ye que nemejua lalebes nenquenejneque nenqueselisque tiechecöhuales Espiritu Sönto, cache xecdeseörucö belelestle para cache nenquenbepöhuasque ocseque creyentes.

¹³ Por inu, tlö yeca tlajtlajtoa de ocsente tlajtule, ma tiemotlajtlanele beltelestle para cuale quejtojtös lo que tli quejtoa. ¹⁴ Tlö naja notlajtlötlajtea ipa ocsente tlajtule, melöhuac motlajtlötlajtea noyulo, pero noasojcömateles amo tli proviecho quequextea. ¹⁵ ¿Tli necchihuas noso? Notlajtlötlajtis ca noyulo, pero nuyejque ca noasojcömateles. Netiecuicatis ca noyulo, pero nuyejque ca noasojcömateles. ¹⁶ Pues tlö cana taja tetieteochihua Deus solamiente ca moyulo, ocsente tlöcatl tli amo casojcömate abele quejtus: “Amén, ma ejqueu iye”, pues abele casojcömate lo que tequejtoa cuöc tetietlasojcömate Deus. ¹⁷ Motlajtlötlajteles cuale iyec cuale, pero inu ocsente amo mobepöhua ipa iyulo. ¹⁸ Netietlasojcömate Deus, pues naja cuale netlajtlajtoa de inu ocseque tlajtulme cache que nemejua nemonochtie. ¹⁹ Pero cuöc tosentlölea tli tecreyentes, cache necnequesquiöne nequejtus sa möcuile tlajtulme ca noasojcömateles, para nequenmachtis ocseque, que diez mil tlajtulme de ocsente tlajtule.

²⁰ Nocnihua, amo xecpensörucö quiename nenpelantzeti. Cache xeyecö quiename nenpelantzeti en que amo xecchihuacö lo que tli amo cuale quechihua tlöca, pero xeyecö quiename ye nentlöca en que xecpensörucö cuale. ²¹ Pues tlajcuelulpanca ipa inu ömatl de ley:

Nequennutzas nönca giente por medio de giente tli tlajtlajtoa de ocseque tlajtulme hua por incamac de estranjeros,

hua nion ejqueu amo niechcaquesque, quejtulo Tlöcatzintle.

²² De maneras que inu ocseque tlajtulme quenserbiroa de sieñas para ocseque giente tli amo moneltoca, hua amo para creyentes. Pero inu tlayulepantelestle quenserbiroa de sieñas para tli creyentes, amo para tli amo moneltoca. ²³ Entunses, tlö nemosentlölisque noche tli nencreyentes hua nemonochtie netlajtlajtusque ca ocseque tlajtulme, hua calaquesque seque tli amo quemajmate noso amo moneltoca, seguramente quejtusque que nenlucojtzeti. ²⁴ Pero tlö nemonochtie nentlayulepantea de tietlajtultzi Deus, hua huölös sente tli amo quemate noso tli amo moneltoca, nenquecombensierusque de itlajtlacul, hua momachelis que nemonochtie nenquestlocojtecate ²⁵ hua que ye onies lo que tli mojoyöntaya ipa iyulo. Ejqueu moumiyörus hua tieteochihuas Deus. Hua tlamachestis ejqueu: “De melöhuac Deus iloac nemotzölö”.

Ma mochihua noche sösanle quiene ca conbenierebe

²⁶ Entunses, nocnihua, ¿quiene tecchihuasque? Cuöc nemosentlölea, cöra sente tlöcatl quepea sente cuicatelestle, noso sente enseñönsa, noso canajyetla tli Deus quemachestejque, noso sente mensöje ipa ocsente tlajtule, noso itraducción de inu mensöje. Bieno, pues ma iye noche para quenbepöhuas creyentes. ²⁷ Cuöc motlajtlajtus de ocseque tlajtulme, ma tlajtlajtucö sa ume personas, o hasta yeteme. Hua ca sie sente ma quentocörojta, hua ma uye sente ma quejtojte. ²⁸ Hua tlö cana amo onca öque quejtojtös, majcamo öque tlajtlajto de ocsente tlajtule cuöc nemosentlölea. Sa *cuöc isiel ma tlajtlajto ca Deus de ocseque tlajtulme. ²⁹ Hua tlö motlayulepantis, ma tlajtlajtucö de pörte de Deus untame, o noso yeteme; hua ocseque ma questlocucö tli omojto. ³⁰ Hua tlö canajyeca tli yehuateca queselea sente mensöje de tlayulepantelestle, inu primero tlanunutztaya ma quecöbele locör hua ma motlöle. ³¹ Pues cuale nentlayulepantisque nemonochtie, para que innochie creyentes momachtisque hua manimörusque. Pero xecchihuacö ca sie sente. ³² Pues tli tlayulepantea cuale quedominöroa inyulo. ³³⁻³⁴ Porque Deus amo quechihualo chöchalönalestle tlöcamo iloac Deus de yecsiebelestle.

Sohuame majcamo tlajtlajtucö cuöc nemosentlölea, pues amo quentocöroa yejua. Ejqueu nuyejque quechihua sohuame ipa noche ocseque grupos de yecteque. Cache

* **14:28** Cuale nuyejque motradusirus: “ipa iyulo”.

ma mosujetörucö, quiename nuyejque tiechelfea inu ley. ³⁵ Hua tlö quenejneque quetzecusque canajyetla, ma quentlajtlanicö innajnömecua ipa inchajchö. Porque amo niese cuale que sohuatl ma tlajtlajto cuöc nemosentlölea.

³⁶ ¿Quie beles nenquepensöroa que tietlajtultzi Deus opie cachto ca nemejua, noso que sa nemejua nencate tli nenqueselejque? Entunses xecchihuacö quiename quechihua ocseque. ³⁷ Tlö canajyecä quepensöroa que cuale tlayulepantea, noso que quepea tieEspíritu Deus, ma quereconosiero que lo que tli nequejcueloa ica tiemandamiento de toTlöcatzintle. ³⁸ Pero tlö canajyecä *amo quereconosiero, entunses nuyejque yaja **amo tcreconosieroa quiename tlayulepante.

³⁹ Bieno pues, nocnihua, lales xecnequecö nentlayulepantisque de tietlajtultzi Deus, hua amo xequenzacuelicö tli quenejneque tlajtlajtusque de ocseque tlajtulme.

⁴⁰ Pero xecchihuacö noche söstantle quiene ca conbenierebe hua ca noche söstantle ipa ilocör.

15

Inu cuale tlamachestelestle tiechelfea que oyulebihuac Cristo

¹ Öxö, nocnihua, necneque nemiechtlalnömetis de inu cuale tlamachestelestle tli onemiechnunutz, hua nenqueselejque, hua nenquetocatecate. ² Hua por inu tlamachestelestle tli nemiechnunutz nemomöquextejtecate, tlö nenquesequiroya sin que nemoxeloa. Ejqueu icaca tlö cana amo de repiente ica que amo nencasojcömatque hua amo nemoneltocaque san quiene ca ica inu mensöje tli onemiechnunutz.

³ Pues naja nemiechmöcte lo que tli cache importönte, lo que tli naja nuyejque onecsele: que Cristo omecoaco ipampa totlajtlacul, quiename quejtoa teotlajtule. ⁴ Hua otietucaque, hua oyulebihuac ipa yeye tunale, quiename nuyejque quejtoa teotlajtule.

⁵ Hua oneniexstiluc ica Cefas noso Piero, hua sötiepa ica inu majtlactle huan ume tlateotitlanme. ⁶ Sötiepa oneniexstiluc ca cache de quinientos de tocnihua ipa sasie locör. Cöso innoctie de yejua hasta öxö neme, mös quiesquete ye omejmejque. ⁷ Sötiepa oneniexstiluc ca Jacobo hua sötiepa ca innoctie tlateotitlanme.

⁸ Sötiepa de innoctie oneniexstiluc ca naja. Pues naja necaca quiename sente peltzintle tli amo otlöcat pa itiempo. ⁹ Pues necaca nesötiepa que ocseque tlateotitlanme. Nimpor amo necmeresiero para neyes netlateotitlantle, pues nequentepotztocac tiegiente de Deus. ¹⁰ Pero neca pues lo que tli neca, ipampa Deus niechmacaque tiefavur. Hua amo de emböde oyeya tiefavur, pues netequet cache que ocseque tlateotitlanme. Möso amo naja netequet, tlöcamo niechpaliebe tiefavur Deus. ¹¹ Bieno pues, sea que naja, o sea ocseque tlateotitlanme, yaja ini nöncia mensöje lo que tli tetlajtlanunutz, hua yaja ini nöncia lo que tli nemejua nemoneltocaque.

Yulebesque mimejque

¹² Pero tlö ejqueu tetlajtlanunutz que Cristo oyulebihuac de intzölö mimejque, ¿quiene noso nenquejtoa seque de nemejua que amo onca yulebelestle de mimejque?

¹³ Pues tlö cana amo onca yulebelestle de mimejque, quejtusneque que amo oyulebihuac Cristo. ¹⁴ Hua tlö tequejtusque que amo oyulebihuac Cristo, quejtusneque que tomensöje amo quepea balur, hua nemejua nemoneltocaque de emböde. ¹⁵ Hua nuyejque quejtusneque que tejua tiechcöhua quiename teistlaceneme ipa söstantle de Deus. Pues tectesticörojque que Deus tieyulebitiluc Cristo. Pero amo ica melöhuac que tieyulebitiluc, tlö ica melöhuac que amo yoyjulebe mimejque. ¹⁶ Pues tlö cana amo yoyjulebe mimejque, nuyejque amo oyulebihuac Cristo. ¹⁷ Hua tlö amo oyulebihuac, entunses quejtusneque que nemoneltoqueles amo quepea balur; oc turavea nencate

* **14:38** Cuale nuyejque motradusirus: “amo quereconosiero, ma mocöhua sin que amo quemate”.

** **14:38**

Cuale nuyejque motradusirus: “amo quereconosieruro Deus”.

ipa nemotlajtlacul. ¹⁸ Nuyejque quejtusneque que niecate tli ye omejmejque, tli omonel-tocaque tieca Cristo, oixniempolejque. ¹⁹ Tlō solamente tecpejpea nemōchealestle de Cristo sa pa nōnca nemelestle, pues teporubejtzetzi cache que nionōque.

²⁰ Pero quiema ica melōhuac que Cristo oyulebihuac de intzölō mimejque. Yejuatzi iloac quiename sente primero pörte de tlamochihualestle de mimejque tli yulebesque.

²¹ Pues ejqueu quiename ocalac mequelestle por medio de sente tlōcatl, nuyejque por medio de sente tlōcatl onhuöla yulebelestle de mimejque. ²² Pues ejqueu quiename tonochtie temeque ica Adán, nuyejque tonochtie tecpeasque nemelestle tieca Cristo.

²³ Pero cōra sente iyes ipa ilocör quiene quetocōroa. Primero iloac Cristo, quiename primero pörte de tlamochihualestle. Sötiepa tli tiehuōxcagua yulebesque cuōc yejuatzi hualiloas.

²⁴ Entunses *iyes itlamejyo tlōltecpactle, cuōc Cristo cantrecōrusque noche tiehecōhualas ca Deus, öque iloac tieTajtzi. Pues cachtō cōnasque noche inchecōhualas hua inautoridad de tlōltecpactlöca. Entunses cantrecōrusque.

²⁵ Pues tieconbenieroa Cristo iloas rey hasta cuōc Deus quensujetōrusque intieramente noche tli cate tiecuntra de Cristo, hua quentlölisque itzintla tieicxehua.

²⁶ Hua inu sölúltimo tiecontrōrio tli quesujetōrusque icaca yaja mequelestle. ²⁷ Pues tlajcuelulpanca:

Deus quesujetōrojque noche sōsantle

hasta itzintla tieicxehua Cristo.

Pero cuōc quejtoa que “Noche ye omosujetōro”, amo quejtusneque que ye onesu-jetōruruc yejuatzi Deus, pues yejuatzi iloac öque quesujetōruro noche sōsantle hua itzintla tieicxehua Cristo quentlölilo.

²⁸ Hua cuōc mosujetōrus noche sōsantle tieca Cristo, entunses yejuatzi mismo, öque iloac tieConietzi Deus, nesujetōrurus tieca tieTajtzi, öque ye quesujetōrojque noche sōsantle tieca tieConietzi. De maneras que Deus iloas noche ipa noche sōsantle.

²⁹ Por ocseque pörte, nenquemajmate que oncate tli mocuajcuötiequea por mimejque. ¿Tlica quechihua inu? Tlō mimejque amo yojoyulebe ¿tli para öque mocuötiequis por yejua?

³⁰ Tejua nuyejque, ¿tli para teyesque seme ipa ini nōnca peligro? ³¹ Pues cara tunale neca en peligro de que nemeques. Nōnca ica melōhuac, nocnihua, quiename ica melōhuac que necmachelea pōquelestle nemopampa tieca toTlōcatzintle Cristo Jesús.

³² Tlō necpensōroōne quieme ocseque tlōca quepejpensōroa, ¿tli proviecho necpeasquea de que onomacac *ca giente petzoteque necō ipa Efeso? Tlō amo yojoyulebe mimejque, cache cuale:

Ma tetlacuöcö, ma tetlaicö;

pues beles mustla noso bictla temejequesque.

³³ Amo xomocōhuacö ma nemiechcaycayōhuacö. Ica quiename quejtoa inu tlaj-tule: “Öque yajteneme ca tli amo cualteque queniempolus inemeles cuale”. ³⁴ Amo cuale nenquepensōrojtecate; quiename nentlajtlōhuönque nencate. Xomoscalicö hua xecpensörucö cuale, hua ayecmo xetlajtlacucö. Pues seque de nemejua amo nentieixomate Deus. Nequejtoa para nemiechpejpinöjte.

Ma tetlacuöcö, ma tetlaicö;

pues beles mustla noso bictla temejequesque.

³³ Amo xomocōhuacö ma nemiechcaycayōhuacö. Ica quiename quejtoa inu tlaj-tule: “Öque yajteneme ca tli amo cualteque queniempolus inemeles cuale”. ³⁴ Amo cuale nenquepensōrojtecate; quiename nentlajtlōhuönque nencate. Xomoscalicö hua xecpensörucö cuale, hua ayecmo xetlajtlacucö. Pues seque de nemejua amo nentieixomate Deus. Nequejtoa para nemiechpejpinöjte.

³³ Amo xomocōhuacö ma nemiechcaycayōhuacö. Ica quiename quejtoa inu tlaj-tule: “Öque yajteneme ca tli amo cualteque queniempolus inemeles cuale”. ³⁴ Amo cuale nenquepensōrojtecate; quiename nentlajtlōhuönque nencate. Xomoscalicö hua xecpensörucö cuale, hua ayecmo xetlajtlacucö. Pues seque de nemejua amo nentieixomate Deus. Nequejtoa para nemiechpejpinöjte.

³³ Amo xomocōhuacö ma nemiechcaycayōhuacö. Ica quiename quejtoa inu tlaj-tule: “Öque yajteneme ca tli amo cualteque queniempolus inemeles cuale”. ³⁴ Amo cuale nenquepensōrojtecate; quiename nentlajtlōhuönque nencate. Xomoscalicö hua xecpensörucö cuale, hua ayecmo xetlajtlacucö. Pues seque de nemejua amo nentieixomate Deus. Nequejtoa para nemiechpejpinöjte.

Quiene yulebesque mimejque

³⁵ Pero cuale yeca tlajtlanes, ¿quiene yulebesque mimejque? ¿Quiename tli iyes incuierpo? ³⁶ Ica tunto nemotlajtlaneles. Cuōc nemejua nenquetuca sente xenöchtle, quepea que cachtō meques, para que sötiepa yulebes plōnta. ³⁷ Lo que tli motuca amo yaja plōnta tli sötiepa pabetzes, cache motuca sa xenöchtle tlaxipiejtle, sea iyes trigo o noso ocseque xenöchtle. ³⁸ Pero Deus quemacasque icuierpo de inu plōnta, inu cuierpo tli yejuatzi oquenejque. Hua cara xenöchtle quemacalo icuierpo tli quetocōroa. ³⁹ Pues amo noche cuierpos iguöl cate. Incuierpo tlōca sente ica; incuierpo yulcōme ocseque

³⁵ Pero cuale yeca tlajtlanes, ¿quiene yulebesque mimejque? ¿Quiename tli iyes incuierpo? ³⁶ Ica tunto nemotlajtlaneles. Cuōc nemejua nenquetuca sente xenöchtle, quepea que cachtō meques, para que sötiepa yulebes plōnta. ³⁷ Lo que tli motuca amo yaja plōnta tli sötiepa pabetzes, cache motuca sa xenöchtle tlaxipiejtle, sea iyes trigo o noso ocseque xenöchtle. ³⁸ Pero Deus quemacasque icuierpo de inu plōnta, inu cuierpo tli yejuatzi oquenejque. Hua cara xenöchtle quemacalo icuierpo tli quetocōroa. ³⁹ Pues amo noche cuierpos iguöl cate. Incuierpo tlōca sente ica; incuierpo yulcōme ocseque

³⁵ Pero cuale yeca tlajtlanes, ¿quiene yulebesque mimejque? ¿Quiename tli iyes incuierpo? ³⁶ Ica tunto nemotlajtlaneles. Cuōc nemejua nenquetuca sente xenöchtle, quepea que cachtō meques, para que sötiepa yulebes plōnta. ³⁷ Lo que tli motuca amo yaja plōnta tli sötiepa pabetzes, cache motuca sa xenöchtle tlaxipiejtle, sea iyes trigo o noso ocseque xenöchtle. ³⁸ Pero Deus quemacasque icuierpo de inu plōnta, inu cuierpo tli yejuatzi oquenejque. Hua cara xenöchtle quemacalo icuierpo tli quetocōroa. ³⁹ Pues amo noche cuierpos iguöl cate. Incuierpo tlōca sente ica; incuierpo yulcōme ocseque

³⁵ Pero cuale yeca tlajtlanes, ¿quiene yulebesque mimejque? ¿Quiename tli iyes incuierpo? ³⁶ Ica tunto nemotlajtlaneles. Cuōc nemejua nenquetuca sente xenöchtle, quepea que cachtō meques, para que sötiepa yulebes plōnta. ³⁷ Lo que tli motuca amo yaja plōnta tli sötiepa pabetzes, cache motuca sa xenöchtle tlaxipiejtle, sea iyes trigo o noso ocseque xenöchtle. ³⁸ Pero Deus quemacasque icuierpo de inu plōnta, inu cuierpo tli yejuatzi oquenejque. Hua cara xenöchtle quemacalo icuierpo tli quetocōroa. ³⁹ Pues amo noche cuierpos iguöl cate. Incuierpo tlōca sente ica; incuierpo yulcōme ocseque

* **15:24** Cuale nuyejque motradusirus: “yulebesque ocseque tli mocōhua”. * **15:32** Literalmente quejtoa: “ca yulcōme petzoteque”.

ica. Incuierpo tutume ocsente ica; incuierpo mimechte ica ocsente. ⁴⁰ Ejqueu nuyejque onca cuierpos tli cate pa elfecac quieme nuyejque oncate cuierpos ipa tlöltecpactle. Hua incualniexteles tli cate elfecac ica sente, hua incualniexteles tli cate pan tlöltecpactle ica ocsente. ⁴¹ Hua icualniexteles tunale, sente; hua icualniexteles mietztle ica ocsente. Hua incualniexteles sitlalte ica ocsente; hua entre mismo sitlalte amo iguöl cate de incualniexteles.

⁴² Ejqueu nuyejque iyec ca mimejque cuöc yojyulebesque. Lo que tli motuca palöne, pero lo que tli yulebe ayecmo palönes hua ayecmo meques. ⁴³ Lo que tli motuca ica tlajyelejtelestle, cache yulebe ca cualniextelestle. Lo que tli motuca amo checactec, cache yulebe ca checöhuallestle. ⁴⁴ Motuca sente cuierpo tli tiechserbiro para tonemeles necö pan tlöltecpactle, pero yulebes sente cuierpo cache cuale para tonemeles espiritual ompa elfecac. Tlö oncate cuierpos de nönca tlöltecpactle, nuyejque oncate cuierpos espirituales.

⁴⁵ Pues ejqueu tlajcuelulpanca: “Inu primero tlöcatl, Adán, oquepex nemelestle ipa iyulo”. Pero inu Adán tli sötiepa ohualiloac, tli sölültimo iloac, yejuatzi onechihualuc sente espíritu tli quetiemaalo nemelestle. ⁴⁶ Pero amo cachtö yebitz lo que tli espiritual, tlöcamo cachtö yebitz lo que tli de nönca tlöltecpactle, hua sötiepa lo que tli espiritual. ⁴⁷ Inu primero tlöcatl oyeya de tlöltecpactle, omochejchi de tlöle. Pero inu segundo tlöcatl iloac de elfecac. ⁴⁸ Ejqueu quiename oyeya inu tlöcatl de tlöle, ejqueu nuyejque tecate tejua tli tecate de tlöle. Hua ejqueu quiename iloac inu tlöcatl de elfecac, ejqueu nuyejque tli cate de elfecac. ⁴⁹ Hua ejqueu quiene tecbejbica iixniehualo de inu tlöcatl de tlöle, ejqueu nuyejque tecbicasque tieixniehualo de inu tlöcatl de elfecac.

⁵⁰ Nemiechelfea ini nönca, nocnihua, que tonacayo hua toyeso abele quepeasque pörte cöne Deus tlamandöruro. Pues abele quepeas pörte lo que tli palöne ompa cöne amo onca palönelestle. ⁵¹ Xejaquecö, pues nemiechelfis sente secreto. Amo tonochtie temejmequesque, pero tonochtie topatlasque. ⁵² Pasörebés sa sie repiente, quiename cuöc öque checoctebetze, cuöc caquestes inu tlapitzale tli canunsiörus sölültimo tunale. Porque tlapitzas tlapitzale, hua yojyulebesque mimejque ca sente cuierpo tli ayecmo palönes. Hua tejua tonochtie topatlasque. ⁵³ Porque tecpejpea que tejcöhuasque nönca tli palöne para totlaquentisque ca tli ayec palönes. Tejcöhuasque ini nönca tli meque para totlaquentisque ca lo que tli ayec meques. ⁵⁴ Hua cuöc ini nönca tli palöne mocuepas lo que ayec palönes, hua ini tli meque mocuepas lo que tli ayec meques, entunses mocumplirus lo que tli tlajcuelulpanca:

Mequelestle ye oquexetunque. Ye oquetlönque yejuatzi.

⁵⁵ Taja, mequelestle, ¿cönenca motlatlöneles?

Taja, mequelestle, ¿cöne ica mochecöhuales para tetiechcocus?

⁵⁶ Inu mequelestle quepea checöhuallestle topa ipampa tetlajtlacojque, hua totlajtlacul quepea checöhuallestle topa por inu ley de Moisés. ⁵⁷ Pero ¡tlasojcömate Deus! Pues yejuatzi tiechchihualtilo para tetlatlönesque ipa mequelestle por medio de toTlöcatzintle Jesucristo.

⁵⁸ Por inu, notlasojcöicnihua, xomochecöhuacö hua xomocuaajpetzucö, hua seme xetequejtacö lalebes ipa tietequé Tlöcatzintle. Pues nenquemajmate que nemotraböjo tieca Tlöcatzintle amo de embölde ica.

16

Ofrienda para yecteque

¹ Öxö, encuanto a inu ofrienda para tocnihua yecteque, xecchihuacö quiename nequemelfe inu grupos de creyentes ompa pa Galacia. ² Cara rominco, cara sente de nemejua ipa ichö ma cöpartöro seque de lo que tli oquetlö. Ejqueu xecchihuacö para amo nenquepeasque que nenquesentlölisque inu ofrienda cuöc nehuölös. ³ Hua cuöc

nehuölös, nequentitlanes seque tli nemejua nenquemixpejpenasque para quebicasque inu ofrienda hasta Jerusalén. Hua nequenmacas cörtas tli quenrecomendörojtas. ⁴ Hua tlö cana conbenierebes naja neyös, hua yejua yösque ca naja.

Cöne quenequeya iyös Pöblo

⁵ Pa noojfe nepanus ca pa Macedonia, hua sötiepa de que nepanus neyös ca nemejua. ⁶ Hua beles nocöhuas ca nemejua quiesquete tunalte. Beles noso nepanus inu cuariesma para que nemejua nenniechtitlanesque ca cuale ipa noojfe cöne neyös. ⁷ Cuale neyösquiöne ca nemejua öxö, pero sa nepanutequisas, hua amo necneque ejqueu. Cache necchea neyes quiesque tiempo ca nemejua, tlö toTlöcatzintle quepermetierusque. ⁸ Por inu amo neya hasta sötiepa. Nocöhuas necö ipa Efeso hasta ma ase inu tunalte de Pentecostés. ⁹ Porque onca bieye locör para netequetes *lalebes, hua oncate meyactie tli moponieroa.

¹⁰ Tlö iyös Timoteo nemotlac, xecprocurörucö que yaja ma momachele quiename pa ichö. Pues yaja quechijteca tietequa Tlöcatzintle, quiename naja necchihua. ¹¹ Por inu majcamo öque quedespresiöro, cache xecitlanecö ca cuale ma huöla ca naja. Pues necchixteca yaja ca ocseque tocnihua.

¹² Pero tocní Apolos, lalebes neclötlajte ma beya nemotlac inca ocseque tocnihua, pero öxö amo oquenec unya. Pero iyös cuöc quepeas locör.

Tlajpalulestle

¹³ Öxö, nocnihua, xetlachixtacö. Xomocuajpetzucö ipa nemoneltoqueles. Xomoportörucö quiename ye nentlöca; xomochejchecöhuacö. ¹⁴ Noche tli nenquechihua, xecchihuacö ca tlasojtelestle.

¹⁵ Öxö, nocnihua, nemejua nenquemajmate que Estéfanas hua ifamilia oyejyeya tli primiero omoneltocaque de noche inu nemoestado de Acaya. Hua nenquemajmate que yejua modedicöroa para quenpaliebisque yecteque. ¹⁶ Nemiechtlötlajtea nemejua nuyejque xomodedicörucö para nenquentocasque noche niecate tli ejqueu quechihua, hua noche tli lalebes tequete para tlapaliebisque ipa tietequa Tlöcatzintle. ¹⁷ Nepajpöque lalebes ipampa onhuölajque Estéfanas hua Fortunato hua Acaico. Pues yejua oquechijque tli nemejua abele onenquechijque por amo oncö nenyejyeya. ¹⁸ Niechescalfejque noyulo, quiename nuyejque nemoyulo. Ma tequenreconosierucö gientes quiename yejua.

¹⁹ Inu grupos de creyentes de necö Asia nemiechtlajpaloa. Aquila hua Prisca hua inu grupo de creyentes tli mosentlölea ipa inchö lalebes nemiechtlajpaloa. ²⁰ Innochie tocnihua nemiechtlajpaloa. Xomotlajpalucö entre nemejua ca sente petzulestle de tlasojtelestle de creyentes.

²¹ Naja nePöblo nemiechejcuelfea nönca saludos ca nomö belaja.

²² Tlö canajyeca amo tieneque toTlöcatzintle, ma iye maldecido. Maranata—ma hualilöa toTlöcatzintle.

²³ Tlöcatzintle Jesús ma nemiechmeyaquelicö tiefavur. ²⁴ Naja nemiechtlasojtla nemonochtie nemejua tieca Cristo Jesús.

* **16:9** Cuale nuyejque motradusirus: “ca proviecho”.

Cörta tli San Pöblo ca ujpa oquemejcuelfe CORINTIOS

¹ Naja nePöblo, que neca netlateotitlantle de Cristo Jesús, ipampa ejqueu quenequi-huaya Deus. Naja ca tocni Timoteo nemiehejcuelfea ini nönca cörta para nemejua tli nencate de inu grupo de creyentes ompa Corinto, hua para innochie tli yecteque cate ipa noche nemoestado de Acaya. ² Deus toTajtzi hua Tlöcatzintle Jesucristo ma nemiechmomeyaquelicö tieinfavur hua neyulsiebelestle.

Quiene oquesufriro Pöblo

³ Ma tetieyectieniehuacö Deus tieTajtzi de toTlöcatzintle Jesucristo. Pues yejuatzi iloac Tajtle hua por inu tiechpililus tietlöocoltelestle, hua iloac Deus hua por inu seme cuale tiechyulölisque. ⁴ Yejuatzi iloac öque tiechyulölilo ipa noche tli tecsufriroa. Ejqueu tejua cuale tequenyulölisque niecate tli nuyejque quesufrirojtecate, ipampa tejua nuyejque ye tiechyulölejque Deus. ⁵ Pues tecpejpea bieye pörte ipa tiesufrimientos de Cristo, hua ejqueu nuyejque tecpejpea tieca Cristo bieye tlayulölelestle. ⁶ Por inu cuöc tejua tecsufriroa, ica para que nemejua nemoyulölisque hua nenquepeasque nemöquextelestle ipampa tejua tecsufriroa. Hua cuöc Deus tiechyulölilo, ica para que nemejua nuyejque nemoyulölisque hua ejqueu cuale nenquexicojtasque cuöc nenquesufrirusque quiename tejua tecsufrirojtecate. ⁷ Hua tecate seguros de que nemejua nenquisasque cuale. Pues tecmajmate que ejqueu quiename nenquepejpea pörte ipa sufrimientos, ejqueu nuyejque nenquepea pörte ipa inu tlayulölestle.

⁸ Tocnihua, tecneque ma xecmatecö quiene oyeya inu sufrimientos tli topa on-huöla cuöc teyejyeya ompa Asia. Pues oyeya lalebes checöhuac, que ayecmo tecbej-beleteya para tecxicusque, hua hasta tecpensöroöya que de mölas temejequesquiöya. ⁹ Tomacheliöya quiename tlö teyene tecuntenödos para temequesque. Pues ini nönca otiechmachte que majcamo tectlölicö toconfiönsa ca tejua mismo, tlöcamo tieca Deus, öque quenyulebitilo mimejque. ¹⁰ Pues yejuatzi iloaya öque tiechmöquextejque de inu mequelestle san tiemajte. Hua oc turavea tiechmöquextisque. Pues tecpea confiönsa tieca yejuatzi que oc turavea tiechmöquextisque, ¹¹ tlö nemejua nentiechtlamachpaliebisque ca nemotlötlajteles. De inu manera, Deus tiechteochihuasque por nemotlötlajteles, hua ejqueu tejua hua nemejua hua ocseque tocnihua tonochtie tetietlasojcömatelisque toDeus.

Tlica amo unya Pöblo ca Corinto

¹² Pues tomachelea que cuale tecate. Pos tecmate ipa toyulo que ca noche giente, hua especialmente ca nemejua, toportörojque ca cuale, hua amo ca ume toxöyac. Pues ejqueu quenequihua Deus ma tecchihuacö. Toportörojque ejqueu ipampa Deus tiechpaliebiluc, amo porque tejua lalebes tecmajmate. ¹³ Pues tocörtas tli nemiehejcuelfea amo tlajtoa de ocseque söstantle, tlöcamo sa de lo que tli cuale nenquetlajtultisque hua cuale nencasojcömatesque. ¹⁴ Hua necneque ma seme xecasojcömatecö ini nönca que ye nencasojcömate ölgo, que nemejua nenpajpöquesque por tejua ipa inun tunale cuöc hualiloas toTlöcatzintle Jesús. Hua ejqueu mismo tejua tepajpöquesque por nemejua.

¹⁵ Necpeaya ini confiönsa ca nemejua, hua por inu onecnec neyös ca nemejua, para que ca ujpa nemiechpaliebis cuöc nemiechtlajpalus. ¹⁶ Hua desde Corinto, cöne nencate nemejua, neyösquiöne hasta necö ipa Macedonia, hua ocsajpa nocuepasquiöne ca nemejua, para que nemejua nenniechtitlanesquiöne ca cuale ipa noojfe para Judea. ¹⁷ ¿Quie beles amo necpensöro cuale cuöc necchihuasquea ini nönca? ¿Quie beles nenquepensöroa que cuöc nequejtoa que necchihuas canajyetla, necchihua quiename

quechihua ocseque tlöca, para que nequejtus “Quiema, quiema”, pero sötiepa nequejtus que “Amo, amo”? Amo, nocnihua. ¹⁸ Deus amo iloac de ume tiexöyac, hua por inu tejua amo nemiechelfea “quiema” hua sötiepa “amo”. Amo ejqueu, nocnihua. ¹⁹ Pues por medio de tejua, por naja hua Silvano hua Timoteo, nemejua nenquecajque inu mensöje de tieConietzi Deus, Jesucristo. Hua yejuatzi amo iloac quiename niecate tli quejejtoa “quiema” hua sötiepa “amo”; cache yejuatzi seme cafirmöruro que “quiema”. ²⁰ Porque noche tiepromiasas de Deus tli onca, yejuatzi quemafirmöruro ca sente tlajtule de “quiema”. Hua ejqueu por medio de yejuatzi tejua nuyejque tequejtusque “Amén, ma ejqueu iye”. Ejqueu tetiechamöhuasque Deus. ²¹ Hua Deus iloac öque tiechchihualtilo para ma tocuajpetzojtacö tejua hua nemejua nuyejque, para majcamo topatlacö de toneltoqueles tieca Cristo. Hua yejuatzi otiechixpejpenque, ²² hua nuyejque otiechseyörojque hua tiechmacaque tieEspíritu Sönto ipa toyulo quiename sieñas de lo que tli sötiepa tecselisque.

²³ Tlö amo oneya ca nemejua ompa Corinto, netietlölea Deus quiename testigo de que onecchi para majcamo nemiechmaca yulcocollestle. Hua tlö cana amo melöhuac, ma nemeque. ²⁴ Amo quejtusneque que tecpensöroa que tecpea deriecho de tetlamandörusque de nemoneltoqueles, cache tecnejneque nemiechpaliebisque para nenquepeasque cache meyac pöquelestle. Pues ye cuale nencate de nemoneltoqueles.

2

¹ Yaja por ini nönca onecdesediro de que amo onocuec ca nemejua ca yulcocollestle. ² Porque tlö nemiechchibelea ma xomoyulcocucö, ¿öquenu noso niechpöctis? Solamiente nemejua, tli ye nemiechchibele ma xomoyulcocucö. ³ Por inu onemiechejcuelfe inu söstantle, porque amo necnequeya neyös para nenniechchihualtisque ma noyulcoco, pues cache conbenierebe ma xeniechpöquelesmacacö cuöc neya nemotlac. Hua necpea confiönsa ca nemejua, de que cuöc naja nopöctea, nuyejque nemejua nemopöctea. ⁴ Pues cuöc nemiechejcuelfe inu cörta, notequepachoöya lalebes hua noyulcocoöya, hua hasta nechucaya. Pero amo nemiechejcuelfe para que nemoyulcocusque, tlöcamo para nenquematesque que lalebes bieye tlasojtelestle nemiechpilea.

Ma queperdonörucö öque oquechi mal

⁵ Pero inu tlöcatl tlö otiechchihualte ma toyulcocucö, amo tönto niechyulcoco naja, tlöcamo cache meyactie de nemejua nemiechyulcoco. (Nequejtoa que “meyactie” para amo nequejtus que nemonochtie.) ⁶ Cuöc nemosentlölejque hua nentlavotörojque para nenquecastecörojque, ye nenquemacaque suficiente icastigo. ⁷ De maneras que öxö cache conbenierebe ma xecperdonörucö hua xecyulölicö, para majcamo iye que por inu bieye yulcocollestle hasta motlabejbicaltis. ⁸ Por inu nemiechtlötlajtea, xedemoströrficö ocsajpa que turavea nenquetlasojtla. ⁹ Pues nemiechejcuelfe inu cörta nuyejque para ini nönca, para nemiechprobörus hua necmates tlö nenqueneltoca noche tli nemiechejcuelfea. ¹⁰ Pero tlö nemejua nenqueperdonöroa canajyeca por canajyetla söstantle, naja nuyejque necperdonöroa. Pues ye onecperdonöro (tlö cana niechtocöroa necperdonörus). Onecchi tieixpa Cristo por nemopampa nemejua, ¹¹ para majcamo tiechxexico inu Satanás, pues tecmajmate cuale de imöñas.

Motequepachoöya Pöblo ipa Troas

¹² Bieno, pues, onaseto ipa ciudad de Troas, hua toTlöcatzintle niechmacaque locör para netlanunutzas de inu cuale tlamachestelestle de Cristo. ¹³ Pero notequepachojtöya ipa noyulo porque amo necponteles tocni Tito. Por inu nodespediro de yejua hua onehuöla necö ipa Macedonia.

Tiemachesteles Deus macheateca ipa noche locör

¹⁴ Pero ma tetietlasojcömatelicö Deus, pues ica quiename tlö seme tiechbicaloteneme ipa sente desfile de tietlatlöneles de Cristo Jesús. Hua ejqueu tlamachestilo por medio de tejua de inu machestelestle tli tlajtoa de yejuatzi. Ejqueu inu machestelestle macheateca ipa noche locör. Ica quiename cuöc ajfeyoc potune ca nobeyo. ¹⁵ Pos tejua tecate quiename inu ajfeyoc tli quecualejtalo Deus, ipampa de Cristo *tecate. Hua tepotuntecate entre tli momöquextejtecate hua nuyejque entre tli ixniempolejtecate. ¹⁶ Para niecate tli ixniempolebe, inu tli potune yebitz de mequelestle hua quenmöpiehua hasta ipa mequelestle. Pero para noche tli momöquextea, yebitz de nemelestle hua quenyecöna hasta ipa nemelestle. ¿Öquenu noso cuale beletes para quechihuas nönca toteque? ¹⁷ Pos tejua abele tecchihuasque quiename quechihua meyactie ocseque. Pos yejua quenelultea tietlajtultzi Deus ca ocseque söstantle. Cache tejua tetlajtlanunutza ca tli melöhuac ipa toyulo. Tetlanunutza lo que tli tiechelfejque Deus. Tecchihua quiename tegiente de Cristo, porque tecmajtecate que Deus quetzaluteca tli tecchihua.

3

Mensöje de yancuec acuerdo

¹ Cuöc tequejtoa ini nönca, ¿quie beles nenquepensöroa que ocsajpa tepiehua toyectieniehuasque tejua mismos? Noso ¿beles tecnesesitöroa sente cörta tli tiechrecomendörus ca nemejua, o noso sente cörta tli nemejua nenquejcuelusque, tli tiechrecomendörus ca ocseque? Pos ocseque quenejnesesitöroa inu cörta, pero tejua amo, tocnihua.

² Pues nemejua nencate quiename inu cörta para tejua, tli omojcuelo ipa toyulo, que quemajmate cuale hua cuale quetlajtultisque noche giente. ³ Cuale quejtasque giente que nencate sente cörta tli Cristo oquejcuelojque por medio de tejua. Amo omojcuelo ca tinta, tlöcamo ca tieEspíritu de Deus öque nemoateca. Amo icaca quiename inu ley tli omojcuelo ipa tietetu manque, cache ini cörta Deus oquejcuelojque ipa toyulo tli yulejteca.

⁴ Hua tecate seguros de que tecchihuasque cuale ini nönca tequetl por medio de Cristo, pues tecpejpea ini nönca confiönsa ca Deus. ⁵ Pues tejua amo tecpejpea beletelestle por tejua mismo, para que ejqueu tequejtusque que tejua mismo otecchijque canajyetla; tlöcamo cache tobeleteles yebitz de Deus. ⁶ Hua yejuatzi tiechmacalo beletelestle para tetequetesque de tetlanunutzasque de inu yancuec acuerdo. Inu yancuec acuerdo amo ica de que öque queneltocas san quiene ca tlajcuelulpanca, tlöcamo ica de tieEspíritu de Deus. Porque inu acuerdo de lo que tli tlajcuelulpanca quenbica giente ipan mequelestle, pero inu tieEspíritu de Deus quetiamacalo nemelestle.

⁷ Hua inu ley de Moisés, tli omojcuelo ipa tietetu manque, ohuöla ca tlanixtelestle, hasta que inu israelitas abele oquetztaya ixöyac Moisés ipampa inu tlanixtelestle, mösque ye oquecöjtöya itzotlöneles. Entunses tlö ejqueu quepeaya tlanixtelestle inu tequetl tli quebicatz mequelestle, ⁸ cache ca meyac arrasu quepea tlanixtelestle ini tequetl tli ica de tieEspíritu Deus. ⁹ Tlö inu tequetl tli quencuntenöroa giente quiename tlajtlaculteque quepeaya tlanixtelestle, pos cache ca meyac arrasu quepea meyac tlanixtelestle ini tequetl tli quemelfea que Deus cuale quenselisque quiename yecteque. ¹⁰ Pues melöhuac, inu tli oyeya quepeaya tlanixtelestle, pero öxö niese amo quepea tlanixtelestle cuöc tequetztecate ini tli cache meyac tlanixtelestle quepea. ¹¹ Pues tlö inu tli sa opanusquea quepeaya tlanixtelestle, cache quepea tlanixtelestle lo que tli mocöhuas.

¹² Bieno pues, tecpejpea ini nemöchealestle, hua por inu tetlajtlanunutza ca meyac confiönsa. ¹³ Amo tecchihua quiename oquechi Moisés, pos yaja mixtlapachoöya ca sente tzojtzomajtle, para majcamo quetztaçö inu israelitas hasta cuöc otlá inu tlanixtelestle

* **2:15** Cuale nuyejque motradusirus: “tetlanunutza”.

tli panutaya. ¹⁴ Pero *yejua amo oquenejqque cajasojcömatesque; pues turavea hasta öxö, cuöc quetlajtultea inu tlajtule de Antiguo Testamento (quejtusneque de inu acuiendo tli primiero oyeya) icaca quiename tlö oc turavea inu mismo tzojtzomajtle quemixtlapachojteca, hua amo mojcuenajteca, porque amo quemajmate que mojcuenea solamiente por Cristo. ¹⁵ Cache hasta öxö, cuöc quetlajtultea tli oquejcuelo Moisés, quiename sente tzojtzomajtle quemixtlapachoa innenebeles. ¹⁶ *Pero cuöc mocuepa ca Tlöcatzintle moquextelea inu tzojtzomajtle. ¹⁷ Hua inu Tlöcatzintle iloac yejuatzi Espíritu Sönto. Hua cöne iloac tieEspíritu Tlöcatzintle, cate libres gigantes. ¹⁸ Por inu icaca quiename tlö tejua tonochtie ayecmo tixtlapachojtecate para ejqueu *cuale tequetztecate tietlaniexteles Tlöcatzintle, quiename tlö ipa sente tiescatl. Ejqueu topatlatebe cache hua cache para teyesque quiename yejuatzi, porque tecpextebe tietlaniexteles cache hua cache. Yaja ini nönca lö que tli tiechchihualtilo Tlöcatzintle öque iloac Espíritu.

4

¹ Bieno, pues, tecpejpea ini nönca tequetl, ipampa Deus tiechpilejqque tietlöocoltelestle, hua por inu amo todesanimöroa. ² Cache cuale ye otejcöjqque inu sösantle tli gigante quechihua sa ichtacajtzi, de tli öque mopejpinöjqte. Amo teyayajteneme ca möñas, nimpor amo tecpatla tietlajtultzi Deus para tequencajcayöhuasque gigante. Cache cuale tecpejpetlöhua cuale lo que tli ica melöhuac. Tecnejneque ma ejqueu noche gigantes ma quemachelicö ipa inyulo que tequejtoa tlin melöhuac tieixtla Deus. ³ Hua inu cuale tlamachestelestle tli tetlanunutza, tlö cana tlapachojteca, solamiente tlapachojteca para niecate tli ixniempolejtecate. ⁴ Porque inu Amo Cuale Tlöcatl, öque ica deus de nönca tlöltecpactle, yaja quemixcocoxcöjqtele innenebeles de yejua tli amo moneltoca. Ejqueu oquechi para majcama impa tlanixte inu tlöbile que yaja inu cuale tlamachestelestle tli tiechelfea de tietlaniexteles de Cristo, öque iloac belaja tieixniehualo Deus. ⁵ Pues cuöc tetlanunutza, amo tetlanunutza de tejua mismos, tlöcamo tetlanunutza de Cristo Jesús. Tequejtoa que yejuatzi iloac Tlöcatzintle, hua que tejua tecate tetlatequepanojque de nemejua porque tetietlasojtla Jesús. ⁶ Pues tecmajmate que Deus, öque oquejtojque: “Ma tlanixte tlöbile de ijtec tlajtlayohuaquelestle”, yejuatzi iloac öque tiechtlanixteliluc ipa toyulo. Pos tiechmacaque inu tlöbile que yaja inu machestelestle de tietlaniexteles Deus, tli tequejta cuöc tetieyeta Cristo.

“Toneltoca, hua por inu tetlanunutza”

⁷ Inu machestelestle ica quiename sente tesoro de ricojyutl, hua tejua tecate quiename xocme de tapalcatl tli amo cuajcuale, tli ijtec inu xocme tecpejpea inu tesoro. De inu manera noche gigante quematesque que inu meyac checöhuallestle yebitz de Deus, hua amo de tejua. ⁸ Ejqueu tecpejpea meyac problemas ca nobeyo, pero seme cuale tequisa. Amo tecmate quiene tequisasque, pero amo todesanimöroa. ⁹ Giente tiechtoca para tiechasesque hua tiechmectisque, pero Deus amo tiehcöhualo. Giente tiechtlajcale, pero amo tiechmectea. ¹⁰ Ca nobeyo ca cöne teyabe icaca quiename tlö niese totech tocuerpo tiemequeles de Jesús, para que tienemeles Jesús nuyejque cuale öque quejtas itech tocuerpo. ¹¹ Porque tejua, mös tenejneme, seme tiechmöctea para temequesque tiepampa Jesús. Ejqueu mochihua para que cuöc Deus tiechmöquextisque de inu peligro, gigante quejtasque totech que Jesús nemoateca, mösque sötiepa meques nönca tocuerpo. ¹² De maneras que mequelestle totechca, pero nemelestle ica nemotech nemejua.

¹³ Pero tejua toyulo moneltoca, san quiene ca moneltocaya iyulo de inu Salmista. Pos tlajcuelulpanca: “Noneltocac, hua por inu onetlanunutza”. Ejqueu tejua nuyejque toneltoca, hua por inu nuyejque tetlanunutza. ¹⁴ Pues tecmajmate que yejuatzi öque

* **3:14** Cuale nuyejque motradusirus: “Deus oquenchihualtejqque majcama casojcömatedö”. * **3:16** Xomojtelicö Exodo 34.34 * **3:18** Cuale nuyejque motradusirus: “tecate quiename sente tiescatl cöne cuale öque quejtas tietlaniexteles Tlöcatzintle”.

tieyulebitiluc toTlöcatzintle Jesús nuyejque tiechyulebitisque tejua tieca Jesús. Hua tiechbicasque tejua hua nemejua nuyejque, hua tiechtlölisque tieixtla yejuatzi. ¹⁵ Pero noche ini nönca sösantle icaca para nemejua, para que cache meyactie nenqueselisque cache meyac tiefavur de Deus. Hua de inu manera cache nentietlasojcömatelisque ipampa tiechmacalo tiefavur. Hua ejqueu yejuatzi cache quepeasque yectieniebestle.

¹⁶ Por inu, amo todesanimöroa, pues melöhuac tlante ini nönca cuiervo tli cuale öque quejtas. Pero ipa toyulo toyancuelejtebe cöra tunale. ¹⁷ Pues lo que tli tecsufriroa ipa ini nönca nemelestle amo bel checöhuac ica hua isejco pano, pero tiechbiquelitz lalebes bieye hua checöhuac tlaniextelestle, tli nochepa mocöhuas. ¹⁸ Hua amo tofijöroa ipa sösantle tli cuale öque quejtas, porque inu sösantle sa pano, pero lo que tli amo niese semejac mocöhua.

5

¹ Pues tocuiervo icaca quiename sente xajcale cöne techönte necö ipan tlöltecpectle. Hua tecmajmate que tlö cana xexetunes tecpejpea sente cale ompa elfecac tli Deus tiechmacasque. Hua inu cale amo quechejchijque tlöca, tlöcamo yecchejchijteca cuale, hua mocöhuas semejac. ² Pues melöhuac mientras techajchöntecate ipa ini nönca tocuiervo, tecuejcuesebe hua teyelsesebe ipampa lalebes tecnejneque ma motlaquente nönca tocuiervo ca inu cuiervo tli yebitz de elfecac. ³ Pues *cuöc ye totlaquentejque ayecmo quiema teyesque sa yejque. ⁴ Pues mientras techajchöntecate ipa ini nönca xajcale, teyelsesebe porque tomajmösebea. Amo ica que tecnejneque toquextelisque nönca cuiervo, tlöcamo tecnejneque teclölisque inu ocseite cuiervo, para que ini tli sa tlame hua meque pojpolebes hua tecpeasque tocuiervo tli nemes nochepa. ⁵ Hua Deus iloac öque otiechchibelejque para tecselisque inu cuiervo yancuec, hua tiechmacaque tieEspíritu quiename sieñas de que seguramente tecselisque.

⁶ Por inu tanimöroa. Tecmate que mientras techönte ipa tocuiervo necö amo tecate ca toTlöcatzintle. ⁷ Porque öxö tenentecate ca toTlöcatzintle sa por medio de toneltoqueles; abele tetieyejta ca toixtelolujua. ⁸ Bieno pues, tanimöroa, hua tecnejnequesquiöne tejcöhuasquea nönca chöntle tli yaja tocuiervo para ejqueu teyesque ca toTlöcatzintle. ⁹ Por inu, lo que tli seme tecnejneque ica ma Deus quecualejtacö totlachihual, ya sea cox tenentecate ipa tocuiervo noso cox ayecmo. ¹⁰ Pues tonochtie tecpejpea que teyesque tieixtla inu tlajtoöne que iloac yejuatzi Cristo, hua yejuatzi tiechpetlöhuasque para ma niese quiene ca tecate. Entunses tecselisque lo que tli tecmeresieroa por lo que tli otecchijque cuöc teyejyeya ipa ini nönca cuiervo, cox otecchijque tlin cuale noso cox tlin amo cuale.

“Xomosentlölicö ca Deus”

¹¹ Por inu tetiemabelea Deus, hua tecmachelea inu mabelestle ipa toyulo cuöc tequennunutzta giente para ma tequenxexicucö. Pero Deus tiechixomatihua cuale, hua neca seguro de que nemejua nuyejque nentiechixomate ipa nemoyulo quiene tecate de tonemeles. ¹² Amo nemiechelfea ini nöncate sösantle para tochamöhuasque, tlöcamo nemiechmacatecate locör para nemomachelisque cuale de tejua, hua para cuale nenquennönquelisque inu ocseque giente tli quejtoa que yeca cuale tlöcatl tlö niese cuale noso caqueste cuale itlajtul, pero amo quejta pa iyulo. ¹³ Hua tlö giente quepensöroa que tecate quieme telucojte, pues icaca para Deus. Hua tlö tecpensöroa cuale hua amo telucojte, icaca para nemejua, para nemiechpaliebisque. ¹⁴ Pues tecmate que Cristo tiechtlasojtlalo, hua inu machestelestle *tiechchihualtea para ma tetequetecö solamiente para yejuatzi. Pues tomaca cuenta de que sa sie tlöcatl omecoac por tonochtie, hua ejqueu tonochtie tecate quiename tlö ye otemejmejque. ¹⁵ Hua omecoac

* **5:3** Cuale nuyejque motradusirus: “siendo que totlaquentisque, ayec tiechpolus sente cuiervo”. * **5:14** Cuale nuyejque motradusirus: “tiechtzacuelea para majcamo tochamöhuacö”.

por tonochtie para que tejua tli tenentecate, tonemeles ma ayecmo iye para tejua, tlöcamo ma iye para yejuatzi öque omecoac hua oyulebihuac por tejua. ¹⁶ Desde öxö ayecmo tecpensöroa de nionöque quiename ocseque giente quepensöroa. Hasta que tlö cachtö otecpensöroöya de Cristo quiename ocseque quepensöroa, öxö ayecmo tecpensöroa ejqueu. ¹⁷ De maneras que tlö canajyeca ica tieca Cristo, ica sente tlöcatl yancuec. Inemeles tli primero oyeya ye opanuc, hua öxö ye ica yancuec.

¹⁸ Noche inu quechihualo Deus. Hua yejuatzi otiechsentlölejque ca yejuatzi por medio de Cristo, hua otiechmacaque ini tequetl de tequensentlölisque tlöca ca yejuatzi. ¹⁹ Quejtusneque que Deus por medio de Cristo ye oquechejchijque lo nesario para quensentlölisque noche tlöltecpactlöca ca yejuatzi. Pos ayecmo quepoalo intlajtlacul tlöca. Hua tiechmacaque inu tlajtule de sentlölelestle. ²⁰ Ejqueu noso tecate terepresentöntes de Cristo. Icacá quiename tlö Deus mismo quentlötlajtilo tlöltecpactlöca por medio de tejua. Tejua quiename terepresentöntes de Cristo tequentlötlajtea: “Xomosentlölicö ca Deus. ²¹ Cristo ayec otlajtlaculuc, pero Deus otiechibejque quiename tlö iloane tlajtlacultec. Oquechijque ejqueu por topampa, para ma teyecö teyecteque para ca Deus ipampa tecate tieca Cristo”.

6

¹ Bieno pues, tetejtequete tieca Deus, hua nemiechtlötlajtea nemejua: Ye nenqueselejque tiefavur de Deus; amo xejcöhuacö que cana amo quepeas iresultödo nemotech.

² Pues yejuatzi quejtulo:

Ipan tiempo cuale otemetzcac,

hua ipan tunale de nemöquextelestle otemetzpaliebe.

Xejcaquecö cuale, que öxö ica tiempo cuale, öxö ica tunale de nemöquextelestle.

³ Amo tecchihua niontle tli canajyeca questorböorus, para ejqueu nionöque tlajtus amo cuale de inu tequetl tli tecchihua. ⁴ Cache, tecnejneque tequemejtetisque por noche lo que tli tecchihua que de melöhuac tecate tetietlatequepanojua de Deus. Por inu, tecxicoa ca meyac paciencia cuöc tecsojsufriroa, cuöc tiechpoloa canajyetla, cuöc totequepachoa por canajyetla, ⁵ cuöc giente tiechbejbiteque, cuöc tiechtzajtzacua ipan cörsel, cuöc meyac giente chöchälöne encuntra de tejua, cuöc toobligöroa para tetequetesque lalebes checöhuac, cuöc amo tecojcoche hua hasta amo tetlajtlacua. Ca noche ini nönca söstantle tequemejtetea que de melöhuac tecate tetietlatequepanojua de Deus. ⁶ Nuyejque tequemejtetea por quiene tomalfea de tlajtlacule, por quiene tecate tetlajmatque, por que amo tecuajcualöne, por que tecualtientlöca, por que yejuatzi Espiritu Sönto iloac ca tejua, por que de melöhuac tequentlasojtla giente, ⁷ por que tetlanunutzá lo que tli melöhuac, hua por que tecpejpea tiechecöhuales Deus. Por noche inu giente cuale quejtasque que tecate tetietlatequepanojua Deus. Tecusöroa örmás de yecteleastle *para tomagasque hua para todefendierusque hua totzacuelisque. ⁸ Paques giente tiechyectieniehua, paques tiechtlajyelejta, paques toca tlajtoa, hua paques tlajtoa cuale de tejua. Paques tiechtratöroa quiename tlö teyene teistlacateneme, mös amo melöhuac, cache tequejtoa tlin melöhuac. ⁹ Tiechtratöroa quiename tlö nionöque tiechixomatene, mös meyactie tiechixomate. Tiechtratöroa quiename tlö ye temejmequene, pero cuale nenquejtasque que oc turavea tenentecate. Deus tiechcastecöruro, pero amo tiechmectilo. ¹⁰ Toyulcocoa, pero seme tepajpöctecate; tecate teporubejte, pero tequenricojtea meyactie. Niese que amo tecpea niontle, pero noche söstantle tohuöxca.

¹¹ ¡Ay tocnihua Corintios! Nemiechnunutzá noche tli tecpejpensöroa; nemiechtlasojtla ca noche toyulo. ¹² Tlö cana polebe tlasojtelestle hua confiönsa entre tejua hua nemejua, amo ica por topörte de tejua, tlöcamo nemejua nemiechpoloa tlasojtelestle.

* **6:7** Literalmente quejtoa: “ica tomöyecmö hua tomöarrabes”.

¹³Xetiechcuelicö inu tlasojtelestle tli tejua nemiechpilea. Nemiechtlötajtea quiename nennopelhua, nuyejque nemejua xetiechtlasojtlacö ca noche nemoyulo.

Tecate tetieteupa de Deus öque nemoateca

¹⁴Amo xomosietelicö ca tli amo moneltoca. Pues tlö cana ejqueu nenquechihuasque, iyeyes quiename sente yunta que amo yabe de acuerdo. Pos ¿tli acuerdo quepeas yectelestle ca tlajtlacule? O noso ¿quiene yesque de acuerdo tlöbile ca tlajtlayohuaquelestle?

¹⁵¿Tli acuerdo quepeasque Cristo ca Beliar noso Amo Cuale Tlöcatl? Noso ¿quiene cuale quepeas pörte sente tli moneltoca ca sente tli amo moneltoca? ¹⁶¿Quiene iyeyes acuerdo entre tieteupa de Deus hua ixniehualojme? Porque tejua tecate tetieteupa de Deus öque nemoateca. Pos yejuatzi Deus oquejtojque ejqueu:

Nechöntes intzölö yejua;
neyajtenemes intzölö.
Hua neyes neinDeus,
hua yejua yesque nopuieblo.

¹⁷Por inu:

Xequisacö de intzölö
hua xomoxelucö nencua, quejtulo Tlöcatzintle,
hua amo xecmötocacö inu tli petzoyutl.

Entunses naja nemiechselis,

¹⁸hua neyes netajtle para nemejua
hua nemejua nenyisque notielpuchhua hua noichpuchhua.

Ejqueu quejtulo Tlöcatzintle öque quepealo noche checöhualestle.

7

¹Deus tiechprometierfilo nöncate söstantle para tejua, notlasojcöicnihua. Por inu ma tochepöhuacö de noche söstantle tli quepetzoneloa tocuerpo hua toyulo, hua ca mabelestle de Deus ma toyectelicö intiero cuale.

Pöblo opajpöc de que omoyulcuejque Corintios

²¡Xetiechselicö ipa nemoyulo! Nionöque amo otecchibelejque canajyetla amo cuale; nionöque amo tequixniempolajque, nimpör nionöque amo tejcajcajajque. ³Amo nequejtoa ini nöncä para nemiechmömaltis, pues quiename ye onemiechelfe, ye onemiechselejque ipa toyulo. Ejqueu tejua hua nemejua seme teyesque sa secni, sea que teme-jmequesque o noso tenentisque. ⁴Necpea meyac confionsa ca nemejua; nomachelea cuale de nemejua. Nanimöroa lalebes, hua lalebes necpea meyac pöquelestle mös tecsufrirojtecate meyac söstantle.

⁵Pues nuyejque desde cuöc tonasecö necö Macedonia, amo mosiebiöya tocuerpo, pues onhuölajque sufrimientos de ca nobeyo. Tiechyehualoöya peleitos, hua ipa toyulo tomajtiöya. ⁶Pero Deus, öque quemanimöruro tli modesanimöroa, yejuatzi tiechanimörojque cuöc onaseco Tito. ⁷Hua amo solamiente tanimörojque ipampa onhuöla Tito, tlöcamo nuyejque tanimörojque ipampa yaja manimöroöya ipampa nemejua cuale nenyabe. Hua yaja tiechpubele que lalebes nenquenejneque nenniechejtasque, hua que nemoyulcocoa, hua que nemotequepachoa lalebes por naja. Pos cuöc onejca noche inu naja nepajpöqueya cache.

⁸Pues naja necmate que onemiechyulcoco ca inu cörta tli nemiechtitlanelle. Pero amo notlöocoltea. Primero notlöocoltiöya ipampa onemiechyulcoco, pero sa por quiesque tiempo nemoyulcocoöya, ⁹hua por inu öxö nepajpöque. Amo nepajpöque porque nocörta nemiechyulcoco, tlöcamo porque inu yulcocalestle onemiechyulcuc. Pues onemiechmacac inu yulcocalestle tli quecualejtalö Deus, hua de inu manera amo nemiechchibele tlin amo cuale cuöc nemiechyulcoco. ¹⁰Pos inu yulcocalestle tli quecualejtalö Deus quebicatz yulcuepelestle tli quebicatz nemöquextelestle. Por inu

amo öque moquejörus de que omoyulcuc. Pero inu yulcolestle tli yebitz de nönca tlöltecpactle quebicatz mequelestle. ¹¹ Pero nemoyulcocolos de nemejua ica de inu tli quecualajtalo Deus. Pues xequejtacö quiene omochihuaco. Onenqueyecpensörojque inu asunto. Nenquesplicörojque lo que tli nenquechijque. Nemiechcualönte hua nemo-majtejque. Nenquenejque nenniechejtasque, nemotequepachojque por naja. Hua nenquecastecörojque öquenu oquechi amo cuale. Ca noche ini nönca söstantle cuale niese que nemejua amo nenquepea tlajtlacule ipa inu asunto. ¹² Pos cuöc nemiechejcuelfe inu cöta, amo tönto onequejcuelo para öquenu oquechi amo cuale, nimpör para öquenu oquechibele, tlöcamo cache onequejcuelo para nemejua, para ma xomomacacö cuenta delönte de Deus de quiene nentiechtlasojtla hua nemotequepachoa por tejua. ¹³ Por inu tanimörojque.

Hua amo solamiente tanimörojque, tlöcamo nuyejque tepajpöjque ipampa Tito pajpöqueya lalebes. Yaja pajpöqueya porque nemejua nenquescalejque iyulo. ¹⁴ Pos naja onetlajto cuale de nemejua ca Tito, hua nemejua amo nenniechpinöjtejque ca lo que tli onequelfe. Pues quiename lo que tli tejua nemiechelfejque seme oyeya melöhuac, nuyejque lo que tli nequelfe Tito de nemejua nuyejque omochihuaco melöhuac. ¹⁵ Hua yaja Tito nemiechneque lalebes, hua quelnömeque de quiene nemejua nenqueneltocaque, hua nenqueselejque ca meyac mabelestle hua respieto. ¹⁶ Nepajpöque ipampa lalebes necpea confiönsa ca nemejua.

8

Ma tetietlööcolicö ca noche toyulo

¹ Öxö, tocnihua, tecneque ma xecmatecö quiene Deus oquenmacaque tiefavur ca inu grupos de creyentes necö ipa Macedonia. ² Pues mös yejua quepejpea meyac pruebas hua sufrimientos, pero yejua pajpöctecate lalebes. De inu manera yejua oquemacaque meyac tomi para ma nequenbiquele para tocnihua tli cajcate ompa Judea. Ejqueu oquetiemacaque mösque lalebes porubejte cate. ³ Nemiechmelöjcöpubelea, que oquetiemacaque noche tli cuale yejua obejbeletiöya, hua hasta cache de lo que tli obejbeletiöya oquetiemacaque. Pues yejua mismo oquenejque oquetiemacaque ejqueu. ⁴ Hasta tiechtlötlajtiöya ma tequenhibelicö favur de que ma tequencöhuacö ma quepeacö pörte de nönca ofrienda para inu yecteque ompa pa Judea. ⁵ Hua oquechijque cache que lo que tli tejua tecpensöroöya, porque primieramente omotiemacaque yejua mismo ca toTlöcatzintle hua nuyejque ca tejua, quiename quenequihua Deus. ⁶ Por inu tecanimörojque Tito, öque quepiehualte inu colecta de entre nemejua, ma nemiechpaliebe para nenquesencöhuasque inu tietlööcolelestle tli nenquetiemacasque. ⁷ Pues nemejua nenchecuaquisa ipa noche söstantle. Nenchecuaquisa ipa nemoneltoqueles, ipa nemotlajtul, ipa machestelestle, ipa nemocuejcuesebeles para nenquechihuasque tlin cuale, ipa inu tlasojtelestle tli tejua nemiechpilea. Ipa noche ini nöncate söstantle nenchecuaquisa; öxö noso xechecuaquisacö ipa ini nönca favur tli nenquechihuasque.

⁸ Cuöc nemiechelfea ini nönca amo nemiechmandörojteca para que ca fuiersa nenquechihuasque. Cache cuale nemiechelfea quiene cuejcuesebe ocseque para quechihuasque ini nönca, para que ejqueu necmates tlö de melöhuac nemejua nuyejque nenquepea tlasojtelestle. ⁹ Pos ye nenquemajmate de inu favur tli tiechchibelejque toTlöcatzintle Jesucristo, que mös iloaya lalebes rico, pero por topampa onechihualuc porube. Ejqueu oquechijque para que tejua ma teyecö tericojte por tieporubejyu de yejuatzi.

¹⁰ Nequejtus ini nönca tli naja necpensöroa; que nemiechconbenieroa ma xecscencöhuacö lo que tli nenquepiehualtejque ipa ocsente xebetl tli opanuc. Pues nemejua cachtö nenquepiehualtejque amo solamiente de nenquechihuasque tlöcamo nuyejque de nenquenequesque nenquechihuasque. ¹¹ Öxö noso xecscencöhuacö, para

que ejqueu quiename nencuejcuesebeya hua nenquenequeya nenquechihuasque, öxö nenquesencöhuasque noche tli nenbejbelete. ¹² Pos tlö de melöhuac yeca queneque quetiemas, Deus queselilo según lo que tli quepea. Amo quetlajtlanelilo de öque lo que tli amo quepea.

¹³ Amo nequejtoa ini nönca para que nemejua nemiechpolus para ocseque quepeasque meyac. Cache necneque ma quepejpeacö iguöl yejua hua nemejua. ¹⁴ Öxö nemejua nenquepejpea para nencaxiltisque de lo que tli quenpoloa yejua. Canajquiema beles nemiechpolus nemejua, hua yejua caxiltisque de lo que tli nemiechpolus nemejua. Ejqueu noso iyés iguöl. ¹⁵ Iyés quiename tlajcuelulpanca:

Öque quetocöro meyac tlacuale amo oquesobröro, hua öque amo oquetocöro meyac amo oquepolo.

Tito hua icompanierojua

¹⁶ Pero netietlasojcömatelea Deus, ipampa yejuatzi quechihualtejqe para ma motequepacho Tito por nemejua, quiename naja notequepachoa. ¹⁷ Pues naja melöhuac nequelfe ma beya ca nemejua, hua yaja otlaneltocac. Pero amo iya porque naja onectitla, tlöcamo porque yaja mismo lalebes queneque iyös ca nemejua.

¹⁸ Tiehua yaja tectitlantecate inu tocni öque creyentes de ca nobeyo queyectieniehua porque lalebes cuale tequete de tlanunutzas de inu cuale tlamachestelestle. ¹⁹ Hua nuyejqe inu grupos de creyentes oquixpejqenque ini nönca tocni para ma yajteneme ca tejua para tiechpaliebis ipa ini nönca tequetl tli tecchijtecate para tequenpaliebisque tocnihua. Pos tecnejneque que giente ma tiechamöhuacö Deus por lo que tli tecchijtecate, hua ma niese cuale que tecnejneque tetlapaliebisque. ²⁰ Tecneque ma beya ini nönca tocni ca tejua, para que abele yeca toca tlajtus de ini nönca colecta tli tecchijtecate. ²¹ Pos tecnejneque ma niese cuale que lo que tli tecchijtecate tecchihua quiene conbenierebe. Tecneque ma quecualejtacö amo solamente Deus tlöcamo nuyejqe giente.

²² Hua ca tiehua inu unteme, Tito hua inu ocsente tocni, tectitlantecate ocsente tocni, öque ye meyac veces tecprobörojque que lalebes queneque quechihuas cualquier tequetl. Hua öxö cache queneque quechihuas inu encörgo de iyös ca nemejua, ipampa nemiechpilea meyac confiönsa. ²³ Tlö canajyeca tlajtlane öquenu yaja Tito, xequelficö que yaja nocompaniero de inu tequetl tli tecchihua para nemejua. Hua tlö tlajtlane de inu ocseque tocnihua, yejua cate tlatitlanme de inu grupos de creyentes, hua intech yejua niese tiecualniexteles Cristo. ²⁴ Xequendemoströrficö nemotlasojteles, para ma quejtacö creyentes de ocseque locörte que tecpeaya arrasu cuöc tetlajtoöya cuale de nemejua.

9

Quiene ma mochihua inu ofrienda para yecteque

¹ Pero de inu tlapaliebestle tli tecchihua para tocnihua yecteque, amo necnecesitöroa nemiechejquelis niontle. ² Pos ye necmate que nemejua nencate nenlistos para nentlapaliebisque. Hasta nemiechchamöhua inca tocnihua necö Macedonia, hua nequemelfea que nemejua de Acaya ye nemopreparörojque desde ye sie xebetl. Hua meyactie de yejua majöprörojque cache cuöc oquecajqe de quiene nemejua nenyeya nenlistos. ³ Pero nequentitlanteca tocnihua ca nemejua para que majcamo cana resultörebes que amo melöhuac inu pörte de lo que tli cuale tli onequejto de nemejua. Necneque ma xeyecö preparödös, pos ye onequemelfe que nemejua nencate nenpreparödös. ⁴ Hua amo necneque ma canajyeca de Macedonia ma beya ca nemejua hua nemiechasetibe hua cana de repiente amo nenyésque nenpreparödös. Pos tlö ejqueu, nemejua nentiechpinöjtisque tejua ipampa lalebes nemiechpilea confiönsa (mösqe cache nemejua nemopejpinöjtisque nemejua mismo). ⁵ Por inu nequejtac

que conbenierebe nequentlötajtis tocnihua ma yöcö ca nemejua antes de que naja neyös, para nemiechpaliebisque para nenquesencöhuasque inu tielöocolelestle que ye nenqueprometierojque. Pues tecneque ma iye listo cuöc tasetibe, hua ma iye sente tielöocolelestle tli yebitz desde nemoyulo. Amo tecneque ma iye quiename sente tlaxtlöbible tli yeca quetlaxtlöbis mösque amo queneque de melöhuac quietiemacas. ⁶ Pero nemiechelfis ini nönca: que öque tlatuca sa nöjte xenöchtle, sa nöjte quecosechörus. Pero öque tlatuca meyac, meyac quecosechörus. ⁷ Cöra sente de nemejua ma quietiemaca lo que tli ye oquepensöro ipa iyulo. Majcamo quietiemaca ca yulcocalestle, quiename tlö amo melöhuac queneque quietiemacas. Nimpor majcamo quietiemaca porque canajyeca quenelchibelis. Pos Deus quetlasojtlalo öque quietiemaca ca pöquelestle. ⁸ Hua Deus cuale nemiechmacasque noche tiefavur para que nemejua seme nenquepeasque noche tli monesetitöroa para noche sösantle tli nenquechihuasque. Hua ejqueu lalebes nenquechihuasque meyac de noche sösantle tlin cuale. ⁹ Pos ejqueu tlajcuelulpanca:

Oquecujchayö, oquenmacac porubejte;

iyecteles iyeyes nochepa.

¹⁰ Hua Deus, öque quietiemacalo xenöchtle para ma motuca hua tlacuale para öque quecuös, yejuatzi nemiechmacasque meyac xenöchtle para nenquetucasque hua quemeyaquelisque inu frutos tli yebitz. Ejqueu quechihuasque ipampa nenquechihua lo que tli yectec. ¹¹ Hua Deus nemiechricojtisque de noche sösantle para que cuale nenquietiemacasque meyac. Hua de inu maniera tocnihua tietlasojcömotelesque Deus cuöc tequenbiquelea inu tielöocolelestle. ¹² Pos inu paliebestle tli nenquechijtecate amo solamente caxiltea lo que tli quenpoloa inu yectequa, tlöcamo nuyejqe quenchiualtea ma tietlasojcömatelicö Deus lalebes. ¹³ Pues yejua tieyectieniehuasque ipampa por ini nönca paliebestle tli nenquechijtecate yejuatzi quemejtetisque que melöhuac nemejua nenqueneltocatecate inu cuale tlamachestelestle de Cristo, quiename nenquejtoa que nenqueneltoca. Hua tieyectieniehuasque nuyejqe ipampa nenquietiemacatecate meyac para yejua hua para noche ocseque giente. ¹⁴ De inu maniera motlajtlötajtis que por nemejua, hua nemiechnequesque lalebes ipampa Deus nemiechmacaluc meyac tiefavur para nenquenpaliebisque.

¹⁵ ¡Ma tetietlasojcömatelicö Deus por inu bieye tielöocolelestle tli tiechmacaque que abele tequesplicöroa!

10

Pöblo quepeaya checöhuallestle por que oyeya llateotitlantle

¹ Öxö, naja mismo nePöblo nemiechlötajtea por tieyectlasojteles hua tiepichaques de Cristo. Seque quejtoa que cuöc neca nemotzölö noportöroa quiename nemöxo, pero que cuöc neca bejca de nemejua nomachelea nechecactec. ² Nemiechlötajtea noso que cuöc naja nemiechejtati amo xeniechchihualticö ma neya ca inu checöhuallestle hua tlabielmequelestle. Pos bel cuale netlabielmeques ca niecate tli quepejpensöroa que tejua sa teneme quiename tlöltecpactlöca. ³ Pues melöhuac tejua tenentecate ipan tlöltecpactle pero amo tomaga quiename momaga tlöltecpactlöca. ⁴ Pos tejua amo tecusöroa sösantle de tlöltecpactle para tomagasque, tlöcamo tecusöroa sösantle de tiechecöhuales Deus para texexetunis que lo que tli checöhuac ica. ⁵ Ejqueu noso texexetunea tlanenebelesme hua noche ocseque sösantle tli ica encuntra de giente hua quentzacuelea para amo tieixomatesque Deus. Tequemajase noche pensamientos para ma tieneltocacö Cristo. ⁶ Hua tecate telistos para tequencastecörusque noche tli ayemo tlaneltocasque cuöc nemejua ye nentlaneltocasque cuale.

⁷*Xomomacacö cuienta de ini nönca sösantle tli cuale niese. Tlō canajyeca momachelea yaja mismo que ica de Cristo, nuyejque ma momaca cuienta yaja mismo que tejua nuyejque tecate de Cristo de iguöl manera que yaja ica. ⁸Pues mösque nochamöhuas oc tepetzi cache de lo que necnequesquea acerca de inu checöhualestle tli tecpejpea, amo nopejpinöjtis, porque ica melöhuac tli nequejtus. Pues toTlöcatzintle tiechmacaque inu checöhualestle para ma nemiechbepöhuacö hua amo para ma nemiechchibelicö dño. ⁹Amo necneque ma niese que sa necneque nemiechmajtis lalebes ca nocörta, quiename seque quejtoa que necchihua. ¹⁰Pues yejua quejetoa ejqueyi: “Icörtas de Pöblo lalebes checöhuac tlajtojtebitze, pero cuöc yebitz yaja amo checactec ica, hua itlajtulhua amo tli cate”. ¹¹Öque quejetoa ini nönca ma quematecö que totlachihual cuöc ompa tecate ica iguöl ca tli tequejtoa ipa tocörtas cuöc amo ompa tecate.

¹²Pues tejua amo tanimöroa tecchihuasque quiename quechihua seque, tli mochamöhua yejua mismos. Hua motemachihua hua monenebelea ca sente medida tli yejua mismo oquechijque, hua ejqueu quechijtecate sente tuntojyutl. ¹³Pero tejua amo tochamöhuasque *de que tecate cuale según tiechelfea sente medida tli tejua mismo otecchijque. Cache tejua totemachihua ca sente medida tli Deus oquechejchijque. Pos yejuatzi tiechelfejque tli tequetl tecchihuasque, hua yaja inu icaca medida ca tli totemachihua. Tlō tecchihua cuale inu tequetl, cuale tecate. Noso tlō amo tecchihua cuale, amo cuale tecate. Hua sie pörte de inu tequetl ica que ma tasecö hasta cöne nemejua nencate. ¹⁴Pos tochamöhua ipampa tejua primero tonaseto nemotlac ca inu cuale tlamachestelestle de Cristo. Tlō amo tonasene nemotlac entunses niesesquea que tochamöjtecate cache de lo que tli conbenierebe. Pero melöhuac otonaseto, hua por inu tochamöhuals moconförmöroa ca tli conbenierebe. ¹⁵Amo tochamöhua de lo que tli oquechijque ocseque tlöca, *pues tlö cana ejqueu tecchihuane abele motemachihuasquiöne cuale totlachihual. Cache tecchea que nemobepöhuasque ipa nemoneltoqueles, hua ejqueu **tecpeasque cache meyac locör para tecchihuasque cache meyac de inu tequetl tli Deus tiechmacaque. ¹⁶De inu manera tecnejneque tetlanunutzasque de inu cuale tlamachestelestle ca ocseque locör cache bejca de cöne nemejua nencate. Tecnejneque tetlanunutzasque cöne ayemo tlajtlanunutza ocseque. Ejqueu amo tochamöhuasque de inu tequetl tli oquechi canajyeca ocsente cachtö de que tejua tonasesquiöne. ¹⁷Pero: “Öque mochamöhuas, ma mochamöhua solamiente de toTlöcatzintle”. ¹⁸Pos cuöc canajyeca moyectieniehua yaja mismo, amo quejtusneque que por inu ica cuale. Pero tlö queyectieniehualo Tlöcatzintle, entunses quiema cuale ica.

11

Pöblo mocomparöroa ca tlateotitlanme istlacateque

¹Ojalá ma xecxicucö mientras notuntojchihuas tepetzi. Pues xecxicucö. ²Pos nechöhuatejteca de nemejua quiename Deus nuyejque chöhuatiluteca de nemejua. Pues nemejua nencate quiename sente sisehuanu que hasta öxö momalfea. Hua naja ye nemiechcomprometiero ca sa sie tlöcatl tli iloas nemonömec, que yejuatzi iloac Cristo. ³Pero nomajtea de que yeca cuale nemiechcaycayöhuas ca istlacatlajtulme para que ejqueu ayecmo sa solamiente Cristo nentietocasque hua ayecmo nenyasque sa de yejuatzi. Pues ejqueu inu cuhuötl oquecaycayö Eva ca imöñas. ⁴Pues cuöc canajyeca yebitz hua nemiechnunutza ocseque sösantle acerca de Jesús tli tejua amo nemiechnunutzque,

* **10:7** Cuale nuyejque motradusirus: “nemejua sa nenquejta lo que tli cuale niese”. * **10:13** Cuale nuyejque motradusirus: “de lo que Deus amo tiechelfejque ma tecchihuacö”. * **10:15** Cuale nuyejque motradusirus: “tli amo tiechelfejque Deus ma tecchihuacö”. ** **10:15** Cuale nuyejque motradusirus: “tecpeasque cache meyac locör para tetequetesque entre nemejua, pero solamiente quiename Deus tiechelfilo”, o noso “nentiechchamöhuasque lalebes, pero solamiente quiename Deus quenequihua”.

nemejua nencate listos para nenquexicusque. Hua cuöc yeca yebitz hua nemiechmaca ocsie espíritu, tli amo ica bel yejuatzi Espíritu Sönto öque cachto nentieselejque, noso tlö nemiechmaca ocsie tlamachestelestle tli amo ica inu cuale tlamachestelestle tli ye nenqueselejque, nemejua nencate listos para nenquexicusque. Öxö pues xecxicucö mientras naja notuntojchihuas tepetzi. ⁵ Pues necpensöroa que inu *“super-apóstoles” tli yejua quejtoa que cate tlateotitlanme de primera, amo niechpanabea nion tepetzi. ⁶ Beles noso notlajtulhua amo cualtzetzi cate quiename intlajtulhua de yejua, pero de machestelestle necmate cuale. Pues ca noche tli tecchihua ye nemiechejtetejque inmixtla innochtie giente que tecmajmate cuale.

⁷ ¿Beles noso nenquepensöroa que netlajtlaco ipampa onemiechnunutz de inu cuale tlamachestelestle tli Deus quietiemaalo, hua amo tli nemiechcobrörfe niontle? Pues naja quieme nopichaque para nemiechtlejcabis nemejua. ⁸ Hasta nequemönele insentöbo de ocseque grupos de creyentes, pues inu tomi tli niechhualtitlanelejque onecsele para nemiechpaliebejtaya ca noteque. ⁹ Hua cuöc neyeya nemotzölö paques niechpoloöya, pero amo neyeya sente cörga para nionöque de nemejua, porque tocnihua tli ohuölajque de Macedonia niechmacaque lo que tli niechpoloöya. De inu manera onectlachile para amo neyes sente cörga para nemejua. Hua oc turavea nectlachilejtas. ¹⁰ Nequejtoa lo que tli melöhuac tieixpa Cristo cuöc nequejtoa que nionöque niechcamatzacuas para ayecmo nochamöhuas de que ayec necsele tomi de nemejua por noteque ipa nemoestado de Acaya. ¹¹ ¿Tlica amo necselea? ¿Beles icaca porque amo nemiechtlasojtla? Deus quematihua que nemiechtlasojtla.

¹² Pero lo que tli pasörejteca icaca ini nönca; que niecate giente queselea tomi, hua quenejneque nuyejque naja ma necsele tomi, para ejqueu cuale mochamöhuasque de que cate quiename naja. Pero necsequirojtas amo necselis tlaxtlöbile por noteque, para ejqueu amo nequenmacas locör para mochamöhuasque. ¹³ Pues niecate amo de melöhuac cate tlateotitlanme, cache tlacajcayöjteneme. Sa mochihua quiename tlö oyejyene tlateotitlanme de Cristo. ¹⁴ Pues majcamo tectietzömajtacö ini nönca, pues nuyejque inu Satanás mocuepa quiename sente öngel tli tlaniextea quiename tlöbile. ¹⁵ Ejqueu amo ica tietzöbetl tlö itlatequepanojua Satanás nuyejque mocuepa para niesesque quiename tlatequepanojque de yectelestle. Pero intlamejyo iyees lo que tli quemeresieroa intlachihual.

Quiene oquesufrirö Pöblo

¹⁶ Ocsajpa nequejtus: majcamo yeca quepensöro que neca netunto. Pero tlö ejqueu nenquepensörusque, pos xeniechcöhuacö ma nochamöhua tepetzi quiename sente tunto. ¹⁷ Tlö noyulchecöhuas para nequejtus ini nöncate söstantle amo netlajtlajtus quiename quenequihua toTlöcatzintle ma tlajtlajtucö giente, tlöcamo cache cuöc nochamöhuas netlajtlajtus quiename sente tunto. ¹⁸ Meyactie entre nemejua mochajchamöhua quiename tlöltecpactlöca; naja nuyejque nochamöhuas. ¹⁹ Pos nemejua cuale nenquenxicoa tuntojte, ya que nele nemejua lalibes nentlajmatque nencate. ²⁰ Hasta tlö canajyeca nemiechase, noso tlö hasta tlö nemiechcua, tlö nemiechtzacua para que ayecmo nenyeseque nenlibres, tlö mochihua bieye hua hasta nemiechmaca pa nemoxöyac, nemejua nenquexicoa hua nenquetlöcayejta inu tlöcatl. ²¹ Lalibes nepinöhua nequejtus, pero tejua amo tomachelejque techecacteque para nemiechchibelisque inu söstantle.

Pero lo que tli yejua moyulchecöhua para quechihuasque, pos naja nuyejque noyulchecöhuas para necchihuas. (Xequelnömequecö que netlajtlajtojteca quiename sente tunto.) ²² Yejua, ¿cate hebreos? Naja nuyejque neca nehebreo. ¿Cate israelitas? Naja nuyejque. ¿Cate ipelhua Abraham? Naja nuyejque. ²³ ¿Cate tietlatequepanojua de Cristo? Naja cache neca que yejua. (Netlajtojteca quiename sente luco.) Naja

* **11:5** Cuale nuyejque motradusirus: “tlateotitlanme tli cache importöntes cate”.

netequejteneme cache lalebes que yejua. Oniechtzajtzejque cache meyac veces ipan cörseles. Lalebes meyacpa niechbitejque giente, hua meyac veces neyeya para nemeques. ²⁴ Möcuilpa inu joriojte niechmacaque inu castigo de que niechbitejque 39 veces. ²⁵ Yexpa niechbitejque ca cuabetl inu romanos, hua sajpa giente oniechtecaltejque. Yexpa opötzcalac börco cuöc naja ipa neyöya, hua sajpa nepanuc sie yohuale hua sie tunale ijtec lamör cuöc opötzcalac börco. ²⁶ Lalebes neyajteneme ca nobeyo, hua ye onopönte ipa meyac peligros: peligros de ötlacme cöne pano meyac ötzintle, peligros de tlachtejque, peligros de nopaisönos joriojte, peligros de giente tli amo cate de nopuieblo. Onopönte ipa peligros ca pa ciudades, peligros ca cöne nionöque chönte, peligros ipa lamör, peligros intzölö tli mojtoa que cate tocnihua pero amo cate de melöhuac. ²⁷ Netequete ipa traböjo lalebes checöhuac. Meyac veces amo necoche. Neteosebe hua noömeque. Meyac veces amo netlacua. Necsufriroa itztec hua niechpoloa notzojtzomajua.

²⁸ Hua amo solamiente inu, tlöcamo nuyejque cara tunale necpea quiename tlamömale que notequepachoa lalebes por noche grupos de creyentes de ca nobeyo. ²⁹ Tlö canajyeca amo checactec ica, naja nuyejque nomachelea quiename yaja amo nechecactec. Tlö canajyeca quechihualtea ma betze ipa tlajtlacule, naja *nuyejque niechpinöhua. ³⁰ Tlö nenniechobligörusque para nochamöhuas, ma nochamöjta de ini söstantle tli que-niextea que amo nechecactec. ³¹ TieDeus de toTlöcatzintle Jesucristo, öque nuyejque iloac tieTajtzi, öque quepealo teochibelestle nochepa, yejuatzi quematihua que amo neistlacatlajtoa. ³² Cuöc naja neyeya ipa inu ciudad de Damasco ompa tlamandörojtaya sente cubernadur tli oquetlöle inu rey Aretas. Hua inu cubernadur oquetlöle guördias para ma quixuticö pobieltajte de inu ciudad para ma niechasecö. ³³ Pero tocnihua oniechtemobejque ijtec sente canösta ca pa bentöna de pa tepöntle, hua de inu manera onemöquis de inu peligro.

12

Cochtiemequelesme hua panquextelesme

¹ Nenniechobligöroa para nochamöhuas, mösque inu chamöhuallestle amo quepea proviecho. Bieno pues, ma netlajto de cochtiemequelesme hua panquextelesme tli niechejtetejque toTlöcatzintle. ² Ye quepea catorce xebetl que Deus niechtlejcabejque hasta pa inu terciar elfecac. Amo necmate tlö oneya ca nocuierpo noso sin nocuierpo; solamiente Deus quematihua. ³⁻⁴ Hua niechtlejcabejque hasta ipa Paraíso. (Ocsajpa ma nequejto que amo necmate tlö oneya ca nocuierpo o noso amo; solamiente Deus quematihua.) Hua ipa Paraíso onejca tlajtulme tli abele öque quejtus, tli amo mopermitiroa mojtusque. ⁵ Cuale necchamöhuasquea ocsente tlöcatl tlö yaja oquejtane ini nönca söstantle, pero amo nochamöhuas naja mismo de niontle tlöcamo solamiente nochamöhuas de lo que tli queniextea que amo nechecactec. ⁶ Pos mösque cana necnequesquiöne nochamöhuas de nöncate söstantle, amo necchihuasquiöne sente tuntojyutl, ipampa nequejtusquea lo que tli melöhuac. Pero amo nochamöhua de ini nönca söstantle, ipampa amo necneque ma yeca quepensöro que naja neca cache cuale que lo que tli quejta hua quecaque de naja.

⁷ Hua por que inu söstantle tli Cristo niechpanquextelejque oyeya lalebes bieye, por inu, para que majcamo nochamöhua cache de lo que tli conbenierebe, niechmacaque sente tiecoco tli ica quiename sente estöcacuabetl tli tlölecteca itech nocuierpo. Yaja inu tiecoco cualtitla Satanás para niechtlatzcuepunelis. Hua Deus oquecöjque para majcamo nochamöhua cache de lo que tli conbenierebe. ⁸ Ca ini nönca yexpa netietlajtlane Tlöcatzintle ma niechcöhua ini tiecoco. ⁹ Pero yejuatzi niechelfejque:

* **11:29** Cuale nuyejque motradusirus: “niechtlabielmectea”, noso “niechpinöhua hua niechtlabielmectea”.

“Amo tecnesesitöroa ocsente sösantle tlöcamo solamiente nofavur tli temetzmacateca. Pues nochecöhuales yecniese intech tlöca tli amo checateque cate”. Así es que öxö cache cuale nochamöhua ca meyac gusto de que amo neca nechecactec. Pos ejqueu tiechecöhuales Cristo icaca notech. ¹⁰ Por inu nepajpöque cuöc amo nechecactec, cuöc giente niechpöpöca, cuöc niechpoloa sösantle, cuöc giente niechtepotztoca, noso cuöc necsufriroa canajyetla por Cristo. Pos cuöc amo nechecactec, cuöc inu cache nechecactec neca.

Pöblo motequepachoöya lalbes por creyentes ipa Corinto

¹¹ Bieno pues, ye onocuec quiename sente tunto. Pues nemejua onen-niechobligörojque ma necchihua. Conbenierebeya que nemejua nenniechyectie-niehuasquiöne, porque naja de niontle sösantle amo neca incuetlapa de *inu “super-apóstoles” tli yejua quejtoa que cate tlateotitlanme de primera. Mös de melöhuac amo tli neca. ¹² Cuöc naja netequejtaya entre nemejua, Deus seme quechihualutaya sösantle tli ica sieñas de öque ica tlateotitlantle. Pues quechihualoöya tietzöbetl hua sieñas hua ocseque sösantle bejbeye, mientras naja necxicojtaya meyac sösantle. ¹³ Nemejua amo nemiechtratöro quiename tlö neyene mienos que ocseque grupos de creyentes. Solamiente amo onocö ma neye sente cörga para nemejua. ¡Xeniechperdonörucö inu fölta!

¹⁴ Ye neca para neyös por yexpa ca nemejua. Hua cuöc naseti amo neyes sente cörga. Pues amo necneque niontle de lo que tli nemohuöxca; pues cache nemiechneque nemejua. Pues amo conbenierebe öque ipelhua ma quesentlöllicö tomi para intötajua. Cache conbenierebe tötajte ma quesentlöllicö para inpelhua. ¹⁵ Hua naja neca listo para nejcastörus notomi hua hasta naja mismo nocastörus hasta ma netlame por nemoyulo. Tlö naja ejqueu nemiechtlasojtla lalbes, ¿nemejua nenniechtlasojtlasque mienos?

¹⁶ Bieno pues, amo oneyeya sente cörga para nemejua, pero seque quejtoa que nele de porsí nemañuso, hua que ca nomöñas nemiechasec ijtec sente trömpa. ¹⁷ ¿Quie beles noso nemiechcajcayö noso nemiechtlachtequele por medio de canajyecca de niecate tli nequentitla ca nemejua? ¹⁸ Nequelfe Tito para ma beya ca nemejua, hua ihua yaja inu ocsente tocni. ¿Quie beles nenquejtusque que Tito nemiechcajcayö hua nemiechtlachtequele? Naja necmate que amo. ¿Amo teneme yaja hua naja sa de sie *maniera? ¿Amo otecchijque iguöl?

¹⁹ Beles nenquepensöroa que todefendierojtecate delönte de nemejua, pero amo sa ejqueu ica. Cache tetlajtlajtojtecate tieixtla Deus tietucöyupantzincö Cristo. Pero noche ini sösantle tequejtoa para nemejua, notlasojcöicnihua, para ma xomobepöhuacö de nemoneltoqueles. ²⁰ Pos nomajtea de que cuöc naja neyös nemotlac beles nemiech-niextis que amo nenyisque quiename naja necnequesquiöne, hua de inu manera necpeas que noportörus ca nemejua quiename nemejua amo nenquenequesque. Pos amo necnequesquiöne ma uye peleitos, chöhuatelestle, hua cualönelestle entre nemejua, nimpör ma xomonencuaxelucö entre nemejua, nimpör ma xequajtucö tlajtulme amo cuale, hua ichtacatlajtulme. Nimpör amo necnequesquiöne ma xomochamöhuacö nemejua mismo, nimpör ma uye chöchalonelestle entre nemejua. ²¹ Ojalá majcamo niechchihualticö noDeus ma nepinöhua cuöc neyös ca nemejua, hua majcamo de repiente iye que nonchucas por meyactie de nemejua tli oc nentlajtlacojtecate hua ayemo nemoyulcuepa. Cache necneque ma xomoyulcuepacö para ayecmo nenquechihuasque petzoyutl hua ayecmo nentlajtlacusque ca sohuame tli amo cate nemosojsöhuöhuö, hua ayecmo nemodedicörusque sa para nemopajpöctisque

* **12:11** Cuale nuyejque motradusirus: “inu tlateotitlanme tli cache importöntes cate”.

* **12:18** Literalmente quejtoa: “espíritu”.

13

Pöblo nima iyös ca Corinto

¹ Ye ica yexpa neyös ca nemejua. Tlö canajyeca quetieyelfisque, tecmatesque tlö melöhuac incamacopa de unte noso yete testigos tli oquejtaque tli oquechi. ² Cuöc ca ujpa oneyeya ca nemejua, nequemelfe tli tlajtlacojtaya, hua ocsajpa nequemantesipörfea yejua hua ocseque, que mös amo neca öxö ca nemejua, cuöc neyös amo möquisasque de incastigo. ³ Entunses nemomacasque cuienta que Cristo de melöhuac tlajtlajtulo por medio de naja. Pos nemejua nenquejtoa que nenqueneque sente prueba de que Cristo tlajtlajtulo por medio de naja. Bieno pues, cuöc neyös hua nemiechcastecörus, nemomacasque cuienta que quiema quechihualo, hua que amo tiepoloa checöhuallestle, tlöcamo checöhualuteca entre nemejua. ⁴ Pues melöhuac tiecoruspelojque quiename tlö amo checactec iloane, pero nemoa por tiechecöhuales Deus. Hua tejua nuyejque amo techecacteque tecate quiename yejuatzi amo checactec iloaya, pero tieca yejuatzi tenentasque por tiechecöhuales Deus. Hua ca inu checöhuallestle teyösque ca nemejua.

⁵ Xomoprobörucö nemejua mismo para nenquejtasque tlö nennejentecate según lo que tli toneltoca. Nemejua mismo xomoprobörucö. Noso, ¿amo nenquemate que Jesucristo iloac *ipa nemoyulo? O noso solamente tlö cana nemoproböroa de que amo nencate nencreyentes, entunses amo iloac ipa nemoyulo. ⁶ Pero necneque ma xomomacacö cuienta de que tejua cuale yeca tiechprobörus que de melöhuac tecate de yejuatzi. ⁷ Öxö totlötajtlötajtea ca Deus por nemejua, para majcamo xecchihuacö tlin amo cuale. Amo tecchihua ipampa tecneque ma teniesecö cuale tejua, tlöcamo cache tecneque nemejua ma xecchihuacö quieme conbenierebe, mös ejqueu abele tecprobörusque que tecpejpea checöhuallestle. ⁸ Porque abele tecchihuasque niontle tli ica encuntra de lo que tli melöhuac; solamente cuale tecchihuasque lo que tli ica de acuerdo ca lo que tlin melöhuac. ⁹ Por inu tepajpöque cuöc amo tecpejpea que tecusörusque tochecöhuales, porque quejtusneque que nemejua nenchecöjtecate de nemoneltoqueles. Totlajtlötajtea por ini nönca, para que nenyasque cache hua cache cuale. ¹⁰ Por inu nemiechjcuelfea ini cörta mientras ayemo neya ca nemejua para que cuöc naseti amo nemiechajajuas ca inu checöhuallestle tli necpea. Pues toTlöcatzintle niechmacaluc inu checöhuallestle para nemiechbepöhuas, hua amo para nemiechxexetunis.

Tlajpalulestle

¹¹ Öxö, nocnihua, *xepajpöquecö. Xeyecö cache hua cache cuale. Xecpeacö tlapojpofelestle ipa nemoyulo. Xeyecö sa de sie pensamiento. Xenemecö ca yeisiebestle. Hua Deus, öque tiechtlasojtlalo hua quetiemaalo yeisiebestle, iloas ca nemejua. ¹² Xomotlajtlapalucö entre nemejua ca sente petzulestle de yectelestle. ¹³ Innochie yectequa de necö nemiechtlajpaloa.

¹⁴ ToTlöcatzintle Jesucristo ma nemiechmeyaquelicö tiefavur, hua Deus ma nemiechpilocö tlasojtelestle, hua Espíritu Sönto ma nemiechacompañörucö nemonochtie nemejua.

* **13:5** Cuale nuyejque motradusirus: “nemotzölö”.

* **13:11** Cuale nuyejque motradusirus: “adiós”.

Sente cörta tli San Pöblo oquemejcuelfe

GÁLATAS

¹ Naja nePöblo, que neca netlateotitlantle. Amo niechtitla yeca sente tlöcatl, nimpör amo niechnutzque Deus por medio de sente tlöcatl para neyes netlateotitlantle. Cache yejuatzi mismo Jesucristo, hua Deus Tajtle, öque tieyulebitiluc de intzölö mimejque, yejuantzetzti niechtlölejque para neyes netlateotitlantle. ² Naja, ca tiehua innochie tocnihua tli cate ca naja, nemiehejcuelfea ini cörta para nemejua tli nencate de inu grupos de creyentes pa estado de Galacia. ³ Deus toTajtzti hua Tlöcatzintle Jesucristo ma nemiechmeyaquelicö tieinfavur hua neyulsiebelestle. ⁴ Yejuatzi Jesucristo nemöctiluc ipampa tejua tetlajtlacojque, para tiechmöquextisque de ipa ini nönca tlöltecpactle tli amo cuale. Pos ejqueu oquenejque toDeus, öque iloac toTajtzti. ⁵ Yejuatzi ma quepeacö yectieniebelestle nochepa semejca. Amén. Ma ejqueu iye.

Amo onca ocsente tlamachestelestle tli tiechbiquelitz nemöquextelestle

⁶ Nectietzömäte lalebes que nemejua isejco nentiecöjtecate yejuatzi öque nemiechnutzque por medio de tiefavur de Cristo. Pos ye nenquetocatecate ocsente tlamachestelestle ⁷ tli icaca ocsie que inu belaja cuale tlamachestelestle tli tiechbiquelitz nemöquextelestle. Solamiente lo que tli pasörejteca ica que seque nemiechtlapolultea hua quenejneque quepatlasque inu cuale tlamachestelestle de Cristo. ⁸⁻⁹ Pero tlö canajyeca nemiechnunutzta ocsente tlamachestelestle de nemöquextelestle tli ica ocsie de inu cuale tlamachestelestle tli tejua onemiechnunutzque hua tli nemejua nenqueselejque, pos ma iye maldecido. Amo importörebe tlö tejua mismo, noso tlö hasta sente öngel de elfecac. Ye otequejtojque hua ocsajpa nemiechelfis: que öque beletes tlö nemiechnunutzta ocsente tlamachestelestle, ma iye maldecido.

¹⁰ Cuöc nequejtojteca ini nönca, amo nectiemoa ma niechcualejtacö giente, cache nectiemoa Deus ma niechcualejtacö. Noso ¿beles nenquepensöroa que nectiemoa ma niechcualejtacö tlöca? Tlö oc necnequesquiöne ma niechcualejtacö giente, ayecmo netietlatequepanusquiöne Cristo.

Quiene Pöblo omochi tlateotitlantle

¹¹ Pues necneque ma xecmatecö, nocnihua, que inu cuale tlamachestelestle tli naja onemiechnunutz, amo yebitz de tlöca. ¹² Pues amo onecsele de tlöca, nimpör nionöque tlöcatl amo niechmachte, tlöcamo mismo yejuatzi Jesucristo niechejtetejque.

¹³ Pues ye onenquecajque quiene oyeya nonemeles cuöc nectocaya inu religión de joriojte. Pos lalebes nequentepotztocaya lalebes tli moneltocaya ca Deus, hua nectratöroöya de necxexetunis inu religión de cristianismo. ¹⁴ Hua de entre tli tectocaya inu religión de joriojte, naja cache nechecuaquisaya de entre nocompañeros joriojte tli tecbejbicaya mismo xebetl. Pues naja cache lalebes necnequeya necchihuas inu costumbres de tobiebetcöhua. ¹⁵⁻¹⁶ Pero Deus niechixpejpenque antes de cuöc netlöcatene, hua niechnutzque ipampa oquenejque oniechmacaque tiefavur. Hua oniechniextelejque tieConietzi porque ejqueu oquenejque, para que naja netlanunutzta de yejuatzi intzölö giente tli amo joriojte. Hua cuöc nopa omochi ini nönca, amo nectlajtlanito yeca tlöcatl. ¹⁷ Nimpör amo oneya ompa Jerusalén cöne oyejyeya tlateotitlanme tli cachtö oyejyeya que naja. Cache nima oneya ompa Arabia, hua sötiepa onocuec ca Damasco.

¹⁸ Opanuc yeye xebetl. Sötiepa de inu oneya Jerusalén onequixomateto Cefas, noso Piero, hua onocö ipa ichö quince días. ¹⁹ Amo onequejtac nionöque ocsente tlateotitlantle, sino solamiente nequejtac Jacobo tieicni de toTlöcatzintle. ²⁰ Nemiechasegurörfeateixpa Deus que lo que tli nequejcueltajteca melöhuac ica.

²¹ Sötiepa oneya pa inu estados de Siria hua Cilicia. ²² Pero ayemo niechixomateya tocnihua de inu grupos de creyentes ca Cristo tli cate pa inu estado de Judea. ²³ Solamiente oquecajque de naja que nele: “Inu nieca tlöcatl tli oyeya tiechtepotztocaya hua quenequeya quexexetunis toreligiön, öxö tlanunutza de inu sösantle tli toneltoca”. ²⁴ Hua yejua tiechamöhuaya Deus por nopampa.

2

Inu ocseque tlateotitlanme queselejque Pöblo

¹ Sötiepa de catorce xebetl ocsajpa oneya Jerusalén ca tiehua Bernabé, hua tecbicaque Tito ca tejua. ² Oneya ompa porque Deus oniechejtetejque para ma nebeya. Hua nequemelfe tocnihua de lo que tli naja nequejtoa cuöc netlanunutza de inu cuale tlamachestelestle intzölö tli amo joriojte. Pos niecate tli quepejpeaya cörgo nequenmachte ipa sente locör cöne sa tejua tonunutzaya. Onecchi ini nönca por amo onecnequeya que noche noteque tli onecchijtaya amo mocöhuane de embölde. ³ Hua ni siquiera amo cobligörojque Tito, öque oyeya ca naja, ma monacayuteque, mös que amo joreyo oyeya. ⁴ Melöhuac ica que seque que amo de melöhuac cate tocnihua ocalajque sa ichtacajtzi hua quenejnequeya ma monacayuteque Tito. Ini nöncate ocalajque para tiechestlöcusque ipampa tecate telibres. Yejua quenejnequeya ma tosujetörucö para ma tecneltocacö inu ley de Moisés. ⁵ Pero amo tosujetörojque ca yejua nion sie minuto. Ejqueu tecmalfiöya inu tlamachestelestle tli ica melöhuac, para que nemejua xomocöhuacö nenlibres.

⁶ Hua niecate tli quepejpeaya cörgo (mös naja amo niechempörtöroa tlö quepejpea cörgo canajyeca; Deus amo questloculo según lo que tli tejua tequejta), pos yejua amo niechelfejque que ma necchihua ocseque sösantle de lo que tli ye necchijtaya. ⁷ Cache omomacaque cuenta de que Deus oniechmöctiluc tiecuale tlamachesteles para ma netlanunutza ca tli amo monacayuteque, ejqueu quiename nuyejque oquemöctiluc Piero para ma tlanunutza ca tli monacayuteque, quejtusneque tli joriojte cate. ⁸ Pues mismo öque otequetihuac ca Piero ipa inu tequetl de tlateotitlantle para joriojte, yejuatzí mismo otequetihuac ca naja ipa noteque de nequennunutzas tli amo cate joriojte.

⁹ Por inu Jacobo hua Cefas hua Xohuö, tli tocnihua quenpejpeaya quiename tlötlajtoönejme, yejua momacaque cuenta de que Deus niechpaliebeliloöya ca tiefavur. Hua ca naja hua Bernabé otiechmacaque inmöyecmö para otiechelfejque que oyejyeya de acuerdo que tejua tequennunutzasque tli amo joriojte, hua yejua quennunutzasque joriojte. ¹⁰ Solamiente oquenejque ma tequemelnömequecö tli porubejte cate, para tequenpaliebisque. Hua yaja inu ye necchijtaya ca meyac cueröro.

Pöblo omoponiero ca Piero ipa Antioquía

¹¹ Pero cuöc onya Cefas noso Piero para Antioquía, naja onoponiero ca yaja, ipampa tlajtlacultec oyeya. ¹² Pos ye oquecöjtöya de que ayecmo tlacuöya ca tli amo joriojte. Pues primero otlacuöya ca yejua, pero sötiepa cuöc ohuölajque seque de ipörte Jacobo, cuöc inu oquecöjtöya de que ayecmo tlacuöya ca tli amo joriojte. Pos pinöhuaya de niecate tli quenejnequeya ma monacayutequecö tli amo joriojte. Pues quenmabeliöya de que yejua questlocusque por que tlacuöya ca tli amo joriojte. ¹³ Hua nuyejque ocseque tocnihua joriojte ompa Antioquía nuyejque ejqueu omocuejque de ume inxöyac quiename yaja. Hasta Bernabé nuyejque omocö oqueyulcuejque para que nuyejque oquecö de ayecmo tlacuöya ca tli amo joriojte. ¹⁴ Pero naja onequejtac que amo quechihuaya de acuerdo ca inu cuale tlamachestelestle que melöhuac ica. Entunses onequelfe Cefas imixtla innoctie: “Taja teca tejoreyo, pero amo teneme quiename tejoreyo, tlöcamo quiename niecate tli amo joriojte. Entunses ¿quiene tequemobligöroa tli amo cate joriojte ma mocuepacö joriojte?

Joriojte iguöl ca tli amo joriojte momöquextea por moneltoca

¹⁵ Tejua desde ipa otetlöcatque tecate tejoriojte, hua amo tecate de niecate tli amojoriojte, tli seme tlajtlacoa incuntra de inu ley de Moisés. ¹⁶ Pero nuyejque tecmajmate que amo tiechselilo Deus quiename teyecteque por lo que tli cuale tecchihua tli tiechelfea inu ley de Moisés. Cache tiechselilo por que toneltoca tieca Jesucristo. Ejqueu tejua nuyejque toneltocaque tieca Cristo Jesús para que por toneltoqueles tieca Cristo Deus tiechselisque quiename teyecteque, hua amo porque tecchijque lo que tli quejtoa inu ley”. Porque nionöque Deus amo queselisque ipampa oquechi lo que tli quejtoa inu ley. ¹⁷ Pero tlö tejua, porque tecnejneque ma tiechselicö Deus por Cristo, tlö por inu noso tetlajtlacoa cuntra inu ley de Moisés, ¿beles quejtusneque que Cristo tiechchihualtilo ma tetlajtlacucö? De ninguna manera, porque ini nönca ayecmo ica tlajtlacule para tejua porque ye otejçojque inu ley. ¹⁸ Pero tlö ocsajpa nectlölis inu ley para ocsajpa nectocas, neyes quiename sente tlöcatl tli queyectlölea lo que tli ye oquexexetu, hua resultörebes que neyes netlajtlacultec.

¹⁹ Pos icaca quiename ye onemec para ca inu ley, pos ayecmo tli necpea nequejtas ca inu ley. Hua inu mismo ley quiename oniechchihualte ma nemeque para ca yaja, pues niechmacheste que abele nejcumplirus lo que tli niechmandöroöya. De maneras que neca quiename sente mejque para ca inu ley, para que ejqueu nenentas para ca Deus. ²⁰ Icaca quiename tlö onemec tieca Cristo ipan coruscubetl, hua öxö ayecmo neneme naja tlöcamo nemoa Cristo pa noyulo. Hua nonemeles tli öxö neneme, neneme por medio de noneltoqueles tieca tieConietzi Deus, öque niechtlasojtlaluc hua nemöctiluc para que omecoac por nopampa. ²¹ Amo nejcaltechus sie löro tiefavur Deus. Pos tlö nequejtus que Deus cuale queselisque yeca quiename yectec ipampa queneltoca inu ley, pos quejtusneque que Cristo omecoac de embölde.

3

¿Tasesque itech inu ley noso itech neltoquelestle?

¹ ¡Ay, nocnihua de Galacia, lalebes nentuntojte nencate! ¿Öquenu nemiechtajchibe? Pos tejua cuale tetlanunutzque ca nemejua de Cristo hua de quiene tiecoruspelojque. ¿Tlica noso nenquecöhuasque inu mensöje? ² Solamente necneque ma xeniechnönquelicö ini nönca pregunta: ¿Onenqueselejque tieEspíritu Deus por nenqueneltocaque inu ley, o noso amo cache nenqueselejque por nenquecajque inu cuale tlamachestelestle hua nemoneltocaque? ³ ¿Tlica noso nencate lalebes nentuntojte? ¿Quie beles nenquepensöroa nenquesencöhuasque ca nemotlachihual de nemejua mismo inu nemelestle tli nenquepiehualtejque por tiechecöhuales Espíritu Sönto? ⁴ ¿Quie beles inu meyac söstantle tli onenquesufrirojque uya de embölde? ¡Ojalá majcamo sa iye de embölde! ⁵ Yejuatzi öque nemiechmacalo tieEspíritu hua quechihualo tietzöbetl nemotzölö, ¿tlica quechihualo noso? ¿Beles quechihualo porque nenquechihua tli quejtoa ley? Amo, cache quechihualo ipampa onenquecajque cuale tlamachestelestle hua nemonelto-
caque.

⁶ Ejqueu omochi ca Abraham: “Omoneltocac tieca Deus, hua Deus oquepubelejque ineltoqueles quiename yectelestle”. ⁷ Xecmatecö noso que tli monejneltoaca, yejuanu Deus quenpoalo quiename ipelhua Abraham.

⁸ Pues Deus quemajtaloöya antes que pasörebesquiöne que yejuatzi quenselilusquiöne giente de noche naciones quiename yecteque por inneltoqueles. Por inu, teotlajtule otlanunutz de inu cuale tlamachestelestle ca Abraham antes de que pasörebesquea. Pos oquelfejque: “Innochtie naciones nequenteochihuas por medio de taja”. ⁹ Ejqueu noso innochtie tli moneltoca Deus quenteochihualo ca tiehua Abraham öque nuyejque omoneltocac.

¹⁰ Pero quiejquechte quenejneque momöquextisque por quechihuasque lo que tli quejtoa inu ley de Moisés, yejuanu cate maldecidos. Pos tlajcuelulpanca: “Maldecido

iyes cara sesen tlöcatl tlö amo seme quecumplirojtas noche sösantle tli tlajcuelulpanca pa ini nönca ömatl de ley; maldecidos yesque tlö amo quechihuasque noche tli quejtoa nönca ley". ¹¹ Cuale tequejtasque que abele öque iyec yectec tieixpa Deus por queneltocas inu ley, pues tlajcuelulpanca: "Öque iyec yectec, por ineltoqueles nemes". ¹² Pero inu ley amo tli quepea quejtas ca öque ineltoqueles, cache tlajcuelulpanca ejqueyi: "Öque quechihua noche tli quelfea ley, nemes por inu tlachihualestle". ¹³ Cristo quetlaxtlöjque para otiechquextejque de inu maldición de inu Ley, pos yejuatzi onechihualuc maldecido por topampa. Pues tlajcuelulpanca: "Maldecido iyec öque quetömpelusque ipa sente cuabetl". ¹⁴ Noche ini nönca omochi para que inu bendeseyu tli Deus oquemacaque Abraham nuyejque ma queselicö giente de noche naciones por medio de Jesucristo. Ejqueu tecselisque por medio de toneltoqueles tieEspíritu tli Deus otieprometierojque.

¿Tasesque itech inu ley noso itech tiepromiesa Deus?

¹⁵ Nocnihua, nemiechtlölelis sente ejjemplo de tonemeles. Paques yeca quechihua sente acuerdo, noso sente testamento, hua cuöc yeca, entunses caseguröroa ca ifirma. Entunses abele yeca quejtus que amo balierebe, hua abele yeca caxiltis ocseque sösantle. Ejqueu icaca mösque icaca sente acuerdo de tlöca hua amo de Deus. ¹⁶ Bueno, pues, Deus oquemacaque promesas ca Abraham hua ca idescendencia. Hua amo quejtoa: "idescendencias", quiename tlö Deus quejtuloöne de meyactie, cache quejtoa: "idescendencia". Quejtusneque que inu promesas cate para sa sente persona, que yejuatzi Cristo. ¹⁷ Nequejtusneque ini nönca; que Deus oquechijque sente acuerdo ca Abraham hua casegurörojque. Inu ley de Moisés, que amo onhuöla hasta sötiepa de cuatro cientos treinta años, abele quejtus que amo balierebe tiepromiesa Deus. ¹⁸ Hua tlö ipelhua Abraham mohuöxcatisquiöne de lo que tli Deus oquemacaque Abraham por quechihuasquiöne lo que tli quejtoa inu ley, entunses amo uyesquiöne por medio de promesa. Pero Deus oquemacaque inu sösantle ca Abraham por medio de promesa.

¹⁹ Bueno pues, ¿tlica oquemacaque Deus inu ley? Oquemacaque para ma tomacacö cuenta de totlajtlacul. Pero solamente uyesquea hasta cuöc hualiloasquea inu idescendiente Abraham, öque Deus otieyacuc promesa. Inu ley omotiemacac por öngeles, hua Moisés onsevire de representönte para oquenmacheeste inu ley. ²⁰ Pero amo monesesitöroa sente representönte cuöc motratöroa sa de sie persona, pero Deus sa sietzi iloac.

¿Tli para serbirebe inu ley?

²¹ Bueno pues, ¿beles quejtusneque que inu ley de Moisés icaca encuentra de tiepromesas de Deus? Pues amo. Porque tlö uyesquiöne sente ley tli quale quetiemacone nemelestle, entunses quale tecpeasquiöne yectelestle por inu ley. Pero amo ejqueu icaca. ²² Cache teotlajtule tiechmacheeste que tecate tonochtie tetlajtlaculque, para que de inu manera tejua tli toneltoca tecselisque lo que tli Deus oqueprometierojque, por toneltoqueles tieca Cristo Jesús.

²³ Pero antes que asesquea inu tiempo cuöc ma toneltocacö, inu ley tiechpeaya quiename tepriesoste, hua tiechtzajtactaya mientras tecchixtaya inu tiempo cuöc toneltocasquea. ²⁴ De maneras que inu ley oyeya quiename sente pelmöma tli quixutea peltzintle. Tiechixutiöya hua sötiepa otiechbicac tieca Cristo para que toneltocasquea tieca yejuatzi hua ejqueu Deus tiechselilusquea quiename teyecteque. ²⁵ Pero öxö que ye toneltoca, ayecmo tiechixutea inu pelmöma, que yaja inu ley de Moisés.

²⁶ Porque nemonochtie nencate nentiepelhua de Deus ipampa nemoneltoca tieca Cristo Jesús. ²⁷ Pos noche nemejua tli nemocuötiequejque para nenyisque tieca Cristo, icaca quiename tlö nemotlaquentiöne ca sasié nemotlaquie. Hua inu nemotlaquie iloac Cristo. ²⁸ De maneras que amo importörebe cox öque icaca joreyo noso cox amo joreyo; amo importörebe cox öque icaca esclavo noso cox icaca libre; amo importörebe cox öque

icaca tlöcatl noso cox sohuatl, porque nemonochtie nencate quiename sa sie tlöcatl ipampa nencate tieca Cristo Jesús. ²⁹ Hua siendo que nencate tieca Cristo, nencate nenipelhua Abraham, hua nemohuöxcatisque quiename Deus oqueprometierojque.

4

¹ Bieno, xomomacacö cuienta de que öque mohuöxcatis de lo que tli quepea itajtzi, mientras ica oc pelalactle icaca iguöl quiename sente esclavo de itajtzi, mösque sötiepa iyes itieco de noche tli quepea itajtzi. ² Ocseque quixutea hua moencargöroa de quixutisque de noche inu asuntos de ichö. Ejqueu quixutea hasta inu tunale tli oqueseñalörfe itajtzi. ³ Ejqueu nuyejque tejua, cuöc teyejyeya quiename tepelantzeti, tosujetöroöya ca inu *mandamientos de tlöltecpactlöca tli cachtö tecpejpeaya. ⁴ Pero cuöc oaseco tiempo, Deus tiehualtitlanuc tieConietzi. Yejuatzi tieConietzi otlöcatihuac de itech sente sohuatl, hua otlöcatihuac de joreyo hua nesujetöruruc ca inu ley de Moisés. ⁵ De inu manera oquetlaxtlöjque topatie para otiechlibrörojque de inu ley, pos cachtö tosujetöroöya ca inu ley. Hua ejqueu Deus otiechselejque quieme tetiepelhua. ⁶ Hua ipampa tecate tetiepelhua, Deus tiehualtitlanuc tieEspíritu de tieConietzi para ma iloa ipa toyulo. Hua yejuatzi Espíritu tzajtzihua tojtecopa, hua quejtulo: “*Abba, noTajtzi”. ⁷ Entunses quejtusneque que ayecmo teesclavos tecate; öxö tecate tetiepelhua de Deus. Hua ipampa tecate tetiepelhua, Deus tiechchihualtilo ma tohuöxcaticö de lo que tli tiehuöxca.

Pöblo motequepachoöya por inu creyentes

⁸ Oyeya, cuöc ayemo nentieixomateya Deus, nenyeyyeya nenesclavos de niecate tli gente quencuitea deuste, mös de melöhuac amo deuste cate. ⁹ Pero öxö ye nentieixomate Deus. Noso beles cache cuale tequejtusque que Deus ye nemiechixomati-hua hua nemiechreconosieruro. Tlöjcu, ¿tlíca nenqueneque nemocuepasque ipa inu *mandamientos tli amo quepea checöhuallestle nimpör ricojyutl para nemiechpaliebis? Pos ejqueu nemochihua ocsajpa nenesclavos. ¹⁰ Nemejua nenqueneltoca mandamientos tli nemiechelfea de tli amo nenquechihuasque pa sente tunale, por ejemplo ipan tunale de yancuec mietztle noso yancuec xebetl noso ocsente tunale. ¹¹ Necmabelea que noteque entre nemejua cuale iyes de embölda.

¹² Nocnihua, nemiechtlötlajtea, xomocuepacö quiename naja, pues naja ye onocuec quiename nemejua. Pues amo icaca que canajyetla nenniechchibeliöne. ¹³ Pues nenquelnömequesque que cuöc primero onemiechnunutz de inu cuale tlamachestelestle, oneyeya ca nemejua ipampa nococoöya. ¹⁴ Hua inu cocolestle de nocuierpo, que cuale uyesquiöne sente prueba para nemejua, amo nenquedespresiörojque, nimpör amo nenniechtlajyelejaque. Cache onenniechselejque quiename tlö neyene sente öngel de Deus, quiename tlö neyene bel yejuatzi Cristo Jesús. ¹⁵ Bieno pues, ¿cönenca inu pöquelestle tli cuöc inu nenquemachelejque? Pues naja cuale netlatestificörus de nemejua, que tlö nenbejbeletesquiöne, nemejua nemixcopinasquiöne nemoixtelololja para nenniechmacasque. ¹⁶ Hua öxö, ¿beles nenniechpea quiename nemocontrörio de nemejua ipampa nemiechelfea lo que tli melöhuac?

¹⁷ Niecate gente moportöroa quiename nemiechneque lalebes, pero amo quenejneque nemiechchibelsique tlin cuale. Cache quenejneque nemiechxelusque *de tejua

* **4:3** Cuale nuyejque motradusirus: “espíritus de tlöltecpactle tli cachtö tequenneltocaya”. Xomojtelicö v. 9, hua Col. 2.8, 20. * **4:6** “Abba” ica sente tlajtule Aramaico. Quejtusneque “Tata” noso “noTöta”. Xomojtelicö Mr. 14.36 hua Ro. 8.15. * **4:9** Cuale nuyejque motradusirus: “espíritus”. * **4:17** Cuale nuyejque motradusirus: “de Cristo”, noso “de inu cuale tlamachestelestle”.

para que sötiepa nemejua nenquennequesque yejua. ¹⁸ Ica cuale *yeca ma nemiechneque para ma nemiechchibele tlin cuale, hua icaca cuale ma nemiechnecta seme. Pos naja nemiechneque seme, hua amo solamiente cuöc neca ca nemejua. ¹⁹ ¡Ay, Ixojte! Necsufriroa lalebes por nemopampa, quiename quesufriroa sente sohuatl para quetlöcatelis iconie. Hua necsufrirojtas hasta que de melöhuac Cristo cuale niexihuas itech nemonemeles. ²⁰ Necnequesquiöne öxö mismo neyes ca nemejua, para nemiechnunutzas *de ocsie maniera, pues amo necmate tli necpensörus de nemejua.

Ejemplo de Agar hua Sara

²¹ Nemejua tli nenqueneque nemosujetörusque ca inu ley de Moisés, xeniechelficö ini nönca: ¿amo nenquecaque lo que tli nemiechelfea inu ley? ²² Pues tlajcuelulpanca que Abraham oquepex unte ipelhua. Sente de yejua oyeya iconie de icriada tli oyeya esclava. Hua ocsente oyeya iconie de isohua, tli amo oyeya esclava. ²³ Pero inu iconie de icriada otlöcat ejqueu quiename tlajtlöcate innochie pelantzetzí. Pero iconie de isohua tli amo oyeya esclava, yaja otlöcat por tiepromiesa de Deus. ²⁴ Nöncate söstantle cate quiename sente ejemplo. Inu sohuame querepresentöroa unte acuerdos de Deus ca tlöca. Sente acuerdo Deus oquemacaque ipa inu tepietl itucö Sinaí, hua querepresentöroa yaja Agar icriada de Abraham. Tli cate de inu acuerdo tlajtlöcate para yesque esclavos. ²⁵ Pos Agar querepresentöroa inu tepietl de Sinaí, tli icaca ompa Arabia. Hua ica quiename inu Jerusalén tli öxö icaca, ipampa inu ciudad icaca esclava ca noche giente tli quepertenesieroa. ²⁶ Pero inu Jerusalén de elfecac icaca libre, hua amo ica esclava. Hua tejua tecpertenesieroa de inu ciudad. ²⁷ Pues tlajcuelulpanca:

Xepajpöque taja sohuatl machura que ayec tecpea mopelhua, xetzajtze de pöquelestle taja tli amo tequixomate inu tiecoco de cuöc öque ye quetlöcatelis peltzintle.

Pos taja, sohuatl tli mosiel teca, cache meyactie mopelhua tequenpeas que ipelhua de yaja tli öxö quepea inömec.

²⁸ Nocnihua, tejua tecate quiename Isaac; tecate teipelhua tli Deus queprometierojque. ²⁹ Pero ejqueu quiename pa nieca tiempo, ejqueu nuyejque pasörebe öxö. Pues inu pelactle tli otlöcat quieme tlajtlöcate innochie pelantzetzí, yaja quetepotztocaya inu peltzintle tli otlöcat por tietlanequeles Espíritu. Hua ejqueu nuyejque pasörejteca öxö. ³⁰ Pero ¿tli quejtoa teotlajtule? “Xejquexticö ca queyöhuac inu criada ca tiehua iconie. Pues iconie de inu criada amo mohuöxcatis niontle de lo que tli quetocöroa iconie de sohuatl tli amo ica esclava”. ³¹ Bieno, nocnihua, amo tecate teipelhua de inu criada, pues amo tecate teesclavos. Cache tecate de inu sohuatl tli libre ica, hua amo ica esclava.

5

¹ Cristo tiechlibrörojque para ma teyecö telibres. Xecsequirucö noso ca inu libertad, hua amo xomosujetörucö para ocsajpa nenyeseque nenesclavos.

“Tlö nemonacayutequesque, Cristo amo tli nemiechserbirurus de niontle”

² Xejcaquecö tli nemiechelfis. Naja nePöblo nemiechelfea que tlö nemonacayutequesque, Cristo amo tli nemiechserbirurus de niontle. ³ Ocsajpa nequejtus ini nönca: que tlö canajyeca monacayuteque, moobligöroa para quechihuas noche lo que tli quelfea inu ley de Moisés. ⁴ Nemejua tli nenquenejneque ma nemiechselicö Deus quiename nenyecteque ipampa nenqueneltoca inu ley, ye nemoxelöjque de Cristo, ye nemoxelöjque de tiefavur de Deus. ⁵ Pero tejua por medio de tieEspíritu de Deus hua por toneltoqueles tecpejpea inu nemöchealestle hua confionsa de que Deus tiechselisque quiename teyecteque. ⁶ Porque tieca Cristo Jesús amo tli balierebe öque monacayuteque

* **4:18** Cuale nuyejque motradusirus: “ma xeniechnequecö ipa söstantle tlin cuale, hua ica cuale ma xeniechnequecö seme, hua amo solamiente...” * **4:20** Cuale nuyejque motradusirus: “ca belaja notlajtul”.

noso öque amo monacayuteque. Lo que tli balierebe yaja toneltoqueles, tli tiechchihualtea ma tenemecö ca tlasojtelestle.

⁷ Nemejua cuale nennejnentöya ipa inu ojtle tli ica melöhuac. ¿Öquenu noso nemiechtzacuele para que ayecmo nenquetocatecate inu ojtle? ⁸ Inu söstantle amo yebitz de Deus, pues yejuatzi nemiechnutzalo para ma xectocacö inu ojtle. ⁹ Amo xequelcöhuacö que sa tepetzi de levadura de pöntzi cuale quemöhua noche textle. ¹⁰ Naja necpea confönsa nemotech tiepampa Tlöcatzintle, de que amo nenquepensörusque ocsente söstantle de lo que tli naja necpensöroa. Pero öquenu nemiechtlapolultea, yaja quetlaxtlöhuas por itlajtlacul, amo importörebe öquenu beletes.

¹¹ Pero naja, nocnihua, tlö naja oc turavea netlanunutzane de que ma monacayutequecö giente, entunses joriojte amo niechtepotztocane. Pos entunses amo tli uyesquiöne tli quencualöntisquea cuöc netlanunutzane de tiecorujtzi de Cristo. ¹² Pero niecate tli nemiechpasolojteneme para ma xomonacayutequecö, ¡ojalá ma motejtequelicö por completo yejua mismos!

¹³ Pues Deus onemiechnutzque para ma xeyecö nenlibres. Pero amo xecusörucö inu libertad sa quiename pretexto para nenquechihuasque lo que tli queneque nemonacayo. Cache cuale xomopajpaliebicö sente ca ocsente ca tlasojtelestle. ¹⁴ Pos noche inu ley mocumpliroa ca sa sie tlajtule, cuöc quejtoa: “Xectlasojtla motlöcaicni quiename taja mismo tomtlasojtla”. ¹⁵ Pero tlö amo nemotlasojtlasque tlöcamo nemo magatasque hua nemoquejquetzontasque hua nemocuösque, xecpeacö cueröro amo cana de repiente nemosencöhuasque.

Lo que tli queneque tonacayo hua lo que tli quenequihua tieEspíritu Deus

¹⁶ Pero nemiechelfis ini nönca: Xenentacö tieca tieEspíritu de Deus, hua ejqueu ayecmo nenquechihuasque lo que tli queneque nemonacayo. ¹⁷ Pues lo que tli queneque tonacayo ica encuntra de lo que tli quenequihua tieEspíritu de Deus. Hua lo que tli quenequihua tieEspíritu de Deus icaca encuntra de lo que tli queneque tonacayo. De inu manera tonacayo hua tieEspíritu Deus moponierojtecate, hua por inu nemejua abele nenquechihua lo que tli nenquenejneque. ¹⁸ Pero tlö iloac yejuatzi Espíritu öque nemiechyecönalo, entunses abele nemiechmandörus inu ley.

¹⁹ Bieno pues, cuale niese itlachihual de tonacayo. Pues tli quenejneltoaca innacayo yejua mopajpöctea ca ocseque sohuame tli amo cate insojsohuöhuö. Quechihua söstantle de petzoyutl. Modedicöroa sa para mopajpöctisque ipa bisio hua tlajtlacule. ²⁰ Quenteochihua ixniehualojme. Tietlajtlachibea. Momaga. Chajchöhuate. Sa cuajcualöne. Sa quetiemoa tli inhuöxca. Moxeloa hua quetlölea apörte ingrupa. ²¹ Moxejxicoa. Tlajtlöhuöna. Quecualajta chöchalönesque pa elfeme. Noche ini nönca söstantle hua söstantle quiename nöncate quechihua niecate tli queneltoca innacayo. Ye nemiechantesipörojteca que niecate tli quechihua nöncate söstantle abele mohuöxcatisque cöne Deus tlamandöruro.

²² Pero cuöc mochihua ipa tonemeles inu fruto tli yebitz de tieEspíritu de Deus, entunses tecpejpea tlasojtelestle, hua pöquelestle, hua neyulsiebestle. Tecxicoa noche söstantle, hua tecualtientlöca tecate. Tecchihua tlin cuale ca ocseque, hua tecate de confönsa. ²³ Toportöroa cuale hua amo tecuajcualöne, hua todominöroa cuale. Amo onca ley tli tiehcuntenörus tlö tecchihuasque nöncate söstantle. ²⁴ Hua tonochtie tli tecate tetiehuöxcahua Cristo Jesús, icaca quiename tlö ye tejcoruspelojque tonacayo ca tiehua itlanequeles hua itlaeliebes. ²⁵ Entunses tlö tecpea nemelestle por tieEspíritu Deus, ma tenemecö quiename yejuatzi Espíritu quenequihua.

²⁶ Majcamo tectiemucö inu chamöhuallestle tli amo balierebe. Ejqueu amo topiepiehualtisque sente ca ocsente, nimpör amo toxicusque entre tejua.

6

Ma topaliebicö entre tejua

¹ Nocnihua, tlö canajyeca betzes ipa tlajtlacule, nemejua tli nentietocatecate cuale tieEspíritu de Deus xecpaliebicö para ma majcoque. Pero amo xecchihuacö ca cualönelestle, hua xecpeacö cueröro de nemejua mismo, amo cana de repiente nemejua nuyejque nemiechyulmajmötocas Amo Cuale. ² Xomopaliebicö sente ca ocsente para cuale nenquexicusque nemotlamömal, hua ejqueu nenquecumplirusque tieley de Cristo.

³ Tlö canajyeca momachelea que yaja ica bieye tlöcatl, mös melöhuac amo tli ica, sa mocajcayöjteca yaja mismo. ⁴ Cara sente de nemejua ma questloco itlachihual yaja mismo, hua entunses tlö quejta que cuale iya, momachelis cuale porque mostlocoa que yaja mismo quechihua cuale, hua amo porque sa quejta que ocsente quechihua amo cuale. ⁵ Porque cara tlöcatl quetocöroa quebicas icörga yaja mismo.

⁶ Pero öque queselea machelestle de tietlajtultzi Deus, yaja ma quepanulte de noche söstantle tlin cuale ca öque quemachtea.

⁷ Amo xomocajcayöhuacö, pos abele öque majöbeltis tieca Deus. Pos noche lo que tli quetuca tlöcatl, de inu mismo tlatuctle quecosechörus. ⁸ Tlö sente tlöcatl quetuca lo que tli queneque inacayo, de inu tlatuctle quecosechörus mequelestle hua palönelestle. Pero tlö quetuca lo que tli quenequihua tieEspíritu Deus, de inu tlatuctle quecosechörus nemelestle nochepa. ⁹ Entunses majcayec teseyabecö de tecchihuasque tlin cuale, porque cuöc ases tiempo tejcosechörusque, tlö amo todesmayörusque hua amo tejcöhuasque de tetequejtasque. ¹⁰ Por inu, cuöc onca locör, innochtie giente ma tequenchibelicö tlin cuale, hua cache ca meyac arrasu tli cate tocnihua de toneltoqueles.

Tlanahuatelestle hua tlajpalulestle

¹¹ Xequajtacö ca tli lietras bejbeye nemiechejcuelfejteca ca belaja nomö. ¹² Niecate tli quenejneque cuale niesesque de innacayo, yejua quenejneque nemiechobligörusque ma xomonacayutequecö. Solamente quechihua inu porque amo quenejneque ma quentepotztocacö ocseque. Pues inu ocseque quentepotztocasquiöne tlö tlajtlanunutzasquiöne de que öque cuale momöquextis ipampa Cristo omecoac ipan coruscuabetl. ¹³ Pos niecate tli monacayuteque, nion yejua mismos amo quechihua tli quemelfea inu ley de Moisés. Sa quenejneque ma xomonacayutequecö para mochamöhuasque de nemejua. ¹⁴ Pero naja majcayec nochamöhua de niontle tlöcamo sa de que Cristo omecoac ipan corujtzi. Pues por inu tiemequeles ipan corujtzi, icaca para naja quiename tlö ye omec nönca tlöltecpactle ipan corujtzi. Hua nuyejque icaca quiename tlö naja ye onemec para ca tlöltecpactle. ¹⁵ Pero amo importörebe öque monacayuteque, noso amo monacayuteque. Lo que tli importörebe ica que Deus tiechchihualtilo ma teyecö tegiente teyancueque. ¹⁶ Ma quepeacö yulsiebelestle hua impa ma iye tietlöocolteles Deus innochtie tli neme san quiene quejtoa nönca tlajtule, quejtusneque, innochtie tli de melöhuac cajcate de inu puieblo que ica de Deus.

¹⁷ Desde öxö, majcamo yeca niechestorböro. Pues necpea nocuierpo chipetlactec por lo que tli onecsufriro, hua inu quemoströroa que de melöhuac neca netietlatequepano Jesús.

¹⁸ Tiefavur de toTlöcatzintle Jesucristo ma iye ipa nemoyulo, nocnihua. Amén. Ma ejqueu iye.

Sente cörta tli San Pöblo oquemejcuelfe EFESIOS

¹ Naja nePöblo, que neca netlateotitlantle de Cristo Jesús, pues ejqueu quenequihuaya Deus. Nemiehejcuelfea ini nönca cörta para nemejua tli nenyecteque, tli necate *ipa Efeso, tli nemoneltoca tieca Cristo Jesús. ² Deus toTajtzi hua Tlöcatzintle Jesucristo ma nemiechmomeyaquelicö tieinfavur hua neyulsiebelestle.

Deus tiechbendeseyumacaque ca noche bendeseyu por medio de Cristo

³ Ma tetieteochihuacö yejuatzi öque iloac tieDeus hua tieTajtzi de toTlöcatzintle Jesucristo. Pos yejuatzi tiechbendeseyumacaque por medio de Cristo ca noche bendeseyu tli de elfecac, tli tiechmacalo yejuatzi Espíritu Sönto. ⁴ Cacho de cuöc oquetlölejque tlöltecpactle hua elfecac, yejuatzi otiechixpejpenque por medio de Cristo. Quenequihuaya ma teyecö teyecteque tieixpa, sin niontle tli amo cuale, hua ma tecpeacö meyac tlasojtelestle. ⁵ Desde inu tiempo ye otiechtzontejque para tiechselilusquea para ma teyecö tetiepelhua de yejuatzi por medio de Jesucristo. Pues ejqueu quecualajtaque hua oquenejque. ⁶ Por inu Deus seme quepealo yectieniebelestle ipampa tiechmacaque tiebieye favur por medio de tieConietzi öque tietlasojtlalo. ⁷ Tieca tieConietzi tecpejpea nemöquextelestle ipampa oquenuquejque tieyesojtzi cuöc omecoac. Nuyejque tieca yejuatzi tecpejpea tlapojpolfelestle de totlajtlacul, pues lalebes bieye tiefavur otiechmacaque. ⁸ Hua por tiemeyac favur tiechmacaque noche machelestle hua yecnenebelestle. ⁹ Pues otiechmachejque inu secrieto de tlininu yaja tietlanequeles. Pos ejqueu quecualajtaque, hua ejqueu quedesedirojque para quechihualusquea por medio de Cristo. ¹⁰ Pos ejqueu queplaneörojque Deus, que cuöc ases itiempe yejuatzi quensietelisque noche söstantle tieca Cristo, noche tli onca ompa elfecac hua nuyejque tli onca pan tlöltecpactle. Ejqueu Cristo tlamandörusque ipa innochie.

¹¹ Deus quechihualtilo noche söstantle ma mochihua san quiene yejuatzi queyecnenebelejque hua oquenejque. Hua yejuatzi oquedesedirojque otiechtzontejque para ma *teyecö tetiehuöxcagua. ¹² Hua ejqueu oquechijque para que por tejuatzi cachto tecpeaya nemöchealestle tieca Cristo, por tejuatzi ma quepeacö yejuatzi yectieniebelestle ipampa tiechmacaque inu tiebieye favur. ¹³ Hua nemejua nuyejque, cuöc nenquecaque inu mensöje tli ica melöhuac, tli yaja cuale tlamachelestle de quiene cuale nemomöquextisque, cuöc nenquecajque hua nemoneltocaque tieca Cristo, Deus nemiechseyörojque ca tieEspíritu ipampa nencate tieca Cristo. Inu Espíritu yejuatzi tiechmacaque quiename tiechprometierfejque. ¹⁴ Hua yejuatzi Espíritu iloac sieñas de que tejuatzi tohuöxcaticque de lo que tli Deus tiechmacasque. *Pos yejuatzi quenmöquextisque tli tiehuöxcagua, para ma tetiechamöhuacö hua ma tetieyectieniehuacö.

Deus ma nemiechmacacö machelestle

¹⁵ Por inu, desde cuöc onejac de quiene nemoneltoca tieca toTlöcatzintle Jesús hua quiene nenquentlasojtla noche tli yecteque, naja por nopörte ¹⁶ amo nosiebea de netietlasojcömatelea Deus por nemejua. Seme nemiechelnömeteneme ipa notlölajteles. ¹⁷ Netietlajtlanelea yejuatzi öque iloac Deus de toTlöcatzintle Jesucristo, hua iloac Tajtle tli quepealo tlanixtelestle, ma nemiechmacacö *machelestle ipa nemoyulo hua ma nemiechmachejque de lo que tli iyyönteca para cache cuale nentieixomatesque. ¹⁸ Ma

* **1:1** Seque manuscritos de tli cachto omojcuelojque amo quepea inu tlajtulme: “ipa Efeso”. * **1:11** Cuale nuyejque motradusirus: “tohuöxcaticö de lo que tli tiechmacasque”. * **1:14** Cuale nuyejque motradusirus: “hasta cuöc quemöquextisque noche tli tohuöxcaticque”. * **1:17** Cuale nuyejque motradusirus: “tieEspíritu öque nemiechmacasque machelestle hua nemiechmachejque”.

quetlapucö nemoyulo para cuale nencasojcömatesque cuale tlin inu yaja nemöchealestle tli tecpejpea ipampa otiechnutzque. Ma xecasojcömatedcö tli inu yaja sösantle bieye lalebes hua rico lalebes tli *yejuatzi nehuöxcatiluc cuöc tiechselejque tonochtie tli ye teyecteque. ¹⁹ Nuyejque ma xecasojcömatedcö cuale tlin inu yaja tielalebes bieye checöhuales ica tli tiechpaliebilu tejuua tli toneltoca. Pues tiechpaliebilu ca inu checöhualestle hua beletelestle lalebes bejbeye hua checateque ²⁰ inca tli nuyejque otieyulebitiluc Cristo de intzölö mimejque, hua tielöliluc ca tiemöyecmö ompa elfecac. ²¹ Otiemacuc lalebes meyac checöhualestle ipa noche cubiernos hua tlajtoönejme hua checöhualesme hua tlajtojcöyume, hua ipa innochtie tli motieniehua, amo solamiente ipa ini nönca tiempo tlöcamo nuyejque ipa inu tiempo tli yebitz. ²² Hua quesujetörojque noche sösantle itzintla tieicxehua Cristo. Hua Deus tiechmacaque Cristo para tejuua tli tecreyentes, para ma iloa quiename itzontecö cuiervo, pues tlamandöruro ipa noche sösantle. ²³ Hua tejuua tecate quiename tetiecuervo, hua tetieaxiltea yejuatzi öque caxiltilo noche sösantle ca nobeyo.

2

Por tiefavur Deus tomöquextejque

¹ Hua oyeya nemejuua nuyejque nenyeyjyeya quiename nenmimejque ipampa nentlajtlacojtaya hua nenquechihuaya tlin amo cuale. ² Nennemeya ipa inu tlajtlacule, quiename nejneme giente de nönca tlöltecpactle. Pos ejqueu quenequeya inu espíritu amo cuale tli tlamandöroa ipa yejyecatl, hua quemanimöroa niecate tli amo tlajtlaneltoca. ³ Hua oyeya tonochtie tejuua nuyejque tenemeya quiename yejuua. Tecneltocaya lo que tli queliebiöya tonacayo. Tecchihuaya lo que tli quenequeya tonacayo hua topensamientos amo cuale. De porsí tecmeresieroöya tiecualöneles Deus ma topa betze, quiename quemeresieroa ocseque. ⁴ Pero Deus lalebes bieye tielöocolteles quepealo, hua tiechtla-sojtlaque lalebes. ⁵ Hua por inu tiechyulebitejque tieca Cristo, pos teyeyjyeya quiename temimejque ipampa totlajtlacul. Pues por tiefavur tomöquextejque. ⁶ Hua tiechajcojque tieca Cristo Jesús, hua otiechtlölejque ompa elfecac tieca Cristo. ⁷ Ejqueu oquechijque para que ejqueu ipa inu tiempos tli bitze cuale quedemoströrusque tielalebes bieye hua rico favur tli otiechchibelejque ca selec tlasojtelestle por Cristo Jesús. ⁸ Pues por tiefavur nemomöquextejque por medio de nemoneltoqueles. Hua ini nönca amo yebitz de nemejuua, cache ica tielöocoleles Deus. ⁹ Amo yebitz por que tejuua tecchihua canajyetla tlin cuale. Ejqueu noso abele öque mochamöhuas. ¹⁰ Pues tetietlachihual Deus tecate. Yejuatzi tiechchejchijque por Cristo Jesús para ma tecchihuacö sösantle tlin cuale, tli Deus ye oquepreparörojque para ma tecchijtacö.

Tecpea siebelestle por Cristo

¹¹ Por inu, xequelnömequecö de quiene nenyeyjyeya nemejuua tli amo nencate nenjoriojte. Pues joriojte monacayuteque yejuua mismo de incuervo, hua por inu mocuejcuitea Nacayutlatecme, hua nemiechcuitea nemejuua Amo Nacayutlatecme. ¹² Xequelnömequecö de que pa nieca tiempo nenyeyjyeya bejca de Cristo, hua nenyeyjyeya nenestranjeros de inu nación de Israel, hua amo nenquepeaya pörte ca inu acuiertos tli Deus quenprometierfejque ca yejuua. Amo nenquepeaya nemöchealestle, nimpör amo nenquepeaya deus ipan tlöltecpactle. ¹³ Pero öxö tieca Cristo Jesús, nemejuua tli pa nieca tiempo bejca nenyeyjyeya, öxö ye nemopachojque por medio de tiemequeles de Cristo, hua ejqueu nenquepea pörte inca joriojte.

¹⁴ Pues Cristo iloac toyecsiebeles. Pues amo oyeya acuierto entre tejuua tli tejoriojte hua nemejuua tli amo nenjoriojte. Oyeya quiename tlö oyene sente tepöntle tli tiechnen-cuajteliöya. Pero Cristo ye quemöyajque tepöntle, hua ejqueu tiechsietelejque. ¹⁵ Pues

* **1:18** Cuale nuyejque motradusirus: “tohuöxcatisque tejuua tli teyecteque”.

por medio de tiemequeles de tiecuerpo oquexetunque inu tli tiechchihualtiöya majcamo uye acuerdo entre tli joriojte hua tli amo joriojte, que yaja inu ley ca noche imandamientos hua ireglamentos. Yejuatzi oquexetunque para que ejqueu de tli joriojte hua tli amo joriojte oquechijque sa sie cuerpo yancuec ca yejuatzi. De inu manera oquechijque yeicsiebestle. ¹⁶ Hua de inu manera nuyejque tiechsendlölejque tieca Deus, sea tejoriojte noso amo, pues ye tecate sa sie cuerpo. Pos amo oyeya acuerdo entre tejua hua Deus, cache oyeya cualönelestle. Pero icaca quiename tlö Cristo oquemectejque inu cualönelestle ipa tiecorujtzi.

¹⁷ Hua yejuatzi hualiloac hua otlanunutzaluc de inu cuale tlamachestelestle de que onca yeicsiebestle. Nemiechelfejque nemejua tli amo nenjoriojte, tli nenyeyeya bejca de yejuatzi. Nuyejque tiechelfejque tejua tli tejoriojte, tli amo tönto bejca teyeyeya. ¹⁸ Porque por medio de yejuatzi tejua hua nemejua nuyejque cuale topachusque tieca Tajtle por sa sie yejuatzi Espíritu. ¹⁹ De maneras que ayecmo nencate nenestranjeros, hua ayecmo sa tiepal nenchajchönte, cache ye nencate nenciudadanos iguöl que noche yecteque, hua nencate de tiefamilia de Deus. ²⁰ Nencate quiename sente cale tli quechejchihualuteca Deus. Nemoedificörojtecate ipa inu cimientto que yaja omochejchi de inu tlayulepantejque hua tlateotitlanme. Hua mismo yejuatzi Cristo Jesús belejuatzi iloac inu tietetu de esquiniero. ²¹ Por medio de yejuatzi noche tepöntle majcöcte hua mosietelea para mochijteca sente teopantle yectec para ca toTlöcatzintle. ²² Hua tieca yejuatzi nemejua ejqueu nemosietelea ca ocseque para nenyeseque quiename sente cale cöne chöntihuas Deus por medio de tieEspíritu.

3

Pöblo omoencargöro de quentlanunutzas tli amo joriojte

¹ Por ini nönca arrasu, naja nePöblo notlajtlötlajtea. Naja neca neprioso ipampa netlanunutz de Cristo Jesús ca nemejua tli amo nenjoriojte. ² Pues beles ye nenquemajmate de tiefavur Deus tli niechencargörfejque para ma nemiechmaca nemejua. ³ Beles ye nenquemajmate que Deus niechejtetejque inu secieto. Pos de ini nönca ye nemiechejcuelfe quiejquech tlajtulme, ⁴ hua cuöc nenquetlajtultisque cuale nemo-macasque cuienta de que necasojcömate cuale inu secieto de Cristo. ⁵ Ipa ocseque tiempos Deus amo tlamachestiluc de inu secieto ca tlöca, pero öxö ye oquemejtetejque ca tietlateotitlanhua yecteque hua ca inu tlayulepantejque. Oquemejtetejque por medio de tieEspíritu. ⁶ Hua inu secieto yaja ini nönca: que por medio de inu cuale tlamachestelestle nuyejque nemejua tli amo nenjoriojte ye nemohuöxcatisque de lo que tli quentocöroa mohuöxcatisque joriojte. Ye nenpejpertenesierebe sa de sie cuerpo ca joriojte. Ye nenquepeasque pörte ca yejua de lo que tli Deus queprometierojque por Cristo Jesús.

⁷ Hua Deus niechchihualtejque ma netequete de netlanunutzas inu cuale tlamachestelestle. Necpea ini tequetl ipampa Deus por tiefavur oniechtlöocolejque ini tequetl, por tiemeyac checöhuales tli oquemoströrojque notech. ⁸ Naja, que mienos necmeresieroa que innoctie ocseque yecteque, Deus niechmacaque ini nönca tiefavur: que ma nemiechmacheste ca nemejua tli amo nenjoriojte de ini cuale tlamachestelestle tli tiechelfea de inu ricojyutl tli hasta abele tecasojcömate tli tecpea tietech Cristo. ⁹ Nuyejque niechencargörfejque ma nequenmacheste noche tlöca quiene oquenejque quechihuasque Deus ca ini nönca mensöje. Pues yejuatzi, öque oquechejchijque noche söstantle, primero oquenejque majcamo machea inu secieto por meyac xebetl. ¹⁰ Yejuatzi oquenejque ejqueu para que öxö quenchiualtilo *cubernadurte hua

* **3:10** De mölas tlajtlajtojteca de tlajtoönejme de öngeles cualteque hua amo cualteque.

tlötlajtoönejme ompa elfecac ma quixomatecö por medio de tejua quiene ica tiemach-esteles que tequete de meyac maneras. ¹¹ Ejqueu tequete confurme ca lo que tli Deus oquedesedirojque por toTlöcatzintle Cristo Jesús para ma iye semejca. ¹² Por medio de Cristo cuale topachusque tieca Deus ca meyac confiönsa, ipampa toneltoca tieca yejuatzi. ¹³ Por inu nemiechtlötlajtea amo xomodesanimörucö por lo que tli necsufrirojteca por nemejua. Cache cuale xomochamöhuacö de que necsufriroa por nemejua.

Tietlasojteles Cristo

¹⁴ Bieno pues, por ini nönca arrasu notlancuöquetza tieixtla Tajtle, ¹⁵ öque tietech moformöroa *noche **familias ompa elfecac hua ipan tlöltecpectle. ¹⁶ Netietlajtlanelea que de tiericojyu lalebes bieye ma nemiechmacacö checöhualestle por tieEspíritu para ma xomochecöhuacö ipa nemoyulo. ¹⁷ Hua netietlajtlanelea ma chöntihua Cristo ipa nemoyulo por medio de nemoneltoqueles, para que nemonelhuayutisque hua nemocimientörusque ipa tlasojtelestle. ¹⁸ Ejqueu ma cuale xebejbeletecö xecaso-jcömatecö nemejua hua noche ocseque yecteque, quiene bieye lalebes hua beyac hua patlöhuac hua tlacpac hua bejcatlanca ica tietlasojteles Cristo. ¹⁹ Ejqueu noso ma xecaso-jcömatecö tietlasojteles Cristo, que abele öque caso-jcömates, hua ejqueu nemoyulo ma tieme por completo ca noche lo que tli iloac Deus.

²⁰ Hua öxö, yejuatzi Deus iloac öque ca checöhualestle tequetihua toztölö. Hua ca inu checöhualestle cuale quechihuasque cache lalebes meyac de lo que tli tejua tetietlajtlanelea hua hasta cache de lo que tebejbelete tecpensörusque. ²¹ Yejuatzi ma quepeacö yecteniebelestle por medio de tejua tli tecreyentes hua por medio de Cristo Jesús nochepa semejca. Amén. Ma ejqueu iye.

4

Sasie tecate por tieEspíritu Deus

¹ Por inu, naja, öque neca neprioso por tiepampa Tlöcatzintle, nemiechtlötlajtea ma xomoportörucö quiename conbenierebe siendo que Deus onemiechnutzque para xeyecö ca yejuatzi. ² Amo xomochamöhuacö, hua xomoportörucö cuale ca ocseque. Xecxicucö ca paciencia lo que tli giente nemiechchibelea. Xomopilicö paciencia entre nemejua, hua tlasojtelestle. ³ Xecpeacö cueröro xecmalficö inu sietelestle tli ye nenquepea tieca tieEspíritu Deus por medio de inu yecsiebelestle tli nemiechsietelea. ⁴ Pues onca sa sie cuiervo, hua sa sietzi Espíritu, ejqueu quieme Deus onemiechnutzque para nenquepeasque sa sie nemöchealestle. ⁵ Sa sietzi Tlöcatzintle iloac, sa sie neltoquelestle, hua sa sie cuötiequelestle. ⁶ Hua iloac sa sietzi öque iloac Deus hua Tajtle de tonochtie, öque tlamandöruro ipa tonochtie, hua tequetihua por medio de tonochtie, hua iloac ca tonochtie.

⁷ Pero cara sente de tejua oquesele sente beletelestle según quiene Cristo oquemacaque. ⁸ Por inu quejtoa:

Cuöc otlejcoac tlacpac,
oquenbicaque meyactie priesoste ca yejuatzi,
hua quenmacaque tietlöcolesme ca tlöca.

⁹ Hua ¿tli quejtusneque cuöc quejtoa que otlejcoac? Quejtusneque que nuyejque otemoac hasta *tlölpa ipan tlöltecpectle. ¹⁰ Hua iloac sa sietzi yejuatzi öque otemoac hua öque nuyejque tlejcoac cache lalebes tlacpac que noche elfecac, para ma tlamandörucö ipa noche söstantle ca nobeyo. ¹¹ Hua yejuatzi oquenmacaque seque ma yecö tlateotiltlanme, hua ocseque tlayulepantejque, hua ocseque tlanunutzaneme de inu cuale

* 3:15 Cuale nuyejque motradusirus: “inu familia intiero”. ** 3:15 Cuale nuyejque motradusirus: “naciones”.

Griego “patria”. * 4:9 Cuale nuyejque motradusirus: “itzintla tlöltecpectle”.

tlamachestelestle, hua ocseque tlaixutiöneme hua tlamachtioneme. ¹² Ejqueu yejuatzi quenpreparörojque tli yecteque para ma tlatequepanucö para yejuatzi, hua para ma mobepöhua tiecuiervo de Cristo. ¹³ Quenequihua ma mobepöhua hasta que tonochtie ma tecpeacö sa sie neltoquelestle hua asojcömatelestle de tieConietzi. Ejqueu teyesque quiename cuöc öque ye ica tlöcatl, que quiename Cristo teyesque complietos. ¹⁴ Hua ayecmo ma teyecö quiename tepelantzetzzi, que sa nima topatla de tli tecpensöroa hua tiechbica cualquier enseñönsa quiename tlö teyene tetlasole que cuöc yebitz yejyecatl quebica. Cuöc ejqueu tecate giente cuale tiechcajcajöhua por inmönas, para ma tecsequirucö inu ojtle de cajcajöhuaquelestle. ¹⁵ Por inu, ma ayecmo teyecö ejqueu. Cache ma tequejtucö lo que tli melöhuac, ca tlasojtelestle. Ejqueu ma tobepöjtacö de noche maneras para teyesque quiename Cristo. Yejuatzi iloac quiename itzontecö cuiervo. ¹⁶ Hua por yejuatzi noche cuiervo yecchejchijteca hua majase *por medio de lo que tli quietimaca cara sesen pörte de inu cuiervo. Hua cara pörte de cuiervo tequete quiename conbenierebe, para que ejqueu noche cuiervo mobepöhua hua chajchamöbe ca tlasojtelestle.

Yancuec nemelestle tieca Cristo

¹⁷ Ini nönca noso nemiechelfea hua nemiechtlajtulmaca por toTlöcatzintle, que ma ayecmo xenemecö quiename niecate tli amo tieixomate Deus, tli yejua neme ca inpensamientos tli amo bajbalierebe. ¹⁸ Abele cajasojcömate, hua nencuaxelojtecate de inu nemelestle tli quietimacalo Deus. Ejqueu cajcate ipampa amo quemajmate, hua ipampa oquetepitzojque inyulo. ¹⁹ Ayecmo pejpinöhua, hua por inu ye modedicörojque ica bisio hua tlajtlacule. Ejqueu quechihua söstantle petzoyutl hua moxicoa lalebes por söstantle tli amo inhuöxca. ²⁰ Pero nemejua amo ejqueyi nenquetzecoique de Cristo, ²¹ tlö cana melöhuac nentiecajque yejuatzi hua tlö melöhuac nemomachtejque de yejuatzi, quiename ica melöhuac lo que tli oquejtojque Jesús. ²² Cache nenquetzecoique para nenquecöhuasque inu manera de nemonemeles tli oyeya nenquesequiroöya, inu nemelestle soltec tli ixniempolejteca, hua mocajcajöhua por itlaeliebeles tli amo cuale. ²³ Hua nenquetzecoique para nemoyancuelisque de nemoyulo hua nemopensamientos, ²⁴ hua nemöquisque inu yancuec nemelestle tli icaca quiename tienemeles Deus, que de melöhuac ica yectec hua melactec.

²⁵ Por inu, xejcöhuacö de nenestlacatesque, hua cache cuale xequajtucö lo que tli melöhuac entre nemejua, porque tonochtie tecate pörtes de sa sie cuiervo.

²⁶ *Xecualönecö hua amo xetlajtlacucö. Amo xejcöhuacö ma tlame tunale mientras oc turavea nentlajtlabielmecteneme. ²⁷ Hua amo xecmacacö locör Diöblo.

²⁸ Öque tlachtequeya ma ayecmo tlachteque. Cache cuale ma quechihua cuale tequetl ca imöhua, para quepeas tli quietimacas ca niecate tli quenpoloa.

²⁹ Amo xetlajtucö ca petzotlajtulme, tlöcamo cache xetlajtlajtucö ca tlajtulme cuajcual tli cuale betze cuöc monesesitöroa, tli quenbepöhuasque hua quietimacasque proviecho para niecate tli quecaque. ³⁰ Hua amo xetiechihualticö ma neyulcocolo tieEspíritu Sönto de Deus, öque tieca yejuatzi Espiritu Deus onemiechseyörojque hasta inu tunale cuöc tomöquextisque por complieto.

³¹ Xecxelucö de nemejua noche tlajyelejtelestle hua tlabielmequelestle hua cualönestelestle hua tlabieltzajtzelestle hua tlabejibicaltelestle, hua noche ocseque söstantle amo cuale. ³² Cache xeyecö nencualtientlöca entre nemejua, hua xeyecö neyulcaxönque. Hua xomoperdonörucö entre nemejua, ejqueu quiename Deus nemiechperdonörojque nemejua por Cristo.

* **4:16** Cuale nuyejque motradusirus: "porque cada sesen pörte de inu cuiervo quequextea proviecho de tieitech yejuatzi". * **4:26** Xomojtele Salmos 4.4.

5

Xecchihuacö quiename Deus quechihualo

¹ De inu manera, xecchihuacö quiename Deus quechihualo, pues nentiepelhua nencate, hua nemiechtlasojtlalo. ² Hua xenemecö ca tlasojtelestle, ejqueu quiename Cristo tiechtlasojtlaque hua nemöctiluc por topampa. Pos yejuatzi iloaya quiename sente bentle hua cuetlabiltelestle tli ajfeyoc ijnecueste para ca Deus.

³ Pero inu tlajtlacule ica sohuame tli amo nemosojsohuahua, hua noche sösantle petzoyutl hua tlaeliebelestle de lo que amo nemohuöxca, ni siquiera amo xectieniehuacö inu sösantle entre nemejua, pues amo nemiechconbenieroa ipampa nenyecteque nencate. ⁴ Nimpor amo xequejtucö tlajtulme tli tiepinöjtea, nimpor tlajtulme tuntojte, nimpor tlajtulme de chönsa tli amo cualteque. Pos niecate sösantle amo conbenierebe, cache conbenierebe ma tetietlasojcömatelicö Deus. ⁵ Pos ye nenquemajmate que tlö canajyeca mopöctea ca sohuatl tli amo isohua, noso tlö quechihua sösantle petzoyutl, noso tlö queliebea lo que tli ihuöxca ocsente hua ejqueu mochihua quiename niecate tli quenteochihua ixniehualojme, ye nenquemajmate que yaja amo quepeas pörte cöne tlajtlamandöruro Cristo hua Deus. ⁶ Majcamo yeca nemiechcajcajóhua, cache xecmatecö que por ipampa niecate sösantle yebitz tiecualöneles Deus impa niecate tli amo tlajtlaneltoaca. ⁷ Por inu nemejua amo xecpeacö pörte ca yejua.

⁸ Pues oyeya nenyeyjeya quiename nentlajtlayohuaquelestle ipampa nentlajtlacoöya, pero öxö ye nencate nentlöbile tieca toTlöcatzintle. Xenentacö noso ipa sosantle de tlöbile. ⁹ Porque inu tlöbile quebicz lo que tlin cuale hua yectec hua melöhuac. ¹⁰ Xecprocurörucö xetzecucö tlin inu quecualejtalo Tlöcatzintle. ¹¹ Hua amo xecpeacö pörte ca inu tlachihuale de tlajtlayohuaquelestle tli amo tli quebicz. Cache cuale xejquexticö inu tlachihuale ca tlöbile. ¹² Pos tiepinöjte mös öque sa tlajtlajtus de inu sösantle tli yejua quechihua sa ichtacajtzi. ¹³ Però cuöc öque quequextea canajyetla ca tlöbile niese cuale, hua lo que tli niese cuale motlöbelea. ¹⁴ Por inu quejtoa:

Xetlachea, taja que tecochteca,
xemiehua de intzölö mimejque,
hua metztlöbelisque Cristo.

¹⁵ Por inu noso, xequejtacö cuale nemonemeles quiename nengiente nentlajmatque. ¹⁶ Xecaprovechörucö cuale nemotiempo, porque ye tecate pa tunalte petzoteque. ¹⁷ Por inu, amo xeyecö xetuntojte, cache xecasojcömatecö tlin inu tietlanequeles Tlöcatzintle. ¹⁸ Hua amo xetlöhuönacö ca mescöl, porque inu nemiechniempolaa. Cache xomotiemiticö ca tieEspíritu Deus. ¹⁹ Xomonunutzacö entre nemejua ca salmos hua himnos hua cuicatelesme de tieEspíritu Deus, hua xecuicacö hua xetiecuicaticö Tlöcatzintle ipa nemoyulo. ²⁰ Seme xetietlasojcömatelicö Deus toTajtzi por noche sösantle tietucöyupantzinco toTlöcatzintle Jesucristo. ²¹ Xomosujetörucö entre nemejua porque nentiemabelea Cristo.

Quiene ma tenemecö ipa tochö

²² Sohuame, xomosujetörucö ca nemonajnömecua, quiename tlö oyene nemoTlöcatzintle. ²³ Pos tlöcatl ica quiename itzontecö de isohua, ejqueu quiename Cristo iloac itzontecö de inu cuierpo tli tecate tejua tonochtie tli tecreyentes. Pues yejuatzi iloac tlamöquextiöne de inu cuierpo. ²⁴ Hua quiename tejua tli tecreyentes tiechtocöroa tosujetörusque tieca Cristo, ejqueu nuyejque sohuame ma mosujetörucö ca innajnömecua ipa noche sösantle.

²⁵ Tlöca, xequentlasojtlacö nemosojsohuöhuö, quiename Cristo tiechtlasojtlaluc tejua tli tecreyentes, hua nemöctiluc por topampa. ²⁶ Pues nemöctiluc para tiechyecteleyque

hua tiechchepöjque de toyulo, pues tiechchepöjque *ca tietlajtultzi quiename öque tlachepöhua ca ötzintle. ²⁷ Ejqueu oquechijque para tiechpresentörusque tieca yejuatzi mismo ca meyac tlanixtelestle, sin niontle möncha nimpör niontle xoxolochtec, nimpör niontle söstantle amo cuale, tlöcamo teyesque intiero teyecteque. ²⁸ Ejqueu noso conbenierebe que tlöca ma quentlasojtlacö insojsohuöhuö *quiename quetlasojtla inpropio cuiervo. Pues öque quetlasojtla isohua motlasojtla yaja mismo. ²⁹ Pues ayec yeca quetlajyelejta icuierpo, cache quetlacualtea hua quemalfea. Hua Cristo ejqueu quechihualo ca tejua tli tecreyentes, ³⁰ porque tejua tecate pörtes de tiecuierpo. ³¹ Yaja ica: “Por ini nönca arasu tlöcatl quecöhua itajtzi hua inöntzi, hua mosietelis ca isohua, hua yejua innehua yesque sa sie cuiervo”. ³² Ini nönca ica sente secreto lalebes bieye, pero nequejtojteca que tratörebe de Cristo hua tonochtie tli tecreyentes. ³³ Pero cara sente de nemejua xectlasojtlacö nemosohua quiename nemotlasojtla nemejua mismo. Hua sohuame ma quenmabelicö innajnömecua.

6

¹ Nemejua tli nencate neninpelhua, xequenneltocacö nemotötajua porque nencate tieca toTlöcatzintle. Pues icaca cuale ma xecchihuacö ejqueu. ² Pues ejqueu nemiechelfea inu primero mandamiento tli quebicatz sente promesa. Pues quejtoa:

Pa xequemejta motajtzi hua monöntzi,
³ para que mopa huölös cuale söstantle,
 hua tenemes meyac xebetl ipan tlöltecpactle.

⁴ Hua nemejua nentötajte, amo sa xequentlabeledmecticö nemopelhua, cache xequenbepöhuacö hua xequencastecörucö cuöc amo cuale quechihua hua xequentlajtulmacacö quiename conbenierebe porque tecate tieca Tlöcatzintle.

⁵ Nemejua tli nenesclavos nencate, xetlaneltocacö ca *nemopatrones necö ipan tlöltecpactle. Xequenneltocacö ca mabelestle hua respieto, hua xecchihuacö ca noche nemoyulo, quiename tlö nenquechihua para Cristo. ⁶ Amo solamente xetequetecö cuöc yejua nemiechejta, quiename quechihua seque, tli solamente queneque mocöhuaque cuale ca giente. Cache xetequetecö quiename nentiesclavos de Cristo, tli nenquechijtecate tietlanequeles Deus ca noche nemoyulo. ⁷ Xetlatequepanucö ca gönas quiename tlö para *Tlöcatzintle hua amo para tlöca. ⁸ Xequelnömequecö que cara tlöcatl, cox esclavo noso cox libre, *Tlöcatzintle quecuepelisque por tli quechihua.

⁹ Nemejua tli *nenpatrones nencate, ejqueu mismo nuyejque xequenchibelicö nemoesclavos. Ayecmo xequenmajmajcömecticö. Xequelnömequecö que ompa elfecac iloac yejuatzi öque iloac *Patrón de yejua quiename de nemejua nuyejque. Hua yejuatzi amo tlachecuaejtalo. ¹⁹ “Xectlöllicö noche inu tlaquentle de guierra tli Deus tiechmacalo” (v. 11)

Itlaquie de guierra de sente creyente

¹⁰ Hua öxö, nocnihua, xomochecöhuaque tieca Tlöcatzintle, ca tiechecöhuaque de yejuatzi, tli lalebes checactec ica. ¹¹ Xectlöllicö noche inu tlaquentle de guierra tli Deus tiechmacalo. Ejqueu cuale nenquexicusque ipetzomöñas Diöblo. ¹² Pos amo tomaga ca giente tli quepejpea yestle hua nacatl quiename tejua, cache tomaga ca niecate cubernadurte hua tlajtoönejme tli tlamandöroa ipa noche tlöltecpactle ca tlajtlayohuaquelestle, ca inu espíritu amo cualteque tli cate ompa tlacpac. ¹³ Por inu xejcönacö noche inu tlaquentle de guierra tli Deus tiechmacalo, para que cuale nenquexicusque cuöc ases amo cuale tunale, hua cuöc ye nenquechijque noche, nemocöhuaque firmes. ¹⁴ Xechecöjtacö, pues,

* **5:26** Cuale nuyejque motradusirus: “ca ötzintle (de tluacuötiequelestle) hua ca totlajtul (de testimonio)”, noso “ca inu tlajtulme de tluacuötiequelestle”. * **5:28** Cuale nuyejque motradusirus: “pues isohua icaca quiename ipropio cuiervo de tlöcatl”.

* **6:5** Sa sie tlajtule ca griego quejtusneque “tlöcatzintle”, hua nuyejque “patrón”.

hua xomotlajcoilpetacö ca lo que tli melöhuac ica, pues yaja inu nemocinturón iyes. Hua xectlölicö yectelestle quiename nemotlaquie de tepostle tli nemiechprotejierus de nemopiecho. ¹⁵ Hua xeyecö nenlistos por medio de inu cuale tlamachestelestle de yecsiebelestle, pues yaja inu icaca nemosapötoshua. ¹⁶ Hua ipa noche söstantle xecönacö inu escudo que icaca yaja nemoneltoqueles. Pues ca inu cuale nenquensiebisque inu fliechas tli xutlatebitze, inu söstantle amo cuale tli quantitlane Amo Cuale Tlöcatl. ¹⁷ Hua xemöquicö inu cösco de tepostle, que yaja nemomöquextelis. Hua xejcönacö inu espöda tli tiechmacalo yejuatzi Espíritu, que yaja tietlajtultzi Deus. ¹⁸ Xecchihuacö noche ini nönca ica netlötlajectelestle, hua seme xomotlajtlötlajecticö hua xetietlajtlanelicö Deus por medio de tieEspíritu. Para ini nönca, xetlachixtacö hua xecsequirojtacö xetietlajtlanelejtacö por noche yecteque. ¹⁹ Hua xetietlajtlanelicö por naja, para ma niechmacacö tlajtule para ma netlanunutza ca balur de inu secrieto que yaja inu cuale tlamachestelestle. ²⁰ Por ipampa inu cuale tlamachestelestle neca nerepresentönte de Deus necö cöne nelpeteca ijtec cörsel. Xetlajtlancö para ma netlanunutza ca balur, pos ejqueu conbenierebe.

Tlajpalulestle

²¹ Tíquico, totlasojcöicni öque yeclatequepanoa por Tlöcatzintle, yaja nemiechmachestis cuale de noche tli necchihua para que nenquematesque quiene neca. ²² Por inu mismo nectitlane ca nemejua, para ma xecmatecö quiene tecate, hua para ma nemiechanimöro.

²³ Innochie tocnihua ma quepeacö yulsiebelestle hua tlasojtelestle ca neltoquelestle, de Deus toTajtzi hua Tlöcatzintle Jesucristo. ²⁴ Ma quepeacö tiefavur innochie tli tietlasojtla toTlöcatzintle Jesucristo ca tlasojtelestle tli ayec mopatla.

Sente cörta tli San Pöblo oquemejcuelfe FILIPENSES

¹ Naja nePöblo nequejcuelfe ini nönca cörta ca tiehua Timoteo. Tejua tetietequapanoa Jesucristo. Nemiechejcuelfe ini cörta para nemonochtie tli nenyectequetli nenchajchönte pa puieblo de Filipos. Nemiechejcuelfe nemejua nenobispos tli nenquenmixutea ocseque creyentes, hua nemejua nendiáconos tli nentlapaliebea ipa inu tequetl de Deus. ² ToTajtzin Deus hua toTlöcatzintle Jesucristo ma nemiechmomeyaquelicö tieinfavur hua neyulsiebestle.

Pöblo motlajtlötlajtiöya por inu creyentes de Filipos

³ Cuöc naja nemiechelnömeque netietlasojcömatelea noDeus por nemejua. ⁴ Cara vez que notlajtlötlajtea por nemonochtie, necpea meyac pöquelestle. ⁵ Nepajpöque porque nenniechpaliebejtebitze para que ocseque tlöca ma quecaquecö inu cuale tlamachestelestle. Ejqueu nenniechpaliebejtebitze desde que nenquecajque tietlajtultzi Deus. ⁶ Deus ye opiehualuc tlayectlölilo pa nemoyulo. Necaca seguro que yejuatziquesequisque tlayectlölilitös pa nemoyulo hasta quesencöhuasque cuöc Jesucristo hualiloas. ⁷ Nepajpöque que Deus ejqueu tlayectlöliluteca pa nemoyulo, porque ca noche sentetl noyulo nemiechneque. Deus nemiechpaliebiluteca ompau hua niechpaliebiluteca naja necö cöne netzacteca. Seme nenniechyulölea mientras nequennunutza tli oncö cate hua nequemasegurörfe que icaca melöhuac inu cuale tlamachestelestle. ⁸ Deus quematihua que lalebes nemiechtiemoa nemonochtie. Necmachelea que tietlasojteles Jesucristo oncönca pa noyulo para nemejua. ⁹ Naja notlajtlötlajtea por nemejua ma seme xecpeacö meyac tlasojtelestle. Notlajtlötlajtea ma xecmatecö cache hua cache, hua ma cache xecasojcömatecö. ¹⁰ Ejqueu nenquixpejpenasque söstantle tli cache cuale. Tlö ejqueu nenquechihuasque, entunses nenquepeasque nemonemeles chepöhuac hua amo öque quepeas tli quejtus encuntra de nemejua ipa inun tunale cuöc Cristo hualiloas. ¹¹ Pos Jesucristo nemiechpaliebisque para nenquepeasque noche söstantle tli quebicatz yectelestle. Ejqueu nentiebecapanusque Deus hua nentiechamöhuasque.

Para naja, tlö nenemes, nenemes para Cristo

¹² Nocnihua, naja necneque ma xecmajtacö quiene icaca necö. Noche tli necsufrirojtebitz ijtec cörsel ye ohualmochi sente bendeseyu bieye. Necpextebitz meyac locör para netlanunutzas de inu cuale tlamachestelestle. ¹³ Así es que noche inu soltörojte tli oncö cate pa palösio del rey hua noche ocseque giente quemate que naja neca neprioso porque netietoca Cristo. ¹⁴ Öxö cöso innochie tocnihua ocaseque balur porque quemate que naja neprioso por netietoca Cristo. Ayecmo momajtea para quennunutzasque giente de tietlajtultzi Deus. Quepea cache meyac confiönsa ca Deus para tlanunutzasque.

¹⁵ Melöhuac seque quennunutza giente de Cristo porque niechpilea envidia. Queneque que tlöca ma quenhibelicö cöso de yejua para que majcama niechhibelicö cöso naja. Pero ocseque tlanunutza ca cuale inyulo. ¹⁶⁻¹⁷ Así es que seque tlanunutza ca cuale porque niechneque. Quemate que Deus oniechtlölejque necö para nequemelfis tli oncöncate que inu cuale tlamachestelestle icaca melöhuac. Pero ocseque tlanunutza de Cristo para mobieyematesque. Amo tlanunutza de Cristo ca sentetl inyulo. Quenejneque ma necsufriro cache meyac turavea ademös de que netzacteca. ¹⁸ Pero amo tli quechibelea tlö seque ca noche sentetl inyulo tlanunutza hua ocseque amo ca noche inyulo. La cosa es que innochie tlajtlanunutza de Cristo. Por inu nepajpöque.

Pos nepajpöques cache turavea. ¹⁹ Pos necmate que niechquextisque de ipan cörsel, porque nemejua nemotlajtlötlajtea por naja hua porque Espíritu Sönto niechpaliebisque. ²⁰ Naja necneque ca noche noyulo seme netiechamöjtas Cristo. Ca meyac balur, noso, ma netiechajchamöhua, quieme seme necchijtebitz, amo cana de repente nepinöhuas tieixtla. Tlö nenemes ipa nöncua cuierpo noso tlö nemeques amo niechtequepachoa, pero la cosa es que ma netiechajchamöhua Cristo. ²¹ Pues para naja, tlö nenemes, nenemes para Cristo. Tlö nemeques, cache cuale turavea porque naseti miero tietlac. ²² Pero tlö turavea necsequirus nenemes pan tlöltecpactle, cuale netietequapanus oc tepetze. De todos modos ícaca tequeyo para necmates cötlaja cache cuale nequixpejpenas; tlö cache cuale nenemes noso cox nemeques. ²³ Paque oc necneque nenemes pero muchas veces necneque nemeques para neyes ca Cristo. Melöhuac necpea meyac gönas nemeques hua neyös ca Cristo. Pos mil veces cache cuale para naja. ²⁴ Pero la cosa es que para nemiechpaliebis nemejua, onca nesesidad que oncö neyes oc tepetzi. ²⁵ Por inu necmate por seguro que ayemo nemeques. Oncö neyetenemes turavea ca nemejua. Nemiechpaliebis para nencasesque fuierca hua para cache nenpajpöquesque porque nemoneltoca ca Deus. ²⁶ Pos naja nocuepas ocsajpa ca nemotlac. Por inu nentiechajchamöhuasque Cristo Jesús porque yejuatzi bel cuale oniechixutiluc.

²⁷ Ca meyac cueröro xenemecö confurme tli quejtoa inu cuale tlamachestelestle de Cristo. Cox neyös para nemiechejtati, cox amo neyös, pero de todos modos necneque nejcaques que nenyulchecöjque hua que saside nencate. Necneque nejcaques que nentejtequete sa secne para que giente ma moneltocacö ica inu cuale tlamachestelestle. ²⁸ Hua amo xomomajticö de toenemigos. De inu manera nieses de melöhuac que yejua ixniempolejteneme hua nemejua nemomöquextejque de nemotlajtlacul. Es que yejuatzi Deus tequetihua ca nemejua. ²⁹ Deus quenequihua que nemejua nemoneltocasque tieca Cristo. Hua amo solamiente inu, tlöcamo nuyejque onemiechmacaque para nenquesufrirusque por Cristo. ³⁰ Nemejua hua naja tecsufriroa por Cristo. Ye onemomacaque cuenta quiene ca necsufriroöya antes por yejuatzi. Pos hasta öxö turavea necsufrirojteca tiepampa quieme nenquecaque.

2

Ma topichaquicö quiename Cristo nepichaquiluc

¹ Tiel Cristo nemiechyulchecöhualo. Nemoyulölea porque Cristo nemiechtlasojtlalo. Espíritu Sönto nemoa ca nemejua ipa nemoyulo. Onca tlasojtelestle nemotzölö, hua nenyulcaxönque nencate. ² Por inu, noso, xenemecö de töl manera que naja necpeas meyac pöquelestle por nemejua. Es decir, xeyecö sa de sie nemoyulo. Xomotlasojtlacö sie tlöcatl ca ocsie tlöcatl. Saside xeyecö; xeyecö complietamente de acuerdo. ³ Amo xecpensörucö sa de tli nemejua nenqueneque, nimpör amo xomobiyemajtacö. Al contrörio, xomopichaquicö, hua xecpensörucö que cache cuale cate inu ocseque nemocnihua que nemejua mismo. ⁴ Xecpensörucö para bien de ocseque hua amo solamiente para bien de nemejua mismo.

⁵ Ejqueu xecpensörucö quiene Cristo Jesús oquepensörojque. ⁶ Pos yejuatzi de porsí iloaya Deus. Pero yejuatzi amo tieimportöroöya tlö iloas iguöl quieme Deus noso amo. ⁷ Pos oquecöjtiejque tli tiehuöxca. Onepichaquiluc para quenpaliebisque tlöltecpactlöca. Otlöcatihua hua onechihualuc tlöcatl, hua ejqueu tlatequepanuloöya. ⁸ Cuöc ye onechihualuc tlöcatl, yejuatzi onepichaquiluc cache turavea. Otieneltocuc Deus mös Deus oquenejque ma mecoa. Pos omecoac ipa sente corujtzi quieme tlö sente tlöcatl amo cualtec iloane. ⁹ Por inu Deus otiechamöhualuc Jesús. Tietlejcabiluc pa elfecac hua tietlöliluc ca tiemöyecmö. Otiemacuc sente numero cache importönte que noche ocseque numeros. Quejtusneque que tieConietzi cache bieyetzintle de noche. ¹⁰ Sie tunale noche tli cate elfecac hua noche tli cate pan tlöltecpactle hua noche tli cate itzintla tlöltecpactle

quecaquesque tietucöyutzi Jesús. Cuöquenuju innochtie motlancuöquetzasque tieixtlantz-inco. ¹¹ Innochtie quejtusque que Jesucristo iloac Tlöcatzintle. Ejqueu tiebejcapanusque Deus Tajtle.

Sente tlöbile para tlöltecpactlöca

¹² Bieno, notlasojcöicnihua, seme nenquechijtebitze tli nemiechelfiöya cuöc oneyeya ca nemejua. Pos öxö cache impurta ma xecchihuacö ye que bejca neca de nemejua. Xecchihuacö noche tli Deus quenequihua para ma niese que de melöhuac Deus nemiechmöquextiluc. Xequelnömequecö quiene Deus quetlajyelejtalö tlin amo cuale, hua xetiemabelicö. ¹³ Deus tequetihua pa nemoyulo para nenquenequesque nenquechihuasque tietlanequeles. Nemiechmacalo fuiersa nuyejque para cuale nenquechihuasque san quiene ca yejuatzi quecualejtalo.

¹⁴ Noche tli nenquechihua xecchihuacö ca cuale. Amo xomoquejörucö nimpör amo xemixcomacacö. ¹⁵ Ejqueu nionöque amo quepeas tli quejtus cuntra nemejua. Majcamo oye nion sente fölta ca nemejua. Ejqueu xenemecö ca cuale intzölö giente tli mölojteque hua petzoteque para yejua quejtusque que nentiepelhua Deus de melöhuac. Tlö nennemesque ejqueu pa yecnemelestle, entunses nenquenpaliebisque inu giente tlajtlaculteque ma mixtlapucö. Nenquenpaliebisque quieme sente tlöbile tiechpaliebia tequejtusque yetla ca yohuale. ¹⁶ Nenquennunutzasque giente de tietlajtultzi Deus, tli quetiema nemelestle. De inu manera naja nepajpöques lalebes cuöc Jesucristo hualiloas. Nepajpöques porque amo sa nienca onemiechmachte de tietlajtultzi Deus. Amo sa nienca onetequet. ¹⁷ Mös niechmectisque tiepampa Cristo ma ejque. Nepajpöques porque turavea nemoneltocatösque ca Cristo mös nenquesufriusque tiepampa. Nemejua nenpajpöquesque tieca Cristo, hua naja nepajpöques ca tiehua nemejua. ¹⁸ Xepajpöquecö nemejua nuyejque ca naja.

Timoteo hua Epafrodito

¹⁹ Necneque necchihuas tli toTlöcatzintle quenequihua. Por inu necpensöroa nima nectitlanes Timoteo ma beya nemiechejtati. De inu manera nepajpöques cuöc necmates de nemejua. ²⁰ Amo necpea yeca ocseque quieme Timoteo. Quieme naja necpensöroa ejqueu quepensöroa yaja. Pos yaja ca sentetl iyulo mopreocupörus por nemejua. ²¹ Noche ocseque tocnihua quetiemoa sa tli inhuöxca. Amo quemimportöroa sösanle de Jesucristo. ²² Pero nemejua ye nenquixomate Timoteo quiene ca lalebes cuale tlöcatl para tlatequepanus por Cristo. Niechpaliebejtibitz quieme sente pelalactle cuöc quepaliebea itajtzi. Tetlanunutztebitze de cuale tlamachestelestle yaja hua naja. ²³ Así que necneque nectitlanes Timoteo ca nemejua san tequetl necmates tli niechpasörus naja. ²⁴ Necpea confiönsa ca Deus que sa nima naja nuyejque neyös ca nemejua.

²⁵ Tlasojcömate onenniechhualtitlanque tocní Epafrodito para oniechtequepano hua oniechpaliebe. Öxö niechparesieroa que cache cuale nectitlanes ocsajpa ca nemejua. Yaja seme tequete para Cristo ca naja. Yaja quieme naja tecöguantöroa sösanle quieme tesoltöröjte para Cristo. ²⁶ Pos yaja quepea meyac gönas nemiechejtus ocsajpa. Quepensöroa que beles nemotequepachoa por yaja desde que nenquecajque que yaja mococoöya. Öxö moyulcocoa por nemejua. ²⁷ Melöhuac ohualmococo. Hasta mequesquea. Pero Deus oquepilejque icnuejtelestle, hua quepajtejque. Naja nuyejque oniechpilejque icnuejtelestle, para majcamo necpea ocseque tequepachule ademös de inu tequepachule tli necpextebitz. ²⁸ Por inu necpea cache meyac gönas nectitlanes Epafrodito ca nemejua para que nenpajpöquesque nuyejque cuöc nenquejtusque ocsajpa. Ejqueu naja ayecmo notequepachus tönto. ²⁹ Xecselicö ca meyac pöquelestle, pos ica nemocni tieca Cristo. Xeciplicö meyac respieto yaja hua noche tlöca tli cate quieme yaja. ³⁰ Pos yaja ye miero mequesquea por tietequapanojtenemeya Cristo. Pos lalebes

mococoöya hua ye miero mequesquea por niechpaliebiöya naja. Oniechpaliebiöya porque nemejua abele onenniechpaliebejqe por bejca nenyeyeya.

3

Necneque netieixomates Cristo de melöhuac

¹ Pos öxö, nocnihua, xepajpöquecö porque nentiehuöxcagua Tlöcatzintle nencate. Xequajtacö. Amo traböjo para naja nemiechtlajcuelfis ocsajpa tli ye onemiechtlajcuelfe. Pos nemiechserbirus lalebes.

² ¡Xomotlachilicö! Amo xequenchibelicö cöso quiejquech quejtoa que tecpea que tonacayutequesque. Yejua yulpetzoteque cate. Quechihua tlin amo cuale. ³ Tejua tecate tli tecpea inu nacayutequelestle tli melöhuac. Pos tejua tetieteochihua Deus de melöhuac porque tieEspíritu de Deus tiechpaliebilo. Tejua tetiechamöhua yejuatzí Cristo Jesús, hua amo toquitzquea itech söstantle de tonacayo. ⁴ Tlö öque cuale momöquextisquiöne por que quechihua meyac söstantle para Deus, hua por que icaca cuale tlöcatl, entunses seguro que naja cuale nomöquextisquiöne ejqueu. Tlö canajyeca quepensöroa que de inu manera cuale momöquextis, pos naja cache seguro nomöquextisquea. ⁵ Pos naja onetlöcat pa tonación de Israel. Onetlöcat de ipelhua Benjamín. Cuöc ye onetlöcat pa checume tunale oniechnacayutejetejqe confurme tocostumbre. Nobiebetcöhua oyejyeya hebreos, hua naja nuyejque nehebreo. Onomachte entre inu fariseos, öque querespetöroa inu ley de Deus cache que ocseque giente. ⁶ Lalebes nechöhuatu oneyeya ipa noreligión. Onequentepotztocaya noche creyentes tli moneltocaque ca Cristo. Onecyecchi noche tli niechmachtejqe inu fariseos de inu ley. Pos nionöque amo oquepex tli quejtus contra naja. ⁷ Onecpensöro que por onecyecchi tli niechmachtejqe, entunses Deus niechcualajtalusquea. Pero öxö necmate que Deus amo niechcualajtalo por noche inu tlöcamo por noneltoca tieca Cristo. ⁸ Pos noche inu söstantle ayecmo niechimportöroa ye que netieixomate noTlöcatzintle Cristo. Tli antes onecyecchi para ma niechselicö Deus, noche inu necpea öxö quieme cana tlasole. Onectlajcal ca niepa para cache cuale netieixomates Cristo ⁹ hua para neyes sasie ca yejuatzí. Hua inu abele iyeyes por que por notlachihual naja neyes neyectec. Pos abele nochihuas neyectec por necchihuas tli quejtoa inu ley. Cache cuale Deus niechmacasque inu yectelestle tli yebitz por öque moneltoca tieca Cristo. ¹⁰ Pos necneque netieixomates Cristo de melöhuac. Necneque necasojcömates cache cuale de inu beletelestle tli Deus tiechmacalo porque Cristo oyulebihuac de intzölö mimejqe. Necneque necsufrirus tiepampa Cristo quieme yejuatzí quesufrirojqe por nopampa. Necneque seme nenemes quieme tlö naja ye onemec pa corujtzi cuöc yejuatzí omecoac. ¹¹ Necneque ma mochihua noche inu ca naja para neyes cache seguro que neyulebes ca tlanixtelestle de intzölö mimejqe.

Necchihua fuiersa para nenemes quieme Cristo

¹² Amo nequejtusneque que ye necchijtebitz intiero ejqueu. ¡Ayemo! Turavea ayemo intiero necualtec. Pero de todos modos necchihua lucha para necchihuas ejqueu porque Cristo oniechchihualtejqe ma neye netiehuöxca. ¹³ Nocnihua, amo necpensöroa que ye necchihua noche quieme conbenierebe ma necchihua. Pero inun quiema necchihuas, que nequelcöhuas noche tli ye opanuc, hua ca meyac gönas necchihuas lucha para nenemes por Cristo. ¹⁴ Necchihua fuiersa para nenemes cache quieme Cristo. Necneque necases inu premio tli Deus quepealo para naja. Tiechnutzalo para ma tecresibirucö inu premio ompa elfecac porque tecate ca Cristo Jesús.

¹⁵ Tonochtie tli ye toyulchecöjtecate ca Cristo ma tecpensörucö de inu manera quieme nequejtojtebitz. Tlö en caso que nenquepensörusque ocsie, Deus nemiechejtisque inu nuyejque. ¹⁶ Pero inun quiema, ma tecsequirucö pa tieojfe Deus de inu manera quieme ipa tenentebitze.

¹⁷ Nocnihua, seme xecchihuacö quieme naja necchihua. Nuyejque xomomacacö cuienta tlö ocseque neme quieme tejua teneme. ¹⁸ Meyac veces ye onemiechelfe hua öxö nocuiel nemiechelfea hasta ca nexöyutejtepiebe, que onca meyactie que cate enemigos en cuntra de Cristo öque omecoac pan corutzi. ¹⁹ Al fin Deus quenpojpulusque innochie porque amo tieteochihua Deus tlöcamo seme quepensörojtteneme tlacua hua cone hua quechihua tli incuierpo queliebea. Mös quechijtecate tli san petzotec yejua quepensöroa que amo mopinöjtea, tlöcamo mochajchamöhua. Solamiente quepensöroa de sösantle de nönca tlöltecpactle hua amo de Deus. ²⁰ Pero tejua tecpea tohö miero ompa elfecac. Tejua tetiechixtecate sente tiemöquextiöne ma hualiloa de elfecac, yejuatzi Tlöcatzintle Jesucristo. ²¹ Nönca tocuiervo amo tönto cuale ica, pero Jesús quechihualtisque ma mocuepa quiename tiecuiervo tli ica de tlanixtelestle. Quecuepasque tocuiervo ejqueu porque quepealo beletelestle. Cusörusque inu mismo beletelestle tli quepealo para quesujetörusque noche sösantle para ma tieneltoca.

4

¹ Por inu, notlasojcöicnihua, seme xetietocacö Cristo ca noche sentetl nemoyulo. Necpea meyac gönas nemiechejtati ocsajpa, pos nemiechtlasojtla. Nepajpöque por nemejua, pos nencate quiename nopremio tli Deus niechmacaque.

¡Xepajpöquecö!

² Necneque que tocní Evodia hua tocní Síntique ma moyujyulsiebicö sente ca ocsente. Ma yecö saside porque cate de Cristo. ³ Öxö taja, öque seme teniechpaliebejtbitz para tetlanunutztenemeya de Cristo. Mach tecneques, xeniechchibele sente favur. Xequenpaliebe niecate tocnisohuame, Evodia hua Síntique. Pos yejua seme oniechpaliebejque nuyejque cuöc nequennunutztaya giente de inu cuale tlamachestelestle. Nuyejque Clemente hua ocseque tocnihua oniechpaliebejque ipa inu tequetl. Yejua quepea innombres pa inu ömatl cöne tlajcuelulpancate innombres de innochie tli quepeasque nemelestle nochepa.

⁴ Seme xepajpöquecö porque nencate de toTlöcatzintle. Nocuiel ma nequejto: ¡Xepajpöquecö! ⁵ Ma quejtacö giente que nemejua nenyulcaxönque. Jesucristo nima hualiloas.

⁶ Majcamo xomotequepachucö por niontle, tlöcamo seme xetieyelficö Deus noche sösantle. Xetietlajtlötlajticö hua xetietlajtlanelicö hua xetietlasojcömatelicö. ⁷ Entunses nenquepeasque inu yulsiebelelestle tli yebitz de Deus, tli abele öque casojcömates. Hua ejqueu nenquepensörusque quiene conbenierebe, hua ipa nemoyulo nenquenequesque sösantle cuale.

Xecpensörojtacö noche tlin cuale

⁸ Bieno pues, nocnihua, xecpensörojtacö noche tli melöhuac, noche tli quemeresieroa respieto, noche tli yectec, noche tli ica intiero cuale, noche tli cuöcualtzi, noche tli mabestec. Seme xecpensörojtacö noche tlin cuale hua noche tli yecteniehuale.

⁹ Xecchihuacö san quiene ca onemiechmachte hua onemiechtlajtulmacac. Xecchihuacö noche tli naja nemiechelfe, hua noche tli nenquejtaque que necchihua naja. Ejqueu Deus, öque tiechmacalo yulsiebelelestle, iloas ca nemejua.

Pöblo quentlasojcömatelea porque quepaliebejque

¹⁰ Ara ca nepöcteca ca Deus porque nemejua ocsajpa nenquepensöroa de naja. Por supuesto amo nequejtusneque que oneniechelcöjque tlöcamo amo nenquepeaya locör quiene ca nenniechualtitlanelisquea tomi. ¹¹ Amo nequejtoa que niechchibelea fölta. Pos ye notech omomat neyes confurme ca tli beletes necpeas. ¹² Paques neporube neca. Nuyejque a veces necpea meyac. Ye onectzeco neyes confurme ca tli beletes necpexteca. Tlö quejtus nixbeteca cox turavea neteosebe amo tli quechibelea. Tlö

necpea hasta subra noso tlö amo yetla necpea, de todos modos neca confurme. ¹³Noche cuale necxicus porque yejuatzi niechylchecöhualo. ¹⁴Sin embargo, ara ca cuale que nenniechpaliebejque siendo que neprioso por Cristo.

¹⁵Nemejua pa puieblo de Filipos nenquelnömeque cuöc onepie netlanunutzaya de Jesucristo ompa pa Macedonia. Cuöc onequistie de Macedonia, solamente nemejua onenniechpaliebejque. Nenniechmacaque tomi. Tocnihua de ocsie löro amo niechpaliebejque. ¹⁶Pos cuöc oneyeya turavea pa puieblo de Tesalónica, nemejua onenniechhualtitlanelejque tomi para nonesidad. Amo sa sajpa, tlöcamo hasta ujpa. ¹⁷Amo nequejtoa san por necneque nenniechmacatasque tomi. Amo. Pos necneque ma niese que nemejua de melöhuac nentietequelpaña Deus, pues yejuatzi quelnömequesque de quiene nenniechchibelejque tlin cuale. ¹⁸Pos ye onecresibiro noche tli nenniechhualtitlanelejque hua öxö necpea lalebes meyac. Ca tli neniechhualtitlanelejque por medio de Epafrodito, necpea hasta subra. Quieme giente quecualejta iajfeyöca cupale, pos ejqueu Deus quecualejtalö tli nenquechihua de que nenniechhualtitlanelejque inu tomi. Ca inu nemejua nentiepöquelesmaca Deus. ¹⁹Pos Deus neniechmacasque noche tli neniechchibelea fölta. Yejuatzi quepealo ricojyutl hua tlanixtelestle lalebes meyac para cuale tiechmacasque por Cristo Jesús. ²⁰Yejuatzi toTajtzin Deus ma quepeacö yecteniebelestle nochepa semejca. Amén. Ma ejqueu iye.

Tlajpalulestle

²¹Xequentlajpalucö innochtie tli cate yecteque por Cristo Jesús. Tocnihua tli oncöncate ca naja neniechtlajpaloa. ²²Pos noche yecteque tli cate necö neniechtlajpaloa, especialmente yejua tli cate pa ipalösio rey César.

²³Tiefavur Tlöcatzintle Jesucristo ma iye pa nemoyulo.

Sente cörta tli San Pöblo oquemejcuelfe COLOSENSES

¹ Naja nePöblo, que neca netlateotitlantle de Cristo Jesús, pos ejqueu oquenejque Deus. Naja ca tiehua tocni Timoteo nemiechejcuelfea ini nönca cörta ² para nemejua, tocnihua tieca Cristo tli *nencate de confiönsa hua nencate nenyecteque, tli nenchajchönte ompa pa Colosas. Deus toTajtzi ma nemiechmeyaquelicö tiefavur hua neyulsiebelestle.

Pöblo motlajtlötlajtiöya por creyentes ipa Colosas

³ Seme tetietlasojcömatelea Deus tieTajtzi de toTlöcatzintle Jesucristo, hua totlajtlötlajtea por nemejua. ⁴ Pues tejcactecate de nemoneltoqueles tieca Cristo Jesús hua de nemotlasojteles para ca noche yecteque. ⁵ Nenquepejpea inu neltoquelestle hua inu tlasojtelestle ipampa nenquechixtecate inu söstantle tli momalfejteca para nemejua ompa elfecac. Pues nenquecajque de inu cuöc nenquecajque inu cuale tlamachestelestle, tli icaca melöhuac. ⁶ Pues inu cuale tlamachestelestle tli oaseco ca nemejua, nuyejque ejqueu mosujteca ipa noche tlöltecpectle hua tlamochihualtea. Hua ejqueu nuyejque tlamochihualtejteca entre nemejua desde inu tunale cuöc nenquecajque hua de melöhuac nencasojcömatque tiefavur de Deus. ⁷ Onenquetzecoque de inu tiefavur por medio de Epafras, öque tectlasojtla. Pos yaja tlatequepanoa iguöl quiename tejua, hua otlatequepano cuale por nemotequepa para Cristo. ⁸ Yaja otiechmacheste de nemotlasojteles tli nenquepejpea por yejuatzi Espíritu Sönto.

⁹ Por inu tejua nuyejque, desde cuöc tejcajque, amo tejcöhua de totlajtlötlajtea hua tetietlanelea Deus por nemejua. Tectlajtlane ma nemiechchihualticö para nenquixomatesque tietlanequeles, hua que para inu ma nemiechmacacö de noche machestelestle hua asojcömatelestle tli bitze de Espíritu Sönto. ¹⁰ De inu manera nennemesque quiename conbenierebe para öque tietocas Tlöcatzintle. Hua ejqueu yejuatzi quecualejtasque nemonemeles, hua nenquepeasque quiename fruto noche tlachihuale tlin cuale, hua nentieixomatesque Deus cache hua cache. ¹¹ Hua yejuatzi nemiechchecöjtasque ca noche checöhuallestle, quiename yejuatzi quepealo meyac checöhuallestle hua tlanixtelestle. De inu manera cuale nenquexicojtasque noche söstantle ca meyac paciencia hua meyac pöquelestle. ¹² Hua nentietlasojcömatelisque toTajtzi. Pos yejuatzi nemiechchihualtejque para ma cuale xecpeacö pörte de inu söstantle tli ica ipa tlöbile. Nemejua ca tiehua innochtie tli yecteque nemohuöxcatisque de inu söstantle. ¹³ Yejuatzi otiechmöquextiluc de ichecöhuales tlajtlayohuaquelestle, hua otiechtlölejque cöne tlamandöruro tieConietzi öque tietlasojtlalo. ¹⁴ TieConietzi iloac öque tiechmöquextilo hua tiechperdonöruro de totlajtlacul.

Cristo tiechsentlölejque ca Deus cuöc omecoac

¹⁵ Yejuatzi Cristo iloac tieixniehualo de Deus öque abele yeca tieyejtas. Hua iloac primero que noche söstantle tli Deus oquechejchijque. ¹⁶ Pues ca yejuatzi oquechejchijque noche söstantle tli onca pa elfecac hua pan tlöltecpectle, noche söstantle tli tequejta hua nuyejque tli amo tequejta, sea noso *reyes, noso tlajtocöyume, noso tlötlajtoönejme, noso autoridades; noche söstantle oquechejchijque por medio de Cristo hua para yejuatzi. ¹⁷ Hua yejuatzi Cristo iloya cachtö que noche söstantle. Hua por yejuatzi noche söstantle quesequiroa cuale ejqueu quiene cate. ¹⁸ Hua yejuatzi iloac quiename itzontecö cuiervo, hua tiecuiervo tecajcate tonochtie tli tecreyentes. Hua yejuatzi iloac piehuallestle, hua iloac primero en que cachtö oyulebihuac de intzölö mimejque. De maneras

* **1:2** Cuale nuyejque motradusirus: “nemoneltoca”.
tlajtojteca de tlötlajtoönejme de öngeles.

* **1:16** Literalmente quejtoa: “tronos”. De mölas Pöblo

que ipa noche sösantle yejuatzi iloac primero. ¹⁹ Pos Deus oquenejqque noche tienemeles ma iloa tieca Cristo. ²⁰ Hua por medio de Cristo Deus oquenejqque ocsajpa quesentlölisque noche sösantle ca yejuatzi, sea que sösantle de tlöltecpactle noso cox sösantle de elfecac. Ejqueu ayecmo yesque tieenemigos. Pos oquetiemacaque yecsiebelestle ca yejuatzi por medio de tieyesojtzi Cristo tli oquis ipan coruscuabetl.

²¹ Hua oyeya nemejua nenyeyjyeya quiename nenestranjeros para ca Deus. Nemo-ponieroöya ca yejuatzi por lo que tli nenquepensöroöya ipa nemoyulo. Pues sa nenquechihuaya lo que tli amo cuale. ²² Pero öxö Cristo ye nemiechsentlöllejque tieca Deus por medio de tiecuiervo, cuöc omecoac. Oquechijque ini nönca para nemiechp-resentörusque nenyecteque tieixpa yejuatzi, que amo nenquepeasque niontle tli amo cuale de que yeca cuale nemiechtieyelfis. ²³ Solamente xecsequirojtacö ipa nemonel-toqueles, hua xomoyejcujpetzojtacö hua xeyecchecöjtacö. Hua amo xomocaxönicö tlöcamo cache xecsequirojtacö de nenquechixtasque inu sösantle de lo que tli quejtoa inu cuale tlamachestelestle. Inu cuale tlamachestelestle omonunutz ca meyac giente ipa noche tlöltecpactle. Hua naja nePöblo netequete de netlanunutzas de inu cuale tlamachestelestle.

Pöblo omochi tlatequepano de creyentes

²⁴ Hua öxö nepajpöque ipa noche tli necsufrirojteca por nemejua. Pues de ini manera ipa nocuierpo necaxiltejteca lo que tli polebe de lo que tli quesufrirojque Cristo para tiecuiervo. Cuöc nequejtoa que oquesufrirojque para tiecuiervo nequejtusneque que oquesufrirojque para tonochtie tli tecreyentes. ²⁵ Hua naja onochihuaco nesente tlatequepano de nemonochtie nencreyentes. Pos Deus oniechmacaque inu cörgo para ma nemiechpaliebe nemejua, hua ma netlanunutza cuale de noche tietlajtultzi Deus.

²⁶ Tetlamachestea de inu secrieto tli mojoyöntaya por meyactie sientos de xebetl, pero öxö Deus otiechmachestiluc tejua tli teyecteque tecate. ²⁷ Pues oquenejqque otiechmach-estiluc quiene lalebes bieye hua cuale lalebes inu secrieto para tli amo nenjoriojte nencate. Hua inu secrieto ica ini nönca, que Cristo iloac ca nemejua, hua por inu cuale nenyeseque seguros de que nenquepeasque pörte de inu tlaniextelestle de elfecac.

²⁸ Tejua tetlanunutza de yejuatzi, hua tequemantesipörfea noche giente. Hua tequenmachtea ca meyac machestelestle, para tequenchiuualtisque ma yecö cuale ipa noche sösantle tieca Cristo. ²⁹ Hua para inu netequete lalebes hua nosforsöroa ca inu checöhualestle tli Cristo niechmacalo. Pos tiechecöhuales tequejteca checöhuac notech.

2

¹ Pues necneque ma xecmatecö que nosforsöroa lalebes por nemejua hua por toc-nihua tli cajcate ompa Laodicea, hua por noche ocseque tli ayemo niechixomate.

² Nosforsöroa ejqueu porque necneque ma xemanimörucö ipa nemoyulo, hua ma xomositelicö ca tlasojtelestle entre nemejua. Ejqueu nemoricojtisque de inu confiönsa de que nencasojcömate hua nenquixomate cuale inu secrieto de Deus, que yejuatzi Cristo.

³ Pos tietech yejuatzi mojoyönteca noche tielalebes bieye machesteles hua asojcömateles de Deus. ⁴ Nemiechelfea ini nönca para que majcamo yeca nemiechcajcaöhua ca tlajtulme cualtzetzi. ⁵ Pues mösque naja amo neca nemotzölö ca nocuierpo, pero ompa neca ca noyulo. Hua nepajpöcteca porque nequetzteca que nejnentecate quiene quemarcöroa tiemandamiento Deus, hua que nenchecöjtecate de nemoneltoqueles tieca Cristo.

⁶ Por inu, ejqueu quiename nentieselejque Cristo Jesús para que iloac Tlöcatzintle de nemejua, ejqueu noso xenemecö ca yejuatzi. ⁷ Xomonelhuayuticö de nemonemeles hua xomobepöhuacö ipa yejuatzi. Hua xomocujpetzucö de nemoneltoqueles, quiename ye onenquetzecojqque. Hua xetietlasojcömatelicö Deus lalebes.

Deus tiechyulebitejqque tieca Cristo

⁸ Xomotlachilicö majcamo huöla yeca ca sente machestelestle tli amo tli balierebe hua sa tlacajcayöhua, hua cana por inu machestelestle nemiechchihualtis ayecmo nentieneltocasque Deus. Porque inu machestelestle sa yebitz de tlöca, hua tiechelfea ma tosu-jetörucö ca inu *mandamientos de tlöltecpactlöca tli oyeya tecpejpeaya. Pos inu machestelestle amo ica de Cristo. ⁹ Porque tietech yejuatzi icaca noche lo que tli iloac Deus, ipa tiecuiervo. ¹⁰ Hua nemejua nencate intiero nencualteque tieca yejuatzi. Yejuatzi iloac tlajtoöne de noche autoridades hua checöhualesme. ¹¹ Nuyejque porque nencate tieca yejuatzi nemejua ye nemonacayutejque, pero ca sente nacayutequelestle tli abele quechihua tlöca, tli solamiente Cristo quechihualo. Hua inu nacayutequelestle ica para ayecmo tecneltocasque itlanequeles de tonacayo. ¹² Pues cuöc nemocuötiequejque icaca quiename tlö ye nemotlöltucaque tieca Cristo, hua nuyejque ye nenyulejque tieca yejuatzi. Pos nemoneltoca tieca Deus, öque por tiechecöhuales tieyulebitiluc Cristo de intzölö mimejque. ¹³ Hua nemejua nenyeyjeya quiename ye onenmejmejque para ca Deus, ipampa nentlajtlacoöya hua ipampa amo nemonacayutejque. Pero nemiechyulebitejque tieca yejuatzi, pues tiechperdonörojque de noche totlajtlacul. ¹⁴ Pos ica quiename tlö tetiebiquelejta yente cuienta, hua abele tectlaxtlöhuaya lo que tli tiechtlajtlaneliöya. Pero yejuatzi ye oquepojpolojque. Ica quiename tlö ye quecalöbosminque ipa tiecorujtzi para que ayecmo quiema tiechestorbörus. ¹⁵ Hua *quecuejcuelejque inchecöhuales de autoridades hua checöhualesme. Oquemumiyörojque por complieto imixtla de meyangiente, pues oquenxexicojque **ipan corujtzi.

Ma tectiemucö söstantle tli ica de tlapac

¹⁶ Por inu, majcamo yeca tlajto de nemejua por lo que tli nenquecua noso por lo que tli nencojcone, noso por lo que tli nenquechihua ipan tunalte de yelfetl noso tunalte de mietztle yancuec, o noso tunalte de siebelestle quiename söbro. ¹⁷ Porque noche inu nieca söstantle tiechejtetiöya ölgö de lo que tli tiechejtetea inu cuale tlamachestelestle, pero solamiente oyeya quiename sente itunalsiejyo de lo que tli huölösquea cache sötiepa. Pero lo que tli amo sa tunalsiejyo, pues iloac bel yejuatzi Cristo. ¹⁸ Majcamo yeca nemiechcuejcuele inu premio tli nemiechtocörus. Pues cuale yeca nemiechcuejcuellis inu premio por nemiechchihualtis ma xecchihuacö quiename yaja. Pues yaja queneque mopichaquis hua quenteochihuas öngeles, hua moquitzquea itech söstantle tli yaja oquejtac. Hua mochamöjteca sin que amoyetla quepea de tli mochamöhuas. Pues sa quepensöroa quiename tlöltecpactlöca. ¹⁹ Hua amo moquitzquea tietech Cristo. Pos yejuatzi iloac quiename itzontecö cuiervo, hua inu cuiervo tejua tecate. Pues sente cuiervo para mosietelis por medio de imemetehua hua icuierdashua hua ejqueu moquetzas, pos tiene que quepeas itzontecö. Ejqueu nuyejque tejua tieca tejuatzi cuale topaliebea tosietelea hua tobepöhua ca bepöhualestle tli yebitz de Deus. ²⁰ Tiehua Cristo ye onenmejmejque para que ayecmo nenquepeasque tli nenquejtasque ca inu *mandamientos de tlöltecpactlöca tli oyeya nenquepejpeaya. ¿Tlica noso turavea nenquechihua quiename tlö nenyene nende tlöltecpactlöca? ²¹ Nemosujetöroa ca inu mandamientos tli quejtoa, por ejemplo: “Amo xejcua ini”, noso, “Amo xecase nieca”, noso, “Amo xecmötoca niecaju”. ²² Pero noche inu söstantle sa ixniempolebes cuöc tlames. Pos noche niecate söstantle cate mandamientos de tlöca. ²³ Pues nejniese tlajmatque inu mandamientos, porque tlajtlane ma öque iye religioso porque yaja queneque, hua ma mopichaque, hua ma quemaltratöro icuierpo. Pero niecate söstantle amo *balierebe; solamiente öque quechihua inu söstantle para quepeas lo que tli queneque inacayo.

* **2:8** Cuale nuyejque motradusirus: “espíritus de tlöltecpactle tli oyeya tequenneltocaya”. Xomojtelicö v. 20, Gá. 4.3, 9.

* **2:15** Cuale nuyejque motradusirus: “oquenquextejque de tietech inu autoridades...” ** **2:15** Cuale nuyejque motradusirus: “por medio de tieConietzi”. * **2:20** Xomotelicö v. 8. * **2:23** Cuale nuyejque motradusirus: “balierebe para öque quedominörus itlanequeles inacayo”.

3

¹ Bieno pues, tlö ye onenyojyulejque tieca Cristo hua onemiejque de ipa mequelestle, xectiemucö inu sösantle tli ica de tlacpac, cöne Cristo yehualuteca ca tiemöyecmö Deus. ² Seme xecpensörojtacö de sösantle tli ica tlacpac, hua amo de sösantle tli ica pa tlöltecpactle. ³ Porque ye onemiejque, hua nemonemeles mojoyönteca tieca Cristo tieitech Deus. ⁴ Cristo mismo iloac nemonemeles, hua cuöc yejuatzi niexihuas, entunses nuyejque nemejua nenniesesque tieca yejuatzi ijtec tlaniextelestle.

Ma tejcöhuacö sösantle amo cuale hua ma tecchihuacö sösantle tlin cuale

⁵ Por inu xecmecticö noche sösantle amo cuale tli onca ipa nemonemeles. Por ejiemplo, ica amo cuale cuöc öque mopöctea ca sohuatl tli amo ica isohua, hua ica amo cuale cuöc quechihua sösantle petzoyutl, noso cuöc quepea deseos hua tlaeliebelestle tli amo cuale, noso cuöc micoltea lalebes por lo que tli ihuöxca ocsente. Pos cuöc öque micoltea, icaca quiename tlö quenteochijteca ixniehualojme. ⁶ Pos por ipampa noche inu sösantle yebitz tiecualöneles Deus impa niecate tli amo tlajtlaneltoaca. ⁷ Hua oyeya nemejua nenquechihuaya inu sösantle ipa nemonemeles tli ye opanuc. ⁸ Pero öxö nemejua nuyejque xejcöhuacö noche ini sösantle: cualönalestle, tlabielmequelestle, tlabielejtelestle, istlacatelestle, petzotlajtulme. Majcamo quisacö de nemocamac inu tlajtulme. ⁹ Ayecmo xomolficö entre nemejua de lo que tli amo melöhuac. Pos ye onenquecöjque *nemonemeles soltec ca noche itlachihual, ¹⁰ hua ye nenquetlölejque quiename tlaquentle *nemonemeles yancuec, tli moyancuelejteca cache hua cache para cache cuale nentieixomatesque hua cache nenyisque quiename yejuatzi öque oquechejchijque inu nemelestle. ¹¹ Pa nönca nemelestle ayecmo onca diferiencia entre griegos hua joriojte, entre tli monacayuteque hua tli amo monacayuteque, nimpor entre nemejua hua extranjeros hua giente de munte, nimpor entre tli esclavos hua tli amo esclavos. Pues ayecmo importörebe öquenu tecate tejua, solamente Cristo importörebihua. Hua yejuatzi iloac totech tonochtie.

¹² Por inu noso xectlölicö quiename tlaquentle ipa nemoyulo sösantle cuale. Pos nencate nengiente nenyecteque, öque Deus nemiechixpejpenque hua nemiechtlasojtlalo. Xequenpilocö tietlöocoltelestle para ca ocseque ipa nemoyulo. Xeyecö nencualtientlöca. Amo xomochamöhuacö. Xomoportörucö cuale. Xecxucö ca paciencia lo que tli nemiechpasöroa. ¹³ Tlö canajyeca nemiechchibelis canajyetla sösantle amo cuale, xecxucö, hua xecperdonörucö. Ejqueu quiename Tlöcatzintle nemiechperdonörojque nemejua, ejqueu nuyejque xecchihuacö nemejua. ¹⁴ Hua cachtö de noche sösantle xecpeacö tlasojtelestle. Pues inu tlasojtelestle quensietelea noche sösantle para yesque intiero cuale. ¹⁵ Hua ma tlamandöro ipa nemoyulo inu yulsiebelestle tli quietiemaalo Cristo. Pues para inu nemiechnutzque Deus, para nenquepeasque yulsiebelestle hua para nenyisque sa sie cuierpo. Hua seme xetietlasojcömatelicö.

¹⁶ Tietlajtultzi de Cristo ma intiero quietiemitte nemoyulo. Ca noche machestelestle xomomacticö hua xomotlajtulmacacö entre nemejua ca salmos hua himnos hua cuicatelesme de tieEspíritu Deus. Xetiecuaticö Deus *ca tlasojcömatelestle ipa nemoyulo. ¹⁷ Hua noche lo que tli nenquechihua noso nenquejtoa, xecchihuacö noche tietucöyupantzinco Tlöcatzintle Jesucristo, hua xetietlasojcömatelicö Deus Tajtle por medio de yejuatzi.

Quiene ma tenemecö ca ocseque

* **3:9** Literalmente quejtoa: “inu tlöcatl tli ye biebertzi soltec”, hua, “inu tlöcatl yancuec”. Seque quepensöroa que tlajtlajtoa de Adán hua Cristo. * **3:16** Cuale nuyejque motradusirus: “por tiefavur Deus”, noso, “ca cuicatelestle cuöcualtzi”.

¹⁸ Sohuame, xomosujetörucö ca nemonajnömecua, pues ejqueu conbenierebe porque nencate tieca toTlöcatzintle. ¹⁹ Tlöca, xequentlasojtlacö nemosojsohuöhuö, hua amo sa xequentlabilajajuacö.

²⁰ Nemejua tli nencate neninpelhua, xequenneltocacö nemotötajua ipa noche tli nemiechmandöroa. Pos ejqueu quecualejtalo Tlöcatzintle ma xecchihuacö nemejua tli nencate tieca yejuatzi. ²¹ Tötajte, amo xequencualönticö nemopelhua, para que majcamo modesanimörucö.

²² Esclavos, seme xetlaneltocacö ca nemopatrones necö ipan tlöltecpectle hua xecchihuacö noche tli nemiechmandöroa. Amo solamiente xecchihuacö cöne cuale yejua quejta, quiename seque quechihua, niecate tli solamiente queneque mocöhuasque cuale ca giente. Cache nemejua xetequetecö ca noche nemoyulo, porque nentiemabelea toTlöcatzintle. ²³ Cuöc nenquechihua canajyetla, xetequetecö ca meyac gönas, quiename tlö nenquechijtane para toTlöcatzintle hua amo para giente. ²⁴ Pues ye nenquemajmate que toTlöcatzintle iloac öque nemiechmacasque inu tlaxtlöbile tli nemohuöxcatisque. Porque nemejua nentietequepanoa *Tlöcatzintle Cristo. ²⁵ Pero öque quechihua tli amo cuale queselis inu tli oquechi, hua Deus amo tlachecuaejtalo.

4

¹ Patrones, xequenmacacö nemoesclavos lo que tli conbenierebe, lo que tli quemeresieroa. Hua xequelnömectacö que nenquepea sente *nemoPatrón ompa elfecac.

² Xomodedicörucö xomotlajtlötlajtejtacö. Seme xeyectlachixtacö ica nemotlötajteles, hua xetietlasojcömatelicö Deus. ³ Xomotlajtlötlajticö nuyejque por tejua, para ma tiechmacacö Deus locör para tetlanunutzasque de tietlajtultzi, para tecyecpoasque inu secreto de Cristo. Öxö neca neprioso ipampa netlanunutzaya de inu. ⁴ Xomotlajtlötlajticö para ma necyecmacheeste cuale, pues ejqueu conbenierebe.

⁵ Xomoportörucö ca macheestelestele para ca niecate tli amo creyentes. Xecaprovechörucö cuale nemotiempo. ⁶ Nemotlajtulhua seme ma yecö cualtzetzi, *tli amo tlacualöntis, para cuale nenquematesque quiene nenquennönquelisque noche giente.

Tlajpalulestele

⁷ Totlasojcöicni Tíquico, öque yectequete hua tietequepanoa toTlöcatzintle tieca tejua, yaja nemiechpubelis quiene neca. ⁸ Pues por ini nönca nectitlanteca, para ma xecmatecö quiene tecate hua para ma nemiechanimöro ipa nemoyulo. ⁹ Ihua nectitlanteca Onésimo, tocni öque ica de confiönsa, öque tectlasojtla, öque ica de nemejua mismos. Yejua nemiechpubelisque noche lo que tli mochijteca necö.

¹⁰ Aristarco, nocompaniero de cörsel, nemiechtlajpaloa, hua nuyejque Mörcos, iprimo Bernabé. (Ye nemiechtlajtulmacac que tlö cana iyös ca nemejua, xecselicö.) ¹¹ Nuyejque nemiechtlajpaloa Jesús öque mocuitea Justo. Noche nöncate cate joriojte, hua solamiente yejua de entre joriojte tejtequete noca para ma tlamandörucö Deus inca giente. Yejua niechanimöroa lalebes. ¹² Nuyejque nemiechtlajpaloa Epafra, öque ica de nemejua, hua öque tietequepanoa Cristo. Yaja seme motlajtlötlajtea por nemejua, para ma xomocua-jpetzojtacö quiename tlö ye nentlöca nencate, que ye cuale nenquemajmate de noche lo que tli tietlanequeles Deus. ¹³ Pues naja neca netestigo de quiene yaja motequepachoa por nemejua, hua por tocnihua ompa ipa Laodicea hua Hierápolis. ¹⁴ Inu mierco Lucas, öque tonochtie tectlasojtla, nemiechtlajpaloa, hua nuyejque nemiechtlajpaloa Demas.

¹⁵ Xequentlajpalucö tocnihua tli cate ompa Laodicea. Hua xectlajpalucö Ninfa hua tocnihua tli mosentlölea ipa ichö. ¹⁶ Hua cuöc ye nenquetlajtultejque ini cörta entre nemejua, xectitlanecö para ma quetlajtulticö ompa Laodicea, hua nuyejque nemejua

* **3:24** Sa sie tlajtule ca griego quejtusneque “patrón” hua nuyejque “tlöcatzintle”. motradusirus: “gracioso”, noso, “ca tlin cuale”. Literalmente quejtoa “ca istatl”.

* **4:6** Cuale nuyejque

xectlajtulticö inu cörta tli nectitlanteca para yejua. ¹⁷ Hua xequelficö Arquipo ini nönca: “Xequejta cuale inu tequetl tli otecsele para tecchihuas por toTlöcatzintle, hua xejcumpliro”.

¹⁸ Naja nePöblo nemiehejcuelfea ini nönca tlajpalulestle ca belaja nomö. Xequelnömequecö que neca ipan cörsel. Tiefavur Deus ma iye ca nemejua.

Primero cörta tli San Pöblo oquemejcuelfe TESALONICENSÉS

¹ Naja nePöblo. Naja ca tiehua Silvano hua Timoteo nemiechejcuelfea ini nönca cörta para nemejua tli nencate de inu grupo de creyentes de inu ciudad de Tesalónica, tli nencate tieinca Deus toTajtzí hua Tlöcatzintle Jesucristo. Ma xecpeacö tiefavur Deus hua neyulsiebelestle.

Creyentes ipa Tesalónica oyejyeya sente ejiepmo para ocseque

² Seme tetietlasojcömátelea Deus por nemonochtie nemejua. Tetieyelfea yejuatzi de nemejua ipa totlajtlötlajteles. ³ Pos tejua seme tequelnömetecate de lo que tli nenquechijque ipampa nemoneltoca, hua de quiene nentequetque laebes ipampa nentietlasojtla Deus, hua de quiene nenquexicojtecate meyac söstantle ipampa nenquepea nemöchealestle tieitech toTlöcatzintle Jesucristo. De noche inu quematihuataca toTajtzin Deus. ⁴ Pos tejua tecmate que Deus nemiechtlasojtlalo, tocnihua, hua nemiechixpejpenque. ⁵ Tecmajmate de inu porque inu quale tlamachestelestle tli tejua nemiechpubelejque amo ocalac ijtec nemoyulo sa de tlajtulme. Cache ocalac ca tiechecöhuales Espíritu Sönto, hua ca inu confiönsa de que inu tlamachestelestle ica melöhuac. Cuale nenquemajmate nemejua quiene tejua tecchihuaya nemotzölö. Ejqueu tecchihuaya por nemopampa. ⁶ Hua nemejua nenquechijtecate lo que tli nenquejtaque de tejua hua nenquecajque de toTlöcatzintle. Pos nenqueselejque inu tlajtule ca meyac pöquelestle tli yejuatzi Espíritu Sönto nemiechmacaque, mös nenquesufrirojtaya. ⁷ De inu manera ye nencate ejiepmo para noche creyentes tli cate pa nemoestado de Macedonia hua nuyejque ipa estado de Acaya. ⁸ Pos tietlajtultzi Tlöcatzintle ye omacheac desde nemejua amo sa pa Macedonia hua Acaya, tlöcamo nuyejque ipa meyactie ocseque pörtes. Ye omacheac de nemoneltoqueles tli tieca Deus nenquepejpea. De maneras que tejua amo tecnesesitöroa tequemelfisque ocseque creyentes de nemejua, ⁹ pos yejua mismos quepoa de quiene tejua teyajque nemotlac hua quiene nemejua nemoyulcuejque para nentietocaque Deus hua ayecmo nenquentocaque ixniehualojme. Hua toDeus öque öxö nentieneltocatecate, yejuatzi iloac Deus de melöhuac, hua nemoateca. ¹⁰ Nuyejque quepoa ocseque creyentes quiene nemejua nentiechixtecate tieConietzi Deus öque hualiloas de ompa elfecac, öque yejuatzi tieTajtzí tieyulebitiluc de intzölö mimejque. Yejuatzi iloac Jesús öque tiechmöquextilo de tiecualöneles Deus, tli yebitz ipan tlöltecpactle.

2

Quiene otequet Pöblo ipa Tesalónica

¹ Pos nemejua nenquemate, tocnihua, que cuöc teyejyeya ompa ca nemejua, amo de embölde oyeya. ² Ma tequejtucö mösque oyeya giente tiechtratörojque san petzotec ompa pa ciudad de Filipos (quieme nemejua nenquemajmate), mös ejqueu tiechchibelejque, pero Deus tiechyulchecöhualoöya. Ejqueu nemiechnunutzque de inu quale tlamachestelestle de Deus, mösque otiechcostöro meyac traböjo. ³ Pos cuöc tejua nemiechyuliehuaya para nemoneltocasque tieca Cristo, amo tecchijque porque tejua totlapolulteijque, nimpor porque tecpeaya toyulo amo quale, nimpor amo tecchijque ca tlacajcayöhuallestle. ⁴ Cache seme tetlanunutztecate para que Deus quecualejtasque lo que tli tequejtoa. Pos yejuatzi tiechixnenebelejque hua tiechtlölejque quieme teencargödos de inu quale tlamachestelestle. Ejqueu tetlanunutzta tejua, amo para quecualejtasque giente, tlöcamo para ma quecualejtacö Deus, öque tiechixnenebeliluteca toyulo. ⁵ Pos quieme nemejua

nenquemate, ayec tetlajtojque de nemejua ca tlajtulme cualtzetzi para nemiechcajcajohuasque. Cuale huölös yeca tli nemiechnunutzas cuöcualtzi para majcamo xecmatecö que yaja quetiemoa tomi. Tejua ayec tecchijque ejqueu. Deus quematihua de inu. ⁶ Nuyejque ayec tectiemojque yectieniebestle de giente, cox de nemejua cox de ocseque giente, mösque cuale tecchihuasquiöne xecmachelicö tochecöhuales quieme tetlateotitlanme de Cristo. ⁷ Pero amo toconchijque inu, tlöcamo teyejyeya temöxos entre nemejua quieme pelantzetzzi, noso quieme sente sohuatl tli modedicöroa quemixutea pelantzetzzi de ocseque, pero cache ca meyac tlasojtelestle quemixutea tli ihuöxcagua. Ejqueu tecchijque ca nemejua. ⁸ Porque tejua nemiechpilea meyac tlasojtelestle, que hasta tecnequeya nemiechmöctisque amo sa cuale tlamachestelestle de Deus, tlöcamo nuyejque belaja tonemeles, pos nemiechtlasojtlaya lalebes. ⁹ Pues nenquelnömequesque, tocnihua, quiene tontequetque ca meyac traböjo. Ca tunale hua ca yohuale tetejetequeteya para tetlacuösque. Pues amo tecnequeya ma tiechtlacualtejta canajyeca de nemejua mientras nemiechnunutzaya de inu cuale tlamachestelestle de Deus.

¹⁰ Nemejua nenquemajmate, hua Deus nuyejque quematihuateca, que tejua tecchijque tli yectec hua mabestec ca nemejua tli nencreyentes, hua amo tecchijque niontle amo cuale. ¹¹ Pos nemejua nenquemate quiene tecchijque ca nemejua quieme sente tajtle quechihua ca ipelhua. ¹² Pos tejua nemiechmachtejque hua nemiechyuliejque ma xecchiuacö lo que tlin cuale, hua nemiechtlajtulmacaque xecchiuacö quiene nemiechconbenieroa ipampa de Deus nencate. Pos yejuatzi nemiechnutzalo para ma xecpeacö pörte ijtec tietlaniexteles ompa cöne tlamandöruro.

¹³ Por inu tejua seme tetietlasojcömateleca Deus, pos cuöc nemejua nenquecajque inu tlajtule de Deus tli tejua nemiechnunutzque, nenqueselejque quieme tlajtule de Deus, hua amo quieme tlajtule de tlöca. Pos melöhuac yaja tlajtule de Deus, hua cuale niese lo que tli quechijteca pa nemoyulo de nemejua tli nencate nencreyentes. ¹⁴ Pos nemejua, tocnihua, cuöc inu giente de nemopuieblo nemiechtepotztocaque, nemopa omochi quieme niecate grupos de creyentes ca Deus hua ca Cristo Jesús tli cate ompa Judea. Porque joriojte quentepotztocaque inu grupos de creyentes de inpuieblo. ¹⁵ Inu joriojte tli amo creyentes, yejua tiemectejque toTlöcatzintle Jesús, ejqueu quieme oyeya quenmejmectejque inu tlayulepantejque tli tlanunutzaya de pörte de Deus. Hua yejua joriojte tiechquextejque tejua de meyac pörtes. Deus amo quecualajtalo lo que tli quechihua yejua. Hua yejua cate encuntra de noche ocseque giente, ¹⁶ porque amo tiechcöhua ma tequennunutzacö tli amo joriojte para ma momöquexticö yejua nuyejque. De inu manera momeyaquelea intlajtlacul de inu joriojte. Pero ye lalebes meyac tiecualöneles Deus impa betzteca.

Pöblo quenequeya quemejtas ocsajpa

¹⁷ Pero tejua, tocnihua, cuöc tocöjque por quiesque tiempo hua amo tojtaque, mösque seme toyulo nemiechpeaya totlac, tecnequeya lalebes teyösque para tojtasque. ¹⁸ Por inu tecpensörojque teyösque nemotlac. Naja nePöblo ye ca ujpa necpensöro neyös. Pero amo otiehcö Satanás. ¹⁹ Pos ¿tli iyec lo que tli teccheasque, tli tiechmacas pöquelestle, ca tli tochamöhuasque ipa inun tunale cuöc hualiloas toTlöcatzintle Jesús hua teyesque tieixtla? Pos nemejua nenyecque. ²⁰ Nemejua nencate nentochamöhuales hua nentopöqueles.

3

¹ Ejqueu noso, cuöc ayecmo tecxicojque de tönito tecpensöroöya de nemejua, tecpensörojque tocöhuasque tosiel necö Atenas. ² Hua tectitlanque tocní Timoteo, öque tieca Deus tequete de inu tequetl de que tlanunutzaya de inu cuale tlamachestelestle de Cristo. Otectitlanque para ma cafirmöro nemoneltoqueles hua ma nemiechanimöro, ³ para majcamo yeca nemiechcajcajohua pa ini nöncate tunalte cuöc giente nemiechtepotztocasque. Pos nenquemajmate que nönca tocnupel, que giente amo

tiechnequesque. ⁴ Hua cuöc teyejyeya nemotzölö ye nemiechantesipörfejqe de que tec-sufriusque. Hua ejqueu omochi, quieme nenquemajmate. ⁵ Por inu naja, cuöc ayecmo necxicoöya, nectitla Timoteo nemotlac para necmates tlö oc turavea nemoneltoca cuale. Pos nomajtiöya de que inu tieyulmajmötocane cana ye nemiechyulmajmötocac, hua totraböjo amo tli oserbirebesquea.

⁶ Öxö, ye onasecö Timoteo de Tesalónica, cöne nemejua nencate. Hua quebiczatc cuale tlamachestelestle de nemoneltoqueles hua de nemotlasojteles. Tiechelfe que seme nentiechelnömeque ca tlasojtelestle hua que nenqueneque lalebes nentiechejtasque, ejqueu quiename tejua nuyejque tecnejneque nemiechejtasque. ⁷ Por ini nönca, tocnihua, mösque giente tiechtlajyejytaya hua tiehcocoöya tocuierpo, pero toyulsiebiöya lalebes cuöc tejcajqe quiene nemoneltoca. ⁸ Seme toscalea cuöc tejcaque que nenchecöjtecate tieca Tlöcatzintle. ⁹ ¿Quiene noso cuale tetietlasojcömatelisque toDeus por nemejua hua por noche inu pöquelestle tli tecpejpea tieixtla Deus por nemejua? ¹⁰ Yohualen tunale tetietlötajtea lalebes para ma tiehcöhuacö para nemiechejtatibe ocsajpa. Pos tecneque teescöhuasque lo que tli oc polebe para ma xeyecö intiero nencualteque de nemoneltoqueles.

¹¹ Öxö, mismo Deus toTajtzi hua Tlöcatzintle Jesús ma tiechpaliebicö para cuale teyösque ca nemejua. ¹² Tlöcatzintle ma nemiechmeyaquelicö hua cache hua cache nemiechmacacö neltoquelestle hua tlasojtelestle, para ma uye inu tlasojtelestle entre nemejua hua nuyejque ca ocseque giente, ejqueu quiename tejua nemiechpilea inu tlasojtelestle ca nemejua. ¹³ Ma nemiechmacacö fuierpa ipa nemoyulo para que nenyecque nenyecteque, sin niontle de amo cuale, tieixtla Deus toTajtzi, cuöc hualiloas toTlöcatzintle Jesús ca noche giente tli tiehuöxchua.

4

Quiene conbenierebe öque nemes para quecualejtasque Deus

¹ Öxö, nocnihua, nemiechtlajtlanelea hua nemiechtlötajtea tietucöyupantzinco Tlöcatzintle Jesús, xecsequirucö hua xecchijtacö cache hua cache lo que tli nemiechejtetejqe, quiename ye nenquechijtecate. Pos tejua nemiechejtetejqe quiene conbenierebe öque nemes para que ejqueu Deus quecualejtasque. ² Nemejua nenquemajmate lo que tli nemiechtlajtulmacaque por tiechecöhuales de toTlöcatzintle Jesús. ³ Pues yaja ini nönca lo que tli quenequihua Deus, que nemonemeles ma iye yectec. Quenequihua majcamo yeca mopajpöcte ca ocseque sohuame tlöcamo solamiente ca tli isohua. ⁴ Ejqueu noso, cara sente ma momachte *quepeas isohua de sente manera yectec hua ca meyac respieto. ⁵ Majcamo queliebe lo que tli amo cuale, quiename queliebea ocseque giente que amo tieixomate toDeus. ⁶ Majcamo yeca tlajtlaco hua majcamo maprovechöro de sente icni pa ini nönca asunto. Pos toTlöcatzintle quencastecörurus checöhuac innochie tli quechihua inu söstantle, quiename ye nemiechantesipörfejqe hua nemiechtlajtulmacaque. ⁷ Pues Deus amo tiechixpejpenque para ma tenemecö ipa petzoyutl, tlöcamo quenequihua ma iye yectec tonemeles. ⁸ Por inu, öque amo queneltoca inu nieca tlamachestelestle, amo tieneltoca Deus. Pos inu nieca machestelestle amo yebitz de tlöca tlöcamo de Deus, öque tiechmacalo tieEspíritu öque yectec iloac.

⁹ Pero de inu tlasojtelestle para tocnihua, ¿tli para nemiechejcuelfis de inu? Pos Deus ye nemiechmachestiluteca para que ye nemotlasojtlatecate entre nemejua. ¹⁰ Pos ejqueu ye nenquentlasojtla innochie tocnihua tli chajchönte pa noche estado de Macedonia. ¹¹ Pero nemiechtlötajtea, nocnihua, que nemotlasojteles ma momeyaquale

* 4:4 Cuale nuyejque motradusirus: "quemalfis icuierpo".

cache. Hua xecnequecö nennemesque ca cuale hua ca siebelestle. Hua *amo xecalaquecö ipa asuntos tli amo nemohuöxcagua. Hua xeyectequetecö, quiename tejua nemiechtlajtulmacaque. ¹² Ejqueu xenemecö quiene conbenierebe imixtla ocseque giente, pos ejqueu amo nemiechpolus niontle.

Hualiloas toTlöcatzintle

¹³ Tocnihua, tecneque ma xecmatecö de niecate tli omejmejque, para majcamo xomoyulcocucö quiename moyulcocoa ocseque giente tli amo quepejpea nemöchealestle. ¹⁴ Pos toneltoca que Jesús omecoac hua sötiepa oyulebihuac. Hua ejqueu mismo toneltoca que niecate tli moneltocaque tieca Jesús hua ye omejmejque, Deus quechihuasque ma huölöcö tieca Jesús.

¹⁵ Pos nönca tli tejua nemiechelfea ica tietlajtultzi Tlöcatzintle, que tejua tli oc turavea tenejneme hua tocöhuasque hasta cuöc hualiloas Tlöcatzintle, tejua amo tetlayecönasque antes de niecate tli omejmejque. ¹⁶ Porque Tlöcatzintle mismo temoas de elfecac, hua tiechtzajtzelisque ca itlajtul de inu arcöngel, tli ica capetö de ocseque öngeles, hua ca inu tlapitzale de Deus. Entunes niecate tli moneltocaque tieca Cristo hua omejmejque, yejua yulebesque cachto. ¹⁷ Sötiepa tejua tli oc turavea tenejneme tiechbicasque inhua tli ye jojyulejque. Hua tetejcusque itzölö mextle para tetienömequesque Tlöcatzintle ompa tlapac. Ejqueu teyesque ca Tlöcatzintle nochepa. ¹⁸ Xomoyuliehuacö noso entre nemejua ca nöncate tlajtulme.

5

¹ Pero, ¿tli para nemiechejcuelfis de tunalte o noso ura que pasörebes ini nönca? ² Pos nemejua ye nenquemate cuale que inu tunale de toTlöcatzintle ases sin que amo öque quemates quiema yebitz, quiename cuöc yebitz sente tlachtejque ca yohuale. ³ Cuöc giente quejtojtasque: “Noche icaca cuale, hua onca siebelestle”, entunes sa sie repiente impa huölös tlaxexetunelestle hua mequelestle. Iyes quiename cuöc sente sohuatl ica utztle, hua sa sie repiente yebitz inu tiecoco de que quetlöcatelis peltzintle. Hua de inu tlaxexetunelestle abele cholusque giente. ⁴ Pero nemejua, tocnihua, amo nencate ijtec tlajtlayohuaquelestle, para que inu tunale de toTlöcatzintle majcamo nemiechnöhualase quieme cuöc tlanöhualase sente tlachtejque. ⁵ Pos nemonochtie nencate de tlöbile hua de ca tunale. Tejua tli tecreyentes amo tecate de ca yohuale nimpör amo tecate de tlajtlayohuaquelestle. ⁶ Por inu majcamo tecojcochtacö quiename ocseque giente cojcoche. Cache ma teyectlajtlachixtacö hua ma tecyecpensörojtacö. Majcamo tecpensörojtacö quieme tlajtlöhuöncötzetzi. ⁷ Pos tli cojcoche, cojcoche ca yohuale, hua tli tlajtlöhuöna, tlajtlöhuöna ca yohuale. ⁸ Pero tejua tli tecate de ca tunale, seme ma cuale tecyecpensörojtacö. Ma toixuticö ca toneltoqueles hua totlasojteles, quiename sente soltöro mixutea ca itlaquie de tepostle ipa ipiecho. Hua ma techixtacö de que Deus tiechmöquextisque. Inu nemöchealestle iyes quiename icösco de tepostle ca tli quixutea itzonteco soltöro. ⁹ Pos Deus amo tiechixpejpenque para tiechcastecörusque, tlöcamo para ma tecpeacö nemöquextelestle por toTlöcatzintle Jesucristo. ¹⁰ Yejuatzi Jesucristo omecoac por tejua para que tonochtie ma tenemecö tiehuantzincö, ya sea cox tenentecate cuöc hualiloas, noso cox ye otemejmejque. ¹¹ Por inu, xomoyuliehuacö hua xomoyulchecöhuacö entre nemejua, quiename ye nenquechijtecate.

Consiejos

¹² Nemiechtlötlajtea, tocnihua, xequemejtacö niecate tli tejtequete nemotzölö hua nemiechyecöna hua nemiechtlajtulmaca tietucöyupantzincö Tlöcatzintle. ¹³ Xequenyequajtacö hua xequentlasojtlacö lalebes, por inteque tli quechijtecate. Ma seme uye siebelestle entre nemejua.

* **4:11** Cuale nuyejque motradusirus: “xomodedicörucö pa nemotraböjo”.

¹⁴ Nuyejque nemiechtajtulmaca, tocnihua, xequemelficö niecate tli amo quenejneque tejtequetesque, que majcama quetlatzebelicö. Xequenyuliehuacö niecate tli amo quenejneque quesequirusque. Xequenpaliebicö niecate tli quenpoloa checöhualestle. Xequenxicucö innochie ca paciencia.

¹⁵ Tlö canajyeca nemiechchibelea yetla amo cuale, xecpeacö cueröro majcama xecuepelicö ca tli amo cuale, tlöcamo xecchihuacö seme tlin cuale entre nemejua hua nuyejque ca ocseque giente.

¹⁶ Seme xepöctacö. ¹⁷ Seme xomotlötajtejtacö. ¹⁸ Xetietlasojcömatelicö Deus ipa noche söstantle tli nemiechpasöroa, pos yaja ini nönca lo que tli Deus quenequihua ma xecchihuacö nemejua tli nencate tieca Cristo Jesús.

¹⁹ Amo xectzacuelicö lo que tli Espíritu de Deus quenequihua quechihuasque. ²⁰ Amo xecdespresiörucö lo que tli quejtoa tlayulepantejque cuöc tlajtlajtoa de pörte de Deus. ²¹ Pero xecprobörucö noche söstantle tli nenquecaque, hua xomocöhuacö ca lo que tlin cuale. ²² Xomomalficö de noche söstantle tli amo cuale.

²³ Deus mismo, öque tiechmacalo yulsiebelestle, ma nemiechyectelicö intiero cuale, hua ma nemiechixuticö para quemalfisque nemoyulo hua nemoölma hua nemocuiervo para que amo nemiechpolus niontle hua amo nenquepeasque niontle de amo cuale ipa nemonemeles cuöc hualiloas toTlöcatzintle Jesucristo. ²⁴ Yejuatzi öque nemiechnutzque iloac de confiönsa, hua quechihuasque ini nönca söstantle.

Tlajpalulestle

²⁵ Tlocnihua, xomotlajtlötajticö por tejua nuyejque.

²⁶ Xequentlajpalucö innochie tocnihua ca sente petzulestle de yectelestle.

²⁷ Nemiechencargörfea tietucöyupantzinco Tlöcatzintle xectlajtulticö nönca cörta ca innochie tocnihua.

²⁸ Tiefavur de toTlöcatzintle Jesucristo ma iye ca nemejua.

Cörta tli San Pöblo ca ujpa oquemejcuelfe TESALONICENSES

¹ Naja nePöblo. Naja ca tiehua Silvano hua Timoteo nemiechejcuelfea ini nönca cörta para nemejua tli nencate de inu grupo de creyentes ipa inu ciudad de Tesalónica, que nencate tieinca Deus toTajtzi hua Tlöcatzintle Jesucristo. ² Ma xecpeacö tieinfavur hua neyulsiebelestle de Deus toTajtzi hua de Tlöcatzintle Jesucristo.

Deus quenjuscörurus tlajtlaculteque cuöc Jesús hualiloas

³ Tocnihua, tecpea que tetietlasojcömatelisque toDeus seme por nemejua. Pos ejqueu conbenierebe ma tecchiuacö, porque nemoneltoqueles momeyaunquelejteca hua mobepöjteca nemotlasojteles de cara sente de nemejua para ca ocseque. ⁴ Tejua mismo topöctea de nemotlachihual hua tetlanunutzta de nemejua ca ocseque grupos de creyentes ca Deus. Tequemelfea de que cuale nenquexicojtecate meyac sösantle, hua de que nemoneltocatecate mösque giente nemiechtepotztoca. ⁵ Ini nönca tiechmachestea que Deus iloac yectec cöne tlajuscöruro, cöne yejuatzi quejtulo que nemejua nenquemereresieroa nencalaquesque ompa cöne yejuatzi tlamandöruro. Pos nemejua de melöhuac nenquesufrirojtecate ipampa nenquepea inu nemöchealestle.

⁶ Pos ejqueu conbenierebe que Deus ma quencuepelicö sufrimientos impa niecate tli nemiechchihualtea ma xecsufirucö nemejua. ⁷⁻⁸ Nuyejque conbenierebe ma nemiechmacacö siebelestle ca nemejua tli nenquesufrirojtecate. Hua nuyejque tejua tiechmacasque siebelestle ipa inu tunale cuöc neniextilus Tlöcatzintle Jesús. Pos temoas de elfecac itzölö tletzintle tli mönteca, ca tieöngeles hua ca noche tiechecöhuales. Hualiloas para quencastecörusque noche niecate tli amo tieixomatque Deus, hua niecate tli amo queneltocaque inu cuale tlamachestelestle de toTlöcatzintle Jesús. ⁹ Noche niecate quencastecörusque hua niempolebes inyulo nochepa. Bejca yesque de tiexöyac Tlöcatzintle, hua amo quejtasque tietlaniexteles hua tiechecöhuales. ¹⁰ Noche inu pasörebés inu tunale cuöc hualiloas Tlöcatzintle para ma tieyectieniehuacö noche giente tli tiehuöxcahua. Hua quetietzömatesque yejua tli moneltoca tieca, ya que nemejua nemoneltocaque lo que tli tejua nemiechpubelejque.

¹¹ Por ini nönca seme totlajtlötlajtea por nemejua, que toDeus ma nemiechmacacö para nenquemereresierusque de que nemiechixpejpenque. Hua ma nemiechpaliebicö ca tiechecöhuales para nenquechihuasque noche tlin cuale nenqueneque nenquechihuasque, hua nenquetlamisque inu tequetl tli nenquechihua porque nemoneltoca. ¹² De inu manera nentieyectieniehuasque toTlöcatzintle Jesús, hua yejuatzi nemiechyectieniehuasque nemejua. Inu mochihuas por tieinfavur toDeus hua Tlöcatzintle Jesucristo.

2

Tlöcatl de tlajtlacule.

¹ Öxö, nocnihua, ma tetlajtlajtuco de cuöc hualiloas toTlöcatzintle Jesucristo hua tiechsentlölisque ca yejuatzi. ² Nemiechtlötlajtea amo nima xecpatlacö lo que tli nenquepensöroa. Hua amo xemajcömequecö tlö cana yebitz sente mensöje que quejtusque giente que yebitz de tieEspíritu Deus, noso tlö canajyeca nemiechnunutzas, noso tlö cana huölös sente cörta que quejtoa que tejua nemiechtitlanelea, hua quejtojtös que ye aseco tunale de toTlöcatzintle. ³ Majcamo yeca nemiechcajcayöhua ca niontle de inu sösantle. Porque abele ases inu tunale hasta que pasörebés ocseque sösantle. Cachtö de inu mochihuas que meyac giente quecöhuasque de que ayecmö moneltocasque tieca Deus. Nuyejque moniextis inu tlöcatl de tlajtlacule, yaja inu tlöcatl de niempolebelestle.

⁴ Pos yaja moponieroöne icaca, hua iyas encuntra de noche tli giente queteochihuasque hua noche tli giente quejtusque que yaja deus. Ini nönca tlöcatl iyas encuntra de noche inu söstantle. Hasta motlölis ijtec tieteupa de Deus, hua yaja quejtus que yaja icaca bel yejuatzi Deus.

⁵ ¿Amo nenquejelnömeque que cuöc naja neyeya ca nemejua nemiechpubeliöya de ini nönca söstantle? ⁶ Hua nemejua nenquemajmate tlin inu tli öxö quetzacuelea para majcama moniexte inu tlöcatl hasta cuöc ases itiempo. ⁷ Pos inu tlajtlacule ye tequejteca sa ichtacajtzi. Sö polebe mojcuenis yaja öque öxö quetzacuelejteca. ⁸ Pos entunses moniextis inu tlöcatl de tlajtlacule, öque Tlöcatzintle Jesús quemectisque ca tietlalpitzales tli quisas de tiecamac. Quemectisque hua queniempolusque cuöc hualiloas hua neniextilus. ⁹ Inu tlöcatl de tlajtlacule asequi porque Satanás quechihuas ma asequi ca meyac checöhuallestle para quechihuas meyactie tietzöbeme tli quencajcajöhuasque giente. ¹⁰ Hua ca meyac söstantle de lo que tli amo cuale yaja quencajcajöhuas niecate giente tli yabe ipa niempolebelestle, niecate tli amo quenejque lo que tli melöhuac. Tlöcana yejua quenejnequene inu tli melöhuac, cuale momöquextiöne, pero amo quenejque. ¹¹ Por inu Deus quenchiuualtisque ma mocajcajöhuacö hua ma moneltocacö ica istlacalestle. ¹² Ejqueu Deus quencuntenörusque noche nieca giente tli amo moneltocaque ca tlin melöhuac, tlöcamo quecualejtaque tlajtlacule.

Deus tiechixpejpenque para tiechmöquextisque

¹³ Pero tejua tecpea que seme tetietlasojcömatelisque Deus por nemejua, tocnihua öque yejuatzi nemiechtlasojtlalo. Pos yejuatzi nemiechixpejpenque para nemejua cachto que ocseque nemomöquextisque. Nemiechmöquextilo por tieEspíritu öque nemiechyectelea, hua por nemoneltoqueles ca tlin melöhuac. ¹⁴ Pos para inu nemiechnutzque Deus por medio de inu cuale tlamachestelestle tli tejua nemiechpubelejque. Nemiechnutzque para ma xecpeacö pörte ipa tietlaniexteles Tlöcatzintle Jesucristo.

¹⁵ Por inu noso, tocnihua, xomoyulcuajpetzojtacö. Hua amo xejcöhuacö lo que tli tejua nemiechmachejque ca totlajtulhua hua ca cörtas tli nemiechtitlanelea. ¹⁶ ToTlöcatzintle Jesucristo mismo, hua toTajtzin Deus, öque por tiefavur tiechmachestiluc que tiechtlasojtlalo hua tiechyulöliluteca nochepa, hua tiechmacalo cuale nemöchealestle, ¹⁷ yejuantzetzzi ma nemiechyulölicö nemoyulo, hua ma nemiechmacacö fuiersa para seme nenquejtusque hua nenquechihuasque noche tlin cuale.

3

Xomotlajtlötlajticö por tejua

¹ Öxö, tocnihua, xomotlajtlötlajticö por tejua, para que tietlajtultzi Tlöcatzintle ma mocuasemana isejco ipa meyac pörtes, hua giente ma queselicö ca tlasojtelestle, quiename onnenqueselejque nemejua. ² Nuyejque xomotlajtlötlajticö para ma tiechcöhuacö inu tlöca amo cualteque tli quechihua tli amo conbenierebe. Pos oncate meyactie tli amo moneltoca tieca Cristo. ³ Pero Tlöcatzintle iloac de confiönsa, hua yejuatzi nemiechmacasque fuiersa hua nemiechmalfisque de Amo Cuale Tlöcatl. ⁴ Hua tecmachelea por toTlöcatzintle que nemejua nenquechijtecate hua nequechijtasque lo que tli tejua nemiechtajtulmacaque. ⁵ Yejuatzi Tlöcatzintle ma nemiechyecönacö nemoyulo para xecmachelicö cache hua cache inu tlasojtelestle de Deus, hua para cache cuale nenquexicusque meyac söstantle quiename Cristo oquexicojque.

Conbenierebe ma tetequetecö

⁶ Öxö, tejua nemiechtajtulmaca, tocnihua, tietucöyupantzinco Tlöcatzintle Jesucristo, xejcöhuacö sie löro öque quejtoa que yaja tocní pero ica tlatzejque hua inemeles amo ica de acuerdo ca inu enseñönsa tli yaja oquesele de tejua. ⁷ Pues nemejua mismo

nenquemajmate quiene conbenierebe ma xecchihuacö para nenquechihuasque quien-ame tejua. Tejua amo tenenque sin que amo tontejtequetque cuöc teyejyeya nemotlac, ⁸ nimpör amo tejcuajque tlacuale de yeca sin que amo tectlaxtlöjque. Cache cuale tetejtequeteya ca meyac tequetl hua traböjo ca yohuale hua ca tunale, para majcamo quepea que tiechtlacualtejtas canajyeca de nemejua. ⁹ Amo quejtusneque que tejua amo tecpeaya deriecho de que nemejua nentiechtlacualtisque, pero tecchijque para ma xequejtacö totech quiene tecchijque, hua ma xecchihuacö ejqueu. ¹⁰ Hua cuöc ompa teyejyeya nemotzölö, ejqueu nemiechtlajtulmacaque, que tlö canajyeca amo queneque tequetes, majcamo tluca. ¹¹ Pues tecmajmate que seque tli cate nemotzölö sa tlatzcöchijteneme, hua amo tejtequete tlöcamo quepujteneme istlacadlajtulme hua lo que tli amo quepea proviecho. ¹² Inu niecate tejua tequenmandöroa hua tequentlajtulmaca tietucöyupantzinco Tlöcatzintle Jesucristo, ma tejtequetecö para tlacuösque. Ma ayecmo quecuöcö intlacual de ocseque, hua ma ayecmo quechijtenemecö lo que tli amo conbenierebe.

¹³ Pero nemejua, tocnihua, ayec xeseyabecö de nenquechijtasque tlin cuale. ¹⁴ Tlö canajyeca amo quechihua cöso de lo que tli tequejtoa ipa ini nönca cörta, xequejtacö cuale öquenu yaja, hua ayecmo tli xecpeacö ca yaja, para que yaja mismo quepinöhuas. ¹⁵ Pero amo xecpeacö quieme nemocontrörio, tlöcamo cache cuale xectlajtulmacacö quiename nemocni.

Tlajpalulestle

¹⁶ Öxö, yejuatzi Tlöcatzintle, öque yejuatzi quetiemaalo yulsiebestle, ma nemiech-meyaquelicö yulsiebestle seme ipa noche tli nemopa mochihuas, cox cuale noso cox amo cuale. Tlöcatzintle ma iloa ca nemonochtie.

¹⁷ Naja nePöblo nemiechtlajpaloa. Nemiechejcuelfea nöncate tlajtulte ca belaja nomö. Noche nocörtas ejqueu nequemejcuelpa para nenquematesque que melöhuac naja nequentitla. ¹⁸ Tiefavur Tlöcatzintle Jesucristo ma iye ca nemonochtie.

Primero cörta tli San Pöblo oquejcuelfe TIMOTEO

¹ Naja nePöblo, que neca netlateotitlantle de Cristo Jesús. Deus öque tiechmöquextilo hua Cristo Jesús öque tetiechixtecate, yejuantzetzni niechtlölejque quieme netlateotitlantle. ² Temetzejcuelfe ini nönca cörta para taja, Timoteo, tli tecaca quieme tenoconie de melöhuac, ipampa tomoneltocac ca Cristo por medio de naja. Deus toTajtzi hua toTlöcatzintle Cristo Jesús ma metzmacacö tieinfavur, hua tieintlöocolteles, hua yulsiebestle.

Majcama tejactacö tlajtulme tli amo quepea proviecho

³ Ejqueu quieme oyeya temetzontlölajite cuöc oneya pa inu estado de Macedonia, ejqueu temetztlölajitea ocsajpa: xomocöhua ompa Efeso. Xequemelfe niecate tlöca tli tlamachtea ocsente tlamachestelestle ma ayecmo quesequirucö ca inu. ⁴ Xequemelfe majcama quepolojtacö tiempo ca inu cuientos hua tlapoalestle de pa nieca tiempo, que amo quepea itlamejyo. Ca inu nieca sösantle solamiente öque quepoloa tiempo de öque tladiscutiroa. Pues amo tiechbiquelitz proviecho hua amo tiechpaliebea para ma techihuacö por toneltoqueles lo que tli Deus tiechencargörfejqe.

⁵ Pos tecpejpea ini nönca mandamiento para ma tecpeacö tlasojtelestle. Inu tlasojtelestle quepea öque yectec iyulo, hua iyulo pinöhua tlö quechihua tlin amo cuale, pues yaja de melöhuac moneltoca. ⁶ Seque ye quecöjqe ini sösantle tlin cuale, hua mixpolojque ca inu tlajtulme tli amo quepea proviecho. ⁷ Ejqueu oquechijque ipampa quenejneque yesque quieme maestros de inu ley de Moisés, mösque de melöhuac amo quemajmate lo que tli quejejtoa, hua amo cajasojcömate inu sösantle de tli cafirmöroa yejua.

⁸ Pues tejua tecmajmate que ica cuale inu ley tlö tecojusöroa quiene conbenierebe. ⁹ Pues tecmate que inu ley amo ica para öque yectec. Cache inu ley ica para niecate tli amo quechihua cöso de tieley de Deus, niecate tli amo tlaneltocaneme hua tli amo tierespetöroa, hua tlajtlaculteque, hua amo yecteque, hua niecate tli amo quechihua cöso de tlin cuale, niecate tli quenmejmectea intajtzi hua innöntzi, hua innochie tlajtlamectiöneme, ¹⁰ hua niecate tli mopöctea ca sohuame tli amo cate insohua, niecate tlöca tli entre yejua mojeliebea, niecate tlajtlachtejqe de gente, hua istlaceneme, hua niecate tli cafirmöroa mös amo melöhuac, hua niecate tli quechihua lo que tli ica cuntra de inu machestelestle tlin cuale: para noche niecate gente icaca inu ley de Moisés. ¹¹ Ejqueu quejtoa inu cuale tlamachestelestle tli tiechelfea de tieyectlanixteles de Deus öque quepealo pöquelestle. Yejuatzni niechmöctejque ini tlamachestelestle para ma necpoa ca nobeyo.

Pöblo tietlasojcömateliöya Cristo

¹² Netietlasojcömatelea toTlöcatzintle Cristo Jesús, öque niechmacalo checöhualestle, ipampa niechpilejqe confiönsa hua niechtlölejque ma neye netietlatequepano.

¹³ Ejqueu oquechijque mösque oyeya nechecuatlajtoöya cuntra yejuatzni hua nequentepotztocaya inu gente tli tiehuöxcagua, hua netiepöpöcaya. Pero amo necmateya tli necchijtaya cuöc ayemo noneltocaya, hua por inu Deus niechperdonörfejqe noche tli netiechibeliöya. ¹⁴ Hua de inu manera Deus niechmeyaquelejqe lalebes tiefavur, hua ejqueu niechchihualtejqe ma netieneltoca hua ma necpea tlasojtelestle por Cristo Jesús.

¹⁵ Nöncate tlajtulte cate de confiönsa, hua conbenierebe ma noche gente ma momacacö cuenta que ica melöhuac ini nönca: que Cristo Jesús hualiloac ipan tlöltecpactle para quenmöquextisque tlajtlaculteque. Hua naja netlajtlacultec cache que ocseque.

¹⁶ Yaja por ini nönca Deus niechperdonörojque, para que Cristo Jesús tiechmachesisque que cuale quexiculo meyac sösantle. Pues quexicojque tli naja necchihuaya cuntra yejuatzi. De inu manera ocseque giente cuale quejtasque notech quiene Deus niechperdonörojque, hua ejqueu moneltocasque tieca Cristo hua quepeasque innemeles nochepa. ¹⁷ Yejuatzi öque iloac Rey nochepa, öque ayec mecoas, öque abele tetieyetasque, öque solamente yejuatzi iloac Deus, yejuatzi ma quepeacö yectieniebestle hua chamöhualestle nochepa. Amén. Ma ejqueu iye.

¹⁸ Timoteo, noconie, ocsajpa temetzencargörfea, xequennunutzta niecate tlöca. Tequelnömeques de quiene Deus quenmachejque inu tlayulepantejque acerca de taja. Xequelnömecta de inu hua xomopeleöro inu cuale guerra tli ica encuntra de noche sösantle tli amo cuale. ¹⁹ Amo xejcöhua de seme tomoneltocas hua seme tecmachejtas ipa moyulo lo que tli tecchijteca, tlö cuale o noso amo cuale. Ocseque oquecöjque de quemachejtasque ipa inyulo lo que tli quechihua, hua de inu manera oniempole inneltoqueles. ²⁰ Ejqueu quenpasöro Himeneo hua Alejandro, öque naja nequencö ma yöcö ca Satanás, para ma momachticö para ma ayecmo checuatlajtucö cuntra Deus.

2

Quiene ma totlölajtlötlajticö

¹ Öxö, necneque nemiachelfis, que ma tetietlajtlanelicö Deus, ma tetietlölajtelicö, ma tetieyelficö hua ma tetietlasojcömatelicö por noche giente. ² Ma totlölajticö por reyes hua noche tlajtoönejme. Ejqueu ma tenemecö ca siebestle hua ca cuale, para majcamo tiechtzacuele niontle, cache ma tenemecö tieca Deus quiene conbenierebe. ³ Pos ica cuale ma tenemecö ejqueu, hua ejqueu quecualejtalö Deus, öque tiechmöquextilo. ⁴ Pos yejuatzi quenequihua ma innochtie ma momöquexticö, hua ma quixomatecö tlin melöhuac. ⁵ Iloac sa sente Deus, hua iloac sa sie tlöcatl representönte öque cuale quechihuasque totlölisque de acuerdo ca Deus. Yejuatzi iloac Cristo Jesús, öque iloac tlöcatl quieme tejua. ⁶ Yejuatzi netiemacuc para ma tiemecticö, para ejqueu quetlaxtlöjque ipatie de nemöquextelestle para noche giente. Hua ini nönca omacheac pa nönca tiempo tli conbenierebe. ⁷ Hua Deus niechtlölejque naja quieme netlateotitlantle para netlamachestis de inu mensöje, pos ica melöhuac. Niechtlölejque para ma nequenmachte inu giente tli amo joriojte de quiene omecoac Cristo, para ma moneltocacö. Lo que tli nequejtoa ica melöhuac; amo neistlacatlajtoa.

⁸ Necneque, noso, ma tlöca ipa noche locör ma motlajtlötlajticö. Cuöc nenquemajcoquesque nemomöhua cuöc nemotlatzajtzelea, ma yecö yectequenemomöhua. Amo xomotlajtlötlajticö ca tlabiele nimpör ca chöchalönelestle. ⁹ Hua sohuame, ma motlaquenticö quiene conbenierebe, hua ma pinöhuacö tlö amo quebica intlaquie quiene conbenierebe. Ma moyecchejchihuacö pero amo para mochamöhuasque. Majcamo moxoniepalficö ca sösantle tli pateyo. Majcamo motlölelicö meyac sösantle de oro o noso perlas noso ocseque sösantle tli lalebes pateyo. Nimpör majcamo motlaquenticö ca intlaquie tli lalebes pateyo. ¹⁰ Cache ma iye incualejteles que quechihuasque tlin cuale. Pues ejqueu conbenierebe para sohuame tli quejtoa que innemeles ica para Deus. ¹¹ Cuöc yabe sohuame para estudio para quetzecusque, sa ma tlacactacö, hua ma quematecö que amo quentocöroa inu primier locör quieme tlöca. ¹² Pos naja amo nejcöhua sohuatl ma tlamachte noso ma tlamandöro ca tlöca, tlöcamo sa ma tlacacta. ¹³ Porque Deus oquechejchijque Adán primero, hua sötiepa Eva. ¹⁴ Hua amo mocajcayö Adán, tlöcamo sohuatl mocajcayö hua obetz ipa tlajtlacule. ¹⁵ Pero sohuame momöquextisque ca ma quenbepöhuacö pelantzetzti, tlö cana quesequiroa ca inneltoqueles hua ca intlasojteles hua ca innemeles tli yectec hua quieme conbenierebe.

3

Öquenu cuale iyes obispo para quemixutis creyentes

¹ Nöncate tlajtulte cate de confiönsa: que tlö canajyeca queneque inu tequetl de obispo, quejtusneque öque quemixutis creyentes, cuale tequetl queneque. ² Por inu conbenierebe para öque quepeas inu tequetl de obispo, majcamo tli quepea de tli öque quetieyelfis de inemeles. Ma quepea sa sente sohuatl. Ma quemate queyecpensörus. Ma cuale modominöro. Ma quemate cuale quebicas inemeles hua lo que tli quepensöroa. Ma quecualejta quenselis pa ichö noche tli comentlajpaloa. Ma cuale tlamachte. ³ Majcamo iye tlöhuönque, nimpör majcamo quecualejta peleitos, tlöcamo ma iye cuale tlöcatl hua majcamo quecualejta momagas. Majcamo quetiemo tomi. ⁴ Ma quemate cuale quebicas ichö, hua ipelhua ma yecö tlaneltocaneme hua ma quepeacö respieto. ⁵ Pos tlö öque amo quemate cuale quebicas ichö hua ipelhua, ¿quiene cuale quemixutis sente grupo de creyentes ca Deus? ⁶ Tli iyes obispo majcamo iye tli quemach omoneltocac. Porque cuale mochamöhuas, hua Deus quecuntenörusque quiename oyeya quecuntenörojque inu Diöblo porque omochamö. ⁷ Nuyejque conbenierebe ma ocseque giente tli amo creyentes ma seme queyectieniehuacö. Ejqueu giente amo ica tlajtusque, hua inu Diöblo abele quechihualtis ma betze ipa tlajtlacule.

Öquenu cuale iyes diácono para quentequepanus creyentes

⁸ Nuyejque ejqueu inu diáconos, o noso tlatequepanojque de grupo de creyentes, ma yecö tlöca de respieto. Ma seme quejtucö sa tli melöhuac. Majcamo conicö meyac mescöl. ⁹ Majcamo quetiemicö tomi sin que amo tequetesque. Ma quixomatecö cuale inu machestelestle secreto de toneltoqueles. Hua majcamo quepeacö niontle söstantle tli quenpinöjtis pa inyulo. ¹⁰ Inu tli yesque diáconos, cachto xequenprobörucö, hua sötiepa, tlö amo tli quepejpea encuentra de tli öque quentieyelfis, entunses ma quechihuacö inu tequetl. ¹¹ *Insojsohuahua nuyejque ma yecö de respieto, majcamo yecö istlacaateneme. Ma quematecö quebicasque cuale de lo que tli quepejpensöroa. Ma yecö de confiönsa ipa noche söstantle. ¹² Diáconos ma quepeacö sa sente sohuatl, hua ma cuale quebicacö inchö hua inipelhua. ¹³ Pos inu diáconos tli cuale quechejchihua intraböjo motlönelea respieto hua deriecho para tlamachestisque ca confiönsa de toneltoqueles tieca Cristo Jesús.

Sente secreto lalebes bieye hua importönte

¹⁴⁻¹⁵ Necchea que isejco neyös motlac, Timoteo, pero temetzejcuelfea ini nöncia söstantle por tlö cana de repente abele nima neyös, para tecmates quiene conbenierebe öque nemes ipa tiechö de Deus. Pos tejua tli tecreyentes ca Deus öque nemoateca, tejua tecate quieme tiechö de yejuatzi. Tecate quieme tepelörte tli tecmömajtecate hua tequejquitzquejtecate inu machestelestle tli melöhuac. ¹⁶ Hua melöhuac, tlö öque quemate de cöne yebitz toreligión quemate sente secreto lalebes bieye hua importönte. Pos yebitz de:

Öque neniextiluc quieme tlöcatl,
 hua tieEspíritu Deus tieaprobörojque,
 hua öngeles tieijtaque,
 hua omacheac de yejuatzi ipa noche naciones,
 hua giente pa noche tlöltecpactle omoneltocaque tieca,
 hua Deus tieselejque ipa tlanixtelestle.

4

Seque moxelusque de inu söstantle tli toneltoca

* **3:11** Cuale nuyejque motradusirus: “Inu sohuame tli tejtequete quieme diáconos”.

¹ TieEspíritu de Deus quejtulo para ma cuale öque quemate, que sö ca itlamejyo tunalte seque moxelusque de inu söstantle tli tejua toneltoca. Pos yejua quencactasque niecate espíritu tli tlacajcayöhua, hua quetocasque inu machestelestle tli yebitz de demunios. ² Quencactasque giente tli istlacatque de intlajtul hua nuyejque de innemeles, tli ayecmo pejpinöhua cuöc quechihua amo cuale. ³ Nöncate giente tlamachtisque que amo cuale öque mosohuajtis, hua uyes tlacuale que yejua quejtusque que amo cuale öque quecuös. Pero amo ejqueu ica, tlöcamo Deus oquechejchijque noche inu söstantle para tejua tli toneltoca. Pos tejua tli tecmajmate tlin melöhuac ma tecselicö inu söstantle hua ma tetietlasojcömatelicö Deus. ⁴ Porque noche söstantle tli oquechejchijque Deus ica cuale, hua niontle ma tequejtucö que amo cuale. Sa ma tecselicö ca tlasojcömatelestle. ⁵ Pues tietlajtultzi Deus hua totlajtlötlajteles queyectelea.

Sente cuale tlatequepano de Cristo Jesús

⁶ Nönca söstantle xequemejtete tocnihua, hua de inu manera teyes tecuale tietlatequepano de Cristo Jesús. Tecmachelis pa moyulo que ye tectzeco cuale inu tlajtulme de neltoquelestle hua de inu cuale machestelestle tli tectocateca. ⁷ Pero amo xecchihua cöso de inu cuientos tuntos tli amo quepea proviecho para ca Deus. Cache cuale xomopracticöro de toreligiön. ⁸ Pos inu de cuöc öque mopracticöroa para iyec checactec icuierpo, inu ejersisio tlapaliebea tepetzi, pero cuöc öque mopracticöroa de toreligiön, cache tlapaliebea para noche söstantle. Pos tiechserbirus pa ini nönca nemelestle hua nuyejque ipa inu nieca nemelestle tli sötiepa huölös. ⁹ Nöncate tlajtulte cate de confiönsa, hua conbenierebe ma tonochtie ma toneltocacö. ¹⁰ Por ini nönca arrasu tetejtequete hua tecsojsufriroa, porque tetiechixtecate Deus öque nemoateca, öque iloac Tiemöquextiöne de noche giente, hua cache ca meyac arrasu iloac toTiemöquextejcötzi de tejua tli tcreyentes.

¹¹ Xequenmandörojta ini nöncate söstantle, hua xequenmachtejta. ¹² Amo xectiemaca locör para amo metzchibelisque cöso ipampa ayemo tebiebentzi. Cache xeye xeejiemplo, para cuale monunutzasque creyentes quieme taja tequennunutza, hua cuale quechihuasque quieme taja tecchijteca, hua cuale quentlasojtlasque giente quieme taja tequentlasojtla, hua cuale moneltocasque queme taja tomoneltoca, hua mochihuasque yecteque quieme taja teyectec. ¹³ Hasta que naja neyös motlac, xomodedicörojta xectlajtultejta tietlajtultzi Deus, hua xequenyuliehua tocnihua, hua xequenmachte. ¹⁴ Amo xequelcöhua de tecusörus inu beletelestle tli Deus metzmöctiluc cuöc inu biebertzetzi quentlölejqe inmöhua mopa, hua Deus ontlamachestiluc de taja.

¹⁵ Xomodedicöro lalebes ca ini nöncate söstantle para que innochie metzejtasque quiene tetlayecöna ipa ini nönca söstantle cuale. ¹⁶ Xomopile cueröro de taja mismo hua de lo que tli tetlamachte. Seme xecpensörojta hua xecchijta ini nönca söstantle, hua de inu manera tomomöquextis taja hua tequennöquextis nuyejque tli metzcaque.

5

Quiene ma moportöro Timoteo ca creyentes

¹ Amo xecajajua ca cualönelestle sente tli biebertzi. Cache cuale xectlajtulmaca quieme tlö oyene motajtzi. Hua niecate tli amo biebertzetzi xequentratöro quieme tlö oyejyene mocnihua. ² Hua sente lamatzti nuyejque xectratöro quieme tlö oyene monöna, hua nuyejque sohuame tli ayemo lamatzetzi xequentratöro quieme tlö oyene mocnihua, ca noche yectelestle.

³ Xequentlasojtla ca meyac respieto icnusohuame tli de melöhuac cate icnusohuame, quejtusneque tli amo quepejpea nionöque tli inca moquetzas. ⁴ Pero tlö sente icnusohuatl quepea ipelhua o noso ixbihua, ma yejua momachticö quechihuasque quiene conbenierebe ca infamiliares, hua ma quencuepelicö inu tlasojtelestle de intötajua. Pos Deus quecualejtalo ma quechihuacö ini nönca. ⁵ Pero sente tli de melöhuac ica icnusohuatl,

tli icaca sa isiesiel, yaja quechea que Deus quepaliebisque, hua quededicöroa itiempo para motlajtlötlajtejtas hua motlajtzajtzelejtas tieca Deus yohualen tunale. ⁶ Pero sente icnusohuatl tli modedicöroa sa para mopöctis, yaja ica quieme sente mejque mösque neme. Pos inemeles amo serbirebe para niontle. ⁷ Xequenmandöro ma quechihuacö ini nöncate söstantle para majcamo tli uye de tli öque quemajajuas. ⁸ Pero tlö canajyeca amo quenpaliebea noche ifamiliars, hua espesialmente itötajua hua ipelhua hua tli cate pa ichö, yaja ye quechihua encuntra de toneltoqueles, hua cache amo cuale ica que sente tli amo moneltoca.

⁹ Para öque quetlölis sente icnusohuatl ipa inu tlapoale de icnusohuame, conbenierebe que inu sohuatl ma quepea cache de sesenta xebetl, hua ma iye *tli mosujetöro ca inömec, hua ma quixomatecö giente por lo que tlin cuale quechihua. ¹⁰ Xetlajtlane tlö cuale quenbepö ipelhua, hua tlö cuale quenselea tli comentlajpaloa, hua tlö *quemecxepajpöca tli yecteque, hua tlö quenpaliebea tli tlasufrirojtecate, tlö modedicöroa para quechihuas noche söstantle tlin cuale.

¹¹ Pero amo xequentlöle ipan tlapoale inu icnusohuame tli ayemo quepejpea inu xebetl, porque paques mocxetlajtea de yesque tieca Cristo, hua quenejneque monajnömectisque. ¹² Hua ejqueu quepejpea tlajtlacule ipampa amo oquechijque quiename primero queprometierojque. ¹³ Nuyejque momajmachea amo quechihua inteque, tlöcamo yajyajteneme ipa inchö de ocseque. Hua ejqueu amo sa quetlatzejcöchihua, tlöcamo nuyejque mocuepa tlajtlanunutzaneme lalebes, hua tlajtlajtoa de tli amo quemimportöroa hua de tli amo conbenierebe. ¹⁴ Por inu necneque ma ini nöncate icnusohuame tli ayemo lamatzetzi ma monajnömecticö, ma quepejpeacö inpelhua, hua ma quebicacö cuale inchö. Majcamo quetiamacacö locör por tlapöpöcas niecaju tli moponieroa. ¹⁵ Pues seque icnusohuame ye omoxeløjque hua quetocaque inu Satanás. ¹⁶ Tlö cana sente sohuatl tli moneltoca quepea pa ifamilia icnusohuame, ma quenpaliebe. Majcamo quecöhua ma quenpaliebejtacö inu grupo de creyentes; ma quechihua yaja. De inu manera inu grupo de creyentes cuale quenpaliebisque inu icnusohuame tli de melöhuac cate insiesiel.

¹⁷ Inu biebentzetzi tli cuale quebica inu grupo de creyentes quemejmeresieroa cache meyac respieto hua tlasojtelestle, hua cache ca meyac arrasu niecate tli lalebes tejtequete tlajtlanunutza hua tlajtlamachea. ¹⁸ Pos tlajcuelulpanca: “Amo xetlölele ibarsinas cucobe cuöc yaja tlatriyöroa”, hua: “Tli tequete quemeresieroa itlaxtlöbil”.

¹⁹ Amo xecchihua cöso de öque quetieyelfea encuntra de sente biebentzi tlö amo oncate unte, o noso yete testigos. ²⁰ Tli tlajtlacoa xequennunutza imixtla innoctie, para que ocseque momajtisque hua amo quechihuasque lo mismo.

²¹ Temetzelfea delönte de Deus hua de Cristo Jesús hua de tieöngeles tli quemixpejpenque: xecchijta ini nönca söstantle sin que amo tequestlocus antes de tejaques tli onca, hua xequemestloco innoctie pariejo. ²² Amo xenombröro yeca quieme biebentzi noso diácono sin que cachtö tomomacas cuienta, amo cana tecpeas pörte ca intlajtlacul de ocseque. Taja xomomalfe sin tlajtlacule.

²³ Ayecmo seme xeötlita, cache cuale xecone tepetzi vino para quepaliebis mojte, porque seme metzcocojtebitz.

²⁴ Intlajtlacul de seque tlöca cuale niese. Ica quieme tlö quenyecönte hasta cöne mojuscorusque. Pero pan seque tlöca intlajtlacul amo niese hasta sötiepa. Ica quieme tlö quentocatz. ²⁵ Nuyejque lo que tli cuale oquechijque seque tlöca cuale niese, hua tlö ayemo niese, pero abele seme mojoyöntas.

* 5:9 Cuale nuyejque motradusirus: “tli sa sente inömec oquepex”.

* 5:10 Pa inu tiempo quepeaya costumbre quemecxepajpöcaya tli comentlajpaloöya. Inu oyeya tequetl de musojte. Xomojtelicö Jn. 13.1-7.

6

¹ Niecate tli tejtequete quieme esclavos, ma quenpilocō meyac respieto ca inpatrones, para que majcama gente tlajucō tiecuntra de Deus, nimpor encuntra de lo que tli tetlamachtea. ² Tlō inpatrones cate creyentes, majcama quejtucō que: “Yaja nopatrón ica nocni hua por inu amo necchibelis cōso”. Cache cuale ma yectequetecō cache, siendo que inpatrón ica creyente, hua que quepaliebejtecate imicni öque quetlasojtla. Seme xetlamachte hua xetlanunutza ini nōnca.

Öque moneltoca hua ica confurme ca tli quepea quetlöne lalebes

³ Tlō canajyeca tlamachtea ocseque sōsantle hua amo ica de acuerdo ca inu tlajtulme tlin cuale de toTlōcatzintle Jesucristo hua ca totlamachesteles de toreligiön, ⁴ pues yaja mochamoöne. Amo quemate niontle, cache quefayöroa ipampa seme tlajtlanteca hua tladiscutirojteca palöbras. De ini nōnca sōsantle yebitz chōhuatelestle hua peleitos. Mopöpocasque, amo mopilisque confiōnsa, ⁵ hua amo moyequejtasque niecate tlōca. Pos amo cuale quepensöroa, hua amo quejixomate tlin melöhuac. Pos quepensöroa que toreligiön yaja sente manera de öque quetlönis tomi. ⁶ Cache de melöhuac ejqueu icaca: que öque moneltoca ca toreligiön hua ica confurme ca lo que tli quepea, quiema quetlöne lalebes, pero amo tomi. ⁷ Pos amo tli tecualecaque niontle pa ini nōnca tlöltecpactle; pos nuyejque abele tecbicasque niontle. ⁸ Entunses tlō tecpea tli tejcuösque hua tecpea totlaquie hua total, pos ayecmo cache tecnesesitöroa. ⁹ Pero niecate tli quenejneque moricojtisque biebetzesque ijtec sente trömpa. Pos quenyulnutza tomi, hua tlō quetoca quenequesque sōsantle tli amo quepea proviecho hua hasta quenhibelis döño. Hua quemixniempolus niecate tlōca hasta intiero moniempolusque. ¹⁰ Pos inu tlasojtelestle de tomi ica quieme nelhuayutl de cōne quisa de noche sōsantle tli amo cuale. Hua seque tli quedeseörojque tomi ye omoxelöjque de inneltoqueles hua quepexque pa innemeles meyac tiecoco.

Xomocujpetzo ipa ini nōnca lucha tlin cuale

¹¹ Pero taja, tlōcatl tli teca ca Deus, xecho de inu sōsantle. Xetoca nemelestle yectec, hua xomodedicöro ca sōsantle de toreligiön. Monemeles ma iye de neltoquelestle hua tlasojtelestle. Seme xecxicojta noche tli metzpasöroa; seme xomoportöro cuale ca ocseque. ¹² Xomocujpetzo pa ini nōnca lucha cuale que yaja ica de toneltoqueles. Ejqueu tecpeas nemelestle nochepa. Xequelnömeque que para ini nōnca nemelestle Deus metznutzque, hua taja cuale tomodeclaröro que tomoneltoca, imixtla de meyactie testigos. ¹³ Öxö, delönte de Deus, öque quetiemaalo nemelestle ca noche tli neme, hua delönte de Cristo Jesús, öque nuyejque cuale nedeclaröruruc ixtla Poncio Pilöto, hua quetestificörojque, ¹⁴ temetzelfea que xecneltoca tli metzmandöruro Deus. Amo xecpatla. Majcama gente tlajucō amo cuale de tietlajtultzi por mopampa. Xecchihua ini nōnca hasta cuöc toTlōcatzintle Jesucristo niexihuas. ¹⁵ Cuöc ases itiempo, Deus tiechmojtetelis tieConietzi. Pos sa yejuatzi Deus iloac Tlajtoöne hua quepealo pöquelestle, hua iloac Rey de reyes, hua Tlōcatzintle de Tlōcatzetzinte. ¹⁶ Sa yejuatzi iloac öque amo mecoa, hua nemoateca ijtec tlöbile cōne abele öque mopachus. Ayec nionöque tieyejtac Deus, hua abele öque tieyejtas. Yejuatzi ma quepeacö yectieniebestle hua checöhualestle nochepa. Ma ejqueu iye. Amén.

¹⁷ Niecate tli ricojte pa nōnca tlöltecpactle xequemelfe majcama mochamöhuacö hua majcama quepeacö confiōnsa ca intomi, porque amo icaca seguro que intomi quenpaliebis. Cache cuale ma quepeacö inconfiōnsa ca Deus, öque iloac rico para tiechmacasque noche sōsantle para ma ica topöcticö. ¹⁸ Inu ricojte ma quechihuacö tlin cuale, hua ma moricojtico ca tlachihualestle tlin cuale. Ma quenejnequecö quexiexelusque tli yejua quepejpea, hua ma quenejnequecö quetiemaacasque ca niecate tli amo quepejpea.

¹⁹ De inu manera moricojtisque ca sösantle tli quemasegurörus para inu tiempo tli yebitz. Pos ejqueu cuale cönasque inu nemelestle tlin melöhuac.

Pöblo quenahuatea Timoteo

²⁰ Timoteo, xequixute lo que tli metzmöctejque. Amo xejcaque tlajtulme tli giente quejtoa que yaja tlamachestelestle, pero yaja ica de nönca tlöltecpactle hua amo tli quebicz, hua nimpoyejua amo cate de acuerdo de tli ica inu tlamachestelestle. ²¹ Pos seque tli quetoca inu nieca enseñönsa ye omoxelojque de inneltoqueles.

Tiefavur Deus ma iye ca nemejua.

Cörta tli San Pöblo ca ujpa oquejcuelfe TIMOTEO

¹ Naja nePöblo. Necaca netlateotitlantle de Cristo Jesús ipampa Deus oquenejqe ma neye, hua ma netlanunutzta de que Deus queprometierojque quetiemasque nemelestle ca queiejquech cate tieca Cristo. ² Temetzejcuelfea ini nönca cörta para taja, Timoteo, öque temetztlasojtla lalebes, quieme tlö tenoconie teyene. Deus toTajtzi, hua toTlöcatzintle Cristo Jesús ma metzmacacö tieinfavur hua tieintlöocolteles hua yulsiebestle.

Amo xepinöhua de xetlajtajto de toTlöcatzintle

³ Temetzelnömeque seme ipa notlajtlötlajteles ca yohuale hua ca tunale. Netietlasojcömotelea Deus por taja. Pos naja netietequapanoa Deus quiename tietequapanojque notötajua, hua amo niechtiyelfea noyulo de niontle. ⁴ Cuöc notlajtlötlajtea por taja, nequelnömeque de quiene techucaya, hua necneque temetzejtas para nepajpöques. ⁵ Nequelnömeque de quiene melöhuac tomoneltoca. Pos ejqueu nuyejque neneltocaloöya mosejtzi Loida hua monöntzi Eunice, hua öxö neca seguro de que taja nuyejque ejqueu tomoneltoca. ⁶ Por inu temetztlalnömechtea ini nönca: Xecöpröro inu beletelestle tli Deus metzmacaque cuöc nequentlöle nomöhua mopa. ⁷ Pos inu Espiritu tli Deus tiechmacaque amo tiechchihualtilo ma teyecö temabeneme, tlöcamo cache tiechmacalo checöhualestle hua tlasojtelestle, hua tiechpaliebilo para tecyecpensörusque.

⁸ Por inu, amo xepinöhua de xetlajtajto de toTlöcatzintle, hua amo xepinöhua de que naja neca neprieso por tiepampa yejuatzi. Cache cuale xecsufriro taja nuyejque por inu cuale tlamachestelestle ca inu checöhualestle tli Deus quetiemaalo. ⁹ Yejuatzi tiechmöquextejque, hua tiechnutzque para ma tecbicacö cuale tonemeles. Amo tiechmöquextejque por canajyetla cuale tli tejua tecchijque, tlöcamo porque ejqueu oquenejqe hua de inu manera tiechmacaque tiefavur por Cristo Jesús. Tiechmacaque inu tiefavur cachtö de cuöc mochejchihuane tlöltecpactle, ¹⁰ pero quemach öxö ye cuale niese inu tiefavur porque ye hualiloac toTiemöquextejcötzi Cristo Jesús. Yejuatzi quexetunque mequelestle, hua por medio de inu cuale tlamachestelestle tiechmachestiluc quiene cuale tecpeasque nemelestle, hua ejqueu ayec temejmequesque.

¹¹ Deus niechtitlanque para ma netlanunutzta de ini nönca cuale tlamachestelestle. Hua niechtlölejque para ma neye netlateotitlantle hua netlamachestiöne. ¹² Yaja por ini nönca necsufrirojteca noche ini nönca söstantle. Pero amo nepinöhua, ipampa naja netieixomate yejuatzi öque tieca noneltocac. Hua neca seguro que yejuatzi cuale quemalfisque lo que tli naja netiemöctele hasta ipa inu sölültimo tunale.

¹³ Taja xectoca inu cuale tlajtulme tli naja otemetzejtete. Hua xeneme ca inu neltoquelestle hua tlasojtelestle tli tecpea tejua tieca Cristo Jesús. ¹⁴ Ca tiepaliebeles Espiritu Sönto öque nemoa tojtec, xecmalfe inu tlin cuale tli Deus metzmöctejque.

¹⁵ Ye tecmate que innochie tli cate de ompa Asia oniechcajcöjqe. Entre yejua cate Figelo hua Hermógenes. ¹⁶ Tlöcatzintle ma netlöocolticö de Onesíforo hua tli cate pa ichö, ipampa yaja oniechescaliöya, hua amo pinöhuaya de que naja netzactaya ipan cörsel. ¹⁷ Pos cuöc yaja oyeya necö Roma oniechtiemo hasta cöne oniechniexte. ¹⁸ Tlöcatzintle ma netlöocolticö de yaja ipa inu sölültimo tunale. Taja ye tecmate quiene lalebes otiechpaliebe ompa pa Efeso.

2

Xeye sente soltöro cuale de Cristo Jesús

¹ Öxö, taja, noconie, xomocuaipetzo por tiechecöhuales Cristo Jesús, tli yejuatzi tiechmacalo. ² Hua inu sösantle tli otejcac, tli naja onequejto inmixtla meyactie testigos, inu sösantle xequenmöcte tlöca tli cate de confiönza, tli quale quemachestisque ca ocseque tlöca.

³ Xecsufriro quieme naja, hua ejqueu teyes tesoltöro quale de Cristo Jesús. ⁴ Sente soltöro tlin quale amo tlatzölö calaque ca negocios hua asuntos de innemeles de ocseque. Ejqueu quechihua ipampa queneque que öque quetlöle quieme soltöro ma quecualajta lo que tli quechihua. ⁵ Ejqueu nuyejque öque majöbeltea, tlö amo möbeltis quiene quemarcöroa reglamento, abele queselis trofeo. ⁶ Hua öque tequete ipa cömpo, conbenierebe yaja ma cachtö que sele ipörte de tli omochi. ⁷ Xecyecpensöro de lo que tli nequejtojteca, hua Tlöcatzintle metzchibelisque ma xecasojcömate noche inu sösantle.

⁸ Xequelnömehta de Jesucristo, öque oyulebihuac de intzölö mimejque, hua nehuöxcatiluc de inu reino de tietöta David, ejqueu quiene quejtoa inu quale tlamachestlestle tli naja netlanunutzä. ⁹ Naja necsufrirojteca meyac sösantle ipampa netlanunutzä de inu quale tlamachestlestle. Hasta necarienailpeteca quieme tlö neyene netlachtejque noso netlamectiöne. Pero tietlajtultzi Deus amo ilpeteca. ¹⁰ Por inu necxicoa noche ini sösantle, por impampa niecate tli Deus quemixpejpenque. Pos necneque que yejua ma quepeacö nemöquextelestle tieca Cristo Jesús, hua tlanixtelestle tli ayec tlames. ¹¹ Nöncate tlajtulte cate de confiönsa:

Pues tlö ye otemejmejque tieca Cristo, nuyejque tenemesque tieca.

¹² Tlö tecxicusque, tetlamandörusque tieca yejuatzi.

Tlö tequejtusque que amo tetieixomate, yejuatzi nuyejque quejtusque que amo tiechixomatihua.

¹³ Mös cana tejua amo tejcumplirusque totlajtul, pero yejuatzi seme quecumplirusque tietlajtul;

pos yejuatzi abele iloas ocsie de lo que iloac.

Xeye sente yectequetiöne

¹⁴ Xequentlalnömehta noche creyentes de nöncä sösantle, hua xequentlajtulmaca tieixpa Deus ma quecöhuacö de tladiscutirojtasque palöbras, porque inu amo quepea proviecho. Solamiente tlaperjudicöroa ca niecate tli quecaque. ¹⁵ Taja xecöpröro para que Deus quecualajtasque motlachihual. Ejqueu teyes teyectequetiöne, que amo tecpeas niontle de tli tepinöhuas, hua teyectequetes ca tietlajtultzi Deus tli melöhuac. ¹⁶ Pero xomoxelo de inu tlajtulme tli giente tlanunutzä, tli amo quepea proviecho. Pos tli tlanunutzä de inu, mocajcalactea cache hua cache ipa tlajtlacule. ¹⁷ Hua intlajtulhua mosoa quieme söhuame. Ejqueu oquenpasöro Himeneo hua Fileto, ¹⁸ tli ye omoxelöjque de lo que tli melöhuac. Pos quejetoa que ye opanuc inu yulebelestle de mimejque, hua quentlapolultealea inneltoqueles de seque. ¹⁹ Pero Deus ye tiechonelfejque quiene ca tenemesque, hua lo que tli tiechelfejque icaca quiename sente cimientö tli ayec mocuenis, tli ipa quepea sente sieñas tli quejtoa:

Tlöcatzintle quemixomatihua tli tiehuöxcahua,
hua:

Innoctie tli quebica tienumbre Tlöcatzintle ma moxelucö de tlajtlacule.

²⁰ Ipa sente chöntle bieye amo solamiente oncate tröstes de oro hua de plöta, tlöcamo nuyejque de cuabetl hua de tapalcatl. Seque cualtzetzi cate para mousörusque cuöc tlalfequisa, o noso cuöc onca visitas. Hua ocseque cate tli mousöroa cöra tunale. ²¹ Tlö canajyecä moxelus de noche sösantle tli amo quale, iyec quieme sente tröste de inu cualtzetzi. Iyec yectec, iyec quale para quale cusörusque toTiecojtzi, hua iyec listo para quechihuas noche tlin quale.

²² Taja noso xecholo de inu sösantle tli queliebea inacayo de öque oc icaca pelalactle. Xectoca yectelestle, neltoquelestle, tlasojtelestle, hua siebelestle inca innochtie tli tietzajtzelea Tlöcatzintle ca noche sentetl inyulo. ²³ Pero amo xecchibele cöso de inu preguntas tli sa tuntos, tli tlajtlane inu giente tli sa tlajtlajtojeneme. Ye tecmate que inu sösantle sa quebicatz peleitos. ²⁴ Hua öque tlatequepanoa para Tlöcatzintle amo conbenierebe ma neme ipa peleitos. Cache conbenierebe ma iye cuale tlöcatl ca innochtie, ma cuale quemate tlamachtis, hua ma quemate quexicus de noche sösantle tli quechibelisque giente. ²⁵ Ma quemejtete tli moponieroa, pero amo ca chamöhuallestle ipa iyulo. Ejqueu Deus cuale quenyulcuepasque inu giente para ma quematecö lo que tlin melöhuac. ²⁶ Ejqueu tlajtlacheasque, hua momöquextisque de inu trömpa cöne inu Diöblo quenpea para ma quechihuacö itlanequeles.

3

Quiene yesque giente ipa sölúltimo tunalte

¹ Nuyejque xecmate que pa sölúltimo tunalte mochihuas meyac sösantle tli lalebes petzotec. ² Gientes sa yejua mismo motlasojtlasque. Sa quetiemosque tomi. Mochamöhwasque hua san yejua mosemajtasque. Yesque tiepöpöcaneme. Amo queneltocasque intötajua. Amo quetlasojcömatesque. Amo tlaneltocasque nion lö que tli tlöltecpactlöca quejejtoa que yaja yectec. ³ Amo quepeasque tlasojtelestle nimpör tlöocoltelestle ca nionöque. Yesque istlacateneme. Abele moaguantörusque de lo que tli queneque quechihuasque. San petzoteque yesque. Quetlajyelejtasque lo que tlin cuale. ⁴ Sa tlanöhualasesque. Sa quechihuasque sösantle sin que amo cachtö quepensörusque. Tientasque de chamöbelestle. Sa quenequesque mopöctisque. Amo quenequesque yesque ca Deus. ⁵ Niesesque quieme creyentes, cache pa innemeles nieses que toreligiön amo quenpatlac, ipampa seme tlajtlacojtecate.

Xomoxelo de ini nönöcate giente. ⁶ Pos seque de inu niecate tieinchajchöcajcalaque hua quencajcayöhua sohuame tli amo checöjtecate de inneltoqueles, tli quemate ipa inyulo que otlajtlacojque, hua tli quejeliebea meyac sösantle. ⁷ Seme queneque quetzecusque ocseque sösantle, pero ayec casojcomate tlin melöhuac. ⁸ Ejqueu quieme inu chichichte Janes hua Jambres moponierojque ca Moisés, ejqueu nuyejque inu giente moponieroa ca tlin melöhuac. Inu tlöca quepejpea inpensamientos necuelteque, hua Deus quencuntenöruro ipampa amo melöhuac moneltoca. ⁹ Pero abele tlacajcayöhwasque lalebes, ipampa noche giente momacasque cuienta de que cate tuntojte, ejqueu quieme opasöre ca inu unte chichichte.

Seme xeyeta ca lo que tli otectzeco

¹⁰ Pero taja cuale tectocac lo que tli naja necmate hua necchihua hua necneque. Taja tomoneltocac quieme naja, hua ejqueu quiename naja necxicoa meyac sösantle, hua nequentlasojtla giente, ejqueu nuyejque taja. ¹¹ Tecmate quiene niechtepotztocaque giente, hua tecmate quiejquech sösantle onecsufriro. Tecmate lo que tli oniechpasöro ipa inu puieblos de Antioquía, Iconio, hua Listra. Tecmate quiene giente de ompa niechtepotztocaque, pero Tlöcatzintle oniechmöquextejque de noche inu sösantle. ¹² Pos melöhuac, innochtie tli quenequesque nemesque cuale tieca Cristo Jesús quesufriusque ipampa giente quentepotztocasque. ¹³ Pero amo cualteque hua tlacajcayöhuaneme mochihuasque cache hua cache amo cuale. Tlacajcayöhwasque yejua, hua yejua mismos mocajcayöhwasque.

¹⁴ Pero taja seme xeyeta ca lo que tli otectzeco, lo que tli taja tomomacac cuienta que yaja melöhuac. Tecmate öquenu metzmachte, ¹⁵ hua tecmate que desde cuöc tetzitzequetzi teyeya ye tequixomate tieömahua Deus. Pos yejua ömame cuale metzmachtisque para tomomöquextis por tomoneltocas tieca Cristo Jesús. ¹⁶ Deus mismo oquechijque

ma quejcuelucö noche lo que tli tlajcuelulpanca ipa teotlajtule. Hua noche inu tli tlajcuelulpanca ica cuale para tiechmachtis, para tiechelfis cuöc amo cuale tenejneme, para tiechyejyectlölis de tonemeles hua topensamiento, hua para tiechbepöhuas para teyesque teyecteque. ¹⁷ Ejqueu öque ica tlöcatl de Deus cuale iyees intiero preparödo hua ejqueu cuale quechihuas de noche söstantle tlin cuale.

4

¹ Tieixpa Deus hua tieixpa Cristo Jesús, öque yejuatzi tlajuscörusque tli neme hua tli omejmejqe, temetzencargörfealalebes, siendo que Cristo hualiloas para tlamandörurus, xetlanunutza de tietlajtultzi Deus. ² Xomodedicöro ca inu cuöc onca locör hua nuyejqe cuöc amo onca locör. Xequenyulcuepa giente, xequemelfe cuöc amo cuale neme, hua xequentlajtulmaca. Ayec xecualöne ca yejua, pero seme xecsequiro xequenmachtejta. ³ Porque huölösque tunalte cuöc giente amo quexicusque inu machestelestle tlin melöhuac, cache quensentlölisque tlöca tli sa quenmachtisque lo que tli yejua quenejneque quecaquesque. ⁴ Hua amo quecaquesque tlin melöhuac, tlöcamo quecaquesque sa cuientos. ⁵ Pero taja seme xecyecpensörojta. Xecsufriro söstantle tli checöhuac. Xetlanunutza inu cuale tlamachestelestle. Xejcumpliro cuale ca motraböjo.

⁶ Pues naja necaca quieme sente bentlölele tli ye ica ipa ajtöl; ye necaca para nemeques. ⁷ Necaca quieme nesoltöro que ye onopeleöro cuale, quieme nedeportista que ye necsencö cuale nocarriera, pues ayec onoxelo de lo que tli toneltoca. ⁸ Öxö niechchixteca ompa elfecac sente premio de yectelestle, tli niechmacasque ipa inun tunale toTlöcatzintle, öque seme tlayecjuscöruuro. Hua amo sa naja niechmacasque, tlöcamo nuyejqe quenmacasque innochie tli quedeseöroa lalebes ma hualiloa yejuatzi.

Noticias de iamigos de Timoteo

⁹ Xemöpröro para nima tehuölös teniechejtaqui. ¹⁰ Pos Demas ye oniechcajcö ipampa cache quetlasojtlac söstantle de nöncia tlöltecpactle. Ye uya ipa Tesalónica. Crescente unya ipa tlöle de Galacia, hua Tito uya ipa tlöle de Dalmacia. ¹¹ Solamiento Lucas ica ca naja. Xectiemo Mörcos, ma huöla ca taja, porque cuale niechpaliebis ipa tequetl. ¹² Tíquico onectitla ma beya pa Efeso. ¹³ Cuöc tehuölös xecualeca nosaröpe tli onejcöjtie ompa Troas ca tocní Carpo. Nuyejqe xecualeca noömahua, especialmente noömahua de cuetlaxtle.

¹⁴ Inu herriero Alejandro oniechchibele meyac söstantle amo cuale. ToTlöcatzintle quecuelisque quieme yaja oquechi. ¹⁵ Taja xemixute de yaja porque lalebes moponieroa encuntra de tomensöje.

¹⁶ Cuöc cachtö onodefendiero inmixtla tlajtoönejqe, nionöque oniechpaliebe. Innochie oniechcöjqe. Deus majcamo quencastecörucö por inu. ¹⁷ Pero mös yejua oniechcöjqe, pero Tlöcatzintle oniechpaliebejqe hua oniechchecöjqe. Ejqueu cuale onetlanunutz de inu mensöje de nemöquextelestle para que oquecajqe giente de nöche tlöltecpactle. Hua yejuatzi oniehmöquextejque de inu bieye peligro. ¹⁸ Hua yejuatzi Tlöcatzintle oc niechmöquextisque de noche tli amo cuale, hua niechmalfisque para que neyes ompa elfecac cöne tlamandöruro. Yejuatzi ma quepeacö yecteniebelestle nochepa. Amén. Ma ejqueu iye.

Tlajpalulestle

¹⁹ Xequentlajpalo Prisca hua Aquila, hua ifamilia de Onesíforo. ²⁰ Erasto omocö ompa Corinto, hua Tróximo onejcö ompa Mileto ipampa mococoöya. ²¹ Xomoöpröro xehuöla antes de cuöc siehuas. Metztlajtlajpaloa Eubulo, Pudente, Lino, Claudia, hua noche ocseque tocnihua. ²² Tlöcatzintle ma iloa ca taja ipa moyulo. Hua ma nemiechmacacö Deus tiefavur.

Sente cörta tli San Pöblo oquejcuelfe TITO

¹ Naja nePöblo, que neca netietlatequepano de Deus, hua netlateotitlantle de Jesu-cristo. Yejuatzi niechtlölejque para que por medio de naja moneltocasque niecate tli Deus ye quemixpejpenque, hua quematesque lo que tlin melöhuac de toreligiön. ² De inu manera cuale quecheasque para quepeasque inu nemelestle nochepa. Deus, öque abele istlecatihuas, tiechprometierfejque inu nemelestle cachto de cuöc omochejchi tlöltecpectle. ³ Pero amo nima tiechonelfejque, tlöcamo hasta cuöc asec inu tiempo cuöc conbenierebeya. Entunses otiechelfejque ipa tiemensöje. Yejuatzi toTiemöquextejcötzi Deus oquejtojque ma niechmöcticö inu mensöje. ⁴ Temetzejcuelfea ini cörta para taja, Tito, tli tecaca quiename tlö teyene melöhuac tenoconie ipampa tecpejpea sa sie neltoquelestle. Deus toTajtzi, hua toTiemöquextejcötzi Cristo Jesús ma metzmeyaquelicö tieinfavur hua neyulsiebelestle.

Tlica oyeya Tito ipa Creta

⁵ Cuöc temetzcöjtie ompa ipa tlöltojpole de Creta, onecchi para que taja ma xet-layejyectlöle de lo que tli ayemo oyeya cuale. Nuyejque necnequeya ma xequentlöle tli yesque biebentzetzi de creyentes ipa noche puieblös, quiename nuyejque otemet-zencargörfe. ⁶ Cuale öque tectlölis para iyes biebentzi tlö amo tli quepea encuentra de tli öque cuale quieteyelfis. Ma quepea sa sente isohua. Ma quepea ipelhua tli moneltoca, tli abele yeca quieteyelfis de que sa yajyajteneme ipa sösantle tli amo cuale, o noso de que amo tlajtlaneltocaneme cate. ⁷ Pues queconbenieroa inu obispo, tli quemixutea creyentes, majcamo quepea niontle de tli öque quieteyelfis. Pues yaja tlaixutea de lo que tli tiehuöxcatzi Deus. Por inu conbenierebe majcamo iye mochamöhuane. Majcamo iye sa cualönene. Majcamo iye tlohuönque. Majcamo quecualejta peleitos. Majcamo quietiemo tomi sin que amo tequetes. ⁸ Cache cuale ma quecualejta quenselis pa ichö noche tli comentlajpaloa. Ma iye cuale tlöcatl, hua ma quemate queyecpensörus. Ma iye intiero yectec, hua ma quemate cuale mocontrolörus. ⁹ Ma quietoca inu mensöje tli oquetzeco, tli yaja melöhuac. Ejqueu cuale quenyuliehuas creyentes ca inu machestelestle tlin cuale, hua cuale quenyulcuepas tli tlajtlajtoa encuentra de tomachesteles.

¹⁰ Pos oncate meyactie tli amo tlaneltocaneme, especialmente entre joriojte, que tlajtlajtoa de tli amo quepea proviecho, hua quencajcayöhua giente. ¹¹ Conbenierebe öque ma quencamatzacua, pos quentlapolultea gientes ca noche infamilias, hua quenchachte sösantle tli amo conbenierebe, para quietlönisque tomi sin que amo tequetesque.

¹² Sente tlayulepante de miero ompa Creta otlannutz de ipueblo. Ejqueu oquejto: Ini giente de necö Creta seme istlcatlajtoa.

Cate quiename petzoyulcöme,
sa tlacuöneme, hua tlajtlatzejque.

Hua tli yaja oquejto ica melöhuac. ¹³ Por inu, xequenmelfe cuale que amo cuale quechijtecate. Xequemelfe ejqueu para ma cuale iye inneltoqueles, ¹⁴ hua para ma ayecmo quietocacö inu cuientos de joriojte hua inmandamientos de inu tlöca tli omoxeløjque de tlin melöhuac.

¹⁵ Para öque chepöhuac hua yectec iyulo, noche sösantle ica cuale. Pero para öque petzotec iyulo, öque amo moneltoca, niontle amo ica cuale. Pues sa quepensöroa tli petzoyutl, hua amo pinöhua ipa iyulo cuöc quechihua noso cuöc quepensörojteca de tli amo cuale. ¹⁶ Yejua quejtoa que tieixomate Deus, pero por lo que tli quechihua niesteca que amo melöhuac. Pues cate quieme tietlajyelteque, hua amo tlaneltocaneme, que abele quechihuasque niontle sösantle tlin cuale.

2

Inu machestelestle tlin cuale

¹ Pero taja xequejto lo que tli quejtoa inu machestelestle tlin cuale. ² Xequemelfe biebentzetzi ma queyecpensörucö, ma cuale mocontrolörucö, hua ma cuale quebicacö innemeles. Ma yecö cuale de inneltoqueles hua de intlasojteles hua de inxicojteles. ³ Nuyejque ejqueu lamatzetzi ma moportörucö ca meyac respieto. Majcamo yecö istlacatlajtoönejme. Majcamo yecö quiename niecate tli lalebes cojcone meyac mescöl, hua abele quecöhua. Cache cuale ma quenmacticö inu ocseque sohuame de lo que tlin cuale. ⁴ Ma quemejteticö inu ocseque tli ayemo lamatzetzi quiene quentlasojtlasque innajnömecua hua inpelhua, ⁵ quiene queyecpensörusque, quiene momalfisque de tlajtlacule, hua quiene cuale tlaixutisque ipa inchö. Ma yecö cualteque sohuame. Ma quenneltocacö innajnömecua. Pos tlö ejqueu quechihuasque, entunses abele öque tlajtus amo cuale de tietlajtultzi Deus.

⁶ Nuyejque xequenyuliehua tlöca tli ayemo biebentzetzi ma quematecö queyecpensörusque. ⁷ Hua xeye taja mismo sente ejjemplo de noche sösantle cuale, para que cuale quechihuasque quieme taja tecchijteca. Cuöc tequenmachtea, xecchihua ca yectelestle, sin que tecpensörus de que tecresibirus canajyetla taja, hua xecchihua ca meyac respieto. ⁸ Xetlanunutza lo que tlin cuale, para que abele yeca tlajtus amo cuale de lo que tli taja tequejtus. Entunses niecate tli moponieroa pinöhuasque porque abele tli tlajtusque amo cuale de tejua tli tecreyentes.

⁹ Niecate tli tejtequete quieme esclavos xequentlajtulmaca ma tlaneltocacö ipa noche sösantle. Inteque ma iye cuale para ma quecualejtacö inpatrones. ¹⁰ Majcamo yecö tlanönönqueliöneme, hua majcamo tlachtequecö, tlöcamo ma yecö intiero cualtientlöca. Ejqueu giente cuale quejtasque itech intlachihual que icaca cuale hua cuöcualtzi inu machestelestle tli tiechelfea de toTiemöquextejcötzi Deus.

¹¹ Pues ye onies tiefavur Deus, hua oquecualecac nemöquextelestle para noche giente. ¹² Hua tiechmachtea ma tejcöhuacö lo que tli amo cuale hua lo que tli quenejneque tlöltecpactlöca, hua ma tecyecpensörucö ipa tonemeles. Hua tonemeles ma iye yectec, hua ma tetiepilicö respieto ca Deus mientras teneme necö ipan tlöltecpactle. ¹³ Nuyejque tiechmachtea ma seme tetlachixtacö para inu tunale cuöc niexihuas ipa tietlaniexteles yejuatzi totieJesucristo, öque iloac Deus bieyetzintle, hua iloac toTiemöquextejcötzi. Pos cuöquenu tepajpöquesque lalebes. ¹⁴ Yejuatzi onetiemicuc topampa tejua, para tiechmöquextisque de tlajtlacule. Hua intiero tiechchepöjque para ma teyecö giente de yejuatzi tli lalebes tecnejneque tecchihuasque tlin cuale.

¹⁵ Xetlanunutza nönca sösantle ca nöche checöhuallestle. Xequenyuliehua creyentes hua xequemelfe tlö amo cuale quechihua. Amo xequencöhua que amo metzchibelisque cöso.

3

Quiene ma moportörucö creyentes

¹ Xequentlalnömete ma mosujetörucö ca cubierno hua tlötlajtoönejme, ma tlaneltocacö, hua ma quenequecö quechihuasque sösantle tlin cuale. ² Majcamo tlajtucö amo cuale de yeca. Majcamo quecualejtacö momagasque. Majcamo yecö mochamöhuöneme. Ma yecö cualtientlöca ca noche ocseque giente.

³ Porque oyeya tejua nuyejque oteyeyeya tetuntojte hua amo tetlaneltocaneme, hua giente tiechcajcayöjtaya. Sa tecneltocaya noche lo que tli quenequeya hua queliebiöya tonacayo. Otenemeya ipa noche sösantle tli amo cuale. Toxicöya. Giente tiechtlajyelejta, hua totlajyelejta entre tejua mismo. ⁴ Pero toTiemöquextejcötzi Deus otiechejtetejque tiefavur hua tietlasojteles para tlöltecpactlöca. ⁵ Entunses tiechmöquextejque, amo porque tecchijque canajyetla tlin cuale, tlöcamo ipampa tetitlölcoltejque. Tiechchepöjque cuöc tontlöcatque ocsajpa, hua tiechyancueliluc tieEspíritu

Sönto, hua de inu maniera otiehmöquextejque. ⁶ Hua otiechmacaque meyac tieEspíritu Sönto por medio de toTiemöquextejcötzi Jesucristo. ⁷ Ejqueu por tiefavur otiechselejque quiename teyecteque, hua quiename tetiepelhua tli tohuöxcatisque de inu nemelestle nochepa tli tecchixtecate.

⁸ Nöncate tlajtulte cate de confiönsa, hua necneque ma xequennunutza lalebes ipa ini nönca söstantle, para ma niecate tli moneltoca ca Deus ma modedicörucö seme quechihuasque tlin cuale. Ini söstantle cuale, hua tlaserbiroa para ca noche giente. ⁹ Pero xomoxelo de inu tlajtulme tuntos tli öque sa tladiscutiroa, hua de inu cuientos hua tlapoalestle de pa nieca tiempo, hua de inu peleitos hua chöchalönalestle de cuöc tladiscutiroa sobre inu ley de Moisés. Pos inu söstantle amo tli serbirebe hua amo tlapaliebea.

¹⁰ Tlö canajyeca *quechihua yaja ma moponierucö entre creyentes, xectlajtulmaca hasta ujpa, hua sötiepa xomoxelo de yaja. ¹¹ Ca inu tecmates que inu tlöcatl amo cuale iyulo, hua que itlajtlacul quecuntenörojteca.

Tlajpalulestle

¹² Cuöc ye temetztitlaneles Artemas o noso Tíquico, xecchihua lo posible para tehuölös ca naja ipa Nicópolis. Pos ye onecpensöro ompa nepanus inu tiempo cuöc siehua. ¹³ Xecchihua lo posible por tecpaliebis inu abogado itucö Zenas ca tiehua Apolos, para quepeasque noche tli quenejnesesitörusque para quesequirusque inojfe. ¹⁴ Hua inu creyentes de ompa ma momachticö quechihuasque tlin cuale hua tlapaliebisque ca lo que tli quechihua fölta, para que innemeles tlaserbirus. ¹⁵ Innochtie tli cate ca naja metztlajpaloa. Xequentlajpalo innochtie tli tiechtlasojtla porque moneltoca quieme tejua.

Tiefavur Deus ma iye ca nemonochtie.

* **3:10** Cuale nuyejque motradusirus: “tlamachtea tli amo ica de acuerdo ca toenseñönsa”.

Sente cörta tli San Pöblo oquejcuelfe FILEMÓN

¹ Naja nePöblo que netzacteca ipan cörsel por tiepampa Cristo Jesús. Naja ca tiehua tocni Timoteo temetzejcuelfea ini cörta para taja, Filemón, öque tecaca tetotlasojcöicni de traböjo. ² Nuyejque tequejcuelfea para tocnisohuatl Apia, hua tocni de guerra Arquipo, ca inu grupo de creyentes tli mosentlölea ipa mochö. ³ Deus toTajtzi hua Tlöcatzintle Jesucristo ma nemiechmomeyaquelicö tieinfavur hua neyulsiebelestle.

Pöblo tietlasojcömatelya Deus por Filemón

⁴ Netietlasojcömatelya noDeus seme cuöc temetzelnömetteca taja ipa notlajtlötlajteles. ⁵ Pos niechelfejque quiene ca tomoneltoca ca Tlöcatzintle Jesús hua tequentlasojtla tli yecteque. ⁶ Netietlajtlanelea Deus ma taja cuale xequenxiexelfe de moneltoqueles para que yejua cuale casojcömatesque de lo que tlin cuale tecpejpea tejua por Cristo Jesús. ⁷ Pos necpeaya meyac pöquelestle hua tlayulölelestle porque tequentlasojtla. Pos inyulo de yecteque omoscale por taja, nocni.

Pöblo otlajtla sente favur para Onésimo

⁸ Por inu, mös necpea meyac deriecho en Cristo para temetznahuatis de tli conbenierebe tecchihuas, ⁹ pero cache cuale temetztlötlajtea, por que totlasojtla lalebes. Pos naja nePöblo, que ye nebiebentzi, hua öxö cache neca neprioso por tiepampa Cristo Jesús. ¹⁰ Temetztlötlajtea por noconie Onésimo. Nejcuitea noconie pos icaca quiename tlö onochi neitajtzi de yaja necö ipan cörsel.

¹¹ Pa nieca tiempo Onésimo oyeya moesclavo de taja, pero amo cuale tequeteya. Pero a öxö para taja hua para naja ye cuale tequete. ¹² Ye temetztitlanellea ocsajpa. Iaca quieme tlö naja temetztitlanellejteca noyulo. ¹³ Naja necnequeya ma mocöhua ca naja, para que pa molocör taja niechserbirus necö ipan cörsel cöne netzacteca por ipampa cuale tlamachestelestle. Necnequeya ma yaja ma niechserbiro siendo que taja abele teniechserbirus. ¹⁴ Pero naja amo necnequeya necchihuas niontle sin que amo taja tecmates, para que mofavur tli taja teniechchibelis majcama iye quieme ca fuiersa, tlöcamo por que taja tecneque teniechchibelis ini favur. ¹⁵ Beles Onésimo uya de taja por quiejquech tunalte para que öxö tecpeas nochepa. Pero ayecmo iyeyes moesclavo, ¹⁶ tlöcamo ica motlasojcöicni. Pos yaja nectlasojtla lalebes ca toTlöcatzintle, hua taja cache ca meyac arrasas tectlasojtlas quieme tlö oyene mocni.

¹⁷ Ejqueu, tlö tecpensöroa que naja neca nemocompaniero de taja, pos xecsele Onésimo quieme tlö naja mismo neyene. ¹⁸ Hua tlö canajyetla metzchibele noso metzbiquelea, xeniechcubrörfe naja. ¹⁹ Naja nePöblo nequejcuelfea ca nomö; naja nectlaxtlöhuas. Mös que cuale temetzhibelisquea ma xequelnömeque que taja teniechbiquelea hasta belaja mölma. ²⁰ Quiema, nocni, ma necpea proviecho de taja ca toTlöcatzintle; xeniechescale noyulo tieca Cristo.

²¹ Temetzejcuelfea ca inu confiönza de que taja tetlaneltocas, hua necmate que taja tecchihuas cache de tli naja temetznahuatea. ²² Hua xecpreparöro nuyejque locör para naja; pos necchea que por nemotlajtlötlajteles Deus niehcöhuasque neyös ca nemejua.

Tlajpalulestle

²³ Epafras, nocompaniero de cörsel, metztlajpaloa tietucöyupa Cristo Jesús. ²⁴ Nuyejque metztlajpaloa Mörcos, Aristarco, Demas, hua Lucas, nocnihua de traböjo.

²⁵ Tiefavur Tlöcatzintle Jesucristo ma iye ca nemoyulo.

Sente cörta tli omojcuelo para HEBREOS

Deus tiechnunutzalo por medio de tieConietzi

¹ Ipa nieca tiempo, Deus otlajtlajtuluc meyacpa hua de meyac maneras inca tobiebetcöhua por incamacopa de tlayulepantejqque tli quepoaya tietlajtultzi. ² Pero öxö, que ye teyabe pa itlamejyo tunalte, tiechnunutzalo por tiecamacopa tieConietzi, öque tiemochibele para nehuöxcatilus noche söstantle. Por medio de tieConietzi, Deus oquechejqque noche tlöltecpactle. ³ Tietech tieConietzi cuale tequejtasque tietzotlöneles hua tieyectlanixteles hua noche quiene iloac Deus. Hua noche söstantle yejuatzi tieConietzi quenchiuualtilo ma quesequirojtacö cuale por tietlajtulchecöhualestzi. Hua yejuatzi tiechchepöjqque de totlajtlacul, hua sötiepa onetlöniluc ompa tlacpac ca tiemöyecmö de Deus, öque lalebes bieye hua checöhuac iloac.

TieConietzi Deus cache cuale iloac que öngeles

⁴ De inu manera tieConietzi Deus cache cuale iloac que innochtie öngeles, hua oquepexque cache bieye tucöyutl que yejua. ⁵ Pos Deus ayec oquelfejque yeca sente öngel:

Taja tenoConie;

öxö temetzchihualte para ma xeye tenoConie.

Cache tiel otieyelfejque Cristo ejqueu. Hua pa ocsie locör oquejtojque:

Naja neyes neiTajtzi, hua yaja iyeyes noConie.

⁶ Hua ocsajpa, cuöc tiehualtitlanuc tieConietzi öque cache importönte para ma hualiloo ipan tlöltecpactle, oquejtojque ejqueyi:

Hua ma quemabesuticö noche tieöngeles de Deus.

⁷ Hua de inu öngeles oquejtojque:

Quenchiuualtilo tieöngeles ma yecö *quiename yejyecatl,

hua tietlatequepanojua quenchiuualtilo ma yecö quiename tletzintle cuöc möna.

⁸ Cache de tieConietzi oquejtojque:

Tetlamandörus ipa motrono, oh Deus, semejcac hua para nochepa.

Inu tlacutl tli tecusörus para tetlamandörus quejtusneque que iyeyes melactec motlajtoj-cöteles.

⁹ Tectlasojtla yectelestle, hua tectlajyelejta tlajtlacule.

Ipampaju Deus, öque iloac Deus de taja, metzteochijque ca cache meyac pöquelestle que inu ocseque mocompanierojua.

¹⁰ Hua nuyejque tlajcuelulpanca:

Tejuatzi, oh Tlöcatzintle, ca ipiejyo noche söstantle tomotlölele tlöltecpactle;

hua elfecac icaca motlachihualetzi de momöztetzihua.

¹¹ Yejua tlamesque, cache tejuatzi tomobetztas nochepa;

yejua innochtie tlamesque quieme sente tlaquentle,

¹² hua quiename sente tlaquiemetl tequenmoquemelfis, hua mopatlasque.

Cache tejuatzi ayec tomopatlatzinoa,

hua inu xebetl de monemelestzi ayec tlames.

¹³ Pues Deus ayec oquelfejque yeca sente öngel:

Xomotlöle ca nomöyecmö,

hasta senamo ma nequemumiyöro moenemigos hasta itzintla mocxehua.

* **1:7** Cuale nuyejque motradusirus: "espíritus".

¹⁴ Amo oquejtojqe ejqueu ca öngeles, pues yejua cate espíritus tlateotequepano-
jqe, tli Deus quenhualtitlanque para tiechpaliebisque tejua, tli tohuöxcatisque de
nemöquextelestle.

2

Majcamo tecdespresiörucö tomöquexteles

¹ Por inu conbenierebe ma tecyejcaquecö ca meyac cueröro lo que tli otejcajqe,
para majcamo de repiente iye que toxelusque de ini söstantle. ² Porque inu tlajtule tli
oquejtojqe öngeles omochi, hua noche giente tli otlajtlacojqe hua amo tlaneltocaque
oquepexque inu castigo tli yejua quemeresierojque. Tlö Deus ejqueu quencastecörojque
niecate, ³ ¿quiene noso temöquisasque tejua, tlö amo tecchihuasque cöso de ini nönca bieye
nemöquextelestle tli tecpejpea? Pues primero tlanunutzaluc de inu nemöquextelestle
yejuatzi Tlöcatzintle. Hua niecate tli oquecajqe nuyejqe tiechasegurörfejqe de inu
nemöquextelestle. ⁴ Hua Deus nuyejqe tiechasegurörfejqe inca yejua, por medio
de sieñas hua tietzöbeme, hua meyac ocseque söstantle tli ica tietzöbetl, hua ca inu
beletelesme tli quetiemaalo yejuatzi Espiritu Sönto. Noche inu söstantle oquechijque
Deus san quiene ca yejuatzi oquenejqe.

Jesucristo onechihualuc quiename tieicnihua

⁵ Pues inu tlöltecpactle tli huölös, de tli tetlajtlajtojtecate, Deus amo quesujetörusque
para ma ipa tlamandörucö öngeles. ⁶ Pues yeca oquejto ipa teotlajtule ejqueyi:
¿Tli motequetea tlöcatl, para que yejuatzi tomotequepachojtzinus por yaja?

Noso ¿öquenu yaja, para que tomopaliebelea?

⁷ Tejuatzi otomochejchibele cache tepetzi tzitzequetzi que öngeles.

Tomocorunajtele ica tlanixtelestle hua yectieniebelestle.

⁸ Noche söstantle tomotlölele itzintla icxehua.

Entunses tlö Deus oquetlölejque noche söstantle itzintla icxehua tlöcatl, pues amo
oquecöjqe niontle que amo quesujetöröjqe. Pero cuale tequejtasque que ayemo mo-
sujetöroa noche söstantle para ma quemandöro tlöcatl. ⁹ Pero tetieyejta Jesús, que nechihualuc
tepetzi cache tzitzequetzi que öngeles, hua quesufrirojque hasta que omecoac.
Hua por inu Deus tiecorunajtejqe Jesús ca tlanixtelestle hua yectieniebelestle. Pues
Deus, porque tiechtlasojtlaluc, oquenejqe ma Jesús ma quemachelicö mequelestle por
tonochtie.

¹⁰ Pues ejqueu conbenierebeya ma quechihuacö Deus, öque por tiepampa yejuatzi
hua por medio de yejuatzi omochejchi noche söstantle. Yejuatzi oquenejqe quenhuale-
casque meyactie tiepelhua para ma yecö ipa tlanixtelestle. Para quechihuasque inu,
tieconbenieroöya ma tieyecscöhuacö toCristo por medio de tiecoco. Ejqueu öxö cuale
tiehmöquextilo tejua tli tecate tetiepelhua de Deus. ¹¹ Pues yejuatzi öque tiechyectelilo,
hua tejua tli tiechyectelejqe, tejua quiename yejuatzi tecate tetiepelhua Deus. Por inu
amo pinöhualo para tiechcuitilo tetieicnihua. ¹² Pues quejtulo:

Nequennunutzas nocnihua de motucöyutzi

hua innepantla temetzmocuatelis.

¹³ Hua nuyejqe quejtulo:

Naja neyes de niecate tli moneltoca ca Deus.

Hua pa ocsie locör quejtulo:

Xetiechejtacö necö, naja hua nopelhua tli niechmacaque Deus.

¹⁴ Bieno pues, tejua tli tecate tetiepelhua, tonochtie tecpejpea tocuiervo de yestle hua
nacatl. Hua por inu yejuatzi nuyejqe oquepexque sente cuiervo quiename de tejua.
Oquechijque ejqueu para que cuale omecoac. De inu manera oquexexicojqe por com-
plieto inu nieca tli quepeaya checöhualestle de mequelestle, quejtusneque yaja Diöblo.

¹⁵ Ejqueu cuale tiehmöquextejque tonochtie tejua. Pos tejua seme teyejeyeya quiename

teesclavos ipampa tomajtiöya de que temequesque. ¹⁶ Pues de melöhuac yejuatzi amo oquenpaliebejqe inu öngeles, tlöcamo cache oquenpaliebejqe itlöcaxenöchpelhua de Abraham. ¹⁷ De inu manera, tieconbenieroöya ma iloa quiename tieicnihua ipa noche söstantle, para que ejqueu cuale nechihualuc tlajtojcöteopexque tli tiechpelilo icnuejteles-tle hua tli iloac de confiönsa para quecumplirusque lo que tli Deus quenequihua. Ejqueu cuale oquetlaxtlöjqe para tiechquextelejqe totlajtlacul de tejua tli tecate tetiepuieblo. ¹⁸ Pos sie yejuatzi oquesufrirojque cuöc Amo Cuale Tlöcatl tieyulmajmötocac. Hua de inu manera cuale tiechpaliebisque cuöc tejua nuyejqe tiechyulmötocas Amo Cuale.

3

Jesús iloac cache importönte que Moisés

¹ Por inu, nocnihua yecteque, tli nuyejqe Deus nemiechnutzque desde elfecac, xetieitzacö Jesús, öque iloac tlateotitlantle hua teopexque de lo que tli toneltoca. ² Pues yejuatzi seme quecumplirojqe lo que tli quenequihuaya Deus. Pues Deus tietlölejque para inu. Ejqueu nuyejqe quechihuaya Moisés ipa noche tequetl tli quechihuaya *ipa tiechö de Deus. ³ Pero Jesús cache quemeresieruro bieye yecteniebelestle que Moisés. Pues sente cale amo tönto quemeresieroa ma tecyecteniehuacö, tlöcamo cache quemeresieroa öquenu yaja oquechejchi. ⁴ Pues amo onca chöntle sa yaja mochejchi, pos innochtie tlachejchijme por yeca. Hua noche söstantle tli onca, Deus oquechejchijque. ⁵ Hua Moisés de melöhuac quecumpliro cuale iteque *ipa noche tiechö Deus. Pues oyeya sente tlatequepano, hua ejqueu omochihuaco sente testigo de lo que sötiepa mojtus. ⁶ Cache Cristo amo iloac quiename sente tlatequepano, tlöcamo cache tlamandörruro quiename sente öque iconie tli tlamandöroa ipa ichö itajtzi. Hua inu tiechö tejua tecate, tlö seme tecsequirojtasque ca inu balur hua inu pöquelestle tli tecpejpea por tomöcheales.

Onca siebelestle para tiegiente Deus

⁷ Por inu, xejcaquecö cuale lo que tli quejtulo Espíritu Sönto:
Tlö nenquecaquesque öxö tietlajtul,

⁸⁻⁹ amo xectepitzucö nemoyulo quiename oquechijque nemobiebetcöhua,
cuöc niechpiepiehualtejqe ompa cöne nionöque chönte
ipa inun tunale cuöc niechprobörojque para quejtasque tlö necualönes.

Pues oniechprobörojta hua oniechmatque,
mös ye oquejtaque notlachihual ipa cuarenta años.

¹⁰ Por inu onecualö ca inu niecate giente
hua onequejto: “Seme san tlimach quenemelea yejua ipa inyulo,
hua amo oquenejqe oquixomatque noojfe”.

¹¹ Por inu onetlabielmec hua necprometiero ca juramento:
Nieca giente amo quepeasque pörte ipa nosiebeles.

¹² Nocnihua, xecpeacö cueröro amo cana de repiente yeca de nemejua quepeas amo cuale iyulo para ayecmo tlaneltocas, hua ejqueu monencuaxelus de Deus öque nemoa.

¹³ Cache xomotlajtulmacacö entre nemejua cöra tunale, mientras öxö oc onca locör, para majcamo iye que canajyeca de nemejua quetepitzus iyulo ipampa quecajcajöhua itlajtlacul. ¹⁴ Pues tecpeasque pörte tieca Cristo tlö tecsequirusque tocajpetzojtasque ipa toyulo hasta itlamejyo tlöltecpactle ca inu balur tli tecpea desde cuöc toneltocaque.

¹⁵ Xequelnömequecö tli quejtoa:

Tlö nenquecaquesque öxö tietlajtul,

amo xectepitzucö nemoyulo,

quiename oquechijque nemobiebetcöhua cuöc niechpiepiehualtejqe.

* **3:2** Cuale nuyejqe motradusirus: “entre tiegiente Deus”.

¹⁶ ¿Öquemeju noso oquecajque tietlajtul Deus hua tiepiepiehualtejque? Pues innochtie tli oquisque de Egipto ica Moisés. ¹⁷ Hua ¿ca öquemeju ocualönoac Deus por cuarenta años? Pues inca innochtie tli otlajtlacojque, tli omejmejque ompa cöne nionöque chönte. ¹⁸ Hua ¿öquemeju oquemelfejque ca juramento que amo quepeasque pörte ipa tiesiebeles? Pues niecate tli amo tieneltocaque. ¹⁹ Hua cuale tequejta que amo oquepexque pörte ipampa amo moneltocaque.

4

¹ Bieno pues, oc turavea tecpea tiepromiesa de Deus para cuale tecpeasque pörte ipa tiesiebeles. Pero ma tecmabelicö, amo cana de repiente nieses que canajyeca de nemejua abele quepeas pörte. ² Pues tejua melöhuac otiechnunutzque de inu cuale tlamachestelestle, hua ejqueu mismo nuyejque niecate. Cache amo oquenserbiro mös oquecajque inu tlajtule, porque *amo mosietelejque de inneltoqueles ca inu ocseque tli oquecajque hua omoneltocaque. ³ Pues tejua tli ye toneltocaque tecpea pörte ipa tiesiebeles, san quiene ca oquejtojque:

Onetlabielmec hua necprometiero ca juramento:

Nieca giente amo quepeasque pörte ipa nosiebeles.

Pues ye oyeya inu siebelestle desde cuöc opie tlöltecpactle; solamente que amo oquencöjque nieca giente ma quepeacö pörte ipa. ⁴ Pues sie pörte tlajcuelulpanca de inu söbro: “Hua Deus nesiebiluc de noche tietequa ipa inu checume tunale”. ⁵ Hua nuyejque tlajcuelulpanca cöne ye tequetzaya: “Nieca giente amo quepeasque pörte ipa nosiebeles”. ⁶ Bieno pues, oc turavea polebe seque tli quepeasque pörte ipa inu siebelestle. Pues niecate tli cachtö oquecajque inu cuale tlamachestelestle amo oquepexque pörte ipampa amo tlaneltocaque. ⁷ Por inu Deus ocsajpa tiechtlölituteca ocsente tunale, quejtusneque yaja öxö. Pues ye meyac xebetl sötiepa de que niecate oquepolojque inderiecho de que amo oquepexque pörte, oc turavea quejtuluteca por icamacopa David (quiename ye tequejtojtecate):

Tlö nenquecaquesque öxö tietlajtul,

Amo xectepitzucö nemoyulo.

⁸ Pues tlö Josué ye oquenmacane inu siebelestle, Deus ayecmo tlajtlajtulusquiöne de ocsente tunale. ⁹ Quejtusneque entunses que oc mocöhua sente siebelestle de Deus para tiepuieblo. ¹⁰ Pues öque ye oquepex pörte ipa siebelestle, yaja mosiebea de itequa, quiename Deus nuyejque onesiebiluc de tietequa. ¹¹ Por inu, ma tecuejcuesebecö para tecpeasque pörte ipa inu siebelestle. Majcamo iye que de repiente canajyeca betzes ipa tlajtlacule por amo tlaneltocas, quiename niecate giente que nuyejque amo tlaneltocaque.

¹² Pues tietlajtultzi Deus yulejteca hua tequete cuale, hua cache calaquene ica que sente espöda tli de ujcö löro tlateque. Pues tietlajtultzi Deus cuale caxelea para quetlapönas toölma hua toespíritu hua noche lo que tli tecpejpea ipa toyulo. Hua cuale quetlatejtiemolea topensamiento hua noche lo que tli tecpensöroa ipa toyulo. ¹³ Hua niontle amo onca de noche lo que tli Deus oquechejchijque ma mojoynta sin que yejuatzi abele quejtasque. Cache noche söstantle xipetzejtecate hua mopejpetlöjtecate, yecniestecate tieixtla yejuatzi. Hua tejua tetiemacasque cuienta ca yejuatzi.

Jesús iloac totlajtojcöteopexque

¹⁴ Bieno pues, tecpea sente tlajtojcöteopexque, que ocalacoac hasta miero elfecac, yejuatzi Jesús tieConietzi Deus. Por inu ma seme toneltocatacö ca lo que tli tequejtoa que toneltoca. ¹⁵ Pues totlajtojcöteopexque cuale quemachelilo de lo que tli tejua tecmachelea, de que amo techecteque tecate. Pues yejuatzi nuyejque oquesufrirojque noche

* **4:2** Meyactie manuscritos quejetoa: “oquecajque hua amo moneltocaque”.

ini pruebas tli tejua tecsufriroa. Pero yejuatzi ayec otlajtlaculuc. ¹⁶ Ma topachucö noso ca noche confionza itlac inu trono de toDeus, öque tiechmacalo tiefavur. Pues yejuatzi tiechpilisque tielöocoltelestle hua tiechmacasque tiefavur cuöc tecnesesitörusque.

5

¹ Pues cara sente tlajtojcöteopexque quixpejpenalo Deus de intzölö tlöca. Hua motlölea para quenrepresentörus giente ipa söstantle de Deus, para tlabentlölis hua tiecuetlabiltis por intlajtlacul giente. ² Quentratöroa ca cuale niecate tli amo quemajmate hua tli mocajcayöjtecate, pos yaja mismo nuyejque quepoloa checöhualestle hua machestelestle. ³ Hua por inu quepea que tiecuetlabiltis por itlajtlacul de yaja mismo, ejqueu quiename quechihua por intlajtlacul de inu puieblo. ⁴ Hua nionöque amo mochihua tlajtojcöteopexque san por yaja queneques, cache teopexque mochihua solamente öque Deus quetlölilo para quechihuas inu cuale tequetl, quiename nuyejque oquetlölejque Aarón.

⁵ Ejqueu nuyejque Cristo amo nechajchamöhualuc sie yejuatzi para ma iloa tlajtojcöteopexque. Cache otiechamöjque yejuatzi öque otieyelfejque:

Taja tenoConie;

öxö temetzchihualte para ma xeye tenoConie.

⁶ Ejqueu nuyejque quejtulo ipa ocsente locör:

Taja teca teteopexque para nochepa,

ejqueu quiename oyeya Melquisedec.

⁷ Cuöc Cristo nemoöya necö ipan tlöltecpactle, netlajtlötlajtiloöya hua netlatzajtzeloöya hua hasta chucoöya lalebes, hua tlajtlanihuaya tieca Deus, öque cuale tiemöquextilusquea de inu mequelestle. Hua Deus otiecajque, ipampa yejuatzi tieyecmabeliluc Deus.

⁸ Ejqueu, mösque iloaya bel yejuatzi tieConietzi Deus, pero por lo que tli oquesufrirojque onemachtiluc para tlaneltocuc. ⁹ Pues öxö que ye onechihualuc intiero cuale, öxö ye cuale quetiemaalo nemöquexlestle nochepa para innochie tli tieneltoca. ¹⁰ Hua Deus otietlölejque para ma iloa tlajtojcöteopexque quiename oyeya Melquisedec.

Majcamo toxelucö de Deus

¹¹ De inu Melquisedec tecpea meyac söstantle tli tequejtusque. Hua beles tepetzi tequeyo para nencasojcömatesque lo que tli nemiechpubelisque, pues niese ayecmo nenquecaque cuale. ¹² Pues ye nenquepea meyac tiempo desde cuöc primero nemoneltocaque, hua ye nentlamachestisquiöne. Pero niese que oc nenquenesesitöroa ma nemiechmachesticö lo que tli ica cachto cöne piehua machestelestle de tlajtule de Deus. Nencate quiename nenpelantzetzi tli oc nenquenesesitöroa nenconitasque lieche, hua ayebele nenquecua tli checöjctlacuale. ¹³ Cuöc nequejtoa que yeca oc coniteca lieche hua que oc ica peltzintle, nequejtojteca que ayemo ica tlajmatque de inu tlajtule de yectelestle. ¹⁴ Cache tli checöjctlacuale icaca para tli ye tlöca, para niecate tli ye cuale quejta hua questlocoa, pues intech omomat de que ye cuale quejta de tlin cuale hua tlin amo cuale.

6

¹⁻² Por inu, ma tecsequirucö adelönte para tobepöhuasque hua tasetibe tetlöca. Ejqueu noso ma tejcöhuacö sie löro tepetzi inu tlamachtelestle de Cristo tli cachto otectzecoque. Nequejtojteca de ini nöncate enseñönsas quiename de neyulcuepelestle para ayecmo öque quechihuas inu söstantle tli quebicatz mequelestle, hua de neltoquelestle tieca Deus; de inu tlamachtelestle de necuötiequelestle, hua de inu mötlölelestle ipa öque itzontecö, hua de inu yulebelestle, hua de quiene Deus tlajuscörusque hua lo que tli quejtusque mocöhuas nochepa. Pues noche ini nöncate enseñönsas cate quiename sente cimientto de toneltoqueles. Pero öxö ma tecsequirucö ca ocseque söstantle. ³ Hua ini nönca tecchihuasque tlö Deus quenequihua. ⁴ Pues oncate tli ye oquejtaque inu tlöbile tli yaja

tietlajtultzi Deus, hua ye oquematque de lo que tli Deus quieti macalo, hua oquepexque pörte ca yejuatzi Espiritu Sönto. ⁵ Nuyejque quebelmatque inu cuale tlajtule de Deus, hua oquematque inu beletesme tli tecpeasque ipa inu tlöltecpactle tli sötiepa huölös. ⁶ Pero yejua, mös oquematque noche inu sösantle, ocsajpa obetzque hua omoxelojque de Deus. Hua ayojcocuele öque quenhualecas ocsajpa para ma moyulcuepacö. Pues icaca quiename tlö ocsajpa tiecoruspelojtecate tieConietzi Deus, hua tiepejpinöjtejtecate imixtla giente. ⁷ Cajcate quiename tlöle que meyacpa quietoia ötzintle tli ipa queyabe. Tlö inu tlöle quieti maca sente tlamochihuallestle cuale para niecate tli quetequetiltel- jque, Deus quecualejtalo hua queteochihualo. ⁸ Pero tlö sa quieti maca betztle hua sacajpule, amo tli balierebe, hua icaca para tietlabejbicaltelestle, hua itlamejyo icaca para xutlas. ⁹ Pero mös ejqueu tetlajtlajtoa, totlasojcöicnihua, tecpea confiönsa que nemejua nenquechihuasque lo que tlin cuale. Pues ipa nemonemeles mochihuas inu sösantle tli yebitz itech nemöquextelestle. ¹⁰ Pues Deus queyequejtalo hua nemacalo cuienta de noche nemotlachihual hua de inu tlasojtelestle tli nentiepilea, que onies cuöc nenquenpaliebejque inu yecteque, quiename hasta öxö turavea nenquechijtecate. ¹¹ Hua tecnejneque ma cara sente de nemejua ma cuejcuesebe seme. Pos ejqueu nenquepeasque confiönsa de que mochihuas por complieto inu sösantle tli tecchea. ¹² Amo xetlajtlajtzejque xeyecö, cache xecchihuacö quieme inu niecate tli quesequiroa moneltocatecate hua ejqueu mohuöxcatisque de lo que tli Deus queprometierojque.

Tiepromesa de Deus icaca seguro

¹³ Pues cuöc Deus oquechijque inu promesa ca Abraham, quejurörojque por yejuatzi mismo. Pues amo onca canajyeca cache bieye que Deus para que Deus tlajurörurus por inu yeca. ¹⁴ Hua oquelfejque Abraham: “Melöhuac temetzelfea, pues temetzteochihuas ca bieye tlateochihuallestle, hua lalebes temetzmeyaquelelis moxenöchpelhua”. ¹⁵ Hua ejqueu, cuöc yaja ye meyac tiempo omöchix ca paciencia, oquesele lo que tli Deus oqueprometierfejque. ¹⁶ Pues cuöc giente tlajuröroa, quejuröroa por yeca tli cache bieye ica, hua cuöc cafirmöroa canajyetla ca juramento, ayecmo quediscutiroa. ¹⁷ Hua Deus cafirmörojque tiepromesa ca juramento, porque oquenejque tiechmoströrfisque que ayec quepatlasque de lo que tli quepensörojque quechihuasque. Pues tejua to- huöxcatisque de inu sösantle tli queprometierojque. ¹⁸ De inu manera tecpea ume sösantle tli cafirmöroa de lo que tli tohuöxcatisque, que yejua tiepromesa hua tieju- ramento de Deus. Hua abele mopatlasque, porque abele istlacatihuas Deus. Por inu tanimöroa tejua tli tonhuölajque tietlac Deus para ma teyecö seguros, para ma totlapejpeficö itech inu nemöchealestle. ¹⁹ Pues inu nemöchealestle quehecöhua hua caseguröroa toölma, quiename sente *ancla quehecöhua hua caseguröroa börco. Hua inu ancla tli tecpejpea, que yaja inu tomöcheales, moquitzquejteca icuetlapa de inu cortina de teopantle de elfecac, ²⁰ cone ye ocalacoac Jesús por tejua para que tejua nuyejque cuale tecalaquesque. Pues yejuatzi ye iloac tlajtojcöteopexque para nochepa quiename oyeya Melquisedec.

7

Jesús iloac teopexque quiename oyeya Melquisedec

¹ Pues ini nönca Melquisedec oyeya rey de Salem, hua oyeya teopexque de Deus öque cache bieyetzintle iloac. Cuöc ye hualmocuepato Abraham de inu guierra cöne quenx- exico inu reyes, Melquisedec oquis oquenömequeto, hua quebendeseyumacac. ² Hua Abraham oquemacac inu majtlactle pörte de tli oquetlö. Inu tucöyutl de Melquisedec

* **6:19** Sente ancla ica sente tepostle yetic tli giente quietlajcale de ipa sente börco, para ma motlölaque itech tlöle itzintla ötzintle. Entunses inu börco cuale moquitzquis ca sente löso noso cariena tli ilpeteca itech ancla. Xomojtelicö Hch. 27.29.

quejtusneque “Rey de Yectelestle”. Hua quiename oyeya rey de inu ciudad de Salem, que quejtusneque “yecsiebelestle”, pos nuyejque cuale tequejtusque que oyeya “Rey de Yecsiebelestle”. ³ Niestequisa sin que amo quepea itajtzi nimpör inöntzi nimpör ipelhua. Amo tlajtlajtoa teotlajtule de quiene opie noso quiene otlameto inemeles. Ejqueu inu Melquisedec icaca quiename tieConietzi Deus, hua iteopexcöyu iyēs para nochēpa.

⁴ Xequējtacö noso quiene lalēbes bieye oyeya ini nönca tlöcatl. Pūes hasta Abraham, öque ica tajtle de noche inu nación de Israel, quētiēmacac ca yaja Melquisedec inu majtlactle pörte de lo que tli cache cuale de lo que tli oquetlö. ⁵ Hua melöhuac inu ley de Moisés tlamandöroa que inu teopexcötzetzi tli cate de ipelhua de Leví ma quēselicö inu majtlactle pörte de lo que tli quepejpea inu ocseque israelitas, mös yējua levitas nuyejque cajcate de ipelhua Abraham. ⁶ Pero Melquisedec, öque amo ica de ipelhua Leví, oquesele inu majtlactle pörte de lo que tli quepeaya Abraham. Hua yaja quebēdeseyumacac Abraham, öque oquēpex tiepromiasas de Deus. ⁷ Hua abele öque negörus que öque tlabēdeseyumaca ica cache bieye que öque quēselea ibēdeseyu. ⁸ Hua inu levitas, tli quēselea inu majtlactle pörte, yējua sa meque. Cache Melquisedec, teotlajtule tiechēfea de yaja quiename tlö nenteca. ⁹ Hua inu levitas quēselea inu majtlactle pörte de lo que tli quepejpea ocseque grupos de israelitas. Pero cuale tequejtusque que yējua levitas nuyejque quētiēmacaque inu majtlactle pörte ca Melquisedec cuöc Abraham quētiēmacac. ¹⁰ Pūes cuale tequejtusque que yējua oc turavea oyejyēya itech icuierpo Abraham cuöc Melquisedec oquis oquēnömequeto.

¹¹ Inu israelitas oqueselejque inu ley por medio de inu teopexcötzetzi de levitas. Pero inu ley hua inu tequetl tli oquechihuaya inu teopexcötzetzi quepoloöya para iyēs intiero cuale. Pūes tlö oyene intiero cuale, ¿tli para Deus cualtitlanelilusquea ocscēte teopexque? Pūes ye ohualiloac toteopexque, hua tietēopexcöyu icaca quiename de Melquisedec, hua amo quiename itēopexcöyu de Aarón. ¹² Pos ye que omopatlac teopexcöyutl, quejtusneque que nuyejque omopatlac inu ley. ¹³ Hua cuale tequejta que ye omopatlac teopexcöyutl porque inu teopexque de tli tetlajtlajtojtecate amo iloac de inu levitas, tlöcamo iloac de ocscēte grupo de israelitas. Hua nionöque ocscēte de inu grupo ayec omochi teopexque. ¹⁴ Pos tecmajmate que toTlöcatzintle otlöcatihuac de inu grupo noso tribu de Judá. Hua Moisés amo tli oquejto ipa inu ley de que uyesquea teopexque de Judá. ¹⁵ Hua turavea cache cuale tequejta que ye omopatlac inu teopexcöyutl cuöc tequejta que ye ohualiloac scēte teopexque quiename Melquisedec. ¹⁶ Yējuatzi amo nechihualuc teopexque por medio de inu ley. Pos inu ley quejtoa que öque iyēs teopexque tlö ica de familia de levitas. Cache toTlöcatzintle onechihualuc teopexque porque quepealo checöhualēstle hua porque nēmoa nochēpa. ¹⁷ Pos quejtoa de yējuatzi:

Taja tecaca tēteopexque para nochēpa,
ejqueu quiename oyeya Melquisedec.

¹⁸ Ejqueu inu mandamiento tli oyeya ayecmo balierebe. Pos abele tiechpaliebiöya hua amo tli tiechserbiroöya. ¹⁹ Pūes inu ley abele tiechchibeliöya para ma teyēcö intiero tecualteque. Pero öxö que ye omojcuene inu ley, öxö ye tecpejpea scēte möchealestle tli cache cuale, hua por medio de inu möchealestle cuale tasetibe tietlactzinco Deus.

²⁰ Hua Deus oquechijque inu ica juramento. ²¹ Pos inu ocseque omochijque teopexcötzetzi sin que amo öque tlajuröro. Cache cuöc Deus tietlöliluc Jesús para iloac teopexque, tlajuröruruc. Pūes tieyelfejque ejqueyi:

Tlajuröruruc Tlöcatzintle, hua ayec neyulcūepalus:

Taja tēca tēteopexque para nochēpa.

²² De maneras que Jesús iloac öque quegarantizöruro que mochihuas scēte acuerdo tli ica cache cuale que inu ocscēte. ²³ Inu ocseque teopexcötzetzi oyejyēya meyactie, pūes abele möcöhuaya nochēpa porque mequeya. ²⁴ Cache Jesús iloac para nochēpa, hua por

inu quepealo teopexcöyutl que ayec mopatlas. ²⁵ Hua por inu cuale nuyejque intiero tlayecmöquextilo öque tieca yejuatzi mopachoa tiecatzinco Deus. Pues nemoa nochepa hua ejqueu cuale netlatzajtzelo por tejua.

²⁶ Pues yejuatzi iloac tlajtojcöteopexque ejqueu quieme tejua tecnesesitöroöya. Pues tecnesesitöroöya sente tlajtojcöteopexque yectec quiename yejuatzi, hua sin tlajtlacule nimpör niontle tli amo cuale, tlaxelule de tli tlajtlaculque, tli cache bejcapa iloac que elfecac; ²⁷ que amo quepealo que tiecuetlabiltis mumustla, quiename quechihua ocseque tlajtojcöteopexcötzetzi. Pues yejua quepea que cachtö tiecuetlabiltisque bentlatlölele por intlajtlacul de yejua mismo, hua sötiepa por intlajtlacul de inu puieblo. Pero Jesús oquechijque sa sajpa, cuöc onebentlatlöiluc sie yejuatzi mismo. ²⁸ Pues inu ley de Moisés quentlölea tlöca tli amo intiero cualteque para yesque tlajtojcöteopexcötzetzi. Pero Deus oquejurörojque sente tlajtule ye meyac xebetl sötiepa de cuöc onhuöla inu ley. Hua inu tlajtule tietlölea para iloas tlajtojcöteopexque yejuatzi tieConietzi, öque iloac intiero cuale para nochepa.

8

Jesús iloac teopexque tli tiechbiquelitze sente acuerdo yancuec tli cache cuale

¹ Bieno pues, lo que tli cache importönte ica de noche lo que tli tequejtojtecate yaja ini nönca: Tetiepea nönca tlajtojcöteopexque, öque netlöiluc ompa elfecac ca tiemöyecmö de tietrono de Deus öque lalebes bieye hua checöhuac iloac. ² Hua yejuatzi tequetihua de teopexque ipa inu nieca teopantle, quejtusneque de inu nieca melöhuac teocale tli Tlöcatzintle oquetlölejqe, hua amo tlöcatl. ³ Noche tlajtojcöteopexque ica para tlabentlölis hua tiecuetlabiltis. Hua ejqueu conbenierebe que totlajtojcöteopexque nuyejque ma quepeacö tli tiecuetlabiltis. ⁴ Hua tlö iloasquiöya necö ipan tlöltecpactle, abele iloasquea teopexque, pues oncate ocseque teopexcötzetzi para quetiecuetlabiltisque inu bentle san quiene ca quejtoa inu ley de Moisés. ⁵ Pero niecate teopexcötzetzi tequete ipa sente teocale tli ica quiename ixniehualo noso itunalsiejyo de inu melöhuac söstantle tli onca elfecac. Nenquelnömequesque que cuöc Moisés ye quepiehualtejtaya inu teocale, Deus quenahuatejqe hua oquelfejque: “Xecpea cueröro para tecchihuas noche söstantle san quiene ca otemetzejtete necö pa munte”. ⁶ Pero totlajtojcöteopexque tequetihua ipa sente teocale cache lalebes cuale. Hua ejqueu nuyejque iloac representönte tli tiechbiquelitze sente acuerdo tli cache cuale, tli yebitz itech promesas tli cache cuajcuale cate. ⁷ Pues tlö inu acuerdo tli oyeya cachtö uyesquiöya intiero cuale, amo uyesquea nesesidad para ma huöla ocsente. ⁸ Pues cuöc Deus oquemajajuaque giente oquemelfejque ejqueyi: Xequetacö, que bitze tunalte, quejtulo Tlöcatzintle, que necchihuas sente acuerdo yancuec para ca giente de Israel hua Judá.

⁹ Amo iyec quieme inu ocsente acuerdo tli onecchi inca intötajua, ipa inu tunale cuöc nequemasec de inmö para nequenquexte de ipan tlöle de Egipto. Pos yejua amo quesequirojqe hua amo quecumplirojqe inu acuerdo tli quepeaya ca naja,

hua naja onequentlabielcö, quejtulo Tlöcatzintle.

¹⁰ Öxö, yaja ini nönca acuerdo tli necchihuas ca inu giente de Israel sötiepa de inun tunalte, quejtulo Tlöcatzintle.

Nectlölis nomandamientos ipa inpensamiento de yejua, hua ipa inyulo nequejcuelus.

Hua neyes neinDeus de yejua,

hua yejua yesque nopuieblo de naja.

¹¹ Hua amo öque quemachtis itlöcaicni, nimpör amo quelfis icni: “Xetieixomate Tlöcatzintle”.

Ipampa innoctie niechixomatesque,

desde tli cache tzitzequetzi hasta tli cachtojybe.

¹² Hua nequenperdonörus de lo que tli amo cuale oquechijque, hua de intlajtlacul ayecmo quiema nequelnömeques.

¹³ Cuöc quejtoa “yancuec acuierto”, quejtusneque que ye soltec hua ayecmo serbirebe inu tli oyeya ca cachto. Hua lo que tli ye mochijteca soltec, ye miero pojpolebes.

9

Teopantle de necö tlöltecpectle hua teopantle de elfecac

¹ Bieno pues, inu cachto acuierto nuyejque quepeaya ireglamento de quiene öque tieteochihuas Deus. Hua quepeaya iteupa necö ipan tlöltecpectle. ² Ijtec inu teocale oyeya primero sente cuörto cöne oyeya inu canteliario, hua inu miesa, hua inu pöntzi de tlatlölelestle. Hua inu cuörto itucö “Yectec Locör”. ³ Ca icuetlapa de inu ca ujpa cortina de tzotzomajtle oyeya inu ocsente cuörto, que itucö “Tli Cache Yectec Locör”. ⁴ Ompa oyeya sente ajtöl para popuchtle tli omochejchi de nochaja oro noso tomi costec. Nuyejque ompa oyeya inu caxu itucö örca, tli querepresentöroöya inu tli cachto acuierto. Hua inu örca motlaquentejtaya de oro. Ijtec inu örca oyeya sente xoctle de oro tli quepeaya inu pöntzi tli Deus oquenmacaque israelitas, que itucö maná. Hua nuyejque ijtec örca oyeya itlacu de Aarón tli itzmoli, hua nuyejque inu bepalte de teme cöne tlajcuelulpa oyeya de inu primero acuierto. ⁵ Hua ipa inu örca oyejyeya inu querubines, noso öngeles de teotlaniextelestle, que quetlapachoöya inu tapadiera de inu örca. Ipa inu tapadiera omochihuaya tiecuetlabilestle para que Deus quenperdonörfisque intlajtlacul giente. Pero öxö amo tecpea locör para cache tetlajtlajtusque de nöncate söstantle.

⁶ Bieno pues, cuöc ini nöncate söstantle ye cate preparödos, inu teopexcötzetzi seme yajyajteneme ipa inu primero cuörto para quechihuasque inteque. ⁷ Cache ipa inu ocsente cuörto, sa yaja miero tlajtojcöteopexque calaque sa sajpa por sie xejpa. Hua cuöc calaque quebica yestle de yulcöme, hua quetiecuetlabiltea por itlajtlacul yaja mismo, hua por intlapolulteles de puieblo. ⁸ Ica ini nöncia Espiritu Sönto tiechmachestilo que mientras inu nieca teocale oc turavea oyeya, cuöquenu ayemo oyeya manera quiene cuale tecalaquesquea ipa inu tli cache yectec locör. ⁹ Pues inu nieca teocale quiename icaca ixniehualo de inu cache cuale teocale, hua Deus oquemacaque inu primero teocale sa para giente de nieca tiempo. Pues ipa inu teocale motiecuetlabiltiöya bentlatlölelestle hua tiecuetlabilestle. Pero inu söstantle abele quenchibelea giente ma yecö intiero cualteque, porque seme momachelea ipa inyulo que tlajtlaculcate. ¹⁰ Pues noche inu söstantle de inu teocale icaca sa de tlacuale hua tlaile hua de tlapajpöquelesme. Pues noche inu söstantle sa tratörebe de quiene öque iyec yectec de lo que tli ca pane niese, hua amo ipa öque iyulo. Hua solamiento oyeya hasta cuöc Deus quepatlaque.

¹¹ Cache öxö ye oniexihuaco Cristo, öque iloac tlajtojcöteopexque de inu söstantle cuale tli ye onhuöla. Pues yejuatzi iloac tlajtojcöteopexque de inu teocale tli cache bieye ica hua cache cuale, tli amo oquechejchijque tlöca, quejtusneque, que amo ica de nöncia tlöltecpectle. ¹² Hua sajpa por nochepa yejuatzi ocalacoac ijtec inu locör yectec. Amo quetiecuetlabiltiuc inu yestle de chibojte nimpör de pesierojte, cache quetiecuetlabiltejque tieyesojtzi de yejuatzi mismo, hua ejqueu oquepealuco nochepa tlamöquextelestle para tejua. ¹³ Pues inu yestle de chibojte hua de turojte hua inu tlaconextle de sohuapesiero tli quesemanque impa giente tli moyulpetzoneloyque, inu söstantle cuale quenyejyectelea para ma mochepöhuacö de innacayo. ¹⁴ Cache Cristo sie yejuatzi netiecuetlabiltiuc por medio de inu Espiritu öque iloac nochepa. Hua ejqueu iloac sente cuetlabilestle intiero chepöhuac para ca Deus. Hua tlö inu yestle de yulcöme cuale quechepöhuaya innacayo giente, cache ca meyac arrasu tieyesojtzi Cristo cuale quechepöhuas toyulo. Ejqueu ayecmo tiechpinöjtejtas toyulo de lo que tli amo cuale

otecchijque de inu sösantle tli quebicz mequelestle. Pues ye tecmachelea pa toyulo que ye tiechperdonörojque. Ejqueu cuale tetietequedanisque Deus öque nemoa.

¹⁵ Ejqueu noso Cristo iloac quiename representönte tli tiechbiquelitze inu yancuec acuerdo noso testamento. Pues yejuatzi omecoaco para ma tiechperdonörucö de noche totlajtlacul tli otecchijque cuöc teyejyeya ipa inu primero acuerdo. Nuyejque omecoaco para que ejqueu tejua tli Deus otiechnutzque cuale tohuöxcatisque de inu sösantle tli nochepa mocöhuas, tli Deus queprometierojque. ¹⁶ Pues para ma balierebe sente testamento quepea que meques öquenu oquechejchi. ¹⁷ Pos sente testamento balierebe solamente cuöc ye omec öquenu oquechejchi; abele balierebes cuöc oc neme. ¹⁸ Por inu nuyejque inu primero testamento noso primero acuerdo amo omochi sin yestle. ¹⁹ Pues cuöc ye oquetlajtulte Moisés noche mandamientos tli quejtoa inu ley, hua ye oquecajque giente, entunses ucö yestle de inu pesierojte hua chibojte. Oquenelulte ca ötzintle. Entunses ucö sente röma de hisopo tli quemelejtaya ca ichcatl chichiltec. Quetzetzelö hua ocajfeche inu libro hua nuyejque inu giente. ²⁰ Hua oquejto: “Yaja ini nönca yestle de inu acuerdo tli Deus quemandörojque ma tecpeacö”. ²¹ Hua ejqueu nuyejque ocajfeche inu teocale ica yestle, ca tiehua noche sösantle tli mousöroöya ipan teocale. ²² Hua inu ley quenequeya que cöso innochtie sösantle ma mochepöhuacö ca yestle. Hasta beles cuale tequejtusque que amo onca tietlapojpolfestle de tlajtlacule sin que amo mosemanas yestle.

Inu cuetlabiltelestle de Cristo cuale quequextea totlajtlacul

²³ Bieno pues, inu sösantle cate quiename ixniehualo de inu sösantle de elfecac, hua conbenierebeya ma mochepöhuacö ejqueu ca yestle de yulcöme hua ca ötzintle. Pero inu belejua sösantle de elfecac conbenierebe ma mochepöhuacö ca sente cuetlabiltelestle tli cache cuale. ²⁴ Pos Cristo amo ocalacoac ipa inu locör yectec tli tlöca quechejchijque, tli sa ica ixniehualo de inu tlin melöhuac. Cache yejuatzi ocalacoac bel miero ompa elfecac para que öxö nepresentöruro por tejua tieixpantzinco Deus. ²⁵ Inu tlajtojcöteopexque de israelitas calaque por meyac xebetl ijtec inu locör yectec sajpa por xebetl para tiecuetlabiltis yestle que amo iyeso de yaja. Pero Cristo amo netiecuetlabilito meyacpa. ²⁶ Pues tlö ejqueu oyene ye lalebes meyac veces netiecuetlabilitusquiöne desde ca opie tlöltecpactle. Cache öxö sa sajpa ipa itlamejyo xejme, ohualiloac para necuetlabilitiluc yejuatzi mismo. Hua ejqueu oquejcuenejque totlajtlacul. ²⁷ Hua san quiene ca ijteca para tlöca ma mejmequecö sajpa, hua sötiepa Deus quenjuscörusque, ²⁸ ejqueu nuyejque Cristo onecuetlabilitiluc sajpa para quequextejque totlajtlacul de tonochtie. Hua ca ujpa niexihuas, ayecmo para quequextisque tlajtlacule tlöcamo para tiechmöquextisque tonochtie tli tietiechixtecate.

10

¹ Pues inu ley de Moisés sa quepea quiename itunalsiejyo noso ixniehualo de inu sösantle de elfecac, pero amo quepea belejua sösantle. Hua meyac giente queneque mopachusque tieca Deus por medio de inu cuetlabiltelesme tli seme quecuetlabiltejtecate cara xebetl. Pero inu cuetlabiltelesme amo cate tli belaja de elfecac. Por inu, inu ley ayec cuale quenchebelea inu giente ma yecö intiero cualteque. ² Pues tlö canaj cuale quechihuasquea, ¿tli para öque quesequirojtas quecuetlabiltejtas? Pues inu giente tli tietieochihua Deus, cuöc ye sajpa omochepöjque, inyulo ayecmo quentieyelfejtas de que cate tlajtlaculteque. Pero amo ejqueu icaca, tlöcamo ³ cache yejua quesequiroa quecuetlabiltea cöra xebetl ipampa quejelnömetecate de intlajtlacul. ⁴ Pues inu inyeso de inu turojte hua chibojte abele tiechquextelea tlajtlacule.

⁵ Por inu, cuöc ye calacoasquea Cristo necö ipan tlöltecpactle, yejuatzi tieyelfiluc Deus: Cuetlabiltelestle hua bentle amo tomonequite; cache teniechmomaquele nocuierpo para ma nenemequi necö.

⁶ Pues amo tomocualejtele inu cuetlabiltelestle tli xutla, nimpör tli mocuetlabiltea por tlajtlacule.

⁷ Yecuöquenu onequejto:

“Necö nebitz para necchihuas motlanequelestzi, noDeus, ejqueu quiename tlajcuelulpanca de naja ipa inu ömatl”.

⁸ Ca ipiejyo quejtulo: “Cuetlabiltelestle hua bentle, hua cuetlabiltelestle tli xutla, hua tli mocuetlabiltea por tlajtlacule, amo tomonequite, nimpör amo tomocualejtele”. Pues yaja ini nöncate cuetlabiltelesme quejtoa inu ley ma öque quechihua. ⁹ Sötiepa quejtulo: “Necö nebitz para necchihuas motlanequelestzi”. Primero quejtulo que ayecmo balierebe inu cuetlabiltelesme. Hua sötiepa quejtulo que lo que tli balierebe yaja ini nönca: que ma quechihuacö tietlanequeles Deus. ¹⁰ Pues tietlanequeles Deus oyeya que ma quecuetlabilticö tiecuiervo Jesucristo. Hua ejqueu oquechijque sajpa por nochepa. Hua de inu manera tiechchibelejque ma teyecö teyeteque.

¹¹ Hua melöhuac inu ocseque teopexcötzetzi ijijcateneme mumustla mientras quechihua inteque. Hua meyacpa quecuetlabiltea mismo söstantle de cuetlabiltelesme, tli ayec quequextea tlajtlacule. ¹² Cache ini nöiloac, sa sajpa por nochepa netiecuetlabiltuluc por tlajtlacule, hua entunses onetlöleluc ca tiemöyecmö Deus. ¹³ Öxö quechealuteca hasta senamo Deus quentlölelisque tieenemigos itzintla tiecxehua. ¹⁴ Pos sa ca sie cuetlabiltelestle otiechchijque intiero tecualteque por nochepa, tejua tli teyeteque. ¹⁵ Hua nuyejque tiechafirmörfilo yejuatzi Espíritu Sönto. Pues primero quejtulo:

¹⁶ Yaja ini nönca acuerdo tli necchihuas ca yejua sötiepa de inun tunalte, quejtulo Tlöcatzintle:
Nectlölis nomandamientos ipa inyulo,
hua nuyejque ipa inpensamientos nequejcuelus.

¹⁷ Hua quesequiruro quejtulo:

Hua de intlajtlacul hua de lo que tli amo cuale oquechijque ayecmo quiema nequelnömeques.

¹⁸ Pos tlö Deus ye oqueperdonörojque totlajtlacul hua lo que tli amo cuale otecchijque, ayecmo onca tli ipampa öque tlacuetlabiltis.

Ma topachucö tieca Deus

¹⁹ Bieno pues, nocnihua, ye cuale tecalaquesque ca meyac confiönsa pa inu locör yectec por medio de tieyesojtzi de Jesús. ²⁰ Cuale tecalaquesque ca ipa inu ojtle yancuec de nemelestle tli yejuatzi oquetlapojque, cuöc quetzomunejque inu cortina de teopan-tle, que quejtusneque que quetzomunejque tiecuiervo. ²¹ Bieno pues, ejqueu cuale tecalaque tietlac Deus, hua tetiepea sente bieyetzintle teopexque öque tlamandöruro ipa tiechöntzi Deus. ²² Por inu, ma tasete ca noche sentetl toyulo, hua ca toneltoqueles tli amo moyulcuiecuepa, hua ca toyulo tli ye omochepö para que ayecmo tiechtiyelfea, hua ca tocuiervo tli omopajpöc ca ötzintle chepöhuac. ²³ Hua ma tecsequirucö ma tecchixtacö inu söstantle que ye tequejtojque que toneltoca. Hua majcamo toxelucö. Pues yejuatzi öque queprometierojque iloac de confiönsa. ²⁴ Ma tectiemucö maniera noso quiene topiepiehualtisque para ma tecpeacö tlasojtelestle hua ma tecchihuacö tlin cuale. ²⁵ Majcamo tejcöhuacö de que tosentlölisque, quieme seque ye quepea por costumbre que ayecmo mosentlölea. Cache cuale ma tanimörucö entre tejua. Hua cache xemanimörucö porque nenquetztecate que inu nieca tunale ye aseteca.

²⁶ Porque tlö tetlajtlacojtasque sampör tecnequesque, mös ye tecmajmate lo que tli melöhuac, entunses ayecmo onca cuetlabiltelestle para totlajtlacul. ²⁷ Para giente tli quechihua ejqueu sa mocöhua majtelestle de que Deus quenjuscörusque, hua impa huölös tletzintle tli xutlateca checöhuac hua quempojpolus tli tlajtlacuajnömejque. ²⁸ Öque amo ipa quejta inu ley de Moisés, hua onca unte noso yete testigos tli

tlatestificöroa de lo que tli oquechi, pos yaja meques sin que abele moperdonörus. ²⁹ Xecpensörucö, pues, quiene cache lalebes petzotec icastigo quemeresieroa öquenu tiepa moquetza tieConietzi Deus, hua quepea por petzoyutl inu yestle tli queyectele hua tli cafirmöroa inu acuerdo. Cuöc quechihua inu, nuyejque tiepöpöca inu Espiritu öque quemacalo tiefavur. ³⁰ Xequelnömequecö öquenu oquejtojque:

Naja niechtocöroa netlabengörus,
naja nequencuepelis lo que tli quemeresieroa por intlajtlacul.
Hua ipa ocsie locör quejtoa:

Tlöcatzintle quejuscörusque tiepuieblo.

³¹ San petzotec hua tiemajte ica öque betzes tiemöc Deus öque nemoa.

³² Pero xequelnömequecö de inun tunalte tli ye opanuque, cuöc primero nenquetze-cojque de lo que tli melöhuac, hua nenquexicojque meyac sufrimientos. ³³ Seque de nemejua giente nemiechpöpöcaque hua nemiechmaltratörojque inmixtla giente. Hua inu ocseque de nemejua nenquepexque pörte ca niecate tli ejqueu oquesufrirojque.

³⁴ Pos nemiechtlöocoltejque nemocnihua que oyejyeya ipan cörsel. Hua nenquexicojque ca pöquelestle cuöc giente nemiechcuejcuelejque meyac söstantle tli nemohuöxca. Pues nemomacaya cuienta que nenquepea ocseque söstantle cache cuale tli nemohuöxca, que ayec tlamas. ³⁵ Amo xecpolucö noso inu balur, pues nemiechbiquelitz sente bieye hua cuale tlaxtlöbile. ³⁶ Pues oc nemiechpoloa nenquexicusque ca paciencia, para que cuöc ye onenquechijque tietlanequeles Deus, cuale nenqueselisque lo que tli Deus queprometierojque.

³⁷ Pos sa oc tepetzi, hua yejuatzi hualiloas, hua amo bejcöbihuas.

³⁸ Por inu, inu tlöcatl öque ica yectec para ca naja, por ineltoqueles nemes.

Cache tlö mojcuenis, noyulo amo quecualejtas.

³⁹ Pero tejua amo ejqueu tecate quiename niecate tli mojcuenia hua sötiepa ixniempolebe, tlöcamo cache toneltoca para que sötiepa momöquextis toölma.

11

Neltoquelestle

¹ Öxö, neltoquelestle quejtusneque confiönsa de lo que tli abele öque quejta. Tlö tecpea neltoquelestle tecate seguros de que onca inu söstantle de lo que tli tecchea, hua de lo que tli abele tequejta. ² Deus otlajtlajtuluc cuale de tobiebetcöhua, porque quepejpeaya neltoquelestle. ³ Por medio de neltoquelestle tecasojcömate que Deus quechejchijque cuale noche tlöltecpactle hua noche tli onca por medio de tietlajtultzi. Ejqueu ocönque de lo que tli amo nieseja para oquechejchijque lo que tli öxö niesteca.

⁴ Abel omoneltocac, hua ejqueu otiecuetlabilte Deus cache cuale tiecuetlabiltelestle que Caín. Hua por inu Deus oqueselejque inu bentle, hua ejqueu tlatestificörojque de que Abel oyeya yectec. Hua por inu, mösque ye omec, icaca quiename tlö oc turavea tiechnunutzta Abel por ineltoqueles.

⁵ Enoc omoneltocac, hua Deus quebicaque sin que amo omec. Pos sa opolejtequis, porque Deus oquebicaque. Hua antes quebicasque, Deus oquejtojque que oquecualejtaque. ⁶ Pero tlö amo tecpejpea neltoquelestle abele tiechcualejtasque Deus. Pos conbenierebe para öque mopachus tieca yejuatzi ma moneltoca que yejuatzi iloac, hua que quentlaxtlöbilo innochtie quiejquech tietiemoa.

⁷ Noé omoneltocac, hua cuöc Deus cantesipörfejque de söstantle tli ayemo nieseja, ca mabelestle oquechejchi inu börcobiebe itucö örca para ma momöquexticö yaja hua ifamilia. Ejqueu por ineltoqueles oquedemoströro que noche tlöltecpactlöca amo cuale oyejyeya, hua oquesele inu yectelestle tli yebitz por neltoquelestle.

⁸ Abraham omoneltocac, hua cuöc Deus oquenuzque, tlaneltocac hua oquis para que unya ipa inu nieca locör tli sötiepa mohuöxcatisquea. Hua oquis sin quemates cöne

oyöya. ⁹ Por ineltoqueles onemeto ipa inu tlöle quiename tlö oyene sente extranjero hua quiename tlö amo oyene ihuöxca tlöle. Mochöntito ijtec möntajcale, hua ejqueu nuyejque oquechijque Isaac hua Jacob, öque nuyejque sötiepa mohuöxcatisquea de lo que tli Deus queprometierojque. ¹⁰ Pues yaja Abraham quechixtaya inu ciudad tli quepea cimienta checactec para ayec betzes, que bel yejuatzi Deus oqueplaneörojque hua oquechejchijque. ¹¹ *Hua, mösque Sara oyeya machura hua ye lamatzi, pero Abraham omoneltocac hua ejqueu oquesele checöhuallestle para queutzis Sara. Pues oquepensöro que iloac de confiönsa Deus, öque queprometierojque que quepeas iconie. ¹² Hua por inu, de inu tlöcatl, mösque ye oyeya para meques, omoxenöchojque meyactie hua meyactie ixenöchpelhua, quiename cate sitlalte de elfecac, hua quiename xöle tli icaca itienco lamör, que abele öque quepoa.

¹³ Noche ini nöncate omejmejque ipa neltoquelestle. Pues ayemo oqueseliöya lo que tli Deus queprometierojque. Pero por inneltoqueles oquetztaque inu söstantle, quiename cuöc öque quetzteca lo que tli bejcateca. Hua opajpöjque por oquejtaque inu söstantle. Hua oquejtojque que melöhuac oyejyeya sa extranjeros que sa panutecate ipa ini nöncia tlöltecpactle. ¹⁴ Pos cuöc quejtoa inu, quejejtusneque que quietimójtecate ocsente tlöle que amo yaja nöncia tlöltecpactle. ¹⁵ Tlö cana quepensörojane de inu nieca tlöle de cöne oquisque, cuale mocuepasquea. ¹⁶ Cache yejua quenejnequeya sente tlöle tli cache cuale, quejtusneque yaja inu elfecac. Hua por inu Deus amo pinöhualo necutilus Deus de yejua. Pues oquenpreparörfejque sente ciudad.

¹⁷ Por ineltoqueles Abraham otiecuetlabilte inu Isaac cuöc Deus oqueprobörojque. Pues yaja Abraham, öque oquesele inu promesas, ye tiecuetlabiltisquea isenteconie. ¹⁸ Pues Deus oquelfejque: “Itech Isaac tecpeas moxenöchpelhua”. ¹⁹ Hua Abraham quepensöroöya que Deus cuale quenyulebitisque giente tli ye omejmejque. Hua cuale tequejtusque que ocsajpa oquesele iconie de ipa mequelestle.

²⁰ Isaac omoneltocac, hua ejqueu por neltoquelestle oquenbendeseyumacac inu Jacob hua Esaú de lo que tli sötiepa mochihuasquea. ²¹ Jacob omoneltocac, hua cuöc ye mequesquea, quenbendeseyumacac ipelhua Josie, hua omopiecho ipa icuajfortu hua tietechijque Deus. ²² Josie omoneltocac, hua ejqueu cuöc ye miero mequesquea, otlajtlajto de quiene quejquisasquea ipelhua Israel desde ompa Egipto, hua oquennahuate que cuöc quisasque ma quebicacö imemetehua.

²³ Itötajua Moisés omoneltocaque, hua ejqueu oquijyönque por yeye mietztle sötiepa de cuöc otlöcat. Pues quejtaque lalebes cuöcualtzi peltzintle, hua amo momajtejque de que inu rey otlamandöro ma quenmejmecticö noche pelantzetzti oquechte de inu israelitas. ²⁴ Moisés omoneltocac, hua ejqueu cuöc ye omobepö, ayecmo oquenec mocuitis iconie de ichpuch de Faraón, rey de Egipto. ²⁵ Cache oquenec para ma quesufriro ica inu puieblo de Deus, hua oquenec majcamo quepea inu pöquelestle de tlajtlacule, tli sa pano. ²⁶ Yaja amo oquenec quepeas inu ricojyutl de Egipto, pues oquepensöro que ica cache cuale ma quepöpöcacö giente, quiename tiepöpöcaque Cristo. Pues yaja quemateya que sötiepa quetlaxtlöbelilusquea Deus. ²⁷ Por que omoneltocac oquecö Egipto, hua amo oquemabele itlabielmequeles inu rey, cache oquesequiro moneltocataya. Pues por ineltoqueles quiename tlö otiejtane Deus, öque abele yeca tieyejtas.

²⁸ Por ineltoqueles otlanhuate ma quechihuacö inu pöscua hua ma tlaajfechicö ica yestle ipa pobieltajte. Ejqueu oquechijque para que inu öngel tli huölösquea para quenmejmecticis noche pelantzetzti tli cachtö yejyebe, abele quenmejmecticisquea pelantzetzti de inu chönme tli quepeaya yestle ipa pobieltajte.

* **11:11** Seque manuscritos de tli cache biebertetzti quejejtoa: “Sara, mösque oyeya ye lamatzi hua machura, pero nuyejque omoneltocac hua ejqueu oquesele checöhuallestle para moutztlölis”.

²⁹ Por neltoquelestle inu israelitas opanuque inu ötiescatl itucö Lamör Chichiltec, hua onejnenque ipa tlöluhujque ijtec lamör. Cache cuöc oquenejque quechihuasque nuyejque inu Egipcios, omoötlapachojque hua omejmejque. ³⁰ Por neltoquelestle obetzque inu tepönme bejbeye de Jericó, sötiepa de que por checume tunale queyehualoöya inu israelitas. ³¹ Por ineltoqueles inu cacherila itucö Rahab amo omec inca inu giente tli amo moneltocaya, pues inu espías de tiegiente Deus tli najnöhuatlacheato yaja oquensele pa ichö quiename iamigos.

³² Hua ¿tli cache nequejtus? Pues niechpolus tiempo para necpoas de Gedeón, de Barac, de Sansón, de Jefté, de David, de Samuel, hua de inu ocseque tlayulepantejque. ³³ Por medio de inneltoqueles yejua oquetlönque reinos, oquechijque lo que tlin melactec, oqueselejque tiepromiesas de Deus, oquentzacuelejque incamac leunte, ³⁴ oquesiebejque checöhuac tletzintle, omöquisque de inespödas de incuntrörrios. Cuöc amo chejchecacteque oyejyeya mochecöjque lalebes. Oqueselejque beletelestle para momagasque cuale ipan guerra, hua quencholultejque inu soltörojte estranjeros. ³⁵ Seque sohuame inmimejcöhua oyulejque hua quenselejque ye oyulejque. Ocseque oquentetitzque para quenmejmectisque, hua yejua cuale momöquextisquea por tienegörusque Deus, pero amo oquenejque. Pos cache oquenejque quepeasque sente nemelestle tli cache cuale, cuöc Deus quenyulebitisque. ³⁶ Ocseque giente quenpöpöcaya hua quenbejbitejque hua hasta quentzajtzejque hua quemejilpejque ijtec cörsel. ³⁷ Oquentecaltejque, oquentietejque ca sierra, * oquenmejmectejque ica espöda. Motlajtlaquentejtenemeya ica incuetlaxyo de calnielojte hua de chibojte. Oyejyeya porubejte, hua oquesufriroöya meyac sösantle, hua giente quentratöroöya amo cuale, ³⁸ hua yajyajtenemeya ipa muntas hua tepieme hua ustume cöne nionöque chönte. Pues tlöltecpactlöca amo quemeresieroa ma uye giente intzölö ejqueu lalebes cualteque.

³⁹ Hua innoctie ini nöncate Deus quejtulo que quencualejtaque porque yejua omoneltocaque. Pero ayemo queselea inu sösantle tli Deus queprometierojque. ⁴⁰ Pos Deus oquepreparörojque sente sösantle cache cuale. Pues tiechtomörojque en cuenta tejua, para que ejqueu yejua cuale queselisque lo que tli quenpoloa solamente sa secne ca tejua.

12

Ma tetieyetzacö Cristo

¹ Bieno pues, quiename tiechyehualojtecate noche inu giente *tli quedemoströrojque ca inneltoqueles que melöhuac onca inu sösantle tli abele tequejta. Por inu noso, ma tejcöhuacö sie löro noche tli tiechestorböroa, hua cache ca meyac arrasu ma tejcöhuacö inu tlajtlacule tli nima tiechmanejtea. Ejqueu ma tetzecuintöcö ca paciencia inu carrera de tonemeles tli tecpea por delönte. ² Hua ma tetieyetzacö Jesús, öque *yejuatzi primero oneneltocuc intiero cuale. Pues yejuatzi quetzalutaya inu pöquelestle tli sötiepa quepealusquea, hua ejqueu oquexicojque inu mequelestle de coruscua betl, hua amo oquechibelejque cöso de inu pinöhuallestle. Hua öxö yehualuteca ca tiemöyecmö de inu trono de Deus.

³ Xecpensörucö cuale de quiene yejuatzi oquexicojque noche lo que tli giente oquejtojque encuentra de yejuatzi. Ejqueu amo xeseyabecö nimpör amo xecuejcuatlaxebecö ipa nemoyulo. ⁴ Pues nemejua ayemo nenquesufriroa hasta para xeyesquisacö ipa inu lucha tli nenquechijtecate encuentra de tlajtlacule. ⁵ Hua ye onenquelcöjque inu tlajtule cöne Deus nemiechtlajtulmacalo quiename nentiepelhua, hua quejtulo ejqueyi: Noconie, xetomöro en cuenta cuöc metzcastecöruro Tlöcatzintle para metzmachtisque,

* **11:37** Seque manuscritos quetlasolultea: “quenprobörojque”. * **12:1** Cuale nuyejque motradusirus: “tli tiechetztecate para avier lo que tli tecchihua”. * **12:2** Cuale nuyejque motradusirus: “tiechmacalo toneltoqueles hua quechihualo intiero cuale”.

hua amo xomodesanimöro por que metzajajualo.

⁶ Ipampa Tlöcatzintle öque quetlasojtlalo quecastecöruro para quemachtisque, hua quebitequihua öque queselilo para iyese tieconie.

⁷ Inu söstantle tli nenquexicojtecate ica quiename sente castigo tli Deus nemiechmacalo para nemomachtisque. Pues nemiechtratöruruteca quiename nentiepelhua. Pues amo onca öque ipelhua que intajtzi amo quencastecöroa. ⁸ Pues innochie tiepelhua de Deus quencastecöruro ejqueu. Pues tlö cana amo nemiechcastecörurusquiöne, quejtusnequesquea que amo nentiepelhua de melöhuac, tlöcamo que nencate quiename nenpejpentzetzi noso nenichtacajconieme. ⁹ Ca ocsie löro, otiechcastecörojque totötajua de tonacayo, hua tequenmabeliöya. Cache ca meyac arrasu, noso, ma tetieneltocacö öque iloac Tajtle de toyulo, para que ejqueu tecpeasque nemelestle. ¹⁰ Hua totötajua sa por quiesque xejme tiechcastecörojque, hua oquechijque san quiene ca yejua quenejnejque, cache Deus tiechcastecöruro para toproviecho, para ma teyecö teyecteque quiename yejuatzi iloac yectec. ¹¹ Melöhuac inu castigo niese que amo tiechbiquelitz pöquelestle, cache niese que tiechbiquelitz tequepachule hua yulcocalestle. Pero tlö tomachtisque por inu castigo, sötiepa tecpeasque yulsiebelestle hua yectelestle.

¹² Por inu xequencuajpetzucö hua xequenchecöhuacö nemomöhua hua nemotlancuötehua tli cuetlaxejtecate hua quenpoloa checöhualestle. ¹³ Xecsequirucö xenej-nentacö ipa inu cuale ojtle, para que niecate que abele nejneme cuale amo mocxecuejcuechaquisque, tlöcamo cache pajtesque.

Ma tecchiuacö cöso de lo que tli Deus tiechelfilo

¹⁴ Xectiemucö yecsiebelestle para ca noche giente, hua nuyejque xectiemucö yectelestle. Pues abele yeca tieyejtas Tlöcatzintle sin que iyese yectec. ¹⁵ Xomotlachilicö cuale majcamo öque moxelo de tiefavur Deus. Majcamo uye entre nemejua yeca tli ica quiename sente plönta chechec tli quenmöhua noche ocseque ca ivenieno. ¹⁶ Majcamo uye yeca tli mopöctea ca sohuame tli amo isohua, hua majcamo uye yeca que amo pa tlacheane. Pos ejqueu oyeya Esaú amo pa tlacheane, hua por sente tlacuale oquenamacac ideriecho tli quepeaya porque mayur oyeya. ¹⁷ Pues ye nenquemate que yaja sötiepa quenequeya queselis inu bendeseyu de itajtzi. Pero ayecmo oquenejque Deus, mösque yaja chucaya lalebes, hua quetiemoöya locör para *quepatlas de lo que tli oquechi, pero ayecmo oqueniexte.

¹⁸ Pues tejua otopachojque ca söstantle cache cuale que inu söstantle que oquejtaque inu israelitas. Yejua omopachojque ipa nieca tepietl tli cuale öque quemötocas, hua inu tepietl xutlaya ca tletzintle. Hua oquejtaque tlanextecume hua tlajtlayohuaquelestle, hua lalebes otlalpitz yejyecatl. ¹⁹ Hua oquecajque itlapitzal tlapitzale, hua sente tosquetl tli tlajtlajtoöya. Hua cuöc oquecajque inu tlajtule omotlötajtejque para ma ayecmo quennunutzta, ²⁰ pos abele quexicojque de lo que tli quennunutzaya. Pues oquejto tlö canajyeca mösque yulcötl quemötocas inu nieca tepietl ma quetecalticö. ²¹ Hua lalebes petzotec hua tiemajte oyeya inu söstantle tli mojtaya, hasta que belaja Moisés oquejto: “Lalebes nomajtea hua hasta nebebeyoca”. ²² Pero tejua amo topachojque itlac niecate söstantle, cache topachojque itlac inu tepietl de Siön, hua itlac inu ciudad de Deus öque nemoa, que yaja inu Jerusalén inu elfecayutl. Hua topachojque itlac meyactie miles de öngeles tli mosentlölejtecate para tietechihuasque Deus ca pöquelestle. ²³ Hua topachojque intlac noche tiepelhua de Deus, tli cate sasie puieblo, hua innumbres tlajcuelulpancate ompa elfecac. Nuyejque topachojque tietlac yejuatzi öque iloac juez hua Deus de noche giente, hua topachojque itlac inölmas de gientes melacteque tli öxö cate intiero cualteque. ²⁴ Hua topachojque tietlac Jesús, öque iloac representönte tli tiechbiquelitze inu yancuec acuerdo ca Deus, hua topachojque itlac tieyesejtzi tli

* **12:17** Cuale nuyejque motradusirus: “moyulcuepas”.

omajfeche para ma tiechchepöhua, hua tli tiechmachestea de sösantle tli ica cache cuale que lo que tli tiechejtetea iyeso de Abel.

²⁵ Por inu xecpeacö cueröro amo cana de repiente amo nentieneltocasque yejuatzi öque nemiechnunutzalo. Pues inu nieca giente abele omöquisque de incastigo cuöc amo quechibelejqque cöso Moisés öque quennahuatiöya necö ipan tlöltecpactle. Entunes cache ca meyac arrasu tecselisque tocastigo tlö tocuepasque hua amo tetiecaquesque yejuatzi öque tiechnunutzalo desde elfecac. ²⁶ Pa nieca tiempo tietosque ocuoline tlöltecpactle, cache öxö ye oqueprometierojque ejqueyi: “Oc turavea sajpa, hua nejcuolinaltis amo sa tlöltecpactle, tlöcamo hasta elfecac nuyejqque”. ²⁷ Hua cuöc quejtulo “Oc turavea sajpa”, quejtulusneque que entunes quejcuenisque noche sösantle tli moulinea, hua noche sösantle tli omochejchi, para que ejqueu mocöhuas inu sösantle tli ayec moulinea. ²⁸ Pero tejua tecselisque sente reino tli abele moulinis. Por inu ma tetietlasojcömatelicö Deus, hua ejqueu noso ma tetietequapanucö san quiene ca yejuatzi quecualejtalo, ica respieto hua majcömabelestle. ²⁹ Ipampa toDeus iloac quiename tletzintle que tlaxutlaltea hua quentlamea.

13

Quiene ma tecchihuacö para que Deus tiechcualejtasque

¹ Xecsequirucö xomotlajtlasojtlacö entre nemejua quiename nenicnijte. ² Seme xecnequecö xequencaluticö giente tli nemiechtlajpaloa. Pues seque tli quechihuaya ejqueu oquencalutejqque öngeles sin que amo momacaque cuienta.

³ Xequemelnömeqtacö de tlin tzactecate ipan cörsel, quieme tlö nentzactane nuyejqque nemejua inca yejua. Hua nuyejqque xequemelnömeqtacö niecate tli giente quenmaltratöroa, pues nemejua nuyejqque nenquepea nemocuierpo que nuyejqque cuale que-sufriroa.

⁴ Ica cuale hua yectec ma mosohuajte tlöcatl hua ma monömeqte sohuatl, hua yectec ica ma mopöcticö entre yejua. Pero niecate tlöca tli mopöctea ca isohua ocsente hua sohuame tli mopöctea ca inömec ocsente sohuatl, hua innoctie tli mopöctea ca canajyeca que amo yaja icompaniero, noche inu niecate Deus quenjuscörusque hua quencastecörusque.

⁵ Xenemecö cuale sin que amo xecnequecö lalebes tomi; cache cuale xomoconformörucö ca tli ye nenquepea. Pues yejuatzi oquejtojqque: “Ayec temetzcöhuas, cache seme temetzpaliebis”. ⁶ Por inu cuale tequejtusque ca confiönsa que:

Tlöcatzintle iloac öque niechpaliebilo;
amo nomajtis.

Abele tli niechchibelisque tlöca.

⁷ Xequemelnömequecö niecate tli nemiechyecönaya, hua onemiechnunutzque de ti-etlajtultzi Deus. Xecpensörucö cuale quiene omochi innemeles, hua xomoneltocacö quiename yejua nuyejqque omoneltocaque.

⁸ Jesucristo ayec nepatlalo; iyölhua, öxö, hua para nochepa iloas lo mismo. ⁹ Amo xomocöhuacö ma nemiechbicacö inu meyactie enseñönsas que amo machea de cöne bitze. Pues ica cache cuale ma moquitzque toyulo itech tiefavur de Deus para iyeshchecöhuac, hua majcamo moquitzque itech enseñönsas tli sa tratörebe de tlö cuale tejcuösqque bentle noso amo. Pues inu enseñönsas ayec oquenpaliebe inu giente tli queneltocaque.

¹⁰ Tejua tecpea sente cuetlabiltelestle, hua inu teopexcötzetzi de inu primero teocale abele quecuösqque de ini cuetlabiltelestle. ¹¹ Ica quiename inu cuetlabiltelestle cuöc inu tlajtojcöteopexque quebicaya yestle de yulcöme ipa inu locör yectec por intlajtlacul giente. Pues incuierpo de inu yulcöme quenxutlaltiöya ca queyöhuac de inu puieblo. ¹² Ejqueu nuyejqque Jesús oquesufrirojque ca queyöhuac de inu puieblo, para

que ejqueu tiechchihualtejqe para ma teyecö teyecteque por tieyesojtzi. ¹³ Por inu ma tequisacö ca queyöhuac para ayecmo teyesque ijtec inu puieblo hua religiön de joriojte. Ejqueu teyesque tieca yejuatzi. Hua ejqueu ma tecxicojtacö inu tiepöpöquelestle tli nuyejqe yejuatzi oquesufrirojque. ¹⁴ Porque amo tecpea ipan tlöltecpectle sente ciudad tli nochepa mocöhua, cache tectiemoa inu ciudad tli sötiepa huölös. ¹⁵ Ejqueu noso, por medio de yejuatzi, ma seme tetiecuetlabiltejtacö Deus inu bentlatlölele que yaja inu yectieniebelestle. Quejtusneque, que ma tetlajtlajtucö de yejuatzi hua ma tetieyectieniehuacö. ¹⁶ Hua amo xequelcöhuacö de nenquechihuasque tlin cuale hua de nenquetiemacasque de lo que tli nenquepejqe, pues yaja ini nönca nuyejqe icaca quiename sente bentle tli quecualajtalo Deus.

¹⁷ Xequenneltocacö niecate tli nemiechyecöna, hua xomosujetörucö inca yejua. Pos yejua tlachixtecate por nemoyulo, hua yejua quemate que quietiemacasque cuenta de nemejua tieca Deus. Xomosujetörucö, pues, para que ejqueu cuale quietiemacasque cuenta ca pöquelestle, hua amo ca yulcocalestle. Pues tlö ca yulcocalestle quietiemacasque cuenta de nemejua iyepetzotec para nemejua.

¹⁸ Xecsequirucö xomotlötlajtejtacö por tejua. Pues tejua tecmachelea ipa toyulo que cuale teyabe, hua tecnejneque seme tecchihuasque noche tlin cuale. ¹⁹ Hua cache ma xomotlatzajzelicö por naja, para que isejco nocuepas ca nemejua.

Bendeseyu hua tlajpalulestle

²⁰ Hua Deus iloac öque quietiemacalo yulsiebelestle, hua öque tiequextejque toTlöcatzintle Jesús de intzölö mimejqe. Jesús iloac bieyetzintle calnielojpexque de inu calnielojte que tejua tecate. Yejuatzi quecuetlabiltejqe tieyesojtzi tli cafirmöroa inu acuerdo tli iyepa nochepa. ²¹ Deus ma nemiechchihualticö nenyisque intiero nencualteque de noche sösanle tlin cuale, para que ejqueu nenquechihuasque lo que tli yejuatzi quenequihua. Ma quechihuacö yejuatzi ca tonochtie por medio de Jesucristo lo que tli yejuatzi quecualajtalo. Yejuatzi ma quepeacö yectieniebelestle nochepa semejqac. Amén. Ma ejqueu iye.

²² Nemiechtlötlajtea, nocnihua, xecselicö ca cuale ini nönca cörta tli nemiechejqe ca quiesquete tlajtulme para nemiechtlajtulmacas. ²³ Xecmatecö que tocní Timoteo ye oquis de ipan cörsel. Hua tlö cana hualase nima, nequelfis ma beya ca naja cuöc nemiechejtati.

²⁴ Xequentlajpalucö noche tlin nemiechyecöna, hua innochtie yecteque. Tocnihua de necö Italia nemiechtlajpaloa.

²⁵ Tiefavur Deus ma iye ca nemonochtie nemejua.

Sente cörta tli oquejcuelo Jacobo noso SANTIÖCO

¹ Naja necaca neJacobo, öque neca netieintlatequepano de Deus hua de Tlöcatzintle Jesucristo. Nemiechejcuelfea ini cörta hua nemiechtlajpaloa nemejua tli nencate de inu majtlactle huan ume grupos noso tribus de giente de Israel, que öxö nencuasemantecate ipa ocseque naciones.

Pruebas de toneltoqueles

² Nocnihua, xomocacacö cuenta que nemiechconbenieroa nenpajpöquesque lalebes cuöc nemopa yebitz meyac sösantle pruebas. ³ Pos nenquematesque que cuöc inu sösantle ejqueu nemiechproböroa abier tlö de melöhuac nemoneltoca, entunses nenquetzecoa quiene nenquexicojtasque. ⁴ Xexicojtacö, noso, hasta que ye intiero nenquetzecoque noche tli cuale nequetzecosque por nenquexicojtasque. Ejqueu nenyeseque intiero nencualteque hua nenquepeasque noche sösantle, hua amo tli nemiechpolus niontle.

Ma tetlajtlanecö machestelestle

⁵ Pero tlö canajyeca de nemejua quepoloa machestelestle, ma tietlajtlanele Deus. Pues Deus quetiemaalo ca meyac gönas ca innochie giente, hua ayec tiechajajualo por que seme tiechpolojteca. Entunses tlö canajyeca tietlajtlanelis, Deus quemacasque. ⁶ Pero ma quetlajtlane ca nochaja neltoquelestle, hua majcamo iye de ume iyulo. Pos öque moyulcuiecuecteneme noso ica de ume iyulo, yaja icaca quiename ötzintle de lamör que ayec moquetza, tlöcamo yejyecatl quebica hua quetlajcale cöne queneques. ⁷ Pos inu tlöcatl majcamo quepensöro que Tlöcatzintle quemacas canajyetla. ⁸ Pos yaja ica de ume pensamientos, hua amo ica de confiönsa ipa niontle de lo que tli quechihua.

Porubejte hua ricojte

⁹ Tocni tli porube noso amo importönte ma pajpöque de que de melöhuac icaca rico hua importönte. ¹⁰ Tocni tli rico ma pajpöque de que Deus quepichaquisque. Pos quiename sente xuchetl de xebetl de ca caltienco peline, ejqueu nuyejque sa panutequisas inemeles rico. ¹¹ Pos quisa tunale, hua yebitz yejyecatl totunque, hua inu xebetl peline, hua betze ixuche, hua ixniempolebe noche icualniexteles de quiene cuöcualtzi omochejchi. Ejqueu mismo sa panutequisas inemeles rico mientras quechijteca negocio.

Quiene icaca cuöc öque pano por pruebas

¹² Cuale icnupel de öque quexicoa pruebas, pues cuöc ye omoproböro hua ye oquis cuale, yaja queselis ipremio que yaja nemelestle nochepa. Pos yaja inu oquenprometierfejqe Tlöcatzintle ca innochie tli tietlasojtla. ¹³ Cuöc canajyeca pano por pruebas, noso ipa betze yulmajmötotoquelestle, majcamo quejto que queyulmajmötocaluteca Deus para queprobörusque. Pos abele öque tieyulmajmötocas Deus para ma quechihualo tli amo cuale, hua yejuatzi ayec queyulmajmötocalo nionöque tlöcatl. ¹⁴ Cache cuöc moyulmajmötoca canajyeca, pos itlaeliebeles de yaja mismo, yaja inu queyulmajmötoca, hua quixnutza para ma tlajtlaco. ¹⁵ Ejqueu cuöc inu tlaeliebelestle oquepex ireresultödo, mochihua tlajtlacule. Hua cuöc ye omobepö tlajtlacule, mochihua mequelestle.

¹⁶ Amo xomocajcayöhuacö, notlasojcöicnihua. ¹⁷ Noche tlin cuale tietlöcolestle hua tli intiero cualtec, yaja inu yebitz de tlapac. Cualtitlanihua toTajtzi öque oquechejchijque tunale hua mietztle hua noche tlöbilte. Hua yejuatzi ayec nepatlalo; ayec quepealo canajyetla quiename tunalsiejyo tlöcamo iloac nochaja tlöbile hua ayec necuepalo ocsie.

18 Sampor yejuatzi oquenejqe, otiechmacaluc yancuec nemelestle por inu tlajtule tlin melöhuac. Ejqueu tejua tecate quiename ipa primier locör de noche tli yejuatzi oquechejqijque.

Ma tejcaquecö tlajtule hua ma tecchihuacö tli tiechelfea

19 Ye nenquemate ini nönca, notlasojcöicnihua. Pero nemonochtie ma seme xeyecö xelistos para nentlacaquesque. Pero amo sa nima xetlajtlajucö, hua amo nima xecualönecö. 20 Pues incualöneles tlöca amo quebicatz inu yectelestle tli quecualajtalo Deus. 21 Por inu xejcöhuacö sie löro noche söstantle petzoyutl, hua noche inu meyac söstantle tli sie tiro amo cuale. Xomopichaquicö para ejqueu nenqueselisque cuale inu tlajtule tli motucateca ipa nemoyulo, pos yaja inu tlajtule cuale quemöquextis nemoölma.

22 Pero xecchihuacö tli nemiechelfea inu tlajtule; amo sa xejcaquecö. Pos tli sa quecaque mocajcayöjtecate sie yejua. 23 Pues tlö canajyeca sa quecaque tlajtule hua amo quechihua tli quelfea, icaca quiename sente tlöcatl tli quejta ixöyac ipa sente tiescatl. 24 Pues sa quetztebetze, hua iya, hua nima quelcöhua quiene nieseya. 25 Pero öque quetzteca ca cueröro inu ley tli intiero cuale, inu ley tli tiechmaca libertad, hua seme quesequiroa quetzteca, hua amo sa quecaque tlöcamo nuyejque quechihua tli quejtoa inu ley, yaja inu tlöcatl icnupel iyec cuale ipa noche tli quechihua.

26 Tlö canajyeca quepensöroa que ica religioso pero amo mocontrolöroa de tli quejtoa pues inu tlöcatl mocajcayöjteca ipa iyulo, hua sa nienca ireligión. 27 Lo que tli melöhuac cuale religión, tli amo tli quepea de amo cuale tieixtla toDeus öque iloac toTajtzi, yaja ini nönca: que sente tlöcatl ma quentlajpalo hua ma quenpaliebe icnutzetzti hua icnusohuame ipa noche tli yejua quesufriroa, hua ma momalfe para amo momöhuas ca lo que tli amo cuale de ini nönca tlöltecpectle.

2

Majcamo techecuaejtacö

1 Nocnihua, ye nemoneltoca tieca totieJesucristo, öque iloac Tlöcatzintle de tlanieختهlestle. Por inu, amo cache xectlöcaejtacö sente tlöcatl que ocsente. 2 Pues beles huölös ipa nemoteopancone sente tlöcatl ca sente bieye öniyo de oro, ca itzotzomajua ara cuajcuale. Hua beles nuyejque huölös sente tlöcatl porube, ca itzotzomajua petzonelteque. 3 Entunses beles cache nenquerespetörusque inu tlöcatl tli moquentea ca itzotzomajua cuajcuale, hua nenquelfisque: “Xomotlölejtzino ca necö ipan locör cuale”. Pero nenquelfisque porube: “Xomoquetza ca ompa”, noso: “Xomotlöle necö nocxetla”. 4 Pos tlö ejqueu nenquechihua, pos seguramente nenquechecuaetztecate. Ye nenquepensörojtecate amo cuale hua ejqueu ayecmo cuale nentlaestloca.

5 Xeniechcaquecö, notlasojcöicnihua. ¿Öquemeju quemixpejpenque Deus? ¿Amo noso yejua tli porubejte ipa ini nönca tlöltecpectle? Pos quiema, yejuanu quemixpejpenque para yesque ricojte de inneltoqueles, hua para mohuöxcatisque de inu reino tli yejuatzi quenprometierfejqe quiejquech tietlasojtla. 6 Pero nemejua nenquepinöjtejqe inu tlöcatl porube. ¿Amo yejua ricojte cate tli nemiechchihualtea ma xecsufrirucö? ¿Amo yejua cate tli nemiechbica ca fuierca inmixtla tlötlajtoönejqe para nemiechtiyelfisque? 7 ¿Amo yejua cate tli checuatlajtoa encuntra de inu tucöyutl yectec tli nenquebica?

8 Bieno pues, tlö de melöhuac nenquecumplirusque inu ley tli tiehcöbelejtiejque torey, cuale nenquechihuasque. Hua teotlajtule quejtoa que inu ley yaja ini nönca: “Tectlasojtlas motlöcaicni quiename tlö taja mismo teyene”. 9 Pero tlö cache nenquetlöcayejta sente tlöcatl que ocsente, nentlajtlacojtecate, hua inu ley nemiechcuntenöroa de que nencate nentlajtlaculteque. 10 Pos öque quechihua noche tli quejtoa inu ley, pero betze ipa tlajtlacule ipa sa sie pörte, yaja icaca tlajtlacultec de que amo queneltocac noche inu ley. 11 Pues öque oquejtojqe: “Amo xecalaque ca isohua ocsente”, nuyejque oquejtojqe:

“Amo xetlamecte”. Entunses mös taja amo tecalaque ca isohua ocsente, pero tlö tetlamectea, pos ye teca tetlajtlacultec de que amo tecneltoaca inu ley. ¹² Entunses cuöc nenquejtoa canajyetla noso nenquechihua canajyetla, xomomacacö cuenta de que Deus nemiechjuscöorusque por inu ley tli tiechmaca libertad. ¹³ Pues öque ocseque amo quetlöocoltejqe, yaja amo tietlöocoltis Deus cuöc yejuatzí quejuscöorusque. Pero tlö tetietlöocoltisque Deus, tequisasque cuale cuöc tiechjuscöorusque.

Toneltoqueles hua totlachihual

¹⁴ Nocnihua, ¿tli proviecho quepea sente tlöcatl tli quejtoa que moneltoca, pero amo quechihua tlin cuale? ¿Beles nenquejtusque que ineltoqueles cuale quemöquextis? Pos amo. ¹⁵ Tlö sente tocní noso tocnisohuatl quepoloa itzotzomajua hua itlacual de cara tunale, ¹⁶ ¿quie beles sente de nemejua quejtus: “Xeyöcö ca cuale, xomototunicö hua xetlacuöcö hasta cöne nenexbesque”? Pos tlö ejqueu nenquelfea pero amo nenquemaca lo que tli quenesesitöroa icuierpo, ¿de tli queserbiroa tli nenquelejque? ¹⁷ Ejqueu mismo, tlö toneltoqueles sa isiel mocöhua hua amo onca tlachihuale, pos inu neltoquelestle mejque icaca. ¹⁸ Pos cuale yeca quejtus: “Taja tequejtoa que taja tecpea neltoquelestle, hua naja necpea sa tlachihuale. Pos tlöjcu xeniechejtete que de melöhuac tomoneltoca sin que tecchihuas niontle. Pos abele. Pero naja temetzejtets por notlachihual que naja nuyejque necpea neltoquelestle. ¹⁹ Nele taja tomoneltoca sa sietzi Deus iloac. Pos cuale tecchihua. Nuyejque ejqueu monejneltoaca demunios, hua yejua bejbebeyoca ca majcömabelestle. ²⁰ Pero taja, tlöcatl tunto, xecmate que neltoquelestle sin tlachihuale amo tli proviecho quebicatz. ²¹ ¿Quiene omochi que Deus oquejtojque que oyeya yectec totöta Abraham? ¿Amo oyeya por itlachihual, por que oquecuetlabilte iconie Isaac ipa ajtöl? ²² Xequajta noso quiene ineltoqueles tequeteya por itlachihual, hua por itlachihual omocumpliro ineltoqueles hua omochi intiero cuale. ²³ Hua ejqueu omocumpliro inu tli quejtoa: Hua Abraham omoneltocac tieca Deus, hua Deus oquepubelejque ineltoqueles quiename yectelestle. Hua yaja omocuite tieamigo de Deus”. ²⁴ Ejqueu noso nenquejta que sente tlöcatl mochihua yectec por itlachihual, hua amo sa por ineltoqueles isiel. ²⁵ Hua sa ejqueu mismo inu cacherila itucö Rahab omochi yectec por itlachihual. Pos yaja oquenselec inu mensajeros, hua oquentitla ma yöcö ipa ocsie ojtle. ²⁶ Pos quiename sente cuierpo cuöc ayecmo quepea espíritu icaca mejque, ejqueu mismo neltoquelestle tli amo quepea niontle tlachihuale mejque icaca.

3

Tonenepil

¹ Nocnihua, amo nenmeyactie xeyecö nenmaestros. Pos cache tequeyo iyas para tejua tli temaestros cuöc Deus tiechjuscöorusque. ² Pues onca meyac söstantle cöne tonochtie tebetze ipa tlajtlacule. Tlö canajyecaca ayec betze ipa tlajtlacule ca lo que tli quejtoa, pos yaja icaca tlöcatl intiero cualtec, que cuale quecontrolörus noche icuierpo. ³ Pues tejua tectlölea inu frieno ijtec icamac caböyo, para ejqueu ma tiechneltoca. Hua ejqueu cuale tejcuepasque noche icuierpo ca cöne tejua tecnequesque. ⁴ Xequemejtacö börcos nuyejque, que mös ara bejbeye hua mös lalebes checöhuac yejyecatl quenbica, pero sa ca sente timón tli tzitzequetzi lalebes, ca inu mocuepa ca cöne queneques öque quemanejöroa börcö. ⁵ Ejqueu nuyejque tonenepil icaca sa tzitzequetzi ipa tocuiervo, pero mochamöhua de que cuale quechihuas bieye söstantle. Xequajtacö quiene sente tletzintle lalebes tzitzequetzi cuale quexutlaltis sente bieye munte. ⁶ Hua tonenepil icaca quiename inu tletzintle. Tonenepil quepea ipa tocuiervo noche tli amo cuale onca ipan tlöltecpectle. Quepetzoneloa noche tocuiervo ca lo que tli quejtoa. Quiename quexutlaltea noche tonemeles ca lo que tli amo cuale quejtoa, ca inu tletzintle de tlajtlacule tli yebitz de tlecale. ⁷ Pos innochie yulcöme, hua tutume, hua yulcöme

quiename cuhuöme hua cuiecuetzpalte, hua tli cate ijtec lamör, noche ini nöncate cuale mocontrolörusque, hua giente quenmöxoquextea. ⁸ Pero abele öque quecontrolörus tonenepil. Icacá sie tiro amo cuale hua ayec mosiebea de tlajtojtas. Tlaperjudicöroa quiename venieno tiemecte. ⁹ Ca tonenepil tetieyectieniehua Tlöcatzintle toTajtzi, hua ca sie yaja tonenepil tequentlabejbicaltea tlöca tli omochejchijque ipa tieixniehualo Deus. ¹⁰ De ijtec sa sente camactle quisa yecteniebelestle hua tlabejbicaltelestle. Nocnihua, amo conbenierebe ma ejqueu iye. ¹¹ ¿Quie beles quisa ötzintle tzopielec hua chehec ipa sa sente ömieyale? ¹² ¿Quie beles sente icoxcuabetl cuale quetiemas olivas? Noso sente uvastemecatl ¿cuale quetiemas icox? Amo, nocnihua. Nimpör abele quisas ötzintle tzopielec de tli poyec.

Machestelestle tli yebitz de tlacpac

¹³ ¿Öquenu entre nemejua momachelea tlajmatque hua quepensöroa que casojcömate? Ma niese ipa inemeles que noche söstantle quechihua ca inu pichaquelestle tli quepejpea giente tli de melöhuac tlajmatque cate. ¹⁴ Pero tlö nenquepea nexiculestle hua tlabielmequelestle ipa nemoyulo, amo xomochamöhuacö de que nencate nentlajmatque. Pues tlö ejqueu nenquejtoa que nencate nentlajmatque, nenistlacatlajtoa encuntra de lo que tlin melöhuac. ¹⁵ Pues inu nieca machestelestle amo icaca de tli yebitz de tlacpac, cache ica de tlöltecpactle, ica sa de tonemeles necö, hua yebitz de demunio. ¹⁶ Pues cöne giente moxicoa hua tlajtlabielmeque entre yejua, mochihua chöchalönelestle hua noche tlachihualestle petzotec. ¹⁷ Però inu machestelestle tli yebitz de tlacpac icaca ejqueyi: ipa primier locör ica intiero yectec, hua nuyejque tietlaseseltelea, hua amo quencocoa ocseque. Amo sa quencamatzacua ocseque, tlöcamo yejua quetlöocoltea. Seme quechijteca lo que tlin cuale. Amo mocuiecucteca, hua amo ica de ume ixöyac. ¹⁸ Hua niecate tli tietlaseseltelea hua quetiemoa siebelestle, de inu manera yejua quechejchihua yectelestle para yejua mismo.

4

Majcamo teyecö teamigos de ini nönca tlöltecpactle

¹ ¿De cöne bitze quierras? ¿De cöne bitze peleitos entre nemejua? Pos bitze por que nenqueliébea lo que tli nemiechpöctea, hua inu tlaeliebesme momagatecate ipa nemocuierpo. ² Nenqueliébea canajyetla hua abele nenquepea; hua por inu nenquenmectea ocseque giente. Nemoxicoa, pero abele nemomöc onase; hua por inu nemomaga hua nenquechihua guerra. Amo nenquepea söstantle ipampa amo nentietlajtlanelea Deus. ³ Noso beles nentietlajtlanelea, pero amo nemiechmacalo ipampa nentlajtlane quiene amo conbenierebe, pues sa nenqueneque para nemöpöctisque. ⁴ ¡Sie tiro amo nenqueneque nentietocasque Deus! ¿Quie beles amo nenquemate que öque iyes amigo de ini nönca tlöltecpactle iyes tienemigo de Deus? Entunses tlö nemochihua nenamigos de ini tlöltecpactle, nenyisque nenenemigos de Deus. ⁵ ¿Noso beles nenquepensöroa que sa nienca tlajtoa teotlajtule? Pos Deus nexiculo hua chöhuatihua por toyulo tli oquetlölejque tojtécopa. ⁶ Pero yejuatzi cache meyac tiefavur tiechmacalo. Por inu quejtoa teotlajtule ejqueyi:

Deus neoponieruro cuntra tli mochajchamöhuaneme,
pero tli mopejpichaquea quenmacalo tiefavur.

⁷ Por inu, xomosujetörucö tieca Deus. Pero xomoponierucö cuntra inu Diöblo hua yaja cholus. ⁸ Xomopachucö tieca Deus, hua yejuatzi nepachulus ca nemejua. Xomoxextelicö inu tlajtlacule tli nenquechijque ca nemomöhua, nemejua tli nentlajtlaculteque. Nemejua tli nencate de ume nemoyulo, sa xecnequecö lo que tli

yectec. ⁹ Xomotequepachucö, xomoyulcocucö, hua xechojchucacö. Nemobiebetzqueles ma mocuepa chuquelestle, hua nemopöqueles ma mocuepa tequepachule. ¹⁰ Xomopichaquicö tieixtla Tlöcatzintle, hua yejuatzi nemiechajcopatlölsique.

Majcamo tequemestlocucö tocnihua

¹¹ Nocnihua, amo xechecuatlajtucö sente ca ocsente. Öque checuatlajtoa cuntra sente icni, noso questlocoa icni, yaja checuatlajtojteca encuntra de inu ley, hua questlocojteca inu ley, quejtojteca que amo cuale ica. Pero tlö cana tequestlocojteca inu ley, quejtusneque que ayecmo tomotlölea para tecneltoacas, tlöcamo tomotlölea quiename tejuez para tequestlocus. ¹² Pero sa sietzi iloac öque quetiemaalo ley hua iloac juez para tlaestlocusque. Yejuatzi iloac öque cuale tlamöquextisque noso tlaixniempolusque. Pero taja ¿öquenu teca que tecpensöroa que cuale tequestlocus motlöcaicni?

Majcamo tochamöhuacö

¹³ Öxö ma netlajtlajto ca nemejua que nentlajtlajtoa ejqueyi: “Mustla bictla teyösque ipan ciudad. Ompa teyesque por sie xejpa; tejcoasque meyac sösantle para tecnamacasque, hua tetlatlönesque”. ¹⁴ Mös ejqueu nenquejtoa, pero amo nenquemate tli pasörebés mustla nimpör amo nencasojcömate quiene icaca nemonemeles. Pos nemejua sa nencate quiename sente öpuctle tli niestequisa hua nima polebe. ¹⁵ Cache cuale conbenierebe xequajtucö: “Tlö quenequihua Tlöcatzintle, entünses tenemesque, hua tecchihuasque ini nönca noso ocsente sösantle”. ¹⁶ Cache öxö nemejua nemochajchamöhua hua nemobejcapatlölea. Noche inu nechamöhuallestle amo cuale ica. ¹⁷ Ejqueu tlö canajyeca quemate quechihuas tlin cuale pero amo quechihua, yaja inu ica tlajtlacule para inu tlöcatl por que amo quechihua.

5

Amo cuale inmicnupel de inu ricojte tli oquechijque amo cuale

¹ Öxö ma netlajtlajto ca nemejua tli nenricojte. Xechucacö nemejua, hua xetzajtzecö por que nemopa huölös meyac tiecoco. ² Nemoricojyu ye opalö, hua nemotlaquie oquecuacua tlacuöne. ³ Nemooro hua nemoplöta ye otepostlölo. Hua inu tepostlöle nemiechelfis quiene amo cuale nencate, hua quecuacuas nemonacayo quiename tletzintle. Noche nemoricojyu nenquesentlölejque ipa sölúltimo tunalte. ⁴ Xequajtucö que tlajtoa encuntra de nemejua inu tlaxtlöbile tli nenquenbiquelea tequetque que otlatejque ipa nemosiembra. Pues nemejua sa nenquencajcayöjque hua amo nenquentlaxtlöbejque. Pero inyelsesebeles de inu tequetque ye oquecayque Tlöcatzintle *Sabaot. ⁵ Ye nemopöctejque necö ipan tlöltecpactle, ye onenquepexque noche sösantle tli nemiechpöquelesmacaya. Nencate quiename yulcöme tli ye tojtomöjque, hua ye oasec tunale para quenmejmectisque. ⁶ Ye nenquencuntenörojque tli yectequé, hua nenquenmectejque, mös yejua amo nemiechcuajnömequeya.

Ma tecxicojtaö hua ma tetlajtlötlajtejtacö

⁷ Ejqueu noso, nocnihua, xecxicojtaö ca paciencia hasta cuöc hualiloas Tlöcatzintle. Xequajtucö quiene tli tequete ca caltienco quechea ma mobepöhua inu tlatuctle hua ma tlamochihualte. Hua quexicojtecate ca paciencia hasta ma huöla inu queyabetl tli cachtö yebitz hua nuyejque tli sötiepa hualase. ⁸ Nemejua nuyejque xecxicojtaö ca paciencia, hua xomoyulcuajpetzucö. Pos ye miero aseteca tunale cuöc hualiloas Tlöcatzintle. ⁹ Nocnihua, amo xemixtlabielejtacö entre nemejua, majcamo iye que cana de repente Deus nemiechjuscörusque por inu. Pues xomomacacö cuenta que ye totlac

* 5:4 “Sabaot” ica sente tlajtule hebreo tli quejtusneque “ejércitos”. Nele tlajtlajtoa de tieöngeles de Deus. Xomojtelicö Ro. 9.29.

iloac öque tiechjuscöorusque. ¹⁰ Nocnihua, para nenquetzecosque quiene nenquexicojtasque hua nenquesufrirusque cuöc nemopa huölös tli amo cuale, xequelnömequecö de inejiemplo tli tiehcöjtiebelejque inu tlayulepantejque tli tlanunutzaya tietucöyupa Tlöcatzintle. ¹¹ Pos tequejtoa que cuale inimicnupel inu niecate tli oquexicojque tiecoco. Ye nenquemate de quiene oquexico inu Job, hua ye nenquejtaque lo que tli Tlöcatzintle quechibelejque sötiepa. Pos yejuatzi Tlöcatzintle tetietlöocoltea, hua tiechicnuejtalo lalebes.

¹² Pero ipa primier locör, nocnihua, amo xequejtucö “¡Cabelelepaltzinco!”, nimpör amo xetlajurörucö por elfecac, nimpör por tlöltecpactle, nimpör por canajyetla ocsente söstantle. Cache cuale cuöc nenquejtoa “Quiema” ma iye quiema, hua cuöc nenquejtoa “Amo” ma iye amo. Ejqueu amo nemiehcuntenöorusque Deus.

¹³ ¿Beles canajyecaca de nemejua quesufrirojteca? Ma motlajtlajte. ¿Beles pajpöque canajyecaca? Ma tiemocuicatele Deus. ¹⁴ ¿Beles mocococa canajyecaca de nemejua? Ma quemennutza inu biebertzetzi de nemogrupö de creyentes, hua yejua ma motlajtlajticö ca Deus ixtla inu cocoxque, hua ma cajalöbelicö asiete tietucöyupantzinco Tlöcatzintle.

¹⁵ Inu netlölajtelestle de tli monejneltoca quepajtis cocoxque, hua Tlöcatzintle quechihuasque ma case checöhualestle. Hua tlö otlajtlaco, queperdonörfisque. ¹⁶ Por inu, xomoyulcuiticö sie tlöcatl ca ocsie tlöcatl, hua xomötlajticö sie tlöcatl por ocsie tlöcatl, para que ejqueu nenpajtesque. Cuöc sente tlöcatl yectec tlajtlane ca Deus, inetlölajteles tequete cuale para ejqueu mochihuas meyac söstantle. ¹⁷ Elías oyeya tlöcatl quiename tejua, hua yaja omötlajte lalebes para majcama queyabe. Hua amo onqueya ipa inu tlöle por yeye xebetl hua checuasie mietztle. ¹⁸ Entunses ocsajpa omötlajte, hua ocsajpa öbetz queyabetl de elfecac, hua omöbepö tlatuctle ipan tlöltecpactle.

¹⁹ Nocnihua, tlö canajyecaca de nemejua mixpoloa para ayecmo moneltoca ca tlin melöhuac, hua ocsente queyulcuepa, ²⁰ ma quemate que öque queyulcuepa sente tlajtlacultec para ayecmo quetocas ojtle de neixpolebelestle, pos yaja quemöquextejteca iölma de inu tlöcatl para amo meques, hua quepojpolojteca meyac tlajtlacule.

Cörta tli primiero oquejcuelo SAN PIERO

¹ Naja nePiero, que necaca netlateotitlantle de Jesucristo. Nemiechejcuelfea ini cörta para nemejua tli Deus onemiechixpejpenque, tli nencuasemantecate bejca de nemopuieblo, hua öxö nencate pa inu estados de Ponto, Galacia, Capadocia, Asia, hua Bitinia. ² Deus onemiechixomatque antes de cuöc nentlöcantene, hua ejqueu onemiechixpejpenque, hua tieEspíritu onemiechyectelejque. Hua ejqueu nentieneltocaque Jesucristo hua por tieyesojtzi onemiechchepöjque.

Tiefavur Deus hua neyulsiebelestle ma momeyaquelicö ca nemejua.

Nemöchealestle tli ayec tlamés

³ Ma tetieyectieniehuacö Deus tieTajtzi de toTlöcatzintle Jesucristo. Por tiemeyac tlöocolteles yejuatzi otiechchihualtejque para tetlöcatque ocsajpa. Ejqueu cuale tecpeasque sente nemöchealestle tli abele tlamés, porque oyulebihuac Jesucristo de intzölö mimejque. ⁴ Hua öxö nemiechchea ompa elfecac inu sösantle tli nemohuöxcatisque, tli abele palöne nimpör abele mepetzonelo a nimpör abele peline, tli ompa momalfejteca. ⁵ Pues Deus nemiechmalfiluteca nemejua, porque nemoneltoca. Ejqueu, yejuatzi iloc listo para tiechejtetisque ipan söúltimo tunale quiene nemiechmöquextisque.

⁶ Por inu noso nemejua nenpöctecate lalebes, mösque beles conbenierebe que por quiesque tiempo nenquesufrirojtecate meyac sösantle. ⁷ Porque nemoneltoqueles icaca quieme oro tli giente quetlölea ipa tletzintle para quejtasque tlö nochaja oro icaca. Hua nemoneltoqueles, que cache balierebe que inu oro tli cuale polebes, nuyejque conbenierebe ma moproböro. Pos nemoneltoqueles moproböroa por inu sösantle tli nenquesufrirojtecate para ma niese que cuale icaca. Ejqueu *giente tiechamöhuasque hua tieyectieniehuasque Jesucristo cuöc hualiloas. ⁸ Nemejua nentietlasojtla mösque ayec nentiejtaque, hua nemoneltoca tieca. Por inu, mösque öxö amo nentieyeta, pero nenpajpajpöque lalebes, hasta que abele nenquepoa ca tlajtulme de inu pajpöquelestle, porque ica quieme inu pajpöquelestle tli icaca ompa tlanixtelestle. ⁹ Hua de inu manera nenquepea inu nemöquextelestle de nemoölma, pues para inu nemoneltoca. ¹⁰ Desde pa nieca tiempo inu tlayulepantejque oquepoaya por tietlajtultzi Deus quiene Deus quechihualusquea tiefavur ca tejua. Yejua tlayulepantejque oquepensöroöya hua oquetiemoöya lalebes para casojcömatesque inu nemöquextelestle. ¹¹ Oquenejnequeya quematesque ipa tlin tiempo o noso tlin tunale mochihuasquea inu sösantle tli tieEspíritu de Cristo quenmachestiloöya. Pues yejuatzi oquenpubeliloöya desde pa nieca tiempo de quiene Cristo quesufririrusquea tlimach, hua de quiene sötiepa quepealusquea tietlanixteles. ¹² Hua Deus quenmejtetejque que inu sösantle amo uyesquiöya para yejua tlöcamo cache uyesquea para tejua. Hua öxö ye nenquemate de inu sösantle. Nemiechmachestejque inu niecate tli tlanunutzque de inu cuale tlamachestleste. Yejua tlanunutzaya ca tiechecöhuales Espíritu Sönto öque Deus tiehualtitlanuc desde ompa elfecac. Hasta inu öngeles quenejneque queyequejtasque cuale ini nönca sösantle.

Ma teyecö teyecteque ipa noche tli tecchihua

¹³ Por inu xomopreparörucö para lo que tli nenquechihuasque. Xenemecö cuale, hua xeccheacö cuale tiefavur Deus tli nemiechmacasque cuöc niexihuas Jesucristo. ¹⁴ Xeyecö quiename tiepelhua tli tlaneltocaneme. Ayecmo xenemecö quiename pa nieca tiempo cuöc ayemo nenquemateya tietlajtultzi Deus, hua sa nenquechihuaya tli

* **1:7** Cuale nuyejque motradusirus: “nemiechchamöhuasque hua nemiechyectieniehuasque cuöc hualiloas Jesucristo”.

nenquenejnequeya. ¹⁵ Pero öxö pa noche tli nenquechihua xeyecö xeyecteque, quiename yejuatzi öque onemiechnutzque iloac yectec. ¹⁶ Pues tlajcuelulpanca: “Xeyecö xeyecteque, porque naja neyectec”.

¹⁷ Hua yejuatzi öque nentiecuitea “toTajtzi”, yejuatzi tlajuscöruro san quiene itlachihual tlöcatl, hua amo tlachecuaejtalo. Por inu ma xetiemabelicö pa noche tunalte de nemonemeles necö ipan tlöltecpectle. ¹⁸ Pues nenquemajmate que Deus onemiechcujque para ma ayecmo xenemecö inu nemelestle que amo quepea proviecho, quiename onenquetzecoique de nemotötajua. Amo otiehcujque ca oro nimpör ca plöta, pues inu söstantle tlames. ¹⁹ Cache otiehcujque ca yestle tli otiecostöro lalebes, ca yestle quiename iyeso de sente calnielojconetzi intiero cuale, hua sin niontle tli quepoloa. Quejtusneque, otiehcujque ca tieyesojtzi Cristo. ²⁰ Yejuatzi quematiloöya desde ca opie tlöltecpectle que mecoasqueya topampa, pero hasta öxö, ipa itlamejyo tunalte, oneniextiluco para tejua. ²¹ Tejua por yejuatzi toneltoca ca Deus, öque tieyulebitiluc de intzölö mimejque, hua otiemacuc tietlaniexteles. Ejqueu oquechijque para ma toneltocacö tieca Deus hua ma tetiechixtacö yejuatzi hua amo ocsente.

²² Pues ye nenqueneltoca de lo que tlin melöhuac, hua de inu manera nenquechepöjque nemoölma. Ejqueu nemotlasojtlasque de melöhuac entre nemejua tli nenicnijte nencate. Por inu, xomotlasojtlacö lalebes ca noche nemoyulo. ²³ Pues nemejua ye onentlöcatque ocsajpa. Amo solamiente nentlöcatque de söstantle tli sa tlame hua meque, tlöcamo nentlöcatque de tietlajtultzi Deus, tli neme hua ayec tlame. ²⁴ Porque tlajcuelulpanca:

Noche giente cajcate quiename xebetl,
hua noche inchecöhuales quiename ixucheyo xebetl.

²⁵ Xebetl huajhuöque, ixucheyo chayöbe,
pero tietlajtultzi Tlöcatzintle bejcöbes semejac.

Hua inu tietlajtultzi de tli tlajtlajtoa icaca inu tlajtule de cuale tlamachestelestle tli onenquecajque.

2

¹ Por inu, xejcöhuacö tlacajcayöhuaquelestle hua noche ocseque söstantle tli amo cuale. Amo xeyecö de ume nemoxöyac, hua amo xomoxicucö, hua xejcöhuacö noche tlajtulme tli amo cuale. ² Cache xeyecö quieme pelantzetzti tli quemach otlöcatque. Xequeliebicö lalebes tietlajtultzi Deus, tli amo quepea niontle tli tlacajcayöhua hasta cöne momöquextis. Yaja icaca quiename nochaja lieche cuale tli lalebes queliebea pelantzetzti. Pues por medio de tietlajtultzi cuale mobepöhuas nemoölma. ³ Pues ye nenquematque que cuale iloac Tlöcatzintle.

Cristo iloac quieme sente tietetu tli neme

⁴ Yejuatzi iloac quieme sente tietetu tli neme, tli giente de melöhuac oquetlabielcöjque, pero Deus quixpejpenque, hua para yejuatzi lalebes balierebe. Hua cuöc tejua topachoa tietlac Tlöcatzintle, ⁵ tejua nuyejque tecate quiename teme tli tenentecate, tli Deus tiechtlölilo ipa tepöntle de sente teocale espiritual. Nuyejque tiechchihualtilo ma teyecö tetieteopexcötzetzihua yecteque, para ma tetlabentlöllicö de inu bentle espiritual tli Deus cuale queselisque por Jesucristo. ⁶ Pues tlajcuelulpanca:

Xequajtacö: naja neclölis ipa Siön sente tietetu de esquiniero tli naja nequexpejpe, tli lalebes balierebe,
hua öque moneltoca ca yaja ayec mopejpinöjtis.

⁷ Para tejua tli toneltoca inu tietetu lalebes balierebe, pero para niecate tli amo moneltoca mocumpliroa ini nönca tli tlajcuelulpanca:
Inu tietetu tli calchihuaneme oquetlabielcöjque,
yaja mismo inu tietetu öxö omochihuaco esquiniero principal.

⁸ Nuyejque mocumpliroa tli tlajcuelulpanca ejqueyi:

Tietetu tli ica moteputlamejque,

hua tietebiebentzi tli quenchiualtea ma betzecö.

Pues niecate tli amo moneltoca moteputlamea por que amo queneltoca cuale tlajtule. Pos para inu quentlölejque Deus, para ma moteputlamicö. ⁹ Pero tejua tecate tegiente tli Deus tiechixpejpenque, tecate sente grupo de tetieteopexcötzetzihua de yejuatzi öque iloac torey. Tecate sente nación yectec, sente puieblo tli tetiehuöxcagua Deus, para ma totech niese tiechecöhuales. Pues yejuatzi tiechnutzque para ma tequisacö de ijtec tlajtlayohuaquelestle hua ma tecalaquecö ipa tietlaniexteles tli lalebes cuale. ¹⁰ Pa nieca tiempo amo sa de sie puieblo teyejyeya, pero öxö tonochtie tecate tetiepuieblo de Deus. Oyeya ayemo tiechecnuejtaloöya Deus, pero öxö ye otiechmacaque tieicnuejteles.

Ma topörtörucö cuale por tiepampa Tlöcatzintle

¹¹ Notlasojcöicnihua, nemiechtlötlajtea, siendo que nencate nenestranjieros hua amo de necö tlöltecpactle nencate, xomoxelucö de sösanle tli amo cuale tli quelieba tonacayo. Ini nöncate sösanle cate encuntra toölma. ¹² Xomopörtörucö cuale intzölö tlöltecpactlöca, para que cuöc quetiemoa canajyetla para nemiechtielfisque quiename tlö nenyeyene nentlöca amo nencualteque, cache quejtasque nemotlachihual tlin cuale, hua tieyectieniehuasque Deus ipan tunale cuöc yejuatzi neniextilus ca yejua.

¹³ Xomosujetörucö tiepampa Tlöcatzintle ca noche tlajtoönejme tli quentlölea tlöltecpactlöca. Xomosujetörucö ca inu emperador o noso rey, tli quepea cache meyac checöhuallestle que ocseque, ¹⁴ hua nuyejque ca cubernadurte. Pues inu rey quentlölea cubernadurte para ma quencastecörucö niecate tlöca tli amo cualteque, hua nuyejque para ma quenyectieniehuacö niecate tli quechihua tlin cuale. ¹⁵ Porque ini nönca icaca lo que tli quenequihua Deus, que inu niecate tuntojte que amo tli quemajmate ma sequencamatzacuacö ca nemotlachihual cuale tli yejua quejtasque.

¹⁶ Nencate nenlibres, pero amo xequajtucö que “Ye tecate telibres; hua por inu cuale tecchihuasque tlin amo cuale”. Cache xomopörtörucö quieme esclavos de Deus. ¹⁷ Xequenrespetörucö innochie. Xequentlasojtlacö tocnihua. Xetiemabelicö Deus. Xecrespetörucö inu emperador.

Cristo tiechmacatiejque sente ejiemplo de quiene ma tecsufrirucö

¹⁸ Nemejua tli nenquentequepanoa, xequenneltocacö nemopatrones ca noche respieto. Amo sa xequenneltocacö tlin cualtientlöca, tlöcamo nuyejque niecate tli amo cuale nemiechtratöroa. ¹⁹ Pues ini nönca icaca cuale, tlö canajyeca quexicus sufrimientos tli amo quenmeresieroa, ipampa quemate que Deus iloac itlac. ²⁰ Pues tlö nemejua nenquechihua canajyetla amo cuale, hua por inu nemiechcastecöroa, hua nenquexicoa, ¿tli proviecho nenquepea? Pero tlö nenquechihua tlin cuale, hua gente nemiechchibelea tlin amo cuale, hua nenquexicoa, ini nönca quecualajtalo Deus. ²¹ Pues para ini nönca Deus onemiechnutzque, para ma xecchihuacö cuale hua para ma xecsufrirucö. Porque nuyejque Cristo oquesufrirrojque nemopampa, hua onemiechmacatiejque sente ejiemplo, para ma xecchihuacö quiename yejuatzi oquechijque. ²² Yejuatzi ayec otlajtlaculuc, hua ayec otlacajcayöhualuc. ²³ Cuöc tiepöpöcaque yejuatzi amo quencuepeliluc; cuöc quesufriruroöya, amo quentlacaquitejque, tlöcamo cache nemöctiluc tieca Deus, öque tlayecjuscöruo quiene ca conbenierebe. ²⁴ Cristo mismo oquetlaxtlöjque por totlajtlacul ipa tiecuiervo ipan coruscuabetl, para que tejua ma ayecmo tetlajtlacucö, quiename sente mejque ayecmo tlajtlacoa, hua para ma tenemecö ca yectelestle. ²⁵ Pues tejua pa nieca tiempo otoxelotöya quiename calnielojte, pero ye otocuejque tieca Cristo, öque iloac quiename calnielojpexque tli quixutilo toölma.

3

Quiene ma tenemecö tli tecpejpea tonömec noso tosohua

¹ Ejqueu nuyejque nemejua, sohuame, xomosujetörucö ca nemonajnömecua. Ejqueu tlö canajyeca inömec de sente de nemejua amo queneltoca tietlajtultzi Deus, cuale moneltocas ipampa quejtas itlachihual de isohua, mösque amo quecaque tlajtule. ² Pues quejtas quiene moportöroa isohua yectec hua ca respieto. ³ Hua cuöc nemoyecchejchihua, majcamo iye de söstantle quiename teposcuajme hua öniyojte pateyojque quiename de oro, o noso de nemotlaquie lalebes pateyo, o noso nemoxoniepalfisque para nemochamöhuasque. Pues noche inu söstantle sa niese ca pane. ⁴ Cache cuale, nemojtecopa xomoyecchejchihuacö ipa nemoyulo, ca inu söstantle tlin cuale hua tli amo tlame, de que nenyisque cuale hua amo nemomösebisque. Pues para Deus lalebes cuöcualtzi hua balierebe lalebes ini nönca söstantle. ⁵ Pues ipa nieca tiempo ejqueu moyecchejchijque inu sohuame yecteque, tli omömöchixtaya ca Deus. Pues yejua omosujetörojque ca innajnömecua. ⁶ Por ejiemplo, Sara oqueneltocac inömec, Abraham, hua oquejtoöya “Tlöcatzintle” cuöc quenutzaya. Hua nemejua nenyisque quiename yaja, tlö nenquechihuasque tlin cuale hua amo nemomajtisque de niontle.

⁷ Nuyejque ejqueu nemejua, tlöca, xecmatecö nenquecomprendierusque de nemosojsuhuöhuö, hua xequentratörucö cuale ca respieto. Pues sohuatl amo icaca checöhuac quiename tlöcatl, hua nuyejque yejua sohuame quepea inu nemelestle tli Deus tiechmacaque, quiename nenquepea nemejua. Tlö ejqueu nenquechihuasque, niontle quetzacuelis nemotlajtlötlajteles.

Cuale tocnupel tlö tecsufriroa por tecchijteca tlin cuale

⁸ Öxö, xeyecö de acuerdo nemonochtie. Xecmachelicö lo que tli nemocnihua quemachelea, hua xequentlasojtlacö. Hua xomotlöocolticö tlö canajyetla impa mochijteca. ⁹ Cuöc giente nemiechchibelea tlin amo cuale, amo xequencuepelicö ca tli amo cuale. Cuöc nemiechpöpöca, amo xequencuepelicö lo mismo; cache cuale xequenben-desirucö. Pues para inu otiechnutzque Deus, para tecselisque tiebendeseyu. ¹⁰ Pues:

Öque queneque nemes ca pöquelestle
hua queneque nemes ipa tunalte cuajcuale,
ma quemalfe icamac para majcamo quejto tli amo cuale,
hua inenepil majcamo tlacajcayöhua.

¹¹ Ma monencuaxelo de tli amo cuale,
ma quechihua tlin cuale.

Ma seme quetiemojta siebelestle ca innochie,
hua cöne ye queniexte ma quetoca.

¹² Porque Tlöcatzintle impa quejtalö yecteque,
hua quecaquihua intlötlajteles.

Pero iloac incuntra de niecate tli quechihua tli amo cuale.

¹³ Hua tlö nemodedicöroa nenquechihuasque tlin cuale, ¿öque nemiechchibelis amo cuale? ¹⁴ Pero mös cana nenquesufrirusque ipampa nenquechihua tlin cuale, pero cuale nemocnupel. Hua amo xomomajticö de lo que tli yejua quenmajtea, nimpör amo xomotequepachucö. ¹⁵ Pero xetieteoehihuacö toTlöcatzintle Cristo ipa nemoyulo. Hua seme xeyecö listos para nentlanönquelisque cuöc yeca nemiechtlajtlanea quiene nenquepea inu nemöchealestle. Hua amo xetlanönquelicö ca chamöbelestle tlöcamo ca cuale hua ca respieto. ¹⁶ Xenemecö cuale para que amo nenquepeasque niontle tli nemiechpinöjtis ipa nemoyulo, para que niecate tli nemoca tlajtoa pinöhuasque de intlajtul porque innochie quematesque que nemonemeles tieca Cristo ica cuale. ¹⁷ Pues tlö Deus quenequihua ma tecsufrirucö por lo que tlin cuale tecchijque, cache cuale ma ejqueu iye. Pero majcamo iye que tecsufrirusque por canajyetla tli amo cuale

otecchijque. ¹⁸ Porque Cristo nuyejque oquesufriro tiecoco ipampa tlajtlacule. Mösque yejuatzi iloac yectec, omecoac nemopampa nemejua tli amo nenyeyjeya nenyecteque, para onemiechpachojque tieca Deus. Omec tiecuiervo, pero oyulebihuac por tieespíritu. ¹⁹ Ca tieespíritu nuyejque obiloac hua oquennunutzque inu niecate espíritu tli tza-jtzactaya. ²⁰ Yejua cate tli pa nieca tiempo cuöc nemeya Noé, amo tieneltocaque Deus. Amo tieneltocaque mösque yejuatzi quenchealoöya lalebes, ipa noche inu tiempo cuöc Noé quechijchitaya inu örca noso börcobiebe. Sa quiesquete gientes, sa checuieye gientes momöquextejque ijtec inu örca ipa ötzintle. ²¹ Ejqueu tomöquextea tejua ca ötzintle, quejtusneque cuöc tocuötiequea. Amo tomöquextea ipampa tajöltea cuöc tocuötiequea, tlöcamo ipampa tetietlajtlanelea Deus ma quechepöhuacö toyulo ipampa oyulebihuac Cristo, para que ejqueu totlajtlacul ayecmo tiechpejpinöjtis. ²² Yejuatzi Cristo ye otlejcoac elfecac, hua iloac ca tiemöyecmö Deus, hua noche öngeles hua noche espíritu tli quepejpea checöhuallestle tieneltoca.

4

Ma tequenpaliebicö tocnihua ca inu beletelestle tli Deus tiechmacalo

¹ Por inu, siendo que Cristo oquesufrirojque ipa tiecuiervo, xecpensörucö nemejua quiename yejuatzi oquepensöröjque; pues öque ye oquesufriro ipa icuierpo ayecmo tlajtlacus. ² De inu manera ipa nönca tiempo tli polebe de tonemeles majcamo xenemecö quiename queneque tonacayo, tlöcamo quiename quenequihua Deus. ³ Pues ipa inu tiempo tli ye opanuc ye nenquechijque meyac inu söstantle tli quecualajta quechihuasque tlöltecpactlöca. Nennemeya quieme bisiosos, hua nenquelielibiöya söstantle amo cuale. Nenyeyjeya nentlöhuöncötzetzi, hua nenquecualajtaya elfeme cöne chajchalöne lalebes. Hua nencoconiya lalebes, hua nenquenteochihuaya ixniehualojme, que amo conbenierebe öque quechihuas. ⁴ Niecate giente quetietzöbea que nemejua ayecmo nenqueneque nenyösque ca yejua para nenquechihuasque noche inu söstantle amo cuale, hua nemiechpöpöca. ⁵ Pero yejua quetiencasque cuienta ca yejuatzi öque iloac listo para tlajuscörusque inca innochtie gientes. Pues quenjuscörusque tli neme hua nuyejque tli ye omejmejque. ⁶ Pues niecate tli ye omejmejque oquecajque inu cuale tlamachestelestle, para que ejqueu ma neme inespíritu, quiename nemoa Deus, mösque omec incuierpo quiename meque incuierpo de noche giente. Pues Deus oquejtojque ma ejqueu iye.

⁷ Pero itlamejyo noche söstantle ye aseteca. Por inu, xecyecpensörucö nemejua, hua xomodedicörucö ca nemotlötlajteles. ⁸ Cache de noche söstantle, xomotlasojtlacö lalebes entre nemejua, pues tlasojtelestle quepojpoloa meyac tlajtlacule. ⁹ Xomocaluticö entre nemejua sin que nemoquejörusque. ¹⁰ Cöra sente de nemejua ma quenpaliebe icnihua ca inu beletelestle tli oquesele de Deus. Quienamente encargödo que cuale quexiexeloa iteque, nemejua xecusörucö cuale inu beletelesme tli Deus nemiechmacaque cara sente de nemejua. ¹¹ Cuöc tlanunutzas yeca de nemejua, itlajtulhua ma yecö quieme tietlajtultzi Deus. Cuöc canajyeca tlapaliebicö, ma quechihua ca inu checöhuallestle tli Deus quetiencalaco. Ejqueu ma quepeacö Deus yectieniebelelestle ipa noche söstantle por medio de totieJesucristo, öque quepealo yectieniebelelestle hua checöhuallestle nochepa. Ma ejqueu iye. Amén.

Cuale tocnupel tlö tiechpöpöca porque tecate de Cristo

¹² Notlasojcöicnihua, amo xectiezöbicö de inu söstantle tli nemopa yebitz, tli nenquesufrirosque para ma niese que ica cuale nemoneltoqueles. Amo xecpensörucö que yaja tietzöbetl. ¹³ Cache xepajpöquecö porque nenquesufrirojtecate lo mismo que oquesufrirojque Cristo, hua de inu manera nuyejque nemöpöctisque hua nenpajpöquesque lalebes cuöc niexihuas ca tlanixtelestle. ¹⁴ Tlö giente nemiechpöpöca ipampa nencate

de Cristo, cuale nemocnupel, pues yejuatzi Espiritu de Deus, öque quepealo tlanixteles-tle, iloac nemotlac. ¹⁵ Cuöc yeca de nemejua quesufriroa, majcamo iye porque otlamecte o noso otlachtec, o noso oquechi tli amo cuale, o noso omocalacte ipa asuntos de ocseque giente. ¹⁶ Pero tlö canajyeca quesufriroa ipampa icaca cristiano, majcamo quepinöhua, cache ma tiechamöhua Deus ipampa icaca cristiano porque moneltoca tieca Cristo.

¹⁷ Pues ye oasec tiempo de que Deus ye quepiehualtisque tlajuscörurus, hua cachtö tiechjuscörurusque tejua tli tecate de tiefamilia. Pero tlö ejqueu quepiehualtilo tlajuscöruro ca tejua, ¿quiene iyes intlamejyo de niecate tli amo queneltoca tiecual tamachesteles de Deus? ¹⁸ Tlö

yectequa ca traböjo momöquextea,

¿tli noso quenpasörus tlajtlaculteque hua niecate tli amo quechihua cöso de Deus?

¹⁹ Por inu, tlö nenquesufriroa quiene Deus quenequihua, xecsequirucö xecchijtacö tlin cuale, hua xetiemocticö nemoölma ca Deus öque otiechchejchijque, pues yejuatzi iloac de confiönza.

5

Consiejos para tli creyentes

¹ Nemejua tli nencate nenbiebentzti entre creyentes, nemiechtlajtulmacas. Pues naja nuyejque nebiebentzi, hua naja onequejtac quiene quesufrirojque Cristo. Hua naja nuyejque quieme nemejua necpeas pörte ipa tietlanixteles Deus tli tiechejtetisque sötiepa. ² Xequenmixuticö tiegiente de Deus. Xequentlachilejtacö quieme tlö nenyene nencalnielöjpexque de tiecalnielöjua Deus. Amo xecpensörucö que yeca nemiechchihualtea ca fuierisa ma xecchihuacö inu tequetl, cache xecchihuacö porque nemejua ejqueu nenquenejneque nenquechihuasque. Xecchihuacö quiename Deus quenequihua. Xecchihuacö ca pöquelestle. Amo xecchihuacö para nenquetlönisque tomi, ³ nimpör amo xecchihuacö quiename tlö yejyene nemohuöxcachua inu creyentes tli nenquemixutea. Cache cuale xeyecö nenejiemplos para que yejua cuale quechihuasque quieme nemejua nenquechihua. ⁴ Entunes cuöc niexihuas öque cache bieyetzintle calnielöjpexque iloac, nenqueselisque sente coruna de tlanixtelestle, tli amo tlames nimpör amo pelines.

⁵ Nuyejque ejqueu nemejua tli ayemo nenbiebentzti, ma xomosujetörucö ca biebentzti. Hua nemonochtie nemejua xomopichaquicö entre nemejua mismo, para nemopaliebisque entre nemejua. Pues:

Deus neoponieruro ca niecate tli mochajchamöhua,

pero quenmacalo tiefavur ca niecate tli mopichaquea.

⁶ Por inu xomopichaquicö tieixtla Deus, öque ca checöhuallestle tequetihua totzölö. Hua yejuatzi nemiechchamöhuasque cuöc conbenierebes. ⁷ Hua xejcöhuacö noche nemotequepachul tieca Deus, pues yejuatzi nemiechtlachililo.

⁸ Xecyepensörucö hua xomotlachilicö lalebes, porque inu nieca nemocontrörrio, inu Diöblo, yajteneme quiename sente leyu tiemajte tli tzajtzeteneme hua quetiemojteneme öquenu yaja quecuös. ⁹ Xomocujpetzucö cuntra yaja, hua xomochecöhuacö ca nemoneltoqueles, pues nenquemajmate que pa ocseque pörtes de tlöltecpactle nemocnihua quesufrirojtecate iguöl quiename nemejua nuyejque. ¹⁰ Deus, öque quetiemaalo tiefavur, öque nemiechnutzque para nenquepeasque pörte de tietlanixteles tieca Cristo, yejuatzi, sötiepa de cuöc ye nenquesufrirojque tepetzi, ye nemiechcöhuasque intiero yectequa de nemonemeles, hua nemiechcuajpetzusque hua nemiechchecöhualus. ¹¹ Yejuatzi ma quepeacö checöhuallestle nochepa. Ma ejqueu iye. Amén.

Tlajpalulestle

¹² Nemiechtitlanelea ini nönca cörta ca Silvano, öque necpensöroa que yaja cuale tocní hua icaca de confiönza. Amo meyactie tlajtulte nemiechejcuelfea; sa necnequeya

nemiechtajtlamacas hua nemiechpubeles que yaja ini nönca icaca de melöhuac lo que tli Deus otiechmacaque. Xomocujpetzucö ipa ini nönca machelestle.

¹³ Inu grupo de creyentes tli cate necö Babilonia, öque Deus nuyejque oquennutzque, yejua nemiechtajpaloa. Nuyejque nemiechtajpaloa Mörcos, öque icaca quiename noconie. ¹⁴ Xomopetzucö ca tlasojtelestle cuöc nemotajpaloa.

Nemonochtie tli nencate tieca Cristo ma xecpeacö neyulsiebelestle.

Cörta tli ca ujpa oquejcuero SAN PIERO

¹ Naja neSimeón Piero, que neca netietlatequepano hua netlateotitlantle de Jesucristo. Nemiechejcuelfea ini nōnca cörta para nemejua tli nenquepea inu neltoquelestle tli lalebes balierebe, quiename tejua nuyejque tecpejpea. Tecpea ipampa toDeus Jesucristo, öque tiechmöquextilo, iloac yectec hua melactec. ² Tiefavur Deus hua neyulsiebestle ma momeyaquelicö lalebes ca nemejua ipampa cache nenquixomatesque de toDeus hua de toTlöcatzintle Jesús.

Deus tiechnutzque hua tiechixpejpenque

³ Yejuatzi, siendo que iloac Deus, quepealo beletelestle para cuale tiechmacaque noche tli tecnesesitöroa para tonemeles nochepa hua para ma tenentacö quieme tiechmachestea toreligiön. Cuale tecpeasque ini nōnca sösantle cuöc de melöhuac tetieixomate yejuatzi öque otiechnutzque. Otiechnutzque cuöc oquechijque ma tomacacö cuienta de que iloac lalebes cuale hua de que quepealo bieye tlanixtelestle. ⁴ Hua porque ejqueu iloac, tiechmacaque tiepromiasas bejbeye lalebes, hua de meyac balur. Ejqueu oquechijque para que ejqueu cuale nenyessque quiename iloac Deus, tlö nemomöquextea de inu ixniempolebestle tli onca necö ipan tlöltecpactle. Onca ixniempolebestle ipampa tlöltecpactlöca quejelibea lo que tli amo cuale.

⁵ Bueno, por ini nōnca arasu, xomoyecdedicörucö xectlasolultelicö cuale sösantle ipa nemonemeles. Ye nemoneltoca; pos nuyejque xeyecö nencualteque lalebes. Tlö ye nencualteque, pues nuyejque xomomachticö para nenyessque nentlajmatque. ⁶ Tlö ye nenquepea machestelestle, pos nuyejque xomodominörucö cuale nemejua mismos. Tlö ye nemodominöroa cuale, nuyejque xomomachticö quiene nenquexicojtasque ca paciencia. Tlö ye cuale nenquexicoa ca paciencia, nuyejque xenentacö quiename tiechmachestea toreligiön. ⁷ Hua tlö ye cuale nenqueyectoca toreligiön, nuyejque xecpeacö inu cariño tli onca entre tli icnijte cate. Hua tlö ye nenquepea inu cariño, nuyejque xecpeacö tlasojtelestle. ⁸ Porque tlö nenquepea nōncate sösantle hua nenquemeyaquela, entunes amo sa iyes de embölde que nentieixomatque toTlöcatzintle Jesucristo, tlöcamo quepeas resultödo ipa nemonemeles. ⁹ Tlö canajyeca amo quepea nōncate sösantle, icaca quiename ixcocoxque, tli abele tlachea bejca. Pues ye oquelcö de que omohepö de inu tlajtlacule tli oquechi pa nieca tiempo tli ye opanuc. ¹⁰ Por inu, cache ca meyac arasu xomodedicörucö para nenquecomprobörusque que Deus nemiechnutzque hua nemiechixpejpenque. Pues tlö nenquechijtasque nōncate sösantle, ayec nenbetzesque. ¹¹ Pues de ini manera Deus nemiechmacasque para cuale nencalaquesque ompa cöne nochepa tlamandöruro toTlöcatzintle Jesucristo öque tiechmöquextilo.

¹² Por inu seme nemiechtlalnömectis de nōncate sösantle, mösque ye nenquemajmate, hua ye nemocuajpetzojtecate ipa inu sösantle tli ye nenquepextecate, tli melöhuac. ¹³ Hua necpensöroa que naja mientras neneme ca nōnca nocuierpo conbenierebe ejqueu nemiechtlalnömectejtas. ¹⁴ Pues necmate que isejco nejcöjtiehuas nōnca cuierpo, quiename öque quecöjtiehua sente xajcale. Pues ejqueu niechmachestejque toTlöcatzintle Jesucristo. ¹⁵ Pero necchihuas lo que tli nebeletes para que sötiepa de que naja nemeques turavea nenquelnömectasque nōncate sösantle.

Ica melöhuac lo que tli otejcajque de Cristo hua lo que tli oquejcuerojque inu tlayulepan-tejque

16 Cuöc nemiechmachejque de quiene Cristo iloac checöhuac hua de quiene *hualiloas, pos amo oyeya sa de cuientos quiename tli gente de möña quinbentöroa. Cache tejua mismos tetiejtaque ca toixtelolojua quiene iloac bieyetzintle lalebes. 17 Pues tetiejtaque cuöc Deus Tajtle tiechamöjque hua tieyectieniejque. Pues otejcajque sente tlajtule de ijtec inu tlanixtelestle hua coluria tli oquejto: “Yaja ini nönca noconie, öque neclasojtla, hua itech nepöcteca”. 18 Hua tejua otejcajque inu nienca tlajtule tli huölöya de elfecac cuöc teyejyeya ca yejuatzi ompa ipa inu tepietl sönto.

19 Pero tecpea sente söstantle tli aun cache seguro ica: quejtusneque inu teotlajtule tli oquejcuelojque tlayulepantejque. Hua ica cuale ma xecyejactacö inu teotlajtule. Pues ica quiename sente cantil tli tlanixtea ipa sente locör cöne tlajtlayohua, hasta cuöc tlanieses tunale, hua inu sitlale de ca ise quisas ipa nemoyulo. 20 Pero primero xecmatecö ini nönca, que noche inu tlayulepantelestle tli tlajcuelulpanca, abele öque casojcömates sa yaja mismo quiename yaja queneque. 21 Porque inu teotlajtule ayec onhuöla ipampa oquenec sente tlöcatl, tlöcamo inu tlöca otlajtlajtojque de pörte de Deus, quiename oquenchihualtejque yejuatzi Espiritu Sönto.

2

Huölösque machestieros istlacateque

1 Pero nuyejque onhuölajque tlayulepantejque istlacateque entre inu gente de Israel, quiename nuyejque yesque machestieros istlacateque entre nemejua. Yejua sa ichtacajtzi quecalaqueisque inenseñönsas tli tlanimpoloo. Hua ejqueu tienegöroa bel yejuatzi inTlöcatzintle öque oquencujque. De inu manera quebicatze impa yejua mismo tlaxexetunelestle tli isejco huölös. 2 Hua meyactie quentocasque ipa innemeles de bisio hua tlajtlacule. Hua impampa yejua ocseque gientes tlajtusque amo cuale de ini ojtle tli melöhuac ica. 3 Ca intlajtulhua de möña nemiechquextelisque tomi, ipampa yaja inu quetiemojteneme. Pero Deus desde ye icsa tiempo ye quematihua que isejco quencuntenörusque, hua seguramente isejco quenxexetunisque.

4 Pues yejuatzi amo quenperdonörojque nion öngeles tli otlajtlacojque, cache quentitlanque ijtec tlecale hua ca carienajte oquemejlpejque ipa tlajtlayohuaquelestle hua tlanextecume. Ompa quenpealo hasta cuöc quenjuscörusque. 5 Nuyejque amo quenperdonörojque Deus inu gente de tlöltecpactle de pa nieca tiempo cuöc yejuatzi quetitlanque inu ötiemelestle ipa inu tlöltecpactlöca tli amo quechihuaya cöso de yejuatzi. Pero quemöquextejque Noé ca tiehua oc checume, öque yaja tlanunutzaya de yectelestle. 6 Hua inu ciudades de Sodoma hua de Gomorra Deus oquencuntenörojque hua oquexutlaltejque hasta que sö tlaconextle omocö. Hua ini nönca oquechijque para ma mocöhua quiename sente ejiemplo para gente tli sötiepa amo quechihuasque cöso de Deus. 7 Pero quemöquextejque yaja Lot, öque yectec oyeya tlöcatl, hua motequepachoöya lalebes por innemeles de inu tlöca amo cualteque tli nemeya ipa bisio hua tlajtlacule. 8 Porque inu tlöcatl yectec tli chönteya entre yejua quesufriroöya iyulo yectec cuöc oquejtaya hua oquecaqueya inu söstantle amo cuale tli oquechihuaya yejua. 9 Por noche ini nöncate söstantle cuale tequejta que Tlöcatzintle quematihua cuale quenmöquextilus niecate tli tiemabelea, hua quematihua queguardörojtasque niecate tli amo yectequ hua quencastecörojtasque hasta inu tunale cuöc quenjuscörusque. 10 Hua cache quencastecörusque nieca gente tli quetoca itlanequeles de innacayo, que yaja petzoyutl, hua quejetoa que Deus amo quenmandörusque.

Yejua amo tlacaque, hua lalebes cate atrevidos, pues hasta amo quenmabelea para tlajtusque incuntra de inu espíritus tli lalebes quepejpea checöhuallestle hua chamöhuallestle. 11 Pero nion öngeles mös cache checöjque hua checateque cate, pero

* 1:16 Cuale nuyejque motrodusirus “hualiloac”.

amo matrebieroa de tlajtusque incuntra de inu ocseque cuöc cate tieixtla Deus. ¹² Pero ini nöncate tlöca cate quiename yulcöme que amo cajasojcömate. Yejua quechihua sösantle quiename yulcöt quechihua, sin que amo quemate lo que tli quechihua. Sa cate para gente quemasesque hua ejqueu mequesque. Tlajtoa amo cuale de sösantle tli yejua amo cajasojcömate. Hua seguramente moxexetunisque. ¹³ Yejua amo queselisque sösantle tlin cuale, mös yejua oquechijque tlin amo cuale para quetlönisque inu sösantle. Yejua hasta ca tunale mopöctea ca noche tlajtlacule tli quenmaca pöquelestle. Cajcate sente pinöhualestle hua san petzotec nejniese cuöc tlajtlacua nemotzölö, hua pajpöque porque nemiechcajcayöjtecate. ¹⁴ Seme quepensörojtecate de que mopöctisque ca isohua ocsente, hua abele quecöhua de tlajtlacusque. Yejua quemixnutza gente tli amo checateque ipa inyulo para ma tlajtlacucö ca yejua. Ye macostumbrörojque seme mijicoltea lo que tli amo inhuöxca. Impa betzes tietlabejbicalteles Deus. ¹⁵ Ye oquecöjque cuale ojtle, hua amo quetocaque. Cache quetocaque inu ojtle de inu tlayulpante Balaam iconie Bosor, öque quenequeya queselis tlaxtlöbile por quechihuasqueya tli amo cuale. ¹⁶ Pero sente puro, tli abele tlajtlajtoa, ocajajuac por itlajtlacul ca tlajtule de gente, hua amo oquecö ma quesequiro ca ilucojyu. ¹⁷ Inu tlöca cajcate quiename öpusojte tli amo quepea ötzintle, hua quiename öyabetl tli yejyecatl quebica. Para ini nöncate Deus quepreparörojque inu locör de tlajtlayohuaquelestle hua tlanextecume. ¹⁸ Pues yejua quejetoa tlajtulme tli caqueste lalebes bejfeye, mös de melöhuac amo tli quebicatze. Ejqueu quemixnutza niecate tli quemach oquisque de intzölö tli nentecate ipa cajcayöhuaquelestle. Quemixnutza para ma quechihuacö itlaeliebeles de innacayo, hua ma nemecö ipa bisio hua tlajtlacule. ¹⁹ Quenprometierfea que yesque libres hua amo yesque esclavos de nionöque, mös yejua mismo cate esclavos de petzoyutl. Pues tlö canajyetla sösantle tladominöroa ipa sente tlöcatl, inu tlöcatl ica esclavo de inu sösantle. ²⁰ Pues para gente tli ye otieixomatque Tlöcatzintle Jesucristo öque tiechmöquextilo, hua de inu manera ye omöquisque de inu petzoyutl tli onca necö ipan tlöltecpectle, tlö yejua ocsajpa milacatzoa ca inu petzoyutl, hua petzoyutl tladominöroa, entunses mocöhua cache petzotec que primero. ²¹ Pues cache cuale uyesquea para yejua tlö ayec quixomatene inu ojtle de yectelestle. Cache petzotec iyes para yejua ipampa ye oquixomatque hua omoxelojque para que ayecmo queneltocaque inu mandamiento yectec tli oqueselejque. ²² Intech yejua mochihua lo que quejtoa ca melöhuac inu dicho que mojtoa:

Chechetu mocuepa ocsajpa ipa imesutlales

hua:

Petzolama tli quemach omajölte ocsajpa momimeloa ijtec soquetl.

3

Hualiloas Tlöcatzintle quiename oqueprometierojque

¹ Notlasojcöicnihua, ye nemiechejcuelfejteca ini segunda cörta, hua ipa inu ume cörtas necnequeya nemiechtlalnömectis. ² Necneque ma xequelnömequecö de melöhuac ipa nemopensamientos de lo que tli inu tlayulepantejque yectequ oquejtojque cachtö de que pasörebesquiöne. Nuyejque necneque ma xequelnömequecö de inu mandamiento tli tiechcöbelejtijque toTlöcatzintle öque tiechmöquextilo. Inu tlateotitlanme nemiechmacaque inu mandamiento cuöc nemiechnunutzque. ³ Pero cachtö ma nemiechante-sipörfe ini nönca, que pa sölúltimo tunalte huölösque gente tli moburlörusque. Yejua sa quetocasque itlaeliebeles de yejua mismo, ⁴ hua quejtusque: “¿Tli pasörebe? ¿Tlica amo yebitz inu Cristo quiename oqueprometiero? Pues xequejtacö que desde que omejmejque tobiebetcöhua noche sequirebe iguöl desde cuöc omochejchi tlöltecpectle”. ⁵ Pues yejua tli quejtoa ejqueyi amo queneque momacasque cuenta de que pa nieca tiempo oyeya sente elfecac hua sente tlöltecpectle. Inu tlöltecpectle omochejchi de

ötzintle por tietlajtultzi Deus, hua oyeya inepantla de ötzintle. ⁶ Hua por medio de *inu tlajtule ötöcuc inu tlöltecpactle hua onxexetu. ⁷ Pero por mismo inu tlajtule de Deus momalfejtecate ini nönca elfecac tli öxö ica, hua ini nönca tlöltecpactle, para xutlasque. Pues Deus quenmalfiluteca hasta ma ase inu tunale cuöc tlajuscörurus hua quenxexetunisque niecate tli amo quetomöroa en cuenta de yejuatzi.

⁸ Pero amo xequelcöhuacö ini nönca, notlasojcöicnihua, que para Tlöcatzintle sie tunale ica iguöl que mil años, hua mil años iguöl ica que sie tunale. ⁹ Yejuatzi amo bejcöbihua para quechihuasque lo que tli queprometierojque, quiename seque quejtoa. Cache es que nemiechpililo meyac paciencia, porque amo quenequihua que nionöque ma ixniempolebe tlöcamo cache tonochtie ma toyulcuepacö. ¹⁰ Pero inu tunale de Tlöcatzintle huölös quiename cuöc yebitz sente tlachtejque cuöc nionöque quechea. Ipa inu tunale ini nönca elfecac tlames, hua caquestes quiename cuöc xutla tletzintle lalebes checöhuac. Hua noche *inu sösantle de tli mochejchihua tlöltecpactle tlames ca inu tletzintle. Hua tlöltecpactle hua noche sösantle tli giente oquechijque necö **nises. ¹¹ Bueno, tlö noche inu sösantle ejqueu tlames, entunses conbenierebe ma xenemecö ca yectelestle hua mabelestle de Deus. ¹² Hua ma xeccheacö hua ma xecnequecö lalebes ma ase inu tunale de Deus. Ipampa inu tunale ini nönca elfecac xutlas hua tlames, hua *inu sösantle de tli mochejchihua tlöltecpactle öteyas ipampa lalebes ara totunque iyes. ¹³ Pero tejua tecchea lo que tli Deus queprometierojque: tecchea yancuec elfecac hua yancuec tlöltecpactle, cöne uyes yectelestle.

¹⁴ Por inu, notlasojcöicnihua, por que nenquechea ini sösantle, xomodedicörucö para que cuöc hualiloas hua nemiechaxihuaqui, nenyisque ipa yecsiebelestle sin peleitos, hua ejqueu nuyejque quejtasque que amo nenquepea niontle sösantle de amo cuale noso de tlajtlacule. ¹⁵ Hua xomomacatacö cuenta de que Tlöcatzintle tiechchealo ca paciencia para ma tiehmöquexticö. Pues ejqueu nuyejque nemiechejcuelfe totlasojcöicni Pöblo. Pues yaja quejcueloa ca inu machestelestle tli Deus quemacalo, ¹⁶ hua ejqueu nuyejque noche quejcueloa icörtas. Hua ipa inu cörtas tlajtoa de nönca sösantle, mös ocseque sösantle tequeyo para öque casojcömates. Por inu es que seque tli amo quemajmate hua amo checateque cate de inneltoqueles, yejua case itlajtulhua hua quejtoa que quejtusneque ocseque sösantle. Pos ejqueu mismo quechihua ca ocseque teotlajtule tli tlajcuelulpanca. Ejqueu mixniempoloo yejua mismo.

¹⁷ Bueno, notlasojcöicnihua, ye nemiechantesipöro de nönca sösantle. Por inu xecpeacö cueröro majcamo nemiechbica incajcayöhuales de giente amo cualteque. Pos majcamo cana iye que nenbetzesque para ayecmo nenquesequirusque nemocuajpetzoytasque. ¹⁸ Cache xomobepöhuacö ipa tiefavur de toTlöcatzintle Jesucristo öque tiehmöquextilo, hua xetieixomatecö cache hua cache. Yejuatzi ma quepeacö yectieniebelestle öxö hua semejacac. Amén. Ma ejqueu iye.

* **3:6** Cuale nuyejque motradusirus: “ötzintle”. * **3:10** Cuale nuyejque motradusirus: “sitlalte tlamesque” (v. 10) hua: “sitlalte öteyasque” (v. 12). ** **3:10** Seque manuscritos quejtoa: “xutlas” noso “polebes”.

Cörta tli primiero oquejcuelo SAN JUAN

Yejuatzi öque necuitilo Tlajtule, öque nemoateca

¹ Nemiechpubelea de yejuatzi öque necuitilo Tlajtule, öque nemoateca hua tiechmacalo nemelestle. Pues yejuatzi ye iloac desde ca opie noche söstantle. Hua bel yejuatzi tetietiencajque. Tetieijtaque hua tetieyequejtaque, hua hasta tetiemötocaque. ² Es que yejuatzi öque nemoateca oneniextiluc, hua tejua tetieijtaque. Por inu tetlajtlajtoa de yejuatzi. Nemiechnunutza de yejuatzi öque nemoateca hua nochepa nemoas. Yejuatzi iloaya ca tieTajtzi, hua sötiepa oneniextiluc totzölö. ³ Tli otequejtaque hua tli otejcajque nemiechpubelea nemejua. Tecneque ma nemejua nuyejque ma xecpeacö sasie nemoyulo ca tejua, quiename tejua tecpea sasie toyulo ca toTajtzin Deus hua ca tieConietzi Jesucristo. ⁴ Tequejcueloa ini söstantle para que nemopöqueles de nemejua quiename de tejua ma momeyaquele.

⁵ Nemiechpubelea lo que tli yejuatzi otiechelfejque tejua. Yejuatzi oquejtojque que Deus iloac tlöbile, hua ca yejuatzi amo tli onca niontle tlajtlayohuaquelestle. ⁶ Tlö tequejtusque que tecpea sasie toyulo ca Deus pero tlö tecchijteneme inu söstantle amo cuale de tlajtlayohuaquelestle, tejistlacate. Amo teneme san quiene ca lo que tli melöhuac. ⁷ Pero tlö tejua tecchijteneme tlin cuale söstantle de tlöbile, quieme Deus seme quechihualo, tecpeasque sasie toyulo ca tocnihua. Hua tieyesojtzi Jesucristo tieConietzi tiechchepöhua de noche tlajtlacule. ⁸ Tlö tequejtusque que amo tetlajtlacul te cate, tocaycayöhua sie tejua. Amo tecpea lo que tlin melöhuac ipa toyulo. ⁹ Tlö tetieniextelisque totlajtlacul, yejuatzi iloac de confiönsa para tiechperdonörfisque totlajtlacul. Conbenierebe ma ejqueu tiechperdonörocö hua ma tiechchepöhuacö de noche tlin amo cuale. ¹⁰ Tlö tequejtusque que tejua ayec tetlajtlacoa, pos ca inu tequejtojtecate que amo melöhuac tli Deus quejtulo. Cuöc ejqueu tequejtoa icaca seguro que tietlajtultzi Deus amo tecpea pa toyulo.

2

Cristo tohua nequetzalo

¹ Notlasojcöpelhua, nemiechejcuelfea nönca cörta para amo xetlajtlacucö. Pero tlö canajyeca otlajtlaco, xequelnömequecö que Jesucristo tohua nequetzalo tieixtla Deus. Pos Cristo cuale tohua nequetzalus siendo que iloac yectec. ² Yejuatzi oquetlaxtlöjque totlajtlacul cuöc omecoac ipan corujtzi. Amo sa totlajtlacul de tejua oquetlaxtlöjque, tlöcamo intlajtlacul de noche tlöltecpactlöca. ³ Tlö tecchihua tli Deus tiechnahuatilo, entunes tecmajmate que tetieixomate de melöhuac. ⁴ Tlö canajyeca quejtus: “Naja netieixomate”, pero yaja amo quechihua tli Deus tiechnahuatilo, pues yaja icaca istlecatque. Amo quepea lo que tli melöhuac ipa iyulo. ⁵ Pero öque quechihua tli Deus tiechelfilo, pos ca yaja tietlasojteles Deus oquepex resultödo. Por ini nönca tejua tecmate que de melöhuac teneme tieca Deus: ⁶ öque quejtoa que nenteca tieca Deus, queconbenieroa ma neme töl quieme Cristo onemoaya.

Sente yancuec mandamiento

⁷ Notlasojcöicnihua, amo nemiechejcuelfea sente yancuec mandamiento, tlöcamo sie yaja tli nenquecactebitze desde ca opie. Pos inu mandamiento tli ye icsa nenquepea ica de inu mensöje de tlasojtelestle tli onenquecajque. ⁸ Pero inu mandamiento seme yancuec icaca mös nenquecactebitze por meyac tiempo. Pos nemejua nemotlasojtla de melöhuac san quiene ca Cristo otiechtlasojtlaluc. Nemotlasojtla porque inu tlöbile tli

melöhuac ye tlanixtea hua tlajtlayohuaquelestle cache mojcueneyte. ⁹ Tlō öque quejtus que tlōbile ye tlanixtea pa iyulo, pero quetlajyelejta icni, pos yaja turavea oc quepea tlajohuaquelestle ipa iyulo. ¹⁰ Tlō yeca quetlasojtla icni, quejtusneque que tlōbile ye tlanixtejteca pa iyulo. Amo tli onca para quechihualtis betzes ipan tlajtlacule. ¹¹ Pero tlō öque quetlajyelejta icni quejtusneque oc quepea tlajtlayohuaquelestle ipa iyulo. Pos yaja amo quemate tli quechijteneme. Ayecmo quemate tli Deus quenequihua ma quechihua porque quechijteneme tli amo cuale sösantle de tlajtlayohuaquelestle, hua por inu abele cuale quejta tli quechijteca.

¹² Nemiechtlajcuelfea, notlasojcöpelhua, porque necmate que Deus nemiechperdonörfejqe nemotlajtlacul porque Cristo omecoac por nemopampa. ¹³ Nemiechtlajcuelfea nemejua, nentötajte, porque necmate que ye nentieixomate yejuatzi öque ye iloac desde ca opie noche sösantle. Nemiechtlajcuelfea nemejua nenpelalacme porque necmate que nenquexexicojqe Amo Cuale Tlōcatl. Nemiechtlajcuelfe nemejua, nopelhua, porque necmate que ye nentieixomate toTajtzin Deus. ¹⁴ Nemiechtlajcuelfe nemejua nentötajte porque necmate que ye nentieixomate yejuatzi öque ye iloac desde ca opie. Nemiechtlajcuelfe nemejua nuyejqe nenpelalacme porque necmate que nenyulchecacteque. Tietlajtultzi Deus nenquepea pa nemoyulo, hua nenquexexicojqe Amo Cuale Tlōcatl.

¹⁵ Amo xecnequecö xeyecö de nönca tlöltecpactle. Nimpör amo xequeliebicö tli onca pan tlöltecpactle. Tlō canajyeca quetlasojtla ini nönca tlöltecpactle hua queneque iyes de nönca tlöltecpactle, quejtusneque que amo tietlasojtla toTajtzin Deus. ¹⁶ Pues ipa nönca tlöltecpactle mochihua ejqueyi: giente seme quetiemoa lo que tli queliebea innacayo. Yejua queliebea noche tli quejejtta. Mochajchamöhua porque quepea meyac sösantle. Noche inu amo yebitz de toTajtzin Deus, tlöcamo ica de tlöltecpactle. ¹⁷ Nönca tlöltecpactle tlames hua noche sösantle tli tlöltecpactlöca queliebea tlames. Pero öque quechijtas tietlanequeles Deus nochepa mocöhuas.

Öque icaca encuntra de Cristo

¹⁸ Nopelhua, ye tecate pa sölúltimo tiempo. Ye nenquecajqe que huölös inu tlöcatl tli iyes encuntra de Cristo. Pos ye ohuölajque meyactie tli cate encuntra de Cristo. Ca inu tecmate que totlanca sölúltimo tiempo. ¹⁹ Quiejquech tietlajyelejta Cristo pos ye omoxelojque de tejua. Pos de melöhuac amo sasié oyejyeya ca tejua porque tlō sasié oyejeyene ca tejua omocöhuane totlac. Pero siendo que omonencuaxelojque de tejua, niesteca que nochemeju amo sasié oyejyeya ca tejua. ²⁰ Pero nemejua amo ejqueu nenquechijtebitze. Cristo öque yectec iloac nemiechmacaque Espíritu Sönto, hua ejqueu nemonochtie nenquemate tlin melöhuac. ²¹ Amo nequejtus que amo nenquemate tlin melöhuac. Pos nemiechtlajcuelfejteca porque necmate que ye nenquemate tlin melöhuac. Nenquemate que sente istlacatelestle amo yebitz de yejuatzi öque iloac melöhuac. ²² Noche tlöca ejestlacate tli quejtoa que Jesús amo iloac Cristo hua que Deus amo tieixpejpenque para tiechmöquextisque. Öque ejqueu quejtoa, de porsí icaca encuntra de Cristo. Nimpör amo tierreconosieroa Deus Tajtle, nimpör amo tierreconosieroa tieConietzi Deus. ²³ Noche öque amo tierreconosieroa tieConietzi Deus, de porsí amo tiepea Deus quieme iTajtzi. Noche öque quejtoa que Jesús iloac tieConietzi Deus, nuyejqe tiepea Deus quieme iTajtzi. ²⁴ Hua nemejua, xecmalficö ipa nemoyulo inu sösantle tli nenquecactebitze desde que nemoneltocaque. Tlō ejqueu nenquechihuasque, entunses nenyisque sasié ca tieConietzi Deus hua sasié ca Deus Tajtle. ²⁵ Pos yaja ini nönca otiechprometierfejqe, que tiechmacasque nemelestle nochepa.

²⁶ Nemiechejcuelfea noche ini nönca para ma xecmatecö que seque queneque nemiechcaycayöhuasque. ²⁷ Nemejua nentiepea Espíritu Sönto öque Deus nemiechmacaque.

Pos amo nenquenesesitöroa ma öque nemiechmachte, pos yejuatzi tieEspíritu Deus nemiechmachtilo de noche söstantle. Hua noche tli nemiechmachtilo ica melöhuac, pos yejuatzi amo istlacatihua. Así es que seme xetietocacö Cristo quieme Espíritu Sönto nemiechmachtilo.

Tetiepelhua de Deus tecate

²⁸ Öxön quiema, notlasojcöpelhua, xetietocacö Cristo, para que ejqueu tecpeasque confiönsa cuöc yejuatzi hualbiloas, hua amo tepinöhuasque tieixtla cuöc axihuaqui. ²⁹ Nenquemate que yejuatzi yectec iloac. Pos nuyejque nenquemate que noche queijquech moportöroa yectequé, moportöroa ejqueu porque cate tiepelhua de Deus.

3

¹ Xomomacacö cuienta quiene ca bel tiechtlasojtlalo toTajtzin Deus. Tecasojcömate que yejuatzi tönto lalebes tiechtlasojtlalo porque tiechmacalo deriecho de teyesque tetiepelhua. Pos de melöhuac ejqueu tecate. Por inu giente de nönca tlöltecpactle abele cajasojcömate quiene tecate, pos nuyejque abele ocasojcömatque quiene iloaya Jesús. ² Notlasojcöicnihua, ye tecate tetiepelhua de Deus. Ayemo tecmate quiene ca teyesque ompa elfecac. Pero inun quiema tecmate que cuöc Cristo hualiloas teyesque quiename yejuatzi, porque ixmantete tetieijasque san quiene ca iloac. ³ Cuöc öque quelnömeque que iyes san quiene ca iloac Cristo, motelchihuas nemes ipa yecnemelestle, porque quemate que Jesús yectec iloac.

⁴ Öque beletes tlajtlacojteneme amo quechihua lo que tli quejtoa tieley de Deus. Pos cuöc tlajtlacoa, tlajtlacoa cuntra tieley de Deus. ⁵ Nemejua nenquemate que Cristo ohualbiloac ipan tlöltecpactle para tiechquextelesque totlajtlacul. Nenquemate que yejuatzi amo tlajtlacultec iloac. ⁶ Así es que öque beletes tietocateneme Jesús amo tlajtlacojteneme. Pero noche öque tlajtlacojteneme ayemo otieyejtac Jesús nimpör amo tieixomate. ⁷ Notlasojcöpelhua, majcamo yeca nemiechcajcajöhua. Noche queijquech quechihua tlin cuale, quechihua ejqueu porque quepea yectec iyulo quieme Jesús quepealo yectec tieyulo. ⁸ Pero öque tlajtlacojteneme icaca de Diöblo. Pos inu Diöblo tlajtlacojtebitz desde ca opie. Yaja ica tieConietzi Deus ohualiloac miero para quexexetunisque noche itlachihual Diöblo. ⁹ Öque icaca tieconie de Deus ayecmo betzta pa tlajtlacule, porque ye quepea nemelestle de Deus. Pues quepea ijtec lo que tli Deus quemacaque, tli quechihualtea ma iye tieconie Deus hua ma ayecmo betzta pa tlajtlacule. ¹⁰ De inu manera tejua tecmate cötlejua tiepelhua Deus hua cötlejua ipelhua Diöblo. Tecmate que öque quechijteneme tlin amo cuale noso amo quetlasojtla icni, abele iyes de Deus.

Xomotlasojtlacö entre nemejua

¹¹ Pos ye nenquecactebitze desde que nemoneltocaque que ma totlasojtlacö sie tlöcatl ca ocsie tlöcatl. ¹² Majcamo tecchihuacö quieme Caín oquechi. Caín omotiemöcte ca Amo Cuale Tlöcatl, hua oquemecte icni. ¿Tlica oquemecte? Caín oquemecte porque Caín quechihuaya tlin amo cuale hua icni quechihuaya tlin cuale. ¹³ Amo xectietzöbicö noso, nocnihua, cuöc giente de nönca tlöltecpactle nemiechtlayjelejta. ¹⁴ Tejua quieme temimejque tenemeya. Öxö ye tecate pa nemelestle nochepa. Tecmate que ompau tecate porque tequentlasojtla tocnihua. Öque amo tietlasojtla icaca ipa mequelestle turavea. ¹⁵ Öque quetlayjelejta icni icaca tlamectiöne ipa iyulo. Nenquemate que sente tlamectiöne amo quepea nemelestle nochepa ipa iyulo. ¹⁶ Tecmate tlinenuju tlasojtelestle. Tecmate porque Cristo otiechtlasojtlaque hua omecoac por tejua. Pos öxö tejua tiechconbenieroa ma tequentlasojtlacö tocnihua hua ma tequenpaliebicö mös cana por inu temejmequesque. ¹⁷ Por ejemplo, sente tlöcatl quepea söstantle hua amo tli quepoloa. Quemate que icni quechibelea fölta. Tlö amo queneque quexelfis niontle icni,

quejtusneque que de melöhuac amo quepea tlasojtelestle de Deus. ¹⁸ Notlasojcöpelhua, majcamo sa tequejtucö que tequentlasojtla tocnihua, tlöcamo itech totlachihual ma niese que de melöhuac tequentlasojtla.

Tecpea confiönsa ca Deus

¹⁹ De inu manera tecmatesque que tectocatecate lo que tli melöhuac, hua toyulsiebisque tieixtla Deus. ²⁰ Cuöc amo tecmate cox cuale toyulo ca Deus noso cox amo cuale, ma tequelnömequécö que yejuatzi quematihua quiene ica toyulo. Quematihua cache cuale que tejua porque quematihua noche söstantle. ²¹ Hua ca ocsie, notlasojcöicnihua, cuöc tecmate que toyulo cuale ca Deus, tecpea confiönsa ca Deus. ²² Hua yejuatzi tiechmacasque noche tli tetietlajtlanea, porque tecchihua tli tiechmandöruro ma tecchihuacö. Tecchihua tli tiepöquelesmaca. ²³ Yejuatzi tiechmandöruro ma toneltocacö tietucöyupantzinco tieConietzi Jesucristo hua ma totlasojtlacö sie tlöcatl ca ocsie tlöcatl. Ejqueu tiechmandöröjque. ²⁴ Öque quechihua tli Deus tiechmandöruro icaca tieca yejuatzi hua yejuatzi nemoa pa iyulo. Deus tiechmacaque Espíritu Sönto, hua por inu tecmate que Deus nemoa pa toyulo.

4

TieEspíritu Deus hua iespíritu de öque icaca encuentra de Cristo

¹ Notlasojcöicnihua, amo xomoneltocacö sampor öque quejtoa que tlanunutza por tieEspíritu de Deus. Cache xequenprobörucö para abier tlö de melöhuac tlanunutza por tieEspíritu Deus noso por ocsente espíritu. Pos meyactie tlayulepantejque istlaceneme tlanunutzteneme ipan tlöltecpactle, tli yejua quejtoa que tlanunutza de pörte de Deus. ² Cuale nenquematesque tlö yeca tiepea tieEspíritu Deus pa iyulo noso amo. Tlö quejtoa que Jesús iloac Cristo öque Deus tieixpejpenque, hua que onechihualuc tlöcatl, yaja tiepea tieEspíritu Deus ipa iyulo de melöhuac. ³ Tlö canajyecaca amo tiereconosieroa Jesús, quejtusneque que yaja amo tlanunutza por tieEspíritu Deus, tlöcamo por ocsente espíritu. Pos yaja inu espíritu de öque icaca encuentra de Cristo. Ye nenquecajque que huölös öque iyes encuentra de Cristo. Pos yeca. Ye oncönca necö ipan tlöltecpactle. ⁴ Pero nemejua, notlasojcöpelhua, nencate nentiepelhua de Deus. Nemejua ye nenquenxexicojque inu giente. Pos Deus, öque iloac ca nemejua, cache checactec iloac que Amo Cuale Tlöcatl, öque icaca ca tlöltecpactlöca. ⁵ Niecate istlaceneme cate de nönca tlöltecpactle de amo cuale. Por inu tlajtlajtoa de söstantle de amo cuale. Hua por inu tlöltecpactlöca quepea gusto quenjejcaque. ⁶ Pero tejua de Deus tecate. Quiejquech tieixomate Deus tiechyejcaque tli tequejtoa. Quiejquech amo cate de Deus, amo tiechchebelea cöso. De inu manera tecmate cötlejua tiepea Espíritu Sönto öque tiechmachtilo tlin melöhuac, hua nuyejque tecmate cötlejua quepea inu espíritu amo cuale tli quencajcajyöhua.

Deus tlasojtlane iloac

⁷ Nöcnihua, ma totlasojtlacö. Tlasojtelestle yebitz de Deus, hua cuöc öque quetlasojtla icni niesteca que yaja icaca tieconie Deus hua que tieixomate Deus. ⁸ Tlö canajyecaca amo tietlasojtla quejtusneque que amo tieixomate Deus, pos Deus tlasojtlane iloac. ⁹ Deus otiechejtetejque quiene ca tiechtlasojtlalo cuöc otiehualtitlanuc tiesenteConietzi pan tlöltecpactle. Otiehualtitlanuc para tejua ma tecpeacö nemelestle tietech yejuatzi. ¹⁰ Tejua amo tetietlasojtlaque Deus cachto, tlöcamo yejuatzi cachto otiechtlasojtlaluc tejua. Pos otiehualtitlanuc tieConietzi para quetlaxtlöhualuco totlajtlacul ca tiemequeles. Yaja ica öxö tecmate tlinenuju tlasojtelestle. ¹¹ Notlasojcöicnihua, quieme Deus tiechtlasojtlaluc tönto ejqueu, conbenierebe ma tejua ma totlasojtlacö nuyejque. ¹² Nion sente tlöcatl ayec otieyejtac Deus. Pero tlö totlasojtla tecmate por inu que Deus nemoateca pa toyulo, hua tietlasojteles oquepex iresultödo ipa toyulo.

¹³ Deus tiechmacaque tieEspíritu pa toyulo. Ca inu tecmate que tejua tecate ca Deus, hua que yejuatzi nemoateca pa toyulo. ¹⁴ Tejua tetieijtaque Jesucristo. Tequen-pubelea giente quiene ca toTajtzin Deus tiehualtitlanuc tieConietzi pan tlöltecpactle ma quenmöquexticö tlöca de ipa intlajtlacul. ¹⁵ Cuöc öque quejtoa ca noche sentetl iyulo que Jesús iloac tieConietzi Deus quejtusneque que Deus nemoateca pa iyulo, hua yaja icaca tieca Deus. ¹⁶ Tejua tecmate de melöhuac que Deus tiechtlasojtlalo, hua toneltoca ca tietlasojteles.

Yejuatzi tlasojtlane iloac. Tlö quejtus öque seme tlasojtlane icaca pos ca inu niesteca que yaja seme icaca ca Deus, hua que Deus nemoateca pa iyulo yaja. ¹⁷ Tietlasojteles Deus ye oquepex iresultödo ca tejua. Por inu amo tomajtisque pa inun tunale cuöc Deus quenjuscörusque innochie giente. Amo tomajtisque porque san quiene ca Jesús iloac ejqueu tecate tejua mientras oncö teneme pan tlöltecpactle. ¹⁸ Cuöc öque quepea tlasojtelestle tli intiero cuale, amo tli quemajtea. Pos cuöc de melöhuac quepea tlasojtelestle, abele quepeas mabelestle. Cuöc öque turavea majcömeque, niesteca que inu tlasojtelestle tli intiero cuale ayemo oquepex iresultödo ca yaja. ¹⁹ Tejua tecpea tlasojtelestle porque Deus cachtö tiechtlasojtlaluc tejua. ²⁰ Tlö canajyeca quejtoa: “Naja netietlasojtla Deus”, pero al mismo tiempo quetlajyelejta icni, pos istlacate. Tlö amo quetlasojtla icni tli quetzteca, abele tietlasojtla Deus, öque nimpör amo tieyejta. ²¹ Hua yaja ini mandamiento tiehcöbelejtijque, que öque quejtoa que tietlasojtla Deus ma quetlasojtla icni nuyejque.

5

Por toneltoqueles texexicoa tlöltecpactle

¹ Jesús iloac Cristo, öque Deus tieixpejpenque. Noche öque moneltoca inu icaca tieconie Deus. Quiejquech tietlasojtla toTajtzin Deus, *quentlasojtla nuyejque tiepelhua. ² Cuöc tetietlasojtla Deus, hua tecchihua tli tiechmandöruro, entunses tecmate que tequentlasojtla tiepelhua nuyejque. ³ Tlö tetietlasojtla Deus entunses tecchihuasque tli tiechmandöruro. Amo tequeyo para tecchihuasque lo que tli tiechmandöruro, ⁴ pos mös giente hua söstantle de ini nönca tlöltecpactle momagatecate ca tejua, pero tejua ye otequenxexicojque, porque tecpea nemelestle tli tiechmacaque Deus. Pos innochie tli quepea inu nemelestle ye quexexicojque tlöltecpactle. Hua ¿quiene texexicoa tlöltecpactle? Pos por tonelto. ⁵ Pos öque moneltoca que Jesús iloac tieConietzi Deus, solamente yaja quexexicoa tlöltecpactle.

Deus tiechelfilo de Cristo

⁶ Jesucristo ohualiloac pan tlöltecpactle. Onecuötiequiluc ca ötzintle. Oquenunuquiluc tieyesojtzi cuöc omecoac pa corujtzi. Amo solamente onecuötiequiluc tlöcamo oquenunuquiluc tieyesojtzi nuyejque. Ejqueu tiechelfilo Espíritu Sönto öque iloac melöhuac. ⁷ Pos cate yeteme tli tiechelfea que Jesús iloac Cristo öque Deus tieixpejpenque. ⁸ Yejuatzi Espíritu Sönto tiechelfilo ejqueyi, hua nuyejque inu ötzintle de tiecuötiequeles, hua tieyesojtzi nuyejque quiename tiechelfea que iloac Cristo. Inu yeteme cate de acuerdo entre yejua. ⁹ Tejua tecselea tli quejtoa tlöca cuöc tiechpubelea canajyetla. Pos tlö ejqueu, ma tecselicö tli Deus tiechelfilo, porque cache balierebe tli quejtulo yejuatzi. Hua yejuatzi tiechelfilo que Jesús iloac tieConietzi. ¹⁰ Öque moneltoca tieca tieConietzi Deus quepea ipa iyulo tli quelfejteca que ica melöhuac tli Deus oquejtojque. Öque amo moneltoca tli Deus oquejtojque quejtojteca que Deus istlcatihua cuöc quejtulo que Jesús iloac tieConietzi. Pos yaja inu tli Deus tiechelfilo, hua yaja amo moneltoca. ¹¹ Pos yaja ini nönca tiechelfilo Deus, que tiechmacalo nemelestle nochepa, hua que

* 5:1 Cuale nuyejque motradusirus “tietlasojtla nuyejque tieConietzi”.

inu nemelestle tecpeasque tietech tieConietzi. ¹² Öque tiepea tieConietzi Deus nuyejqe quepea nemelestle nochepa. Öque amo tiepea tieCönietzi Deus amo quepea nemelestle nochepa.

Quiene tecmatesque que tecpea nemelestle nochepa

¹³ Nemejua nemoneltoca tietucöyupantzinco tieConietzi Deus. Nemiechejcuelfea nönca cörta para que nenquematesque que nenquepea nemelestle nochepa. ¹⁴ Tecpea confönsa ca Deus porque tecmate que tlö tetietlajtlanelisque canajyetla san quiene ca tietlanequeles yejuatzi, tiechtiencaquihua. ¹⁵ Siendo que tecmate que Deus tiechtiencaquihua de noche tli tetietlajtlanelea, nuyejqe tecmate que ye otiechmacaque tli tetietlajtlanelejque.

¹⁶ Tlö canajyeca quejta icni tlajtlacojteca pero amo de manera que meques, ma motlajtlötlajte por yaja. Entunses Deus quemacasque nemelestle, tlö amo otlajtlaco de manera para meques. Onca tlajtlacule que cuöc tecchihua temequesque, hua amo nequejtojteca ma motlajtlötlajte por tli ejqueu tlajtlacoa. ¹⁷ Noche tli amo cuale tlachihuale icaca tlajtlacule. Pero onca tlajtlacule tli tecchihua que amo icaca para temequesque.

¹⁸ Tecmate que öque ica de tiepelhua Deus amo betzta pa tlajtlacule, porque Jesús, öque nuyejqe iloac tieConietzi Deus, quixutilo. Ejqueu Amo Cuale Tlöcatl abele tli quechibelis. ¹⁹ Tecmate que tejua tecate de Deus, hua que noche tlöltecpactle icaca imöpa Amo Cuale Tlöcatl. ²⁰ Tecmate nuyejqe que tieConietzi Deus ohualiloac. Yejuatzi otiechmacaque asojcömatelestle para tetieixomatesque yejuatzi öque iloac melöhuac. Sasie tecate ca yejuatzi öque iloac melöhuac, hua ca tieConietzi Jesucristo. Amo onca ocsente Deus ademös de toDeus öque iloac Deus de melöhuac. Tietech yejuatzi onca nemelestle nochepa. ²¹ Notlasojcöpelhua, amo xequenteochihuacö ixniehualojme nimpor niontle tli amo de melöhuac Deus.

Cörta tli ca ujpa oquejcuero SAN JUAN

¹ Naja, que ye nebiebentzi, temetzejcuelfea ini cörta para taja, sohuatl öque Deus metzixpejpenque. Nuyejque mopelhua nequemejcuelfea. Nemiechtlasojtla de melöhuac, hua amo sa naja nemiechtlasojtla, tlöcamo nuyejque innochtie tli quemajmate lo que tli melöhuac. ² Tejua nemiechtlasojtla porque tecpea lo que tli melöhuac ipa toyulo, hua seme tecpextasque. ³ ToTajtzin Deus hua tieConietzi Jesucristo tiechmacasque tieinfavur hua tiechicnuejtasque hua tiechchihualtisque ma toyulsiebejtacö. Ejqueu quechihuasque porque tecmate lo que tlin melöhuac hua totlasojtla.

Tlasojtelestle hua lo que tli melöhuac

⁴ Lalebes onepajpöc cuöc onecmat que seque de mopelhua quechihua lo que tli quejtoa tietlajtultzi Deus tli melöhuac. Pos ejqueu toTajtzin Deus tiechmandöröjque ma tecchihuacö. ⁵ Öxö, necpea tli temetzelfis, sohuatl. Amo sente yancuec mandamiento temetzelfis, tlöcamo inu mandamiento tli ye tecmate desde ca opie cuöc toneltocaque, que ma totlasojtlacö tonochtie. ⁶ Cuöc de melöhuac tecpejpea tlasojtelestle, seme techihua noche tli Deus tiechmandöruro. Hua tiemandamiento tli tiechmandörurutebitz desde que toneltocaque icaca ini nönca: que ma seme totlasojtlacö. ⁷ Pos ca nobeyo onca giente tli tlacajcayöjteneme. Yejua quejtoa que cuöc Jesús ohualiloac amo oquepexque cuierpo quieme tejua. Öque ejqueu quejtoa tlacajcayöhuane icaca hua icaca encuntra de Cristo. ⁸ Xecpeacö cueröro majcamo nemiechcaycayöhuacö hua cana por inu nenquepolusque inu premio por que nentietequepanoa Deus. Xecpeacö cueröro para cuale nencönasque noche tli Deus quenequihua nemiechmacasque. ⁹ Tlö canajyeca quietoca ocsente tlamachtelestle hua ayecmo quietoca tlamachtelestle de Cristo, quejtusneque que amo tiepea Deus pa iyulo. Tlö öque quietoca inu tlamachtelestle, quejtusneque que tiepea toTajtzin Deus hua nuyejque tiepea tieConietzi Deus ipa iyulo. ¹⁰ Tlö canajyeca nemiechtlajpaluti hua amo nemiechmachtis de ini tlamachtelestle tlin melöhuac, amo xectlöcaejtacö inu tlöcatl pa nemochö, nimpör amo xectlajpalucö. ¹¹ Porque öque quietlajpaloa quejtusneque que ica de acuerdo ca inu söstantle amo cuale tli yaja quechihua.

Tlajpalulestle

¹² Necpea meyac tli nemiechelfis, pero amo necneque nequejcuulus. Necpensöroa nemiechejtati hua tonunutzasque para ejqueu tecpeasque meyac pöquelestle. ¹³ Ipelhua de mocnisohuatl öque Deus quixpejpenque metztlajpaloa.

Cörta tli ca yexpa oquejcuelo SAN JUAN

¹ Naja, que ye nebiebentzi, temetzejcuelfea ini cörta para taja, Gayo, öque temetztlaso-jtla de melöhuac.

² Notlasojcöicni, notlajtlötlajtea por taja. Necneque Deus ma metzmacacö para teyes cuale de noche söstantle. Necneque amo xomococo cache necneque xeye cuale de mocuierpo, san quiene ca teca cuale de moölma. ³ Seque de tocnihua ye hualmocuejque de ca motlac. Bel lalebes onepajpöc cuöc oniechelfejque que taja tecchijteca tli melöhuac, hua teneme de acuierto ca lo que tli ica melöhuac. ⁴ Amo onca ocsente pöquelestle cache bieye para naja que ma nejcaque que nemejua tli nencate quiename nennopelhua, que nenneme de acuierto ca lo que tli melöhuac.

Tli tlapaliebea hua tli mophoneroa

⁵ Notlasojcöicni, tecchijteca sente tequetl bel cuale cuöc tequenpaliebea tocnihua mös seque amo tequenmixomate porque bitze de ocsie löro ca motlac. ⁶ Cuöc tosejsentlölejque, seque tli opanuque ca taja otiechpubelejque quiene tequenpaliebe ca meyac tlasojtelestle. Pos ica cuale ma ejqueu xequenpaliebe ca noche tli quenchebelea fölta para quesequirusque inojfe. Xequenpaliebe noso san quiene ca Deus quecualejtalo. ⁷ Pos yejua oquejquisque para quenpubelisque giente de Jesucristo. Amo tlajtlanque ma quenpaliebicö inu giente tli amo de tejua. ⁸ Por inu tonochtie tli tetiepelhua de Deus ma tequenpaliebicö yejua. De inu manera tetejtequete ca yejua cuöc yejua tlamachtea de lo que tli melöhuac.

⁹ Onequejcuelo sente cörta ca tocnihua, pero Diótrfes queneque mobieyemates entre yejua, hua amo queneque tiechtlöcayejtas. ¹⁰ Por inu cuöc neyös ompa nectlalnömetis Diótrfes de tli quechijtebitz. Pues yaja istlacatlajtoa cuntra tejua hua quepoa söstantle sie tiro amo cuale. Pero amo sa inu, tlöcamo nuyejque amo quentlöcayejta tocnihua tli onajase ompa. Pos Diótrfes quentlajtulmaca ocseque tocnihua ompa para majcamo quenselicö tocnihua tli onase ca ompa. Hua innochtie tli queneque quenselisque, yaja quentojtoca para ma ayecmo yecö de nemogrupa. ¹¹ Pos taja, notlasojcöicni, amo xecchihua tlin amo cuale quieme giente tli amo cualteque quechihua. Cache xecchihua tlin cuale quieme quechihua giente tlin cualteque. Öque quechihua tlin cuale icaca de Deus. Öque quechihua tlin amo cuale amo tieixomate Deus. ¹² Pero innochtie queyectieniehua Demetrio hua sa nima niese que yaja neme de acuierto ca lo que tlin melöhuac. Pos tejua nuyejque tecyectieniejtecate hua nenquemate que lo que tli tejua tequejtoa icaca melöhuac.

¹³ Necpeaya meyac tli temetzelfisquea, pero amo necneque nequejcuelus noche inu, ¹⁴ porque necpensöroa nima neyös temetzejtati hua tonunutzasque. ¹⁵ Ma xecpea yulsiebestle. Toamigos necö metztlajpaloa. Xeniechentlajpalfe cara sente de toamigos ompa, por favur.

Sente cörta tli oquejcuelo SAN JUDAS

¹ Naja neJudas, que neca netietlatequepano de Jesucristo, hua neca neicni de Jacobo. Nemiechejcuelfea ini nönca cörta para nemejua öque Deus nemiechnutzque, öque yejuatzi Deus Tajtle nemiechtlasojtlalo hua nemiechmalfilo para Jesucristo. ² Ma momeyaquelicö ca nemejua icnuejtelestle, hua neyulsiebelestle, hua tlasojtelestle.

Deus quencuntenörusque maestros istlacateque

³ Notlasojcöicnihua, necpensöro nemiechejcuelfis sente cörta acerca de quiene Deus tiechmöquextilo tejua ca tiehua nemejua. Hua necuejcuesebeya lalebes para ejqueu nemiechejcuelfisquea, pero sötiepa onecmachele ipa noyulo que cache cuale conbenierebe nemiechejcuelfis ocsente söstantle. Por inu nemiechejcuelfejteca para nemiechanimörus para ma xecmalfejtacö de lo que tli tejua toneltoca. Sa sajpa Deus otiechmöctejque ini söstantle para tejua tli teyecteque. Xomocuaajpetzucö encuentra de niecate tli queneque quexetunisque inu söstantle. ⁴ Pos seque ye ocalajque nemotzölö sa ichtacajtzi. Ye omojcuelo de ini nöncate tlöca desde ca ye niepa, de que mocuntenörusque ejqueyi quiename tequejtasque. Yejua amo quechihua cöso de Deus. Quepatla tiefavur de Deus, pues yejua quejtoa que cuale öque nemes ipa bisio, hua que mös ejqueu nemes pero Deus seme quemacasque tiefavur. Yejua tienegöroa yejuatzi Jesucristo, öque solamente yejuatzi iloac toTiecojtzi hua toTlöcatzintle.

⁵ Pero necneque nemiechtalnömectis, mös ye onenquecajque noche ini nöncate söstantle ipa nieca tiempo. Pero xequelnömequecö quiene Jesús oquenmöquextejque inu giente hua oquenquextejque de inu tlöle de Egipto, pero sötiepa oquenpojpolojque inu niecate tli amo omoneltocaque. ⁶ Ejqueu nuyejque oyeya öngeles tli amo omocöjque ipa inteque cache quecöjtiejque inchö hua inlocör tli quenconbenieroöya. Deus quenpealuteca yejua ipa tlajtlayohuaquelestle, cöne ilpetecate ca carienajte tli ayec quetlatzcotunasque. Ompa mocöhwasque hasta cuöc Deus quenjuscörusque ipa inu bieye tunale. ⁷ Pos nuyejque ejqueu giente de inu ciudades de Sodoma hua Gomorra, hua de inu ocseque ciudades tli intlac oyejyeya, ejqueu nuyejque otlajtlacojque ca sohuame tli amo insohuöhua, hua hasta moliebejtenemeya para mopeasque entre yejua mismo tlöca. Hua yejua ye mocöhua quiename sente ejjemplo, pos impa onhuöla inu castigo de tletzintle nochepa.

⁸ Pero ejqueu mismo quechihua ini nönca giente tli calactecate nemotzölö. Pos *sa quecojcochtiemectecate, hua ejqueu quepensöroa que cuale mopetzonelusque incuierpo ca tlajtlacule, hua que cuale amo pa quejtasque tli quepejpea autoridad, hua cuale quenpöpöcasque tli quepejpea checöhualestle hua chamöhualestle. ⁹ Pero inu arcöngel Miguel, mös icaca capetö de noche ocseque öngeles, pero cuöc momagaya ica Diöblo, hua mixcomacataya de öquenu de inehua quebicas icuierpo de Moisés, pues yaja amo matreviro quepöpöcas noso quecuntenörus. Cache cuale sa oquejto: “Ma metzajajuacö Tlöcatzintle”. ¹⁰ Pero ini nöncate giente quepöpöca tli söstantle amo quemajmate. Hua cate quiename yulcöme que mös abele casojcömate, pero seque söstantle quemate sin que yejua amo momaca cuienta. Pos ejqueu yejua nuyejque casojcömate seque söstantle. Hua itech inu mismo söstantle yejua mixniempolaa.

¹¹ ¡Porubejte de yejua! Pos yejua quetocaque inu ojtle de Caín. Hua para quetlönisque tomi omodedicörojque mocajcayöhuasque quiename oquechi Balaam. Hua quieme inu Coré otlajtlajto encuentra de Moisés hua por inu omec, ejqueu yejua nuyejque

* **1:8** Cuale nuyejque motradusirus: “quejtoa que Deus quemejtetejque ca cochtiemequelestle que cuale mopetzonelusque”.

mejmequesque. ¹² Yejua mocajcalactea para tlacuösque nemotzölö ipa inu tlacuale de tlasojtelestle tli nenquecua. Tlaperjudicöroa quiename tietebiebentzetzi tli mojoyöna ijtec lamör, que cuöc pano börcos impa, quenxexetunea börcos, ipampa amo nejniese. Cate quiename calnielojpexque que amo pejpinohua que sa yejua tlacuajtasque mös que incalnielöjua amo quentlacuajcualtea. Cate quiename sente mextle tli amo quebicatz queyabetl, que cuöc yebitz yejyecatl nima quebica. Cate quiename cuajme tli amo quetiemaca infruto mösque ye tiempo para quetiemacasque. Cate cuajme tli ye hua-jhuöjque hua ye quencojcopinasque ca noche innelhuayo. ¹³ Cate quiename ötzintle ipa lamör que cuöc majcoque lalebes motlapachoa ca ipuposunale petzoneltec. Pos ejqueu mismo yejua motlapachoa ca pinöhuallestle por tli quechihua. Cate quiename sitlalte tli oquisque de inlocör, pues para yejua Deus quepreparörojque inu tlajtlayohuaquelestle hua tlanextecume nochepa.

¹⁴ Pos nuyejque para ini nöncate tlöca otlayulepante inu Enoc, öque oyeya pan checume locör de tobiebetcöhua tli oyejyeya desde ipiejyo Adán. Pos yaja oquemelfe ejqueyi: “Onequejtac quiene ohualiloac Tlöcatzintle ca meyactie miles de tieyecteque. ¹⁵ Hualiloac para quenjuscörusque hua quencastecörusque innochtie giente, hua quencuntenörusque innochtie giente que amo quechihua cöso de Deus. Quencuntenörusque por noche inu söstantle tli oquechijque encuntra de Deus por que amo tiechibeliöya cöso. Quencuntenörusque noche inu tlajtlaculteque que amo tiechibelea cöso por noche inu tlajtulme checöjque tli oquejtojque incuntra de yejuatzi”. ¹⁶ Ini nöncate giente cate tiechecuaejtööneme, que seme moquejöroa de lo que tli quenpasöroa. Yejua sa quechijteneme lo que tli quecualajta, hua tlajtlajtojteneme ca tlajtulme bejbeye hua chajchamöjque. Yejua cache quenrespetöroa tli cate ricojte noso cache importöntes, pues quetiemoa quiene quetlönesque canajyetla.

Ma tecpeacö cueröro de ini giente

¹⁷ Pero nemejua, notlasojcöicnihua, xequelnömequecö de inu tlajtulme tli tietlateotitlanhua de toTlöcatzintle Jesucristo oquejtojque antes de que omochihuaco. ¹⁸ Pos yejua nemiechelfeque: “Ipa sölütimo tiempo huölösque giente moburlöroöneme, tli quechijtenemesque sa quiene quecualajta, pos amo quechihuasque cöso de Deus”. ¹⁹ Yejua ini nöncate nemiechnencuaxeloa para ayecmo nenyisque de acuerdo nemonochtie. Yejua sa quetoca söstantle de nöncanemelestle; amo quepejpea tieEspíritu de Deus.

²⁰ Pero nemejua, notlasojcöicnihua, cache xomobepöhuacö ipa inu söstantle yectec tli toneltoca. Xomotlötlajtejtacö por inu beletelestle tli Espiritu Sönto nemiechmacasque. ²¹ Hua xenentacö ipa tietlasojteles Deus. Xecchixtacö inu tiempo cuöc toTlöcatzintle Jesucristo tiechpililus icnuejtelestle, hua ejqueu tecpeasque nemelestle nochepa.

²² Hua seque giente, quiejquech moyulcuiecuectecate, xequenpaliebicö ca icnuejtelestle. ²³ Ocseque xequenmöquexticö, quiename cuöc öque quequextejtebetze ocseite de ijtec tletzintle. Hua ocseque xequenpaliebicö ca icnuejtelestle, pero nuyejque ca mabelestle. Xectlajyejtacö inu tlajtlacule tli quenmajmö por que innemeles amo cualtec oyeya. Ma nemiechtlajyelte inu tlajtlacule quiename cuöc nemiechtlajyeltea sente tlaquiemetl petzoneltec hua tzojyoc.

Deus ma quepeacö chamöhuallestle

²⁴ Öxö, yejuatzi öque cuale nemiechmalfisque para que amo nenbetzesque ipa tlajtlacule, hua cuale nemiechtlölisque tieixtla yejuatzi ipa tietlaniexteles sin que nenquepeasque niontle de amo cuale tlöcamo cache nenquepeasque bieye pöquelestle; ²⁵ yejuatzi toTiemöquextejcötzi öque solamente yejuatzi iloac Deus, ma quepeacö chamöhuallestle por medio de Jesucristo toTlöcatzintle, hua mabelestle, hua tlajtojcolestle hua checöhuallestle, ipa noche xebetl tli ye opanuc, hua öxö, hua nochepa. Amén. Ma ejqueu iye.

APOCALIPSIS

Jesucristo oquejtetejque ini sösantle ca Xohuö

¹ Nönca ömatl tlajtlajtoa de meyac sösantle tli ayemo nieseya, pero Jesucristo ye oquepanquextejque. Deus tiemacuc ini tlamachestelestle, para que yejuatzi Jesucristo ma quemachesticö ca tietlatequepanojua. Noche ini sösantle isejco pasörebes. Hua yejuatzi quetitlanque tieöngel ma quemacheste ca tietlatequepano Xohuö. ² Xohuö caseguröroa noche sösantle de lo que tli oquejtac de lo que tli quejtoa tietlajtultzi Deus, hua de lo que tli Jesucristo oquepujque.

³ Cuale icnupel de öque quetlajtultea nöncate tlajtulte de tli pasörebes, hua nuyejque cuale imicnupel de innochtie tli quecaque hua quechihua noche tli tlajcuelulpanca necö. Pos ye aseteca tunale.

Xohuö oquemejcuelfe checume grupos de creyentes

⁴⁻⁵ Naja neXohuö. Nemiechejcuelfea nemejua tli nencreyentes de checume grupos ipa Asia. Yejuatzi öque iloac hua iloaya hua *iloas, hua yejuantzetzi checume Espíritus tli ijiloac ompa elfecac ixtla tietrono Deus, hua yejuatzi Jesucristo, öque seme quejtulo tli melöhuac, hua cachtö de noche ocseque oyulebihuac de intzölö mimejque, hua tlamandöruro impa noche reyes de tlöltecpactle, yejuantzetzi ma nemiechmomeyaquelelicö tieinfavur hua neyulsiebelestle.

Yejuatzi Jesucristo tiechtlasojtlalo hua tiechtojtönque de totlajtlacul cuöc oquis tieyesojtzi ipan coruscua betl, ⁶ hua tiechtlölejque entre tiegiente para ma tetieneltocacö, hua ma teyecö tetieteopexcötzetzihua de tieTajtzi Deus. Por inu, ma seme tetiechamöhuacö Cristo hua ma tetiepilicö respieto nochepa porque yejuatzi toTlajtoöne iloac. Amén. Ejqueu icaca.

⁷ Xequajtacö. Yejuatzi hualiloas intzölö mextle, hua noche giente tiejtasque, hua nuyejque tiejtasque niecate tli tiecalövösmingue, hua noche gigantes de tlöltecpactle chojchucasque por yejuatzi. Amén. Ejqueu iyese.

⁸ “Naja neca *neAlfa hua neOmega”. Ejqueu quejtulo toTlöcatzintle Deus, öque iloac, hua iloaya, hua **iloas, öque quepealo noche checöhualestle.

Xohuö otieyjtac Cristo

⁹ Naja neXohuö hua nenemocni de nemejua, hua naja nuyejque niechtepotztoca por tiepampa Cristo, quiename nemejua nuyejque nemiechtepotztoca. Hua naja quiename nemejua seme necchea que sie tunale teyesque ompa cöne Deus tlamandöruruteca. Naja neyeya pa sente tlöltojpole ijtec lamör que itucö Patmo. Ompa oneyeya ipampa naja netlajtlajtoöya de tietlajtultzi Deus hua de tli oquejtojque Jesús. ¹⁰ Oyeya sie rominco. Necmachele quieme inu Espiritu de Deus niechejtetejque, hua onejca ca nocuetlapa sente tlajtule checöhuac quieme tlapitzale. Niechelfiöya:

¹¹ —Lo que tli tequejtas xequajcuelo, hua xectitlane tli tequejcuclus ca inu niecate checume grupos de creyentes; tequejtusque, ca inu grupos tli cate pa Efeso, Esmirna, Pérgamo, Tiatira, Sardis, Filadelfia hua Laodicea.

¹² Entunses onocuec para nequejtas öquenuju niechnunutzaya. Yecuöquenu onequejtac checume cantelerojte de oro, ¹³ hua innepantla de inu cantelerojte onetieyjtac sente öque niexihuaya quieme sente tlöcatl. Quepealoöya tietlaquie tli aseya hasta

* **1:4-5** Cuale nuyejque motradusirus: “hualiloas”.
“Alfa” icaca primero hua “omega” icaca sölültimo.

* **1:8** “Alfa” hua “omega” cate lietas de alfabeto griego.
** **1:8** Cuale nuyejque motradusirus: “hualiloas”.

tieicxehua, hua ilpihuataya pa tiepiecho ca sente pöxajtle de oro. ¹⁴ Tietzo hua tietzon-teco istöc oyeya, quiename yechcatl chepöhuac noso quieme tesebetl, hua tieixteloljua nieseya quieme cuöc möna tletzintle. ¹⁵ Tieicxehua nieseya quieme tepostle totunque tli pepetlaca, hua tietlajtul caquesteya quieme cuöc meyac ötzintle yebitz hua isoloca. ¹⁶ Quepealoöya pa tiemöyecmö checume sitlalte, hua de ijtec tiecamac quisaya sente espöda bieye tli cuale tlatequeya de ujcö löro. Tiexöyac oyeya quieme tunale cuöc checöhuac tuna. ¹⁷ Hua cuöc netieyejtac onebetzeto tieicxetla quieme tlö ye onemec. Quetlölejqe tiemöyecmö nopa, hua niechelfejqe:

—Ayecmo xomomajte. Naja nePrimero hua neÚltimo, ¹⁸ hua naja neneme. Pos onemec, pero xeniechejta, que ye neneme nochepa. Hua naja necpea yöbes para cuale nectlapus o noso nectzacuas pobielta de cöne icaca mequelestle hua de inu mectlöncale.

¹⁹ 'Por inu, xequejcuelo noche söstantle tli tequejtac hua noche tli ye ica, hua lo que tli pasörebes sötiepa. ²⁰ Temetzelfis secreto de tli quejtusneque inu checume sitlalte tli tequejtac pa nomöyecmö hua de inu checume cantelierojte de oro. Inu checume sitlalte querepresentöroa *önges de inu checume grupos de creyentes, hua inu checume cantelierojte querepresentöroa inu checume grupos de creyentes.

2

Sente mensöje para creyentes ipa Efeso

¹ 'Xequejcuelte ini nönca para nieca *öngel de inu grupo de creyentes tli cate ipa Efeso: “Nönca söstantle quejtulo yejuatzi öque quepealo checume sitlalte ipa tiemöyecmö, hua nejnemoateneme innepantla de inu checume cantelierojte de oro: ² Naja necmate de noche tli otecchi, hua de quiene tontequet checöhuac, hua necmate que seme tetequejteca. Necmate que abele tequenxicoa inu tlöca amo cualteque, hua tequenproböroa tli yejua quejtoa que nele yejua cate tlateotitlanme de Deus mös amo melöhuac. Hua taja tecomeniexte que yejua istlacateque. ³ Nuyejqe necmate que taja tecxicojteca hua tecöquantöroa meyac söstantle por nopampa, hua amo teseyabe. ⁴ Pero necpea tli temetzelis, ipampa ayecmo teniechtlasojtla quieme primero. ⁵ Por inu, xequelnömetca de tli tecchihuaya oyeya, pero ayecmo tecchihua öxö, hua xomoyulcuepa para ocsajpa tecchihuas. Pos tlö amo tecchihuas ejqueu, nehuölös hua nejaltechus mocanteliero de ilocör, tlö amo tomoyulcuepas. ⁶ Pero ini nönca tecpea tlin cuale, que tectlajyelejta lo que tli quechihua nicolaítas, quieme naja nuyejqe nectlajyelejta.

⁷ 'Öque quepea itlacaqueles, ma quecaque lo que tli tieEspíritu de Deus quemelfilo ini nöncate grupos de creyentes. Öque seme mopeleöroa ca lo que tli amo cuale hua tlaxexicoa, naja necmacas deriecho para quecuös inu fruto de cuabetl tli quemacas nemelestle, tli ica ipa inu locör cuöcualtzi itucö Paraíso, cöne iloac Deus”.

Sente mensöje para creyentes ipa Esmirna

⁸ 'Nuyejqe xequejcuelte ini nönca para nieca *öngel de inu grupo de creyentes tli cate pa Esmirna: “Nönca söstantle quejtulo yejuatzi öque iloac primero hua sölúltimo, öque omecoac hua oyulebihuac: ⁹ Necmate que giente metztepotztoca hua que teca teporube (mösqe de melöhuac teca terico). Hua necmate quiene moca tlajtoa de taja niecate tli quejtoa que yejua cate joriojte, o noso giente de Deus, mös amo melöhuac ipampa cate sente grupo de itlatequepanojua de Satanás. ¹⁰ Majcamo metzmajte niontle de lo que tli metzpasörus. Xequejta. Diöblo isejco nemiechcalaquise que de nemejua ijtec cörsel para nemiechprobörus, hua nemiechtepotztocasque por majtlactle tunale.

* **1:20** Beles niecate önges yesque önges tli quemixutea inu grupos de creyentes, noso beles yesque mensajeros noso pastores de inu grupos. * **2:1** Beles niecate önges yesque önges tli quemixutea inu grupos de creyentes, noso beles yesque mensajeros noso pastores de inu grupos.

Taja xomoneltoca ca naja seme, hasta cuöc temeques, hua tlö ejqueu tecchihuas, naja temetzmacas inu coruna de nemelestle.

¹¹ 'Öque quepea itlacaqueles ma quecaque lo que tli tieEspíritu de Deus quemelfilo ini nöncate grupos de creyentes. Öque seme mopeleöroa ca lo que tli amo cuale hua tlaxexicoa, inu ca uypa mequelestle abele tli quechibelis”.

Sente mensöje para creyentes ipa Pérgamo

¹² 'Nuyejque xequiejcuelfe ini nönca para nieca *öngel de inu grupo de creyentes tli cate ipa Pérgamo: “Nönca sösantle quejtulo yejuatzi öque quepealo espöda bieye tli cuale tlateque de ujcö löro: ¹³ Necmate cöne techönte, pos ipa mociudad tlamandöroa Satanás. Hua seme notlac teyeya, hua amo otejcö moneltoqueles ca naja, nimpör pa niecate tunalte cuöc quemectejque Antipas. Pos yaja seme tlanunutzaya de naja, ompa cöne chönte Satanás. ¹⁴ Pero necpea quiesque palöbras tli temzelis; pos oncate nemotzölö seque tli nemiechmachea enseñönsas de Balaam. Pos inu Balaam quemachtiöya Balac ma quetlöle trömpa imixtla giente de Israel, para ma quecuöcö de tlacuale tli quentlölelea ixniehualojme, hua ma sohuatocacö. ¹⁵ Ejqueu nuyejque taja tecpea seque tli moneltoca ca inu enseñönsas de nicolaítas. ¹⁶ Por inu, noso, xomoyulcuepa. Tlö amo tomoyulcuepas, nehuölös hua necchihuas guerra ca yejua ca noespöda tli quisa de nocamac.

¹⁷ 'Öque quepea itlacaqueles ma quecaque lo que tli tieEspíritu de Deus quemelfilo ini nöncate grupos de creyentes. Öque seme mopeleöroa ca lo que tli amo cuale hua tlaxexicoa, naja necmacas de inu tlacuale tli moyönteca ompa elfecac. Nuyejque necmacas sente tieteconetzi istöc, hua ipa inu tieteconetzi iyees sente nombre yancuec tli nionöque ocsente quemates, tlöcamo solamiente yaja öque queselis”.

Sente mensöje para creyentes ipa Tiatira

¹⁸ 'Nuyejque xequiejcuelfe ini nönca para nieca *öngel de inu grupo de creyentes tli cate ompa Tiatira: “Nönca sösantle quejtulo tieConietzi Deus, öque tieixtelolujua quepealo quieme cuöc möna tletzintle, hua tieicxehua quieme tepostle cuöcualtzi: ¹⁹ Necmate de noche tli otecchi hua de motlasojteles. Hua necmate de moneltoqueles, hua de motraböjo tli tecchihua para ocseque, hua de quiene seme tetequejteca. Necmate que lo que tli tecchihua öxö cache cuale ica que lo que tli tecchihuaya oyeya. ²⁰ Pero necpea tli temzelis ipampa tectlöcayejta inu sohuatl tli ica quieme Jezabel, que quejtoa yaja que nele icaca tlayulepante hua que nele tlanunutza de pörte de Deus. Hua quencajcayöjteca notlatequepanojua hua tlamachtejteca para ma sohuatocacö hua ma quecuöcö tlacuale tli quentlölelea ixniehualojme. ²¹ Ye necmacac tiempo para ma moyulcuepa hua ma ayecmo tlajtlaco ca tlöca, pero amo queneque. ²² Xequejtacö. Nectiecas yaja hua niecate tli calaque ca yaja ipa sente tlapechtle cöne quepeasque meyac tiecoco, tlö quejtus yejua amo moyulcuepasque para ayecmo quechihuasque lo que tli yaja quechijteca. ²³ Hua ipelhua de yaja, naja nequenmejmectis. Hua nemonochtie tli nencate nencreyentes nenquematesque que naja nequixomate cuale lo que tli quepensöroa giente hua lo que tli quenejneque quechihuasque ipa inyulo. Hua necmacas cara sente de nemejua lo que tli conbenierebe según lo que tli nenquechijque. ²⁴ Pero seque de nemejua ompa Tiatira amo nemoneltoca ca inu enseñönsas, hua amo nenquetzecoque o noso amo nenquechijque tli yejua quecuitea “tlamachtelestle secreto de Satanás”. Ipa nemejua amo nemiechtlölelis ocsente cörga. ²⁵ Pero lo que ye nenquepea tlin cuale, xecpextacö hasta cuöc nehuölös.

²⁶ 'Öque seme mopeleöroa ca lo que tli amo cuale hua tlaxexicoa, hua quechihua noche tli necmache hasta cuöc tlamas inemeles, naja necmacas checöhuallestle ipa meyactie naciones. ²⁷ Hua ca sente tlacutl de tepostle quemixutis gigantes, quieme öque quemacas xoctle hua tlapöne. ²⁸ Nuyejque noTajtzti Deus niechmacheque naja inu checöhuallestle.

Nuyejque öque tlaxexicoa necmacas inu sitlale tli tlaniextea ca ise cualcö. ²⁹ Öque quepea itlacaqueles ma quecaque lo que tli tieEspíritu de Deus quemelfilo ini nöncate grupos de creyentes”.

3

Sente mensöje para creyentes ipa Sardis

¹ Nuyejque xequejcuelfe ini nönca para nieca *öngel de inu grupo de creyentes tli cate ompa Sardis: “Nönca sösantle quejtulo yejuatzi öque quepealo inu checume Espíritus de Deus hua inu checume sitlalte: Naja necmate de noche tli otecchi, hua que mös giente quejtoa que teneme, amo melöhuac, porque teca temejque. ² Xetlachixta, hua xecmaca fuiersa öque ye ica para meques. Pos necaseco que amo tecscencö niontle de motraböjo mös que noDeus metzetzalutaya. ³ Por inu, xequelnömecta lo que tecseliöya hua otejcac, hua xecchihua, hua xomoyulcuepa. Tlö cana amo tetlacheas, naseti quieme onase sente tlachtejque, hua amo tecmates tlin ura mopa naseti. ⁴ Pero oncate quiesquete personas ompa Sardis que amo quepetzoneløjque intlaquie, hua yejua nejnemesque ca naja ca intlaquie istöc, porque ejqueu quemeresieroa.

⁵ Öque seme mopeleöroa ca lo que tlin amo cuale hua tlaxexicoa, ejqueu quepeas itlaquie istöc, hua seguramente amo necpojpolus inumbre de inu lista cöne tlajcuelulpancate queiejquech quepeasque nemelestle nochepa. Hua nequixomates inumbre delönte de noTajtzin Deus hua de tieöngeles. ⁶ Öque quepea itlacaqueles ma quecaque lo que tli tieEspíritu de Deus quemelfilo ini nöncate grupos de creyentes”.

Sente mensöje para creyentes ipa Filadelfia

⁷ Nuyejque xequejcuelfe ini nönca para nieca *öngel de inu grupo de creyentes tli cate ompa Filadelfia: “Nönca sösantle quejtulo yejuatzi öque yectec iloac, öque melöhuac, öque quepealo iyöbe de rey David para que cuöc yejuatzi quetlapulo, abele quetzacuas ocsente, hua cuöc quetzacualo abele yeca ocsente quetlapus: ⁸ Necmate de noche tli otecchi. Hua xequejta, ye neclapo sente pobierta mixtla, hua abele ocsente quetzacuas. Pos tecpea tepetzi checöhuallestle, hua otecchi tli quejtoa notlajtul, hua ayec tequejto que amo teniechixomate. ⁹ Xequejta. Inu giente de inu grupo de itlatequepanojua de Satanás, tli yejua quejtoa que yejua cate joriojte, o noso giente de Deus, hua amo cate sino tlacajcayöjtecate, yejua nequenchiualtis ma huölöcö motlac hua ma motlancuöquetzacö mixtla. Entunses yejua quematesque que naja temetztlasojtlac. ¹⁰ Taja otecchi ca paciencia lo que tli otemetzelfe. Por inu, naja temetzmöquextis de inu ura de prueba tli yebitz para noche tlöltecpactle, cuöc naja nequenprobörus noche giente tli chönte pan tlöltecpactle. ¹¹ Isejco nehuölös. Xecmalfe lo que tli tecpea, para que majcamo ocsente quepea inu premio tli metztocöroa.

¹² Öque seme mopeleöroa ca lo que tli amo cuale hua tlaxexicoa, neclölis quieme sente pelör de inu templo de noDeus, hua semejcac mocöhuas ijtec. Nequejcuelfe itech yaja tienumbre de noDeus, hua nuyejque nequejcuelfe inumbre de inu ciudad de noDeus, que yaja inu yancuec Jerusalén tli hualtemus de ompa elfecac desde noDeus. Hua nuyejque nequejcuelfe nonumbre yancuec. ¹³ Öque quepea itlacaqueles, ma quecaque lo que tli tieEspíritu de Deus quemelfilo ini nöncate grupos de creyentes”.

Sente mensöje para creyentes ipa Laodicea

¹⁴ Nuyejque xequejcuelfe ini nönca para nieca *öngel de inu grupo de creyentes tli cate ompa Laodicea: “Nönca sösantle quejtulo yejuatzi öque necuitilo el Amén, öque seme quejtulo tli melöhuac, öque por yejuatzi Deus quechejchijque noche tli onca: ¹⁵ Naja

* **3:1** Beles niecate öngeles yesque öngeles tli quemixutea inu grupos de creyentes, noso beles yesque mensajeros noso pastores de inu grupos.

necmate de noche tli otecchi, que amo teitztec nimpor tetotunque. Cuale teyene teitztec o noso tetotunque. ¹⁶ Por inu, ipampa teyemönque hua amo tetotunque nimpor amo teitztec, isejco temetzchejchas de nocamac. ¹⁷ Taja tequejtoa que terico tecaca hua que tecpea de noche sösantle, hua que amo tli tecnesesitöroa. Però amo tecmajteca que de melöhuac teca teporube. Amo tli tecpea, hua ojalá cuale tomtolajtlaniöne. Abele tetlachea hua texipetztec teca. ¹⁸ Por inu temetzmaca consiejo xejcoa de naja oro que ye opanuc ijtec tletzintle para que ye ica intiero cuale. Ejqueu teyes de melöhuac terico. Hua xejcoa de naja motlaquie istöc para tomtolaquentis. Ejqueu ayecmo tepinöhuas ipampa texipetztec. Nuyejque xejcoa de naja pajtle para moixtelololua para cuale tetlacheas. ¹⁹ Öque naja neclasojtla, necajajua hua nejcastecöroa. Por inu, xecpea ánimo, hua xomoyulcuepa. ²⁰ Xequejtacö. Neca ixpa nemopobierta hua netzajtze. Tlö canajyeca quecaque notlajtul hua quetlapoa pobierta, naja necalaques ca yaja hua netlacuös ca yaja, hua yaja ca naja.

²¹ Öque seme mopeleöroa ca lo que tlin amo cuale hua tlaxexicoa, necmacas deriecho ma tlamandöro ca naja, quieme nuyejque naja netlaxexico hua nuyejque netlamandöro tiehua noTajtzin Deus. ²² Öque quepea itlacaqueles ma quecaque lo que tli tieEspíritu de Deus quemelfilo ini nöncate grupos de creyentes”.

4

Ompa elfecac tiechamoöya Deus

¹ Sötiepa de inu sösantle, onequejtac sente pobierta tlapojtaya ompa elfecac, hua onejcac ocsajpa inu tlajtule quieme tlapitzale. Niechtzajtzele ejqueu:

—Xetlejo necö, hua temetzejtetis lo que tli pasörebes sötiepa de nöncate sösantle.

² Sa nima necmachele quieme inu Espiritu de Deus niechejtetejque, hua nequejtac sente trono ompa elfecac, hua netieyejtac öque ipa yehualutaya. ³ Niexihuaya quiename inu teme jaspe hua cornalina tli tzotlöne lalebes. Öcösemölutl oyeya itienco de inu trono, hua tzotlöneya lalebes quieme inu tietetu itucö esmeralda. ⁴ Nuyejque oyejyeya veinticuatro tronos tli queyehualojtaya inu primero trono. Ipa niecate tronos oyejyeya veinticuatro biebertzetzi. Quepejpeaya intlaquie de istöc, hua impa intzonteco quepejpeaya coronajte de oro. ⁵ Hua de ijtec trono bieye quisaya quieme cuöc tlapetlöne, hua soluneya checöhuac, hua tlatecuineya. Hua oyejyeya checume tlöbelecome que xuxutlaya ixtla inu trono. Yejua cate inu checume Espíritus de Deus. ⁶ Hua nuyejque ixtla trono oyeya quieme sente ötiescatl de teitztle, quieme tietetu tzotlöne. Hua inepantla hua noche itienco de inu trono oyejyeya nöbeme tli joyyulejtaya. Yejua quepejpeaya meyactie inmixtelololua ca adelönte hua ca incuetlapa. ⁷ Hua primero de inu nöbeme oyeya quieme sente leyu, hua inu segundo quieme sente cucobe, hua inu tercero quepeaya ixöyac quieme de sente tlöcatl, hua inu ocsente quieme sente águila cuöc patlöne. ⁸ Hua cara sente de inu nöbeme tli joyyulejtaya quepea checuasie iajfetzhua, hua itienco hua tlajtec quepejpea meyactie imixtelololua. Hua amo mosiebea ca tunale nimpor ca yohuale; seme quejtojtate:

¡Yecmabestec, yecmabestec, yecmabestec

iloac Tlöcatzintle Deus, öque noche quepealo checöhuallestle,

öque iloaya hua iloac hua *iloas!

⁹ Ejqueu inu nöbeme tli joyyulejtate tiechamöjtate hua tiemacatecate respieto hua tietlasojcömatetecate yejuatzi öque yehualuteca ipan trono hua nemoateca nochepa.

¹⁰ Hua seme cuöc ejqueu quechijtecate, inu veinticuatro biebertzetzi motlancuöquetza tieixtla yejuatzi öque yehualuteca ipan trono, hua tietechihua ipampa nemoateca nochepa. Hua quentlölea incorunajua ixtla inu trono, hua quejetoa:

* 4:8 Cuale nuyejque motradusirus: “hualiloas”.

¹¹ ToTlöcatzintle hua toDeus;
Tejuatzi tomomeresierfea tomoselelis chamöhualestle hua respieto hua checöhualestle.
Pos tejuatzi tomochejchibele noche tli onca,
hua porque tejuatzi tomonequite, tequenmochejchibele, hua oyejyeya hua hasta öxö
cate.

5

Yejuatzi Calnielo quemeresieruro quetlapusque ömatl

¹ Hua ipa tiemöyecmö de yejuatzi öque yehualutaya ipan trono onequejtac sente ömatl
tli tlajcuelulpa oyeya de ujcö löro, hua yectzactaya ca checume sieyos. ² Hua nequejtac
sente öngel checactec. Otlajtlaneya checöhuac:

—¿Öquenu quemeresieroa quetlapus inu ömatl hua quetzomunis inu sieyos tli quet-
zactecate?

³ Hua amo oyeya nionöque ompa elfecac nimpör ipan tlöltecpectle nimpör itzintla tlöle
öque beleteya quetlapus ömatl noso ijtec tlacheas. ⁴ Hua nechucac lalebes, ipampa amo
onies öque quemeresieröya quetlapus ömatl noso ijtec tlacheas. ⁵ Hua entunses sente
de inu biebentzetzi niechelfe:

—Amo xechuca. Xequajta. Yejuatzi öque necuitilo Leyu de inu tribu de Judá, öque iloac
iConie de rey David, yejuatzi ye quetlöniluc deriecho para quetlapusque inu ömatl hua
inu checume sieyos.

⁶ Hua netieyjtac sente Calnielo tli ijcatihuataya inepantla de inu trono hua de
inu nöbeme tli joyyulejtecate hua de inu biebentzetzi. Hua niexihuaya quieme tlö
ye tiemectejque. Quepealoöya checume tiecuöcuajua, hua checume tieixtelololua, tli
cate inu checume Espíritus de Deus tli quentitlanque ipa noche tlöltecpectle. ⁷ Niecaju
Calnielo obiloac hua ocönque inu ömatl de tiemöyecmö de yejuatzi öque yehualutaya ipa
trono. ⁸ Hua cuöc ocönque inu ömatl, inu nöbeme tli joyyulejtecate hua inu venticuatro
biebentzetzi omotlancuöquetzque tieixtla inu Calnielo. Hua cöra sente de yejua que-
peaya sente örpa. Nuyejque quepejpeaya plötojte tejteconteque de oro tli tientaya de
popuchtle ajfeyoc. Inu plötojte de popuchtle querepresentöroa innetlötlaiteles de giente
tli yecteque. ⁹ Hua inu nöbeme hua inu biebentzetzi cuejcuicaya yancuec cuicatelestle,
ejqueyi:

Tejuatzi tomomeresierfea tomönelis inu ömatl hua tomotlapolfis isieyos,
ipampa metzmomectelejque, hua ca moyesojtzi tequenmocubele meyac giente para
Deus,

giente de noche tribus, hua de noche tlajtulte, hua de noche puieblos, hua de noche
naciones,

¹⁰ hua tequenmotlölele cöne tlamandöruro toDeus para ma yecö teopexcötzetzi para
yejuatzi.

Hua yejua tlagobornörusque ipan tlöltecpectle.

¹¹ Entunses nequejtac, hua onejcaac intlajtul de meyactie öngeles itienco inu trono,
hua intlajtul de niecate tli joyyulejtecate, hua intlajtul de inu biebentzetzi. Intlapoal de
noche inu giente oyeya hasta millones hua millones. ¹² Quejejoöya ca checöhuac tlajtule:
Yejuatzi Calnielo öque tiemectejque quemeresieruro queselisque noche checöhualestle,
hua noche tli balur quepea,
hua noche tlamachestelestle,
hua noche fuiersa,
hua noche torespieto,
hua chamöhualestle de noche giente,
hua noche tlateochihualestle.

¹³ Hua onejca nocte sösanle tli oquechejchijque Deus, nocte ompa elfecac hua ipa tlöltecpactle hua itzintla tlöltecpactle hua ipa lamör, hua nocte tli ica; nocte onejca oquejtojqque:

Yejuatzi öque yehualuteca ipan trono

hua yejuatzi Calnielo

ma quepejpeacö tlateochihualestle hua respieto

hua chamöhualestle hua checöhualestle nochepa.

¹⁴ Hua inu nöbeme tli yojoyulejtecate quejejtöya:

—¡Amén! ¡Ma ejqueu iye!

Hua inu biebzetzeti motlancuöquetzque hua tietechijque.

6

Yejuatzi Calnielo quentlapuluc sieyos

¹ Hua nequejtac cuöc inu Calnielo oquetlapuluc inu primero sieyo de inu checume. Hua onejca itlajtul de sente de inu nöbeme tli yojoyulejtecate. Caquestec quieme cuöc tlatecuine. Oquejto:

—¡Xebeya!

² Entunes nequejtac sente caböyo istöc, hua sente tlöcatl ipa yetöya. Quepeaya sente örco, hua quelese sente coruna, hua oquis para momagas hua seme tlaxexicojtas.

³ Hua cuöc oquetlapuluc inu segundo sieyo, onejca itlajtul de inu segundo tli yulejteca. Oquejto:

—¡Xebeya!

⁴ Entunes oquis ocsente caböyo, hua nöncia caböyo chichiltec oyeya. Hua öque ipa hualyetöya queselec beletelestle para quejcuenis paz de ipan tlöltecpactle para ma uye guierra hua ma momejmecticö giente. Hua oqueselec sente espöda bieye.

⁵ Hua cuöc oquetlapuluc inu tercero sieyo, onejca itlajtul de inu tercero tli yulejteca. Oquejto:

—¡Xebeya!

Entunes nequejtac sente caböyo capötzttec, hua öque ipa oyöya quepeaya ipa imö sente balönza. ⁶ Hua onejca quieme tlajtule innepantla de inu nöbeme tli yulejtecate. Oquejto:

—Sie kilo de trigo ma balierebe lo que tli sente tlöcatl quetlönea pan tunale, hua yeye kilo de ceböda ma balierebe iguöl, pero amo tli xecchibele asiete hua vino.

⁷ Hua cuöc oquetlapuluc inu cuarto sieyo, onejca itlajtul de inu cuarto tli yulejteca. Oquejto:

—¡Xebeya!

⁸ Hua nequejtac sente caböyo istalectec. Hua öque ipa oyöya itucö Mequelestle, hua quetocaya öque querepresentöroa inu meclöncale. Hua yepua queselejque checöhualestle para quenmejmectisque inu cuarta pörte de nocte giente tli cate ipan tlöltecpactle. Quenmejmectisque ca espöda hua ca öpestle hua ca cocolestle, hua ca yulcöme tli tiacuöneme.

⁹ Cuöc oquetlapuluc inu möcuile sieyo, nequejtac itzintla ajtöl inölmas de meyac giente. Ocseque giente ye quenmejmectejque ipampa yepua quepoaya tietlajtultzi de Deus hua tlajtlajtoöya de inneltoqueles. ¹⁰ Tzajtztajtzeya checöhuac hua oquejejtöya:

—¿Hasta quiema, Tlöcatzintle yectec hua melactec? ¿Hasta quiema tomojuscörfis hua tomobengörfis tomequeles impa yepua tli chajchönte ipan tlöltecpactle?

¹¹ Hua quenmajmacaque intlaquie istöc, hua quemejelfejque ma möcheacö tepetzi hasta senamo ocseque de imicnihua tli tlatequepanoa por Deus nuyejque quenmejmectisque quieme yepua.

¹² Hua nequejtac cuöc oquetlapuluc inu checuasie sieyo. Ontlaole checöhuac, hua tunale ocapötztie quieme tzojtzomajtle de luto tli omochejchi de tzontle, capötzttec

lalebes. Hua mietztle ochichilie quieme yestle. ¹³ Hua sitlalte obiebetzque ipan tlöltecpactle, quieme chayöbe icox tli seselec de sente icoxcuabetl cuöc checöhuac yejyeca. ¹⁴ Hua inu cielo otzomu hua omololo quiename sente ömatl, hua noche tepieme hua noche tlöltojpote tli cate ijtec lamör mojuolinejque hua oquisque de inlocör. ¹⁵ Hua noche reyes de tlöltecpactle, hua noche cubernadurte hua coronielte hua ricojte hua tli quepea checöhualestle hua nuyejque trabajadurte hua noche ocseque giente, mojoyönque ijtec coyocme hua innepantla tepetlame ompa cöne cate tepieme. ¹⁶ Hua oquemelfejque tepieme hua tepetlame:

—Xomocajcöhuacö topa hua xetiechijyönacö, para majcamo tequejtacö tiexöyac de yejuatzi öque yehualuteca ipa trono, hua para majcamo topa betze tiecualöneles de inu Calnielo. ¹⁷ Porque ye aseco nönca tunale de tieincualöneles, hua abele öque quexicus.

7

Omoseyörojque giente de Israel

¹ Sötiepa nequemejtac nöbe öngeles tli ijijcataya pa inu nöbe esquinas de tlöltecpactle. Quequejquitzquejtaya inu yejyecatl tli yebitz de inu nöbe esquinas para majcamo tlabiteque yejyecatl ipan tlöltecpactle nimpör ipa lamör nimpör impa cuajme. ² Hua nequejtac ocsente öngel que tlejcuaya de ca cöne quisa tunale, hua quepeaya tiesieyo de Deus öque nemoa nochepa. Inu öngel oquentzajtzele checöhuac inu nöbe öngeles tli quepeaya checöhualestle para quechibelisque mal noche tlöltecpactle hua lamör.

³ Oquejto:

—Ayemo xecchibelicö mal tlöltecpactle nimpör lamör nimpör cuajme hasta senamo tequenseyörusque tietlatequepanojua de toDeus. Tequenseyörusque ipa inmixcuöte.

⁴ Hua onejcac intlapoal de innochie tli omoseyörojque; oyejyeya ciento cuarenta y cuatro mil de noche tribus noso grupos de giente de Israel tli omoseyörojque.

⁵ De inu tribu de Judá oyejyeya doce mil omoseyörojque,

hua de inu tribu de Rubén oyejyeya doce mil,

hua de inu tribu de Gad oyejyeya doce mil,

⁶ hua de inu tribu de Aser oyejyeya doce mil,

hua de inu tribu de Neftalí oyejyeya doce mil,

hua de inu tribu de Manasés oyejyeya doce mil,

⁷ hua de inu tribu de Simeón oyejyeya doce mil,

hua de inu tribu de Leví oyejyeya doce mil,

hua de inu tribu de Isacar oyejyeya doce mil,

⁸ hua de inu tribu de Zabulón oyejyeya doce mil

hua de inu tribu de Josie oyejyeya doce mil

hua de inu tribu de Benjamín oyejyeya doce mil tli omoseyörojque.

Meyactie giente tiechamoöya Deus

⁹ Sötiepa nequejtac, hua oyejyeya lalebes meyactie giente, hasta que abele öque quemates intlapoal. Huölajque de noche naciones hua noche tribus hua noche puieblos, hua noche tlajtulte. Ijijcataya ixtla trono hua tieixtla Calnielo. Quepejpeaya intlaquie istöc, hua quepejpeaya ipa inmöhua ixeyo suyotl. Tzajtztajzeya checöhuac, ¹⁰ quejetoöya: Ye tiechenmöquextejque yejuantzetzzi toDeus öque yehualuteca ipa trono hua inu Calnielo.

¹¹ Hua noche öngeles ijijcataya queyehualojtaya inu trono hua quenyehualojtaya inu biebentzetzi hua inu nöbeme tli yojulejtecate. Yejua öngeles motlancuöquetzque ca inxöyac hasta tlölpa, hua tietechijque Deus. ¹² Oquejtojque:

Amén; ma ejqueu iye.

Ma tetiemacacö toDeus tlateochihualestle hua chamöhualestle, tlamachestelestle, tlasojcömatelestle,

respieto, checöhuallestle, hua fuiersa nochepa.

Amén; ma ejqueu iye.

¹³ Hua sente de inu biebertzetzi niechontlajtlane:

—¿Öquemeju niecate tli quepejpea intlaque istöc, hua de cöne huölajque?

¹⁴ Hua nequelfe:

—NoTlöcatzi, tejuatzi tomomachitea.

Hua niechelfe:

Yejua cate tli onquisque de inu tiempo cuöc giente quentepotztocaya lalebes.

Hua intlaque quepöjque ca tieyesojtzi Calnielo, hua omocö istöc.

¹⁵ Por inu seme cate ixtla tietrono de Deus,

hua yohualen tunale tejtequejtecate para yejuatzi ipa tieteupa;

hua yejuatzi öque yehualuteca ipan trono chöntihuas inca yejua para quenprote-
jierusque.

¹⁶ Ayecmo quiema teosebesque nimpör ayecmo quiema ömequesque,

ayecmo quiema impa tunas nimpör ayecmo quiema quentlatis totunque,

¹⁷ ipampa inu Calnielo öque iloac inepantla de inu trono, yejuatzi quenmixutisque

hua quenyecönasque ca cöne cate ömieyalte de inu ötzintle tli quetiema nemelestle.

Hua miero yejuatzi Deus quenmixpojpoasque inmixöyu.

8

Oquetlapuluc inu sölültimo sieyo

¹ Hua cuöc quetlapuluc inu checume sieyo, ompa elfecac amo tli onöhuat por tlajco ura. ² Entuneses nequemejtac checume öngeles tli ijijcataya tieixtla Deus. Quenmaj-macaque checume tlapitzalte.

³ Hua ocsente öngel uya hua omoquetz itlac ajtöl, hua yaja quepeaya sente popuchcumetl de oro. Hua quemacaque meyac popuchtle para ma quetlasolulte ca inetlajtlötlajteles de noche yecteque. Hua inu öngel oquetlöle inu popuchtle ipan ajtöl de oro tli ica ixtla trono. ⁴ Hua de ipa imö öngel otlejcuc tieixtla Deus inu popuchtle ajfeyoc ca ihua inetlajtlötlajteles de tlin yecteque. ⁵ Entuneses inu öngel oconö popuchcumetl, hua quetiemite ca tletzintle de ipa ajtöl, hua quetebitec ipan tlöltecpectle. Hua opie tlatecuineya hua isoluneya checöhuac hua tlapetlöneya hua tlaoliniöya.

Ontlapitzque öngeles

⁶ Hua inu checume öngeles tli quepejpeaya inu checume tlapitzalte quentlölejque pa incamac para tlapitzasque.

⁷ Hua inu primero ontlapitz. Entuneses tlatesebiluc, hua obetz tletzintle hua yestle itzölö tesebetl ipan tlöltecpectle. Hua inu tercera pörte de tlöltecpectle oxutlac, hua inu tercera pörte de cuajme, hua noche sacatl xoxoctec oxutlac.

⁸ Hua inu segundo öngel ontlapitz. Hua obetzeto ijtec lamör quieme sente tepietl tli xutlaya ca tletzintle. Hua inu tercera pörte de lamör omocuec yestle, ⁹ hua inu tercera pörte de yulcöme tli nemeya ijtec lamör omejmejque, hua inu tercera pörte de börcos onxexetunque.

¹⁰ Entuneses inu terciro öngel ontlapitz. Hua ubetz desde elfecac sente sitlale hualxutlatöya quieme sente tlöbelecutl. Hua ubetz ipa inu tercera pörte de ötlacme hua ipa ömieyalte. ¹¹ Hua inu sitlale itucö Chehec. Hua inu tercera pörte de ötzintle omocuec chehec, hua meyac giente omejmejque porque oconeya inu ötzintle, pos ye oyeya chehec hua tiemecte.

¹² Entuneses inu nöbe öngel ontlapitz. Hua inu tercera pörte de tunale hua tercera pörte de mietztle, hua tercera pörte de sitlalte osiejque para ma tlayohua inu tercera pörte de yejua. Hua ayecmo tunac por inu tercera pörte de tunale, hua ayecmo mietztunac por tercera pörte de yohuale.

¹³ Hua onequejtac sente águila hua onejccac itlajtul. Inu águila patlöneya lalebes tlapac, hua oquejto checöhuac:

—¡Ay, Ay, Ay! Porubejte yejua tli chajchönte ipan tlöltecpectle, ipampa oc polebe yete öngeles tlapitzasque.

9

¹ Hua ontlapitz inu möcuile öngel. Hua onequejtac sente sitlale de elfecac tli obetz ipan tlöltecpectle, hua yaja quesele inu yöbe de sente puso lalebes bejcatla tli onase hasta tlatecöyöbelespa. ² Hua oquetlapo pobierta de inu puso, hua de ijtec oquis puctle, quieme puctle de sente yurno lalebes bieye. Hua yejyecatl ocapötzie hua tunale omotlapacho ca inu puctle. ³ Hua de ijtec puctle oquisque chapolte ipan tlöltecpectle, hua yejua quepeaya beletelestle para tlaminesque quieme culume. ⁴ Hua quenmandörojque majcamo tli quechibelicö sacatl nimpör xebetl nimpör cuajme, tlöcamo solamiente ma quenmincö giente tli amo quepejpeaya tiesieyo de Deus ipa inmixcuöte. ⁵ Pero amo queselejque permiso para quenmejmectisque; solamiente ma quenmacacö meyac tiecoco tietunie por möcuile mietztle. Hua inu tiecoco de niecate chapolte ica quieme cuöc tlamine culutl. ⁶ Hua pa niecate tunalte giente quetiemesque mequelestle hua abele queniextisque, hua lalebes quenequesque mequesque, pero abele mequesque.

⁷ Hua nejnieseya niecate chapolte quieme caböyojte cuöc quenpreparöroa para guierra, hua oquepejpeaya ipa intzonteco corunajte quieme de oro. Hua inxöyac nieseya quieme de tlöca, ⁸ hua quepejpeaya intzo quieme de sohuatl, hua intlancochhua quieme de leyu. ⁹ Hua quepejpeaya ipa inpiecho intlaquie tli quenprotejieroöya quiename tlö de tepostle. Hua isolocaya inajfetzhua quieme cuöc meyactie caböyojte queteröna carretotu hua tzejtzecuintebe para momagasque. ¹⁰ Hua quepejpeaya incuetlapel quieme culutl, hua tlamineya. Hua quepejpeaya beletelestle para quenperjudicörusque gientes ca incuetlapel por möcuile mietztle. ¹¹ Hua quepejpeaya inrey, que yaja inu öngel de tlatecöyöbelespa. Ca hebreo itucö Abadón, hua ca griego itucö Apoliön, que quejtusneque Tlaxexetuniöne.

¹² Yaja inu tli onequejtac icaca primero “Ay” de inu yete. Oc turavea polebe ume “Ayes” para pasörebes sötiepa de nönca söstantle.

¹³ Hua inu checuasie öngel ontlapitz. Entunses onejccac sente tlajtule tli oquis de intzölö de inu nöbe cuöcuajme tli cate ipa esquinajte de inu ajtöl de oro tli ica tieixtla Deus. ¹⁴ Hua inu tlajtule oquelfe inu öngel tli quemach ontlapitz:

—Xequentojtoma inu nöbe öngeles tli ilpetecate ompa cöne inu ötlactle bieye itucö Eufrates.

¹⁵ Pos niecate öngeles ompa oyejyeya sa para cuöc huölös inu nieca ura de inu nieca tunale de inu nieca mietztle de inu nieca xebetl. Quentojtunque para ma quenmejmecticö inu tercera pörte de giente. ¹⁶ Hua insultörojua de inu öngeles oyajyöya ipa caböyojte, hua oyejyeya meyactie. Onejccac intlapoal, que oyejyeya doscientos millones de soltörojte. ¹⁷ Hua nequemejtac inu caböyojte hua niecate tli impa yetöya, quiename tlö necochtiemequene. Ejqueu nejnieseya: quepejpeaya ipa inpiecho intlaquie de tepostle para quenprotejierus. Inu tlaquiemetl de tepostle oyeya de colur chichiltec quiename tletzintle, hua costec quieme azufre, hua azul marino. Hua intzonteco de inu caböyojte nejnieseya quieme de leyunte, hua de ijtec incamac quisaya tletzintle hua puctle hua azufre. ¹⁸ De nöncate yete plögas omemejque inu tercera pörte de giente, pos quenmejmectejque inu tletzintle, hua inu puctle, hua inu azufre, tli quisaya de incamac caböyojte. ¹⁹ Pos niecate caböyojte quepejpeaya inu beletelestle ipa incamac, hua nuyejque ipa incuetlapel. Pos incuetlapel oyeya quieme cuhuötl; quepeaya itzonteco ca tli tlaperjudicoroöya.

²⁰ Hua tli mocöjque giente, tli amo omejmejqe de inu yete plögas tli obetz, yejua amo quecöjque de que quechihuaya tlajtlacule. Amo moyulcuejqe tlöcamo oc turavea quesequiroöya quenteochihuaya demunios hua motlancuöquetzaya inmixtla ixniehualojme tli tlachejchijme de tlöca. Pos tlöca quenchejchihua inu ixniehualojme de oro, hua de plöta, hua de tepostle cuöcualtzi, hua de tietetu, hua hasta de cuabetl. Hua inu ixniehualojme abele tlachea nimpör abele tlacaque nimpör abele nejneme. ²¹ Hua inu giente quesequiroöya quenteochihuaya porque amo moyulcuejqe, hua por inu nuyejqe oc turavea quesequiroöya tlamectiöya hua cusöroöya de chichyutl ca drogas, hua sohuatocaya, hua tlachtequeya.

10

Sente öngel quemacaque Xohuö sente ömaconetzi ma quecua

¹ Entunses nequejtac ocsente öngel checactec tli temuya desde elfecac. Quepeaya itlaquie de mextle, hua ipa itzonteco quepeaya öcösemölutl, hua ixöyac nieseya quieme tunale, hua icxehua quieme pelörte de tletzintle. ² Hua quepeaya ipa imö sente ömaconetzi otlapojtaya. Hua oquetlöle icxeyecö ipa lamör, hua icxearrabes ipan tlöltecpactle. Hua otzajtzec checöhuac quieme tzajtze sente leyu. ³ Hua cuöc ye ontzajtzec, onöhuatque checume tlatecuinelesme ca intlajtulhua tiemajte. ⁴ Entunses naja ye neyeya para nequejcuelus lo que tli oquejtojque inu checume tlatecuinelesme. Pero onejccac sente tlajtule tli onhuöla desde elfecac. Oniechelfe:

—Xecmajta sa taja lo que tli oquejtojque inu checume tlatecuinelesme, hua amo sequejcuelo.

⁵ Entunses inu öngel tli nequejtac ijcataya ipa lamör hua tlöltecpactle yaja ocajcoc imöyecmö tlacpac, ⁶ hua tlajuröro por yejuatzi öque nemoa nochepa, öque quechejchijque elfecac hua noche tli onca ompa, hua tlöltecpactle hua noche tli onca ipa, hua lamör hua noche tli onca ijtec. Oquejto:

—*Ayecmo bejcöbes, tlöcamo isejco, ⁷ pan tunalte cuöc tlapitzas inu checume öngel, entunses tlames lo que tli Deus queplaneörojque hua giente amo quemateya, lo que tli Deus tlamachestiluc ca tietlatequepanojua tlayulepantejqe.

⁸ Hua inu tlajtule tli ye onejccac de ompa elfecac, ocsajpa niechelfe:

—Xebeya ca inu öngel tli ijcateca ipa lamör hua tlöltecpactle. Xecöna inu ömatl tli tlapojteca tli yaja quepea ipa imö.

⁹ Hua oneya itlac öngel hua nequelfe ma niechmaca inu ömaconetzi. Hua yaja niechelfe:

—Xecöna hua xejcua. Ijtec mojte iyec chehec, pero ijtec mocamac iyec tzopielec quieme nectle.

¹⁰ Hua onecö inu ömaconetzi de imö öngel, hua onejccua. Hua ijtec nocamac oyeya tzopielec quieme nectle. Hua cuöc ye onejccua, ochecheac nojte. ¹¹ Hua yejua oniechelfejque:

—Ocsajpa tecpea que tequenyulepantis giente de meyactie puieblos hua naciones hua tlajtulme hua reyes.

11

Unte tlöca tlatestificöroöya

¹ Hua yeca niechmacac sente mietro quiename sente cuelutl. Niechelfe:

—Xemiehua hua xectemachihua inu tieteupa Deus hua inu ajtöl, hua xequenpoa quiejquech cate tli itlac ajtöl motlancuöquetztecate. ² Pero amo xectemachihua pötio tli ica ca queyöhuac, ipampa inu pötio quentocöroa estranjieros. Hua yejua ipa moquejquetzasque inu ciudad de Deus por cuarenta y dos mietztle. ³ Hua nequenmacas

* **10:6** Cuale nuyejqe motradusirus: “Ayecmo iyec tiempo, ipampa ye iyec eternidad nochepa”.

checöhuallestle unte tlöca tli tlatestificöorusque por naja. Yejua quepoasque notlajtul por mil doscientos sesenta tunalte. Quepeasque intlaquie capötzttec quieme cana de luto. ⁴ Yejua cate tli omojto de yejua cuöc omocuelo de unte cuajme de olivo, hua de unte cantelierojte tli ijcatecate tieixtla Tlöcatzintle öque tlamandöruro ipan tlöltecpactle. ⁵ Hua tlö canajyeca queneques quenchibelis mal inu unte tlöca, tletzintle quisas de incamac hua quenxutlaltis. Tlö canajyeca queneque quenchibelis mal, ejqueu meques. ⁶ Hua inu ume tlöca quepejpea checöhuallestle para quetzacuelisque para majcama queyabe noche tunalte cuöc tlayulepantejtenemesque. Nuyejque quepeasque checöhuallestle para quechihuasque ma ötzintle ma mocuepa yestle, hua ma uye de noche plögas ipa tlöltecpactle. Hua quiejquech veces yejua quenequesque, quechihuasque. ⁷ Hua cuöc tlames inu tiempo de tlatestificöorusque, entunses inu petzoyulcötl tli quisas de tlatecöyöbelespa quechihuas guierra ca yejua, hua quenxexicus, hua quenmejmectis. ⁸ Hua inu unte mimejque biebetztasque ipa cayaju de inu ciudad bieye tli mocuitea Sodoma hua Egipto ipampa giente tlajtlacoa lalebes ompa quiene oyeya tlajtlacoöya giente ipan ciudad de Sodoma hua nación de Egipto. Yaja inu ciudad cöne tiecoruspelojque yejuatzitzi öque iloac inTlöcatzintle de inu unte tlöca tli tlatestificöoroöya. ⁹ Hua por yeye tunale huan tlajco gigantes de meyactie puieblos hua tribus hua tlajtulme hua naciones quenmejtaya inu mimejque, hua amo quecöjque ma quentlölöpachucö. ¹⁰ Hua giente tli chajchönte ipa noche tlöltecpactle pajpöqueya hua quepeaya pöquelestle, hua motlajtlöocoliöya regalos, ipampa inu unte tlayulepantejque ayecmo quenpasoloöya. ¹¹ Hua opanuc inu yeye tunale huan tlajco, hua Deus quenyulebitejque inu unte mimejque, hua moquetzque, hua noche giente tli quenmejtaque omajcömejque. ¹² Nima inu unte testigos oquecajque sente tlajtule checöhuac tli onhuöla desde elfecac. Quemelfiöya: Xetlejcucö necö. Hua otlejcuque elfecac ijtec mextle. Hua tli quentlajyelejtaquenmejtaque. ¹³ Hua sa nima ontlaole checöhuac, hua inu majtlactle pörte de inu ciudad onxexetu, hua omejmejque siete mil personas ipampa ontlaole. Hua tli mocöjque giente omajmajcömejque, hua tiechamöjque Deus öque tlamandöruro ompa elfecac.

¹⁴ Ye opanuc inu segundo “Ay” de inu yete. Pero xequajtacö que isejco yebitz inu terciero.

Inu checume öngel ontlapitz

¹⁵ Entunses inu checume öngel ontlapitz. Cuöquenu ocaquestec tlajtulme ompa elfecac. Quejejtoöya:

Noche ichecöhuales tlöltecpactle ye tieinhuöxca toTlöcatzintle Deus hua Cristo öque Deus tieixpejpenque;

Hua yejuatzitzi tlacubernöorusque nochepa.

¹⁶ Entunses inu veinticuatro biebetzetzitzi tli yejyehuataya pa intronos tieixtla Deus, motlancuöquetzque ca inxöyac tlölpa, hua tietechijque Deus. ¹⁷ Oquejtojque:

Temetzmotlasojcömachelea tejuatzitzi, toTlöcatzintle Deus,

öque tomopilea noche checöhuallestle,

öque tomobetzteca hua tomobetztaya;

ipampa ye tomönele mochecöhuallestzi, hua ye tomtlacubernörfejteca.

¹⁸ Mös tlöltecpactlöca de noche naciones ocuajcualönque,

pero ye aseco tunale cuöc ye tomocualönaltejteca tejuatzitzi,

ye aseco tunale cuöc tequenmojuscörfis tli ye omejmejque.

Ye tequenmotlaxtlöbelis motlatequepanojcötzetzihua,

niecate tlayulepante, hua yecteque, hua innochtie tli metzmorespetörfea,

sea tzequetzetzi o sea bejbeye,

hua ye tequenmomejmectelis niecate tli quexexetunea tlöltecpactle.

¹⁹ Entuneses omotlapö inu teopantle de Deus tli ica ompa elfecac, hua ipan teopantle nieseya inu *örca tli querepresentöroa inu acuerdo tli Deus oquechijque ca tiepuieblo. Hua ontlapetlöneya, hua tlasoluniöya checöhuac, hua ontlatecuineya, hua ontlaoliniöya, hua checöhuac ontlatesebiluc.

12

Xohuö oquejtac sente sohuatl hua sente dragón

¹ Hua moniexte sente söstantle lalebes tietzöbe ompa elfecac. Moniexte sente sohuatl tli motlaquentiöya ca tunale, hua ipa moquetzaya mietztle, hua quepeaya ipa itzonteco sente coruna de majtlactle huan ume sitlalte. ² Yaja utztle oyeya, hua tzajtzeya por inu tiecoco, por ye quetlöcatelis peltzintle.

³ Hua onies ocsente tietzöbetl ompa elfecac. Moniexte sente *dragón lalebes bi-eye, chichiltec quieme tletzintle. Quepeaya checume itzontecohua, hua majtlactle icuöcuajua, hua ipa itzontecohua quepeaya checume corunajte. ⁴ Hua ca icuetlapel quemechpö inu terciera pörte de sitlalte, hua quementepexebe hasta ipan tlöltecpectle. Hua inu dragón omoquetz ixtla inu sohuatl tli ye oyeya para quetlöcatelis peltzintle, para que cuöc tlöcates peltzintle, nima quecuös. ⁵ Hua sohuatl quetlöcatele sente peltzintle oquechtle. Inu peltzintle yaja öque quemixutis noche giente de noche naciones ca sente tlacutl de tepostle. Hua nequejtac iconie de inu sohuatl nima quecuejcuelejque hua tiebiquelejque tietlac Deus cöne yehualuteca ipa tietrono. ⁶ Entuneses inu sohuatl ocholo ca cöne nionöque chönte, ipampa ompa oyeya sente locör tli Deus quepreparörfeque para yaja, para ma quetlamacacö ompa por mil, doscientos sesenta tunalte.

⁷ Hua oyeya guerra ompa elfecac. Inu öngel itucö Miguel, ca inu ocseque öngeles tli cate isoltörojua, quechijque guerra ca inu dragón. Hua inu dragón ca iöngeles omopeleörojque checöhuac, ⁸ pero abele tlatlönque, hua ayecmo uya locör para yejua ompa elfecac. ⁹ Ejqueu inu dragón ca iöngeles quentitlanque desde elfecac ipa tlöltecpectle. Yaja dragón icaca öque desde nieca tiempo moniextea quieme cuhuötl. Mocuiteda Diöblo (quejtusneque Tlatieyelfiöne) hua nuyejque mocuiteda Satanás. Yaja icaca öque quencajcayöhua noche gientes tli chajchönte ipan tlöltecpectle.

¹⁰ Entuneses onejca sente tlajtule checöhuac ompa elfecac. Quejtoöya:

Ye aseco nönca tiempo cuöc Deus quenmöquextisque giente,

hua ca fuiersa hua ca meyac checöhuallestle tlamandörurus.

Ye tequetztecate tiechecöhuales de Cristo öque Deus tieixpejpenque.

Pos ye quetitlanque hasta tlölpa inu Tlatieyelfiöne,

öque yohualen tunale quentieyelfiöya tocnihua tieixpa Deus.

¹¹ Pero tocnihua quexexicojque niecaju moxicoöne,

ipampa yejuatzi Calnielo omecoac por impampa,

hua porque yejua otlanunutzque de tietlajtultzi,

hua yejua amo motlöocoltejque mös mejmequene.

¹² Por inu, ma pajpöquecö innochie tli chajchönte ompa elfecac,

hua ma quepeacö pöquelestle.

Pero porubejte nemejua tli nencate ipan tlöltecpectle hua ipa lamör hua ijtec,

ipampa ye otemuc Diöblo cöne nemejua nencate.

Hua yaja lalebes tlabielmecteca

ipampa quemate que itlamejyo ye aseteca.

¹³ Cuöc momacac cuenta inu dragón que cualtitlanque ipan tlöltecpectle, yaja quepersequiro inu sohuatl tli quetlöcatele inu peltzintle oquechtle. ¹⁴ Hua quemacaque

* **11:19** Xomojtelicö He. 9.4-5. * **12:3** "Dragon" icaca sente yulcöt lalebes tiemajte quiename sente cuetzpale lalebes bieye. Quepea bieye itlancochhua hua quequextea tletzintle de icamac. Amo onca dragones ipan tlöltecpectle; sa cate de cuientos.

inu sohuatl unte iajfetzhua quieme de sente águila bieye para ma patlöne bejca de inu cuhuötl noso dragón para mojoyonas ipa sente locör tli quemacaque ompa cöne nionöque chönte. Ompa quetlamacasque por yeye xebetl huan tlajco. ¹⁵ Hua inu cuhuötl quequexte meyac ötzintle de ijtec icamac para ma quechpöna inu sohuatl. ¹⁶ Pero tlöle mismo quepaliebe inu sohuatl. Pos tlöle motlapo, hua noche inu ötzintle tli inu dragón quequextiöya de icamac ocalac ijtec tlöle. ¹⁷ Entunes inu dragón otlabielmec ca inu sohuatl, hua onya para quechihuas guierra ca tli mocojque ipelhua de inu sohuatl. Yejua cate tli quechihua lo que tli Deus quenmandöruro hua tlajtlanunutza de Jesús.

13

Ume petzoyulcöme

¹ Entunes inu dragón omoquetz itlac lamör. Entunes nequejtac sente petzoyulcötl hualquistöya de ijtec lamör. Quepeaya majtlactle icuöcuajua, hua checume itzontecohua. Hua ipa icuöcuajua quepeaya majtlactle corunajte, hua ipa itzontecohua quepeaya nombres tli tieca tlajtoa de Deus. ² Inu petzoyulcötl nieseya quieme sente tigre, hua quepeaya icxehua quieme de uso, hua icamac quieme de leyu. Hua inu dragón quemacac ifuiera hua ideriecho de tlacubernörus hua noche ichecöhuales. ³ Hua sente de itzontecohua de inu petzoyulcötl quepeaya tlactle quieme tlö ye quemectejque, pero inu tlactle ye opajtec. Hua noche giente de tlöltecpactle quetocaya, pos quetietzöbejtaya lalebes. ⁴ Hua innochie queteochijque dragón ipampa quemacac checöhuallestle ca inu petzoyulcötl. Quejtojque:

—¿Öquenu ocsente quieme nönca petzoyulcötl? ¿Öquenu beletes momagas ca yaja?

⁵ Hua inu petzoyulcötl oquepex permiso para tlajtlajtus cuöcualtze de yaja mismo hua tiepöpöcas Deus, hua quepeas checöhuallestle por cuarenta y dos mietztle. ⁶ Pos ejqueu oquechi. Tiepöpöcac Deus, tiepöpöcac tienumbre hua tieteupea, hua quenpöpöcac yejua tli chajchönte ompa elfecac. ⁷ Nuyejque quepermetierfejtque ma quechihua guierra ca tli yecteque hua ma ma quenxexico, hua ma quepea checöhuallestle hua autoridad ipa noche tribus hua puieblos hua tlajtulme hua naciones. ⁸ Hua noche giente tli chajchönte ipan tlöltecpactle queteochihuasque, noche niecate öque innumero amo omojcuelo ipa inu lista de öquenu quepeasque nemelestle nochepa. Inu lista omochejtchi antes de que Deus oquechejtchijque tlöltecpactle. Yejuatzí Calnielo öque tiemectejque, yejuatzí quepealo inu lista.

⁹ Tlö canajyeca quepea itlacaqueles, ma tlacaque.

¹⁰ Tlö canajyeca iyés prieso, pos prieso iyés de melöhuac.

Tlö canajyeca quemectisque ca espöda, pos melöhuac ca espöda quemectisque.

De inu manera cuale nieses inneltoqueles de tli yecteque, hua nieses que cuale quexicusque.

¹¹ Entunes onequejtac ocsente petzoyulcötl tli quisaya de ijtec tlöle. Quepeaya unte icuöcuajua, quieme sente calnielojconetzi. Tlajtlajtoöya quieme sente dragón.

¹² Hua inu primero petzoyulcötl quemacac ichecöhuales. Hua inu segundo petzoyulcötl oquechihualte noche giente tli chajchönte ipan tlöltecpactle ma queteochihuacö inu primero petzoyulcötl. Inu primero petzoyulcötl yaja inu tli quepeaya tlactle quieme tlö ye quemectejque, pero ye opajtec. ¹³ Hua inu segundo petzoyulcötl quechihuaya meyac söstantle tli tietzöbetl lalebes, pos hasta quechihuaya ma betze tletzintle de elfecac ipan tlöltecpactle mientras giente quejtaya. ¹⁴ Hua quencajcajöhuaya giente tli chajchönte ipan tlöltecpactle ca inu tietzöbeme tli quepermetierfe ma quechihua ixtla inu primero petzoyulcötl. Quemelfiöya innochie giente tli chajchönteya ipan tlöltecpactle ma quechejtchihuacö sente tesönto de inu primero petzoyulcötl, öque quepeaya inu tlactle de espöda pero turavea cuale nemeya. ¹⁵ Hua inu segundo petzoyulcötl quesele beletelestle para quechihuas ma neme hua ma tlajtlajto inu tesönto de inu primero

petzoyulcötl. Hua inu tesönto oquechi que noche giente tli amo quenequeya queteochi-huasque inu tesönto ma mequecö. ¹⁶ Nuyejque oquechi que innochie giente, sea bejfeye noso tzequetzetzi, sea ricojte noso porubejte, sea esclavos noso amo, innochie ma quepeacö sente sieñas ipa inmöyecmö noso ipa inmixcuöte. ¹⁷ Ejqueu abele öque tlacoas nimpör tlanamacas tlö cana amo quepea inu sieñas. Inu sieñas icaca inumbre de inu petzoyulcötl o noso itlapoal de inumbre. ¹⁸ Ini nönca queneque machelestle. Öque cuale itzonteco, ma quepoa inu tlapoale de petzoyulcötl, pos ica itlapoal de sente tlöcatl. Hua itlapoal icaca seiscientos sesenta y seis.

14

Cuejcuicaya ciento cuarenta y cuatro mil gientes

¹ Sötiepa nequejtac que yejuatzi Calnielo nequetzaluc ipa inu tepietl de Siön noso Jerusalén. Hua ca yejuatzi oyejyeya ciento cuarenta y cuatro mil gientes tli quepeaya ipa inmixcuöte tienumbre de Calnielo hua tienumbre de tieTajtzí. ² Entunses onejca ompa elfecac sente tlajtule tli caquesteya quieme cuöc yebitz meyac ötzintle, noso quieme cuöc checöhuac tlatecuine. Nuyejque caquesteya quiename tlö meyactie tlatzotzonaya ca örpas. ³ Hua cuejcuicaya sente cuicatelestle quiename tlö yancuec, ompa ixtla inu trono hua inmixtla de inu nöbeme tli joyjulejtecate hua de inu biebertzetzi. Hua abele ocsente quetzecoöya inu cuicatelestle, tlöcamo solamiente inu ciento cuarenta y cuatro mil gientes, tli Deus oquencujque para ma ayecmo yecö ipan tlöltecpactle. ⁴ Yejua cate tli amo otlajtlacojque ca sohuame tli amo insohua, pos yejua momalfejqe. Yejua tietocateneme yejuatzi Calnielo ca cöne biloa. Yejua cate tlacujme de entre tlöltecpactlöca, hua cate quiename sente ofrienda de tli cachtö mochihua, para Deus hua yejuatzi Calnielo. ⁵ Yejua ayec oquejtojque tli amo melöhuac. Amo quepejpea niontle tlin amo cuale.

Yeye öngeles tlanahuatejqe

⁶ Entunses nequejtac ocsente öngel tli patlöneya tlapac lalebes. Quehualecaya sente cuale tlamachelestle tli ayec tlamas hua abele mopatlas. Inu tlamachelestle quemejtetis ca noche giente tli cate ipan tlöltecpactle, giente de noche naciones hua tribus hua tlajtulme hua puieblos. ⁷ Quejtoöya ca checöhuac tlajtule:

—Xetiemabelicö Deus, hua xetieyectieniehuacö, ipampa ye aseco tiempo para yejuatzi tlajuscörurus. Xetieochihuacö yejuatzi öque oquechijchijque elfecac hua tlöltecpactle, lamör hua ömieyalte.

⁸ Hua ocsente segundo öngel hualtocaya inu primero. Oquejtoöya:

—Ye obetz, ye onxexetu inu bieye ciudad de Babilonia. Pos yaja oyeya quiename sente sohuatl amo cualtec tli quenpiepiehualtea tlöca hua quenchiualtea ma calaquecö ca yaja, hua quentlöhuantea. Pos ejqueu yaja ciudad de Babilonia oquechihuaya ca giente de noche naciones.

⁹ Hua ocsente terciero öngel hualtocaya inu primero hua segundo öngeles. Oquejto ca checöhuac tlajtule que tlö canajyeca queteochihua inu petzoyulcötl hua itesönto, hua mocöhua ma quetlölelicö inu sieñas ipa ixcuöte noso ipa imö, yaja nuyejque quemachelis tiecualöneles de Deus. ¹⁰ Iyes quiename cuöc sente tlöcatl quechihualtea afuiera ma cone nochaja resacöro hua amo cöguantöroa. Hua quepeas meyac tiecoco porque iyes ijtec tletzintle hua azufre inmixtla de tieöngeles de Deus, hua tieixtla Calnielo. ¹¹ Hua inu puctle de inu tletzintle tli quenmaca meyac tiecoco tlejcoteca nochepa. Hua yejua abele mosiebea ca tunale nimpör ca yohuale, pos queteochijque inu petzoyulcötl hua itesönto, hua quenejqe ma quetlölelicö inu sieñas de inumbre. ¹² Pero tli yecteque cate, tli oquechijque tli Deus otlamandörojque hua seme moneltocataya tieca Jesús, pos innochie quematesque que yejua cuale quexicojqe.

¹³ Entunses onejca sente tlajtule tli huölöya desde elfecac. Niechelfe:

—Xequejcuelo ini nönca: “Desde necö adelönte, tlö canajyeca meque quieme creyente ca toTlöcatzintle, cuale icnupel”. “Melöhuac”, quejtulo tieEspíritu de Deus. “Öque ejqueu meques mosiebis de itraböjo. Pero iresultado de lo que tlin cuale oquechi iyös ca yaja hasta ompa elfecac”.

Omocosechörojque gente de tlöltecpactle

¹⁴ Entuneses onequejtac sente mextle istöc, hua ipa inu mextle hualyehuatöya sente persona tli nieseya quieme tlöcatl. Quepeaya ipa itzonteco sente coruna de oro, hua ipa imö quepeaya sente yusno tli tlateque. ¹⁵ Hua ocsente öngel oquis de ijtec teupa hua ca checöhuac tlajtule quetzajtzetele inu nieca tli hualyehuatöya ipa mextle. Oquelfe:

—Xecteque ca moyusno lo que tli omochi. Porque ye asec tiempo de que tej-cosechörusque, pos gente de tlöltecpactle cate quieme tlatuctle tli ye uhuöc.

¹⁶ Entuneses inu nieca tli hualyehuatöya ipa mextle quetitla iyusno para tlateques ipan tlöltecpactle, hua quecosechöro inu tlatuctle.

¹⁷ Hua ocsente öngel oquis de ijtec teupa ompa elfecac. Yaja nuyejque quebicaya sente yusno tlateque. ¹⁸ Entuneses ocsente öngel ohuöla desde itlac ajtöl. Yaja omoencargöroöya de inu tletzintle tli xutla ipa ajtöl. Yaja quetzajtzetele inu nieca tli quepeaya yusno tlateque. Oquelfe:

—Xetlateque ca moyusno tlateque, hua xejcosechöro inu racimos de uva tli cate gientes de tlöltecpactle. Pos ye obejbecseque inu uvas.

¹⁹ Entuneses inu öngel quetitla iyusno para tlateques ipan tlöltecpactle, hua quecuejcuec inu uvas de ipan tlöltecpactle. Quentlöle ijtec sente tönque bieye cöne gente quenpötzcä uvas. Inu tönque querepresentöroa tiecualöneles Deus. ²⁰ Hua ompa ca caltienco itlac inu ciudad quenpötzcäque inu uvas ijtec tönque, hua oquis meyac yestle. Otlejuc yestle hasta cöne icamac caböyo, hua motlalo inu yestle quieme trescientos kilómetros.

15

Checume öngeles quebicaya checume sölültimo plögas

¹ Entuneses nequejtac ocsente tietzöbetl bieye hua tiemajte ompa elfecac. Nequemejtac checume öngeles tli quebicaya checume plögas tli sölültimo betzesque ipan tlöltecpactlöca. Pos ca inu plögas tlames tiecualöneles de Deus.

² Hua nequejtac quieme sente ötiescatl de teitztle ca tletzintle. Hua niecate tli quexexicojque inu petzoyulcötl hua amo motlancuöquetzque ixtla itesönto hua amo oquenejque inu sieñas de itlapoal de inumbre, noche yejua ijijcataya ipa inu ötiescatl tli nieseya quieme teitztle. Quepejpeaya örpas tli Deus oquenmacaque. ³ Hua cuejcuicaya icuicateles de Moisés, öque oyeya tietlatequepano de Deus. Nuyejque cuejcuicaya cuicatelestle de yejuatzi Calnielo. Cuejcuicaya ejqueyi:

ToTlöcatzintle Deus, öque tomopilea noche checöhuallestle,
lo que tli tejuatzi tomochejchibele icaca bieye hua tiemajte;
yectec hua melöhuac motlachihualtzi.

Tejuatzi tomobetzteca terey de noche naciones.

⁴ ¿Öquenu amo metzmomabelelis, Tlöcatzintle?

¿Öquenu amo quemacas respieto motucöyutzi?

Pos sa tejuatzi teyectec temobetzteca.

Huölösque gente de noche naciones hua motlancuöquetzasque mixtlantzinco ipampa quejtasque que noche tli tomochejchibele icaca yectec.

⁵ Sötiepa de inu nequejtac, hua motlapo ompa elfecac inu *cuörto tli tlanepantlajca de inu möntajcale tli serbirebea quieme teupa para gente de Deus pa nieca tiempo. ⁶ Hua de

* **15:5** Cuale nuyejque motradusirus: “tli cache yectec locör ijtec inu cörpa”. Xomojtelicö He. 9.3.

ijtec inu *cuörto oquisque inu checume öngeles tli quebejbicaya inu checume sölültimos plögas. Quepejpeaya intlaquie de inu tzotzomajtle ara cuale itucö lino, hua intlaquie oyeya chepöhuac lalebes hua tzotlöneya. Quepejpeaya pöxajme de oro ipa inpiecho. ⁷ Hua sente de inu nöbeme tli yojoyulejtecate quenmacac checume cupas, hua ijtec inu cupas oyeya tiecualöneles de Deus, öque nemoateca nochepa. ⁸ Hua inu *cuörto otie de puctle por tietlaniexteles hua tiefuiersa Deus, hua abele yeca calaqueya ijtec inu cuörto hasta cuöc ota inu checume plögas tli quebicaya inu checume öngeles.

16

Checume cupas de tiecualöneles Deus

¹ Entunses onejcaac sente tlajtule checöhuac tli huölöya de ijtec inu *cuörto. Quemelfiöya inu checume öngeles:

—Xeyöcö hua xejcuepacö ipan tlöltecpactle inu checume cupas de tiecualöneles Deus.

² Entunses unya inu primero öngel hua oquecuc icupa ipan tlöltecpactle. Hua oquisque söhuame lalebes petzoteque hua tiecoco lalebes intech niecate giente tli quepejpeaya sieñas de inu petzoyulcötl hua tli queteochihuaya itesönto.

³ Entunses inu segundo öngel oquecuc icupa ijtec lamör. Entunses inu ötzintle de lamör omocuec yestle quieme de sente mejque ijyoc, hua noche söstantle tli neme ijtec lamör omejmejque.

⁴ Entunses inu tercero öngel oquecuc icupa ijtec ötlacme hua ömieyalte, hua noche ötzintle omocuec yestle. ⁵ Entunses onejcaac inu öngel de ötzintle. Oquejto:

—Tejuatzi seme tomochibelea quiene conbenierebe, tejuatzi öque tomobetzteca hua tomobetzta, öque tejuatzi teyected. ⁶ Pos tlöltecpactlöca quenmejmectejque yecteque hua tlayulepantejque, hua inyeso oquis ipan tlöltecpactle. Hua öxö tejuatzi tequenmo-maquele yestle ma cojconicö, pos ejqueu quemejmeresieroa.

⁷ Hua onejcaac sente tlajtule tli ohuöla desde inu ajtöl. Oquejto:

—Quiema, Tlöcatzintle Deus, öque tomopilea noche checöhualestle, melöhuac hua yected tomtlajuscörfea.

⁸ Entunses inu cuarto öngel oquecuc icupa ipan tunale. Hua tunale que sele checöhualestle para quentlatis giente ca itletzintle. ⁹ Hua quentlate checöhuac, hua lalebes quentunie. Entunses yejua tiepöpöcaque tienumbre de Deus, öque yejuatzi quepealo checöhualestle para quentitlanihuas noso quemejcuenisque inu plögas. Yejua amo moyulcuejque para ma tieyectieniehuacö.

¹⁰ Entunses inu möcuile öngel oquecuc icupa ipa itrono de inu petzoyulcötl. Entunses otlajtlayohuac ipa noche locör cöne tlamandöröya inu petzoyulcötl. Hua giente hasta quequejtzomaya innenepil porque meyac tiecoco quepejpeaya. ¹¹ Hua tiepöpöcaque Deus öque tlamandöruro ompa elfecac. Pos tlasufriroöya lalebes, hua intech oquis meyac söhuame. Ejqueu tiepöpöcaque, hua amo moyulcuejque para ma ayecmo quechihuacö lo que tli oquechihuaya.

¹² Entunses inu checuasie öngel oquecuc icupa ijtec inu ötlacbiebe itucö Eufrates. Cuöquenu huajhuöc noche ötzintle ijtec ötlactle. Ejqueu omochi para ma iye ojtle cöne cuale panusque reyes tli huölösque de ca cöne quisa tunale. ¹³ Entunses nequejtac yeye espíritus oquisque de ijtec incamac de inu dragón hua de inu petzoyulcötl hua de inu tlayulepante istlacatque. Inu espíritus moxicoöneme oyejyeya en furma quieme de cacatotu. ¹⁴ Oyejyeya espíritus de demunios, hua quechihuaya meyactie tietzöbeme. Oquisque para quensentlölisque noche reyes de tlöltecpactle para ma momagacö ipan guierra tli uyes ipan inun tunale tli quefijörojque Deus. Yejuatzi quepealo noche checöhualestle.

* **16:1** Cuale nuyejque motradusirus: “tli cache yected locör ijtec inu cörpa”. Xomojtelicö He. 9.3.

15 —Xequejta. Naja nehuölös quieme cuöc yebitz sente tlachtejque. Cuale icnupel öque seme tlachixteca hua quemalfea itlaquie. Pos tlö amo, sötiepa yajtenemes xipetztec, hua pinöhuas cuöc giente quejtasque.

16 Hua inu espíritus quensentlölejque reyes ipa inu locör tli mocuitea ca hebreo Armagedón.

17 Entunses inu checume öngel oquecuc icupa ijtec yejyecatl. Hua de ijtec inu teopantle ompa elfecac, desde inu trono, oquis sente tlajtule checöhuac. Oquejto:

—Yeca. Ye ota.

18 Hua otlapetlöneya hua isoluneya checöhuac, hua otlatecuineya, hua ontlaole checöhuac lalebes, que ayec ejqueu tönto lalebes checöhuac ontlaole desde que onies giente ipan tlöltecpectle. 19 Hua cuöc ontlaole inu ciudad bieye otzayo yeye pörtes, hua ciudades de noche naciones onxexetunque. Ejqueu quechibelejque Deus ca inu ciudad bieye de Babilonia, pos momacaya cuenta de quiene quechihuaya inu giente, hua cualönoataya hua tlabielmecoataya ca yejua, hua por inu quencastecörojque. 20 Hua noche tlöltojpölte tli cate ijtec lamör onpojpolejque, hua noche tepieme nuyejque onpojpolejque. 21 Hua tesebetl lalebes bejfeye hua yetique quieme de cuarenta kilos obetz impa giente. Hua yejua tiepöpöcaque Deus ipampa lalebes petzotec inu plöga de tesebetl.

17

Sente cacherila yehuataya ipa petzoyulcötl

1 Entunses ohuöla sente öngel de inu checume tli quepejpeaya inu checume cupas. Niechnunutz hua niechelfe.

—Xehuöla, hua temetzejtetis icastigo de inu cacherila tli lalebes quecualejta tlajtlacus cache que ocseque. Yaja motlölea ipa meyac ötzintle. 2 Hua reyes de tlöltecpectle ocalajque ca yaja, hua innochie tli chajchönte ipan tlöltecpectle mocöjque quieme tlöhuöncötzetzi ipampa ocalajque ca yaja.

3 Entunses inu öngel niechbicac ca cöne nionöque chönte, hua tieEspíritu de Deus niechejtetejque. Nequejtac sente sohuatl tli oyehuataya ipa sente petzoyulcötl chichiltec. Inu petzoyulcötl quepeaya ipa noche icuierpo nombres tli tieca tlajtoöya Deus, hua quepeaya checume itzontecohua hua majtlactle icuöcuajua. 4 Hua inu sohuatl quepeaya itlaquie morörojtec hua chichiltec, hua moyecchejchihuaya ca oro hua ca teme cualtzette hua pateyojque, hua ca perlas. Quepeaya ipa imö sente cupa de oro. Inu cupa tientaya de söstantle petzoyutl hua tietlajyeltec. Pos ejqueu inu tlajtlacule tli yaja quechihua quejtalo Deus quiename petzoyutl. 5 Hua ipa ixcuöte quepeaya sente nombre tlajcuelulpa oyeya, hua amo macheaya tli quejtusnequeya inu nombre. Nönca inu nombre: “Babilonia bieye, nöntle de noche cacherilajte hua noche petzoyutl tli onca pan tlöltecpectle”. 6 Hua nomacac cuenta que inu sohuatl oyeya tlöhuönque ca inyeso de yecteque hua de tli quenmejmectejque ipampa tlatestificörojque de yejuatzí Jesús.

7 Hua cuöc nequejtac, para naja oyeya lalebes tietzöbetl. Entunses öngel oniechelfe:

—¿Tlica tectietzömate? Temetzelfis tli quejtusneque lo que tli tequejtac de inu sohuatl hua de inu petzoyulcötl tli quebica sohuatl, tli quepea checume itzontecohua hua majtlactle icuöcuajua. 8 Inu petzoyulcötl tli tequejtac, yaja ica sente que oncö onyeya, pero öxö ayecmo oncönca. Hua isejco tlejcus desde tlatecöyöbelespa bejcatla, hua sötiepa meques nochepa. Hua noche giente tli chajchönte ipan tlöltecpectle, öque innumbres amo omojcuelojque desde cuöc opie tlöltecpectle ipa inu lista de öque quepeas nemelestle, noche yejua quetietzömatesque cuöc quejtasque inu petzoyulcötl, pos yaja oncö onyeya, pero öxö ayecmo oncönca, hua isejco huölös. 9 Necö onca ölgo para öque quepea cuale itzonteco: Inu checume itzontecohua querepresentöroa checume tepieme cöne motlölea inu sohuatl, hua nuyejque querepresentöroa checume reyes. 10 Möcuilte de

yejua ye omejmejq; sente de yejua tlareinörojteca, hua ocsente ayemo hualase. Hua cuöc asequi inu sölültimo, amo tlareinörus meyac tiempo. ¹¹ Hua inu petzoyulcötl tli oncö onyeya pero öxö ayecmo oncönca, yaja ica inu checuieye rey, hua ica quiename inu checume ocseque. Hua sötiepa meques nochepa. ¹² Hua inu majtlactle icuöcuajua tli tequejtac querepresentöroa majtlactle reyes, que ayemo piehua tlareinöroa. Yejua hua inu petzoyulcötl queselisque checöhuallestle por sie ura. ¹³ Ini nöncate majtlactle reyes cate de acuerdo, hua quemacasque noche inchechöhuales ca inu petzoyulcötl. ¹⁴ Yejua mopeleörusque ca yejuatzi Calnielo, hua yejuatzi quenxexicusque. Pos yejuatzi iloac Tlöcatzintle de Tlöcatzetzinte, hua iloac Rey de reyes. Hua inu gigante tli cate tietlac, yejua cate tli Deus quemixpejpenque hua quensentlölejque, hua yejua quechihua noche tli yejuatzi quejtulo.

¹⁵ Nuyejque niechelfe öngel:

—Inu ötzintle tli tequejtac, cöne motlölea inu cacherila, querepresentöroa noche puieblol hua gigantes hua naciones hua tlajtulme. ¹⁶ Hua inu majtlactle cuöcuajme tli tequejtac hua nuyejque inu petzoyulcötl, yejua quetlajyelejtac inu cacherila. Quequex-telisque ca tli moyecchejchiuaya. Quecuejcuelsique itlaquie, hua quecuösque inacayo, hua sötiepa quexutaltisque. ¹⁷ Pos yejuatzi Deus quenchiualtilo ma quenequecö quechihuasque lo que tli Deus queplaneörojque. Quechihuasque inu lo que tli Deus queplaneörojque cuöc motlölisque de acuerdo para quemacasque inchechöhuales ca inu petzoyulcötl. Hua ejqueu mocumplirus lo que tli Deus oquejtojque. ¹⁸ Hua inu sohuatl tli tequejtac, yaja querepresentöroa inu ciudad bieye tli quenmandöroa noche reyes de tlöltecpactle.

18

Onxexetu ciudad de Babilonia

¹ Sötiepa de inu, nequejtac ocsente öngel que temuya de elfecac ca meyac checöhuallestle. Hua otlaniexte noche tlöltecpactle ca itlaniexteles. ² Hua otzajtzec ca tlajtule checöhuac. Ejqueu oquejto:

Ye obetz, ye onxexetu inu ciudad bieye de Babilonia.

Oxö sa demunios chajchönte ompa;

ica quieme cörsel para espíritus de moxicoöneme,

hua quiename xöola para noche tutume petzoteque hua tietlajyelteque.

³ Noche inu opasöre ipampa inu ciudad oyeya quiename sente sohuatl tli quenpiepiehualtiöya gigantes de noche naciones, hua quentlöhuantiöya.

Hua reyes de tlöltecpactle ocalajque ca yaja,

hua comersiöntes de noche tlöltecpactle omochijque ricos ipampa yaja quecualejtaya quepeas meyac söstantle tli pateyo.

⁴ Entunses onejcac ocsente tlajtule desde elfecac. Oquejto:

Xequisacö, gigante de nopuieblo, de inu ciudad,

para majcamo xetlajtlacucö ca gigante de inu ciudad,

hua para majcamo nemiechtocöro de inu plögas tli betzesque ipa inu ciudad.

⁵ Pues inu ciudad quepea meyac tlajtlacule;

tlö öque quesentlölis itlajtlacul, iyas quieme sente montu tli ases hasta elfecac.

Hua öxö Deus quecastecörusque,

pos yejuatzi quematihua lo que tli amo cuale oquechi.

⁶ Xecmacacö inu ciudad lo que tli quenmacac ocseque gigante,

hua xectlaxtlöbicö ujpä por lo que tli amo cuale oquechi,

hua xecnelulticö sente tlaile ijtec icupa ujpajpa checöhuac que lo que tli yaja oquenelulte para ocseque.

⁷ Ejqueu quiene mochamöhuaya hua quepeaya de noche söstantle para inemeles,

ejqueu mismo xecmacacö tiecoco hua yulcocolestle.

Pos yaja quejtoöya ipa iyulo:

“Naja nereina neca; amo sa nosielneca hua ayec noyulcocus”.

⁸ Por inu ipa sie tunale mosietelesque meyactie plögas hua ipa huölösque:

huölösque mequelestle hua yulcocolestle hua öpestle,
hua quexutlaltisque, ipampa Tlöcatzintle Deus iloac öque quepealo checöhualestle,
hua yejuatzi quecuntenörojque.

⁹ Entunses chojchucasque lalebes reyes de tlöltecpactle, tli calaqueya ca yaja hua mopöctiöya. Chojchucasque ipampa quejtasque puctle de inu tletzintle cuöc yaja xutlatas. ¹⁰ De bejca quetzatasque ipampa momajtisque por inu tiecoco tli yaja quepeas, hua quejtusque:

Ay, porube de taja, ciudad bieye,

Babilonia, ciudad checöhuac,

porque sa sie repiente aseco mocastigo.

¹¹ Hua innoctie comersiöntes de tlöltecpactle chojchucasque hua moyulcocusque por inu ciudad, ipampa ayecmo oyes öque quecoas lo que tli yejua quenajnamaca: ¹² söstantle de oro hua plöta hua teme cualtzetzi hua perlas, hua tzotzomajtle de lino hua de seda, de color morörojtec hua chichiltec, de noche cuabetl tli ajfeyoc, hua söstantle de marfil hua de bepalte cualtzetzi, hua de bronce, hua de tepostle hua mármol, ¹³ hua canela hua tli ajfeyoc, hua copale hua *mirra hua perfumes, hua vino hua asiete hua harina cuale hua trigo, hua yulcöme hua calnielojte hua caböyojte hua carretotu hua hasta giente tli cate esclavo; noche inu söstantle quenajnamacaya inu comersiöntes. ¹⁴ Hua yejua quelfisque inu ciudad:

Noche inu söstantle tli lalebes tecnequeya tecpeas, ye uya;

hua ye tecpolo noche tli rico quepea,

hua ayecmo quiema öque queniextis.

¹⁵ Noche inu niecate comersiöntes tli quenajnamacaya noche inu söstantle hua moricojteque ca itomi de inu ciudad, yejua mocöhuasque de bejca ipampa momajtisque por inu tiecoco que yaja quepeas. Chojchucatasque hua moyulcocusque. ¹⁶ Quejtusque:

Ay, porube de inu ciudad bieye

tli oyeya motlaquentiöya ca tzojtzomajme cuajcuale hua cualtzetzi

hua moyecchejchihuaya ca oro hua ca teme cualtzetzi hua ca perlas.

¹⁷ Pos sa sie repiente ota noche inu ricojyutl.

Hua noche capetönte de börcos ihua pasajeros hua tli tejtequete ijtec börcö, noche tli tejtequete ipa lamör, mocöjque de bejca, ¹⁸ hua tzajtzeque cuöc quejtaque inu puctle de inu ciudad. Quejtojque:

—¿Tli ocsente ciudad oyeya quieme nönca ciudad bieye?

¹⁹ Hua motlöltienque ipa intzonteco; chojchucata hua moyulcocojque hua tza-jtzeque. Quejtojque:

Ay, porube de yaja, ciudad bieye.

Ca iricojyu toricojteque tonochtie tli tecpejpea börcos ipa lamör,

hua sa sie repiente ye onxexetu.

²⁰ Pero xepajpöquecö nemonochtie tli nencate ompa elfecac.

Xepajpöquecö por lo que tli ipa omochi inu ciudad.

Xepajpöquecö nemejua tli nenyecteque, tli nentlateotitlanme, tli nentlayulepantejque.

Pos cuöc quexexetunque inu ciudad, Deus nemiechchibejque justicia.

²¹ Entunses nequejtac sente öngel checactec ocajcoc sente tietebiebentzi quiename de molino hua quetitla ijtec lamör. Hua oquejto:

Ejqueu quetitlanesque checöhuac

* **18:13** Mirra icaca sente pajtle ajfeyoc hua pateyo. Xomojtelicö Jn. 19.39-40.

inu ciudad bieye de Babilonia

hua ayecmo quiema nieses.

²² Hua inu música de tli quetzötözöna örpas,

hua de tli quepitzá tlapitzale hua flauta,

hua de noche morsicojte

ayecmo quiema caquestes ompa.

Hua ayecmo quiema oyes ompa nion sente trabajadur de cualquier tequetl que quemate quechihuas.

Hua ayecmo quiema isolocas molino ompa

²³ hua ayecmo quiema tlanixtis tlöbible ompa,

hua ayecmo quiema caquestes yelfetl de nesohuajtiluyo ompa.

Noche inu pasörees ipampa icomersiöntes de inu ciudad quepejpeaya checöhuallestle ipan tlöltecpactle,

hua inu ciudad quencajcayö noche naciones ca ichichyutl.

²⁴ Hua inu ciudad icaca tlajtlacultec por inmequeles de noche yecteque hua de noche tlayulepantejque

hua de innochie ocseque tli quenmejmectejque ipan tlöltecpactle.

19

¹ Sötiepa de inu onejcac quieme tlajtulte checöjque de meyactie giente ompa elfecac. Quejejtöya:

*¡Aleluya!

Nemöquextelestle hua yecteniebelestle hua checöhuallestle tiehuöxcatzí toDeus.

² Pos yejuatzí tlaestlöculo melöhuac hua quiene conbenierebe.

Porque yejuatzí ye quecuntenörojque inu cacherila,

yaja tli quenmajmöhuaya tlöltecpactlöca ca itlajtlacul,

hua yejuatzí ye quecuepelejque ipa yaja inmequeles de tietlatequepanojua.

³ Hua ocsajpa oquejtojque:

¡Aleluya!

Hua inu puctle nochepa tlejcotas.

⁴ Entunses inu veinticuatro biebzetzetzí hua inu nöbeme tli yojyulejtecate motlancuöquetzque ca inxöyac tlölpá, hua tietechijque Deus öque yehualteca ipan trono. Oquejtojque:

—Amén, ma ejqueu iye. ¡Aleluya!

“Ye aseco tiempo para nesohuajtilus Calnielo”

⁵ Entunses ocaquestec desde inu trono sente tlajtulte tli quejtoöya:

Xetiecuicaticö toDeus, noche nemejua nentietlatequepanojua,

hua nemonochtie tli nentiemabelea, sea tzequetzetzi noso bejfeye.

⁶ Nuyejque onejcac quieme tlajtulte de meyac giente, quieme caqueste meyac ötzintle, hua quieme cuöc checöhuac tlatecuine. Quejejtöya:

¡Aleluya!

Ye opiehualuc tlagobörnörusque Tlöcatzintle,

yejuatzí toDeus, öque quepealo noche checöhuallestle.

⁷ Ma tepajpöquecö, ma tieme toyulo de pöquelestle, ma tetiechamöhuacö,

ipampa ye aseco nöncá tiempo para nesohuajtilus yejuatzí Calnielo,

hua inu tli iyés tiesohua ye moyecchejchi.

⁸ Hua quepermetierfejque ma motlaquente ca tzotzomajtle de lino chepöhuac hua tzotlöne.

* **19:1** “Aleluya” ica sente tlajtulte hebreo, quejtusneque “Ma tetieyecteniehuacö Deus”.

Pos inu tzotzomajtle de lino querepresentöroa lo que tlin cuale oquechijque yecteque.

⁹ Entunses niechelfe:

—Xequajcuelo ini nönca: “Cuale inmicnupel de niecate tli quentlalfejqe para tlacuösque cuöc nesohuajtilus Calnielo”.

Nuyejqe niechelfe:

—Ini nöncate tlajtulme cate tietlajtulhua de Deus hua cate melöhuac.

¹⁰ Entunses notlancuöquetz icxetla para nectechihuas. Pero niechelfe:

—Amo xecchihua inu. Naja nuyejqe neca netietlatequepano de Deus quieme taja hua quieme mocnihua tli tlatestificöroa de Jesús. Sa xetietechihua Deus. Tiemensöje de Jesús ica lo más importönte de lo que tli quejtoöya tlayulepantejqe.

Hualyehualutöya sie tlöcatl ipa sente caböyo istöc

¹¹ Entunses nequejtac omotlapö elfecac, hua moniexte sente caböyo istöc. Hua yejuatzi öque ipa hualyehualutöya iloac melöhuac hua ayec nepatlalo, hua yejuatzi tla-juscörruro hua quechihualo guierra quiename conbenierebe. ¹² Tieixtelolajua tzotlöneya quieme cuöc möna tletzintle, hua ipa tietzonteco quebicaloöya meyactie corunajte. Hua quepealoöya sente nombre tlajcuelulyeya tli solamiente yejuatzi quematiloöya. ¹³ Hua quepealoöya tietlaque que motlapalulte ca yestle, hua necuitiloöya Tlajtule de Deus. ¹⁴ Hua tietocaya inu ejército de elfecac, ca intlaque de lino cuale hua chepöhuac hua istöc, hua ipa oyejyetöya caböyojte istöque. ¹⁵ Hua de ijtec tiecamac quisaya sente espöda bieye hua lateque para que ca inu espöda quenmacasque naciones; hua yejuatzi quemixutisque ca sente tlacutl de tepostle. Hua yejuatzi iloac öque quenpötzcalo inu uvas ijtec inu tönque de uvas tli querepresentöroa tiecualöneles hua tietlabiemequeles de Deus öque quepealo noche checöhualestle. ¹⁶ Hua ipa tietzotzoma hua itech tiequies-cuajyo tlajcuelulyeya sente tucöyutl:

REY DE REYES HUA TLÖCATZINTLE DE TLÖCATZETZINTE

¹⁷ Entunses nequejtac sente öngel ijcataya ijtec tunale. Quentzajtzele checöhuac noche yulcöme tli patlöne, oquemelfe:

—Xehuölöcö hua xomosentlölicö para nenquecuösque inu bieye tlacuale tli Deus nemiechmacasque. ¹⁸ Pos nenquecuösque innacayo de reyes hua de coronielte hua de tli checöjtecate, hua de caböyojte hua de tli ipa tlejcoöya caböyojte, hua de innochtie giente, sea esclavos noso amo, sea bejfeye noso tzequetzetzzi.

¹⁹ Hua nequejtac que inu petzoyulcötl hua reyes de tlöltecpactle ca insultörojua mosentlölejque para mopeleörusque ca yejuatzi öque biloaya ipa inu caböyo istöc hua ca tiesoltörojua. ²⁰ Hua caseque prieso inu petzoyulcötl ihua inu tlayulepante istlacatque. Yaja inu tlayulepante istlacatque oyeya tli quechihuaya tietzöbeme ixtla petzoyulcötl. Hua ca inu tietzöbeme quencajcayöhuaya nieca giente tli queselejque inu sieñas de inu petzoyulcötl hua queteochijque itesönto. Inu petzoyulcötl hua inu tlayulepante istlacatque innehua quentitlanque san quiene yojyulejtöya ijtec inu locör de tletzintle tli xutla ca azufre. ²¹ Hua tli mocöjqe giente quenmejmectejque yejuatzi öque yehualutaya ipa caböyo. Quenmejmectejque ca tieespöda tli quisaya de ijtec tiecamac. Hua inu yulcöme tli pajpatlöne ixbeque de innacayo de inu giente.

20

Opanuque mil xebetl

¹ Sötiepa nequejtac sente öngel que temuya de elfecac ca yöbe de inu tlatecöyöbelespa bejcatla. Hua quepeaya ipa imö sente cariena bieye. ² Hua ocasec inu dragón, yaja inu öque moniexte desde antigua quieme cuhuötl, öque quepea inumbres Diöblo (quejtusneque Tlatieyelfiöne) hua Satanás. Hua inu öngel quejilpe. Hua ilpetaya por mil años. ³ Hua quetitla ijtec tlatecöyöbelespa, hua oquetzajtzac, hua quesejöro inu pobielta,

para ma ayecmo quencajcayöhua naciones de tlöltecpactle hasta ma pano inu mil xebetl. Sötiepa de inu mil años conbenierebe ma quecäjcöhuacö por quiesque tiempo.

⁴ Entunses nequejtac tronos, hua niecate tli ipa motlöliöya quepejpeaya beletelestle para tlajuscörusque. Nuyejque nequemejtac inölmas de niecate tli quenquechtejque ipampa tlatestificörojque de Jesús hua ipampa quepujque tietlajtultzi Deus, hua niecate tli amo queteochijque inu petzoyulcötl nimpör itesönto hua amo queselejque inu sieñas ipa inmixcuöte nimpör ipa inmö. Hua ini nöncate oyojyulejque, hua tlacubernörojque tieca Cristo por mil años. ⁵ Yaja ini nönca primero yulebelestle, ipampa noche ocseque mimejque amo oyojyulejque hasta sötiepa de que otlá inu mil años. ⁶ Yectec ica, hua cuale icnupel öque yulebe pa inu primero yulebelestle. Inu ca ujpá mequelestle abele tli quenchebelis ini nöncate, cache yejua yesque teopexcöztetzi de Deus hua de Cristo. Hua tlacubernörusque ca yejuatzi por inu mil años.

Quetitlanque Satanás ijtec tletzintle

⁷ Cuöc ye opanuque inu mil años, quecäjcöhuasque inu Satanás de icörsel. ⁸ Hua quisas para quencajcayöhuas naciones ipa noche tlöltecpactle. Quencajcayöhuas *Gog hua Magog, hua quensentlölis noche ingiente para guerra. Hua intlapoal de yejua iyés meyactie quieme xöle itlac lamör. ⁹ Hua yejua tlejcuque por noche tlöltecpactle hasta quetzajque inu campamiento cöne oyeya inu ejército de yectequé, hua inu ciudad tli Deus quetlasojtlalo. Pero otemuc tletzintle de elfecac hua quenxutlalte. ¹⁰ Hua inu Diöblo tli quencajcayöhuaya quetitlanque ijtec inu locör de tletzintle ca azufre. Ompa ye cate inu petzoyulcötl hua inu tlayulepante istlacatque. Hua yejua quepeasque meyac tiecoco hua tietunie yohualen tunale nochepa semejcac.

Quenjuscörojque gente ixtla sente bieye trono istöc

¹¹ Entunses nequejtac sente bieye trono istöc, hua öque ipa yehualutaya. Tieixtla yejuatzi, tlöltecpactle hua mextle opojpolejque complietamente, hua amo oyeya locör para yejua. ¹² Hua nequemejtac mimejque bejfeye hua tzequetzetzi ijicataya ixtla inu trono. Hua motlapojque ömame. Hua nuyejque omotlapo ocsente ömatl, que yaja inu lista de öque quepeas nemelestle. Hua Deus quenjuscörojque mimejque san quiene ca tli oquechijque, según lo que tli tlajcuelulyeya ipa ömame. ¹³ Lamör quentiemacac mimejque tli omejmejque ijtec, hua inu mequelestle hua meclöncale quentiemacaque inu mimejque tli yejua quepejpeaya. Hua innochie oquenjuscörojque según lo que tli oquechijque. ¹⁴ Nima inu mequelestle hua inu meclöncale quetitlanque ijtec inu locör de tletzintle. Inu nieca locör de tletzintle, yaja inu ca ujpá mequelestle. ¹⁵ Hua tlö canajyeca inumbre amo tlajcuelulpa oyeya ipa inu lista de öque quepeas nemelestle, quetitlanque ijtec inu locör de tletzintle.

21

Elfecac yancuec hua yancuec tlöltecpactle

¹ Entunses nequejtac elfecac yancuec, hua yancuec tlöltecpactle. Pos inu primero elfecac hua primero tlöltecpactle ye opojpolejque, hua ayecmo oyeya lamör. ² Hua nequejtac inu ciudad yectec, inu yancuec Jerusalén. Hualtemuya desde elfecac desde Deus. Moyecchejchi quieme sente sisehuantu para tli iyés inömec. ³ Hua onejccac sente tlajtule checöhuac tli quisaya de ijtec trono. Quejtoöya.

—Xequajtacö. Deus chöntihua intzölö gente. Hua chöntihuas ca yejua, hua yejua yesque de tiepuieblo, hua yejuatzi Deus iloas ca yejua. Hua yejuatzi iloas inDeus de yejua. ⁴ Hua yejuatzi quenmixöyupojpoasque, hua ayecmo uyes mequelestle, nimpör yulcocollestle, nimpör ayecmo chojchucasque, nimpör ayecmo uyes tiecoco, ipampa lo que tli antes oyeya, ye otlá.

* **20:8** Xomojtelicö Ezequiel 38-39.

⁵ Hua yejuatzi öque yehualuteca ipan trono oquejtojqque:

—Xequejtacö. Naja necyancuelea noche söstantle.

Nuyejqque niechelfejque:

—Xequejcuelo ini nöncate tlajtulte, ipampa cate melöhuac hua de confiönsa.

⁶ Hua niechelfejque:

—Ye ica. Naja miero necaca *neAlfa hua neOmega; naja necpiehualte, hua naja nectlamea. Öque ömecteca naja necötliltis de inu ömieyale cöne quisa inu ötzintle tli quetiema nemelestle, hua amo tli costörebés. ⁷ Öque seme mopeleöroa ca noche söstantle tli amo cuale hua tlaxexicoa, yaja mohuöxcatis de noche ini nöncas söstantle. Hua naja neyes neiDeus, hua yaja iyés noconie. ⁸ Pero innochie tli amo mopeleörojque ipampa momajtejque, hua niecate tli amo moneltocaque, hua niecate tli quechijque lo que tli amo cuale hua tli tietlajyeltec, hua niecate tli tlajtlamectejque, hua niecate tli mopöctejque ca ocseque sohuame tli amo insohua, hua chichichte, hua niecate tli quenteochijque ixniehualojme, hua innochie istlaceneme, noche niecate giente quentocöroa yesque ompa ijtec inu locör tli xutla ca tletzintle hua azufre, que yaja inu ca uja mequelestle.

Xohuö oquejtac inu yancuec ciudad de Jerusalén

⁹ Entunses ohuöla sente de inu checume öngeles tli quepejpeaya inu checume cupas tli quepeaya inu checume últimas plögas. Niechonnunutz hua niechelfe:

—Xehuöla, hua temetzejtetis öque iyés tiesohua de yejuatzi Calnielo.

¹⁰ Entunses niechbicac ipa sente tepietl lalebes bieye hua bejcapa, hua tieEspíritu de Deus niechejtetejqque. Hua inu öngel niechejtetejqque inu ciudad yectec de Jerusalén que hualtemuya de elfecac desde cöne Deus iloac. ¹¹ Quepeaya tietlaniexteles de Deus, hua tlaniextiöya quieme pejpetylaca teme tli pateyojqque lalebes hua cualtzetzi, quieme inu tietetu itucö jaspe, tli tlaniextea quiename teitztle. ¹² Hua inu ciudad tepöntzactaya ca sente tepöntle bieye hua bejcapa. Hua quepeaya majtlactle huan ume pobieltajte lalebes bejfeye hua pajpatlöjqque. Pa inu pobieltajte oyejyeya majtlactle huan ume öngeles, hua majtlactle huan ume números tlajcuelulyejyeya ipa inu pobieltajte. Inu números oyejyeya in números de inu majtlactle huan ume grupos noso tribus de ipelhua Israel. ¹³ Oyejyeya yete pobieltajte ca ilöro ca cöne quisa tunale, hua oc yete ca ilöro norte, hua oc yete ca ilöro sur, hua oc yete ca ilöro ca cöne calaque tunale. ¹⁴ Hua inu tepöntle de inu ciudad quepeaya icimiento de majtlactle huan ume teme, hua ipa inu teme tlajcuelulyejyeya in números de inu majtlactle huan ume llateotitlanme tli quantitlanque yejuatzi Calnielo.

¹⁵ Hua inu öngel tli niechnunutzaya quepeaya sente mietro de oro. Ca inu mietro cuale quetemachihuas inu ciudad, hua ipobieltajua, hua itepö. ¹⁶ Hua inu ciudad oyeya cuadröda; quiene oyeya ca beyac ejqueu oyeya ca patlöhuac. Entunses inu öngel quetemachi inu ciudad ca imietro, hua quemarcöro *ume mil ca umecientos kilómetros de ca tla beyac; hua quiene oyeya de ca beyac, ejqueu oyeya ca patlöhuac hua nuyejqque ca bejcapa. ¹⁷ Entunses quetemachi itepö, hua inu tepöntle oyeya de *sesenta y cuatro mietros según inu mietro de tlöca tli cusöroöya inu öngel. ¹⁸ Inu tepöntle ochejchijtaya de teme de jaspe, hua noche inu ciudad ochejchijtaya de nochaja oro tli nieseya quieme teitztle chepöhuac. ¹⁹ Inu teme de cimientos de inu tepöntle de inu ciudad oyejyeya tlayecchejchijme ca meyactie teme pateyojqque hua cualtzetzi. Inu primero tietetu oyeya de jaspe, hua inu segundo de zafiro, inu tercero de ágata, inu nöbe de esmeralda, ²⁰ inu möcuile de ónice, inu checuasie de cornalina, inu checume de crisólito, inu checuieye de berilo, inu checnöbe de topacio, inu majtlactle de crisoprasa,

* **21:6** Xomojtelicö 1.8. * **21:16** Literalmente quejtoa: “doce mil stadia”. Sente “stadion” ica quieme 192 mietros.

* **21:17** Literalmente quejtoa: “144 codos”. Sente “codo” amo ase tlajco mietro.

inu majtlactle huansie de jacinto, hua inu majtlactle huan ume de amatista. ²¹ Hua inu majtlactle huan ume pobieltajte cate majtlactle huan ume perlas; cōra sente pobielta chejchijteca de sa sente perla. Hua inu cayaju de inu ciudad chejchijteca de nochaja oro quieme tiescatl tlaniese.

²² Hua amo nequejtac teopantle ipa inu ciudad, pos yejuatzi Tlōcatzintle Deus, öque quepealo noche checōhuallestle, hua yejuatzi Calnielo, ijiloac ompa hua por inu amo monesesitōroa teopantle. ²³ Hua inu ciudad amo quenesesitōroa ma uye tunale nimpor mietztle, pos tietlaniexteles de Deus tlanixtea ompa, hua yejuatzi Calnielo iloac tlōbile de inu ciudad. ²⁴ Hua gientes de noche naciones nejnemesque ijtec inu tlōbile tli nises desde inu ciudad. Hua reyes de tlōltecpactle quehualequelisque noche tli cuale quepea yejua hua quetlōlisque ijtec inu ciudad. ²⁵ Hua ipobieltajua de inu ciudad ayec motzacuasque ca tunale, hua amo oyes yohuale ompa. ²⁶ Hua quebiquelisque ca ipa inu ciudad noche checōhuallestle hua noche tlin cuale quepejpea naciones. ²⁷ Pero ayec calaques niontle petzotec nimpor nionōque tli quechihua lo que tlin amo cuale hua tietlajyeltec, nimpor nionōque tli istlacate. Solamente calaquesque niecate tli quepejpea innumbres ipa inu lista tli quepealo yejuatzi Calnielo, cōne tlajcuelulpancate öquemēju quepeasque nemelestle.

22

¹ Hua inu öngel niechejtete meyac ötzintle, hua inu ötzintle quetiemaca nemelestle. Oyeya chepōhuac quieme tiescatl. Quisaya de tieintronos de Deus hua de yejuatzi Calnielo, hua panuya inepantla de inu cayaju de inu ciudad. ² Hua ca ujcō löro de inu ötzintle oyejyeya cuajme tli quetiemaca nemelestle. Hua inu cuajme quetiemaca ifruta majtlactle huan ume veces cara xebetl. Quetiemaca ifruta sajpa por cōra mietztle. Hua ixejyo de inu cuajme serbirebe para moscalisque gigante de noche naciones. ³ Hua ipa inu ciudad amo oyes niontle tli motlabejbicaltea. Hua tieintronos de Deus hua de yejuatzi Calnielo iyes ijtec inu ciudad, hua tietlatequepanojua tieteochihuasque. ⁴ Tieijtasque tiexōyac, hua quebicasque tienumbre ipa inmixcuōte. ⁵ Ompa ayecmo oyes tlayohuaquelestle, hua tli chajchöntisque ompa amo quenesesitōrusque tlōbile de pexica nimpor tlōbile de tunale, ipampa yejuatzi Deus tlanixtilus impa. Hua yejua tlagobnōrusque nochepa.

Isejco hualiloas Jesús

⁶ Entunses niechelfe:

—Nōncate tlajtulte cate melōhuac hua de confiōnsa, hua Tlōcatzintle Deus, öque quetiemacaloōya tiemensōje ca tlayulepantejque, yejuatzi miero quetitlanque tieöngel para ma quemacheste ca tietlatequepanojua lo que tli isejco pasōrebes.

⁷ —Hua ¡xequejta! Isejco nehuölös. Cuale icnupel öque queneltoca nōncate tlajtulte de tlayulepantelestle tli cate pa nōnca ömatl.

⁸ Naja neXohuö öque onejcac hua nequejtac nōnca sōsantle. Hua cuöc ye onejcac hua nequejtac, onotlancuöquetz icxetla inu öngel tli niechejtete nōnca sōsantle. Ye miero nechteochihuasquea. ⁹ Pero niechelfe:

—Amo xecchihua inu, pos naja nuyejque sa necaca netietlatequepano de Deus, ejqueu quieme taja hua mocnihua tlayulepantejque, hua innochie tli queneltoca nōncate tlajtulme tli tlajcuelulpancate ipa nōnca ömatl. Sa xetieteochihua Deus.

¹⁰ Nuyejque niechelfe:

—Amo xecpea sa taja nōncate tlajtulte de tlayulepantelestle tli tequejcuelojteca pa ini nōnca ömatl, porque ye aseteca tunale. ¹¹ Niecaju tli amo cuale quechihua, ma quesequiro, hua niecaju tli mopetzoneloa, ma mopetzonelajta. Pero niecaju tli cuale quechihua, ma quechijta cuale, hua niecaju tli yectec ica para ca Deus ma quesequiro ejqueu.

¹² —Xequejta. Isejco nehuölös, hua nejcualecas tlaxtlöbible, para nectlaxtlöbis cöra sente tlöcatl según lo que tli oquechi. ¹³ Naja *neAlfa hua neOmega. Naja nePrimero hua neÚltimo. Naja nePiejyo, hua naja neTlamejyo.

¹⁴ 'Cuale inmicnupel tli quepöca intzotzoma para quepeasque deriecho de caprovechöorusque de inu cuabetl tli quetiema nemelestle, hua para quepeasque deriecho de panusque por inu pobieltajte para calaquesque ijtec inu ciudad. ¹⁵ Pero ca queyöhuac mocöhuasque niecate tlöca tli sie tiro mölojteque hua niecate tli mopajpöctejque ca ocseque sohuame tli amo insohua, hua niecate tli tlajtlamectejque, hua niecate tli quenteochijque ixniehualojme, hua innochie tli quecualejta hua quechihua lo que tlin amo melöhuac.

¹⁶ 'Naja neJesús nectitla noöngel para ma nemiectestificörfe ini nönca söstantle para nemejua de inu grupos de creyentes. Naja neca neiConie de rey David. Naja neca inu sitlale tli tzotlöne ca ise cualcö.

¹⁷ Hua tieEspíritu de Deus quejtulo:

—Xehuöla.

Hua nuyejque ejqueu quejtoa yaja tli iyies tiesohua Calnielo. Hua öque tlacacteca, ma quejto:

—Xehuöla.

Hua tlö canajyeca ömeque hua queneque queselis de inu ötzintle tli quetiema nemelestle, ma huöla, hua queselis sin que amo tli quetlaxtlöhuas.

¹⁸ Nemonochtie tli nenquecaque ini nöncate tlajtulte de tlayulepantelestle tli tlajcuelulpancate ipa nönca ömatl, naja nemiectantesipöroa ini nönca: que tlö canajyeca quetlölea ocseque tlajtulte que lo que tli cate, Deus quemacasque noche inu plögas tli tlajcuelulpancate ipa nönca ömatl. ¹⁹ Hua tlö canajyeca quequextelea tlajtulte de ini nöncate tlajtulte de Deus tli tlajcuelulpancate ipa nönca ömatl, Deus quecuejcuelisque ideriecho de caprovechöorus de inu cuabetl tli quetiema nemelestle, hua ideriecho de calaques ijtec inu ciudad yectec. De inu ciudad hua de inu cuabetl tlajtoa nönca ömatl.

²⁰ Yejuatzi öque quetesticörojque nönca söstantle quejtulo:

—De melöhuac isejco nehuölös.

Amén, ma ejqueu iye. Xehualmobica, Tlöcatzintle Jesús.

²¹ Tiefavur Tlöcatzintle Jesús ma iye ca nemonochtie.

* **22:13** Xomojtelicö 1.8.